


SC. SUP. 23. PL. 5.



X BIBLIOTHECA  
JOSEPHI GARAMPII







ex Libris petri francisci  
van. lib. broing pastoris in  
Wenelghem.

R. E. F. VINCENTII  
**CONTENSON,**  
ORDINIS PRÆDicatorum  
Sacrae Theologiae Professoris;  
**THEOLOGIA MENTIS  
ET CORDIS:**

**S E V**

Speculatio universæ Sacrae Doctrinae,  
pietate temperata; è Patribus, Doctore  
potissimum Angelico derivata.

**T O M U S III.**

*In quo præmissâ dissertatione præambulâ de locis  
theologicis, de Deo ultimo fine hominis, & pri-  
mâ regulâ vitæ humana agitur: ubi etiam ali-  
qua de Probabilismo.*

Lucere vanum, ardere parum: lucere & ardere  
perfectum. Bern. serm. de nat. Ioan. Bapt.



**LUGDUNI,**  
Sumpt. LAUR. ARNAUD, PETRI BORDE,  
JOANNIS, & PETRI ARNAUD.

---

M. D C. L X X X I.  
Cum Approbat. & Privilegio Regis.

THE NEW ENGLAND  
CONGREGATIONAL  
THEOLOGICAL SEMINARY

AND  
THEOLOGICAL LIBRARY

ET  
C  
O  
R  
D  
I  
S

2 2 8

THEOLOGICAL SEMINARY

AND THEOLOGICAL LIBRARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY

THEOLOGICAL SEMINARY



# INDEX

## DISSERTATIONVM,

Capitum, Speculationum, &  
Reflexionum, quas Tomuster-  
tius Theologiæ Mentis & Cor-  
dis comprehendit.

## LIBER QVINTVS.


De Deo ultimo fine.

*Præloquium.* pag. 1

## DISSERTATIO I.

### PRÆAMBULA.

*Commendatio locorum theologicorum, seu  
de puris Ethicæ Christianæ fontibus. p. 6*

CAP. I.  ACRARVM Scripturarum, &  
Apostolicarum traditionum,  
necnon Ecclesiæ Catholicæ autoritas. 8



# *Index Dissertationum,*

**SPECVL. I.** Sacra Scriptura, ejusque editio  
vulgata est infallibilis authoritatis. 9

**Præoccupantur objectiones.** 15

**Duplex corollasium momentosum.** 18

**REFLEXIO.** 26

**SPECVL. II.** Perennis Apostolicarum traditio-  
num usus omnino admittendus est, non se-  
cus ac divina vocis oracula de aure in aurem  
pervenientia. 29

**Solvuntur objectiones.** 34

**REFLEXIO & apostrophe ad Novatores.** 38

**SPECVL. III.** Conspirans etiam totius Ecclesiæ  
Catholicæ sensus invictum præbet infallibilis  
firmitatis argumentum. 42

**REFLEXIO.** 50

**CAPVT II.** De Conciliorum & Romani Pon-  
tificis authoritate, necnon de aliorum quin-  
que lacorum vi. 54

**SPECVL. I.** Concilium in Spiritu sancto con-  
gregatum in Fide errare non potest; subin-  
deque ejus definitiones firmissimæ sunt au-  
thoritatis. ibid.

**REFLEXIO & apostrophe ad hæreticos.** 59

**SPECVL. II.** Summi Pontificis, Romani scilicet  
Episcopi in universam Ecclesiam Prima-  
tus ostenditur. Romana Sedes ex institutione  
divina centrum est catholicæ unitatis, & veræ  
Religionis. 63

**Nonnullis permagni momenti documentis a va-  
riæ præoccupantur quæstiones & objectio-  
nes.** 85

**Romanæ Sedis Primatus Regum monarchiæ &  
supremo dominio egregie faver.** 63

**Momentosa de Ecclesiasticis judiciis confecta-  
ria derivantur.** 99

*Corolla*

## Capitulum & Speculationum.

Corollarium I. De quaestionibus juris. ibid.

Corollarium II. Ecclesiae de quaestionibus facti  
judicia magnâ quidem cum reverentiâ exci-  
pienda sunt; at errori absolutè obnoxia sunt  
tamen. 105

Corollarium pars altera exponitur & demonstra-  
tur; atque concordî Theologorum assensu  
confirmatur. 110

Rationes hujus secundæ partis. 115

Nonnullæ occupantur objectiones. 124

REFLEXIO & apostrophe ad inimicos S. Se-  
dis. 130

SPECVL. III. Quinque locorum probabilium  
vis expenditur. 135

REFLEXIO. 145

---

## DISSERTATIO II.

*De ultimo fine & beatitudine objectiva  
hominis.* 145

CAPVT. I. **I**llicia ultimi finis; seu de de-  
pendentia actionum  
rum ab ultimo fine. 146

SPECVL. I. Proprium est solius creaturæ ra-  
tionalis agere propter finem. 147

REFLEXIO. 152

SPECVL. II. Impossibile est voluntatem in-  
tendere simul plures fines ultimos totales  
adæquatos. 154

REFLEXIO. 161

SPECVL. III. Quidquid homo deliberatè vult;  
illud appetit propter ultimum finem. 162

## *Index Dissertationum,*

REFLEXIO.	169
CAPVT II. De beatitudine objectiva.	170
SPECVL. I. Bona quævis creata occupare possunt cor humanum; fatiare; vel beare non possunt.	171
REFLEXIO.	175
SPECVL. II. Creatura rationalis in proprio sinu & fundo felicitatem invenire non potest, vel in scientiis intellectus, vel in virtutibus voluntatis.	176
REFLEXIO.	179
SPECVL. III. Animam rationalem solus Deus unus & trinus implere & beare potest.	181
REFLEXIO.	189

---

## DISSERTATIO III.

### *De essentia & proprietatibus formalis beatitudinis.*

CAPVT I. IN quo actu consistat formalis beatitudo; tum Patriæ, tum Vlx.	194
SPECVL. I. Hæc est plena & formalis beatitudo hominis, videre faciem Dei sui.	195
Solvuntur objectiones.	201
REFLEXIO.	211
SPECVL. II. Beatitudo supernaturalis viæ in amore Dei sita est.	212
REFLEXIO.	221
SPECVL. III. Beatitudo Christiana in tribulatione & cruce potissimum percipitur.	224
REFLEXIO.	233
CAPVT.	



*Capitulum, & Speculationum.*

CAPVT II. Prærogativæ & proprietates beatitudinis. 235

SPECVL. I. Perpetuitas est per se & ab intrinseco annexa beatitudini. 237

REFLEXIO. 244

SPECVL. II. Beatitudinem formalem essentialiter comitatur felix amandi Dei necessitas. 247

REFLEXIO. 258

SPECVL. III. Impeccabilitas necessarium est futuræ vitæ consuetarium : & visioni Dei repugnat essentialiter quodvis peccatum. 260

REFLEXIO. 269



LIBER SEXTVS.

De Deo prima regula vitæ humanæ.

*Præloquium.* p: 271

---

DISSERTATIO I.

CAPVT I. **R**epresentatur œconomia mirabilis actuum humanæ voluntatis in esse physico. 279

SPECVL. I. Omnes deitates ex ejus definitione liquidò derivantur. 281

*Corollarium I.* Duplex est voluntarium, aliud perfectum, aliud imperfectum. 283

*Index Dissertationum,*

<i>Corollarium II.</i> Amor beatificus est perfectè voluntarius.	284
<i>Corollarium III.</i> Ratio voluntarii non convenit univocè hominibus & brutis ; sed tantùm analogicè.	286
<i>Corollarium IV.</i> Remoto omni actu voluntatis, omissio non potest esse voluntaria, etiam advertente ratione, & urgente præcepto.	287
<i>Corollarium V.</i> Ut omissio sit indirectè voluntaria, non solùm physicè, sed etiam moraliter, non requiritur præceptum.	291
<i>Corollarium VI.</i> Effectus tamen omissionem voluntariam consequens indirectè, vel concomitans, nullatenus est voluntarius, si non sit præceptum, vel obligatio impediendi illum effectum.	297
<i>Corollarium VII.</i> Quatuor sunt causæ involuntarii, violentia, metus, concupiscentia, & ignorantia : aliter tamen, & aliter.	300
<i>Corollarium VIII.</i> Voluntas non potest cogi in productione actuum elicitorum.	304
<i>Corollarium IX.</i> Voluntas potest cogi in actibus imperatis aliarum facultatum.	ibid.
<i>Corollarium X.</i> Ea quæ fiunt ex solo metu, sunt voluntaria simpliciter, & involuntaria secundùm quid.	306
<i>Corollarium XI.</i> In homine agente ex solo metu concurrent quatuor actus.	307
REFLEXIO.	316
SPECVL. II. Actuum humanorum pictura, & harmonia describitur.	318
Cognitio finis.	ibid.
Simplex volitio finis.	319
Intentio finis.	321
Consilium de mediis.	324
	Consensus

*Capitulum, & Speculationum,*

Consensus approbans media.	327
Electio mediorum.	330
REFLEXIO.	334

SPECVL. III. Prosequutio ejusdem materici,  
& eorum qui supersunt actuum explicatio.

341

Imperium intinans executionem. *ibid.*

Ulus & exequutio voluntatis. 347

Assequutio finis, seu fruitio. 349

REFLEXIO. 353

CAPVT II. De moralitate actuum humanorum, & de prima ejus specie, scilicet indifferentia. 356

SPECVL. I. Moralitas superaddit actui libero  
subjectionem ejus ad regulas morum. 358

REFLEXIO. 363

SPECVL. II. Indifferentia est vera species actus  
moralis. 365

REFLEXIO. 371

SPECVL. III. Omnis actus deliberatus, quan-

tumvis ex objecto indifferens, in individuo

semper vel bonus, vel malus est ex fine, vel

circumstantiis. 374

REFLEXIO. 389

---

DISSERTATIO II.

*De bonitate & malitia actus moralis.* 393

CAPVT I. **D**E principiis & regulis bonita-  
tis moralis. 4

SPECVL. I. Tria sunt principia bonitatis, ob-  
jectum, circumstantiæ, & finis: unde multi-  
plex in actum honestas derivatur. 395

Corollaria.

## *Index Dissertationum,*

Corollaria quæ observentur dignissima.	409
REFLEXIO.	422
SPECVL. II. Actus exterior nullam intrinsecam bonitatem actui interiori fundero & efficaci superaddit. Commendatio vitæ interioris.	427
REFLEXIO.	439
SPECVL. III. Triplex est regula bonæ operationis, lex æterna, ratio, & divina voluntas cognita vel per præceptum, vel per inspirationem.	440
REFLEXIO.	452
CAPVT II. De malitia actus moralis.	460
SPECVL. I. Sententia affirmans constitutivum formale mali moralis esse quid positivum, proponitur, & iudicio Lectoris permittitur.	463
REFLEXIO.	472
SPECVL. II. Formale malitiæ actus moralis, seu peccati essentialiter in privatione debitæ rectitudinis consistit.	476
Confutantur positivè objectiones.	490
REFLEXIO.	507
SPECVL. III. Idem actus moralis respectu diversorum bonus simul & malus esse potest; & sæpè sunt mala mixta bonis, sunt bona mixta malis.	513
REFLEXIO.	538

## DISSERTATIO III.

*De novello probabilitatis commento.* 542

CAPVT I. **N**ovitium probabilitatis commentum petitis ab auctoritate argumentis evertitur.

544  
SPECVL.

## Capitulum, & Speculationum,

SPECVL. I. Definitio, divisio, & obligatio  
conscientiæ præmittuntur. 548

Quæres primò, quid sit conscientia? 549

Quæres secundò, quotuplex sit conscientia?  
554

Quæres tertio, an & quomodo conscientia erro-  
ronea liget, vel excuset? 555

Quæres quartò, quænam, & cujus rei igno-  
rantia excuset vel accuset voluntatem, juxta  
conscientiæ errantis dictamen operantem?  
558

Quæres quintò, an requiratur semper prævium  
conscientiæ dictamen de malitia operis, ut  
contra jus naturale liberè facta sint peccata:  
& an dari possit ignorantia invincibilis ejus-  
modi juris? 573

Peccata sæpe quidem, sed non semper præcedit  
malitiæ cogitatio. 608

REFLEXIO. 634

SPECVL. II. Probabilismum, seu sententiam  
reverà falsam & æternæ legi adversam, non  
esse tutam agendi regulam, præsertim in  
concurſu probabilioris, omni genere autho-  
ritatum suadet. 638

REFLEXIO, & apostrophe ad Probabilistas.  
C.

SPECVL. III. Proſequutio ejusdem materiei ab  
authoritate Summorum Pontificum ac Con-  
ciliorum, & ab Ecclesiæ Catholicæ conspi-  
ratione. 661

REFLEXIO & apostrophe ad Probabilistas.  
689

CAPUT II. Sancti Thomæ inconcuſſâ autho-  
ritate Theologorum suffragiis, & omnige-  
narum rationum momentis Probabilismus  
evertitur.

# Index Dissertationum, &c.

evertitur.	698
SPECVL. I. Sancti Thomæ testimoniis lucē clarioribus Probabilismus exploditur: communis veterum Theologorum sensus proponitur.	700
Solidæ Thomistarum vindiciæ.	718
REFLEXIO & apostrophe ad Semi-Thomistas.	755
SPECVL. II. Omni rationum genere; tum à priori; tum à posteriori Probabilismus evertitur.	763
Ratio à posteriori.	774
Confutantur responsiones Probabilistarum, & seorsim D. Georgii.	792
Solvuntur objectiones Patris Rhodii.	819
REFLEXIO & monita ad Confessarios.	840
SPECVL. III. Varia scrupulosius remedia parantur.	848
REFLEXIO.	862



## LIBER QUINTVS.

### De Deo ultimo fine.

#### *PRÆLOQVIUM.*

**S**I ad locum unde exeunt flumina revertuntur ; si rebus omnibus insitus est centri amor , ad Deum tendat creatura rationalis necesse est , ut postquam ab eo primo principio egressa est , in ipso ultimo fine conquiescat. Hic est unicus Christianæ disciplinæ , quam aggredimur , scopus ; quæ ideo tota quantæ est , in actibus humanis dirigendis versatur , ut ad finem humanæ vitæ , Deum scilicet charitate dilectum , & visione beata tandem possidendum , indigitatis ab ipsomet semitis tutissimè & juxtâ felicissimè manuducat.

Hinc ultrò sese offert Ethicæ , Religionisque Christianæ supra alias sectas dignitas & eminentia ; istæ enim intra hominem sistentes , solius naturalis rationis innumeris obnoxiaë erroribus , præeunte lumine regebantur : & quia terminum ignorabant , sæpius cespitabant in viâ , doctrinisque variis & peregrinis abducebantur : quia sicut in eodem prato bos herbam quærit , canis leporem , ciconia lacertum ; sic ex am-



plissimo scientiarum campo suis quique privatis præjudiciis, & studiorum affectibus aptas opinionationes colligebant Philosophi, & in diversas ibant sententias, non vero, sed tantum fucato colore vestitas; nam teste Tertull. lib. 2. de nat. *Varietas opinionum venit ex ignorantia veritatis.* At verò Religio Christiana lumine fidei illustrata, ab ipsa veritate edocta, ejusque cœlestis doctrinæ pabulo nutrita offusam menti humanæ caliginem dissipat, affectus purgat, Philosophorum offutias discutit, quia ex firmo & immoto veri finis intuitu de humanæ vitæ officiis, eorumque ramis & consectariis disserit, summam & æternam legem puro cernit obtutu, atque ad præceptum Domini lucidum illuminans oculos hominum componit actus.

Verum quanvis finis ille nobis omnibus sui indiderit appetitum, quia nos fecit Dominus ad se, & inquietum est cor nostrum, donec in ipso requiescat; quanvis etiam finis illius micantissima veritas & justitia per se sit evidens, & in ea tenebras comminisci, sit tenebras in Sole cogitare; Deus enim, ut ait Joannes, lux est, & tenebræ in eo non sunt ullæ: nihilominus veritatis circa morum potissimè præcepta dignoscendæ difficultas innata, & per peccatum immensum aucta tanta est, ut in multarum rerum per se verissimarum notitia caliget; tam obliquata ratio, ut in contrarium errorem nonnunquam abeat; tam infirma, ut ex veritatis intuitu nullam in agendo firmitatem, sed opinandi instabilitatem hauriat; tam offuscata concupiscentiæ nebulis, ut nullum fermè sit Christianæ Ethicæ caput, quod non fuerit in dubium vocatum, vel contrarii erroris turpi approbatione turpissimè reprobatum. Quid



ergo inter tot superstites ex primi peccati labe tenebras opus est facto, ne malum bonum, & bonum malum dicentes, à Propheta maledicamur: Finis ultimus verus præ oculis semper habendus est, quia ut veridicè dixit Augustinus: *Minus novimus quid Deo placeat, quia ipse minus notus est nobis.* A quo si tantisper divertamus, sicut nullum est tam dirum nefas, quod non alicubi gentium innoxium habeatur, ita nulla erit tam ridicula de fide sententia, nulla tam laxa de moribus opinio, cui suus non suffragetur patronus.

Sed quia finis ultimi lux plenior aliis quàm aliis concessa, nulli tamen perfectè in hac vita patescit, ideo & tibi, & mihi timendum est, Lector; quid enim ea Veritatis voce terribilius, Matt. 13. *Si cæcus cæco ducatum præsiet, ambo in foveam cadunt:* vel illa Isaïæ 10. maledictione: *Va qui conduunt leges iniquas, & scribentes injustitiam scripserunt.* Si enim (quod absit) æternæ veritati, aut vero fini aliquid scribam adversum similitudine veritatis indutum, & aliis laqueum, & mihi ruinam parabo incautus; quia pejus est malam legem condere, aut benè conditam depravare, quàm mala patrare: tunc enim non solum malè agentibus consentit commentator, sed & malè facta corroborat, & ad facienda invitat. Tunc amabit peccator languores suos, & pro sanitate habebit quod agrotare se nesciat. Nec propterea ille, vel ego excusabimur, quia ut benè dixit Tertull. de spectac. c. 20. *Nusquam, & nunquam excusatur quod Deus damnat; nusquam, & nunquam licet, quod semper, & ubique non licet.*

In aliis scientiis, salva fide, unusquisque abundare in suo sensu facile potest, promptaque venia conceditur luxuriantibus Philosophorum inge-

niis; quia sive aliquid novi dicant, nihil profunt; sive delirant, nihil nocent. At verò in Morali, totius vitæ status disponitur; unde eo majorem diligentiam necesse est adhiberi, quo periculo majori exponimur, si nesciamus, vel negligamus quomodo nos oporteat vivere. In hac scientia nullus debet esse dissidio, nullus errori locus: omnes unum sentire oportet, quia si quid fuerit erratum, vita omnis evertitur. *Nullus hic temeritatis locus*, inquit Lactantius lib. 13. cap. 13. *in æternum stultitia pœna subeunda est, si aut persona inanis, aut opinio falsa deceterit.*

Ut ergo tui, meique lapsus, pie Lector, præcaveamus, antequam de ultimo fine vitæ humanæ in hoc quinto libro, necnon de humanæ vitæ officiis in sequentibus sermonem habeamus, prælibanda est non perfunctoria dissertatio de Locis Theologicis, seu de puris sacrae doctrinæ fontibus, in qua etsi pro rei gravitate satis strictè, tamen ad solidæ doctrinæ jacienda fundamenta satis amplè disputabimus. Absit enim à vero Theologo, absit à discipulo S. Thomæ divinæ voluntatis interpretis, Traditionis, & Patrum omnium echo; absit, inquam, ut doctrinæ Christianæ, id est cœlestis & divinæ principia & normas hauriat ex quorundam modernorum lacunis, in quibus nulla pietas, nulla eruditio, nulla antiquitatis pervestigatio, nulla in evolvendis Patribus diligentia relucet, sed incondita volaticarum opinionum farrago obstreperit. Absit ut momentosissimum salutis negotium, quod est unum necessarium uni Dei gratiæ innixum, eorum prolubiis exponam, qui gemente Alexandro VII. & dolente univ. so Cleri Gallicani conventu, Christianæ disciplinæ leges dissipa-

runt, & Evangelicam vivendi normam ita adulterarunt, ut novitiarum opinionum scientia quavis ignorantia longè sit pejor. Absit ut justitiæ esuriem & sitim, quæ inter beatitudines annumerantur, neglectis Ecclesiæ Catholicæ Doctorum fontibus, turbidis neotericorum fluentis temperaturi impuras cisternas adeamus. Absit demùm, ut in nostris commentariis singulæ de fine, & mediis decisiones recentiorum nominibus, locisque perstreperent, & gravissima Christianismi decreta in illorum autoritate, & ratiuncularum fucò induta fundentur. Potior semper, ut par est, Scripturæ, Traditionis & Patrum erit autoritas; verba eorum universæ nostræ clamabunt paginæ; semper, aut crebrò veneranda Augustini, Gregorii, Aquitanis, aliorumque Sanctorum nomina comparebunt, qui de Christianis institutis tam immaculatè scripserunt. Sed antequam videamus quid doceant, consideremus eos qui docent; primus enim discendi ardor; nobilitas est magistri. Expendamus Scripturæ, Patrum, cæterorumque Theologorum locorum efficaciam, antequam ex eis veritates eruamus. Ex his ordo & œconomia hujus libri claret. D. enim Thomas Ethicè Christianam instituturus, non solum Aristotelem, sed Christum maximè imitatus est. Sicut enim Divinus Legislator Evangelicæ Prædicationis exordium à beatitudine sumpsit: ita Doctor Angelicus ab ultimo fine vero Moralem disciplinam auspicatur, acturus deinde de mediis vel ex natura rei, vel ex Dei arbitrio ad beatitudinem ducentibus. Idque magis ex perpetua nostrarum dissertationum serie liquebit.



# DISSERTATIO

## PRÆAMBULA.

*Commendatio locorum Theologicorum,  
seu de puris Ethica Christiana.  
fontibus.*



ECCEM communiter assignantur loci Theologici, quibus omnium discursuum nervi atque artus firmi, solidique consistunt. De his omnium primus methodicè, nec minus eleganter egit Melchior Canus, vir literis & eruditione præcipuus, moribus & pietate insignis, Pontificalibus etiam infulis conspicuus, & in rebus Theologicis summâ eloquentiâ dicendis nulli sui temporis secundus.

Insignis ille Author integrum & aureum librum de decem locis edidit, quem verè Thesaurum dicam è variis fodinis extractum, in quo nihil non pretiosum, non obrysum, non numeris omnibus absolutum invenitur. Nam secum advehit omnes priscorum hominum divitias, quas magnis aliorum voluminibus diffusas compendiosa utilitate contrahit, non arido stylo, sed verbis sejunctis, loquutione selecta, ornato verborum contextu, & perquàm exquisito rerum apparatu proponit. Patrum & Ecclesiasticæ doctrinæ gemmas non parca manu, sed plena dif-



fundit, & cuncta quæ sunt vel difficiliora dictu, vel sensu grandiora, vel digniora lectu excerptit, & in uno medullato volumine Theologorum usibus profutura transtulit. Hæc præter morem, sed non præter necessitatem dicta sunt in laudem Authoris nostri, quem dilacerare Petrus à Valle-clausa non semel tentavit. Sed quantumvis obganniat inimicus homo, fatebitur quisquis seriò & attentè Canum legerit, vix ullum hactenus librum, aut copiâ ditiorē, aut methodo commodiorem, aut varietate feraciorem, aut oratione cultiorem, vel rerum omnium digestu illustriorem (solis exceptis Ecclesiæ Patribus) post hæminum memoriam prodiisse; quippe in quo eximius elegantiae nitor, sublimis sapientia, & profunda eruditio de palma contendunt.

Itaque Canus locos, seu sedes argumentorum in decem partitus est, & quidem opportunissimè. Primus est sacrarum litterarum autoritas. Secundus, perennis Apostolicarum traditionum usus. Tertius, Universalis & Oecumenici Concilii definitio. Quartus, totius Ecclesiæ Catholice consuetudo, usus, & praxis. Quintus, Summi Pontificis, Romani scilicet Episcopi, in Fidei controversiis decernendis, & Ecclesiæ Christi regenda autoritas. Et hi quinque sunt *infallibilis, & irrefragabilis autoritatis*. Sextus est autoritas alicujus Patris ab Ecclesiâ inter suos Doctores connumerati. Septimus est Theologorum & Canonistarum gravissimorum sententia. Octavus est momentum rationum naturalium, quas advocat Theologia veluti ancillas ad veritates fidei declarandas, confirmandasque. Nonus est assensus Philosophorum rationem ducem sequentium, à quibus veluti ab injustis possesso-

ribus veritas, si quam habent, extorquetur. Decimus est historia humana à scriptoribus omni exceptione maioribus enarrata.

---

## CAPVT I.

*Sacrarum Scripturarum, & Apostolicarum traditionum, necnon Ecclesiae Catholicae auctoritas.*

**A**cturi de limpidis Theologiae fontibus, à sacris litteris sumenda sunt primordia. Religionis enim Christianae puritas, quam in hoc tomo inquirimus, & divinae gratiae omnipotentissima potestas, quam sustinemus, non nostro modulo, sed divino lumine vestigandae sunt, ne vel à vero & summo bono aversi, vel gratiae Christi ingrati reperiamur, atque cum periculo propriae salutis, & Ecclesiae Catholicae injuria aliis venditemus, quod vel superbiam pascat, vel concupiscentiae blandiatur. Hic, vel nullibi omnis sermo noster debet esse sale conditus, ne plus sapiamus quam oportet sapere, sed sapiamus ad sobrietatem. Nullatenus indulgendum est ingeniorum voluptati, sed haec tam divina dogmata divinè, si fieri posset, tractanda forent, id est ex oraculis divinis depromenda, nec ultra procedendo, nec infra manendo. Ad illam incorruptam Divini Verbi amussim exigenda sunt haec praecleara Religionis aedificia, nec plura tentanda, quam Apostolica traditio permittit; ut enim verè & eleganter dixit Hilarius lib. 10. de Trinit.

*Ut sol ita videndus est, ut possit videri, tantisquæ excipiendus lumine est, quantus admittitur, ne si plus velimus expetere, minùs quoque quàm possumus consequamur: ita & ratio cœlestis in tantum intelligenda est, in quantum se permittit intelligi, in tantum expetenda est, in quantum apprehendendam se dedit, ne si contenti indulgentia moderatione non simus, amittamus indulta.*

## SPECVLATIO I.

*Sacra Scriptura, ejusque editio vulgata est infallibilis authoritatis.*

**P**ER Sacram Scripturam intelligimus libros canonicos ab Ecclesia fidelibus propositos, qui communiter dividuntur in legales, historiales, sapientiales, & prophetales. In prima classe Moylis Pentatheucum constituitur: in secunda collocantur libri Josue, Judicum, Ruth, quatuor Regum, duo Paralipomenon, duo Esdræ, unus Tobia, Judith, Esther, Job, duo Machabæorum. Ad tertiam revocantur Psalterium, Proverbia, Cantica, Ecclesiastes, Sapientia, Ecclesiasticus. In quarta reponuntur Iaias, Jeremias, Baruch, Ezechiel, Daniël, & duodecim Prophetæ minores. Simili divisione partiuntur novum Testamentum: nam ad legales quatuor Evangelia, ad historiales Acta Apostolorum, ad sapientiales Pauli, Epistolas aliasquæ canonicas, ad Prophetales Apocalypsim reducunt.

Hos igitur libros admittendos, eorumque oracula omni reverentiâ & fide excipienda definiit sacrum Tridentinum Concilium sess. 4. ubi

post enumeratos utriusque Testamenti libros omnes, sic pronuntiat: *Si quis libros ipsos integros cum omnibus suis partibus, prout in Ecclesia Catholica legi consueverunt, & in veteri vulgata Latina editione habentur, pro sacris & canonicis non susceperit, & traditiones praedictas sciens & prudens contempserit, anathema sit.* Et rationem indicat sapientissima Synodus ibidem, quia illa editio pro authentica habenda est, *qua longo tot saeculorum usu in ipsa Ecclesia probata est.* Certè si Ecclesia Christi, quæ est columna & firmamentum veritatis, tot annorum centuriis hanc editionem, tametsi falsam comprobasset, & tanquam à Spiritu sancto revelatam proposuisset, profectò defuisset Deus Ecclesiae suæ in re tam necessaria; & merito existimare possemus, nihil esse certum in Bibliis, si aliqua falsitas irrepsisset. Natabit profectò, imò infringetur & enervabitur Sacrarum Paginarum veritas, ac Ecclesiae proponentis auctoritas, si semel possit erroris convinci.

Unde non sine speciali divinae providentiae dispensatione semper Scripturarum puritas cum rectitudine fidei connexa est. Quoad enim Judæi fidei firmitatem retinuerunt, tandiu apud eos Scripturarum integritas permansit. Postea fide à Judæis repulsa, & à Gentibus suscepta, Scriptura sacra Græco idiomate, quod erat vulgatissimum, exarata fuit. Græcis autem ab Ecclesiae corpore disjunctis, Latina Ecclesia divinarum litterarum puritatem suâ linguâ habere necesse habuit; alias semper vacillaret Orthodoxorum fides, nec posset firma consistere, nisi vulgata editio tuta sit legentium anchora, lapisque lydius quo possit exortarum controversiarum veritas discreta patescere, & hæreti-



corum petulantia condignâ autoritate revinci.

Quare in fidei ac morum disciplina non licet Catholicis ad Hebræica, vel Græca exemplaria provocare, præsertim quia jam Rabini Christianismi hostes jurati Scripturas, ut eas ad suum sensum traherent, violarunt, truncarunt, depravarunt, multisque supposititiis, adulterinis, & ementitis detractionibus, vel adjectionibus corrumperunt. Id etiam Hæreticis omnibus solenne est, quia ut optimè Tertul. *lib. de præscr. cap. 38.* annotavit: *Quibus fuit propositum aliter docendi, eos necessitas coëgit aliter disponere instrumenta doctrinæ: non potuissent aliter docere, nisi aliter haberent ea, per quæ doceant. Sicut illis non potuisset suæ edere corruptela doctrinæ sine corruptela instrumentorum ejus; ita in nobis, & à nobis integritas doctrinæ non competiisset sine integritate eorum quæ doctrinam tractantur.* Quibus ergo, ut rectè ait Cmo, putas potiùs credendum esse? Num Judæis hostibus Christi? Num hæreticis injuriis Ecclesiæ? Nonne magis Septuaginta Interpretibus? Nonne magis Hieronymo, aliorumque Patrum venerandæ cohorti, virisque Ecclesiasticis, qui omnes inter se concinentes eadem asserere nullo modo possent, nisi uno Divino Spiritu, qui facit concordiam in sublimibus, continerentur? Certè cùm nulla sit veritas tam firma, contra quam aliquid cavillari humana argutia non possit, non debemus propter leves aliquas conjecturas ab Erasmo aliisque novitatum amantibus, & quæque carpendi libidine actis collectas, à trita Doctorem via recedere. Tutiùs enim antiquis Conciliis, tutiùs Pontificibus & Patribus, tutiùs Ecclesiæ mori nos committimus, quàm novitiis veritatis perturbatoribus,

in quos rectè quadrat illud ab August. *lib. de bon. persever. cap. 11.* dictum : *Scripturas sic accipiant, ut suo quodam privilegio, imò sacrilegio, quod volunt, sumant; quod nolunt, rejiciant.*

Accedit quod si semper recurrendum esset ad Hebræicos, vel Græcos fontes, mira & confusa esset diversitas sententiarum, pro diverso modo explicandi Interpretum, qui omninò varius est, ut videre est in Aquila, Theodotione, Symmacho, Xante Pagnino, Vatablo, Oleastro, Cajetano, Malvenda. Sed id maximè claret in hæreticorum commentariis, qui non modò ab aliis dissident, sed à seipsis sæpiùs discrepant, dum suas editiones adornant. Unde inquit bellissimè Cano, *non tam ex fontibus sacras litteras vertunt, quàm circa fontes ipsi vertuntur.*

Certè nisi inconcussa maneat vulgatæ editionis firmitas, in tanta expositionum varietate induceretur discordia fidelibus omnibus formidanda. Quomodo enim unitas subsistet Ecclesiæ, si pereat unitas Scripturarum versionum, vel potius inversionum varietate? Nam, ut rectè ait Hieron. epist. ad Damasc. *Non est verum, quod variat.* Fateor quidem in primis Ecclesiæ cunis Patres ad Hebræica, Græcave exemplaria frequentem habuisse recursum, quia tunc erat magna Latinorum codicum discrepantia, quæ ut conciliaretur, consulendi erant primitivarum linguarum codices, tunc puri & limpidi, nec hæreticorum, curiosorumque novitatibus turbidi. Jam verò in vulgata lectione Ecclesia tota sine dissensione consentit; Ecclesia, inquam, civitas illa Dei, quam fluminis impetus lætificat, quæque filios suos à sexcentis supra mille annis hujus editionis aquis perenniter potavit.

Ex quo fit, omnes apices, syllabas, & particulas Sacrosancti librorum canonicorum voluminis Spiritu sancto affante scriptas esse. Aliàs si minimus error obreperet, posset de totius libri volumine dubitari, sicque tota Scripturarum labefacteretur autoritas, subindeque totius Christianismi fundamentum firmissimum convelletur. Unde negare partem, librum, caput, verbum, vocem, syllabam, apicem Scripturæ, est negare totam; quia si alicubi deficit, ubique deficere potuit; nec sola divina auctoritate recipitur, quod humana ratione eligitur. Incertum suspectumque jure meritò habetur ejus testimonium, quod semel falsum deprehensum est; nec est infallibilis veritas, quam vel tenuissimum mendacium obscurare potest. Daretur planè hæreticis omnia sugillandi ansa, & pro suo arbitratu vel gravia, vel levia judicandi quæcumque voluerint, si semel concedatur Spiritum sanctum assistisse scriptioni rerum præcipuarum, non levium, & nihil ad salutem pertinentium; facile enim sibi persuadebit quilibet argutulus, & morosus, in libris præsertim historialibus multa non necessaria referri, quamvis utilissima, & adoranda omnia Scripturarum verba teneat communis Ecclesiæ Romanæ, seu Catholicæ sensus à Patribus acceptus, & veris Orthodoxis indivulsè sculptus.

Quare non mihi probatur limitatio Joannis Cabassutii, aliàs eruditissimi, contendentis Sacrum Concilium non singulas vulgatæ editionis particulas consecrasse, sed tantum libros quosdam sacros, quos Novatores de Canone obliterabant; vel aliquas insigniter amplas partes, quas hæretici spurias, addititias, & suppositas cõ-

tendebant, sacro Canoni asseruisse, debitæque authoritati vindicasse. Nam licet verum sit, id potissimum intendisse Patres Tridentinos, ut comprimeretur hæreticorum modernorum intolerabilis impudentia, quæ libros integros expunxit, vulgatam editionem Catholicis omnibus pervenerabilem floccifecit, partes & versus quamplures mutavit. & plenitudinem potestatis, quam Conciliis Oecumenicis denegat, superbissimè usurpans, suppressit quæ explodi placuit: Nihilominus tamen ut tam temerario ausui radicitus provideret, *libros integros cum suis omnibus partibus, prout in Ecclesia Catholica legi consueverunt, & in veteri vulgata editione habentur*, suscipiendos præcipit, & non suscipientes anathemate percellit.

Non inficior Typographorum incuriâ librum Bibliorum sæpe sæpius scatere mendis, quia nullus ferè cuditur liber omni ex parte elaboratus, fiuntque in dies editiones aliæ aliis castigatiores, in quibus potissimè Sixti V. & Clementis VIII. diligentiam universa Respublica Christiana collaudavit. Hoc tamen contendimus, & Tridentinum contendisse affirmamus, omnes vulgatæ editionis voculas, & syllabas sine ulla exceptione sacras esse & canonicas, nec ulla irreperere. ut sæpe pro humana infirmitate solet, menda, quin statim ab Ecclesia dignoscantur. Adducit quidem Cabassutius nonnulla loca, quæ quibusdam interpretibus mendosa visa sunt; sed hos nodos dissolverunt alii, & in promptu explanare possemus, si id instituti nostri brevitatis pateretur. Quod autem addit præfatus auctor pag. 714. menda nonnulla si ab antiquo irrepsisse, ut nulla suppetere corrèctoribus exemplaria his

mendis vacua: id verò non solum in vulgata editione, sed in ipsis Hebraïcis, Græcisque exemplaribus reipsa ita contigisse certum esse; ut nullum hujusmodi exemplar immune prorsus reperiri possit, ipsaque Ecclesia sancta in omni sæculorum decursu vix ac ne vix quidem Bibliis Hebraïcis, aut Græcis, aut Latinis posita sit, quæ omni ex parte illibata & expurgata essent. Illud, inquam, si semel admittitur, nihil supererit, de quo dubitare non liceat, dabiturque hæreticis continua cavillandi occasio, si concedamus vulgatæ editionis sacrum depositum hominum manibus, & annorum decursu navorum & depravationum haud paucas injurias pertulisse ab scribentibus antiquariis, & correctoribus imperitis, nec ullum occurrere exemplar illibatum, ad cujus fidem modernæ lectiones exigantur.

*Præoccupantur objectiones.*

Pro solutione objectionum nota primò, non omnes libros fuisse simul ab Ecclesia Catholica receptos: unde in posterioribus Conciliis remanentiùs expensa, Deoque paulatim Ecclesiam illustrante, fuerunt accepti qui in prioribus nondum satis fuerant explorati. Initio enim nascentis Ecclesiæ, ac primis Christianismi exordiis tam citò difficultas hæc ventilari non poterat, nec oportebat; quia non erat adeo prociua hæreticorum audacia in libris ad libitum vel acceptandis, vel rejiciendis. Sed simpliciter Christiani omnes adhærebant volumini à S. Clemente proposito, qui tamen non omnes libros canonicos collegit, sed aliquos silentio prætermisit. Re autem ab Innocentio I. primùm decisa, omnis Catholicorum dubietas cessavit, qui in varias antea

sententias abierant, quia nihil adhuc certi in alteram partem ab Ecclesia definitum erat.

Nota 2. fuisse quidem de quorundam librorum Authoribus dissidium, puta libri Sapientiae, Ecclesiastici, Epistolae ad Hebraeos, & secundae Petri, propter styli diversitatem; sed hoc parum, vel nihil refert, dummodo Spiritus sanctus eorum librorum auctor esse credatur. Nec est inconveniens, in illa quaestione facti non revelati aliquem nonnullis contigisse errorem. Caterum in enumerandis libris canonicis errare nequaquam Ecclesia potuit, quia hoc ad facta revelata spectat, quibus tota fides & orthodoxa doctrina subnixa est. Cum quo stat, non esse facile dubitandum de auctore libri canonici, quando favet conspirans Ecclesiae sensus. Nec obesse debet styli diversitas, quae sapissimè in eodem auctore observatur pro diversa materia, vel lectorum ad quos scribit distinctione, vel interpretum inaequalitate.

Nota 3. ad veritatem sacrorum librorum non esse opus Scriptores omnia ex immediata revelatione accepisse; nam à Petro Marcum, ab aliis Apostolis, Beataque Virgine Lucam audivisse constat. Sed id quod contendimus est, omnes omnino Scripturarum phrasas & versus specialiter Dei instinctu, afflatu, assistentiâ, directione, & manutenentiâ fuisse exaratos, ita ut eorum librorum Spiritus sanctus author sit, juxta illud Psalm. 86. *Dominus narrabit in scripturis populum.* Et illud Salvatoris: *Spiritus suggeret vobis omnia.* Necnon illud 2. Cor. 13. *In me loquitur Christus.* In omnibus igitur habuerunt non revelationem, sed assistentiam & auxilium, ne fallerentur. Quod sane auxilium non debuerit esse

efficax & prædeterminans, an verò purè indifferens & expectans determinationem æquilibrî voluntatis, suo loco dicetur, & interim tuo iudicio permitto, Lector. Quomodo enim labilem hominum manum, & fallibilem arbitrii vertibilitatem constanter, & indeclinabiliter à lapsu etiam minimo, tam formali, quàm materiali liberabit auxilium libertati submissum, ejusque expectans acceptionem, quale admittunt assertores scientiæ mediæ? Nec obest quod aliquando Paulus se in insipientia dixisse significet; hoc enim loquendi modo ostendere sategit, se ea ex necessitate duntaxat protulisse, quæ solent citra necessitatem ab insipientibus jactitari. Unde insipientis personam sapienter gessit, sicut cùm dicebat: *Nos falsi propter Christum.*

Nota 4. quod dum nolumus vulgatam editionem esse per Hebraïca, vel Græca exemplaria corrigendam, non propterea damnamus, sed totis viribus laudamus Græcæ, Hebraïcæque linguæ peritos & studiosos, ut calumniosè Dominicanis imponit Petrus à Valledausa: quasi verò in tota sua Valle fuerit ullus unquam Xante Pagnino, Oleastro, Malvendâ Dominicanis sanctæ linguæ peritiâ par? Non damnant Dominicani linguam Hebraïcam, Syriacam, Græcam, aliasque; sed contendunt à Vulgata totius Ecclesiæ, & Oecumenici Concilii autoritate consecrata non esse provocandum ad fontes Hebraïsimi. Cæterùm probè sciunt in *Clemen. 1. titul. de Magi.* Concilium Viennense ordinasse in Universitatibus Bononiensi, Parisiensi, Salmanticensi trium linguarum Magistros instituendos, qui eas discipulos doceant.

Idque variis sanè emolumentis statutum est.



Tum 1. quia in vulgata editione verba Hebraïca & Græca non sunt de verbo ad verbum scrupulosè translata, sed potiùs servata est sensuum veritas, quàm verborum ordo. Ut ergo videatur nativa verborum series, adire licet textum Hebraïcum. Tum 2. quia vox Hebraïca æquivoca est, subindeque multis sensibus fœta, ex quibus ingeniosus lector plures potest eruere sensus ad subjectam materiam variis conceptibus adornandam. Tum 3. quia phrasis in propria lingua majorem emphasin ex innata proprietate sortitur, quæ non parum conducit ad multa adagia explicanda. Sicut cùm dicitur Luc. 10. *Neminem per viam salvaveritis*, non præcipitur inurbanitas Christi discipulis, sed magna in itinerando celeritas hoc Hebraïco proverbio designabatur. Quod diligenter nota pro variarum intelligentia formularum, quæ passim ubique, sed in proverbiiis Salomonis crebrò occurrunt, quia hujus regulæ ignorance sæpe alieni sensus ac fictitiæ interpretationes magno, & juxtà inani labore quaruntur. Tum 4. ad corrigenda quotidiana Typographorum menda, quibus scatent editiones. Tum demùm quia in editione Latina multa Hebraïca, Græcaque vocabula remanserunt, vel ob antiquitatis reverentiam, vel quia in Latinum transferri commodè non potuerunt.

*Duplex corollarium momentosum.*

Ex dictis inferitur 1. dignitatem sacrarum Litterarum esse incomparabilem & planè divinam. Tum quia habent auctorem Deum. 2. Pet. 1. *Spiritu sancto inspirati loquuti sunt Sancti Dei homines.* Luc. 1. *Loquutus est per os Sanctorum, qui à saculo sunt Prophetarum ejus.* Idem repetitur in princi-



pio Epistolæ ad Hebræos. Unde Chrysost. hom. 2. in Genes. ait, Divinas Scripturas esse litteras & epistolas Deo dictante exaratas, & ad homines missas. Cui concinit Aug. in Psal. 90. *De illa civitate, unde peregrinamur, litteræ nobis venerunt. Ipsa sunt scriptura, qua nos hortamur, ut benè vivamus.* Tum quia Scriptura habet Deum pro argumento; nam ubique Deum loquitur, ad Deum movet, ejus attributa laudesque pangit, mandata promulgat, cordis divini secreta aperit. Tum quia ejus pia, humilis, & assidua lectio homines divinos efficit, dicente Veritate, Joan. 10. *Illos dixi Deos, ad quos sermo Dei factus est.* Et Justinus Martyr orat. 2. *Hæc nos non efficit Poetas, non Philosophos reddit, neque Oratores excellentes; sed ex morti obnoxiiis immortales, & Deus ex immortalibus facit,* inspirando scilicet cordibus hominum affectus divinos.

Dices: Scripturæ dignitatem decere non videtur ea, quæ ubique patet, simplicitas, sermo incultus, metaphorarum usus frequens & parabolarum, quibus vilescit & repit divinorum majestatis eloquiorum.

Respondeo quod sicut dum oculi ægri Solis lucem non ferunt, non Solis, sed lipporum oculorum defectus est: ita si quibusdam vilescit Divinarum sapientia Scripturarum, legentium infirmitas est, non libri. Quamvis enim in sacris Paginis fucata verborum pompa affabre non concinnetur, quia ut rectè ait Prosper lib. 3. de vita contemp. cap. ultimo: *Sententiarum vivacitatem sermo ex industria cultus enervat; non res pro verbis, sed pro rebus enuntiandis verba sunt instructa.* Tamen rectè consideranti apparet in sacris Litteris divina quædam eloquentia, quæ inania

quidem & pendula non crepitat, sed multum movet non verborum, sed rerum avidum. Legis Rhetoricam P. Ludovici Granatensis, & tibi palam erit sacras Litteras argumentorum, figurarumque copiâ cultuque locupletissimas esse.

Quod verò in sacris Litteris, præsertim verò in Evangeliiis parabolæ & metaphoriæ frequentes sint, non inconsultò, sed de industria factum docent Patres, cujus divini consilii plures afferunt rationes. Primò propter hominum à sensibilibus dependentiam: *impossibile enim est*, ait Dion. c. i. *eccelest. hierar. nobis aliter divinum lucere radium, nisi varietate sacrerum velaminum circumvelatum.* Ex Hilarius lib. i. de Trinit. *Infirmas nostra intelligentia cogit species quasdam ex inferioribus tanquam superiorum indices querere, ut rerum familiarium consuetudine admonente rex sensus nostri conscientia ad insubili sensus opinionem meduceremur.* Secundò, ob rudium ineptitudinem, quibus sub similitudine corporalium debent divina proponi à sacris Scriptoris, qui docente Paulo Rom. i. sapientibus & insipientibus debitores sunt. Tertiò, propter studiosorum exercitium; sunt enim, ut Aug. ait, *in Scripturis sacris profunda mysteria, qua ad hoc absconduntur, ne vilescant; ad hoc quaruntur, ut exerceant; ad hoc aperiuntur, ut passant.* Quartò, ad occultandam infidelibus divinorum arcanorum sublimitatem, juxta illud Matth. 7. *Nolite Sanctum dare canibus.* Quintò, ad edomandam curiosorum superbiam, quibus divina absconduntur, dum simplicibus & parvulis revelantur. Sextò, quia cum in hac vita faciliùs de Deo cognoscamus quid non sit, ideo (inquit S. Thom. i. p. q. i. art. 9. ad 3.) *similitudines illarum rerum, quæ magis elongantur*


à Deo, veriore nobis faciunt estimationem, quod sit supra illud quod de Deo dicimus, vel cogitamus. Septimò, ut veritatem sub his parabolarum involucris latentem assiduís precibus impetremus ab eo, qui dat affluenter. Octavò, ad intellectum à fastidio revocandum; solent enim facillè inventa vilescere: sensus verò reconditi, dum deteguntur, delectant, & eo sunt pretiosiores, quo explicatu difficiliores. Nonò, ut ex una eademque littera plures Patrum interpretationes haberemus, quibus Ecclesiastica & Litteraria Respublica ditescit.

Infertur 2. uberrimam esse sacrarum Litterarum fecunditatem ob multiplices sensus, quibus abundant. Primus est literalis, quem faciunt nuda verba in sua naturali significatione accepta. Secundus est mysticus & spiritualis, qui ex verbis eruitur, vel ad fidei mysteria, ut cum figuræ veteris Testamenti applicantur mysteriis novi, & dicitur sensus allegoricus, seu figuratus; vel ad instructionem morum, cum gesta in Scripturis enarrata ad mores componendos flectuntur, & dicitur sensus tropologicus, vel moralis; vel ad ea prænuntianda, quæ in futura vita contingent, & dicitur sensus anagogicus, seu sublimis. Quæ his tritis versibus continentur:

*Littera gesta docet, quid credas allegoria,*

*Moralis quid agas, quid speres anagogia.*

His quatuor sensibus utitur ipsemet Apost. Galat. 4. *Abraham duos filios habuit, unum de ancilla, & unum de libera* (en sensum litteralem,) *quæ sunt per allegoriam dicta: hæc enim sunt duo Testamenta* (ecce sensum allegoricum.) *Illæ autem, quæ sursum est, Ierusalem libera est, quæ est mater nostra* (vide anagogicum sensum.) *Sed quomodo*



tunc is, qui secundum carnem natus fuerat, persequatur eum qui secundum spiritum, ita & nunc. Ecce tropologicum sensum, quo per Ismaëlis in Isaacum persequutionem significabatur persequutio Judæorum in Christianos.

Hæc sacrarum litterarum ubertas significatur *Ezech. 2. & Apocal. 5.* ubi dicitur liber scriptus intus & foris: intus, ob sensum mysticum, qui est interior & reconditus: foris, ob sensum litteralem omnibus pervium. Asseritur etiam à Patribus. August. tract. 24. in Joan. *Ea qua fecit Dominus noster Jesus Christus stupenda atque miranda, & opera, & verba sunt*: opera, quia facta sunt: verba, quia signa sunt. Et Gregor. Magn. lib. 20. Moral. c. 1. *Sacra Scriptura omnes scientias ipso loquutionis sua more transcendit, quia uno eodemque sermone, dum narrat textum, prodit mysterium. Interrogemus miracula, quid nobis loquantur de Christo; habent enim, si intelligantur, linguam suam. Nam quia ipse Christus Verbum Dei est, etiam factum Verbi verbum nobis est.*

Dices: Parit confusionem, æquivocationem, & deceptionem multiplex sensuum ejusdem textus varietas: Ergo quadruplex sensus verbis Scripturæ asserendus non est.

Respondeo quod licet argumentum efficax desumatur solum ex sensu litterali, potest tamen è spirituali elici, si à Canonico Scriptore ita factum inveniatur. V. g. Paulus *Hebr. 1.* illud *Psal. 2. Ego hodie genui te*, intelligit de Divinitate Filii: *Actorum verò 13.* de resurrectione ejus, quæ secunda expositio per se est tantum mystica, sed jam à Canonico Scriptore respectu nostri habet rationem vim, & energiam sensus litteralis. Quia ut ait S. Doctor, *Spiritus sanctus, qui est*

author Scriptura, plures potuit intendere sensus, quos deinde Scriptoribus Canonicis manifestavit. Nec propterea sequitur confusio objecta, quia sensus isti non multiplicantur propter hoc quod una vox multa significet, sed quia res significata per voces, aliarum rerum possunt esse signa, inquit S. Thom. 1. p. q. 1. art. 10. ad 1. unde nulla oritur deceptio, cum omnes sensus inhiuantur litterali, qui in proprio sensu debet semper accipi, si nihil absurdi, vel falsi apertè sequatur, ut sæpè docet Augustinus.

Dices iterum: Si tanta est Scripturarum fecunditas omnibus accommodata, cur Ecclesia Catholica lectionem earum omnibus promiscuè non permittit? Cur prohibet sacras Litteras vulgari lingua non cudi, & nationibus omnibus in proprio idiomate palam legi?

Respondéo, puritatem Scripturarum citò maculatam iri idiomatum omnium versione & permixtione. Sapientissimè ergo Romana Ecclesia sacri depositi in sua integritate custodiendi æmulatrix solam vulgatam lectionem adhibet, aliarum verò linguarum translationes sobriè concedit, ne tantus thesaurus pateat novitatum corruptelis, utque Ecclesia toto orbe diffusa labii unius sit, & sermonum eorundem. Apud hæreticos verò vertendorum librorum nullus est finis, tantaque obstreperet discrepantia lectionum, ut non audiat unusquisque vocem proximi sui; alia quippe est versio Lutheri, alia Oecolampadii, alia Bæsa, &c.

Nec propterea privat pia mater filios suos commodis spiritalibus, quæ à Scripturis eliciuntur. Tum quia editio vulgata est omnibus obvia, & qui tam planam & simplicem latinitatem non

callent, vix ac ne vix quidem eam in lingua vulgari absque interprete intelligerent ob sacri textus profunditatem. Tum quia plurima extant intellectu difficillima, quæ pusillorum infirmæ conscientiæ possent esse occasio erroris, si omnibus indiscriminatim talis lectio concederetur, & periculum immineret imperitis. Tum quia non prohibuit absolutè Sacrarum Scripturarum lectionem, & versionem, sed eam cum dependentia à Pastoribus ordinariis permittit. Rectoribus enim animarum incumbit discernere aptos, coërcere indignos, aliis lac, aliis potum dare & escam: v.g. non omnibus expedit lectio Cantici Cantorum, non omnibus congruit lectio Paulinarum Epistolarum, *in quibus* (ait Petrus epist. 2. c. 3.) *sunt quadam difficilia intellectu, qua indocti & imbecilles depravant, sicut & ceteras Scripturas, ad suam ipsorum perditionem.* Rectè etiam dixit Nazianzenus lib. 1. Theolog. *Neque omni loco, neque omnibus, neque omnia sunt propalanda.* Tum quia non frustrantur Scripturarum sacris utilitatibus populi suæ salutis amantes, quibus accommodatiora è sacris Paginis Ecclesia seligit, & ore, calamoque eruditiorum eis proponit. Quid enim expressius Parochis & Episcopis præcipiunt, inculcantque Concilia, quàm ut oves verbo pascant, populisve sibi concreditæ Scripturarum, Evangelii præsertim maximas, meditationis igne digestas explanent, & sacrorum eloquiorum medullam eliquent.

Hic etiam diligenter observandum est, quod apud Gravinam, aliosque legisse me memini, quod licet vernacula Scripturæ lectio de se mala non sit; imò si bono animo, humilibusque precibus eam ab Apostolica Sede peterent Nationes,



facile crediderim obtenturas ab eo throno misericordiae ad omnem indulgentiam comparato, & ab benignitate proclivi; sicut alias Cyrulus & Methodius à Romano Antistite impetrarunt, ut & ipsis rem divinam facientibus lingua Sclavorum uti liceret, & jam de facto concessum Patribus nostris Armenis vidi ipse Romæ, dum ibi moraret. Tamen quia Lutherani & Calvinistæ eo solum animo vulgarem lectionem extollunt, non ut ad pietatem, pœnitentiamque, cui sunt infensissimi, lectores alliciant, sed ut Ecclesiæ Romanæ iussa, cujus sunt transfugæ & desertores, damnent, atque per solitæ iniquitatis scandulas gradum sibi faciant ad suæ impietatis dogmata propaganda, justè denegat Ecclesia, quod fortè concederet, si eo modo peterent, quo deberent. Nam etsi nihil sit in rebus, quæ petuntur, mali; tamen in schismate tantum est mali, ut nihil pejus esse possit.

Hoc etiam in nostris Novatoribus minimè ferendum est, quod Scripturas omnibus indiscriminatim, non tam exponunt, quàm projiciunt margaritas ante porcos. Certè cum Apostolus attesteretur, non omnes esse Apostolos, nec omnes Prophetas, nec omnes Doctores, non omnibus promiscuè concedenda est divinarum interpretatio Scripturarum, illis præcipuè, quibus brevis & compendiosa articulorum Cardinalium notitia sufficit ad salutem, si modò diligant Deum super omnia, amicos in Deo, inimicos propter Deum, & sicut seipsos; in his enim duobus præceptis pendet universa lex & Prophetæ, & ut ait August. lib. contra epist. fundam. *Homo fide, spe, & charitate subnixus, easque incensus retinens, non indiget Scripturis nisi ad alios instruendos.*

Hoc demùm intolerabile, quod apud illos mulieres, quas lanam texere, vel apprehendere fufum magis expediret, & quidem zonarias, bovillas, piftrices, fùtrices faciunt Apostolas, de Scripturis opportunè importunè, & fèmper ineptè garrientes. Ab illis, utpote ex affidua Scripturæ lectione consuminatis disciplinæ Dei doctricibus libenter peterem interpretationem hujus loci Ecclef. 42. *Melior est iniquitas viri, quàm mulier benefaciens.*

### REFLEXIO.

*Scrutamini Scripturas*, quærat Theologus thesaurum illum opulentissimum, & inexhaustum divitiarum spiritualium, bonum super millia auri & argenti: latetur super eloquiâ Dei, sicut qui invenit spolia multa. In illis virtutum omnium, quæ veræ animorum divitiæ sunt, documenta traduntur, morborum omnium spiritalia remedia apponuntur, offerturque omnibus mensa illa spiritalis in conspectu omnium parata, in qua pro morte cibum doctrinæ, pro peccatorum venenis antidotum, pro necessitatibus auxilium, pro adversis tutamen, pro laboribus levamen, pro periculis securitatem invenimus. *In ea*, inquit Ambros. in Psal. 18. *invenit unusquisque, quo aut vulnera sua curet, aut merita confirmet.* In Scriptura exhibentur fercula delitiosa ad saporem, solida ad nutrimentum, efficacia ad medicinam, inquit Doctor Mellifluus scim. 67. in Cant. Ex ea veluti armamentario munitissimo educuntur arma, ut in continuo carnis, mundi, dæmonisque conflictu nequissimorum hostium impetus & insidias elidamus, exemplo Ducis nostri Christi, qui triplicem Sathanæ tentatio-

nem tribus è sacra pagina testimoniis veluti jaculis compressit, ut discamus quod nulla nos poterit suasio ad malum pertrahere, si consultis Scripturarum oraculis, ejusque instructi munimentis in aciem descendamus. Per illas illustratur intellectus; lucerna enim pedibus nostris verbum tuum, & lumen semitis nostris: purgatur affectus, dum sordes deteguntur, & curantur. Nam teste August. serm. 61. de verb. Dom. *Divina scriptura speculum est, quod te falso nitore non fallit.* Cui subscribit his verbis Magnus Leo serm. 11. de Quadrag. *Artifex misericordia Dei splendidissimum in mandatis suis condidit speculum, in quo homo suam mentis faciem inspiceret, & quàm conformis imagini Dei, aut quàm dissimilis esset, agnosceret.*

Hæc sunt ex infinitis pauca specimina prærogativarum Sacrae Scripturae, quas pia & assidua lectione experietur magis Theologus, quàm à nobis verbis efferri possit. Nam sicut aromata ( comparatio est Chrysostomi *hom. 13. in Genes.* ) quanto magis digitis atteruntur, tanto majorem naturâ suâ fragrantiam reddunt; ita etiam in Scripturis usu venit, quanto quis illas amplius tractare studuerit, tanto magis videre poterit latentem in ipsis Thesaurum, pluresque percipere indicibilium deliciarum fructus. Omitamus ergo, & procul à nobis repudiemus nugas nugarum; tractationes, inquam, inanes quibus tanquam pictis epulis frustra refici cupit humana curiositas. Castas siciamus Scripturarum voluptates *de melle cæli melleas, & de Dei lumine luminosas*, ut loquitur August. *lib. 9. Confess. c. 4.* Inquiramus Scripturarum *fortissimum solatium*, ( sic vocatur ab Apostolo *Hebr. 6.* ) quod dum

recreat, non enervat, sed roborat; non hebetat, sed vegetat; non aggravat, sed sublevat; non parit fastidium, sed tollit; non emollit voluptate, sed roborat suavitate, veluti oleum quod dum lenit, ad pugnam iungit.

Verum hæc divinorum sermonum suavitas super mel & favum dulcis, super aurum & topazion pretiosa cor impurum non percipit, in tumentes non diffluit, in otiosos non diffunditur: eam sapit charitas, videt munditia, suscipit humilitas, fovet meditatio, quæ in præsentis vitæ tenebris jam de lumine æternitatis intermicans, eos nobis cælestes prægustandos saporos proponit, qui sentiri possunt, exprimi non possunt. Ad hanc profundam Scripturarum penetrationem & sapidam notitiam non sufficit linguarum peritia, verborum copia, conceptuum ubertas, eloquentiæ ornatus, nisi unctio doceat nos. Scripturas cortice & superficie tenus intelligemus, nisi humili oratione intellectum ab eo petamus, à quo omne donum de sursum est, descendens à Patre luminaum. Unde Hieronym. in illud Galat. 1. *Notum vobis facio Evangelium meum, quia non est secundum hominem, ait: Marcion, Basilides, & cætera hæreticorum pestes non habent Dei Evangelium, quia non habent spiritum sanctum, sine quo humanum sit Evangelium, quod docetur. Nec putemus in verbis Scripturarum esse Evangelium, sed in sensu; non in superficie, sed in medulla; non in sermonum foliis, sed in radice rationis. Pondera Evangelium fieri humanum sine Spiritu sancto, quia nimirum qui versant Evangelium, nec aguntur Spiritu Dei, nec habent Spiritum Christi. Tonent licet in pulpitis, suspendanteriam auditores sermonum nitore aut sublimitate, eva-*

nescient tandem in cogitationibus suis humanis, ad quas Evangelium detorquent. Quia nimirum non habent experimentum Christi in ipsis loquentis, nec in oratione audiunt verbum bonum, quod aliis eructent, volentes, ut ait Bernard. serm. 18. in Cant. *antè effundere, quàm infundis; loqui, quàm audire paratiores, & prompti docere quod non didicerunt.* Rectè Propheta Regius Psalm. 35. *In lumine tuo videbimus lumen.* Quia sicut visibilem solem non nisi sole adjuti cernimus: sic lumen Evangelii Christi, nisi Christo intus coruscante non percipimus.

## SPECVLATIO II.

*Perennis Apostolicarum Traditionum  
usus omninò admittendus est, non  
secus ac divina viva vocis ora-  
cula de aure in aurem perve-  
nientia.*

**H**anc veritatem ita perspicuè docet Scriptura, ut non minoris impieratis sit traditiones respuere, quàm Scripturas ipsas non acceptare, cum nihil habeamus in sacris litteris apertius definitum. Psalm. 43. *Deus auribus nostris audivimus, patres nostri annuntiaverunt nobis.* Deuter. 32. *Interroga patres tuos, & dicent tibi, & majores tuos, & annuntiabunt tibi.* Thessal. 2. *State & tenete traditiones, quas accepistis, sive per epistolas, sive per sermonem.* Quid evidentius? 2. Tim. 1. *Cætera cum venero disponam.* Non ergo omnia necessaria litteris exaraverat. Et cap. 2. *Formam*



*habe sanctorum verborum, quæ à me audisti: bonum depositum custodi, & quæ à me audisti per multos testes, hæc commenda fidelibus hominibus, qui idonei erunt & alios docere. Ergo quædam commendavit Apostolus, quæ voluit nonnullis tantùm esse nota, ut juxta dominicum præceptum non daretur sanctum canibus, nec spargerentur margaritæ ante porcos. Et Joannes epist. 2. Plura habens vobis scribere, nolui per chartam & atramentum; spero enim me futurum apud vos, & ore ad os loqui. Non ergo omnia scitu necessaria chartis mandaverat Apostolus.*

Rationes verò irrefragabiles ad stabiliendam contra hæreticos modernos hanc cardinalem catholicæ nostræ Religionis assertionem, non desunt. Prima est: Cœlestes veritates non ideo sunt certæ, quia sunt litteris scriptisque concinnatæ, sed quia sunt à veritate prima inspiratæ, hominibusque traditæ: sive autem scriptis, sive verbo, perinde est. Certè ante ullam scripturam, ante Mosem populus Deo fidelis (qualis fuit semper aliquis ab initio) quasdam servabat leges, & sacrificiorum ritus, non in membranis tabulisque delineatos, sed consuetudine & traditione receptos. Christus ipse Legislator noster nihil scripsit, nec scribendum ordinavit: & Apostoli prius Evangelium vivâ voce docuerunt, quàm fuerit litteris commendatum, ut ex Evangelii Lucæ proœmio patet, ubi se audita scribere testatur, sicut tradiderant ipsi, qui ab initio viderant, & ministri sermonis fuerant. Sanè, ut præclare ait sapientissimus Cano, duas Petri epistolas habemus: num nihil aliud verbo docuit? Credemusne annis septem Antiochiæ sedisse elinguem, & Romæ annis viginti quinque? Quid



Andreas, Thomas, alique? Nonne sine scriptura, solo interveniente verbo, Ecclesias sibi destinatas & fundarunt in fide, & in Religione propagarunt? Ergo usus traditionum viva voce manantium semper fuit in Ecclesia, eisque credere necessarium *necessitate approbationis* (sic eam vocat Cardinalis Perronius,) id est, nec eas inficiari licet, nec de eis ritè ab Ecclesia propositis dubitare fas est.

Secunda ratio: Multi sunt fidei Orthodoxæ articuli, qui clarè in sacris litteris non habentur, ut præter innumeros alios constat de virginitate Beatissimæ Deiparæ, de processione Spiritus sancti à Filio, de descensu Christi ad inferos, de quibus non ambigunt novi recentesque hæretici; & tamen clarè in Scripturis non leguntur. Et quod caput est, hos vel illos libros veteris & novi Testamenti, non plures vel pauciores esse recipiendos, nullibi Scripturarum exprimitur, nullibi declaratur quinam spurii sint, quinam legitimi, vel quomodo apocryphi à canonicis secernantur: Ergo velint nolint hæretici, traditiones admittere coguntur, nisi apertissimis Christianismi notionibus renuntiare decreverint. Hanc rationem paucis complectitur August. lib. cont. epist. fundam. c. 4. *Ego Evangelio non crederem, nisi me Catholica Ecclesia commoveret autoritas.* Ipse etiam Apostolus *ad Gal. 2.* loquens de Evangelio suo, quod utique erat verbum Dei, tamen conferre illud voluit cum Petro, aliisque Apostolis, ut probaretur & constabiliretur. Deinde, inquit, *post annos quatuordecim ascendi Ierosolymam cum Barnabæ, assumptis & Tito: ascendi autem secundum revelationem, & contuli cum illis Evangelium, quod prædica in Gentibus, ne fortè in vacuo currerem,*

*aut cucurrissem. Quæ verba ponderans Hieron. epist. ad August. ait Apostolum non habuisse securitatem Evangelii prædicandi, nisi Petri, & qui cum eo erant, fuisset sententiâ roboratum.*

Tertia ratio : Cum nullus sit Scripturarum locus tam conspicuus , qui non possit in varios sensus detorqueri , nulla erit firmitas , securitas nulla, si sola Scriptura ad quæstionum decisionem adhibeatur. Ergo recurrendum est ad Ecclesiasticas traditiones , in eisque sistendum, quibus veluti lydio lapide vera falsaque doctrina probetur , ac germanus sensus ab adulterino seceratur. Præsertim quia solennis semper fuit hæreticorum vafrities errores suos Scripturarum testimoniis confirmare, & ut egregie ait Lirinensis : *Videas eos volare per singula quæque Sanctæ legis volumina. Sive enim apud suos, sive alienos; sive privatim, sive publice; sive in convivio, sive in plateis, nihil unquam penè de suo proferunt, quod non etiam Scripturæ verbis adumbrare conentur.* Nulla ab ipsis scribuntur opuscula , quæ non novi aut veteris Testamenti sententiis fucata & colorata sint ; quia nihil tam sacrum est , quod sacrilegum non inveniatur. Sed tanto magis cavendi sunt , quanto occultius sub divinæ legis umbraculis latitant. Unde præmonuit nos Salvator attendendum esse à falsis Prophetis , qui veniunt ad nos in vestimentis ovium , intrinsecus autem sunt lupi rapaces ; quia nimirum hæretici ut caulas Ecclesiæ infestent, lupinam speciem deponunt, & sese sacrarum paginarum sententiis veluti quibusdam velleribus obvolvunt, eo fallacius incautis ovibus obrepunt , quo venena sua medicaminum vocabulis præcolorant : amara hæresin pocula melle circumli-

nunt, ut incauti dulcedinem præsentientes, amorem non reformident, nec ibi suspicentur venenum, ubi Scripturarum antidotū propinatur. Et ut præclarissimè dixit August. lib. 3. de Bapt. contra Donat. cap. 19. *Scripturas tenent ad speciem, non ad salutem.* Et Hieron. in cap. 1. ad Gal. *Omnes hæreses à Scripturis sibi consuunt cervicalia, quæ ponant sub cubito universa ætatis.*

Nec mirum, illum esse hæreticorum omnium, sed maximè modernorum genium, cū eorum pater diabolus Christum Scripturarum verbis veluti callidissimis machinamentis appetiverit. *Si Filius Dei es,* inquiebat Matt. 4. *mitte te deorsum, scriptum est enim: Angelis suis Deus mandavit de te, &c.* Sicut ergo tūc caput capiti, ita nunc quoque membra membris loquuntur; membra scilicet diaboli membris Christi, hæretici Catholicis, quæ profectò nusquam comminiscerentur, nisi exploratum haberent, nullam omninò esse ad recipiendum artem magis idoneam, quàm ut subinducta divinorum verborum autoritate latentes errores fucent. *Sciunt enim* (ait prælaudatus Vincentius Lirinensis) *fætores suos nulli fore citò placituros, si nudi & simplices exhalentur, atque idcirco eos cælestis eloquiū velut quodam aromate aspergunt, ut ille qui humanum faciliè despiceret errorem, divina faciliè non contemnat oracula.*

Itaque cū hæretici sæpe sæpius, & semper sacris Scripturarum testimoniis abusi sint, & Scripturas bonas non benè intellexerint, ut ait Augustin. ad vitanda errorum contagia nullum efficacius remedium Patres omnes existimarūt, quàm si tenaciter, & immobiliter Apostolorum traditionibus inhaereamus. Maximè cū Scrip-

turæ non in legendo consistant, sed in intelligendo; alioquin si pro nostro arbitratu, & privato spiritu agere liceat, possemus quotidie nova nobis dogmata componere, putà si asseramus in Ecclesiam non esse recipiendos qui calceati sunt, & duas tunicas habent, & sic de aliis. Sæ Divinis eloquiis, sententiis, promissionibus & diabolus & discipuli ejus utuntur; quid facient Catholici homines, & matris Ecclesia filii? (inquit semper laudandus Lirinenſis.) Quonam modo veritatem à falsitate discernent? Hoc scilicet facere magnoperè curabunt, quod sanctos & doctos viros nobis tradidisse scripsimus, ut divinum Canonem secundùm universalis Ecclesia traditiones, & juxta dogmatis regulas interpretentur.

### *Solvuntur objectiones.*

Obicies 1. Incertum est, nec satis constare potest, quænam inter Apostolicas traditiones sint annumerandæ, nec potest sterni expedita ulla via, quâ pervenire possimus ad veræ traditionis notitiam, quæve discernantur fabulæ aniles à veris Ecclesiæ traditionibus: Ergo locus traditionum non est certus & firmus.

Respondeo, certas posse designari regulas hujusmodi traditionum Apostolicarum dignoscendarum. Nam & ipsa Ecclesia plerasque traditiones humanas ut mera figmenta exsufflat, & explodit, tametsi eas nonnulli veluti certas venditent. Hinc illa Pontificum Romanorum diligentia in proscribendis apocryphis libris, & expungendis inanibus conjecturis. Prima autem regula est: Illud ad Apostolicam traditionem pertinet, cujus nullum initium in Ecclesia Catholica invenitur; argumento enim est illud ab



Apostolis esse profectum, cujus nullum exordium invenimus, donec ad Apostolorum tempus perveniamus. Hanc regulam in omnibus ferme libris contra Donatistas inculcat August. nominatim lib. 3. cap. 3. *Quod universa tenet Ecclesia, nec Conciliis institutum, sed semper retentum est, non nisi auctoritate Apostolica traditum rectissime creditur.* Et epist. 118. *Illam autem quæ non scripta, sed tradita custodimus, quæ quidem toto terrarum orbe observantur, dantur intelligi vel ipsis Apostolis, vel plenariis Conciliis (quorum est in Ecclesia saluberrima auctoritas) commendata, atque statuta retineri.* Secunda regula: Si primorum sæculorum Patres in aliquo asseverando conspirent, & oppositum tanquam hæreticum damnent. Tertia regula: Cum Ecclesiæ Proceres in Spiritu sancto congregati, nullo renitente aliquid tanquam ab Apostolis derivatum esse, rematurè examinata consentiunt.

Obijcies 2. ea quæ de aure in aurem transeunt difficilè perseverant, facilè mutantur, & injuriâ temporum corrumpuntur, nisi scriptis mandata servantur: Ergo ex traditionibus nihil firmi elici potest.

Respondeo, hoc quoque argumento probatum iri, nutare firmitudinem Scripturarum, quæ tot annorum centuriis violari, contaminari, & corrumpi temporum calamitatibus potuerunt. Quare sicut Deus habet specialem curam & providentiam, ut illibata Scripturarum puritas conservetur, ita & de traditionibus necessariis fatendum est. Adde quod omnis Apostolica traditio, etsi non sit in libris canonicis exarata, tamen in authenticis Ecclesiæ monumentis servatur: unde periculum non est, ut mutatione

temporum ipsæ mutantur, aut pereant revolutionibus sæculorum.

Objicies 3. In Scripturis & Patribus non semel legimus, homines juxta legem Dei docendos esse, & per verbum Dei nos sufficienter & plenè erudiri; imò prohibetur aliquid ipsi addere, & simul præcipitur ipsos Angelos, si quid aliud evangelizent, quod ab Apostolis non sit traditum, anathema esse, ut patet *Galat. 1.* Ergo frustra ad traditiones recurrimus, & malè eas Scripturis addimus.

Respondeo, legem Dei non solùm in chartis papiaceis scriptam haberi, sed etiam ore proferri, & auditu percipi: unde traditiones non sunt additamenta ad verbum Dei, sed sunt ipsummet Dei verbum, non scriptum quidem, sed vivæ vocis oraculo prolatum, ab ipsis etiam Scripturis commendatum; ac proinde per Scripturas plenè instruimur de rebus ad salutem necessariis, quia ipsæ Scripturæ sacrarum traditionum usum perspicuè tradunt. Unde fit, traditiones Apostolicas non esse additiones, sed interpretationes verbi Dei, quibus quod in Scripturis latens est innotescit, controversiæ emergentes deciduntur, dirimuntur fidelium lites, formantur Conciliorum decreta, in quibus condendis non nova fundamenta jaciuntur, aut novæ fabricæ eriguntur, sed superædificantur super fundamentum Apostolorum & Prophetarum aurum, argentum, & lapides pretiosi; seu, ut ait Eusebius lib. 3. *Eccles. hist. Regni cælorum semina redduntur, non alia, sed eadem auctiora.*

Id ipsum præclarissimè illustrat sæpe laudatus Lirinensis similitudine clementi corporis humani, atque religionem animarum rationem cor-



porum imitari : sicut enim corpora annorum processu se explicant, & augentur, eadem tamen quæ erant permanent ; & quamvis intersit inter pueritiæ florem , & senectutis maturitatem ; iidem tamen ipsi fiunt senes , qui fuerant adollescentes , ut quamvis unius ejusdemque hominis status habitusque mutetur, una tamen nihilominus, eademque persona sit, eadem lactentium & juvenum membra , totque parvulorum artus, quot virorum ; nec potest fieri membri additio vel detractio , nisi totum corpus vel intercidas, vel prodigiosum fiat , vel certè debilitetur : *Ita etiam*, inquit , *Christiana Religionis dogma sequatur has decet profectuum leges , ut annis scilicet consolidetur , dilatetur tempore , sublimetur aetate, incorruptum tamen illibatumque permaneat.* Id etiam elucidat exemplo segetis triticeæ , in qua extrema respondent primis ; & licet accessu temporis frumenta crescant , eadem tamen generis natura permanet. Sic articuli Fidei iidem fuere semper , idem semper perseveravit verbum Dei : sed ex eis jugiter permanentibus aliæ & aliæ controversiarum occurrentium resolutiones ante latent explicantur. Quod ut legitimè fiat, ad sensum Ecclesiæ , qui traditione perseverat, exigendas esse definitiones, nemo sapiens eat inficias. Verum quidem est, Christianos jam scientes res fidei , non necesse habere ut aliquis doceat eos, sed unctionem docere eos de omnibus, imò parum prodesse externam fidei prædicationem ; si non sit intus qui doceat : non tamen propterea excluditur necessitas regulæ exterioris determinantis & dirigentis credenda ; fides enim ex auditu, & ut ait August. tract. 3. in epist. Joan. *Tu dixisti , quia unctio docet vos de omnibus : ut*

*quid talem epistolam fecisti? Quid illos tu docebas? Quid instruebas? Quid aedificabas? Jam hic videre magnum sacramentum, fratres: sonus verborum nostrorum aures percutit, Magister intus est. Qua observatione innumera explicabis Sacrarum Paginarum loca, quibus commendatur quidem interior schola Spiritus sancti loquentis ad cor, reddentis testimonium Spiritui nostro, sed minime excludentis externae propositionis necessitatem.*

*Reflexio & apostrophe ad Novatores.*

Lutheranos & Calvinistas Patrum traditiones saeculorum omnium Doctores firmatas hoc-fici-facientes, & privato suo spiritui postponentes, saepius tomo praecedenti alloquutus iterum aggredior, non meis, sed Patrum Ecclesiae armis, utique amabilibus; à Patre enim pro salute feriri suave est.

Non erubescitis (verba sunt Augustini lib. 2. contra Julian. nostro instituto accommodata) dicere & scribere, vestrum esse destitutam veritatem tueri, fidemque Ecclesiae reformare. Cur non potius auditis traditas à Patribus omnibus sententias, qui de controversiis nostris, antequam viveretis, judicaverunt liberi ab omni studio partium, antequam vestra damnabilia dogmata pullularent. Opponimus vestris Ministris Episcopos doctos, graves, sanctos, veritatis acerrimos defensores adversus garrulas vanitates, in quorum ratione, eruditione, libertate (quae tria bono iudici exiguntur) non potestis invenire quod spernatis. Hos fideles, sed excellentes dispensatores suos Deus per diversas aetates temporum, locorumque distantias, sicut ei placuit,

dispensavit. Hos itaque de aliis atque aliis temporibus atque regionibus ab Oriente & Occidente Congregatos videre potestis, non in locum quò navigare cogantur homines, sed in librum, qui navigari possit ad homines. Quanto vobis essent isti iudices optabiliores, si teneretis Catholicam fidem, tanto vobis sunt terribiliores, quia oppugnatis Catholicam fidem, quam in lacte suxerunt, quam in cibo sumpserunt, cuius lac & cibum parvis magnisque ministraverunt, quam contra inimicos etiam vos tunc nondum natos apertissimè, ac fortissimè defenderunt. Talibus post Apostolos Sancta Ecclesia plantatoribus, rigatoribus, ædicatoribus, pastoribus, nutritoribus crevit: ideo prophanas voces vestræ novitatis expavit, & cauta & sobria ex admonitione Apostolica, ne sicut serpens seduxit astutiâ suâ, sic & mens corrumpere-  
retur à castitate quæ est in Christo, Catholicæ fidei virginitati insidias vestri dogmatis subrepentis exhorruit, & tanquam caput colubri calcavit, otrivit, abiecit.

Patrum contestantium retinendas esse Apostolicas traditiones catalogum quid opus est texere, cum vestram miserandam duriciem non emolliat tam harmonicus Sanctorum consentientium chorus, nec pervicaciam confundat tanta nubes testium locupletum & omni exceptione majorum? Quem enim tam saxeum & adamantinum cor, nisi hæretica pravitas obdurasset, non frangeret illud ab Ignatio Martyre *epist. ad. Heron.* scriptum: *Omnis qui dixerit præter ea quæ tradita sunt, tamen si fide dignus sit, tamen si jejundet, tamen si virginitatem servet, tamen si signa faciat, tamen si prophetet, lupus tibi appareat.* Certè si lupus ha-

bendus est tot virtutibus clarus, quâ stultitiâ credam Calvinistis, & Lutheranis, nec jejunantibus, nec virginitatem servantibus, nec signa facientibus, nec prophetantibus, sed à jejunio abhorrentibus, cœlibatum damnantibus, Ecclesiæ signa & miracula irridentibus?

Vos sanè illuminaret longiusculum quidem, sed nitentissimum Basilii Magni testimonium *lib. de Spiritu sancto, cap. 27.* nisi schismatis tenebræ præpedirent. *Dogmata quæ in Ecclesia prædicantur, quædam habemus è doctrina Scriptorum prodita, quædam rursus ex Apostolorum traditione in mysterio, id est in occulto tradita recepimus: quorum utraque parem vim habent ad pietatem, nec his quisquam contradicit, quisquis sanè vel tenuiter expertus est, quæ sint jura Ecclesiastica. Nam si consuetudines quæ scripto prodita non sunt, tanquam haud multum momenti habentes, conemur rejicere, imprudentes & ea damnabimus, quæ in Evangelio necessaria ad salutem habentur, imò potius ipsam fidei prædicationem ad nudum nomen contrahemus.* Et adductis variis traditionum non scriptarum exemplis, quale est signi sanctæ Crucis usus, ceremoniæ Baptismatis, ait hæc omnia sciri à *tacita & secreta traditione.* Et rationem dat: *Nam quæ nec intueri fas est non initiatis, quæ conveniebat horum doctrinam publicitus circumferri scripto?* Et post adductas varias traditiones probatas consuetudines, quæ in sola Ecclesia Romana adhuc perseverant, sic concludit: *Deficiet me dies, si Ecclesiæ mysteria citra scriptum tradita pergam recensere.* Idem prosequitur tam fusè, tamque evidenter, ut omnis verisimilis effugii viam præcluserit.

Sed quid ad ista Tertull. *lib. de eccles. militis*

non tam verba, quàm fulmina respondebitis? Harum hujusmodi disciplinarum si legem expostules Scripturarum, nullam invenies. Traditio tibi præstendetur auctrix, consuetudo confirmatrix, & fides observatrix. Legite integrum D. Irenæi librum tertium adversus hæreses, ubi Gnosticos hæreticos solis traditionibus confundit. Specialiter autem cap. 3. Ecclesiæ Romanæ traditiones commendans, ait: *Ad hanc Ecclesiam propter potentiorē principalitatem necesse est omnem convenire Ecclesiam, hoc est qui sunt undique fideles, in qua semper ab his qui sunt, conservata est ea quæ est ab Apostolis traditio.* Legite Augustinum traditiones sexcenties commendantem, & scorsim lib. 5. de Bapt. cap. 23. sic loquentem: *Apostoli quidem nihil exinde præceperunt (id est an Baptismus sit iterandus,) sed consuetudo illa ab eorum traditione exordium sumpsit: credenda est, sicut sunt multa quæ universa tenet Ecclesia, & ob hoc ab Apostolis præcepta benè creduntur, quanquam scripta non reperiuntur.* Has, quæso, voces audite, & cernite tandem, quod si omnes traditiones negliguntur, corruat necesse est omnis erga Deum pietas, ceremoniarum cultus, mysteriorum, Sacramentorumve observantia, quæ sola consuetudo corroborat, quæ ab Apostolis dimanans, cum Christiana Republica adolevit. Auscultate, amabò, Magistros optimos; quia si Episcoporum ex toto orbe conventus celebrandus foret, qui controversiis nostras decernerent, nec tales possent facile sedere, nec tot. Vos ergo, Lutherani, vos Calvinistæ cæterique Sectarii, vos in Concilium appello, vos provoco, vos non in lyceum aut Academiam induco, sed in Sanctissimorum Patrum pacificam honorandamque societatem. Po-

nite vobis ob oculos, rogo, tam numerosam seriem eruditissimorum virorum quos in hanc usque diem tot saeculorum consensus approbavit, quousque supra eximiam sacrarum litterarum peritiam vitae quoque pietas mira commendat. Aspicite illos, obsecro, quodammodo aspicientes vos, ac mansuetè leniterque dicentes vobis: Itane nos in Sacrarum expositione litterarum simul omnes erramus? Itane nobis omnibus, quos Ecclesiae Christus praeceptores dedit, spiritus intelligentiae defuit? Itane unus Calvinus adversus nos pugnare audeat, & Ecclesiam creditis unius sensum hominis sequuturam, hujus verò gravissimi sanctissimique Senatus contrarium judicium deserturam? Minusne tribuendam esse judicatis tot Sanctorum praedictis, quam vestro singulari privatoque judicio?

### SPECVLATIO III.

*Conspirans etiam totius Ecclesiae Catholica sensus invidium prabet infallibilis firmitatis argumentum.*

**A**ddit iste tertius locus aliquid supra traditiones. Quia si de aliqua quaestione noviter orta dubitatur, an eius clara explicitaque decisio tradita sit, illa sententia reprobanda est, cui fidelium omnium conspiratio refragatur; si verò applaudit Orthodoxorum concilio tota, suscipienda est. Huic loco contermina est universalis Ecclesiae consuetudo laudabiliter inchoata, & nullo repugante propagata. Quantumvis enim illa consuetudo non fuerit ab initio, mo-



dò non repugnet perpetuæ doctrinæ, sine hæresi  
rejici non potest. Unde legitima est hæc conse-  
quentia : Tota Ecclesia docet illud esse verum  
& licitum, v.g. tota Ecclesia tenet ritum cele-  
brandi Missam hoc vel illo modo licitum esse;  
hunc vel illum Sanctum albo recentè ascriptum  
esse publicè invocandum; hanc vel illam regu-  
larem vivendi formam de novo institutam esse  
salutarem : Ergo talis ritus, talis Sanctus, talis-  
que Religio inter res sacras debent annumerari.  
Itaque traditio est vetusti dogmatis propositio;  
authoritas verò Ecclesiæ etiam sese extendit ad  
nova, sed antiquitati non contraria, sed potius  
virtualiter in illa inclusa; non secus ac scientia  
conclusiones certas ex universalibus, & anti-  
quissimis principiis lumine naturali notis novas  
in dies & certas conclusiones derivat.

Porro hujus veritatis, quam speculatio tradit,  
propugnandæ zelantissimi fuerunt semper viri  
Catholici. Quia, ut rectè Doctor Angelicus 2.2.  
q. 10. art. 12. ait : *Consuetudo Ecclesiæ semper est in  
omnibus amulanda, quia & ipsa doctrina Catho-  
licorum Doctorum ab Ecclesiâ authoritatem habet.*  
*Unde magis standum est authoritati Ecclesiæ, quàm  
authoritati Augustini, vel Hieronymi, vel cujus-  
cumque Doctois.* Et ante ipsum Augustinus epist.  
118. *Si quid tota per orbem frequenter Ecclesiâ,  
hinc quid ita faciendum sit disputare insolentissi-  
mi sententia est.* Consentit Hieron. dialogo ad-  
vers. Luciferian. cap. 4. *Eriam si Scripturæ aucto-  
ritas non subesset, totius orbis in hanc partem con-  
sensus instar præcepti obtineret. Nam & n. u. t. a. alia,  
quæ per traditionem in Ecclesiis observantur, au-  
thoritatem sibi scriptæ Legis observaverunt. Cui  
dicto subscribit ibi Orthodoxus.*

Immobilis hujus loci firmitas peti aliunde non debet, quàm ex promissionibus divinis, quibus fidem Ecclesiæ nunquam defecturam Dominus pollicitus est. Cum enim militans Ecclesia sit collectio fidelium, qui de se fallere, fallique possunt, cum sit omnis homo mendax; proinde inalterabilis veritatis constantia proficisci non potest nisi à Spiritu veritatis, à quo dum regitur homo, in fide continetur, & in errorem labi non potest. Atqui illustres habentur promissiones de assistentia illa Spiritus sancti ab Ecclesia nunquam abfuturi. Nam *Matth. 16.* dicitur: *Super hanc Petram edificabo Ecclesiam meam, & porta inferi non prevalebunt adversus eam.* *Joan. 14.* *Ego rogabo Patrem, & alium Paracletum dabit vobis, ut maneat vobiscum in æternum spiritus veritatis.* Quin & in veteri Instrumento ejusdem inconcussæ & inconcutiendæ veritatis promissiones habentur. *Osee 2.* *Sponsabo te mihi in sempiternum, & sponsabo te mihi in fide.* Si autem Ecclesia in fide deficeret, profectò dissolveretur illud matrimonium. *Isaia 59.* *Spiritus meus qui est in te, & verba mea, quæ posui in ore tuo, non recedent de ore tuo, & de ore seminis tui, à modo usque in sempiternum.* Ergo Ecclesia tota errare non potest, sed est columna & firmamentum veritatis, fundata super stabilitatem suam, quæ non inclinabitur in sæculum sæculi, juxta illud *Paul. 1. Timot. 3.* *Est Ecclesia Dei vicus firmamentum, & columna veritatis.*

Probatur etiam convenienti ratione: Si tota collectio fidelium eadem religione & fide Deum confitentium posset errare, nulla esset in Ecclesia legum ferendum auctoritas certa, nulla firmæ clavium potestas, nulla Ecclesiasticorum judicio-

rum vis, quæ non possit eludi. Nam si verum est, Ecclesiam sub cælo totam posse interdum errare, dubia semper erit fides, num Ecclesia hoc vel illo in puncto aberret à vero, si semel cespitare potest: subindeque erimus semper sicut parvuli fluctuantes, agitati omni vento doctrinæ, in nequitia hominum, in astutia ad circumventionem erroris. Hoc argumentum urget ipse Paulus *Ephes. 4.* ut probet in Ecclesia debere esse Prophetas, Apostolos, Doctores, Pastores ad consummationem Sanctorum, in opus ministerii, in ædificationem corporis Christi. Plura ad hanc firmandam assertionem videre poteris dissertatione præambula tomi superioris, quæ iterare non expedit.

Respondebis, promissa illa tam magnifica de protectione veritatis nunquam & nusquam peritura intelligenda esse de Ecclesia prædestinatorum & Sanctorum; unde si contingat corruptio vitiorum generalis, Spiritus veritatis, quem mundus non potest accipere, discedet ab Ecclesia, quæ repente in variorum barathrum errorum ruet.

Sed hæc hæreticorum modernorum responsio Ecclesiâ ad solos prædestinatos soli Deo notos, nobis verò incognitos relegans superiori tomo reprobata est, nec tam est opinantium hominum quam insanientium vel desperatorum subterfugium. Non negamus quidem bonorum collectionem speciali quodam pacto ad Ecclesiam Dei pertinere, sed contra hæresum pestes verè & jure contendimus Ecclesiam Catholicam bonos & malos simul complecti, quippe quæ iuxta veritatis oracula assimilatur sagenæ missæ in mare ex omni genere piscium congreganti; agro fru-

mento & zizaniis, tritico paleaque constanti; familiæ ex virginibus fatuis & prudentibus, probis & nequam servis coalescenti; & magnæ domui, in qua vasa aurea & argentea, lignea quoque & fictilia; sive in honorem, siue in contumeliam inveniuntur.

Deinde: Promissiones Dei de Ecclesia non sunt sic accipiendæ, ut sint inutiles & exitiosæ; hoc enim divinæ sapientiæ esset injurium. Si enim Principum leges, Senatum consulta & privilegia intelligi non possint eo sensu, quæ inania essent Reipublicæ, vel fatalia; multò minùs id. credendum est de favoribus, quibus sponsam suam Ecclesiam Christus promeruit. Atqui si dona, authoritas, jus, & non errandi privilegia collata Ecclesiæ de solo piorum vel prædestinatorum incognitorum cœtu intelligerentur, Lex Evangelica esset inanis, utpote ad ignotos provocans, unde esset dissidiorum interminabilium inexhausta scaturigo: ergo sanctitas promissa est Ecclesiæ independentem à sanctitate ministrorum.

Non inficiamur quandoque ita inundare flagitia, ut boni in comparatione malorum non solum pauci, sed ferè nulli videantur. Hinc illæ querelæ, illæ Prophetarum lacrymæ, illa suspiria Sanctorum lamentantium, non esse à planta pedis usque ad verticem sanitatem, omnes dereliquisse Deum, non esse qui faciat bonum, non esse usque ad unum. Nec tamen sequitur totam Ecclesiam defecisse; nam semper fuerunt dolentes & gementes super cunctis abominationibus populi, ut habetur *Ezech. 19*. Unde Paulus quos in epistolis suis schismaticos, carnales, inflatos, insensatos, fascinosos, propter permixtos

malos appellat, eisdem sanctificatos, sanctos, spiritales appellat. Quia nimirum, ut Augustin. *epist.* 48. observavit, habent Scripturæ hunc arguendi morem, *Vt tanquam omnibus dicatur, & ad quosdam verbum perveniat.*

Objiciunt hæretici & coacervant omnes, quas possunt, sæculorum sordes, ut Ecclesiam matrem suam, postquam dereliquerunt, impiè inhonorent; furtiva quorundam scelera deducunt in publicum, & in conspectu Solis denudant opera tenebrarum. Sponsæ Christi erroris notam inurunt, & antiquos & modernos membrorum emoveant fœtores, ut parentem, si possent, conspurcarent. *Sopitos jam cineres* (ait sæpe memoratus Lirinensis) *profana manu ventilant, & qua silentio sepeliri oportebat, rediviva opinione diffamant, sequentes omninò vestigia authoris sui Chæm, qui nuditatem venerandi Noë non modò operire neglexit, verùm quoque irridendam cæteris enuntiavit.*

Sed eorum impietatem facilè confundet, qui consideraverit cum Augustino paulò antè citato, Ecclesiam etiam, dum videtur multitudine scandalorum obscurata etiam tunc in suis finissimis eminere. Sic tempore nascentis Ecclesiæ Pastores & oves errabant in montibus & sylvis, latitabant in lacubus & speluncis, nec tam videbatur Ecclesiæ congregatio, quàm dispersio fidelium. Sic item tempore Arrianæ perfidiæ ingenuit totus orbis. & teste Hieronymo, Arrianum se esse miratus est. Tunc sanè periclitabatur navicula Petri, urgebant venti, fluctibus latera tundebantur. Tunc temeratis conjugibus, profanatis virginibus, depopulatis viduis, demolitis Monasteriis, disturbatis Clericis, verberatis

Levitis, actis in exilium Sacerdotibus Orthodoxis, aliisque innumeris partim vi, partim fraude deceptis, caligo quædam toti Ecclesiæ offundi visa est. Sed in alto tot hæreseon, nimborum, discriminumque pelago fuit quidem procellis jactata Ecclesia, & penè fluctibus operta; nunquam tamen demersa est, sed eo magis, juvante Deo, emicuit fidelium in remigando labor, quo proximè periculum imminebat. Fuerunt enim, & adhuc sunt viri intrepidi, quos nulla vis, nulla enumeratarum ab Apostolo calamitatum terribicula separare possunt à fide & charitate Christi. Perennis illa Spiritus sancti protectio singulis quibusque insurgentibus hæresibus aptas opposuit acies, instruxitque duces idoneos, qui prostratas repararent Ecclesias, vivificarent extinctos populos, dejectasque reponerent Sacerdotum coronas. Sic Arrio Athanasium, Nestorio Cyrillum, Eutycheti Leonem, Augustinum Pelagio, Prosperum Massiliensibus; Albigensibus Dominicum, Luthero Ignatium, aliosque sine numero per cuncta singulatim temporum curricula objecit, qui mundum sæva repentina hæreseos tempestate perculsum à novella pravitate ad antiquam fidem revocarent.

Dices: Tempore Synagogæ totus populus à fide deficiens in idololatriam prolapsus est, & in fine mundi fidem in terra se non inventurum Filius hominis comminatur, *Luc. 18*. Quidni similiter in medio annorum interdum excutit Ecclesia, quæ non debet esse melioris conditionis præsens, quàm præterita, vel futura.

Respondeo, quod licet populus Judaicus videatur fuisse aliquando ita dispersus, ut nulla ferme species appareat; fuerunt tamen semper aliqui  
secundum



secundum cor Dei, qui & peccatorum excessus plangerent, & integritatem Fidei conservarent. Est etiam aliqua differentia inter Synagogam & Rempublicam Christianam; illa enim aliquando, casura ruinam minabatur; & sempiternam noctem obscuranda alternatim obumbrabatur: isti verò Sol justitiæ æternam veritatis diem attulit. Quod verò dicitur *Luc. 18.* de ultimis diebus, vel intelligitur de fide illa, de qua scriptum est, *Fides tua te salvum fecit*: & iterum *Matth. 17.* *Amen dico vobis, si habueritis fidem sicut granum sinapis, dicetis monti huic, Transi hinc, & transibit.* Ubi fides accipitur pro firma fiducia, quæ etiam apud eos qui bene credunt, difficilè invenitur, & interdum in ipsis sanctitatis columnis trepidat. Vel significatur illis verbis, Antichristi vi, & peccatorum pondere multos à fide Christi discessuros. Vel denique de fide charitate formata, & per dilectionem operante explicari commodè potest.!

Objicies iterum: Inter Ecclesiæ consuetudines nonnullæ servantur, aliæ veluti antiquatæ in desuetudinem abierunt, ut patet legenti Ecclesiasticam historiam. Ergo ex ritibus Ecclesiæ, ejusque authoritate non potest firmum elici argumentum.

Respondeo hanc objectionem, si quid probaret, militare etiam contra ipsam Scripturam, cujus præcepta cæremonialia veteris legis rescissa sunt, & nonnulla etiam ab Apostolis lata, ut de abstinentia à sanguine & suffocato. Sciendum ergo, præcepta non solum Ecclesiastica, sed etiã ab ipsis Apostolis immediatè verbo vel scriptis tradita, alia fuisse tæporalia, seu ad tempus præscripta, ut Baptismus in nomine IESU, & abstinentia præfacta; alia verò perpetua, seu perpetuis futuris tæporibus observanda, putà lex de aqua calici permis-

cenda in Sacrificio Altaris, & sic de aliis. Rursum sacrarum consuetudinum aliæ sunt à Christo auditæ, ut formæ & materiæ Sacramentorum; aliæ quas ipsimet supremi Ecclesiæ Pastores Spiritu sancto inspirante, & plebe Christiana usu firman- te sanxerunt, qualia sunt jejunium quadragesi- male, institutio Religiosorum, &c. In illa quæ à Christo audierunt, cum sint juris divini, Ecclesia nihil habet potestatis, nec ea potest contraria consuetudo abrogare. In secundis verò Ecclesia & ejus. Caput Romanus Antistes gravibus de causis dispensat vel ex toto, vel ex parte: inter quæ numeratur trina immersio primitus in Bap- tismo adhibita, quotidiana Eucharistiæ percep- tio, pœnitentiæ rigor in Canonibus Apostolicis præfinitus, & sic de aliis, quæ erant pro certorum temporū necessitatibus constituta. Lex enim, quæ ex fine pensanda est, tunc potest à legitimis Supe- rioribus immutari, cum ab illis offensionibus, pe- riculis, aliisque quibus occurrere voluerunt pri- mitivi Legislatores, nihil ampliùs timendum est.

### REFLEXIO.

*Consuetudo Ecclesiæ est in omnibus emulanda*, in- quiebat S. Thomas: Ergo contra illam humanus abusus non prævalebit. Quantum hac in re ca- venda plurimùm est intolerabilis plurium mo- dernorum licentia, qui ut sacras S. Ecclesiæ Ro- manæ leges pro libito negligant, statim desuetu- dine abrogatas affirmant! Hoc effato omnem dis- ciplinæ modum enervant, severitati aditum obse- piunt, pœnitentiam ad nihilum redigunt, multo- rumque flagitiorum patrociniū suscipiunt. Cer- tè nisi hæc nimis trita doctrina cohibeatur, nihil erit tam Sanctum quod non attentetur, nullus

erit Pastorum conatus, & in legibus condendis zelus, qui non sit irritus & inanis; & quantumcunque ad instaurandam collapsionem Superiores incumbant, proficere tamen nihil omnino poterunt, si paucorum annorum desuetudo per inobedientiam introducta, omnes sine delectu Ecclesiæ leges abroget. Ad quid enim proderit Rectorum animarum sollicitudo, qui sacros Canones condiderunt, ut ministrorum formarent mores, reformarent abusus, rescarent nascentes labes, succrescentes rescinderent, veteres eradicarent, si solâ hominum in iis violandis audaciâ annis firmatâ, subindeque nigis ob contumaciam reâ, tam veneranda decreta ad componendos mores frenandaque vitia instituta jacere abrogarique putentur, nec ullam obligandi habere vim, quoties oscitanti alicui semidocto dictitare, vel scriptitare libuerit, sanctiones non esse usu receptas.

Vbinam gentium sumus, Christiane Lector? Siccine cœlestia illa, Patrum instituta, firmataque Spiritu Dei regulæ ad mores pertinentes conculantur, exolescunt, extinguuntur? Nonne idem perseveranter regit Ecclesiam Spiritus sanctus, qui temporum decursu nullam pati labem, nullam vicissitudinis obumbrationem potest? Nunquid minùs nunc quàm olim scelera destituit Ecclesia? Nunquid minorem, saltem internam, ad Sacramenta percipienda sanctitatem præcipit? Nunquid minùs castos, minùs avaros & ambitiosos oprat Ministros? Absit, absurdum est, indignum est, & antichristianum.

Verum quidem est, præcepta illa, quæ ad caeremonias pertinent, externamque Ecclesiæ disciplinam, pro varietate temporum sæpe variare.

Observat tamen D. Thomas quodlib. 9. art. 15. *Quod jura antiqua quantum ad hoc quod continent jus natura. e, abrogari non possunt per contrariam consuetudinem, ut pote irrationabilem. Eo quod dispensatio humana non aufert ligam. n. juris naturalis, sed solum ligamen juris posuisti, quod per hominem statuitur. & per hominem dispensari potest.* Unde quavis desuetudine obstante, non continuo Canonum vigor extingui putandus est, quia manet semper ipsa sacratissimarum legum ratio, semper durat quidquid in eis divini ac naturalis est juris; semper vivit spiritus Christi in vivis membris residens, eundemque semper inspirans de moribus sensum, fixum, immutabilem, immortalem: quem spiritum Christi qui non habet, hic non est ejus.

Lutheranos & Calvinistas Ecclesiae consuetudines & sacros ritus calcantes execramur, & jure detestamur; & patiemur quosdam Catholicos ratiunculis nescio quibus non probantes ea quae olim probata sunt, non ingemiscentes & dolentes, quod tam necessariae leges passim floccifiant; non desiderantes, ut instaurentur; non studentes, ut teneantur; non curantes, ut renoventur; non connitentes, ut ad illas Fideles prudenter quidem, sed ferventer mores exigant suos? Considerent hujusmodi laxones axioma illud in jure traditum, & à S. Thoma loco citato memoratum: *Multa per patientiam tolerantur, quae si in judicium fuerint deductae, justitiâ cogente cassarentur.* Attendant ad grave Petri Cantoris dictum: *Non minus peccas, quia cum multis, sed magis peccas; nec minus ardebis, quia cum pluribus.* Videant omnem disciplinae sanctitatem sine metu ac pudore fore citò exsufflandam, si in impro-



borum resistentium potestate omnia Ecclesiæ decreta ponantur. Audiant istud egregium S. Thomæ pronuntiatum, 1.2. q.97. art.3. *Si manes ratio eadem, propter quam lex primò utilis erat, non consuetudo legem, sed lex consuetudinem vincit.* Sciant sanctiores disciplinæ leges in corde Sacerdotum impressas & consignatas esse debere. Sciant Prælati, peccantium multitudine servorum Dei constantiam non frangi, sed roborari, ut fideles inveniantur. Sciant Pastores animarum, malas consuetudines non minùs quàm perniciosas corruptelas esse vitandas, radicitus evellendas, à solis improbis recipiendas, à probis autem prævaricationis locò habendas. Sciant Episcopi, non levem ab eis exacturum Deum rationem, nisi irruentibus collabentis Ecclesiæ disciplinæ abusibus totis viribus obnitentes vehementissimè reluctentur. Sciant ipsorum esse observantiam legum instaurare, & efficere ne abolitæ putentur. Sciant non ad hoc divinitus datam ipsis esse potestatem, ut promiscuè rigorem decretorum mitigent, sed ut observetur totis viribus incumbant, & prævaricatores puniant, quia eorum est depositum custodire; potestatis thesauros non dissipare, sed dispensare; magisque prodesse, quàm præesse. Quàm sapienter Magnus Gregorius lib.5. epist.112. *Iustitia & rationis ordo suadet, ut qui sua à successoribus desiderat mandata servari, decessoris sui proculdubio voluntatem & statuta custodiat.* Et lib.12. epist.31. *Si ea destruerem quæ antecessores nostri statuerunt, non constructor, sed everfor esse justè comprobarer.*

## CAPVT II.

*De Conciliorum , & Romani Pontificis  
authoritate , necnon de aliorum quin-  
que locorum vi.*

**Q**uestiones infinitas de Conciliorum , Ro-  
manique Antistitis auctoritate non perse-  
quor , Canonistis ventilandas relinquens. Vē-  
rū quia hæreticorum , nominatim Calvinista-  
rum nostrorum in Romanam Sedem contentio  
pertinax & odium æternum est , ideo hic lon-  
giores parū erimus , quā solemus : sed si  
prolixior videatur dissertatio , cum utilitate ra-  
men comparata brevis videbitur.

## SPECVLATIO I.

*Concilium in Spiritu sancto congregatum  
in fide errare non potest, subindēque ejus  
definitiones firmissimæ sunt auctoritatis.*

**P**robandæ huic veritati quædam præmitten-  
da sunt omninò necessaria. Sciendum igitur  
primò, Concilia alia esse generalia, alia Provin-  
cialia, alia diœcesana. Generalia indicuntur & ce-  
lebrantur auctoritate summi Pontificis universi  
Catholici orbis Episcopos convocantis, ad quod  
tamen non est necesse quod omnes conveniant, in  
nullo enim hætenus omnes visi sunt ; requiritur  
tamen quod in magno numero , & ex multis &  
melioribus Provinciis congregentur. Provin-  
cialia celebrantur à Metropolitano vel Primate



alienius Provinciae vel Regni Episcopos cogente. Diocesana instituuntur ab Episcopo Parochos & Sacerdotes suae dioceseos convocante.

Sciendum rursus Episcopos in Concilio œcumenico congregatos, non esse tantum Consiliarios, sed iudices controversiarum. Nam in Concilio primo Hierosolymitano non solum Petrus, sed etiam alii Apostoli iudices esse dicuntur. Dixit enim Iacobus Act. 15. *Propter quod ego iudico, non inquietari eis qui ex Gentibus convertuntur, sed scribere ad eos, ut abstineant se à contaminationibus, &c.* Et ratio est, quia aliàs in ferenda sententia non solum Episcopi, sed etiam eruditi prudentesque Theologi adhiberi possent; quod usui Ecclesiae repugnat. Tum quia omnibus Episcopis in persona Apostolorum collata est potestas ligandi atque solvendi. Tum quia id perspicue indigitat solita Conciliorum forma loquendi, quia Patres sententiam suam non per modum consilii, vel opinionationis, sed statuti, decreti, & anathematis ferunt.

Sciendum tertio, conventus Episcoporum parere certa & infallibili in suis decretis auctoritate, nisi fuerint à Romano Antistite congregati, ab eodemque confirmati, sine quo sunt acephala iniquitatis conventicula, quibus semper exitiales fines contigerunt. Unde S. Damasus ingentem numerum Concilii Ariminensis contempsit, & tantæ illi multitudini paucos Orthodoxos opposuit. *Neque enim* (inquit in epist. ad Episcopos Illyrici) *praedictum aliquod fieri potuit per numerum Arimini congregatum, quando constat Romanum Episcopum, cuius ante omnia deceat eos expectare decretum, talibus non præbuisse consensum. Neque ulla unquam Concilia rata leguntur* (addit idem Pontifex vel quivis alius epist. ad Stephanum

num & Concilium African. ) *qua non sunt fulta Apostolicâ auctoritate.* Et in Cōcilio Chalcedonensi caput accusationis contra Dioscorum Patriarcham Alexandrinum fuit, quòd Synodum inconsulto Romano Pontifice convocarit, quod nec fieri licet, nec aliàs unquam factum est. S. etiam Leo Papa epist. 51. dixit : *Nulla sibi met de multiplicatione congregationis Cencilia blandiantur, quasi refutari nequeat, quod illicite voluerit multitudo.* Hujus tamen doctrinæ duas exceptiones afferunt communiter Theologi & Canonistæ. Prima, si Papa in hæresim labatur, sicut adversus Marcellinum idolorum cultorem Concilium coëgit Clerus Romanus; si tamen vera est illa Marcellini historia. Secunda, in casu schismatis, & juris utrinque ambigui, ut ex Concilio Constantiensi notissimum est.

Sciendum quartò, Concilia Provincialia legitimè à Metropolitano cōgregata de se ante Romani Pontificis approbationem probabilissimè veritatis argumentū efficere, implicite enim Ecclesiæ consensu comprobari cēsentur, donec expressè damnentur. Idem censendum est de communi Episcoporū Catholicorū sensu per literas Pastorales in toto aliquo regno explicato, qualis fuit Apostolica illa totius ferè Galliæ Episcoporū conspiratio, quæ non ita pridem enituit in cohibenda profana modernorum Casuistarū laxitate. Et ratio est, quia ut dicitur dist. 83. *Error cui nō resistitur, approbatur.* Unde si Ecclesia Romana acta Concilii Provincialis vel concordem Catholicorum Præsulū sensum sibi notum dissimulet, comprobatur. Si verò Concilia Provincialia in Ecclesia recepta, auctoritate summi Pōtificis confirmantur, tunc infallibilem præbent regulā

credendorum. Et ideo in 8. Synodo, *sess. ult. can. 1.* dicitur: *Regulas Ecclesie Sanctae, quae tam à Sanctis Apostolis, quam ab Orthodoxorum universalibus, necnon & localibus (id est Provincialibus) Conciliis traditae sunt, servare ac custodire profiteamur.*

Sciendum quintò, Spiritum Sanctum infallibiliter assistere Patribus Concilii, non dormientibus vel oscitantibus, sed summam diligentiam rei, de qua disseritur, veritatem quaerentibus. Neque enim Ecclesia habet novas revelationes, sed ratione, examine, doctrinam, disquisitione verum discernit à falso, nec nisi post multas collationes, & preces ad Deum fusas. Quia Deus fortiter quidem, sed suaviter omnia disponit: & ideo quia Deus Ecclesiae fidei firmitatem promissit, illi etiam viros idoneos tribuit ad fidei controversias discutendas; largitur gratiam & spiritum precum, ad auxilium suum impetrandum exigitque simul curam, vigilias, dissertationes, & operas Patrum in Concilio sedentium. Unde si evidenter constaret de Praelatorum incuria, nutarent Concilii definitiones. Ceterum id nunquam praesumendum est de Synodis ab Apostolico throno confirmatis, sed potius certum & constans esse debet, Concilia à Pontifice approbata omnem operam & diligentiam navasse, alias firmum ratumque in Ecclesia nihil haberemus, & Patrum negligentiam praeceperet semper haeretici & morosi. His praemissis.

Probaturs speculatio: Ecclesia Catholica errare non potest, ut superiori capite demonstravimus. Ergo neque Concilia generalia legitime congregata & approbata ullum continent errorem. Probaturs consequentia. Impossibile est totam Ecclesiam non errare, si Orthodoxi Episcopi in Oecumenica Synodo congregati errent. Si enim omnes Pastores,

& præcipue dum simul conveniant, à recto fidei tramite devient, aberrare quoque oves universas necesse est. Si sal terræ totius, qui sunt Doctores condiendis populis destinati, evanuerit, in quo salietur? Si lux mundi tenebræ fiat, quomodo subsister lumen veritatis? Si Ecclesiæ oculi fuerint nequam, nonne totum corpus tenebrosum erit? Ita planè. Ergo si tota Ecclesia errare non potest, neque etiam errare possunt Concilia œcumenica, quæ totam Ecclesiam repræsentant. Neque enim ad exhibendum totius Ecclesiæ sensum requiritur consensus & suffragium fidelium singulorum, alioquin ad abstrusæ cujusvis quæstionis decernendam inquirendamque veritatem, sæcularium sensa postulare, rusticorum decisiones expectare, muliercularum judicia vestigare oporteret, quod ridiculosissimum est. Ergo ad exprimendam Ecclesiæ totius sententiam sufficit Pastorum judicia ventilare. Nam ut dicit Aug. lib. 1. de Bapt. cont. Don. c. 18. *Plenarii Concilii sententia, totius Ecclesiæ consensus est.* Et ideò Gregor. Magn. sc. quatuor Concilia generalia, Nicænum, Constantinopolitanum, Ephesinum, & Chalcedonense, non minori prosequi reverentiâ testabatur eâ quam quatuor Evangeliiis deferbat. Et Ambros. epist. 2. *Sequor tractatum Concilii Niceni, à quo nec mors, nec gladius me separabit.* Et Magnus Leo de rebus apud Nicæam & Chalcedonem definitis, ait epist. 78. *Nullum audeamus inire tractatum, quasi dubia vel infirma sint. quæ tanta per Spiritum sanctum fixit auctoritas.*

Dices: Si Concilium œcumenicum infallibili polleat autoritate, non indigeret confirmatione Romani Pontificis, quam tamen esse necessariam superius supposuimus.

Respondeo Conciliorum definitiones nondum

esse completas donec Romani Pontificis decisio veluti ultimum sigillum apponatur; nam ad illum tandem referenda est omnis fidei quæstio, pro quo Christus oravit ne deficeret fides ejus, & cui præcepit, ut confirmaret fratres suos. Quod sanè incomparabile privilegium uni Romano Pontifici eximium est, nec illud in Legatos transfundere potest, sicut non potest facere quin solus ipse Vicarius Salvatoris, solus Pastor Urbis & Orbis, solus sit Petra, cui innixa perseverat Ecclesia. Idque experienciâ ipsâ compertum fuit: nam errori & schismati Concilii Basileensis Cardinalis Julianus Apostolicæ Sedis Legatus dum turpiter subscripsit, turpissimè erravit, & ministerium suum inhonoravit: sicut etiâ cum Dioscuro Ephesinum Concilium secundum à Leone convocatum, sed minimè firmatum, infelicitè impexit. Uno verbo, Concilium totam Ecclesiâ non repræsentat, donec Capitis habeat assensum, sine quo truncatum & acephalum est. Adde quod Concilium ex propria ratione Concilii non est ultima regula credendorum, quia contingere potest in Concilio esse dissensiones, & sententiarum diversitates; ideo necessariò debet dari regula superior, quæ nunquam, saltem cum Concilio, possit sentire defectum. Quod si concors Patrum mens in unam nullo refragante sententiam conspiret, tunc Concilium errare non potest, quia totam Ecclesiam, quæ errare non potest, non entitativè, sed authoritativè repræsentat, & in hoc sensu intelligitur speculatio nostra.

*Reflexio, & apostrophe ad hæreticos.*

Dum Ecclesiam totam in tot Conciliis Oecumenicis, & novissimè in Tridentino post homi-



num memoriam celeberrimo errare iterum atque iterum occinitis(moderni Lutherani & Calvinistæ)mirum est tantum apud vos potuisse diabolum, ut à solis ortu usque ad occasum tot ac tantos Christianæ fidei Doctores antiquos, & nostræ ætati contiguos non solum deserere, verum etiam errantes infrunito ore audeatis appellare. *Sed mirum* (ait Aug. lib. I. cont. Jul. c. 5.) *si in facie hominis tantum intervallum est inter frontem & linguam, ut in hac causa frons non comprimatur linguam.* Sed absint à verbis meis injuriæ, quæ à vestrorum Ministrorum Romanam Ecclesiam inclementer lacerantium sermonibus non absunt. Ego enim pro dilectione, quæ nihil est erga vos, quam Deo propitio quibuscumque convitiis absit ut de medullis mei cordis extirpetis, iterum atque iterum rogo: Auscultate maternas Ecclesiæ Catholicæ voces, quæ aperit vobis sinum & ubera, non typho turgentia, sed lacte manantia, & ore Doctorum suorum in hæc verba prorumpit.

Revertere, revertere secta novella, revertere ad matrem, quæ Patres tuos concepit: veritati cede, fructu bono meo, cohibeatur perduellio, impietas expietur, vera Religio conservetur. Apud me invenies, quod Hærelarchæ tui summâ intentione quæsierunt, nec invenire potuerunt. Ostendant tibi veritatem non solum facilem, sed etiam favorabilem. Errores quosque tuos iisdem telis, quibus armaris, retundam: Traditionum depositum, quod custodio, quod sexaginta fortes ambiunt, ex quo mille pendent clypei & omnis armatura fortium, quod viginti Occumenica Concilia circumvallant, quod nubes testium doctissimorum, & juxta sanctissimorum adornat, monstrabo tibi; aliaque quæ facilius est sentire,



quàm dicere, tibi spondeo majora percepturæ. Ne timeas vinci, quia si vincaris, & vinces; nam si ego victor tui, ita tu triumphatrix erroris: nec solâ me superasse existimabo, vincemus utraque, utraque nostrûm palmâ referet: ego tui, tu hæresis, si tandem benè deferas quod malè tenuisti.

Errorem tuum, amabò, jam tandem agnosce, & erubescce, vel serò discas ab Apostolo non omni spiritui credere; discas à Salomone multos quidem amicos, unum autem habere consiliarium de mille, nempe Romanum Antistitem, Patrum Patrem, afflictorum perfugium, totum ad clementiam natum, & ad pietatem comparatum. Discas Præcursorum Domini exemplo non solùm mollibus non vestiri, id est carnalibus Lutheri doctrinis pasci; sed nec in modum vento agitatae arundinis circumferri omni vento doctrinæ. Discas Evangelio domum tuam supra Petram fundare; nam qui ceciderit super lapidem istum, confringetur; super quem verò ceciderit, conteret eum. Obsecro te per viscera misericordiæ Dei nostri, & contra juris ordinem rogo te, à qua rogari debueram: revoco læsa eam quæ me læsit, spreta requiro contemptricem. Veni, veni tantùm, veni citò, & pax erit. Revertere, & satisfactum est. Humilitatem exhibeo, charitatem promitto, & tu times? Intrepida veni, quò te vocat humilitas, pertrahit amor, recipiet mansuetudo. Secura accede talibus præventa obsidibus. Quod si Concilia Ecumenica, in quibus, ut ait Tertull. lib. de jejun. cont. Psychicos, ipsa representatio totius nominis Christiani magna veneratione celebratur, te nec vincunt, nec convincunt; quid respondere poteris supremo Judici dicenti tibi: Cur Lutherum

Calvinumque toti Ecclesiae prae tulisti? Cur hos apostatas in Apostolos elegisti? Spiritum privatum infallibiliter veritatem discernentem cuilibet fidelium asseruisti, quem perfrecta fronte toti Ecclesiae Petri, pro quo rogavi ut non deficeret fides ejus, impudenter denegasti? Cur meam de Ecclesia providentiam, dam abstulisti, inhonorasti; & infidelitatis, quasi non steterim clarissimis promissionibus, blasphemiam accusasti? Verbis meis, quibus solis omnes vis controversias dirimi, adulari fluxisti, & proprium judicium superbissima extulisti, quia videlicet Scripturam meam pro ipsa sua altitudine non uno eodemque sensu universi accipiunt, sed ejusdem eloquia aliter atque aliter, alius atque alius interpretatur, ut penè quot homines sunt, tot illius sententiae erui posse videantur; suntque non pauca difficultia intellectu, quae indocti & instabiles depravant in suam ipsorum perditionem, & tu eorum intellectum sola tibi impudentissimè arrogasti. Id dixit olim Christus sponsus meus, zelotes. Sed iterum atque iterum hæc Hieronymi *epist. 65. ad Oceanum*, tibi inculco: *Vsq̃ue ad hanc diem sine ea doctrina mundus Christianus fuit, eam senex tenebo fidem, quam à parentibus accepi; cur post quadringentos annos (sexcentos supra mille) docere nos niteris, quod antea nescivimus? Si me audis, Christum audis: si me spernis, illum spernis, qui in judicio suo majorem ex hac mea hortatione tibi habet inferre damnationem, si nullam ex ea in te repererit emendationem.*

## SPECVLATIO II.

*Summi Pontificis, Romani scilicet Episcopi in universam Christi Ecclesiam Primatus ostenditur: Romana Sedes ex institutione divina centrum est Catholica unitatis, & vera Religionis.*

**A**B hac assertionē abhorruere semper hæretici omnesque novitatum amantes. Cathedra enim Petri fuit semper signum, cui contradictum est, illudque veræ Religionis firmamentum variis artibus diabolus subruere molitus est; modò schismatibus dividere, modò irrisionibus & blasphemiis inhonestare, modò hæresibus infestare, modò non satis cordatorum Catholicorum jaculis sæpè sæpiùs vibratis ferire tentavit, sciens oves Christi citò dispersum iri, si pastor exturbetur, citòque casuram ædificationem, si fundamentum, cui superstructa est, concutiat. Neque enim, ut scripsit Cyprianus ep. 55. *aliunde hæreses oborta sunt, quàm inde quod Sacerdoti Dei non obtemperatur, nec unus in Ecclesia ad tempus Sacerdos, & ad tempus Iudex vice Christi cogitatur.* Illum Sacerdotem esse Romanum Episcopum, clarè significat, dum ait: *Navigare audeat & ad Petri Cathedram, a que ad Ecclesiam principalem, unde unitas Sacerdotalis exorta est. Vna Ecclesia,* inquit ep. 40. *& Cathedra una super Petrum Domini voce fundata. Quisquis alibi collegerit, spargit.* Ut autem solidè stabiliatur tam momentosa veritas, quâ totius Ecclesiæ unitas continetur, statuitur incorrupta schismatum promptè extinguendorum regula, indigitaturque lydius lapis Catholicismi

puri, probati, & purgati septuplum. Totum probationum ab autoritate & ratione momentum ad hoc unum argumentum revoco.

In Ecclesia Christi agnoscenda est aliqua visibilis potestas divinitus instituta, quæ oves Christi pascat & regat, veritates orthodoxas proponat, & controversias fidei componat. Atqui hæc potestas primario & principaliter Petro Apostolo, ejusque successoribus Romanis Episcopis divinitus concessa est. Ergo Romano Pontifici eximius est in universam Christi Ecclesiam primatus, atque ut rectè ait Illustrissimus Godeus in epistola ad Alexandrum VII. Venciæ die 9. Augusti, an. 1661. Romanus Antistes in ea cathedra collocatus est, *qua non solum unitatis centrum est, sed ad quam in rebus dubiis velut ad veritatis oraculum, qui non vult errare, confugere debet. ... Num ut verbis Casarii Arelatensis utar, sicut à persona B. Petri Episcopatus sumit initium, ita necesse est ut disciplinis competentibus Sanctitas vestra singulis Ecclesiis quid agere debeant, evidenter ostendat.*

Singulæ propositiones, earumque singulæ partes seorsim sunt demonstrandæ. In primis residere in Ecclesia Christi aspectabilem aliquam potestatem Christi ovile regentem, fidei litibus præpositam, quam fideles consulere, cui uniri, à qua schismatis non sejungi oporteat, antiqui hæretici non sunt inficiati, qui propterea frequentia Episcoporum conciliabula cogebant, Romanumque Præsulem, & per eam universam Ecclesiam decipere non semel, sed frustra semper, suis moliminibus conabantur. Sed moderni Novatores apponentes iniquitatem super iniquitatem, & Patrum suorum impietatis mensuram implentes, eò præcipitii lapsi sunt, ut ultimum controversiarum de

fide iudicium privato cuiusvis spiritui afferant, & innixi prudentiæ suæ, contra sensum quem tenuit & tenet sancta Mater Ecclesia, Scripturas ad suos sensus detorquere cuique permittant. Sed verbo Dei, ad quod solum provocant, condemnantur. Dicitur enim Deuteron. 17. *Si difficile & ambiguum apud te iudicium esse perspexeris, venies ad Sacerdotes Levitici generis, & ad iudicem qui fuerit illo tempore, & facies quodcumque dixerint.* 2. Paral. 19. *Ubi cumque questio est de lege, de mandato, de caeremoniis, de justificationibus, ostēdite eis, id est Sacerdotibus, de quibus inibi sermo est.* Matt. 13. *Super cathedram Moysis sederunt Scribae & Pharisei, quæcumque dixerint vobis, servate & facite.* Si ita in veteri lege provisum erat, deteriorisne conditionis erit lex nova? Certè non poterit esse una fides, nec idipsum valebunt dicere omnes, sed continua erunt schismata, si tot iudices sint, quot capita. Frustra tot expensis, laboribus, peregrinationibus congregabuntur Concilia: frustra ad superiores Prælatos per sexdecim sæcula quæstiones fidei delatæ sunt, si omnia privati iudicii sententiâ determinari tutò potuerunt. Si non sit in Ecclesia una eminens potestas, inquit Hieronymus dialogo adversus Luciferianos, *tot futura sunt schismata, quot sacerdotes.* Id etiam constare ex novi Testamenti oraculis, & Patrum traditione statim clarebit. Iste interim locus, quo ut ait Estius, flagellantur omnes hæretici, sufficiet: *Omnis prophetia Scriptura propria interpretatione non fit.* 2. Pet. 1.

Radix totius hac in parte hæreticorum deceptionis est, quod in controversiis dijudicandis ius à iudice discernere nolunt, vel nesciunt. Ius dicitur non solum opus bonum & iustum, sed ipsa

etiam regula per quam justum constituitur; quæ regula scriptis mandata dicitur lex: Judex vero ille est, qui autoritate sua jus illud proponit, & juxta illud lites dirimit, & causas omnes judicat. Novatores confundunt jus cum judice, nec advertunt Scripturam esse quidem jus nostrum, juxta quod judicari & regulari debemus; sed illam tamen non esse judicem controversias de ipso Scripturarum intellectu sæpe exortas dirigentem, sed alium, & quidem visibilem esse assignandum.

Nec propterea sequitur auctoritatem Ecclesiæ esse supra Scripturam, cujus canonicos libros & sensum illa determinat; sicut non sequitur judicem esse supra jus, sed supra explicationem juris, & determinationem dubiorum occurrentium. Quia nimirum judex non est causa & ratio per se impertiens iuri auctoritatem, sed conditio necessaria ad talem auctoritatem exponendam. Ex quibus evanescent plura hæreticorum sophismata ex prava intelligentia illius axiomatis, *propter quod unumquodque tale, & illud magis*, deducta, quod solum de causis per se influentibus intelligitur, secus de illis quæ se habent ut conditio, qualiter se habet Ecclesiæ respectu Evangelii, cui non crederemus, nisi nos Catholicæ Ecclesiæ commoveret autoritas, ut olim dicebant Augustinus, & Tertullianus de præscript. c. 19. *Non ad Scripturas provocandum est, nec in his constituendum certamen, in quibus aut nulla, aut incerta victoria est, aut parum tua.* Quia, ut ibi prosequitur, de intellectu Scripturarum controversia excitatur. Unde consulenda est visibilis aliqua Christianæ disciplinæ regula, ad quam privatis nostras Scripturarum expositiones exigamus.



enim apparuerit, inquit, esse veritatem disciplinæ,  
 & fidei Christianæ, illic erit veritas Scripturarum &  
 expositionum, & omnium traditionum. Sed de his  
 satis in superioribus speculationibus actum est.

Quod verò potestas illa primaria Petro eximiâ  
 & singulari prærogativâ divinius concessa sit,  
 quæ est minor propositio syllogismi supra positi,  
 sic demonstratur: Petrus à Christo institutus  
 est pastor Ecclesiæ universalis; ei enim semel,  
 iterum, & tertio à Salvatore & summo Pastore dictum  
 est, Joan. 21. *Pasce oves meas*, ubi non fit distinctio  
 inter has & illas oves, demonstrans alienam  
 esse à suo ovili, quæ Petrum pastorem non  
 agnosceret. Et Matt. 16. *Beatus es Simon Bar-jona. Tu es Petrus. & super hanc petram ædificabo Ecclesiam meam, & tibi dabo clavem regni cælorum.* Ubi  
 Veritas manifestissimè loquitur de persona particulari,  
 hanc enim magis singularim & individué indigitare  
 non potuit, quàm exprimendo & nomen ejus,  
 & nomen patris, & nomen à Christo illi impositum.  
 Quod verò potestas collata Petro centrum sit  
 unius & veræ Religionis, patet tum quia Petrus  
 petra est super quam ædificata consistit Ecclesia;  
 tum quia ad versus Ecclesiam supra Petrum  
 ædificatum *porta inferi non prævalerunt*, ut ibidem  
 Christus testatur: Ego Petro data potestas immobile  
 est Ecclesiastica veritatis firmamentum, quo libante,  
 adversus Ecclesiam inferi prævalerent; concusso  
 enim fundamento, ruat fabrica necesse est super ipsum  
 ædificata.

Rursum Lucæ 22. *Simon, ecce sathan expetivit te, ut cribraret sicut triticum. Ego autem rogavi pro te, ut non deficiat fides tua, & tu aliquando conversus confirma fratres tuos.* Sicut ergo oratio Christi  
 semper est pro sua reverentia exaudita, ita Petro

collata authoritas basis est, cui nunquam defectura Ecclesiæ fides innixa est, ad eamque pertinet & titubantes confirmare, & confirmatos ne ab unitate decidant retinere. Unde ipsemet aiebat Actor. 15. *Viri fratres, vos scitis, quoniam ab antiquis diebus Deus vos nobis elegit, per os meum audire gentes verbum Evangelii, & credere.* Non potuisset autem Deus eligere eum, ut quæ doceret, gentes crederent universæ, nisi in totam Ecclesiam ubique gentium diffusam concessam sibi à Deo spiritualis regiminis potestatem haberet. Quonvis enim verum sit omnes Apostolos habuisse extraordinariam potestatem, eamque amplissimam, ut nascentem Ecclesiam propagarent, unde & dictum est eis, Matt. 18. *Quæcunque alligaveritis super terram, erunt ligata & in cælo.* Hæc tamen quanquanta erat potestas, Petro tanquam capiti subordinabatur, ut unitatis integritas permaneret, & schismatum tolleretur occasio. Sicut duci summa datur in exercitum potestas, Regi tamen subjecta. *In ter duodecim unus eligitur,* inquit Hieronymus lib. 2. cont. Jovin. *ut capite constituto, schismatis tollatur occasio. In quo (Petro) primatus Apostolorum,* addit Aug. lib. 2. de bapt. c. 1. *tam excellenti gratia præeminet. Quis nescit illum principatum Apostolatus cuiuslibet præferendum?*

Idem privilegium Beatissimo Petro cæteri catevati Patres asserunt. Selectiora testimonia producam, alia deinceps in decursu recitaturus. *Deus unus est,* inquit Cyprianus epist. 40. *Christus unus, & una Ecclesia, & cathedra una super Petrum Domini voce fundata. Petrus (addit epist. 75.) quem primum elegit, & super quem fundavit Ecclesiam.*

Nec minùs eleganter quàm apertè Chrysoft.

hom. 44. in cap. 6. Isaia: Quid autem Petrus basis Ecclesie? Ille vehemens amator Christi: ille sermone indoctus, & Rhetorum victor: ille imperitus, qui Philosophis obturavit os: ille qui Græcicam sapientiam non aliter quàm aranearum telam dissolvit: ille qui sagenam misit in mare, & piscavit orbem.

Succinit Magnus Leo serm. 2. in natali Apostolorum: In Petro, inquit, omnium fortitudo munitur, & divina gratia et ordinatur auxilium, ut firmitas, qua per Christum Petro tribuitur, per Petrum Apostolis conferatur. Et serm. 3. de sua assumpt. Tantam potentiam dedit ei Dominus, quem totius Ecclesie principem fecit, ut si quid etiam nostris temporibus recte per nos agitur, recteque disponitur, illius operibus, illius sit gubernaculis deputandum, cui dictum est: Et tu aliquando conversus confirma fratres tuos.

Astipulatur Optatus lib. 4. cont. Parmen. Negare non potes, inquit, scire te in urbe Roma Petro primò cathedram Episcopalem esse cellatam. In qua una cathedra unitas ab omnibus servaretur, nec ceteri Apostoli singulas sibi quique defenderent: ut iam schismaticus, & peccator esset, qui contra singularem cathedram, alteram collocaret. Piscator, addit lib. 7. accepit claves, ut negotium unitatis formaretur, ne quæ necessaria est, unitas esse non posset.

Ergo sicut in Salvatore (verba sunt Aug. lib. quæst. novi & vet. Testam.) erant omnes causæ Magisterii, ita & post Salvatorem in Petro omnes continentur: ipsum enim constituit caput eorum. Hinc Chrysostomus hom. 55. in Matt. vocat Petrum omnium Apostolorum os, aitque ipsum universorum orbis Christum proposuisse.

Quod autem illa regenda totius Christi Ecclesie primaria potestas successoribus Petri divi-

no jure concessa sit, quæ est altera minoris propositionis pars, facile convincitur, tum rationibus Theologicis, tum perpetua traditione. Et enim cum regnum Ecclesiæ perpetuum sit, & usque ad consummationem sæculi duraturum, Principe perpetuo eget, qui Petri primatui succedat, sicut cæteris Apostolis & Discipulis Domini successerunt Episcopi & Sacerdotes; nec est major ratio majorque necessitas unius quàm alterius. Neque enim Ecclesia quæ modò subsistit, minùs exigit unitatem, minùsve unius supremi Capitis regimen, quàm Ecclesia primitiva, cujus clavo astabat Petrus; si enim mutaretur modus regiminis, eadem non permaneret Ecclesia: teste namque Philosopho 3. Politicor. cap. 2. *Civitas dicitur manere eadem, quandiu remanet eadem forma Reipublicæ.*

Sanè si, ut paulò antea vidimus, in veteri lege unus erat summus Judex, ad quem majores causæ referebantur, cujus mandatis parère non declinando ad dexteram vel sinistram, populi astringebantur, ut multis veteris Instrumenti testimoniis confirmari potest, quantò magis id Ecclesiæ Christi negandum non est, quod Ecclesiæ eo magis necessarium est, quo ex variis nationibus, linguis, ingeniisque constat & institutis? Profectò deterioris conditionis esset Ecclesia quàm Synagoga. Imò meliùs esset regnis & rebus publicis temporalibus provisum, quæ Reges & Duces moderantur. Quin ordinatior foret privatarum familiarum institutio, quas unus paterfamilias administrat. Quamobrem sicut unitas mundi uniformiter gubernati unitatem Dei enarrat, positisque duobus primis principiis, regiminis unitas scinderetur: sic unitas Ecclesiæ ab uni-



tate capitis membra omnia in eadem communione continentis planè dependet.

Sed traditionis luculentissimos testes audiamus. *Quanam de causa*, inquit os Chrysostomi aureum lib. 2. de Sacerdotio, *sanguinem suum Christus fudit? Certè ut pecudes eas acquireret, quarum curam tum Petro, tum Petri successoribus committebat.* Ergo Petro concessa pascendarum Christi ovium potestas in successores ejus Romanos Antistites perenniter derivatur. In qua, inquit Augustinus *epist. 162. de Ecclesia Romana* loquens, *semper Cathedra Apostolica viguit principatus.* Et ante ipsum S. Irenæus lib. 3. *Ad hanc Ecclesiam (Romanam) propter potentiorē principalitatem omnem Ecclesiam convenire necesse est.* Ergo Romana Sedes aspectabile est Religionis Catholicæ centrum.

Quid autem apertius his Hieronymi *epist. 57. & 58. ad Damasum*, verbis? *Inde mihi cathedram Petri, & fidem Apostolico ore laudatam censi consulendam: inde nunc anima mea postulo cibum, à Sacerdote victimam salutis, à Pastore presidium ovis flagito.* Ego nullum primum, nisi Christum sequens, Beatitudini tuæ, idest cathedra Petri, communione consocior. Super illam Petram adificatam Ecclesiam scio. Quicumque extra hanc domum agnum comederit, prophanus est. Si quis in arca Noë non fuerit, peribit regnante diluvio. in tres partes scissa Ecclesia me ad se rapere festinat. Presidiis fulta mundi Arriana rabies fremit. Ego interim clamo: Si quis Cathedra Petri jungitur, meus est. Ergo vera catholicitatis testera est indivulsa cum Romano Pontifice communio, ejusque Sede Apostolica, quæ ut ait Cyprianus, est Ecclesia principalis, unde unitas Sacerdotalis exorta est. Nec

exorta tantum, sed per illam etiam usque ad finem sæculi permansura, juxta illud Magni Leonis serm. 2. de sua assumpt. *Soliditas illius fidei, qua in Apostolorum Principe est laudata, per ætæna est: & sicut permanet quod in Christo Petrus credidit, ita permanet quod in Petro Christus instituit.* Permanere autem non potest nisi in successoribus. Ergo sicut qui negaret Romano Pontifici facultatem ligandi atque solvendi Petro assertam, hæreticus meritò censeretur: ita & qui ei denegat pascendarum Christi ovium, & confirmandorum in fide fratrum primariam potestatem, quæ Petro non ut privato homini, sed ut Ecclesiæ præfecto congruebat.

Hinc esse Catholicum, & ab Ecclesia Romana non sejungi, sed cum illa consentire, synonymum Patres existimarunt. *Rogavit, inquit B. Ambrosius de fratre suo Satyro orat. de ejus obitu, si cum Episcopis Catholicis, hoc est cum Ecclesia Romana consentiret.* Quia nimirum quoties divisio aliqua ebulliebat, una Catholicorum omnium cura erat, ut se ab Sede Petri nunquā separarent, ad eamque amissam veram Religionē exigerent.

Hinc communionem ad Romanam Sedem Catholici Episcopi tota accuratione fovebant, tum litteris mutuis, quibus præcipuarum Sedium Episcopi electionem & ordinationem suam ad Romanos Præsules scribebant, & vicissim Romanus Pontifex principalioribus Episcopis promotionem suam indicabat, ut ex Cypriani epist. 40. & 41. notum est. Tum litteris formatis, quæ erant catholicitatis testimonia. Unde Optatus lib. 2. *Damaso Syricius hodie successit, cumque nobis totus orbis commercio formatarum in una societatis communionem concordat.* Et Chrysostom.



*Commendatio locorum Theolog. 75*

*epist. 1.* quæ habetur *tom. 5.* ab Innocentio Romanæ Sedis Pontifice petit, ut cum reus convictus non sit, literarum ejus communione fruatur. Eadem literas Augustinus *epist. 162.* appellat *Communicatorias cum Romana Ecclesia, in qua semper Apostolica Cathedra viguit principatus.* Et *lib. 3. cont. Cresc. cap. 13.* quarundam literarum falsitatem inde damnat, quod ad Carthaginis Episcopum, Romano Pontifice prætermisso, nunquam Orientalis Ecclesia scriberet. Vide Nazianzenum *orat. 51.* ubi eas literas vocat *Communions indices.*

Hinc cum aliquid universæ Ecclesiæ indicandum erat, siue quoad disciplinam, siue quoad dogmata, id per Romanum Antistitem, utpote quem maneret omnium sollicitudo Ecclesiarum, fieri curabatur. Ejus etiam sententia expectabatur, ut damnatæ in Catholicis Synodis hæreses orbi Christiano innotescerent. Nam & diem Paschalem per Romanum Pontificem toti Ecclesiæ indicari fuisse solitum, ex Concilio Nicæno habetur. Sed ad eam stabiliendam veritatem & integram assertionem nostram persuadendam, gesta Patrum Africanorum tempore Augustini, & cum ipso Augustino congregatorum proferre libet, quæ ex epistolis 90. 91. 92. & 93. inter Augustinianas dignosci possunt.

In primis *epist. 90.* Patres Concilii Carthaginensis sic ad Innocentium Papam scribunt: *Hoc itaque gestum, Domine Frater sancte, charitati tuae intimandum duximus, ut statuti nostra mediocritatis etiam Apostolicæ Sedis adhibeatur auctoritas, pro tuenda salute multorum, & quorundam peruersitate etiam corrigenda. Non dubitamus Venerationem tuam, cum gesta Episcopalia perspexerit, quæ in Oriente in eadem causâ confecta dicuntur, id iudicaturam*

*unde omnes in Dei misericordia gaudeamus. Illis autem Episcopis sic S. Innocentius respondet: Inquirendis de his rebus, quas omni cum solitudine decet à Sacerdotibus, maximè à vero iustoque & Catholico tractari Concilio, antiqua traditionis exempla servantes, & Ecclesiastica memores disciplina, vestra religionis vigorem non minùs nunc in consulendo, quàm antea cum pronuntiaretis, veraratione firmatis, qui ad nostrum referendum approbastis esse iudicium; scientes quid Apostolica Sedi, cum omnes hoc loco positi ipsum sequi desideremus Apostolum, debeat; à quo ipse Episcopatus & tota auctoritas nominis hujus emerfit.::: Et quidquid de disjunctis remotisque provinciis afferetur, non priùs ducerent finiendum, nisi ad hujus Sedis notitiam perveniret, ubi tota hujus auctoritate, iusta qua fuit pronuntiatio firmaretur, indeque sumerent cetera Ecclesia, & velut de natali suo fonte aqua cuncta procederent, & per diversas totius mundi regiones puri capitis incorrupta manarent; quid precipere, quos abluere, quos velut in coeno inmundabili sordidatos, mundis digna corporibus unda vitaret. Gratulor igitur, Fratres charissimi, quod per cunctas totius orbis terrarum Ecclesias, omnibus unà quod profit decernendum esse deboscitis.*

*Rursum epist. 92. Episcopi in Concilio Milevitano, cujus ingenium authore Prospero Augustinus erat, coacti sic ad eundem S. Innocentium scribunt, & Apostolico ejus pectore insinuant periculis infirmorum membrorum Christi pastorem diligentiam adhibere dignetur.:: Imitantes Carthaginensis Provincia Cœpiscopos nostros, quos ad Sedem Apostolicam, quam Beatus illustras, hac de causa scripsisse comperimus. Episcopis porro illis in Spiritu sancto congregatis*

hic sanctissimus Papa respondet: Diligenter ergo & congruè Apostolico consulitis honori; honori inquam illius, quem præter illa quæ sunt extrinsecus, sollicitudo manet omnium Ecclesiarum super anxietatibus, quæ sit tenenda sententia; antiqua scilicet regula formam sequuti, quam toto semper ab orbe mecum nostris esse servatam. Verùm hac missa facio, neque enim hoc vestram credo latere prudentiam. Quid id etiam actione firmastis, nisi scientes quod per omnes provincias de Apostolico fonte petentibus responsa semper emanent: præsertim quoties fidei ratio ventilatur, arbitror omnes fratres & Cœpiscopos nostros non nisi ad Petrum, id est sui nominis & honoris authorem referre debere, velut nunc retulit vestra dilectio, quod per totum mundum possit omnibus Ecclesiis in commune prodesse. Fiant enim necesse est, cauciores, cum inventores malorum ad duplicis relationem Synodi sententiæ vestra statuta viderint ab Ecclesiastica communione sejunctos. Gemino igitur bono charitas vestra fungitur; nam & Canonum potiemini gratia servatorum, & beneficio vestro totus orbis utetur.

Iterum epist. 95. ad eundem Sanctissimum Innocentium quinque Episcopi, quos inter Augustinus, post prolixam Pelagianæ hæreseos expositionem & confutationem, eum literis suis finem imponunt, quo Apostolicæ Sedis singularem primatum, & universalem pascendæ potandæque totius Ecclesiæ spiritalem potestatem, & inseminatum Catholicis omnibus in Romanam Ecclesiam temperatum veneratione amorem clarissime profitentur: Dabit sanè nobis veniam, inquit, suavis mihi si tu cordis tui, quod prolixioris epistolam fortassis quàm velles, tua misimus Sanctitati. Non enim rivulum nostrum tuo large

*fonti augendo refundimus; sed in hac non parva tentatione temporis, unde nos liberet cui dicimus, Et ne nos inferas in tentationem, utrum etiam noster, licet exiguus, ex eodem quo etiam tuus abundans, emanet capite fluentorum, hoc à te probari volumus, tuisque rescriptis de communi participatione unius gratia consolari.* Quibus responder S. Innocentius, jam satis eorum se quæsitis duobus superioribus rescriptis respondisse, quid vel de Pelagianorum perfidia, vel de Episcoporum Catholicorum sententia ipse sentiret.

Vides ex hoc præclaro reciprocarum literarum commercio, quanta solitudine Patres, & Patrū facile Princeps Magnus Augustinus, Sedi Apostolicæ tanquam Religionis centro visibili, basi communionis, & Christianæ veritatis cathedræ principali adhæserint. Nec illam cum Ecclesia Romana, velut perenni & præcipuo doctrinæ fonte, communionem Occidentales duntaxat Episcopi, sed ipsi etiam Orientales totâ & sanctâ accuratione ambiebant, uti ex multis passim obviis, sed nominatim ex epistola III. Hieronymi perspicuum est, in qua sic habetur: *An te annos plurimos cum in chartis publicis juvarem Damasum Romana Urbis Episcopum, & Orientis atque Occidentis synodicis consultationibus respondentem.*

Eandem veritatem perennis Ecclesiæ consuetudo clarissimis testificationibus confirmat. Etenim totius orbis Catholici consensione sæculorum omnium usu firmata fideles omnes à Romani Præfulis ore controversiarum judicia postularunt, postulata expectarunt, & data præcipuâ reverentiâ susceperunt. Semper etiam ab exordio Christianismi usque in præsentem diem in gravaminibus, in fidei controversiis, in conscientiæ

casibus & dubitationibus, in legibus ferendis, in dispensationibus obtinendis, in Episcopis ordinandis, adversus tyrannos protegendis, vel etiam ob delicta deponendis, vel ad partes infidelium propagandæ christianitatis gratiâ mittendis, in Synodis confirmandis, in sæcularibus potestate sua abutentibus corrigendis, puniendis spiritali gladio, & anathemate feriendis ad Sedem Apostolicam & totius Ecclesiæ caput recursum fuit. Atqui nullus est legum Christi sanctior interpres, quam perpetua Ecclesiæ Catholicæ consuetudo, quâ non ad Antiochenum, Alexandrinum, Constantinopolitanum, Ephesinum, Parisiensem, Lugdunensem, Coloniensem, Toletanum, sed ad Romanum Antistitem omni tempore, ab omni loco personæ quælibet Catholicæ & Orthodoxæ confugerunt, intelligentes ad illum pertinere & transfundi verborum eorum efficaciam, quæ Petro Veritas non semel inculcavit, *Pasce oves meas: Confirma fratres tuos, &c.* Unde in Jure, 24. q. 7. dicitur: *Quoties ratio fidei ventilatur, non nisi ad Petrum, id est ad sui nominis honorem & auctoritatem habentem, recurrendum est.* Et iterum: *Majores Ecclesiæ causas, præsertim circa articulos fidei contingentes, ad Petri Sedem referendas intelligit, qui novit pro eo Dominum exorasse, ne deficeret fides ejus.* At enim quid aliud sunt omnia ferè decretorum & decretalium volumina, quàm Romanorum Pontificum ad Episcoporum, aliorumque plurimorum consulta & dubia variis in regnis enata responsiones, atque rescripta?

Ipsa etiam Sacra Concilia hanc veritatem ultrò confitentur. Sardicense in epist. ad Juliū, Chalcedonense in epist. ad Leonem, sexta Synodus in epistola ad Agathonem, aliaque tum provincialia,



tum generalia non minus huic assertioni favent, quam suprà laudata Africana. Hinc decretorum suorum confirmationem à sancta Sede postulaverunt, ut nominatim in calce Concilii Tridentini videre est; Patribus nimirum existimantibus perseverantem in Sede Petri vivere potestatem, & excellere auctoritatem, ut ait Magnus Leo. Illud etiam Augustini in *Psal. contra partem Donati*, præ oculis habebant: *Numerate Sacerdotes vel ab ipsa Sede Petri; ipsa est Petra Ecclesia, quam non vincunt superba inferorum porte.* Si autem Romana Ecclesia nullâ in orbem Christianum primatus & principalioris regiminis prærogativâ emineret, cur illam solam recognoverunt? cur ab illa firmitudinis robur doctrinae suae adjici petierunt Synodi in Spiritu Sancto congregatae? Quia nimirum illi iidem sanctissimi Patres, qui se ovium suarum Pastores in suis quique diocesisbus noverant, Ecclesiae se Romanæ oves esse sincerissimè fatebantur, juxta illud ab Eusebio Emilieno, vel potius Eucherio Lugdunensi sermone de nativitate Joannis, præclarissimè scriptum. Expendens enim magnificam illam Petro demandatam provinciam pascendi agnos, pascendi & oves, ait: *Prius agnos, deinde oves Petri commisit, quia non solum Pastorem, sed Pastorum Pastorem eum constituit. Pascit igitur Petrus agnos, pascit & oves: pascit filios, pascit & matres: regit & subditos, & Prælatos. Omnium igitur Pastor est, quia præter agnos & oves in Ecclesia nihil est.*

Hinc Concilia etiam numerosissima à Romani Pontificis fide & communione sejuncta in varios sæpè errores prolapsa sunt. Testis est Antiochenum II. in quo damnatus est Athanasius; testis Mediolanense tempore Liberii; testis Arimi-



nense quadringentorum & ampliùs Episcoporum tempore Felicis II. ut ex S. Athanasio, Severo Sulpitio, & Sozomeno constat; testis Ephesium II. tempore Leonis Magni, in quo Eutychiana impietas firmata est; testis denique, ut alia misla faciam, Constantinopolitanum tempore Gregorii II. contra sacras Imagines coactum. Concilia verò à Sede Apostolica indivulsa, ab eademque confirmata, nunquam errasse deprehensa sunt; quin imò post hujusmodi Conciliorum definitiones, non posse sine audacia quæstiones & disputationes institui, docet S. Athanasius; quia eorum sententiæ sunt verbum Domini, inquit idem Pater epist. ad Africanos. Nec dubia esse possunt aut infirma quæ tanta per Spiritum sanctum fixit autoritas, ut ait S. Leo *epist.* 78. *cap.* 30. Unde Ambrosio *epist.* 32. teste, moriendum potius est quàm ab eis recedendum; & Magnus Gregorius *epist.* 24. eorum decreta sic se suscipere ac venerari fassus est, ac sancti Evangelii quatuor libros. Ergo unio ad Romanam Sedem ejusque Antistitem Christiani orbis Pastorem primum & summum, catholicitatis tessera est. Et sicut unicum in terra sancta templum Dominus esse voluit, inquit eximius Doctor Sorbonicus Ludovicus Haléin suis de Ecclesia manuscriptis, ut omnes in unum Israëlita convenirent, nihilque inter eos schisma oriretur, ut patet *Deuterom.* 12. *vers.* 4. sic Sedes Romana in medio Ecclesiæ constituta est veluti signum conspicuum & aspectabile nationum omnium oculis objectum, ad quod respicientes Ecclesiæ omnes & singulæ in unitate florerent, & sese adversus omnes hæreses & schismata incolumes conservarēt

Sed ipsorum sacrorum Conciliorum mentem.

non argumentorum circuitu deductam, sed propriis eorum verbis expressam, ante Lectoris oculos expandamus, ut quid de Ecclesiæ Romanæ principitate censuerint, ipsa nos doceat. Et quidem veterum Conciliorum sententias multas retulimus, plures omisimus, quia veras à dubiis discernere sine grandi prolixaque indagine non potuimus. Ultimorum tamen œcumenicorum Conciliorum doctrinam in medium proferre, Theologis Catholicis non erit ingratum.

Luculentæ sunt Magni Concilii, & Conciliorum numerosissimi, utpote 1280. Prælati constantis, Lateranensis sub Innocentio III. *cap. 5.* voces in hunc modum: *Romana Ecclesia disponente Domino super omnes alias ordinaria potestatis obinet principatum, utpote Mater omnium Christi fidelium & Magistra.* Concilium etiam Constantiense sess. 45. propositionibus quibus suspecti in fide post interrogationem assentiri vult, istam accenset: *Vt credas quod Papa canonicè electus, qui pro tempore fuerit, ejus nomine proprio expresso, sit successor B. Petri, habens supremam authoritatem in Ecclesia Dei.*

Consonat definitio Concilii Florentini in litteris S. Unionis, ubi approbante sacro Concilio, sic Eugenius pronuntiat: *Definimus S. Apostolicam Sedem, & Romanum Pontificem in uniuersum orbem tenere primatum, & ipsum Romanum Pontificem successorem esse B. Petri Principis Apostolorum, & verum Christi Vicarium, totiusque Ecclesiæ Caput, & omnium Christianorum Patrem & Doctorem existere, & ipsi in B. Petro pascendi, regendi, & gubernandi universalem Ecclesiam à Domino nostro Iesu Christo plenam potestatem traditam esse.*

Sacrum etiam Concilium Tridentinum can-

*Commendatio locorum. Theolog. &c*

dem veritatem & in actu signato, ut loquuntur, & in actu exercito, id est & disertis verbis, & variis factis doctrinam illam supponentibus exercitè tradit. Si quis dixerit, inquit sess. 7. de Baptismo, can. 3. in Ecclesia Romana, qua omnium Ecclesiarum Mater est & Magistra, non esse veram de Baptismi sacramento doctrinam, anathema sit. Et sess. 14. de Extrema unctione: Nec profectò, inquit, Ecclesia Romana aliarum omnium Mater & Magistra, &c. Et sess. 25. de delectu ciborum, &c. Hortatur sancta Synodus, inquit, & per sanctissimum Domini nostri atque Salvatoris adventum Pastores omnes obtestatur, ut tanquam boni milites illa omnia qua sancta Romana Ecclesia, omnium Ecclesiarum Mater & Magistra statuit, quibuscumque fidelibus sedulo commendent, &c. Hinc sess. 6. c. 1. de reform. Romanum Pontificem Dei in terris Vicarium appellat, qui in omnes Episcopos delinquentes sua suprema Sedis autoritate animadvertere possit. Hinc sess. 14. c. 7. declarat: Merito Pontifices Maximos pro suprema potestate sibi in Ecclesia universa tradita, causas aliquas criminum graviores suo potuisse peculiari iudicio reservare. Hinc sess. 24. de reform. c. 1. docet, Beatissimum Romanum Pontificem sollicitudinem universa Ecclesia ex muneri sui officio debere, & ovium Christi sanguinem, qua ex malo negligentium & sui officii immemorum Pastorum regimine peribunt, Dominum nostrum Iesum Christum de manibus ejus esse requiriturum. Hinc sess. 25. c. 22. salvam vult intelligi autoritatem Sedis Apostolicæ. Postremò, inquit, Sancta Synodus omnia & singula sub quibuscumque clausulis & verbis, qua de morum reformatione atque Ecclesiastica disciplina in hoc sacro Concilio statuta sunt, declarat ita decreta fuisse, ut in his saltem

*semper auctoritas Sedis Apostolica & sit & esse intelligatur.* Hinc affirmat ad ipsum pertinere Ecclesias de Pastoribus providere, Concilia generalia indicere & confirmare, de eorum intellectu dubia declarare, Ecclesiæ universalis tranquillitati invigilare, abusus corrigere, causas Episcoporum graviorēs terminare, non residentes punire, circa impedimenta matrimonii disponere & dispensare, de calicis concessione judicare, ita ut nihil eo inconsulto novum, aut hactenus in Ecclesia inusitatum decernatur; idque non tam docet, quàm ubique passim inculcat & supponit. A textibus referendis supersedeo, ne vel Concilium exscribere, vel infinitis citationibus has chartas implere cum cruce & fastidio Lectoris compellar. Tantæ autem innumerorum sacræ Synodi testimoniorum nubi fidem negare, vel eorum conspirante & consentiente sententiâ non cogi, nisi impiis & perfrictæ frontis hominibus permissum non est.

Denique ab hac doctrina & assertione nostra nunquam recessit Ecclesia Gallicana, sive vetus, sive moderna. Nam præter Irenæum suprâ memoratum, & alios infinitos brevitatis gratiâ prætermittendos, rem hanc confecerunt gemina Galliæ nostræ immortalia ornamenta, & primæ magnitudinis astra Prosper Aquitanicus, & Bernardus Claravallensis. Prior enim carmine do ingratissimis, sic modulatissimè pangit:

*Sedes Roma Petri, quæ Pastoralis honoris  
Facta caput mûdo, quidquid non possidet armis,  
Religione tenet.*

Eodem modo loquitur Author librorû de Vocatione gëtiûm, à Gelasio Papa opusculo adversus Pelagianos, cum laude memoratus. Hos libros

nonnulli Ambrosio, sed absque ullo solido fundamento asseruerunt, plures Prospero vindicarunt: unde sub istius nomine Duaci anno 1576. & dein de Colonia 1609. editi sunt. Favent huic sententiae tria pervetusta manuscripta nomen Prosperi praeferebant. Sed quia has conjecturas infirmas esse docti recentiores contendunt, affirmantque Authorem illorum librorum, sicut & celebris epistolae ad Demetriadem (quem eundem esse fatentur) Africanum esse, nec more veri Prosperi inimicos gratiae exagitare, nec ipsum Augustinum commemorare, quod à methodo Prosperi Aquitanici tam alienum est quam quod maximè, ideò ab hac critica quaestione abstraho. At enim quia omnes faterentur authorem illum incognitum pervetustum esse, catholicum, imò & à Gelasio Magistro Ecclesiae annumeratum, placet testimonium illius à Prospero, mox relatae sententiae simillimum proferre, quod habet lib. 2. c. 16. *Quamvis gratia christiana non contenta sit eosdem habere limites quos Roma, multosque jam populos sceptro crucis Christi illa subdidit, quos armis suis ista non domuit; qua tamen per Apostolici solii principatum amplior facta est arce religionis, quam solio potestatis. En primum Ecclesiae Romanae stricta & soluta oratione clarissimè expressum.*

Sed apertius nihil produci potest iis quae variis in locis tradit Bernard. Duo selectiora referre facit. *Non modo ovium* (inquit Eugenium alloquens lib. 2. de consideratione). *sed & Pastorum tu unus omnium Pastor. Unde id probem, quæris? De verbo Domini. Cui enim non dico Episcoporum, sed Apostolorum sic absolute & indiscrete tota commissa sunt oves. Si me amas, Petre, pasc oves meas? Quas? Illas, vel illius populi, civitatis, aut regniis, aut*

certè regni: Oves meas, inquit. Cui non planum, non designasse aliquam, sed assignasse omnes? Nihil exprimitur, ubi distinguitur nihil. Et infra: Ergo, juxta canones, tuos alii in partem sollicitudinis, tu in plenitudinem potestatis vocatus es. Aliorum potestas certis arctatur limitibus, tua extenditur & in ipsos qui potestatem super alios acceperunt. Nonne si causa exiterit, tu Episcopo cælum clauderes, tu ipsum ab Episcopo: u deponere, etiam & satana tradere potes? Stat ergo inconcussum privilegium tuum tibi tam in clavis clauibus, quàm in ovibus commendatis. Cum quisque ceterorum habeat suam, tibi una commissa est grandissima navis facta ex omnibus, ipsa universalis Ecclesia toto orbe diffusa. Horum omnium porro privilegiorum rationem ab Ecclesiae unitate repetit ibidem his verbis: Sunt quidem alii cæli janitores & gregum Pastores; sed tu tantò gloriose, quantò & differentius praeceteris nomen hereditasti. Habent illi sibi assignatos greges, singuli singulos. Tibi universi crediti, uni unus. Nec modò ovium, sed & Pastorum tu unus omnium Pastor. Ubi unitas, ibi perfectio. Quam rationem superius ponderavimus, paulò etiam inferius magis magisque illustraturi.

Non sunt etiam prætermittenda ejusdem Bernardi verba epist. 190. ad Innocent. II. Oportet ad vestrum referri Apostolatù pericula quaque & scàdala emergentia in regno Dei, ea praesertim qua de fide contingunt. Dignum namque arbitror, ibi perissimum resarciri damna fidei, ubi non possit fides sentire defectum. Cui enim alteri Sedi dictum est aliquando: Ego rogavi pro te, ut non deficiat fides tua. Ergo quod sequitur, à Petri successore exigitur: Et tu aliquando conversus confirma fratres tuos. In eo planè Petri impletis vicem, cujus tenetis & sedem; &



*vestra admonitione corda in fide fluctuantia confirmatis, si vestra auctoritate conteritis fidei corruptores. Nihil arbitror planius vel luculentius in nostra assertionis confirmationem posse produci.*

Consentiunt Doctores Ecclesiæ Gallicanæ recentiores. Dies me citius deficeret, si Cardinalis Perronii, Coëffetei, aliorumque Doctorum Sorbonicorum verba recensenda proponerem. Compendio agam si sacræ Facultatis Parisiensis solenne decretum anno 1659. unanimi consensione editum proferam in medium. Omnes & singuli Magistri nostri palam apertoque ore professi sunt, nihil se in Summorum Pontificum auctoritatem decernere, aut moliri, aut etiam cogitare velle. Imò verò omnes & singuli, ut obedientia fitti, ipsum Romanum Pontificem ut summum Jesu Christi Vicarium & universalem Ecclesiæ Pastorem, cui plenitudo potestatis à Christo data sit, cui omnes utriusque sexus obedire, cujus decreta venerari, & pro se quisque tueri, & observare teneatur, ut semper agnoverunt & confessi sunt, ita nunc quoque sincerè, fide iter, & libenter agnoscunt & confitentur. Hæc inclyta Facultas, quæ tum fidei zelo, cum rerum omnium scientiâ dubios omnes eruditos facit, utra harum virtutum utram vincat.

*Nonnullis permagni momenti documentis  
varia præoccupantur quæstiones  
& objectiones.*

Plures de Romani Antistitis auctoritate quæstiones pro dignitate resolvere operis nostri angustia non sinunt, nonnullas etiam inter consuetudina infra derivanda sufficienter, tametsi non operosè, attingam; at infinitas alias Theologis

positivis & Juris Canonici peritis ventilandas relinquo. Ad doctrinae tamen stabilitate lucem & tutamen quaedam placet praeceptiones institueret, quibus innumeras lites quadantenus interlucabimus, & pullulantes sine fine objectiones putabimus.

Sciendum itaque primò, eximiam aliis à Petro Apostolis quaecumque super terram ligandi concessam potestatem, ob quam pari omnes consortio honoris fuisse praeditos, & ex aequo super eos Ecclesiae fortitudinem solidatam Patres nonnulli affirmant, Petri tamen primatui nullatenus officere vel adversari, ut satis supra ostendimus, omnique argumentorum genere communivimus. Sed in praesentiarum magis exponere, magisque ex Patribus illustrare, ut innumerae difficultates praeccludantur, operae pretium est. Itaque Apostolis non est ligandi solvendiue vis collata tanquam supremis & independentibus potestatibus, sed sicut ministris praecipuis, uni tamen superiori principaliorique auctoritati subordinatis, ut unitas totius corporis uno in capite radicata & fundata salva consisteret. *Inter Beatissimos Apostolos*, inquit Magnus Leo epist. 84. *in similitudine honoris fuit quadam discretio potestatis, & cum omnium par esset electio, uni tamen datum est, ut ceteris praemineret.* Et B. Cyprianus lib. de unit. Ecol. *Hoc erant utique & ceteri Apostoli quod fuit Petrus, pari consortio praediti honoris & potestatis, sed exordium ab unitate proficiscitur, primatus Petro datur, ut una Christi Ecclesia, & cathedra una monstretur.*

Et sanè hierarchica Ecclesiastici ordinis unitas & tranquillitas sicut unum adorat Deum, unum Redemptorem agnoscit, unam fidem praedicat & baptisma unum, unam legem, unum exigit eor

*Commendatio locorum Theolog. 87*

rundem Sacramentorum usum : ita unum caput postulat , & totius uniformis regiminis Principem veneratur. Quocirca regimen spiritale politico longè antecellit. Cùm enim diversæ nationes pro varietate locorum variis egeant institutis genio & moribus accommodatis , plures etiam sunt in distinctis discrepantibusque ditionibus Reges, quorum unus ab alio nequaquam pendet. At verò in spiritali Christi regno gentes omnes quàmlibet moribus discrepantes, in unam tamen coire fidem, eidem subdi Evangelio, iisdem disciplinæ legibus collum subicere tenentur, unde ad unam sacri regiminis formam à cœlesti hierarchia exemplatam , unitas omninò requiritur summi Sacerdotis. Si enim Rex unus est apibus, si ductor unus in gregibus, si in armentis rector unus, si militum copias unus continet Dux, si regno imperat Monarcha unus, si Rempublicam Dictator administrat, si domum paterfamilias, navim nauclerus unus gubernat ; quidn̄ Hierarcha unus unam Christi reget Ecclesiam. ovili, exercitui, regno, navi, & domui sacris. in literis comparatam ?

Verùm enim verò, si Apostoli ad tantum sublimis potestatis culmen provecti, Principem tamen unum Petrum agnoscebant, multò potius non possunt Episcopi in cujusvis Sedis fastigio sedentes Romanæ Sedis Antistitem primariam potestatem & principatum spiritalem detrectare. Veritas enim est, Apostolis, utpote primis Evangelii præconibus, Ecclesiæ Christi, ut sic dicam, confundatoribus & propagatoribus, & nominatim Paulo Doctori gentium & Magistro in veritate, & Vasi electionis nomen Christi coram gentibus omnibus portaturo, extraordinariam

rificibus obloquendi cacozeliâ actos, receptam à Catholicis omnibus de primatu Petri & successorum ejus sententiam laceſſere non deſinere: quia conſuetudine omnia faſtidiendi in naturam inductâ, amoreque ſui tumentes, nihil magni habere ſe crederent, niſi maxima quæque carperent, & conquiſitis affectatæ eruditionis technis inumbrarent. *Parvo nihil parvum, magno nihil magnum*, aiebat non coram Deo, ſed coram ſe magnus Seneca. Ita iſtis Apoſtolicæ Sedis, cui veluti centro uniti Catholici ſumus, hoſtibus parva parvique facienda videtur illa Cathedra, cui Chriſtus commiſit orbem terrarum, ut cunctis ovibus & agnis ſibi ſine diſcretionem concederet latiùs præſtiteret religione divina, quàm dominatione terrena: minusque eſſet quod ſibi bellico labore olim Roma ſubdiderat, quàm quod pax Chriſtiana ſubegit: ut multa regna uno conſcöderarentur imperio, & citò pervios haberet populos prædicationis generalis, quos unius teneret regimen civitatis, uti Magnus Leo *ſerm. 1. in Natali Apoſt.* proſequitur. Iſti verò moroſi ardeliones omnem de Apoſtolica Sede detrahendi occaſionem nanciſcentes, nulla ex Eccleſiæ Romanæ juratis hoſtibus argumenta deprompta prætereunt; nova etiam omni labore adinvenientes, videntur ſe loqui aliquid grandius ore mortali, rati ſibi fore honorificum & glorioſum, ſi cum Sede ſoli Deo inferiori congregiantur. At enim quid emolumenti tandem reportant? Suum in Eccleſiam illam Apoſtoli ore laudatam odium non argumentis, ſed leviffimis conjecturis, vel potiùs ſophiſmatis, maliffique artibus produnt.

Sed dicet: Magnus ipſe Gregor. *lib. 7. epiſt. 69.*

titulum *Episcopis Universalis* repudiavit; unde in multis Juris Canonici locis ex eodem Gregorio prohibetur, ne Romanus Antistes, Universalis Episcopi nomenclaturâ insigniatur: Ergo Romano Pontifici non est in universam Christi Ecclesiam divinitus collata potestas suprema.

Respondeo, titulum Universalis Episcopi humillimum S. Gregorium respuisse, tum ad confundendam Joannis Patriarchæ Constantinopolitani superbiam, qui cum sibi turgentem titulum impudentissimè arrogarat. Tum ad æquivocationem sub nomine *universalis* latentem retegendam, quod vel universalem in essendo, ut loquuntur, vel in causando significare potest. Quanvis enim Romanus Præsul sit Episcopus universalis veluti in causando, quatenus omnes inferiores Prælatos regit, ad eorum consulta respondet, in eosque fluentia doctrinæ & disciplinæ, uti suprâ S. Innocentius aiebat, derivat: Non tamen Episcopus est universalis in essendo, quasi ipse sit proprius & proximus cujuslibet Ecclesiæ particularis Pastor. Et hunc sensum indicat Gregorius in ratione quam subjungit: quia si esset universalis, ceteri non essent Episcopi. *Si unus, inquit, universalis est, restat ut vos Episcopi non sitis.* Et lib. 4. epist. 34. *Triste valde est, ut patienter feratur, quatenus despectis omnibus, prædictus frater & Coepiscopus meus, solus conetur appellari Episcopus.*

Porro si Pontificibus sentientibus in se sicut in Christo Jesu, id est christiana humilitate, prærogativarum inflatos titulos detrectantibus tam sponte vitiligatores illi credunt, cur iisdem Sedis suæ primatum & potestatis plenitudinem affirmantibus non credunt? Syricio pro suo arbitratu

rem à Synodo maturè discussam absque ratione rescindere nolenti, sed statuta Patrum sicut propria custodire satagenti; Gregorio etiam Episcopi universalis in essendo, id est solius Episcopi titulum invidiosum respuenti fidem lubentissimè adhibent: quidni ergo sancti Innocentii, Sanctique Leonis non tam vocibus quàm fulminibus superiùs productis cedunt? Ipsius saltem Gregorii Magni, cuius profundam humilitatem mirari, non in depretiationem primæ Sedis intorquere debuerant, voces audiant, quas ad Mauritium Imperatorem scribens, sic extulit lib. 4. epist. 32.

*Cunctis Evangelium scientibus loquor, quod sancto; & omnium Apostolorum Principi Petro dominicæ vœe totius Ecclesiæ cura commissæ est. :: Et cura ei totius Ecclesiæ & principatus committitur. Ex quo infert, quod si Petrus tantis licet privilegiis decoratus non dicitur Apostolus Universalis, multò iniquiùs Joannes Constantinopolitanus superbū atque pompaticum, Universalis Episcopi nomen arripit, quasi solus ipse totius Ecclesiæ Episcopus sit. Absit, inquit, à cordibus Christianorum nomen istud blasphemia, in quo omnium sacerdotum honor adimitur, dum ab uno sibi dementer arrogatur.*

Duo etiam sunt in præfatis geminis Gregorii Magni epistolis diligenter observanda. Primum est, nomen illud Episcopi Universalis à Concilio Chalcedonensi Romano Pontifici esse assertum, sed illud Romanos Episcopos præ modestia Vicariis Christi digna non usurpasse tamen. Certe, inquit, pro B. Petri Apostolorum Principis honore per venerandam Chalcedonensem Synodum Romano Pontifici (nomen illud) oblatum est. Sed nullus eorum unquam hoc singularitatis vocabulum assumpsit, nec uti consensit, ne dum privatum ali-



*quid daretur uni, honore debito Sacerdotes privarentur universi. Quid est ergo quod nos hujus vocabuli gloriam & oblatam non quarimus, & alter sibi hanc arripere etiam non oblatam præsumit? Vides sanctæ Sedis egregiam supremæ auctoritatis & majoris humilitatis temperaturam ex hoc Gregorii loco invictè probatam. Supremam primatus illius dignitatem demonstrat vocabulum Episcopi Universalis ab œcumenica Synodo Romano Episcopo oblatum, cujus etiam meminit lib. 4. epist. 36. & 38. Sed eximiam christianæ humilitatis moderationem evincit tantæ tanti vocabuli gloriæ repulsa, ipsâ nominis usurpatione gloriosior.*

*Alterum quod observetur dignum est, Gregorium epist. illa 69. lib. 7. dum titulum illum ambitiosum rejicit, unâ suæ Sedis primatum demonstrare, dum ait acta in Synodo à Joanne sine Apostolica Sedis auctoritate atque consensu nullas vires habere. Unde Eusebium Thessalonicensem aliosque complures Episcopos coram omnipotente Deo contestatur & admonet, ut propriâ pastoralis constantiâ, & suâ Apostolicâ auctoritate suffulti prædonem irruentemque lufum excludant, nec sinant Synodum celebrari, quæ nec legitima quidem, nec Synodus (reluctante nimirum Sede Apostolicâ) dicenda est.*

*In illo Gregorii processu, an christiana humilitas, an pastoralis vigoris generositas palmam referunt, difficile judicaverim. Id solum constans & perspicuum est, nullum suâ humilitate Romane Sedis primatui detrimentum accersivisse Gregorium, sed primariam illius potestatem validè confirmasse. Nam & Joannis superbiam contrivit; & acta Synodi illius Sede con-*

*eradiciente Apostolica*, soluta esse, lib. 4. epist. 34. affirmat: & injurias suæ Sedi illatas in Petrum ipsum refundi ibidem contestatur: *Et si peccata Gregorii tanta sunt*, inquit, *ut pari talia debeat*, *Petri tamen Apostoli peccata nulla sunt*, *ut pari ista mereatur*. Et nisi Joannes resipuerit, se juxta canones adversus illum Apostolica autoritate processurum comminatur. Quibus suæ Sedis in cæteras Ecclesias nedum Occidentis, sed & Orientis, easque præcipuas, qualis Constantinopolitana erat, primariam auctoritatem clarissimè demonstrat.

*Romana Sedis primatus Regum monarchia  
& supremo dominio egregiè favet.*

Sciendum tertio, inimicos S. Sedis, ut Pontificii primatus defensoribus invidiam creent, opportunè importunè Regiæ Majestatis jura objicere, quæ citò dicunt peritura, si Romano Antistiti supremus in totam Christi Ecclesiam Principatus asseratur.

Verùm hæc invidiosissima, & juxta iniquissima calumnia (quæ etiam Conciliorum potestatem, & supremam Ecclesiæ auctoritatem, ubicumque tandem resideat, peræquè petit) à clarissimis Doctoribus validè repulsa, falsitatis convicta, & in authores regestà est. Et certè nec exemplorum præsidia, nec rationum momenta desunt, quibus facile est demonstrare, sanctæ Sedis hostes Regum quoque esse inimicos, & supremæ Romanorum Antistitum potestatis spiritalis inficiatores disjiciendis quoque Regibus, deturbandæ Monarchiæ, fovendis perduellibus, convellendis sceptris viam sternere & munire.

Illud est & fuit semper hæreticorum genium,

infrunitæ libertatis amore dominationem omnem pessundare. Illis, ut alicubi apud Sini-  
chium legisse me memini, classicum præcinerunt  
quidam Judæi, à Juda Galilæo antesignano dicti  
Galilæi, qui solum Deum appellari Dominum  
fas esse credebant; ideoque referente Josepho  
*lib. 18. Antiquit. cap. 2.* gravissimas luere pœnas,  
maluerunt, quàm Cæsarem Dominum appella-  
re. Quamobrem Apostoli, qui à Christo Gali-  
læo dicto Galilæi etiam cognominabantur, sæ-  
pius ejusdem criminis insinulabantur ab æmu-  
lis in nominis æquivocatione malignè ludenti-  
bus; unde ut ab ea sese suspicione discipuli Do-  
mini purgarent, debitam Regibus obedien-  
tiam inculcabant.

Quis nescit Uviclefum post indictum Eccle-  
siæ bellum, Reges etiam aggressum fuisse, dum  
peccati mortalis consciis dominii & regni jura  
denegavit? Hieronymum à Praga & Joannem  
Hussum gemina diabolicæ informationis osten-  
ta, his pestilentissimis dogmatis persuasos Boë-  
miam intestinis rebellionibus incendiisse nemo  
ignorat. Latherum Henrico Angliæ Regi peræ-  
quæ ac Romano Papæ fuisse injurium, & atro-  
cissimis insectationibus maledixisse compertum  
est. Galliam nostram concitatis à Calvino flam-  
mis flagrantem non ita pridem Patres nost. i vi-  
derunt, quas nec millionum hominum san-  
guis, nec infinitæ profusæ lacrymæ extinguere  
potuerunt. Batavia legitimi Regis imperium  
post introductum Calvinismum à suis cervici-  
bus depulit. Parricidium post hominum memo-  
riam flagitiosissimum, & solo Christi Deicidio  
inferius, post ejuratam Romanæ Sedis reveren-  
tiam Angliæ Præmores in Regem suum Caro-

lum Stuart, stupente orbe sub Sole toto perper-  
trarunt. Nec ex impetu subitæ iracundiæ, vel  
clandestini sicarii pugione, sed solenni Senatus-  
consulto in eam impietatem perduelles proru-  
perunt, quam credere posteri detrectabunt, nos-  
que ipsi vix credereinus, nisi tantum facinus sæ-  
culum nostrum æternis tenebris obscurasset.

E contra pleni sunt omnes libri, pleni nomi-  
natim Gallorum Annales felicissimis eventibus,  
quibus regna Sedi Apostolicæ devotiora fortu-  
navit Deus, ut in Constantino, Pepino, Carolo  
Magno, Ludovico Pio, Ludovico Justo, aliisque  
claret. Sed invictissimi Monarchæ nostri Ludo-  
vici decimi quarti cognomento Magni exempla  
hodierna splendidiora sunt, quàm ut ea præter-  
mittam, quæ omnium oculos perstringunt, om-  
nium admirationem cient & rapiunt. *Neque Her-  
cules contra duos.* At noster Ludovicus Hercule  
major, fœderatis cum Batavis totius Europæ  
potestatibus non obstitit modò, sed aggreditur  
etiam & prosternit. Interim urbes & provincias  
inexpugnabiles eâ celeritate capit, quâ venato-  
res capiunt feras; & Cæsare felicior, nunquam  
venit, nunquam videt, quin vincat. Ne mirare si  
vincat Heros Christianissimus, qui sub Deo mi-  
litat, pro Deo pugnat, pro Catholicæ & Romanæ  
Ecclesiæ fide & finibus propagandis laborat.

Hi sunt & fuere semper rebellionis gradus, ut  
primùm Monarchiæ spiritualis Romano Antistiti  
eximiæ jugo excusso, in deturbationem terreni  
& temporalis Principatus sponte irruat, supe-  
rioris omnis impatiens, fiatque simul & exlex &  
exrex. Quia sicut non minùs reipsa quàm voca-  
bulo affinia sunt Lex & Rex: sic hæretici legum  
omnium hostes & effrenis libertatis amantes, in

Reges legumlatores qua data vel accepta occasione libentes insurgunt. A solis ergo Ecclesiae hostibus caveant sibi Reges; haeretici enim post everfam infandis moliminibus spiritalem Ecclesiae potestatem, monarchiam terrenam totā concutiunt, omnia sus deque miscent, Principatus suffodiunt, & dicunt: *Exinanite, exinanite usque ad fundamentum in ea.* Certè cum non sit in Scripturis expressior Regibus in populos, quàm Ecclesiae ejusque Capiti Romano Pontifici in oves Christi à Deo collata potestas, quid acceptius tumultuosis, turbidis, & seditionum amanti- bus esse potest, quàm si per scandulas contritae Ecclesiasticae hierarchiae, & scissae in capite unitatis, ad illam Principum cervicibus periculosissimam, & coronis omnibus exitialem assertio- nem viam parent, qua Regia potestas populo, Reipublicae, Comitibus, vel Senatibus ad libitum arctanda vel protendenda, punienda quoque audacissimè subjicitur?

Ratio verò fundamentalis traditae huc usque doctrinae ex ipso Romani Pontificis primatu deducitur, adeo ut Regum potestas in suo ordine suprema eo sit firmior, quo primatus ille est certior. Etenim dum Papa tanquam Ecclesiae caput universas sibi subditas oves docet, non magis politicam Regum potentiam minuire, quàm suam spiritalem infringere potest; quia utraque peraequè à Deo stabilita, peraequè à Traditione recepta est. Regula autem ad quam Pontifex oves verbo doctrinae pascens pronuntiata sua exigit, Scriptura est, vel Sacra Traditio: unde quidquid in contrarium Romanus Pontifex in Regum jura (quod absit, & nunquam Deo bene vertente, & Ecclesiam suam dirigente contingeret) moliretur,

moliretur, totum vel in errorem facti, vel privatam ipsius personalemque sententiam facile revocaretur.

Manifestum est autem, quod ille idem qui absque ullis limitibus dixit Petro: *Pasces oves meas*; non minùs edixit: *Reddite qua sunt Caesaris Caesari*. Ille idem qui prädicavit, *Gentes sibi electas*, ut per os suum audirent verbum Evangelii, & crederent; non minori sollicitudine inculcavit: *Subiecti estote omni humana creatura propter Deum, siue Regi quasi praevalenti, siue Ducibus tanquam à Deo missis*. Quia sic est voluntas Dei, ut bene facientes obmutescere faciat imprudentium hominum ignorantiam...: *Regem honorificate. Servi subditi estote in omni timore dominis, non tantùm bonis & modestis, sed etiam dyscolis*. 1. Pet. 2.

Si quid ergo circa Regum potestatem pronuntiare voluerit Pontifex, ad illius profectò verba suam definitionem exigere tenebitur, cuius vices gerit Christi Servatoris; illius vestigiis insistet, cuius occupat sedem: Principis nimirum Apostolorum doctrinam æmulabitur Sedes Apostolica, dicetque procul dubio cum Beato Juda Thaddæo, *perversorum esse, dominationem spernere, majestatem blasphemare*. Illud Apostolicum perduellibus regeret: *Omnis anima sublimioribus potestatibus subdita sit. Qui resistit potestati, Dei ordinationi resistit*. Commisso sibi gregi, verisq; præcipiet Catholicis reddere omnibus debita; cui tributum, tributum; cui vectigal, vectigal; cui timorem, timorem; cui honorem, honorem. Sacerdotibus etiam imperabit, fieri supplicationes pro Regibus, & omnibus qui in sublimitate sunt. Omnes



denique admonebit, Principibus & Potestatibus subditos esse, & dicto obedire.

Quia nimirum scit Romanus Antistes, quod quemadmodum nullus Catholicorum gregi incorporatus censendus est, qui ejus jussibus non paret, quem Christus æternus Pastor & Episcopus animarum orbi Christiano sine discretione præfecit: ita Christiani nominis indigni sunt, qui Regum imperium & jussa contemnunt. Scit quod ipse Christus æterni Regis Filius, Patri æqualis & consubstantialis, cum posset à tributis immunitatem jure obtendere; nihilominus ut præberet exemplum, factisque probaret quod verbo docebat, maluit exactoribus morem gerere, quàm sibi exemptionem à communi lege vindicare. Scit Pontificiam & Regalem potestatem in suo quamque genere & ordine esse supremam; & quod sicut authore Ennodio Ticinensi, Romanæ Sedis Præsulem suo sine quaestione Deus reservat arbitrio (casibus hæresis, aliisque in sacris Canonibus memoratis exceptis; ) quia, inquit, *Beati Petri Apostoli successores cælo tantum debent innocentiam*: ita etiam authore Irenæo lib. 5, cap. 24. *Cujus jussu homines nascuntur, eodem & jussu Reges constituuntur*. Scit denique Apostolum non dixisse, Non est potens nisi à Deo, sed *Non est potestas nisi à Deo*; quia tanquam bona colenda potestas est etiam in præfecto non bono. Unde prudentissimè Carolum VII. Pius II. admonebat: *Vnum à te petimus, charissime Fili, ut Sedis Apostolicæ detractoribus semper non credas, multa illorum passionibus tribuens*; illorum nimirum qui Pontificiam autoritatem Regali adversari commisitcebantur.

*Commendatio locorum Theolog. 99*  
*Momentosa de Ecclesiasticis judiciis con-*  
*sectaria derivantur.*

*COROLLARIUM I. De questionibus juris*

**E**X dictis hactenus sequitur, Romani Pontificis fideles docentis sententiam locum esse theologicum, unde argumenta & probationes eruere est. Si enim ad Petri successorem pertinet oves Christi verbo pascere, & fratres confirmare, sine dubio ejus autoritas pluris in Theologia facienda est, nec potest à Catholicis contemni.

Ad cujus claritatem considerandum est primò, quod quamvis laudabilis sit eorum zelus, qui Pontifices etiam ut privatas personas nunquam in hæresim lapsos esse contendunt: quia, inquit, non est verisimile quod homini hæretico fidei summam Deus comittat, vel possit alios in fide confirmare, qui seipsum dirigere non valet: tamen ut ab infinitis ex Ecclesiastica historia depromptis instantiis expedite liberemur, distinguere placet errorem in personalem & judicalem. Nam in Petro aliud erat pertinens ad privatam excellentiam, aliud ad communem Ecclesie utilitatem. Romanus autem Pontifex non est hæres culparum, virtutum, sanctitatis, aut prærogativarum personalium Petro à Domino concessarum; sed in his Petro succedit, quæ spectant ad communes & necessarias Ecclesie utilitates. Quidquid ergo sit de erroribus personalibus, abstrahendo etiam ab illa questione (quam pro rei dignitate in præsentiarum resolvere non vacat) utrum Summi Pontificis definitio ad Ecclesiam directa sit infallibilis regula fidei: quid-

quid, inquam, sit de illis quaestionibus, à quibus omnino abstrahimus & intactas volumus, id tamen certum est, Pontificem per sua judicia Christi Ecclesiam nunquam posse in errorē abripere.

Quin etiam, ut rectè in suis de Ecclesia commentariis observat eximius Sorbonæ Doctor Ludovicus Halé, abstrahendo à quaestione de infallibilitate summi Pontificis, ea tamen est prerogativa Sedis Romanæ, quæ à fide ita nunquam deficere potest, ut ab Ecclesiæ corpore per apertam separationem avellatur. Ecclesia enim nunquam ab unitate sua discedet. At Romana Sedes centrum est Ecclesiasticæ unitatis; Ergo nunquam sedes illa ita à fide defectura est, ut à reliquo Ecclesiæ corpore avellatur. Unde Augustinus in Psal. contra partem Donati: *Numerate Sacerdotes vel ab ipsa Sede Petri; ipsa est petra Ecclesia, quam non vincunt superba inferorum portæ*: Hinc Nicolaus I. in epist. ad Michaëlem Imperatorem, ait: *Privilegia ipsius Sedis perpetua sunt, divinitus tradita atque plantata: impingi possunt, transportari non possunt*. Et Leo IX. in epistola ad Petrum Antiochenum, asserit orationem Christi obtinuisse, *quod Lactenus fides Petri non deficit, nec defectura creditur in throno ipsius*. Quia nimirum, ut Magnus Leo sæpe citatus ait, sicut permanet quod in Christo Petrus credidit, ita permanet quod in Petro Christus instituit, in cujus Sede Petri vivit perseveratque potestas, & excellit autoritas. Unde nec ab Ecclesia Catholica toto orbe diffusa Sedes Romana separari, nec à Romana Sede vera Christi Ecclesia recedere unquam potest. Unde præclare Petrus Aurelius in *iudiciis censura*, pag. 13. ait posse quidem privatos homines crimen illud admittere, & ab Eccle-

sia Romana deficere schisma constantes : Sed *ta*, inquit, *simul multitudo Christianorum fidelium tanti mali est incapax : ideoque nec ad punctum temporis sponsi sui Pontificis ~~in~~ <sup>eruentis</sup> ~~amorem~~ <sup>abjicere</sup> potest.*

Considerandum secundo, non solum Romanum Pontificem, sed etiam Prælatos omnes, & quosvis in dignitate constitutos duplicem veluti personam induere, privatam scilicet & publicam. Quam distinctionem licet quidam irrideant, nihilominus tot sunt illius præsidia, ut nemo prudens respuere illam merito possit. Quis enim nisi communi sensui intercedens valeat inficiari? Prælatos supremosque judices, dum decreta edicunt, dum censuras ferunt, dum sedent pro tribunali, non privatae, sed publicæ personæ munus gerere & sustinere? Quis ignorat Magistratibus, Legatis, Regumque Oratoribus longè excellentiorem deferri honorem eo, qui eis ut privatis personis exhibetur, injuriasque eis quæ publicis Ministris intentatas eo esse atrociores, quo bonum commune est peculiari divinius? Nonne Caïphas, quia erat Pontifex anni illius, quantumvis ut privatus de Christo malè sentiret, præter mentem divinum illud oraculum, quo tota Redemptionis æconomia compendiosè continetur, Spiritu sancto linguam præmovere cructavit tamen : *Expediit ut unus moriatur pro populo, ne tota gens pereat*? Nonne ipse Legislator noster Christus post improbatas Scribarum & Phariseorum privatas noxas, eorundem tamen super cathedram Moysis sedentium dicta reverenter excipiēda, & exequutioni mandanda præcepit? Denique quid crebrius & verius in libris asceticis, Theologisque moralibus inculcatur?

quid Concionatores commovendorum ad poenitentiam hominum causâ majoribus clamoribus de sacro suggestu deplorant, quàm non pauperes, quàm privati ad regna cœlorum pervenissent, perfunctos tamen honoribus & prælaturis æternum perituros? Quia nimirum constant vitæ privatæ & publicæ officia; unde potentes potenter tormenta patientur, qui licet privatis muneribus fecerint latis, publica tamen officia vel sustinuerunt incuriosè, vel certè prodiderunt. Ergo homines, illi potissimum qui aliis præsumunt, duabus quasi induuntur personis, quarum una communis est & publica, altera quæ propria spectat negotia, & prudentiâ domesticâ, vel etiam monasticâ gubernatur. Ergo distinctionem illam personæ publicæ & privatæ, quam expungere nonnulli moliti sunt, omnium non Theologorum modò, sed & hominum communissimas notiones non respicientium usus induxit, & consensus munit.

Ex quibus consequitur, privatas summi Pontificis sententias (quod idem de aliis quibuscvis Ecclesiæ Prælati proportionem servata dicendum est) longè minoris esse ponderis & autoritatis iis decretis quæ pro communi bono Ecclesiæ post orationum, collationum, disputationum, aliarumque id genus dispositionum apparatus Pastor Ecclesiæ constituit. Nemo, ni fallor, dubitabit, quin Innocentii III. opuscula, gravia licet & erudita, iis decretalibus autoritate inferiora sint, quibus idem Pontifex ad Episcoporum & Ecclesiarum consulta respondet. Adriani Papæ in libros Sententiarum commentarios nullus epistolis Innocentii I. ad Synodos Africanas directis æquiparabit. Omnes etiam Theologi fatentur

Romanæ Sedis responsa & pronuntiata, quibus rogata ab Ecclesiis aliquid ad fidem vel bonos mores pertinens, directis ad totam universam Ecclesiam diplomatis, Ecclesiâque universâ consensu suo decreta illa divinis Fidei morumque regulis consona esse comprobantè, definit, fideles omnes adstringere. Ergo manifestum est posse aliquid ab Ecclesiæ judicibus quàm publicis ministris proficisci, quod majorem sibi vendicat auctoritatem. Et in hoc sensu distinctionem decretorum Episcopaliū, atque adeo & præcipuè summi Antistitis *ex Cathedra*, vel ex privata sententia, commodam & legitimam esse nemo inficias iverit.

Est tamen alia distinctio nonnullis quidem probata; quam tamen, ut quod sentio aperiam, nec veram reor, nec ferè intelligibilem. Quidam ergo Romanam Ecclesiam à Romano Antistite discernentes, illi præcipuam auctoritatem concedunt, quam isti denegant. Sed hic scrupulus facile evellitur. Tum quia omnia alicujus Sedis privilegia non nisi pro sedente instituta sunt. Tum quia qui ad Sedem Apostolicam accedit, non omnes Romanos incolas, vel Clerum adit, universum, sed sanctissimum Christi Vicarium consulit, ab eoque expectat & oracula doctrinæ, & responsa salutis. Tum quia non populo Cleroque Romano, sed Petro ejusque successoribus factæ sunt promissiones ita præcisè & minutatim, ut Petrum in individuo iis characteribus Christus designaverit, quibus accurati, & ut sic dicam formalistæ tabelliones solent tabularum publicarum acta sollicitè & penè anxie communicare, ut antea ponderavimus. Tam luculenta autem Christi verba tam singulatim Petro asserta in sensu tropologicos detorquere, est illi aditum patescere.



ere, qui verba illa, *Hoc est corpus meum*, sensibus metaphoricis inumbrant. Tum quia à Romano duntaxat Episcopo sacra hæc Concilia decretorum confirmationem, difficultatúmque enucleationem postularunt. Tum demùm, quia alioquin in Christianismum democratia & confusio babylonica invehetur, Ecclesiastici imperii sacra monarchia destruetur, & radicitus extirpato Ecclesiæ Capite, totum Ecclesiæ corpus à fundamentis evertetur. Vnde quidam Theologus Parisiensis in paucis celebris Author, nimirum Theologiæ familiaris, sic rectè scripsit: *Authoritas Pontificalis stabilis penitus & immobilis, & velut anima Ecclesia; subjectum autem & quasi materia autoritatis illius est persona illa, cui Deus potestatem largitur.* Et longè antè S. Leo *serm. 3. de sua assumpt.* in divinum hunc rugitum prorupit, quo tota hæc dissertatio compendio continetur: *De toto mundo unus eligitur Petrus, qui & universarum gentium vocationi, & omnibus Apostolis, cunctisque Ecclesia partibus præponatur; ut quamvis in populo Dei multi Sacerdotes sint, multique Pastores, omnes tamen propriè regat Petrus, quos principaliter regit & Christus.* Quod autem ibi de Petro dixit, in successores ejus esse dilatandum, & perpetuò in Ecclesia duraturum manifestissimè locis suprà laudatis affirmavit.

Denique advertendum est, Ecclesiastica de jure judicia, sive à Pontificibus, sive à Conciliis lata, esse diligenter ex contextu ponderanda. Neque enim intendunt omnia quæ proferunt æquali sæper autoritate vigere. Cùm enim verbis opinandi, vel probabilitatis utuntur ( sicut in Clementina unica de summa Trinitate, probabilior eligitur opinio de infusione virtutum ) vel si

controversia relinquitur indecisa & indefinita, ut in omnibus de conceptu immaculatæ Virginis hætenus emanatis diplomatis liquet; tunc etsi Pontifex in unam vel alteram partem videatur propensus, non intendit tamen rem tanquam ad fidem pertinentem definire. Tunc verò intendunt Ecclesiastici iudices rem ad fidem spectare, cum vel sub interminatione anathematis, vel sub pœnis hæreticis infligendis aliquid proponunt, oppositumque aiunt Ecclesiæ regulis, Scripturæ & sacræ Traditioni adversari. Illud etiam considerandum, quod quando Pontifices & Concilia aliquid obiter & in transcurso præter præcipuum institutum dicunt, non continuo censent illud ad fidem pertinere. In decretis namque duo distinguere est, & intentam conclusionem, & rationes conclusionis: conclusionem fidelibus credendam proponunt; ad rationes autem quas producunt defendendas, pro aris & focis pugnare inutile est; quia sæpè afferunt causas non necessarias, sed verosimiles; non cogentes, sed congruentes.

**COROLLARIUM II.** *Ecclesiæ de questionibus facti iudicia magnâ quidem cum reverentiâ excipienda sunt, at errori absolute obnoxia sunt tamen.*

**N**ulla est, vel esse potest in prima hujus consuetudinis parte difficultas. Nemini enim Catholicò dubiū est, quin authoritas summi Pontificis & Ecclesiæ in questionibus facti decidendis magni sit ponderis & momenti, quas in suis constitutionibus & diplomatis ad totam Ecclesiā directis recensent. Quæ enim auctori gravī & cordano, vel historico locupletī adhibetur fides, nō est

summo Antistiti, aliisque Ecclesiæ judicibus de-  
neganda, qui in omnibus quâ par est gravitate &  
prudentiâ, ascitoque peritiorum judicio proce-  
dere solent. Sanè idcirco credimus Arium circa  
Trinitatem, Nestorium circa Incarnationem,  
Pelagium circa gratiam impegisse, quia Pontifi-  
ces & Concilia, à quibus hæresiarchæ illi profligati  
sunt, ita esse testantur. Usus etiam ad nostra  
usque tempora perenniter certos libros proscri-  
bens, idem apertè confirmat. Si enim Christi Vi-  
cario Prælatisque Ecclesiæ parendum humiliter  
est, dum alicujus codicis lectione interdiciunt,  
quidni iisdem parendum erit, dum personam ali-  
quam feriunt, & hæreticis accensent? cum etiam  
per excommunicationis latam sententiam per-  
sonæ ipsæ censuris iniustæ proscribantur.

Itaque certum est & fuit semper, Pontificiam  
authoritatem posse se ad privatas personas eo-  
rumque libros extendere, eosque erroris & ac-  
cusare, & damnare, ut continenti Ecclesiæ praxi  
perspicuum est. Ergo cum legitimam authori-  
tatem revereri teneamur, manifestum est Eccle-  
siæ & Pontificum de quæstionibus facti judicia  
magno esse honori habenda.

Quavis ergo hujusmodi judiciis non sit, nec  
possit fidei infallibilitas & certitudo esse anne-  
xa, non hoc propterea solo nomine judicia Põ-  
tificia, vel Synodalia eludi possunt, ne omnia lu-  
dificari velimus: quia ut rectè & eleganter dixit  
Petrus Aurelius, omnes Prælatorum sententias  
juridicas (de quarum subreptione non constat,  
aut justa est dubitandi ratio) omnes colere, omnes  
venerari oportet, ut Pastorū vocem, ut Magistro-  
rum Ecclesiæ doctrinā, ut eorum quibus dictum  
est, *qui vos audit, me audit*. Non omnia morose

perscrutari, vel viriligando dijudicare oportet, sed piè, sed humiliter, sed quietè eorum judicium suscipiendum est, quibus pascere oves, & dubios confirmare fratres à Domino commissum est.

Falli in his judiciis & Pontifices & Concilia, posse omnes alicujus notæ Theologi postea referendi docuerunt: at non continuo respuenda illa judicia sunt, quandiu falsitas vel subreptio non apparèt. Quod in his falli possint, dum falli eos nulla bona ratio persuadet, nihil mea refert, ut cum Bernard. *lib. de precept. & dispens. cap. 12.* loquar, qui non sum conscius. Præsertim cum teneam de Scriptura, quod labia Sacerdotis custodiunt scientiã, & legem ex ore ejus requirunt, quia Angelus Domini exercituum est. Ergo à labiis custodientibus scientiam leges omnes reverenter accipiam: ipsumque proinde (verba sunt Bernardi) *quem pro Deo habemus, tanquam Deum, in his quæ apertè non sunt contra Deum, audire debemus.* Hi fuere sensus (inquit præfatus Aurelius Bernardi verba ponderans) *hæc pietas, hic in Deum & Dei Præsules honor meliorum Christianorum, & ipsorum etiam hæreticorum.* qui nimirum Episcopalia judicia hoc solo nomine nunquam eluserunt, quòd dicerent infallibilis non esse auctoritatis. *Tanta enim (subdit) per omnem Ecclesiam, tam humilis, tam casta in Episcopos Ecclesia Patres observantia percrebuerat, ut ejus etiam vestigia in transfugis hæreticis remanerent.*

Sanè si in humanis judiciis nemo mentis compos eo defensionis seu effugii genere utitur, quis tutò eo solo titulo Ecclesiastica judicia ludificari, & ad nihilum redigere præsumet, quòd erroribus absolutè obnoxia sint? At nemo ita insanit, ut idem Author egregiè monet, ut judiciis, vel Sæpe

tas, vel Regis sententiam repudiet, quòd sit ab hominibus lata, infirmis utique ac labilibus. Nemo exceptionem illam admittit, judicem nimirum falli posse, dum re ipsa deceptum esse non pater. Cerrè nisi gravis urgeat in contrarium ratio, hoc effugium nemo cordatus aliud esse censuerit, quàm pertinacis animi, & ipso lumine communi carentis obstinationem obedire detrectantem. Privilegium infallibilitatis, inquis, in rebus facti non habet Ecclesia. Dictum benè. At tu privilegium iis judiciis sine gravi causa obstitendi unde habes? In facti litibus dirimendis Ecclesiae Præsules non sunt ab errandi periculo immunes, addis, infirmitate circumdati, labiles, mortales denique, non Angeli, vel Beati. Ita planè, sed an propterea expectandus de cœlo Angelus, vel Beatus immobili æternitate fruens, ut quæstiones illas exerto ore definiant? Hanc cogitationem respuit communis sensus, respuit sani quietique animi verecundia.

*Sculptissimum est* (aurea sunt Aurelii verba) & inauditum istud genus exceptionis adversus constitutas publicè auctoritates, quarum nulla incolumis esse poterit, si debitum eis honorem pudoremque hoc telo concutere liceat, quo humanarum rerum omnis ordo & discrimen evertitur, omniaque ad peraquationem & confusionem foedissimam deducuntur. Falli posse publicarum potestatum judicia, non inficiamur; homines enim sumus, & natura nostræ meminimus. Sed si ille judicando falli possunt tot tantisque præsidiiis quibus ab errore vindicentur pramunita, quànò magis in reprehendendo falli poterunt privati hominiciones, nulla re cum eis conferendū? Superbia nimia est modestiam exigere, quam ipse non exhibeat; infirmitatis humana admonere, quàm



in te obliuiscaris. Quod si & tu homo es, & falli potes, & nihil est quod in te audiendo me securum ab errandi periculo praestet, quanto equius spectatarum commendatarumque publicè authoritatum iudicia reverebor, quoad mihi de earum errore, si quis subest, certiore argumento constet, quàm reprehensione tua hominis longè incertioris, & futilioris. & ad errandum pronioris, & rebus omnibus infra earum praestantiam authoritatemque dejecti? Nam quandiu dubitandi locus est, nec aperta erroris fides, perspicuaque erroris evidentia in iudiciis publicis ostenditur, repudiari debent, longeque amandari privatorum uocula, ac reorum praecipue, damnatorumque protervè clamores. Nec illustres probatique iudicantium confessus à perpetua notissimaque authoritate, ac fidei possessione sine manifestis & ineluctabilibus argumentis depelli possunt. Hoc enim gentium omnium commune jus in minimis rerum minimarum controversiis quotidiano usu observatur, nec sine summa iniquitate in rerum omnium maximè negligi potest. Hoc denique cuneo Ecclesia Catholica suam in fidei mysteriis, divinique ministerii perpetuitate auctoritatem tueri solet adversus haeticorum temeritatē, errores ei, imperitias, haereses, fœdas in omni genere labe similiter objectantium: strenuèque asseverat, & hoc uno verbo petitiones eorum elidit, non posse sibi sine perspicua iniquitate abjudicari & eripi antiquæ perpetuaque auctoritatis possessionē, nisi illa crimina & illæ reprehensiones ita evidenter & apertissimè patefiant, ut nulla penitus dubitatio super sit, quemadmodū in legitimis tribunalibus usurpatur; alioquin in dubio meliorem esse conditionem possidentium, atque adeo immobilē & invictā. Ergo cum Ecclesia Catholica iudicandorum factorum potestatem possideat, nec possit illi antiquæ, perpetuaque



authoritatis possessio sine perspicua iniquitate  
eripi, quò ad lucidissimæ & penitus ineluctabiles  
in contrarium rationes proferantur, ex certissi-  
ma justitiæ lege judicia illa revereri tenemur.

*Altera corollarii pars exponitur, & demon-  
stratur, atque concordi Theologorum  
assensu confirmatur.*

Præcipuus & totus difficultatis cardo in hoc  
positus est, utrum hujusmodi de factis occurren-  
tibus lata judicia tam infallibili polleant autho-  
ritate, ut non solum illa revereri, illis parere de-  
beamus, sed illis etiam assentiri fide divina te-  
neamur. Res fiet exemplo illustrior & planior.  
Quando Concilium, vel Papa pronuntiant, ali-  
quem librum esse hæreticum ob quasdam propo-  
sitiones in suo naturali sensu erroneas, quæ ex eo  
affirmantur exscriptæ, quaeritur utrum tunc non  
solum sint reprobandæ propositiones damnatæ  
(quod pertinet ad quæstionem de jure) sed etiam  
utrum credendum sit fide divina & supernaturali,  
propositiones illas totidem verbis reperiri in au-  
thore damnato, sensumque erroneum fuisse ab  
ipso autore præsumptum, nec posse ad catholi-  
cum revocari. Et hæc vocatur quæstio facti non  
revelati. Dico *non revelati*; nam de factis reve-  
latis & apertè in sacris paginis expressis nemo  
ambigit quin ad objectum fidei saltem secunda-  
rium pertineant; quia cum divinâ revelatione  
(quæ est ratio formalis & motivum fidei) inno-  
tescant, non minus repugnat illis posse subesse  
falsum, quàm impossibile sit mentiri Deum. V.g.  
non solum doctrina Hymenei & Phileti (de qua  
2. *Timot. 2.*) fuit hæretica, sed etiam ipsos à va-

ritate excidisse, & in hæresim lapsos esse, sicutus  
etiam Sadducæos & Samaritanos schismaticos  
extitisse, ea fide credimus, quâ sacris Scripturis  
& verbo Dei assentimur, idest immobili, super  
naturali, divinâ, falli vel fallere nesciâ.

Statu quæstionis sic ob oculos posito, senten-  
tia nostra ita certa est, ut nullus alicujus nominis  
Theologus ante quindecim circiter annos in-  
veniatur, qui non solùm oppositum non sense-  
rit, sed qui eam etiam vel in dubium unquam  
revocarit. Imò illud firmissimum adversus hære-  
reticorum calumnias præsidium esse existima-  
rent, si Conciliis & Pontificibus nonnullis ab  
aliis Conciliis, aliisque Pontificibus impositas  
hæreses ad errorem & deceptionem circa factam  
nonnunquam contingentem revocarent.

Ita expressè Cardinalis Bellarminus *lib. 4. de p-  
summo Pontifice, cap. 12.* affirmat sextam & septi-  
mam Synodum, necnon Adrianum Papam, &  
Leonem II. in causa Honorii potuisse decipi, et  
quando eum hærescos Monothelitanæ damna-  
verunt. Eadem ratione affirmat Stephanum &  
Sergium errasse in quæstione non juris, sed facti  
gravissimi, dum pronuntiaverunt Formosum non  
esse Papam legitimum, ab eodemque ordinatos  
iterum ordinari præceperunt. Idem affirmat  
Cardinalis Baronius in eadem causa Honorii,  
contestans id nemini dubium esse posse. Subscri-  
bunt eidem veritati Nicolaus Coëfæus *in suis*  
*pro Pontificibus apologiis*, satis notis; Duvallius *in*  
*suo de infallibilitate summi Pontificis tractatu*,  
*part. 2. q. 1.* Stapletonus *in suis controversiis*, Peta-  
vius *lib. 1. de poenitent. publica, cap. 2. & opere de*  
*dogmatibus theologicis*, collatam à Conciliis in  
Honorium & Theodorum hærescos, criminat

tionem hac nostrâ doctrinâ diluendam contēdit. Idem Dominicus Gravina in suis *præscriptionibus*, Melchior Cano *opere de locis*, & Joannes à Sancto Thoma in *tractatu de summo Pontifice*, non semel docuerunt. Denique Cardinalis Palavicinus nostram assertionem tanquam exploratam supponit *Historia Concilii Tridentini lib. 7. cap. 14. & lib. 11. cap. 8.* De mente porro S. Thomæ postea clarebit.

Nec sanè potuerunt Catholici Theologi illi asserto suum non præbere assensum, quod in Jus Canonicum tanquam regula immobilis & indubitata insertum est. Nam *cap. Nobis, de sententia excommunicationis*, sic habetur: *Judicium Dei veritati, quæ non fallit nec fallitur, semper innititur: judicium autem Ecclesiæ neminquam opinionem sequitur* ( in definitionibus nempe factorum, judicia enim Ecclesiæ de jure & controversiis fidei uni etiam veritati, nimirum verbo Dei scripturis vel traditione ad nos transmissio innixa sunt, ) *quam & fallere sæpè contingit & falli. Propter quod contingit interdum, ut qui ligatus est apud Deum, apud Ecclesiam sit solutus; & qui liber est apud Deum, Ecclesiastica sit sententia innodatus.*

Hujus etiam sententiæ veritate fuisse persuasam sacram Congregationem Cardinalium, patet ex judicio lato de opere Gregorii de Laude, Neapoli edito anno 1660. Scopus ejus Authoris c. 67. pag. 281. is est, Abbatem Joachim ab erroribus illi à Magno Concilio Lateranensi assertis vindicare. Huic suo conatui præmittit ex Dominico Gravina, magnum interesse discrimen: *jus quæstionis inter & factum authoris, quo posito non intendit attributas Joachimo sententias adversus Conciliū Lateranense defendere, sed ipsum ab hujusce-*

modi errorum labe purgare. Ad examen vocavit librum illum sacra Congregatio, & re maturè discussa, verba illa Authoris, quibus se *id intendere* professus fuerat, ita mutari præcepit: *Conabimur tamen, si fieri potest, Joachimum defendere.* Ergo ex mente sacre Congregationis etiam post judicium Ecclesiæ, & tale judicium, quo nullum in Ecclesia solennius hætenus fuit, Magni nimirum Concilii Lateranensis 1280. Patribus constantis, licitum est ob graves rationes, reprobandos errores, Authores illos purgare, qui eis inspersi sunt. Noverat siquidem sapientissima Congregatio, quod sicut Augustinus *lib. de utilitate credendi* docet, non solum nihil esse detrimenti, sed non parum esse utilitatis, cum ex alieno scripto intelligitur aliquid veri, etsi fortè hoc ille qui scripsit, non intellexerit, nec ob aliud Author placeat; nisi quod cum sensisse non putatur, quod sentiri non oporteat, tunc nullus error obbibitur: quod si in malè intelligendo, & ad bonum sensum Authore reducendo contingit, *Hic error non modò humanus est, sed etiam homine dignissimus. Non enim mala facta* (addit idem Pater *epist. 38.* quod de libris & scriptis peræquè valet) *hominum cognoscendo, sed cognitis non consentiendo, de incognitis autem non temerè judicando, innocentiam custodimus.*

Ipsi etiam summi Pontifices non negarunt, sed confessi sunt, se in factis judicandis & falli quandoque, & fallere etiam posse, & humiliter & verè agnoverunt se interdum intellectu imprudentiâ obscurato, interdum voluntate infirmâ peccare, qui propterea sicut alii ad Sacramentum poenitentiae quotidianarum culparum conscientiam acti accedere tenentur. *Quid miraris* (inquit

Magnus Gregorius lib. I. dialog. c. 4.) *quia fallimur, quia homines sumus? Quid mirum, si ore mentium aliquando in aliam ducimur, qui Propheta non sumus? Multum verò est quod uniuscujusque Praeulis mentem curarum densitas vastat, cumque animus dividitur ad multa, sit minor ad singulas, tantòque ei in una qualibet re subripitur, quanto latius in multis occupatur.* Hinc lata ab uno Pontifice de his factis judicia, & ab eodem & ab aliis Pontificibus nonnunquam rescinduntur, aut revocantur, aut abrogantur, aut immutantur, aut temperantur. Quia nimirum Pontifices in hujusmodi decretis condendis nec divinam ullam revelationem, nec Scripturis, nec traditione, sed humanam duntaxat prudentiam reguntur. Quamvis autem evidens esse possit videntibus, & ab absentibus praesumi debeat, summum Pontificem esse prudentem & fidelem dispensatorem, id tamen nunquam fide constat. Cum etiam sapientiores & sanctiores Pontifices veritate coacti & propriis experimentis eruditi ultrò fateantur, supremam suam dignitatem non solum in applicandis legibus, aut in judiciis quae pendent ex informatione factorum, & ponderatione circumstantiarum ferendis ab errandi periculo non eximi, sed potius propter illam qua obruuntur negotiorum immensam molem, pluribus erroribus aut fraudibus exponi. Unde Alexander III. cap. Si quando, de rescriptis, ad Archiepiscopum Ravennatensem aiebat: *Aut mandatum nostrum reverenter adimpleas, aut per litteras tuas quare adimplere non possis, rationabilem causam praeendas: quia patienter sustineamus, si non feceris quod prae nobis fuerit insinuatione suggestum.*

Ergo ipsimet Pontificibus fatentibus judicia

de factis errori obnoxia sunt & reformationibus. Unde omne de quacunque re, etiam ex informatione factorum & circumstantiarum pendens iudicium eadem fide suscipere, & sine delectu defendere, non est Ecclesiæ vel Apostolicæ Sedis auctoritatem & jura fovere, sed labefactare; non sed evertere; non decorare gloriam, sed imminuere, hæreticorum ludibrio & sanctorum exponere. Non eget nostro mendacio, adulatione nostra non eget, primæ summæ Sedes veris tam abundè cumulata prærogativarum titulis, falsis & commentitiis non eget honoribus. Quin potius non in vindicanda sibi in factis judicandis infallibilitate, sed in revocandis quæ interdum per subreptionem judicata sunt, gloriam suam quàm verissimè constituit, quia nihil illi veritate charius, nihil antiquius æquitate. *Hoc solet habere præcipuum Apostolica Sedes* (inquit Bernardus epist. 180.) *ut non pigeat revocare, quod à se forte deprehenderit fraude elicitum, non veritate pro meritum. Res plena æquitate, & laude digna, ut de mendacio nemo lucretur, præsertim apud sanctam & summam Sedem.*

### *Rationes hujus secunda partis.*

Ratio à priori hujus posterioris partis traditur à S. Thoma 2. 2. 7. 1. ubi docet articulos fidei temporum successione non crescere quoad substantiam, sed penes explicationem duntaxat. Manifestum est autem, fidem nova quotidie susceptram esse incrementa, si facta emergentia ad objectum fidei pertinerent. Sic ergo formatur ratio: Ut aliquid ingrediatur objectum fidei essentialiter, requiritur ut innotescat verbo Dei vel scripto, vel continua traditione ab Apostolis &



Patribus ad nos derivatā : tum quia fides ex auditu, auditus autem per verbū Christi : tum quia Ecclesia non habet novas revelationes, nihil de novo condit, sed vetera duntaxat proponit aut exponit; ideoque juxta præceptū Pauli, depositum custodit sibi creditū, non à se inventū; quod accepit, nō quod excogitavit; rem non ~~in~~ sed doctrinā; nō usurpatione, sed publicæ traditionis ~~perductā~~, non à se prolata, quā nemo debet esse author, sed custos; non institutor, sed sectator; non ducens, sed sequēs, ut alibi ex Lirinēsi diximus. Tum denique, quia non potest habitus ullus vel virtus ulla extra suum objectum adæquatum & specificativum dilatare. Ratio autem formalis fidei Christianæ est divina revelatio in Scripturis vel Traditione expressa.

Atqui facta singularia de novo contingentia, v.g. utrum ille Author hæreticè senserit, utrum talis fuerit ejus sensus, necne, & alia similia, non innotescunt verbo Dei in Scripturis exarato, vel da manu in manū, de ore ad os ab Ecclesia recepto, & ad nos per Apostolos virosque Apostolicos perēni traditione trāsmissio, ut est per se evidēs. Ergo nec in summo Pōtifice, nec in tota Ecclesia residet facultas definiēdi infallibiliter dubia facti; ita ut determinatio circa hujusmodi, tametsi summa sit humilitate & reverentia excipienda, nunquā tamen fide divina credenda sit. Unde qui fictis singularibus ab Ecclesia definitis fidem derogat, non continuò hæreseos reus censendus est, sed ad summū temeritatis accusari potest, si se torrēti totius Ecclesiæ sine causa opponat. Quia fides ex singulis fictis à Deo minime revelatis nō pendet; ideoque Ecclesia in disceptandis quidem fidei controversiis infallibili

Dei Spiritu regitur & agitur. Verùm in facti qua-  
stionibus sensibus, rationi, & diligentia humanæ  
innititur, quæ licet sæpè certa sint, interdum ta-  
men patere deceptioni nemo ambigit, qui scit  
cogitationes hominum timidas, & incertas pro-  
videntias nostras. Hinc Cardinalis Baronius ad  
annum 681. num. 39. *In iis qua ad personas perti-  
nent & scripta ipsarum, non tam rigide reperitur  
custodita censura. In his enim qua facti sunt unum-  
quemque contingere posse falli, nemini dubium est:  
& tunc illud Pauli ad Corinthios usurpari potest:  
Non enim possumus aliquid ad versus veritatem,  
sed pro veritate.* Et Cardinalis Bellarm. lib. 4. de  
summo Pontif. cap. 11. *Concilium generale legiti-  
mum non potest errare in dogmatibus fidei defini-  
dis; tamen errare potest in quaestionibus de facto.* Et  
cap. 2. *Conveniunt omnes Catholici posse Pontifi-  
cem etiam ut Pontificem, & cum suo cœtu Consi-  
liariorum, vel cum generali Concilio errare in con-  
troverſis facti particularibus, qua ex informatione  
testimoniisque hominum præcipuè pendent.*

Ratio à posteriori petitur ex variis exemplis  
in quibus apertè claret, sacra Concilia Œcume-  
nica, summosque Pontifices non semel in his fa-  
ctis controversiis à veritate aberrasse. Etenim sex-  
ta Synodus generalis, & Constantinopolitana II.  
cui præerat Papa Agatho per Legatos, Hono-  
rium I. tanquam Monothelitarum hæresi infe-  
ctum solenniter, damnavit, ejusque epistolam le-  
ctam & excussam diligenter cum aliis hæretico-  
rum scriptis palà cremari mandavit. Quod sextæ  
Synodi decretum non solum omnes Doctores  
per septem aut octo sæcula receperunt, sed etiam  
duo Concilia œcumenica, itemque Leo II. &  
Adrianus II. clarissimis verbis confirmaverunt.

Quod si dicas cum Baronio aliisque recentioribus, acta sextae Synodi à falsariis fuisse corrupta, adulterata à Theodoro Archiepiscopo Constantinopolitano, propter obfirmatam in hæresi Monothelitarum pertinaciam dejecto, & deinde conciliatâ Imperatoris gratiâ restituto, qui nomen suum oblitteravit, & Honorium supposuit, cujus signum est quod nulla in actibus illis mentio fit Theodori, qui tamen ob Monethelismum meritò fuerat exauthoratus. Si etiam dicas cum aliis, Honorium in sua ad Sergium epistola reprehensibilem fuisse, quia quavis ejus verba sint ita contexta ut possint Catholico sensu exponi, in speciem tamen videntur Monothelitarum causæ favere: unde infertur Honorium non leviter peccasse, simulationem tunc temporis adhibens, quando ei ex officio incumberebat grassantem hæresim cohibere; subindeque non contra fidem, sed contra officium Pastorale peccasse quando toto Oriente tumultibus & Monothelitarum publicis moliminibus vexato siluit, & mali granditatem verbis ambiguis & hæresi verisimiliter astipulantibus dissimulavit, non ascendit ex adverso, nec pro domo Dei murum se & propugnaculum opposuit, ut staret in prælio in die Domini, atque speculator constitutus vidit gladium venientem super terram, & non insonuit buccinâ, ut loquitur Scriptura, imò tâquam mercenarius, & non Pastor, vidit lupum venientem, & fugit. Quocirca Sergius Constantinopolitanus scelestissimus totique orbi notissimus hæresiarcha, cui dudum perspecta erat Honorii pusillanimitas, apud Pontificem accusat Monachum Sophronium intrepidum Catholicæ doctrinæ defenso-rem, ad Jerosolymitanam postea Sedem evectum,

quod duarum Christi voluntatum & operationum assertione Christianum orbem molestaret. Cui Honorius accommodato ad omnia tempora ingenio respondit suppressendas esse voces *unius aut duarum voluntatum*, conclusitque: *Unum esse Christum Dominum divina, vel humana in utrisque naturis operantem*; ut hac verborum eludentium tergiversatione importunam Sergii in aula Imperatoris plurimum valentis infectionem declinaret.

Si, inquam, hæc dicantur, libenter audio, eorumque Doctorum intentionem probò, qui non solum Pontifices prout Pontifices ab errore longissime abfuisse asseverant, sed etiam contendunt, ex speciali Dei providentia nullum Romanum Antistitem, etiam ut privatam personam in fidem Catholicam peccasse. Quod confirmant tum ex celebri S. Maximi cum Pyrrho Monothelita disputatione, in qua ab Honorio hæresis crimen amolitur. Tum ex successoris Agathonis verbis: *Veni mihi, inquit, si veritatem Domini mei, quam illi (Pontifices prædecessores) sinceriter prædicaverunt, prædicare neglexero*. Ubi affirmat Pontifices decessores à tramite Apostolicæ traditionis nunquam errasse, vel aliqua hæreticæ suspicionis labe hætenus aspersos fuisse. Sed ex his magis instauratur & roboratur veritas nostri confectarii,

Etenim tametsi hæc omnia Baronio concedamus, demumque sextam Synodum supposititiis additamentis fuisse falsatam, quantumvis in contrarium obstare videantur non modò exemplaria Græca, sed etiam Latina translatio contexta à Leone Papa, qui primus Synodum confirmavit, Agathone qui eam indixerat, morte prævento. Imò Leo in epistola sua formaliter ait: *Honorium,*

*qui hanc Apostolicam Sedem non Apostolica traditionis doctrina illustravit, sed profana prodizione immaculatam fidem subvertere conatus est: qui iterum epistola ad Hervigium Regem, & ad Episcopos Hispaniae memoriam Honorii damnat. Sed esto demus illa omnia tam multa, tam antiqua, tanta consensione per multa secula admissa, fuisse corrupta, quid responderi poterit ad septimam Synodum, quae eundem Honorium damnat ita luculenter, ut Cardinali Bellarmino nihil aliud dicendum occurrat, nisi Patres septimae Synodi fuisse deceptos sequendo sextam, quae vel corrupta erat, vel per errorem facti Honorium damnaverat? Quid ad octavam Synodum, & ad epistolam Adriani in ea insertam, quibus conceptis verbis asseritur Honorium fuisse anathematizatum, replicari poterit? Cum ipse Cardinalis Baronius confiteatur utriusque illius Synodi, maximè octavae acta esse sincera & integra: quid inquam, responderi poterit, nisi quod ait idem Baronius, gemina illa Concilia cum Adriano fuisse decepta ex adulteratis sextae Synodi exemplaribus? Sed ex hoc habemus intentum, nimirum Pontifices & Concilia in quaestionibus facti posse errare, ut praeaudatus Cardinalis ita certum esse dicit, ut de hoc nemini posse esse dubium asseveret.*

Accedit quod in sexta Synodo, quae falsata perhibetur, refertur epistola Honorii, quam esse ipsius legitimum partem nemo ambigit, cum ex ea conentur eruere Authores, Pontificis illius in fide innocentiae argumenta. Et tamen legentibus constat Honorium in suis literis approbare epistolam Sergii haeticam. Quo in facto excusent Honorium ejus vindices, dicendo Papam illum



illum haud benè epistolam Sergii penetrasse, eamque quantumvis hæresi sordentem, in Catholico, quem pati poterat, sensu benignè fuisse interpretatum, & ita Honorium excusat P. Petavius *lib. 1. de Incarn. c. 21.* Sed ex hoc clariùs habetur intentio nostra, nimirum illū non continuò esse hæreticum, qui decisiones facti fide divina non credit ( ut quidā moderni de nihilo magnas turbas commoventes planè ignoranter effutierunt ) & aliquam propositionem in suo naturali sensu hæreticam, quales erant Sergii propositiones, in alio esse Catholicam censeret ; subindeque si Honorius non fuit hæreticus exponendo epistolam hæreticam hæretici aperti in sensu orthodoxo, multò minùs, nisi per summam iniquitatem, censeretur debere hæreticum, qui Catholicum Authorem in communione Romani Pontificis, decedentem ad sensum catholicum reducere conatur.

Hujusmodi benignarum interpretationum & charitate plenissimarum innumera occurrunt exempla. Et certè qui non sunt historiæ Ecclesiasticæ omninò rudes & imperiti, probè sciunt, quod licèt in Fidei decretis legitima Concilia inter se nunquam dissideant, vel quæstiones juris & dogmatum Universalis Synodi judicio semel sopitæ nunquam iterum excitentur, quia regula fidei semper una & eadem est, semper immobilis, semper irreformabilis, ut ait Tertull. nihilominus in facti quæstionibus, in exponendo Authorum sensu non rarò à se invicem dissentiant, decisasque quæstiones ad judicium iteratò revocant. Sic quandam Monachorum Seytharum propositionem, quam Hormisdas Papa hæretico sensu acceptam damnaverat, Joannes II. successor benigniùs intelligens Catholicam



esse declaravit, nec ex duobus istis Pontificibus alteruter hæreseos reus peractus est. Sic Dionysii Alexandrini Episcopi scripta ut Catholica defendebat Athanasius, quia illa ad Ecclesiæ sensum inflectebat; reprobabat verò Basilius, quia in eis Arianorum sensum sibi legere videbatur: nec propterea Arianismi fuit infirmulatus Athanasius, qui fuit Arianorum hostis capitalis, sed ad summum in pura facti quæstione errare potuit, dum Arianum sensum abesse, & Catholicum inesse arbitratus est. Sic Origenis libros innumeri Doctores, plura Concilia, non pauci Pontifices, & tota quinta Synodus œcumenica ut hæresibus scateutes condemnarunt. Et tamen Picus Mirandulanus, Genebrardus Doctor Sorbonicus & Archiepiscopus Aquensis, P. Binctus, aliique Origeni quidem assertas hæreses detestantes, ipsum nihilominus Origenem ab erroribus à talibus & tantis impositis vindicarunt. Sic Theodoretum in Cyrillum scribentem, eadem quinta Synodus, tanquam Nestorianæ impietatis reum proscripsit, cujus tamen libros innoxios labisque puros esse testatur & contendit P. Simundus. Nec propterea hujuscemodi Apologistæ pro hæreticis habentur, quia damnatos errores ipsi rejiciunt; sed in scriptis eorum, quos defendunt, inesse errores non concedunt. Sic ab Apollinario Damasum, à Celestio Zozimum circumventos in quæstionibus facti nemo inficiatur. Sic per quosdam Monachos ad Innocentium II. fallaciam obrepisse testatur Bernard. epist. 327. *Nec mirum, nec novum est, inquit, humanum animi posse falli & fallere. Monachi venerunt ad vos in spiritu mendacii & spiritu erroris adversus Dominum & adversus Christum ejus. Verbum iniquum*

constituerunt adversus Episcopum, cujus conversacionis & vite bonus odor fuit hætenus in omni loco. Qui sunt isti, qui ut canes mordent, qui dicunt bonum malum, qui ponunt lucem tenebras? Qui sunt isti, qui contra legem maledicunt surdo, & coram cæco ponunt offendiculum? Quare Domine irasceris in filium tuum? Quare latificasti inimicos ejus? Vbi est illud Apostoli: Nolite omni spiritui credere, sed probate spiritus, si ex Deo sunt? In Domino confide, quia dissipabitur consilium eorum; & cum apparuerit quod verum est, evacuabitur quod ex falso est, ut mentita sit iniquitas sibi. Sic postulanti- bus Ratisponensibus Monachis Leo IX. corpus S. Dionysii è Gallica Abbatia Ratisponam translatum pronuntiavit, nec tamen tanto thesauro orbatam se Gallia credit. Sic Cœsmographorum quorundam minimè malorum suasu circumventus Zacharias Papa S. Virgilium anathemati subjecit, quòd antipodas dari doceret: nec propterea antipodæ desierunt; quia veritates facti, cum non sint supra naturam, non Scripturæ, Ecclesiæ, Pontificumque decretis, sed sensibus aut ratione metimur, quibus istorum judicium à natura asser- tum est. Sic demùm ipsi Summi Præsules in omnibus suis quotidianis diplomatis, decretis, concessionibus, dispensationibus, factorumque judiciis istam aut exprimunt, aut subaudiunt exceptionem, *si preces veritate nitantur*. Quia rectè sciunt multa sibi pravâ insinuatione suggeri: sciunt non desituros calumniatores, quandiu non deerunt innocentes: sciunt tantum suis circa facta decretis inesse veritatis, quantum sibi facta ritè verèque exposita sunt: sciunt nullam tantam in mundo vigere auctoritatem, quæ suo pondere aliquod facti caput persuadeat; nullam

extare potentiam, quæ facta reddat infecta ; sed soli Deo eximiam esse prærogativam dicere & facere , mandare & creare, videre res & causare: sciunt non debere Ecclesiam sollicitari, nec in ea contentiones ac turbas foveri ob leviculas demeris factis concertationes, quia parum Reipub. Christianæ interest, parum summi Pontificis, parum Episcoporum, Doctorum & Ecclesiæ, modò proscripti errores libentissimè damnentur. Sciūt Ecclesiam debere prorsus esse contentam jure sibi divinitus tradito Fidei capita infallibili auctoritate decernendi, & decretis suis refragantes à corpore suo rescandi , si pertinaciter Spiritui veritatis , quo in quæstionibus juris finiendis agitur, imbecillam rationis humanæ sapientiam opponant ; ad facta verò infallibiliter determinanda sensuum judicis permilla , jura sua non protendi , quia ex ejusmodi disceptationibus conflare hæresis nequaquam potest. Id rectè scivit beatissimæ memoriæ Clemens IX. qui ad tranquillitatem Ecclesiæ Gallicanæ his facti quæstionibus superioribus annis interturbatæ vires omnes suas conatusque felicissimè contulit.

*Nonnulla occupantur objectiones.*

Objicies 1. Si vera sit nostra doctrina , hæreses reddentur immortales , omniumque hæreticorum libri tuti & intacti : nullus siquidem liber erit ita proscriptus, cujus censura non possint eludi distinctione juris & facti , & ad inventionem cujusdam sensus Catholici, ad quem damnatæ propositiones inflectentur.

Respondeo sufficere ad extinctionem hæresicon , quod possit Ecclesia propositiones erroneas in eo , quem naturaliter præseferunt, sensu infallibiliter damnare , quantumvis in dubiis

facti non sit infallibilis. Sanè sicut sæpè contingunt calumniatores, qui innocentibus coram Judicibus Ecclesiasticis falsa crimina imponunt, ob quæ infontes & plectuntur & infamantur, quia in ore duorum vel trium testium stat omne verbum: ita & Catholicis viris possunt erroneæ assertiones ascribi; & tunc Ecclesia infallibili quidem judicio hæresin impositam proscribit, sed nequit infallibili judicio definire, utrum actores jurènt an injuria, verènt an falsò accusarint. Nec sequitur propterea omnes libros hæreticos in tuto ponitur, quia ad proscribendos libros non exigitur infallibilitas, sed potestas allegatis & probatis innixa: sicut crimina sceleratorum in tuto non ponimus, licèt Principibus & Senatibus infallibilitatem non asseramus. Tum quia præter securitatem fidei datur humana certitudo, cui nemo sine temeritate vel amentia contradicit. Sic nemo sanæ mentis Arii, Nestoriique perfidiam negaverit, de qua nullus Catholicus Scriptor dubitavit. Tum quia sensum libri proscripti sæpissimè non inficiantur ipsi hæretici, putà Calvinistæ non negant sensum Calvini fuisse transsubstantiationem impugnare: unde tunc & error, & author erroris justissimè proscribitur; ille infallibiliter, iste evidenter. Tum demùm quia religiosa filiorum Catholicorum obedientia librorum proscriptioni humiliter obsequitur, nec latis censuris cum scandalo se opponit, probè sciens Ecclesiam non solum veritatum infallibiliter definiendarum jure, sed etiam factorum secundùm allegata & probata determinandorum facultate potiri. Ergo nec hæresibus, nec hæreticis favet nostra doctrina.

Objicies 2. In Concilio Nicæno post anathe-

mate perculsum Arii errorem, procedere ulterius voluerunt Patres ad ipsius Hæresiarchæ damnationem. Et quia Eusebius Episcopus Nicomediensis, & Theognis Nicænus damnationi personæ subscribere noluerunt, eos, tametsi ab hæresi se abhorreere profitentes, prius excommunicatos sancti Patres Sedibus privarunt. Ergo censebat Concilium œcumenicum, non errorem modò, sed hæreticum etiam anathematizari oportere.

Respondeo argumentum multis peccare. Primò enim etiamsi totum antecedens verum foret, nihil tamen contra nos concluderetur. Nunquàm enim negavimus, posse Ecclesiam de personis earumque libris pronuntiare, cum de illis ipsa tribunalia secularia ferre iudicium queant. Sed infallibilia, & fide divina credenda esse illa iudicia nemo unquam probaverit, nullusve Theologus ante paucos aliquot annos affirmare ausus fuerit. Secundo permissò toto antecedente, de cuius veritate statim, nihil inde contra nos. Fate-mur enim quod quando hæresis est manifestè ab aliquo tradita, nec est in Ecclesia Catholica controversia, utrum author illam docuerit, tunc tueri hæreticum est hæresim propugnare, sicque nolle damnare Arium erat consubstantialitatem inficiari. Etenim nemini Catholico dubium erat, quin in Christum blasphemiam Arius evo-misset; erant enim convincentia testimonia & notorietate facti manifestissima.

Sed enim in antecedente historia Eusebii Nicomediensis, & Theognidis Episcopi Nicæni perperam nobis objicitur, quippe quæ nostræ sententiæ non solum non incommodat, sed eam potius singulari luce illustrat. Etenim si Socrati, ex cuius narratione hæc objectio conflata est, credimus, Episcopi illi consubstantialitatem Verbi



subscribere noluerunt. Hanc fidem (inquit Socra-  
tes lib. 1. c. 5. ) approbarunt trecenti decem & octo  
Episcopi, eique omnes assensi sunt, quinque solùm  
exceptis, qui hanc vocem *ὁμοούσιον*, id est consubstan-  
tiale, repudiarunt: Eusebio videlicet Nicomedie  
Episcopo, Theognide Nicae, Mari Chalcedonis, Theo-  
na Marmarica, Secundo Ptolemaïdos.:: Proinde &  
vocem illam vehementer irriserunt, & abdicationi  
Arii subscribere noluerunt. Ob quam causam Con-  
cilium non solùm Ario & omnibus opinionis ejus  
fautoribus anathema denuntiavit, verùm etiam  
vetuit, ne Alexandriam ipse Arius omninò ad-  
ventaret. Edictum porò Imperatoris Arium, Euse-  
bium, & Theognidem in exilium ire mandavit.  
Vides authore Socrate, fidei consubstantialitatis  
Episcoporum omnium calculo probatæ assen-  
sum suum præfatos Episcopos denegasse, imò il-  
lam irrisisse, unde & à Concilio anathemate per-  
culsi, & ab Imperatore in exilium mandati sunt.

Nec obest quod *cap. 10. seq.* idem Socrates re-  
ferat libellum pœnitentiæ Eusebii & Theogni-  
dis, quo declarant se fidei decisioni consensisse, ana-  
themati autem Ario à Concilio denunciato non eam  
ob causam non subscripsisse, quòd fidem illam incu-  
saremus, sed quòd minimè crederemus, eum qui erat  
accusatus, hominem ejus generis fuisse.:: Pro certo  
persuasi, ipsum longè alium esse.:: Iste libellus fuit  
palinodia sive retractationis Eusebii & Theognidis.  
Ex cujus libelli verbis coniecturam facio (addit So-  
crates) istos quanquam fidei in Concilio decreta  
subscribebant, abdicationi Arii subscribere noluisse.  
Non obest, inquam, tum quia hoc libello testan-  
tur se vi & notione verbi consubstantialis diligen-  
ter ponderatâ, sententiam suam revocare: unde  
Socrates eorum formulam appellat *libellum pœ-*



*nitentia, palinodia, & retractationis.* Tum quia in illo libello nō significant se abdicationi Arii assentiri, sed *libenter cupere har. sis vitare suspicionem*, quin potius se esse omnino persuasos, Ariū esse innocentem, & Arium seipsum in Concilio purgasse, & *iis qua ipsi objiciebantur respondisse*; supponuntque Concilium anathemate Arium solvisse & liberasse. Ergo si vera est Socratis narratio, ob negatam fidem Episcopi illi proscripti sunt & Sede pulsi; restituti verò sunt, non damnando Arium, sed fidei decisioni subscribendo.

Abundè hæc ad hujus objectionis confutationem sufficerent, sed veritas est, falsam esse illam Eusebii & Theognidis resistantiam, falsam & supposititiam palinodiam. Constat enim illos & fidei definitioni, & depositioni Arii mente licèt simulata in Concilio cum aliis Episcopis subscripsisse, ut claret tum ex collatione Catholicorū cum Seve. ianis habita Constantinopoli sub Pontificatu Joannis II. & Justiniano imperante; tum ex Theodoro *lib. I. historia, c. 7. & 9.* expressè dicente, Episcopos omnes Arii fautores, *solis Secundo & Theona exceptis*, sententiam excommunicationis contra Arium pronuntiavisse. Quocirca impio illo Ecclesiā exturbato, fidei formulā, quæ adhuc in Ecclesiis servatur, *communi consensu composita, & subscriptionibus omnium confirmata*, Concilium dimissum est. Verū enim verò Episcopi, quorum nomina *suprà citavimus* (inter quæ est Eusebius Nicomediensis, & Theognidis nomen) veteratorie & parum sincere huic fidei formulæ subscripserunt. Quod probat ex iis quæ ab illis postea gesta sunt. Eisdem fidei definitioni & excommunicationi Arii subscripsisse docent S. Athanas. lib. de decretis Nicænæ Synodi, ubi subscriptionem

illam Eusebio Nicomediensi, qui ad vomitum re-  
versus fuerat, objicit. Idem tradit S. Hieronymus  
*dialogo adversus Luciferanos*, idque constare ex  
actis & nominibus Episcoporum Concilii Nicæ-  
ni affirmat. Unde patet Episcopos illos vetera-  
tores, hypocritas, & politicos, & fidei decretis, &  
damnationi Arii, ne concitatum in se tumultum  
magis accenderent, subscripsisse. Unde rebus om-  
nibus ritè ponderatis, vel hæc historia non est ad  
rem, vel assertionem nostram validè confirmat.

Pro solutione aliarum objectionū nota, Theo-  
doretum semper catholicè sensisse, sed multa ab  
Episcopis Ægyptiis sibi infensis, & à Legatis Im-  
peratoris excelsūs damnatis fuisse perpeßum.  
Etenim propalam spectāte sacro Concilio Chal-  
cedonenfi fidem suam his verbis significavit: *Ego  
per Dei gratiam, & ab Orthodoxis sum nutritus, &  
orthodoxe predicavi; & non solum Nestorium &  
Eutycheten, sed & omnem hominem qui rectè non  
sensit, aversor & alienū existimo.* Quam luculentā  
damnationem non totum Concilium, sed quidam  
Episcopi parum ipsi affecti, subterfugii loco ha-  
bentes, urgebant ut Nestori imprætermisso omni  
verborum circuitu strictim & præcisè damnaret.  
Quâ exacerbatione justè ille permotus, agrè pri-  
mū tulit tam acrem importunorum hominum  
instantiam; deinceps tamen Nestorium suo ana-  
themate perspicuè proscripsit. Sed utut sit, nihil  
ex illa historia confici contra nos potest, quia  
cū nemo dubitaret de facto Nestorii à viginti  
annis in Concilio Ephesino damnati, meritò à  
Theodoro to exigi poterat nō solum hæresis, sed  
hæresiarchæ etiam damnatio. Quæ observatione  
variis aliis minutioribus ex Ecclesiastica historiā  
petitis exemplis absque negotio satisfacere est.

*Reflexio & apostrophe ad inimicos S. Sedis.*

Non solum Hæreticorum in Romanam Sedem contentio pertinax, & odium æternum est; sed etiam non pauci, ut se dicunt, Catholici, & si Superis placet, Theologi, hanc fixam & immobilem Romanæ Petræ firmitatem omni machinarum genere conquattere visi sunt: quos sic supremus Antistes sequentibus paterni cordis affectibus è Bernardi mellea doctrina depromptis alloquitur. Nec enim infensos sibi dedignatur Vicarius illius qui pro omnibus, cum adhuc inimici essent, mortuus est. Non abjicit oves errantes summus Pastor, sed sæculò quærit, & de inventis congratulari sibi amicos peroptat. Corde prosternitur illis qui pedes suos osculantur; & inter præcipuos gloriæ suæ titulos, *Servi Servorum Dei* nomen elegit, ut charius & nobilius.

Mirabimini (inquit) forsân, si non valens tegere dolorem meum, anxietatem reprimere, dissimulare tristitiam, contra juris ordinem revocatus qui me læserunt, spretus requiro contemptores, passus injuriâ injuriatores amo, rogo denique à quibus debueram supplicari. At si attenderitis quod scriptum est: Sapientibus & insipientibus debitor sum; & illud, Charitas non quærit quæ sua sunt, desinetis fortè mirari, cur non ad vos objurgandum, sed alliciendum compellor, qui vobis condoleo, quamvis non dolentibus; vobis misereor, miseriam licet non sentientibus suam. Sed inde magis doleo, quod cum sitis dolendi, non doletis; inde magis misereor, quod cum miseri sitis, miserabiles vobis ipsis non estis. Nec frustra forsitan vobis compatiar, ~~quomodo~~ *quomodo* vo; patientes audiaris unde compa-

tior. Volo vos vestrum sentire dolorem, ut jam non habeatis unde doleatis : volo vos vestram scire miseriam, ut miseri non esse incipiat. O bona mater charitas, quâ promoveor, quæ sive foveat infirmos, sive exerceat profectos, sive arguat inquietos, sive consoletur pusillanimes, sive corripiat errantes, diversis diversa exhibens, sicut filios diligit universos ! Cum ergo per me vos arguet, mitis erit ; cum blandietur, simplex : quia piè solet scire, sine dolo mulcere, patienter novit irasci, humiliter indignari.

Cernite, quæso, ô Sæctarii, vosque semicatholici, quomodo mirâ Dei providentiâ cæteris Ecclesiis vel ab infidelibus occupatis, vel ab hæreticis fermento reprobæ doctrinæ infectis, sola Romana toto orbe commoto, Principibus repugnantibus, hæreticis contradicentibus, schismaticis defectionem molientibus, permansit in fide stabilis, & inter tot illidentium fluctuum tumultus inconcussa. Insurrexerunt Pagani, frenduerunt dentibus suis Hæretici, pugnarunt vehementer Græci, defudarunt Episcopi infiniti Ecclesiæ Romanæ privilegium labefactare ; tantis suis simultatibus addebant Imperatorû Regumque arma, nunquam tantum efficere potuerunt, ut Romani Præsulis autoritas abrogaretur. Visa quidem interdum est sicut luna deficere, quæ tempora sua habet persecutionis & pacis, sed quâlibet obumbrata, obscurari penitus nunquam potuit. Quia hæc est P E T R A, adve-sus quam portæ inferi non prævalebunt, à qua quæ recedunt Schismatici, cui, qui refragantur Hæretici merito nuncupantur. Hæc Sedes est lumina unum, unde multi radii ; radix una, unde multi rami ; fons unus, unde rivi multi ; Pastor unus,

à quo oves Christi reguntur, & continentur: à qua proinde si radios tollis, extinguantur; si præscindas ramo, intereant; si dividas rivos, arefcant; si retrahas oves, dispergantur necesse est. Hæc Ecclesia præparata est in vertice montium, & elevata super colles, ut fluant ad eam omnes gentes, Ipsa est in sole posita, id est in manifestatione omnibus nota, nationibus omnibus conspicua, cujus caput Christus, cujus cor Spiritus Sanctus, quæ ut ait Augustin. lib. 1. de Symb. *Pugnare potest, expugnari non potest. Hæreses omnes de illa exierunt, tanquam sarmenta inutilia de vite præcisa; ipsa autem manet in radice sua porte inferi non vincunt eam.* Ipsa est sponsa Christi, quæ ut ait Cyprian. *incorrupta & pudica adulterari non potest: quæ Dominus luce perfusa per orbem totum radios suos porrigit. Illius fœtu nascimur, illius lacte nutrimur, & spiritu ejus animamur.* Ergo accedite, & qui unum Deum Patrem agnoscitis, qui ad unam hæreditatem aspiratis, ad unam matrem confugite, occurrите omnes in unitatem fidei, finite vos adduci, ut fiat unum ovile, & unus Pastor.

Sed volumus (dicitis) Evangelii libertatem, formidimus Romanæ Ecclesiæ servitutem. Anne, amabò, est libertas Reipublicæ nullam habere ducem, à quo regatur? Estne utilis navi libertas, qua sine gubernatore undis ventisque permittitur? Qualis libertas, nullum haberi in scholis magistrum, nullum in corpore caput, nullum in homine mentem, nullum in grege pastorem sed solis cupiditatibus turbari & misceri omnia pro libidine? Talem profectò libertatem ne pocudes qui sem pererent, si petere possent; nam earum interest pastoribus regi, à qui-

bus deducantur in pascua, atque in eis à ferarum injuria defendantur. Anxiam superstitionem, Religionis Romanæ sacratissimas leges appellatis, quia non licet apud nos omnia sus deque ad libitum permiscere, sed omnia ad veneranda Canonum Patrumque decreta exigimus; & cum disputare, aut scribere de rebus divinis filiis nostris concedimus, certis limitibus ac præscriptis lineis continemus licentiam, prurientem frenamus libidinem novitatem. Hinc illæ vestrae lacrymæ, hinc querimoniæ, quibus sentiendi libertas, dicendi scribendique infrunita facultas placet. Vultis vivendi licentiam, & sic vivendo impunitatem. Vultis sine capite corpus, ut membra principentur, & regno diviso desolentur. Vultis sine pastore oves, ut cum lupis Domini gregem occidatis. Vultis sine judice lites, ut nullus sit dissidiorum finis. Vultis omnia confusione perturbari, quia ut tritum adagium fert: *Turbatum flumen Piscatorum est lucrum.*

Venite ergo omnes ad illam Sedem, clementiæ sinum, misericordiæ thronum, indulgentiæ thesaurum. Et licet à vobis se queratur offensam, læsa tamen non provocat, sed spreta revocat, & vestris onerata licet injuriis, si conversi fueritis ad illam, obviabit vobis quasi mater honorificata. Contempta, sed oblita sui ruet in amplexum, gaudens quos perdiderat esse inventos, & qui mortui jacebant, vivos. Securi accedite, surgite, venite ad Patrem. Qua spe? Qua fiducia? Qua confidentia? Qua spe? Illa, qua Pater sum. Vos perdidistis quod erat filii; ego quod Patris est non amisi. Apud Patrem non intercedet extraneus, intus erit in Patris pectore ipse qui interveniet & exorabit affectus. Urgebua-



tur, credite, paterna viscera iterum vos genitura per veniam. Venite ad Patrem rei; sed Pater visis filiis cooperiam mox reatum, dissimulabo judicem, qui magis implere volo genitorem; & sententiam citò vertam in veniam, qui redire cupio filios, non perire.

His edocti & allecti, instructi talibus redite ad domum Patris, Matris in gremio duraturi; fratrum constringemini amplexibus, sed paternus potissimum visus filiorum illustrabit aspectum, ut tota fugetur obscuritas, quæ circumfusa fuerat de errore & totam confusionis caliginem amantis auferet intuitus. Cadam super collum, non lapsu viscerum, sed compassionis. Cadam, ut erigam sic jacentes. Cadam, ut amoris onere onus tollam peccatorum. Sic judicabo, sic emendabo, sic peccantibus filiis dabo oscula, non flagella. Delicta non videbit vis amoris, & ideo peccata redimam pacis osculo, claudam amplexu. Tardam misericordiam nesciam Pater, quia amor nimius non deliberat, non verecundatur, non consulit rationem, non metuit dignitatis. damnum, legi non attemperat, judicio non acquiescit, modum ignorat & ordinem.

Omniù quæ in primam Sedem sine causa fecistis, non requiro, cur, vel quomodo fecistis. Culpas non discutio, non retracto causas, non recordor injurias; solent enim hæc magis instigare, quàm mitigare discordias. Solum quod mihi magis est cordi loquor. Me miserum, quod vobis careo, quod vos non video, quod sine vobis vivo, pro quibus mori mihi vivere esset, sine quibus vivere est mori. Non quaero cur abieritis, sed cur jam non redieritis. queror. Non causas discessionis, sed moras causor regressionis.

Venite tantum, & pax erit. Revertimini, & satisfactum erit. Ego enim, ut verum fatear, Patris erga vos, utpote segrege, sum liberatus officio, sed non deprædatus affectu. Olim Romane Sedi inviscerati fuistis, non facile eruemini. Moneo proinde vos, non ut dominus, non ut magister, sed ut Pater, imò ut Mater, sed semper ut amans. Amens vobis fortassis videar; sed ei qui non amat, ei qui vim non sentit amoris.

His auditis adhuc moramini, adhuc non reditis ad Patrem? Nolite ejus contemnere vocem, quem sacrarum litterarum testimonia extollunt, quem Conciliorum decreta confirmarunt, quem Sanctorum patrum chorus venerandus concinit, quem verorum Christi fidelium concio reveretur, quem perennis traditio probat, & perpetua. Ecclesie usus omnibus præfecit & singulis. His testimoniis sole ipso illustrioribus credite, tam integris & incorruptis testibus. detrectare fidem nolite.

### SPECVLATIO III.

*Quinque locorum probabilium vis  
expenditur.*

**S**uperiori speculatione longiores fuimus: Quàm putavimus, sed si longior visa est, cum utilitatis tamen magnitudine comparata brevis apparebit. Perspicuitas etiam, quam præcipuè aucupamur, non solet esse conjuncta brevitate: obscuros esse necessum est, qui breviores esse laborant; nec decebat rem adeo difficilem & momentosam, si eam tetigissemus, potius quàm præterissemus. Utut sit, nimiam præcedentis loci

prolixitatem quinque reliquorum simul comprehensorum brevi examine compensabimus.

Primus est auctoritas alicujus Patris ab Ecclesia inter suos Doctores connumerati, quales sunt Ambrosius, Augustinus, Hieronymus, Gregorius, Chrysostomus, Aquinas, &c. quorum auctoritas seorsim sumpta specialem postulat venerationem. Dico *seorsim sumpta*, quia si omnes Patres in aliquo asserendo conveniant, tunc elicitur argumentum infallibile, & reducitur ad locum Traditionum. Sed illud singulariter observandum, nonnullos Patres in quibusdam materiis primas obtinere, ut Athanasius & Hilarius in materia de Trinitate, Leo in Mysterio Incarnationis, Augustinus in arcanis Divinae gratiae; quia cum specialiter à Deo electi sint, ut nascentes circa hæc puncta hæreses in ipsis exordiis debellarent, præcipuâ harum veritatum intelligentiâ illustratos fuisse credendum est.

Ad hujus loci pleniorém intelligentiam notandum est, septem esse veluti gradus approbationis alicujus Doctoris vel doctrinæ. Primus & infimus est quando liber permittitur edi cum solita Theologorum approbatione, servatisque regulis à Tridentino præfinitis. Secundus est quando Author aliquam in Scholis auctoritatem nactus est, ob commendatam à longo tempore doctrinam, quæ in Academiis habet & discipulos & sectatores, quales sunt Scotus, & Durandus. Tertius est, quando aliquis inter Ecclesiæ Patres annumeratur, ita ut ejus scripta non solum in Scholis & pulpitis, sed etiam in solennibus Ecclesiæ officiis usurpentur. Tales sunt Chrysologus, Maximus, Venerabilis Beda, aliique sexcenti. Quartus, quando quis speciali præcipuè

Doctōris nomenclaturā insignitur, ad quod non sufficit sola probatæ doctrinæ antiquitas, sed peculiare requiritur iudicium Ecclesiæ tam eximiam honoris prærogativam decernentis. Illos Bonifacius VIII. in *cap. Gloriosus, de reliquiis & veneratione Sancti*. in 6. determinavit. Quo etiam titulo Aquinatem nostrum sublimavit Pius V. & Bonaventuram Sixtus V. Quintus est iudicium speciale de aliquo singulari libro, materia, tractatu, & doctrina. Sic Ecclesia Augustini de prædestinatione & gratia sententiam concessit, ut patet ex epistola Hormisdæ ad Possessorem Episcopum, & Celestini I. ad Episcopos Galliæ. Addit hæc approbatio supra præcedentem specialem quendam commendationis modum. Sextus gradus est iudicium magis particulare, & ad individuas circumstantias descendens, quæ propositio aliqua ventilata, vel opusculum examini Ecclesiæ suppositum comprobantur. Sic officium SS. Sacramenti à S. Thoma editum, Ecclesia tanquam suum recepit & sacra- vit. Sic in Clementina *de sum. Trinit.* ut probabilior eligitur opinio de infusione virtutum cum gratia. Septimus denique gradus est approbatio decretoria & definitiva Ecclesiæ. Sic approbatur Epistola Magni Leonis ad Flavianum, in *cap. Sancta Romana*. Sic in Concilio Arausicano II. quædam Augustinianæ doctrinæ capitula firmata sunt. Sic epistolæ Agathonis & Sophronii in VI. Synodo generali, & anathematismi Cyrilli in Concilio Ephesino accepta sunt.

Secundus locus probabilis est autoritas Doctōrum Scholasticorum, quorum concursus sententia sine temeritate non respicitur; in quacumque enim arte peritis credendum est, Nec

Ecclesia toleraret grassantem Scholarum omnium errorem circa fidei vel morum capita sustineri. In hac etiam sede reponuntur Doctores Canonistæ, seu juris Pontificii periti, quorum in Ecclesia præcipua ratio habetur. Hæc tamen non ita intelligito, ut quilibet Theologus, quantumcunque gravis appelletur, imò trium vel quatuor consensus opinionibus suis securitatem conciliet. Vidimus enim his temporibus, Casuistarum (quos eruditissimos morum Doctores indocti prædicant) fluxam authoritatem à Religiosis & Sacerdotibus quamplurimis, ab Episcopis sine numero, & à Romano Antistite nedum contemptam, sed damnatam ut exitiosam. Unde de illis potissimum testibus eorumque testimoniis, juxta Augustini regulam, tantum credere vel non credere licet, quantum momenti ad faciendam fidem habere vel non habere perpenderit. Cum enim non è puris Ecclesiæ fontibus conclusiones suas derivent, sed iis neglectis, turbidis se proluant probabilissimi fluentis, unde in tam horrenda inciderunt opinionum portenta, non solum sua authoritate opinionibus suis non asciscunt probabilitatem, sed potius detrahunt corrupti sui judicii fundatissimam suspensionem. Sed de his infra sermo redibit.

Tertius locus probabilis est ratio naturalis, qua utuntur Theologi veluti ancilla ad res Fidei declarandas confirmandasque. Utitur autem sacra doctrina ratione humana, ut monet S. Thomas 1. p. 2. c. 1. art. 6. ad 2. non quidem ad probandam fidem, quia per hoc tolleretur meritum fidei, sed ad manifestandum aliqua quæ traduntur in hac doctrina. Cum enim gratia non tollat naturam, sed perficiat, oportet quod naturalis

ratio subserviat fidei, sicut & naturalis inclinatio voluntatis obsequitur charitati. Unde ait Apostolus 2. Cor. 10. *In captivitatem redigentes omnem intellectum in obsequium fidei.* Et certe cum Gentiles & Infideles instructi sint doctrinâ seculari, qua veluti castrorum acie impetunt orthodoxam, operæpretium est iisdem armis eos confodere, & veluti alterum Goliath proprio mucrone truncare. Qua in re mirè excelluit D. Thomas, qui ita rationem fidei servire cœgit, ut meritò à R. P. de Gondran, secundo Congregationis Oratorii Generali, Philosophiæ & Philosophorum Apostolus dictus sit, quia quæ ab illis scripta sunt, collegit, & in usum fidei vindicavit possessoribus illis injustis erepta: & sordentem per se, parumque mundam scholarum barbariem depurgare atque illustrare aggressus est sapientiæ suæ Sole.

Quartus locus est autoritas Philosophorum rationem præeuntem sequentium. Licet enim in multis ob superbiam vel ingenitas ignorantie tenebras per peccatum immensum addensatas cespitarint; tamen in eis scintillarunt quandoque non pauci veritatis radii, lumine illo vultus divini signato super omnes, præclaras interdum boni malique notitias imprimente. Si ergo non pauca quæ rationabiliter, sapienter, eruditè loquuti sunt, habent à divina sapientia, quam effudit Deus super omnia opera sua; justum est ut quæ in scriptis eorum velut gemmæ in luto veritates latent, in Dei sapientiæ gloriam usurpentur, sine qua omnis cognitio vanitas & delirium est, dicente Tertulliano: *Cui veritas cognita sine Deo? Cui Deus sine Christo?* In Palæstra Theologica imitatur exercituum copias. & in



quibus equitum quidem praecipua opera est, sed non propterea spernuntur sagitarii, & funditores. Assimilatur etiam Theologicum opus construendo aedificio, in quo Architecti quidem industria primas obtinet, sed non despiciuntur administratorum operæ. Sic sacra doctrina Divina & Christiana ut meliora & graviora praeponeat; verum tamen lapides, camenta, aliaque ex diu lapso Philosophiae aedificio comportari sinit, ut omnibus omnia facta omnes lucrifaciat, ipsius Apostoli more, qui autoritate cujusdam Aretæ Poëtæ Athenienses alloquutus est, *Act. 17.*

Quintus locus probabilis est historia humana, è qua eo verisimiliora eruuntur argumenta, quo ejus authores sunt accurati. Nihil autem refert siue historia illa sit per authores locupletes scripta, siue de gente in gentem tradita, modò non superstitiosè atque aniliter, sed gravi constantique sibi ratione narretur. Postponendi porrò sunt illi authores, qui absque delectu non tam curant quid scriberent, quàm ut nihil omitterent, quibus credimus leviter, si citò. Aliis verò gravibus, doctis, piis, & emunctioris naris historicis fidem detrectare fastidiosum est & morosum, praesertim si plures fide digni in eadem rem gestam narrandam concurrant, cum in ore duorum vel trium testium stet omne verbum: aliàs si homines hominibus non crederent, humana societas interiret. Theologum etiam Lectorem hic monere placet, ut Ecclesiasticæ historiae operam navet; multa enim è thesauris suis historia suppeditat non solum grata, sed necessaria, quibus si careamus, in re Theologica sepe sepiùs apud doctos peregrini & rudes inveniemur.

REFLEXIO.

Ex decem ergo locis argumentatur Theologia; in hoc tamen ab aliis scientiis differt, quòd in his primum locum ratio tenet, postremum authoritas. At sacra doctrina non tam rationis quàm authoritatis momenta quærit; & locum à divino testimonio ita proprium sibi vendicat, ut rationes vel tanquam hospites & peregrinas accipiat, vel in suum obsequium asciscat, quasi ancillas vocatas ad arcem. Quia nimirum vera Theologia fidei potissimum innititur; fides autem ita ab authoritate proficiscitur, ut sine ea fides esse non possit; fides enim ex auditu, auditus autem per verbum Dei, cui credimus. Si hæc ita sint, profectò Theologiæ moralis nomine indigna est illa doctrina, quæ uni rationis humanæ infirmitati subnixa est. Si præcipuus veræ Theologiæ locus sit Verbum Dei, illud potissimè quo in Evangelio voce Veritatis erudimur. Ergo adoranda Christi verba audiamus, scrutemur, legamus, meditemur, quibus ut Augustinus dixit, & salubriter prava corriguntur, & parva nutriuntur, & magna oblectantur ingenia. Et ille huic doctrinæ inimicus est animus, qui vel errando eam nescit esse saluberrimam, vel odit ægotando medicinam. Evangelium reverenter & assidue lectitatum uberrima est curandarum animarum officina, è qua medelam quisque suo morbo accommodatam potest seligere; apotheca est instructissima omnibus & singulis arma, pharmaca, & spiritalia instrumenta suppeditans. Thesaurus est inexhaustus, unde Martyres constantiam, Doctores sapientiæ lumen, nutantes fidei firmitatem, tepidi diligentiam &

fervorem, et in prosperis modestiam, in adversis patientiam hauriunt. Compendium est, & totius Philosophiæ Christianæ brevium, cujus author Unigenitus qui est, in sinu Patris; cujus materia lex immaculata convertens animas, ipsis Genibus pervenerabilis; cujus finis beatitudo sempiterna. Speculum est nemini blandiens, nullum seducens, in quo se quisque talem reperiet, qualis fuerit. Ibi fœda, ibi pulchra nostra cognoscimus: ibi sentimus quantum proficimus, ibi à profectu quàm longè distamus; cujus assiduus intuitus mentem irradiat, cor purificat, timorem gehennæ incutit, ad gaudia superna cor instigat contemplantis.

Ergo Evangelium, mi Theologe, pervolve assidue, adeo ut *tenenti codicem*, ut Hieronymus ait, *somnus obrepas, & cadentem faciem pagina sancta suscipiat*. Hilariter lege, quia ut idem Hieronymus contra Vigilantium scribit, quando legitur Evangelium, accenduntur luminaria etiâ Sole rutilante, non utique ad fugandas tenebras, sed ad signum lætitiæ demonstrandum, & ut sub luminis corporalis typo d'vina lux ostendatur, de qua scriptum est: *Lucerna pedibus meis verbum tuum, & lumen semitis meis*. Lege reverenter, non enim minori cultu audiendum est Evangelium, quàm Christus ipse. Nam monente Augustin. tract. 30. in Joan. *Nos itaque sic audiamus Evangelium, quasi præsentem Dominum. Sursum est Dominus, sed etiam hic est veritas Dominus*. Unde juxta sacrum Ecclesiæ morem Evangelio quasi Christo loquenti omnes assurgunt. Lege instanter, cogitans ibi latere aliquid quod peccantibus datur, oblatrantibus negatur, à querentibus invenitur, reprehendentibus subtrahitur.


tur, pulsantibus aperitur, oppugnantibus clauditur, ut August. *lib. 3. contra Faustum, cap. 2.* prosequitur. Lege sincerè, ut tam divina dogmata in mores conteras tuos. *Non sit mora in faciendo,* inquit August. *serm. 112. de temp, quod inus sapitis intelligendo. Et ille beatissimus, qui divinas scripturas vertit in opera.*

Divinas ergo novi potissimum Testamenti paginas sæpiùs lege, imò nunquam de manibus tuis sacra lectio deponatur, inquit Magn. Greg. in quibus prohibentur mala, præcipiuntur bona, conceduntur media, suadentur perfecta. Quidquid homo extra didicerit, addit Augustinus, si noxium est, hic damnatur; si utile est, hic invenitur; & cum ibi quisque invenerit omnia, quæ utiliter alibi didicit, multò abundantius ibi inveniet ea, quæ nusquam alibi invenire potuit. Sic loquitur in Evangelio veritas, ut altitudine superbos irrideat, profunditate attentos terreat, virtute magnos pasciat, affabilitate parvulos nutriat. Ad tam divina eloquia penetranda amore potius opus est, quàm eruditione; compunctione, quàm investigatione; suspiriis quàm argumentis; crebris genitibus quàm copiosis rationibus; lacrymis, quàm verbis; oratione, quàm lectione. His inst. ucti præsidii percipiemus quod quidquid ibi docetur, veritas est; quidquid præcipitur, bonitas; quidquid promittitur, felicitas: veritas sine fallacia, bonitas sine nequitia, felicitas sine miseria.

Ad ciendos etiam pietatis & reverentiæ in sacra Christi verba motus observat ex Patribus Theologus modernus præstanti eruditione, nec minori pietate præditus, plures esse inter verbum Dei & Divinam Eucharistiam analogias.

In primis corpus Christi realiter praesens prius adoramus, quam sumamus: sic adoranda Scripturarum verba prius venerari congruit quam legere, more B. Caroli Episcoporum gemmae, qui genibus provolutus adoratione continua Biblia sacrum legere solebat. Secundò, sicut sub signis Eucharisticis latent res eximiae, nimirum corpus Christi realissimè praesens: sic sub simplicium verborum cortice includuntur immensi sapientiae & scientiae Dei thesauri. Tertiò, dum panem Angelorum manducamus, remanentium accidentium saporem non quaerimus, sed spiritus pinguedine è corpore Christi profluente saginari peroptamus. Sic in verbis Domini non concupiscentiam oculorum, vel humanam cupiditatem pascere, sed cor veritate alere curandum est. Quartò, in Eucharistia non sumitur caro mortua, sed viva; sic verbi Dei non superficies attendenda est, sed medulla, sed spiritus Christi, quem qui non habet, hic non est ejus: sicut enim caro non prodest quidquam, ita sola littera occidit, spiritus autem vivificat, & unctio docet nos omnia. Quintò, in hoc quadantenus verbum Dei divinae Eucharistiae praestat, quod hanc nemo nisi sacrilegè accipit, qui non fuerit antè sanatus: at verò sacram Scripturam utiliter legunt peccatores, in qua & vulnera detegunt, & peccatorum remedia inveniunt, & intentatas sceleribus poenas discunt, quibus salubriter permoventur, ut caelestis Medici, qui venit salvum facere quod perierat, misericordiae se committant. Eucharistia ergo est Sacramentum vivorum, & cibus justorum: verbum autem Dei est peccatorum solamen, caecorum lux, medicina infirmorum, mortuorum resurrectio & vita.

Sextò , præcipua dispositio ad Eucharistiam est fervor charitatis, quem sanè excitat ignitum eloquium Christi seriò mente agitaturn; in meditatione enim exardescit ignis. Hinc Christus corpus suum gloriosum discipulis euntibus in Emaüs traditurus, verborum suorum sacrâ eos flammâ apravit, quam persentientes exclamarunt : *Nonne cor nostrum ardens erat in nobis, dum loqueretur in via, & aperiret nobis Scripturas?* In Actis etiam expressè dicitur, discipulos non minùs in doctrina Apostolorum, quàm in fractione panis perseverasse. Denique certis tantùm diebus & horis Divinorum Mysteriorum licet nos esse participes; sæpius etiam infirmitatibus, peccatis, negotiis, aliisque obicibus sacrâ mensâ vel privamur, vel arcemur. At Verbum Dei tandiu revolvimus, quandiu volumus, noctu & interdiu, intus & foris, domi & ruri illud corde, mente, & ore versamus. Eucharistia est panis, quem non fert ægroti stomachus, nisi purgatus. Verbum Dei aër est, quem singulis momentis captare possumus & debemus.



## DISSERTATIO II.

*De ultimo fine, & Beatitudine objectiva hominis.*



**P**RIMUM est adagium: *Quidquid agas prudenter agas, sed respice finem*, quia nimirum in humanis actibus dirigendis finis ultimus inspiciendus est. Sicut enim



tas, Id cuius gratia aliquid fit; vel, Cuius gratia agens operatur. Finis enim amatur propter se, & propter illum cetera diliguntur. Varias etiam ejus divisiones in finem *qui*, seu rem illam quam intenditur; & finem *cui*, seu subiectum cui res intenta desideratur: finem formalem, seu operationem obtinentem finem; & finem objectivum, seu rem ipsam obtentam; finem ultimum ad quem omnia referuntur, nec ipse ad ulteriorem ordinatur; & finem intermedium, cuius bonitas non solum est in se amabilis, sed etiam utilis asciscendo alteri fini, cui subordinatur. Nam sicut in causis efficientibus subordinatio secundæ ad primam non tollit rationem causæ in secunda, sed solum subicit illam primæ: ita à fine intermedio non aufert rationem finis respectu mediorum anteriorum ulterior relatio ad finem, ut Vasquez frustra contendit. Sed in his trivis theologia gravitate non satis dignis immorari non vacat; sed, ut dixi, omnia philosophica principia supponimus, ad utiliora progrediamur, ut ad finem illum perveniamus, non qui consumat, sed consummet & impleat creaturæ rationalis appetitum.

## SPECVLATIO I.

*Proprium est solius creature rationalis agere propter finem.*

**P**Robatur duplici ratione D. Thomæ. Primæ: Omnia quæ sunt in aliquo genere, derivantur à principio illius generis; primum enim in unoquoque genere est causa cæterorum sibi in tali genere subordinatorum; si enim sibi subordinata non sunt, ab eo non derivantur: quæ de

causa animantia non pendent ab homine, nec colores ab albedine; bene tamen corpora inferiora à cœlestibus: Atqui finis est principium operabilium ab homine, seu actuum humanorum, qui à fine desumunt moralitatem: Ergo convenit homini in suis actibus agere propter finem.

Secunda ratio D. Thomæ supponit esse duplex genus actionum ab homine elicitarum, alias vocat *actiones humanas*, alias *actiones hominis*. Actiones humanæ sunt illæ quæ conveniunt homini in quantum est homo, prout discernitur à brutis à quibus distinguitur per hoc quod est dominus actionum suarum per rationem & voluntatem. Est verò homo dominus actionum suarum cum ex deliberatione procedit: unde actiones illæ humanæ sunt quæ à voluntate deliberata procedunt. Actiones verò hominis sunt illæ quæ absolute ab homine ut principio procedunt, sed non ex deliberatione rationis, ut cum homo aliis intentus manum, pedemve movet, vel barbam fricat. Ad quam classem reducuntur etiam actiones ridendi, admirandi, flendi, quæ licet à solo homine procedant, non tamen exprimunt characteristicum hominis operandi modum, qui est ex deliberatione. Hoc posito speculatio intelligitur de actibus deliberatis, &

Probat: Omnes actiones quæ procedunt ab aliqua potentia, causantur ab ea secundum rationem sui objecti; id est, nullus actus potest procedere ab aliqua potentia, qui feratur extra objectum adæquatum talis potentiae: v.g. nulla potest esse cognitio, quæ non feratur circa verum, quod est objectum intellectus; nulla volitio, nisi circa bonum; nulla visio, nisi circa coloratum aut lucidum; nulla auditio, nisi circa

sonum occupari potest, nec generaliter ullus actus sphaeram objecti formalis suæ potentia transilire. Atqui objectum adæquatum voluntatis deliberatæ est finis; voluntas quippe deliberata nullum potest prosequi bonum, nisi ab eo sibi proposito alliciatur; bonum verò propositum ad sui amorem alliciens finis est, ut patet. Ergo voluntas deliberatè procedens in omnibus actibus humanis finem intendit, finem quærit, propter finem agit.

Objicies 1. Amor beatus est actus humanus; per illum enim maximè differt homo à brutis. Sed ille amor non est propter finem, eum sit actus necessarius, nec ad illum se moveat voluntas ex prævia deliberatione, nec sit in libera hominis potestate, quæ tamen requirit S. Thomas in actibus humanis propter finem elicitis. Ergo homo in omnibus actibus humanis non agit propter finem.

Respondeo amorem beatum esse actum humanum perfectissimum, cæterorum omnium fructum & coronam; quia licet ex necessitate procedat, tamen hæc necessitas non provenit ex imperfectione cognitionis, sed ex plenitudine & adæquatione voluntatis, quæ bono universali clarè viso impletur, non cæco impetu propellitur. De illo tamen non loquitur D. Thom. qui agit solum de actibus humanis hujus vitæ, quos homo ex prævia deliberatione & consilio elicit.

Objicies 2. Prima intentio, seu volitio finis est actus verè humanus: amare enim finem sub ratione finis non convenit nisi homini: Sed prima volitio finis non est propter finem; non enim procedit ex deliberatione prævia, cum sit id unde incipit deliberatio; & D. Thomas illos solum

actus dicat esse propter finem, qui ex voluntate deliberata procedunt. Ergo non omnes actus humani sunt propter finem.

Respondeo de ratione finis esse quod appetatur propter se, & quod alia propter ipsum appetantur. Per primam autem volitionem finis appetitur propter se, unde relinquitur primam volitionem esse propter finem. Ad cuius plenioris claritatem considera, quod sicut in eodem actu intellectus duo distinguimus, scilicet rationem intellectiōis & rationem dictiōis, quia idem actus verbum mentis producit, & productum contemplatur: ita in actu voluntatis duo etiam discernimus, & rationem spirationis seu ponderationis, & rationem amoris seu tendenciæ in objectum; nam voluntas dum amat & trahitur ab objecto amato, & objectum amatum amplectitur. Sub prima ratione patitur ab objecto, sub secunda agit circa objectum, ut egregie explicat S. Doctor infra, *quæst. 26. art. 2.* dicens: *Motus appetitus circulo agitur; appetibile enim movet appetitum, faciens quodammodo in eo sui intentionem; & rursum simul appetitus tendit in appetibile, ut ibi sit finis motus, ubi fuit principium illius.* Ubi vides quod sicut amor finis procedit à voluntate, ita & à fine allicitur.

Nec obest quod prima intentio non sit deliberata & deliberatione propria & rigorosa, quæ antecedit electionem mediorum, & sequitur intentionem finis: non, inquam, obest; quia sufficit quod sit radix totius deliberationis, vel etiam quod oriatur ex virtuali deliberatione, quatenus regulatur cognitione advertente & discernente bonitatem finis. Sicque primus ille amor est propter finem, non præamatum, sed præcognitum, & ut sic dicam coamatum.

Objicies 3. Fructio, gaudium, delectatio, & quies in fine possessio sunt verè actus humani, cum nequeant competere brutis: Sed illi actus non sunt propter finem allicientem ad sui amorem, cum potius supponant finem habitum, & possessum: Ergo non omnes actus humani sunt propter finem.

Respondeo plerosque docere delectationem de fine esse etiam propter finem, quia sicut bonitas finis apprehensa causat moraliter sui amorem, & absens causat sui desiderium, sic præsens & possessa causat sui delectationem. Certè, inquirunt, cum delectatio sit actus voluntatis tanquam causæ efficientis, exigit etiam moveri à fine, quæ est causarum omnium prima, & omne quod habet causam efficientem, debet etiam habere finalem. Maximè quia juxta principium S. Thomæ respectu voluntatis idem est objectum & finis: Sed delectatio respicit bonum ut objectum: Ergo & ut finem.

Alii tamen cum Martinez contendunt actus qui versantur circa finem jam adeptum, non esse strictè effectus finis, cujus tota causalitas sita est in hoc, quod alliciat appetitum ad sui desiderium, vel ad media ex sui amore eligenda; adeptum autem finem nemo desiderat, nemo in ordine ad illum aliquid eligit, sed in illo sistit appetitus, subindèque cessant omnes actus humani, qui ad finem acquirendum ordinantur. Favet S. Doctor *quest. 2. art. 6. ad 1.* ubi docet delectationem non esse propter aliud tanquam propter causam finalem, sed tanquam propter formalem, seu objectum: ubi non loquitur de delectatione objectiva, quæ non ponit in numero cum fine, ut quidam exponunt, sed de formali, cum de ea

loquatur, quæ est quietatio appetitus in bono. Juxta quam solutionem dicendum esset delectationem non esse rigorosè actum humanum, sed metam & complementum actuum humanorum, quod adeptò fine non efficitur per veram actionem, sed connaturaliter resultat. Elige quod magis arriserit; est enim subtilitas levis momenti.

Obijcies 4. Bruta animalia agunt propter finem, ut cum unum medium præ alio eligunt in ordine ad aliud quod intendunt: quod variis exemplis confirmari posset. Ergo agere propter finem non est proprium solius creaturæ rationalis.

Respondeo creaturas rationales non agere propter finem formaliter se movendo in illum ex prævia cognitione finis & proportionis mediæ ad ipsum. Quia appetitus brutorum est naturaliter determinatus ad unum, unde quando per sensum vel imaginationem sibi aliquid conforme inclinationi repræsentatur, statim in illud non consilio vel discretionem, sed impetu fertur. Contingit autem in operibus brutorum apparere quasdam sagacitates, quatenus habent inclinationem naturalem ad quosdam ordinatissimos processus à summa arte ordinatos. In quo sanè splendet increatæ sapientiæ ratio; nam virtus moventis apparet in motu mobilis, sicut artis humanæ industria in horologii structura refulget. Nullam tamen inesse brutis rationem, prudentiam, vel sagacitatem apparet ex hoc quod omnia quæ sunt unius naturæ similiter operantur. Sed de his plura & curiosa in Philosophia.

#### REFLEXIO.

Si solius hominis sit agere propter finem, eaque sola operatio humana meritiò dicatur, quæ



ex deliberatione procedit, profectò brutis annu-  
merandus est, qui naturæ suæ oblitus, nec finem  
suis actibus præstituit quem intendat, nec ratio-  
nis præeuntis lucem sequitur, sed passionis im-  
petum, vel solius naturæ instinctum. *Bestius be-  
stialis homo est* (ait Bernard.) *ratione vicens, & ra-  
tione non utens.* O rem pudendam! homo ad æter-  
na natus, Dei capax, cœli candidatus, rationis  
particeps, dum rationis ductum non sequitur, ad  
brutorum greges deponitur, comparatur jumen-  
tis insipientibus, & similis fit illis; fit sicut equus  
& mulus, quibus non est intellectus, ut ait Da-  
vid: Imitatur irrationalia pecora, *quæ naturaliter  
feruntur*, ut dicitur 1. *Pe. r. 2.* & filium prodigum  
amulatur, qui patrem deseruit, *ut pasceret porcos.*  
Et iuste pietatis desertor (ait Chrysolog. *serm. 1.*)  
*debetur porcis, porcorum traditur servituti, ut  
sentiat quàm miserum sit, amarum quàm sit quietis  
paterna beatitudo perdidisse.* Semper agamus  
ut homines, id est opera præveniat deliberatio,  
comiteretur prudentia, iudicii tranquillitas subse-  
quatur. Sic semper rationabilia meditantes ad fi-  
nem intentum tandem perveniemus, & in Deo  
voluntas inveniet consummationem, si ab eo in-  
tentionum suarum ducat exordium. Væ autem  
miseris à vero fine aberrantibus, quærentibus  
brutorum more unde finiant appetitum, & insi-  
pienter respicientibus unde vero propinquent  
fini. *Quærant finem consumptionis, non consumma-  
tionis*, ut egregie observat Bernard. *tract. de di-  
lig. Deo.* Quia non beato fine consummari, sed  
consumi vacuo labore accelerant, qui rerum ma-  
gis specie quàm authoris delectati, prius universis  
percurrere, & de singulis cupiunt experiri, quàm ad  
ipsum current universitatis Dominum pervenire.

## SPECVLATIO II.

*Impossibile est voluntatem intendere simul  
plures fines ultimos totales adequatos.*

**P**robatur exponendo rationes D. Thomæ  
*art. 5.* Prima: Finis ultimus est ille cui omnia  
quæ sunt in potestate hominis subjiuntur, ul-  
timus enim finis affectui hominis omninò do-  
minatur; unde de gulosis dicitur Philipp. 3. *Quo-  
rum Deus ventres est.* Quia habent voluptatem  
ventris pro Deo, ad quem omnia referunt. Atqui  
non possunt dari duo supremi domini voluntatis,  
cui omninò subjiuntur omnes ipsius affectus,  
quia saltem amor unius amor alterius non sup-  
ponetur, aliàs uterque finis non esset supremus  
dominus. Ergo impossibile est voluntatē inten-  
dere simul plures ultimos fines disparatos, juxta  
illud Matt. 7. *Nemo potest duobus dominis servire.*

Secunda ratio D. Thomæ: Finis simpliciter ul-  
timus debet satiare & explere appetitum, si enim  
plenè non satiet, in eo ultimò non quiescet vo-  
luntas, sed ad ulteriorem suspirabit, ut in eo con-  
summata perfectionem inveniatur; unde defini-  
tur ab Augustino finis ultimus ille, *non quo con-  
sumitur homo, ut non sit, sed quo perficitur ut plenè  
sit.* Atqui voluntas non potest intendere duo  
bona perfectè satiatiua; bonum enim perfectè  
satiativum tale est, ut nihil extra ipsum appeten-  
dum relinquatur; quod utique non esset, si præ-  
ter unum ex illis bonis aliud voluntas ad sui per-  
fectionem requireret. Ergo voluntas non potest  
simul intendere plures ultimos fines totales.

Confirmatur hæc ratio penetrantiùs: De ra-

tione ultimi finis simpliciter est quod omnia ordinentur ad ipsum, ipse verò ad alium ulteriorem non ordinatur: Sed repugnat dari duo bona hujusmodi, nam vel unum ordinaretur ad aliud, vel non; si ordinaretur, jam esset bonum subordinatum, non ultimus finis; si non ordinaretur ad alium, jam iste alius non esset finis ultimus, utpote non subjiciens omnia suæ ordinationi: Ergo repugnat duplex ultimus finis.

Tertia ratio D. Thomæ. Finis ultimus est primum principium in processu voluntatis, sicut veritas indemonstrabilis est primum principium in processu intellectus: Sed primum principium voluntatis non potest esse nisi unum, quia sicut in processu rationis principium naturaliter cognoscitur, ita in processu voluntatis finis naturaliter amatur; quod autem naturaliter desiderat, non potest esse nisi unum, quia natura non tendit nisi ad unum; Ergo voluntas non potest intendere sub ratione ultimi finis nisi unum.

Ad intelligentiam hujus reconditæ rationis, quæ prima fronte videtur obscura, nec aliud probare quàm finem ut sic, seu beatitudinem in cōmuni debere unicam esse, considera quod qui finem particulare ultimum sibi constituit, illi saltem practice asserit omnes condiciones ultimi finis ut sic, eo ferè modo quo qui eligunt Regē, ipsum omnibus regiæ majestatis insignibus decorare debent. Unde sicut nequit appeti finis ultimus ut sic, nisi unus, ita nec finis ultimus particularis: quia quod voluntas in ultimo fine in cōmuni naturaliter appetit, solum hoc voluntas finem particularem attribuit, quem sibi assumit. Et ratio radicalis hujus profundæ doctrinæ est, quia voluntas ut libera non operatur nisi servando na-

turæ leges : sicut ergo voluntas ut natura exigat unum ultimum finem , quod sit principium actionum naturalium ; ita voluntas ut libera licet possit pro suo arbitratu finem particularem qui magis placuerit intendere , non tamen potest rationem finis ut sic dividere , & pluribus applicare . Nam ut ait S. Doctor q. 10. art. 1. ad 1. modus operandi voluntatis ut naturæ , participatur à voluntate ut libera , quæ practice & in actu exercito totalem rationem finis & beatitudinis ut sic fini suo particulari attribuit , qui proinde tali ratione supervestitus non potest non esse unicus .

Quarta demùm ratio sic formatur : Actiones liberæ voluntatis speciem moralem sortiuntur ex fine proximo , ut dicemus dum de moralitate : ergo à fine ultimo , qui est communis , sortiuntur rationem generis : nam in hoc conveniunt omnes actus humani , quod sunt propter ultimum finem ; sicut etiam in hoc conveniunt omnia appetibilia , seu omnes fines particulares , quod non movent voluntatem nisi ratione ultimi finis , ut dicemus postea . Sed quod habet rationem generis est unum . Ergo necessariò finis ultimus est semper unicus .

Ad elucidandam hujus difficilis , sed eruditæ rationis energiam , sciendum finem ultimum habere rationem generis non in essendo vel prædicando ( de quo agunt Dialectici , ) sed in movendo & causando ; sicut etiam finis proximus habet rationem speciei seu specificativi voluntatis , quatenus movet & terminat actus illius . Jam sensus rationis clarebit . Fines proximi non specificant nec movent actus voluntatis nisi per ordinem ad ultimum finem ad quem omnes conaspirant , & in cuius virtute alligantur : Ergo finis

ultimus, à quo omnes proximi derivant rationem communem seu genericam movendi, debet esse unus, aliàs non per se, sed per accidens ad eum acquirendū conspirarent. Ergo in genere finalizandi necessariò requiritur unicus ultimus finis, qui omnes alios subijciat, sicut in causis efficientibus prima quæ ordinat alias ad agendum debet esse una, aliàs foret confusa directio.

Obijcies: Voluntas potest ita esse comparata, ut hoc vel illo fine contenta sit: Ergo saltem disjunctivè poterit voluntas appetere plures ultimos fines.

Respondeo, quod cum de ratione ultimi finis sit, ut extra ipsum nihil appetendum relinquatur, & cæteris omnibus anteponatur; si dentur duo objecta quorum bonitate æquè foret contenta voluntas, tunc illa non essent plures ultimi fines formaliter, sed tantum materialiter, quatenus in utroque amaretur aliqua ratio quam voluntas unicè quæreretur. Sicut bonus Christianus qui finem in tribus personis S. Trinitatis ponit, non tres ultimos fines, sed unicū prætendit, nimirum bonitatem divinam in illis per æquè repertam.

Dices: Esto voluntas nequeat appetere plures ultimos fines ut necessarios, quid tamē verat ipsam appetere unum ut satiativū, alterum ut superabundantem? Licet enim natura abhorreat à superfluo, & studeat unitati, voluntas tamen sæpe sæpius exorbitat & entia multiplicat sine necessitate. Certè si Gentiliū immoderata licètia Deos sine modo exaugebat, quidni plures ultimos fines non necessitate, sed excessu luxuriante voluntas intendet? Neque enim minùs immultiplicabilis est Deitas, quàm ratio ultimi finis.

Respondeo voluntatem finis ultimi amore veluti plenam, non posse alium appetere : sicut stomachus cibis repletus alias dapes non concupiscit, sed fastidit. Sanè cum finis ultimus sit unicum & principale bonum appetentis, quidquid amatur ut superfluum, à ratione ultimi finis exulat, seu potius ultimo fini subordinatur.

Ad id quod de Ethnicorum diis subditur, dicendum idololatrias, tametsi pluribus diis adolerent, non tamen omnes ut deos perfectissimos coluisse, sed inter eos principem Deum, putà Jovem agnovisse. Vel dicendum, quod sicut divinitatem partiebantur, ita rationem ultimi finis dividebant, non in uno solo adæquatè constituiebant. Vel demùm dicendum, quod sicutidum plures deos fingeant, errabant; ita dum plures in illis ultimos fines collocabant, mentiebatur iniquitas sibi. Nam reverà seipsos habebant pro ultimo fine, siquidem pro suo arbitrata divinitatem pensitabant, ut aliàs dum de unitate Dei cum Tertulliano diximus. Quamobrem non tam deos, quàm suam rationem, suamque voluntatem divinitatam distributricem, & dispensatricem adorabant. Imò vitia in deos consecrabant; induxit enim Venerem impuritas, Martem ferocias, Bacchum ebrietas : amabantur scelera, deinde consecrabantur, postremò ne scelera arguerentur à diis, deos fingeant sceleratos. Ergo scelus pro deo & ultimo fine habebant.

Instabis : Peccans mortaliter habet creaturam pro ultimo fine, quia ut ait D. Thomas q. 28. de verit. art. 1. *Quantum ad affectum prapone creaturam Creatori, diligens plus creaturam quàm Creatorem*, juxta illud : *Dilexerunt gloriam hominum magis quàm Dei*. Atqui idem homo committit



plura & diversa peccata mortalia disparata : Ergo habet tunc plures ultimos fines.

Respondeo, certum esse peccatorem per peccatum lethale constituere suum ultimum finem in creatura, dum spreto bono incommutabili amplectitur bonum commutabile. In quo sita est grandis illa perversitas cordis humani bonis illis fruentis, quibus tantum uti debebat. Sed non propterea habet tunc peccator plures ultimos fines totales, sed unicum, nimirum proprium bonum, in quo pravè quiescit, sicque amore sui ædificat civitatem Babylonis usque ad contemptum Dei. Babylonica enim confusio est, ubi amor proprius principatur; siquidem nec Deo ratio, nec rationi voluntas, nec voluntati appetitus subjiciuntur, sed omnia suis deque miscentur, & prælibatur infernus, in quo nullus ordo, sed sempiternus horror inhabitat; & licet bonum proprium non sit de se malum, tamen bonum proprium amari ut summum bonum, & eum contemptu Dei, est perversitas perversitatum, accedens ad impietatem idololatriæ, Deum naturalem Regem cordis humani deturbantis à folio, & coronam, quantum in se est, in creaturam transferentis. Unde dixit Chrysostomus idololatram esse peccatorem quemlibet, imò & multorum Deorum cultorem.

Urgebis : Homo existens in peccato mortali, dum elicit aliquod bonum opus, non ordinat illud ad suum ultimum finem pravam, aliàs peccaret mortaliter, sed ad alium finem ultimum inefficaciter amatum : Ergo potest voluntas duos fines ultimos intendere, unum efficaciter, alium inefficaciter.

Respondeo quosdam non disjungi, posse ho-

minem simul intendere duos fines ultimos, unum efficaciter, alterum inefficaciter; sicut, inquit, in physicis non repugnat duas formas contrarias in eodem subjecto reperiri, unam quidem in gradu intensio, alteram in gradu remisso. Sed hæc explicatio videtur toti doctrinæ D. Thomæ ad-versari; cum enim de ratione ultimi finis simpliciter sit totaliter dominari voluntati, & omnes alios fines sibi subicere, planè repugnat posse aliqua ratione dari plures fines. Nam ille ultimus finis inefficaciter amarus vel subordinatur fini efficaciter intento, vel non; si subordinetur, jam non erit finis ultimus, sed intermedius; si non subordinetur, jam finis efficaciter intentus non erit totalis & ultimus; siquidem non omnia sibi subiciet, nimirum finem illum inefficaciter desideratum. Quare exemplum illud de formis non quadrat, quia inter illas est tantum oppositio contraria: at inter duos fines ultimos est oppositio contradictoria, quia uterque esset, & non esset ultimus, ab utroque per se, & non per se penderet voluntas.

Ad argumentum ergo dicendum, peccatorem, dum aliquem bonum actum elicit, non habere plures ultimos fines totales, sed unicum suprâ assignatum, qui tamen permittit aliquando voluntatem non contra se, sed præter se operari. Sicut enim causa prima finit interdum causam secundam deficere; sicut etiam ultimus finis justi non omnia sibi ejus opera subicit, scilicet peccata venialia: ita similiter finis peccatoris ei quandoque indulget extra sphaeram suæ causalitatis transcurrere. Si autem quæras quânam sit tunc finis ultimus peccatoris benè agentis, vel justî venialiter peccantis, dicemus specula-

tionem sequenti esse beatitudinem, quam in omni actu incessanter inquirimus.

## REFLEXIO.

*Nemo potest duobus dominis servire. Regnum in seipsum divisum desolabitur. Porro unum est necessarium. His Veritatis testimoniis damnantur qui Deo servire volunt & mundo, militare Deo & sæculo, æterna sperare gaudia, & terrena degustare. Non considerant quod ait Gregor. Impar quisque invenitur ad singula, dum confusa mente dividitur ad multa, quia videlicet nequaquam plene in uniuscujusque operis ratione colligitur, dum mens per diversa sparsa paritur. Nam plusquam necesse est se exterioribus implicat, quasi occupata in itinere obliviscitur quod tendebat. Erras, Lector, & vehementer erras, si cor tuum partim Deo, partim mundo divides. Totum, vel nihil vult, qui ex toto corde, ex tota anima, ex totis viribus vult amari. Minus te amat, qui tecum aliquid amat, aiebat Aug. & lib. de morib. Eccles. cap. II. Summum bonum, quod etiam optimum dicitur, non modo diligendum esse nemo ambigit, sed ita diligendum ut nihil amplius diligere debeamus. Natura semper tendit ad unum, inquit D. Thom. tendit ars, tendit ratio, tendit voluntas. Unicum est circuli centrum, quod omnes lineæ concurrunt; unicus est orbis sol, unicus sagittarii scopus, unus navigantium ultimus portus, unus itinerantium terminus, unus in Monarchia Rex, unus in orbe Deus, unicum in homine cor soli Deo consecrandum. Quia scriptum est: Dominus Deus tuus unus est, Deus amator & zelotes. Et iterum: Dominum tuum adorabis, & illi soli servias. Et rursum: Ut quid claudicatis in duas partes?*

Et iterum Isaïæ 28. *Angustum est stratum, ita ut alter decubat: & pailiam breve utrumque operire non potest.* Quàm cæcus qui extra Deum aliud quærit! Quàm avarus cui Deus non sufficit! Unicè ergo ad illum suspiremus, qui ut ait Bern. lib. 3. *de consider.* summa beatitudo est, creans mentes ad se participandum, vivificans ad sentiendum, afficiens ad appetendum, dilatans ad capiendum, justificans ad promerendum, accendens ad zelum, fecundans ad fructum, dirigens ad æquitatem, formans ad benevolentiam, moderans ad sapientiam, roborans ad virtutem, visitans ad consolationem, perpetuans ad æternitatem, implens ad felicitatem, circumdans ad securitatem, implens in bonis omne desiderium nostrum.

### SPECVLATIO III.

*Quidquid homo deliberatè vult, illud appetit propter ultimum finem.*

**H**Anc assertionem, quam unanimis Patrum & Philosophorum consensus docet, probari S. Thomas. Primò, quia ultimus finis hominis est summum hominis bonum appetitus ipsius satiativum: Atqui homo in omni suo actu vel illud summum bonum explicitè appetit, vel saltem ad illud implicitè tendit; nam impossibile est quod aliquid appetat voluntas nisi sub ratione boni sibi convenientis vel perfecti, vel tendentis in perfectionem consummatam beatitudinis. Ergo in omni suo actu homo ultimum finem inquit.

Altera ratio D. Thomæ sic procedit: Finis ultimus eo modo se habet in movendo appetitum, quo causa prima in permovendo secundas ad

agendum : Sed nulla causa secunda prorumpit in actum , nisi moveatur à causa prima : Ergo similiter secunda appetibilia, seu fines intermedii non movent voluntatem nisi dependenter à primo appetibili, qui est ultimus finis ; subindeque in omni actu appetitur finis ultimus & beatitudo non solum tanquam ratio volendi, sed etiam tanquam res volita ; finis enim non posset esse ratio volendi, nisi esset in se volitus, sicut lux non est ratio videndi cætera, nisi videatur in se.

Confirmatur utraque ratio : Dum voluntas deliberatè vult aliquid, vel quiescit in amore illius objecti, vel non sistit in eo, sed ad ulterius tendit ; si quiescit, profectò in ipso rationem ultimi finis ponit ; si ad aliud pergit, cum non detur processus in infinitum in finibus subordinatis, omninò deveniendum est ad unum finem, in quo sistat voluntas, aliàs nihil determinatè appeteretur, nec terminaretur consilium, nec quiesceret intentio agentis. Ergo necessariò voluntas agit propter unum aliquem ultimum finem explicite, formaliter, & expresse, quando ex distincta finis ultimi cognitione & amore agit ; vel saltem virtualiter, quando ratione præcedentis intentionis voluntas manet determinata ad agendum, etiamsi de fine illo actu non cogitetur ; & tunc implicite amatur ultimus finis in bono particulari, in quo finis ultimus involvitur. Et horum omnium radix est, quia nihil homo appetit, nisi intendendo satisfacere appetitui, ut patet : id autem est implicite appetere beatitudinem, quæ est expletio appetitus : Ergo quidquid homo agit, id facit propter ultimum finem vel explicite in se amatum, vel in aliqua sui participatione quæsitum.

Dices : Sæpe de ultimo fine non cogitamus, dum circa particularia objecta occupamur : Ergo finem ultimum non volumus; nihil enim volitum, quin præcognitum.

Respondet fatendo sæpe contingere nos appetere finem proximum & bona particularia, non cogitando de fine ultimo in communi, ut experienciâ compertum est, contra quam non est disputandum. Nec enim ullatenus placet quod quidam aiunt, intentionem illam haberi sine attentione & reflexione, subindèque fugere mentem vel memoriam. Nam cum cogitatio necessario involvat sui conscientiam, quia non solum est in nobis, sed etiam à nobis; & cogitatio quam non advertimus, similis sit voci quam non audimus; dicere cognitionem finis in communi præcedere, & tamen non adverti, est dicere quod talis cognitio non præcedit, cum nihil proficit cognitio nisi percepta, & ut sic dicam, conspicua. Quare dum nulla præcessit cognitio vel intentio finis ultimi & beatitudinis, etiam tunc tacite quæritur finis ultimus & beatitudo in aliquo suo radio, quatenus per omnem actum in omni objecto quæritur aliquid pertinens ad beatitudinem, putà honestas, delectatio, pax, quæ sunt conditiones ultimi finis. Unde rectè ait August. lib. 13. de Trinit. cap. 3. *Quidquid aliud quisquam latenter velit, ab hac voluntate, qua omnibus hominibus satis nota est, non recedit.* Ubi innuit, omnem humanæ voluntatis actum esse vel ipsam beatitudinis appetentiam, vel ei subnecti & inniti, vel saltem aliquam ejus inchoationem & participationem quærere.

Instabis: Finis ultimus justus est Deus. Atqui ea quæcumque facit justus, non ordinat ad Deum



committit enim multa peccata venialia, quæ sicut non procedunt à Deo ut primo principio, ita nec ad eum ut ultimum finem referri possunt; absurdum enim iam terminis est dicere justum peccare propter Deum: Ergo quidquid homo facit, non operatur illud propter ultimum finem.

Respondeo hominem in omni suo actu non agere propter ultimum finem particularem, cui se semel devovit, nisi vel formaliter, vel virtualiter ad ipsum se referat; agere tamen semper propter ultimum finem communem, id est beatitudinem. Et hoc solum intendunt S. August. & D. Thom. dum aiunt omnes homines convenire in appetentia ultimi finis, seu beatitudinis, quia semper quærunt bonum inchoatum vel consummatum. *Quantum ad rationem ultimi finis* ( inquit D. Thom. art. 7. ) *omnes conveniunt in appetitu finis ultimi, quia omnes appetunt suam perfectionem adimpleri, quæ est ratio ultimi finis, ut dictum est. Sed quantum ad id in quo ista ratio invenitur, non omnes conveniunt in ultimo fine.* Ecce D. Thomam manifestum sui interpretem, & asserentem quod cum dixit art. 6. præcedenti hominem in omni actu agere propter ultimum finem, id intelligendum est non de fine particulari & materiali, sed formali, scilicet beatitudine & consummata perfectione, quam omnes naturaliter concupiscunt, juxta illud præclarum Boëtii lib. 2. de consol. prof. 2. *Omnis mortalium cura, quam multiplicium studiorum labor exercet, diverso calle procedit, sed ad unum beatitudinis finem nititur pervenire.*

Hac expositione elimpidantur plures difficultates aliàs importunæ. In primis solvitur objectio facta de peccato veniali. Quia justus dum

illud committit, appetit quidem ultimum finem, scilicet beatitudinem, vel aliquam ejus participationem; sed non appetit finem ultimum particularem, scilicet Deum, tametsi illi maneat semper habitualiter subordinatus. Unde non amat objectum peccati venialis propter Deum, sed præter Deum. Quia ut benè observavit D. Bonaventura, in peccato veniali *neque est usus, neque fructus, sed abusus*; quia usus tendit ad ultimum finem particularem, fructus in eo sistit, abusus verò est recessus ab ultimo fine particulari, citra contemptum illius.

Per hanc etiam explicationem soluitur aliud argumentum satis intricatum, quo probatur omnia opera hominis infidelis, imò & fidelis existentis in peccato mortali esse peccata; siquidem finis ultimus infidelis est idolum, finis lethaliter peccantis est proprium bonum inordinatè amatum, vel vilis illa creatura, cui se peccator oppignoravit. Ergo si in omni actu agunt propter ultimum finem, profectò omnia opera sua referunt in finem illum pravam, cui se consecrarunt, quâ relatione tam sordidâ non potest non inquinari omne opus illorum.

Sed hæc instantia præfatâ interpretatione enervatur. Nam in operibus ex objecto bonis, v. g. largitione eleemosynæ, cultu parentum, defensione patriæ, aliisque ex naturali motivo compassionis, pietatis, vel gratitudinis elicitis non agit infidelis vel peccator propter suum ultimum finem particularem, sed ex præciso motivo honestatis, ut supponimus: Finis verò ultimus hujuscemodi operationum est beatitudo, quam in omni actu indefinenter quærimus. Qui finis, utpote naturaliter amatus, & ab honesto

vel inhonesto de se abstrahens, nullam in actum bonitatem vel malitiam refundit. Porro si infidelis aut peccator omnia sua opera, quàmlibet ex objecto bona referat in ultimum suum finem particularem pravam, procul dubio in omni actu peccabit. Qua de causa veridicè scripsit & inculcavit Augustinus, omnia opera infidelium esse peccata, idest infideliter agentium, & opeta sua ordinantium in finem infidelitatis suæ. Propositio enim Augustini in sensu formali intellecta verissima est, ut alibi operosius examinabimus.

Insistes: Eo modo finis intermedius dependet ab ultimo in movendo voluntatem, quo causæ secundæ pendent à prima in influendo, ut ait D. Thomas hic: Atqui causa secunda non influit in effectum nisi dependenter à causa prima singulari: Ergo finis intermedius non movet voluntatem nisi dependenter à fine aliquo ultimo particulari.

Respondeo, comparisonem causæ primæ efficientis cum ultimo fine intelligendam esse servato modo utriusque causæ; modus autem agendi causæ efficientis est per influxum physicum in effectum singularem, qui non procedit à causa in communi, sed singulari; nam *actiones sunt suppositorum & existentium*, subindeque singularem. Modus verò causæ finalis est moralis & metaphoricus, in hoc consistens quod media sui apprehensione alliciat voluntatem. Sicut ergo intellectus potest apprehendere bonum & beatitudinem in communi, ita ad illam semper anhelat voluntas in omni actu. Non quòd moveatur à beatitudine vagè sumpta, sed in hoc vel illo particulari objecto quæsita, vel se-

## REFLEXIO.

Refert D. August. lib. 3. de Trinit. c. 3. facetum dictum cujusdam mimi, qui promiserat se detesturum quid omnes in mente & voluntate haberent, & promissis se satisfacere credidit dum dixit: *Vili vultis emere, & cardò vendere.* Id refutat S. Doctor, quia virtute justitiæ vitium avaritiæ vinci potest, quâ quis justum semper dare pretium velit, & subdit: *Si dixisset, omnes beati esse vultis, miseri esse non vultis, dixisset aliquid quod nullus in sua non agnosceret voluntate.* Ita est, beatitudinem omnes & semper quærimus, sed ibi non est ubi quærimus. Derelinquimus fontem aquæ vitæ, & fodimus cisternas dissipatas, quæ sitim extinguere non valent. *Quia creatura rationali non sufficit ad beatam requiem quidquid Deo minus est,* ait idem Aug. lib. 13. conf. cap. 8. Ultimum aliquem finem velit nolit semper voluntas inquit: ergo eliciat, juxta tritum proverbium, ex necessitate virtutem. Ad verum ultimum finem, tanquam ad scopum singulos actus dirigat, quæ alicujus ultimi finis amorem continere non potest; aliàs non beatitatem, cui inhiet, sed miseriam, quam declinat, certissimè inveniet. Tota nocte laborans nihil capiet: concipiet dolorem, & pariet iniquitatem. Mihî credito, ut vitæ tuæ cursus feliciter dirigatur, respice finem, non quem vulgi opinio, aut falsa æstimatio humanis actibus præfixit, sed quem lux & lex Christiana monstravit. Quærite primum regnum Dei, & justiciam ejus. Erit animus tuus velut navis huc illuc jactata, nisi hunc clavum firmiter teneas. Audi Ethnicum Christianè scribentem: *Ideo peccamus, quia vel de nulla*

mas felicitatis appetitus, nisi tandem expleri posset. Hoc tamen mirum est, quod cum capessendæ atque retinendæ beatitudinis voluntas una sit omnium, tanta nihilominus existat de beatitudine varietas sententiarum, ut August. 19. *de civit.* ex Marco Varrone ducentas octoginta de summo bono opiniones referat: cujus alia ratio non est, quam gustuum seu propensionum humanarum diversitas, vel melius perversitas, beatitudinem non pro veritate, sed pro sua pronitate definiens. *Ut enim eos quæque res maximè delectavit, ita in ea constituerunt vitam beatam,* ait August. 13. *de Trinit. cap. 3.* Inquirimus ergo impræsentiarum, in quonam objecto inveniri possit creaturæ intellectualis beatitudo, quæ teste Boëtio est status bonorum omnium aggregatione perfectus: vel, ut Tullio placet, bonorum omnium, secretis omnibus malis, cumulata complexio: vel, ut Augustinus tradit, rerum omnium optandarum cumulata plenitudo: vel, ut definit S. Thomas: *Bonum totaliter quietans & satians appetitum.*

## SPECVLATIO I.

*Bona quævis creata occupare possunt cor humanum: satiare, vel beare non possunt.*

PROBATUR primò ratione generali: Beatitudo est bonum perfectum quo totaliter impletur appetitus, & ultra quod nihil appetendum restat; Sed nullum bonum creatum vel creabile, imò nec tota creaturarum universitas potest explere & quietare voluntatem hominis; nam objectum voluntatis est universale bonum, sicut

objectum intellectus est verum universale, quod utique non invenitur in aliqua creatura, quæ habet solum veritatem & bonitatem participatam, & ordinatam ad ipsum Deum, qui est fons totius bonitatis: Ergo nulla creatura cor hominis implere potest. Et ideo Ethnici in beatitudinis indagine laborarunt plurimum, & turpissimè aberrarunt: *Instruxerunt sibi varias vias erroris, ut bonum hoc invenirent; sed latuit eos semper, sicut lateret etiam nos, nisi venisset bonum ipsum ad nos*, inquit August.

Probatur rursus discurrendo per singula objecta, in quibus homines terreni beatitudinem collocarunt. In primis nemo divitiis satiari potest. Tum quia divitiæ artificiales ordinantur ad divitias naturales ad usum vitæ necessarias, scilicet victum, vestitum, habitationem; istæ verò divitiæ naturales ad vitæ sustentationem vel commoditatem referuntur: ergo in neutris consistit ultimus finis, qui ad aliquid ulterius non refertur. Tum quia beatitudo est bonum possessione percipiendum: divitiæ verò bonæ non sunt possessione, sed effusione. Tum quia beatitudo est omne bonum: divitiis verò haberi quidem possunt corpori necessaria, sed emi spiritualia non possunt. Proverb. 17. *Quid prodest stulto divitias habere, cum sapientiam emere non possit?* Tum demùm, quia beatitudo est firmum bonum: divitiæ verò obnoxie fortunæ sunt, & in malis copiosius quàm in bonis abundant; semper autem cum labore acquiruntur, cum timore possidentur, cum dolore amittuntur, concupitæ turbant, possessæ vilescunt, amissæ affligunt. Perperam ergo in illis beatitas quæritur. Immo ille verè ditior, qui minùs pecuniis im-



pedition. Divitiæ enim sarcinæ sunt & pondera, quibus non sublevatur anima, sed gravatur, ac sæpissimè inquinatur. Nam *quædam societas est penè etiam nominis duabus his rebus, vitiis & divitiis*, ait S. Eucher.

Secundò in fama & gloria beatitudo non consistit. Tum quia supponit bonitatem, vel excellentiam: unde nemo cognosci desiderat nisi in bonis, in malis autem quærit unusquisque latere. Ergo vera gloria, si sit vera, signum est & testimonium bonitatis, non summum bonum; si verò sit falsa, hominem miserum supponit, non bonum. Tum quia beatitudo est bonum stabile; fama autem falso rumore de facili perditur, vel obscuratur. Tum quia cognoscere nobilius est, quàm cognosci; non enim cognoscunt nisi quæ sunt nobiliora in entibus, cognoscuntur autem etiam infima: non igitur summum bonum consistit in hoc quod aliquis cognoscatur, & famâ celebretur, quæ est clara cum laude notitia. Imò nihil æquè formidant solidè illuminati, quàm vanæ gloriæ insidiantes jacturas; gloriæ enim subrepens appetitus superbiam pascit, quæ ut aiunt Patres; *Dulcis est spiritualium opum exspoliatrix & expilatrix, subtile malum, secretum virus, venenum latens, virtutum fucus, tinea sanctitatis*.

Tertiò beatitudo in potestate temporali sita non est. Tum quia beatitudo est bonum possessum propter se, cùm sit omnium finis: potestas autem ordinatur ad alios. Nam ut verè dixit S. Isidorus Pelusiot. lib. 3. epist. 74. *Imperii regula hac demùm est, quæ ad subditorum utilitatem omnia molitur*. Et epist. 194. *Tyrannis ad suum, regnum autem ad subditorum utilitatem omnia re-*

*fert.* Tum quia beatitudo est bonum perfectum & tranquillum, potestas autem maximè imperfecta & inquieta est; neque enim tollit morsus solitudinem, nec vitare potest aculeos formidinum. Non enim potentes satellitibus stipari vellent, nisi quos terrent ipsi plus metuerent. Unde illud: *Necesse est ut multos timeat, quem multi timeant.* Tum quia beatitudo stabilis est, & excludit malum quodvis: potentia autem mundana instabilis est, obnoxia fortunæ, & in improbis ea abutentibus sapius absolutior & munitor, qui nec eâ obtentâ contenti sunt, sed ad majora contendunt. *O ambitio ambientium crux! quomodo omnes torques, & omnibus places? Nihil acrius cruciat, nihil molestius inquietat, nihil tamen apud miseros mortales celebris negotiis tuis,* inquit Bernardus.

Quæ rō beatitudinem voluptas mundana asserre non potest. Tum quia illa sequitur ex possessione boni convenientis, si sit honesta & spiritalis; unde est potiùs consuetudinarium, quàm essentia beatitudinis. Si verò sit merè corporea, non satisfacit præcipuæ hominis parti, scilicet animæ rationali. Tum quia beatitudo est bonum hominis proprium; voluptas autem corporea communis est pecudibus, imò & perfectiùs in ipsis inveniuntur bona corporea, diuturnior enim est vita in elephante, fortior est virtus in leone, celerior cursus in cervo, acutior visus in aquila. Tum quia beatitudo est altissimum hominis bonum: Ergo non potest consistere in hoc, per quod conjungitur homo rebus sibi inferioribus, scilicet bonis sensibilibus corporis. Desinamus ergo ea sequi, quæ & assequi miserum est. Eorum enim nimius usus & men-

tem deprimit, iudicium præpedit, memoriam confundit, vires enervat. Si sapias, si habes cor tuum, si tecum est lumen oculorum tuorum, desine jam ea sequi, quæ & æstui miserrimum est.

REFLEXIO.

Ergo erravimus. Hanc conclusionem deducunt ipsimet iapii in via iniquitatis lassati. Vident, sed serò in illis perperam beatitudinem quæsi-  
visse, quæ ut ait Bernard. epist. 105. *possessa onerant, amata inquinant, amissa cruciant*. Intelli-  
gunt tandem miseri, facata illa bona esse vera-  
mula, & speciosa supplicia, ut loquitur Cyprian.  
epist. ad Donat. Dolent ea toto corde amasse,  
quæ melius fuerat ignorasse, vel cognita repu-  
tasse ut stercora, quæ dispersa & calcata profunt,  
congregata aërem hominesque corumpunt.  
Lugent tam fluxis lubricisque adhæsisse, quæ ut  
ait Seneca ad Polyb. *cum labore possidentur, cum  
invidia conspiciuntur, eosque ipsos, quos onerant,  
premunt*. Stupent omnia transisse, & se cum il-  
lis; quia cuncta creata triplex tollit interitus,  
ait Chrysostom. homil. 15. in Matth. aut à seipsis  
veterascunt, aut à dominis fortunas suas obli-  
gurientibus dissipantur, aut ab extraneis dolo,  
vi, injustitiâ diripiuntur. Considerant humanam  
gloriam, cujus erant adoratores, theatricæ hi-  
strionum pompæ assimilari, quæ completâ co-  
mœdiâ evanescit. Cernunt vitam hanc vaporem  
esse ad modicum apparentem, & quasi umbram  
transcuntom; nam & Reges, & Imperatores, &  
Pontifices habuimus, qui nec annum, nec men-  
sem, nec hebdomadam numerare potuerunt.  
Hec cûn ita sint, utamur hoc mundo, nec illi  
hæreamus. Non nocebunt bona temporalia sa-

pietia, ait Seneca, si doceamur sapere. Habeantur à nobis, ne nos habeant: sint captiva, ne nos capiant: quaerantur innocenter, emitantur liberaliter; serviant, non imperent. Et saepe inter prospera illud occurrat, quod Eugenio III. Bernardus epist. 236. objiciebat: *In omnibus operibus memento te esse hominem, & timor ejus, qui aufert spiritum Principum, semper sit ante oculos tuos. Quantorum in brevi Romanorum Pontificum mortes tuis oculis aspexisti? Ipsi te praecessores tui tua certissima & citissima decessionis admoneant, & medicum tempus dominationis eorum paucitatem dierum tuorum nunciet tibi. Iugè proinde meditatione inter hujus praesentis gloria blandimenta memorare novissima tua, quia quibus successisti in Sedem, ipsos sine dubio sequeris ad mortem. Extra Deum quaerere requiem potes, invenire non potes. Quàm verè, quàm vividè August. lib. 6. Confess. cap. 13. O tortuosas vias! Va anima audaci, quae speravit, si à te recessisset, se aliquid melius habituram! Versa & reversa in tergum, & in latera, & in ventrem, & dura sunt omnia. Tu solus requies à labore.*

## SPECVLATIO II.

*Creatura rationalis in proprio sinu & fundo felicitatem invenire non potest, vel in scientiis intellectu, vel in virtutibus voluntatis.*

**T**Ria communiter distingui solent bona, alia sunt extra animam, alia circa animam, alia intra animam. Extra animam sunt bona for-

tunæ : circa animam sunt bona corporis : intra animam sunt bona mentis , scientiæ nimirum & virtutes. A duobus primis beatitudinem exclusimus speculatione præcedenti : in tertiis perfectam felicitatem non inveniri monstrandum est.

Probatur 1. ratione generali : Intra animam nihil est nisi substantia , potentiæ , habitus , & actus : Sed in illis non invenitur summum bonum. Non quidem in anima nudè sumpta , quæ exigit ulteriorem perfectionem , qua proinde caret. Non in anima instructa potentiis , ornata habitibus , fecunda actibus , quia illa omnia sunt bona finita , & limitata , quæ non excludunt omne malum , nec implent omne desiderium ; quantumcunque enim animus rationalis sit scientiis & virtutibus auctus , multis tamen malis subjacet , quæ vitari non possunt , nimirum ignorantia in intellectu , inordinato passionum æstui in appetitu , multiplicibus pœnalitatibus in corpore.

Probatur 2. in speciali. In primis in scientia beatitudo non invenitur. Tum quia vera beatitudo terminat hominis appetitum ; in hac autem vita quanto plus aliquis intelligit , tanto magis desiderium sciendi augetur , nec unquam ad finem sciendi pervenit. Et sæpe , ut dicitur Eccles. 1. *Qui addit scientiam , addit & laborem , & in multa sapientia multa indignatio.* Quia ex profundiori eruditione majores emergunt dubitationes. Tum quia beatitudo est bonum stabile & perpetuum , unde corpora naturalia à suo centro non remouentur , nisi per motum violentum : contemplatio autem in hac vita stabilis , & perpetua esse non potest , sæpe enim impeditur tum ab aliis occupationibus , tum corporis infirmitatibus.



tate, tum tempestatum incommodis, frigore, æstu, &c. tum passionum insurgentium motibus, tum falsarum opinionum tenebris, tum continuationis tædio. Tum denum quia beatitudo appetitum quietat; cognitio autem etiam fidei desiderium non quietat, sed magis accendit, quia unusquisque desiderat videre quod credit, ut illi uniatur objecto, à quo quandiu per fidem ambulat peregrinatur.

Idem suadetur de operationibus virtutum moralium. Tum quia beatitudo est ultimus finis ad ulteriorem non tendens; operationes autem virtutum ad aliud ordinantur, puta operationes fortitudinis ad victoriam & pacem, operationes iustitiæ ad Reipublicæ integritatem, & sic de aliis virtutibus moralibus; quæ omnes ad hoc ordinantur, ut per eas conservetur medium in passionibus internis, & decor in operibus externis. Fateor quidem beatitudinem, tota quanta in hac misera vita haberi potest, in actibus contemplationis, & virtutum moralium consistere; nam sola virtus præsertim charitate formata bonum facit habentem, & opus ejus bonum reddit. Tamen in illis ratio summi boni inveniri non potest, cum omnis vera virtus ad summum bonum Deum obtinendum ordinetur. Vnde Augustinus: *Epicurus ait, Frui carne mea bonum est. Stoïcus, Frui mente mea bonum est. Christianus verò, Mihi adhaerere Deo bonum est.*

Confirmantur hæc omnia ratione D. Augustini lib. 14. de Trinit. cap. 24. & 25. Quavis non omnes qui habent quod volunt continuo beati sunt, nemo tamen beatus est nisi habeat quod vult, & nihil malè vult: miser verò est, qui vel id non habet quod vult, vel id habet quod non



rectè vult : Sed in hac vita nullus quàmlibet scientiis & virtutibus ornatus vivit ut vult; nam quis hominum potest ut vult vivere, quando ipsum vivere non est in potestate? Certè non vivit ut vult, qui non vivit quandiu vult, & qui volens vivere, mori cogitur. Deinde etiam ipse justus non vivit ut vult; nam cum tentat error ut fallat, tentat libido ut accendat, tentat labor ut frangat. Ergo justus non vivit ut vult, nisi eò pervenerit, ubi mori, falli, offendi omninò non possit, eique certum sit ita semper esse futurum. Hoc enim natura expetit, nec plenè atque perfectè beata erit, nisi sit adepta quod expetit.

## R E F L E X I O.

*Si separaveris pretiosum à vili, quasi os meum eris; id est, si justâ staterâ appenderis verum bonum, & discreveris illud à falso, imitaberis oris mei veritatem, quæ suum cuique rei nomen & pretium indit. Nihil tam in vita morali necessarium, quam æqua rebus pretia imponere, & tantis res singulas facere quanti valent. Omnia aestimatorem desiderant, aiebat Seneca. Omnia probate, quod bonum est tenere, ait Spiritus sanctus. Certè si justum de rebus feramus judicium, miseriam plenum mundum, non beatitudinis locum fatebimur. Mundus iste (inquit B. Humbertus quintus Ordinis nostri Magister Generalis, in aureo opusculo de eruditione Religios. p. 1. cap. 2.) est tenebrosus, falsus, modicus, implicatus, transitorius, crucians, periculosus. Unde Beatitudo longè ab illo est, qui tot malis scatet. Tenebrosus est mundus. Proverb. 4. Via impiorum tenebrosa. Quia nimirum mundani inter se & verum Solem obicem peccatorum interponunt, unde sunt in*

perpetua eclipsi. & quod deterius est, cæcitatem suam non agnoscunt, vel non dolent. Augustin. *Quid miserius misero non miserante seipsum?* Falsus est mundus. Psal. 5. *Ve quid diligitis vanitatem, & queritis mendacium?* Assimilantur enim bona terrena Sodomæ fructibus ad speciem pulchris & suavibus, sed morsu pressive tentati in fumum ac favillam vaneſcunt. Sic mundi insanix falsæ promittunt & ostentant copiam, sed revera indigentiam augent. *Modicus est mundus.* Sapient. 11. *Tanquam momentum statera, sic ante te orbis terrarum.* Nam respectu cæli tota terra punctum est. Seneca: *Punctum est id in quo navigatis, bellatis, regnatis.* Implicatus est mundus. Luc. 10. Martha, Martha sollicita es, & turbaris erga plurima. August. in illud Psalmi, *Diligite Dominum omnes sancti ejus,* ait: *Disce non diligere mundum, ut discas diligere Deum; averte, ut non vertaris; funde ut implearis.* Felices exonerati qui sequi possunt expediti, addit Bernard. *Transitorius est mundus.* Sapient. 5. *Transferunt omnia illa tanquam umbra, & tanquam nuntius præcurrens, & tanquam navis, que pertransit fluctuantem aquam.* Spes impii tanquam lanugo est, que à vento tollitur: & tanquam spuma gracilis, qua à procella dispergitur, & tanquam fumus, qui à vento diffusus est, & tanquam memoria hospitis unius diei prætereuntis. Crucians est mundus. Eccl. 2. *Cuncti dies ejus (avarici) pleni sunt doloribus & ærumnis.* Augustin. *Curre per singula, & invenies tot animæ tormenta, quot vitia.* Periculosus est mundus. Psal. 103. *Hoc mare magnum & spatiosum.* Cujus periculum, ait Bernard. probat transeuntium raritas, & pereuntium multitudo. In mari Massiliæ de quatuor animabus non pe-

rit una : in hoc mari de quatuor animabus non salvatur una. Mirabiles elationes hujus maris, in quo qui perit, in æternum perit. Si modicum frumenti totam massam corrumpit, quem non corrumpet mundus, cujus tota massa corrupta est? Felicitas ergo in mundo non est. Sed potius terque quaterque beatus est, quem Deus à mundo educit in secessum claustrum vel communitatis, unde exire non liceat nisi ad salutem animarum.

## SPECULATIO III.

*Animam rationalem solus Deus unus & trinus implere & beare potest.*

**H**Æc speculatio est corollarium præcedentium. Si enim creatura intellectualis felicitatem invenire nequit, nec infra se in bonis terrenis, nec circa se in deliciis corporis, nec intra se in ornatu virtutum; restat ut illam quærat supra se, in Deo scilicet totius bonitatis fonte, extra quem quiescere nequit animus immortalis. Nam dum circa creaturas occupatur, aut sequitur bonum quod non assequitur, & non habet requiem; aut bonum obtinet quod retinere non potest, & sentit dolorem; vel illud retinet, sed perdere potest, & habet timorem. Unde oportet verum bonum in Deo quærere. *Bonorum summa Deus nobis est* (ait præclare August. lib. de mor. Eccles. cap. 8.) *Deus est nobis summum bonum: nec infra remanendum nobis est, nec ultra quarendum; alterum enim periculosum, alterum nullum est.* Planè nullum & inane; bona enim terrena desideria non extinguunt, sed accendunt; unde Joannes omne quod est in

mundo *concupiscentiam* vocat, quia ravidam sitim inflamat.

Ratio est, quia in Deo inveniuntur omnes illæ conditiones, ob quarum carentiam felicitas in bonis creatis non invenitur. Nam Deus est summum bonum, ad nullum aliud ordinatum; est omne bonum, omnia possibilia eminentissimè præcontiaens; est purum bonum, omnis defectus & imperfectionis incapax; est sufficiens, & exuberans bonum, satians omne desiderium; est stabile bonum, cum sit æternum; est connaturale bonum, ad quod videndum creatura rationalis naturaliter inclinatur. Unde August. *lib. de spirit. & litt. cap. 33.* ait: *illa cognitione, illa visione, illa contemplatione satiabitur bonis animæ desiderium; hoc enim ei solum sat est: ultra non habet quod appetat, quod inhiat, quod requirat.* Quæ aliàs diximus de possibilitate visionis, faciunt ad præsens institutum. Sed quia in tam uberi materia sterilem esse non decet,

Probatur ampliùs hæc veritas: In illo objecto invenitur summum bonum hominis, quo possessio satiatur omne desiderium cordis humani; bonum enim est quod omnia appetunt, & bonum hominis ad quod asciscendum tendunt omnes desideriorum ejus motus, & quo adepti omnes cessant. Atqui per fruitionem Dei Optimè Maximi omne desiderium hominis completur. Ergo in possessione Dei vera felicitas invenitur. Probatur minor: Quatuor sunt potissimùm desideria, quibus cietur cor humanum, non dissimilia quatuor elementis, quibus constat mundus; quatuor humoribus, quibus componitur corpus; quatuor ventis, quibus perflatur orbis; quatuor fluviiis, quibus irrigatur paradisus ter-

restris. Primum est desiderium veritatis, commune cum Angelis. Secundum est desiderium voluptatis, commune cum brutis. Tertium desiderium æternitatis, commune cum omnibus entibus, quæ fugiunt interitum & corruptionem quantum possunt. Quartum desiderium honoris & dignitatis, proprium hominibus ad vitam politicam & civilem. Ex hac quadruplici scaturigine omnes actus, artes, & industriæ vitæ humanæ, virtutes etiam & vitia promanarunt. Nam amor veritatis studium & scientiam; amor voluptatis artium amœnitatem; amor æternitatis honestam matrimonii fecunditatem, & Reipublicæ perennitatem; amor dignitatum politicæ & regiminis maximas peperere. Sicut è contra dum hæc desideria exorbitant, omnia sus deque confundunt; nam appetitus sciendi inordinatus hæreses & errores; appetitus voluptatis obscœnitates, superstitiosam sanitatis curam; appetitus æternitatis liberorum cæcum amorem, monumentorum vanitatem; appetitus dignitatis ambitionem, & tyrannidem germinarunt.

Atqui hæc quatuor desideria cumulativè & juxtà honestissimè complet Deus clarè visus & possessus. Tunc enim apparet veritas sine ænigmate, sicuti est. Tunc torrente voluptatis potatur animus, quando perfectum objectum perfecte potentiæ perfectissimè unitur, quæ est triplex conditio delectationis. Tunc attollitur nostra vilitas ad divinitatis consortium, quod nihil sublimius. Tunc inamissibilem obtinet perseverantiam bonorum, & interminabilem perfecte vitæ possessionem. Quàm doctus quæ omnia scit, & videntem omnia videt! Quàm lætus qui intrat in gaudium Domini sui, quod



non l'imitat capiendo, sed quo inundatur intrando! Quàm excelsus, cui disposuit Filius, ut edat & bibat super mensam suam in regno Patris sui! Quàm securus, cui æternitas bonorum firmat possessionem. Verè tunc erit longitudo, latitudo, sublimitas & profundum: profundum scientiæ scrutantis arcana Dei, sublimitas dignitatis evehenti ad regnum Dei, latitudo charitatis cor dilatantis & implentis voluptate Dei, longitudo æternitatis firmantis stabilitate Dei. Ergo in Deo vera felicitatis ratio cumulatissime invenitur.

Secunda pars, quæ asserit Trinitatem personarum ingredi essentielle beatitudinis objectum, indicatur à veritate, Joan. 17. *Hæc est vita æterna, ut cognoscant te Deum verum, & quem misisti Jesum Christum.* Ubi pro objecto vitæ æternæ assignat Patrem & Filium cognitos.

Probatum ratione contra Scotistas ex essentiali conditione objecti beatifici. Illud solum potest esse objectum beatificum, quod potest explere desiderium beati; quandiu enim desiderium frustrabitur, tandiu miseria erit, non felicitas; & ideo rationem objecti beatifici ab omnibus creaturis exclusimus; quia desiderium quidem accendere, sed minimè explere possunt. Atqui Deus non satiareat Beati iusta desideria, nisi videretur ut trinus. Tum quia Beatus desiderat Deum videre ut in se est intuitivè & quidditativè; cognitio autem intuitiva, & quidditativa feruntur ad objectum eo modo quo subsistit: Deus verò subsistit in tribus personis. Tum quia Beatus videndo essentiam connaturaliter desiderat videre proprietates cum essentia necessario connexas: proprietates autem personales sunt ita necessa-



riò cum essentia connexa, ut sint de conceptu implicito Divinitatis, ut libro 3. demonstravimus. Ergo Trinitas personarum, ingreditur rationem essentialem objecti beatifici, & summi boni, cujus præcipua diffusio & infinita fecunditas in distinctione personarum relucet.

Dices: Sola essentia divina est objectum formale visionis, sicut & divinæ cognitionis: Ergo in præcisa cognitione illius sita est beatitudo, eo modo quo concipimus Patrem Æternum beatum in illo priori originis, in quo nondum concipitur Filius productus, nec subinde visus.

Respondeo, ipsas etiam personas ingredi rationem objecti primarii divinæ cognitionis; quia eadem indivisibili veritate, & immaterialitate gaudent cum essentia divina, quæ licet sit ratio *sub qua* attingendi, non est tamen sola ratio *qua* primariò attacta. Accedit quod licet essentia esset sola objectum visionis ut cognitio est, non tamen ut est cognitio beatificans & explens omne desiderium Beati, quod fertur ad Deum ut est in se. Sicut aliàs diximus, quod licet daretur solam essentiam esse objectum cognitionis paternæ, ut cognitio est; non tamen ut est cognitio comprehensiva, quæ omnia pervadit, nihil relinquit. Similiter cognitio beatificans ut talis omnia illa attingit, quæ voluntas concupiscit. Quid autem connaturalius inclinationi videntis Deum, quàm intueri personas in quibus subsistit? Pater autem æternus in illo priori non est beatus sine Filio, & quia nunquam est sine illo, & quia semper contemplatur in sua fecunditate filium in signo posteriori producendum. Vide plura circa hoc *lib. 3. differt. 4. cap. 1.*

Instabis : Sub ea ratione Deus est beatitudo objectiva & ultimus finis , sub qua est primum principium creaturarum ; nam ad illud tendit creatura rationalis à quo processit, sicut ad mare unde exeunt flumina revertuntur. Atqui Deus non est principium creaturarum ut Trinus , sed tantum ut unus ; nam *monas genuit monadem & in se suum reflexit ardorem* ; id est , unus Deus unum mundum propter suam gloriam produxit, ut exponit D. Thomas aliàs citatus. Et certè si à Deo trino per se procederet mundus , posset ex creaturis Trinitas demonstrari. Ergo Deus ut trinus non ingreditur formaliter rationem ultimi finis, & beatitudinis creaturarum.

Respondeo , omiſſa solutione eorum qui dicunt , Trinitatem non pertinere ad constitutionem metaphysicam Dei & ultimi finis , benè tamen ad constitutionem physicam , quam exigit penetrare cognitio beatificans ; omiſſa , inquam, & quia valde obscura & metaphysica est illa responsio , & quia non satisfacit comparationi finis ultimi cum primo principio , & quia hìc quærimus constitutivum metaphysicum & formalissimum objecti beatifici , à quo si removeatur Trinitas , profectò vera erit sententia Scottistarum, qui non inficiantur Trinitatem physicè & realiter inveniri in objecto beatifico , sed contendunt illam non ingredi formalem & metaphysicam ipsius rationem constitutivam.

Dicendum igitur planius & solidius, quod licet illud idem quod est primum principium , sit etiam ultimus finis & beatitudo objectiva, tamen plura importat ratio beatitudinis quàm primi principii, ut fateri coguntur ipsi adversarii. Nam ratio primi principii importat solùm perfectio-

nem naturaliter cognoscibilem ; ratio verò ultimis finis importat eilentiam Dei etiam ut authoris supernaturalis clarè & in se visam ; & tamen clara & explicata possibilitas visionis per lumen gloriæ non potest naturaliter cognosci : Ergo in possessione ultimi finis aliquid necessario importatur , quod non includitur in primo principio. Similiter à Deo trino per se non procedit creatura intellectualis ; non beatur tamen nisi per Deum trinum , quia nunquam contenta erit nisi videat Deum sicuti est. Unde negari debet major ; licet enim illud quod est primum principium , sit etiam ultimus finis beatificans ; non tamen per illam eandem rationem constituitur beatificans , qua constituitur primum principium.

Insistes : Ergo etiam creaturæ ingredientur objectum beatitudinis ; nam Beatus desiderat videre aliquas in Verbo : saltem ipsum ens creabile ut sic non potest non videri in omnipotentia divina , quæ habet necessariam connexionem cum possibilitate creaturarum.

Respondeo Beatum desiderare videre aliquas in Verbo creaturas secundum exigentiam sui status, non ex necessitate, sed ex abundantia , & veluti refluentia beatitudinis, non ut objectum essenziale beatitudinis, sed ut accidens, & corollarium illius. Quia ut aliàs ex S. Thoma & D. Augustino accepimus , si solus Deus videretur , qui est fons totius esse & veritatis , ita repleret naturale desiderium sciendi , quod nihil aliud quæreretur. Et qui Deum & creaturas novit , non propter illas beator , sed propter Deum solum beatus. Quod verò additur de ente creabili relucente in divina omnipotentia,

facilis est solutionis. Non enim inde sequitur ens creabile beatificare, sed solam omnipotentiam in qua relucet. Unde non ex propriis, ut sic loquar, meritis beatitudinis objectum ingreditur, sed solum ab objecto beatifico connotatur.

Perfistes: Eodem proportionali modo philosophandum est de beatitudine objectiva, quo de formali: Sed pro beatitudine formali constituenda non colligimus omnes. Beati operationes, sed unam quærimus & seligimus, quæ sit aliarum radix & origo: Ergo similiter ad constituendam rationem essentialem beatitudinis objectivæ non est assignandus bonorum omnium cumulus aggregatione perfectus, sed inquirenda est una ratio fontalis, quæ sit bonorum omnium origo & radix satietatis appetitus. Atqui essentia divina est illud primum & præcipuum bonum, quod est radix prima totius boni, per quod satiatur appetitus, cum sit ratio à priori omnium attributorum & personarum: Ergo objectum essentialis beatitudinis est sola essentia Dei, non verò attributa aut personæ.

Respondeo latum discrimen beatitudinem objectivam inter & formalem inveniri, quia beatitudo formalis est possessio summi boni; unde illa operatio, quæ prima summum bonum possidet, sortitur rationem formalis beatitudinis: at verò beatitudo objectiva est bonum satians & implens appetitum, ita ut nihil possit ultra desiderare: illud autem bonum consummatum & replens in bonis desiderium, est Deus ut in se est unus & trinus, ob rationes allatas, quibus adde, quod eo solum modo potest Deus satiare cor humanum, quo potest esse objectum appetitus intellectualis; creatura enim non eleva-

tur ad fruendum Deo, ut aliàs *libro 1.* ostendimus, nisi sub ratione naturæ intellectualis: Sed Deus est objectum appetitus intellectualis sub ratione universalissima, nimirum secundum essentiam & personas: Ergo non habet rationem satiantis appetitum, subindeque objectivæ felicitatis, nisi secundum essentiam, attributa, & personas. Adde rursus, quod illud est objectum appetitus nostri satiativum, quod est nostræ dilectionis objectum: tota autem Trinitas est objectum supremum & essentialē nostræ dilectionis super omnia, quæ ratio magis urget Scottistas asserentes formalem beatitudinem in actu dilectionis sitam esse. Hanc dilectionem tibi & mihi opto, Lector, ut per illam consequamur infiniti objecti beatitudinem. Vel potius eam ab Ipso petamus, qui sicut solus Beatos, ita solus efficere valet amantes. Uterque ergo nostrum cum Bernardo dicat: *Et si quantum debeo, amare non possum, tamen ultra quam possum: potero verò plus, cum plus donare dignaberis; nunquam tamen prout dignus haberis.*

## R E F L E X I O.

Hic non tam reflexione opus est, quam suspiriis. Dum enim quidquid temporale est, transit & evanescit, quid superest nisi gemere & suspirare ad illam æternitatem, quò tendunt omnia sitientis animæ desideria, ubi requies appetendi, ubi fruendi securitas, ubi tranquillissimum gaudium optimæ voluntatis invenitur. Concupiscat planè, & deficiat anima nostra in atria Domini, qui erit omnibus plenitudo lucis, multitudo pacis, securitas æternitatis. Prorsus expedit illum fruire fontem, qui non solum nobis aquam refri-

gerantem profundit, sed intra nosmetipsos ingreditur, ut per se satiet, per se repleat Deus unus & trinus, qui solus beare potest. O aeterna veritas, & vera charitas, & chara aternitas! (exclamat Aug. lib. 7. Confess. cap. 10.) Tibi suspiro die ac nocte. Ibi fige mansionem tuam, ibi commenda quidquid inde habes anima, saltem fatigata fallaciis. Nam & me miserum, heu! (subdit Bernard. serm. 33. in Cant.) longè agentem, & de longè salutantem: En ipsa ejus recordatio ad lacrymas provocat planè, juxta affectionem, & vocem dicentium: Super flumina Babylonis illic sedimus & flevimus, dum recordaremur tui Sion. Ut tanti boni desiderium in te concites, placet melleum simul & igneum Augustini hymnum hìc apponere ex meditationibus ejus collectum, paucis tantisper à me mutatis, ut verborum pariter sonantium servetur rhithmus, & concinnitas.

*Ad perennis vite fontem mens sitivit arida.*

*Claustra carnis praesto frangi mens exoptat languida.*

*G i' cit, ambit, eluctatur exul frui Patria:*

*In pressuris & arumnis coeli cupit atria.*

*Quam amisit cum deliquit, contemplatur gloriam:*

*Praesens malum auget boni perditì memoriam.*

*Ecquis promat summa pacis quanta sit latitia?*

*Ubi vivis margaritis surgunt adificia.*

*Solis gemmis pretiosis hac structura nequitur:*

*Auro mundo tanquam vitro urbis via sternitur.*

*Hyems horrens, aetas terrens illis nunquam sa-  
viunt:*

*Virent prata, vernant sata, rivi mellis influunt.*

*Flos perpetuus rosarum ver agit perpetuum:*

*Nox & tempus desunt ei, diem fert continuum.*



*Candent lilia, rubet crocus, & defudat balsamum:*

*Pigmentorum spirat odor, liquor & aromatum.*

*Non alternat Luna vices, Sol, vel cursus s. derum.*

*Agnus est felicitis urbis lumen in occiduum;*

*Nam & Sancti quique velut Sol praeclarus rutilant.*

*Post triumphum coronati merito conjubilant.*

*Mutabilibus exuti repetunt originem:*

*Et vitalem vivi fontis hauriunt dulcedinem.*

*Vno pane vivunt omnes in caelesti gloria:*

*Nihil est ultra quarendum habentibus omnia.*

*Avidi & semper pleni, quod habent desiderant.*

*Inhiantes semper edunt, & edentes inhiant.*

*Non satietas fastidit, neque fames cruciat:*


*Quia sitis saturatur, & saturos recreat.*

*Christe palma bellitorum rumpe meum vinculum.*

*Heu! me quaeso post solutum militare cingulum,*

*Fac consortem donativi beatorum civium,*

*Vt te merear videre sine fine primum.*



## DISSERTATIO III.

*De essentia, & proprietatibus formalis  
beatitudinis.*



INVENTO & detecto Thesauro  
beatitudinis objectivæ, inquiren-  
dum superest, quomodo tantum  
bonum possidere licet, quave  
operatione illud consequemur in  
Patria quidem consummative, in via verò in-

choativè. Neque enim existimandum est creaturam intellectualem in visione & possessione summi boni merè passivè se habere, Deumque per increatâ intellectiōem intueri. Cùm enim intellectio sit actio immanens, & vitalis, quæ necessariò egreditur à principio intrinseco, non potest ab extrinseco advenire, sed ab interno principio essentialiter promanat. In quo differt à subsistentia divina, quæ cùm non sit actio vitalis, sed complementum substantiæ, optimè potest naturæ creatæ communicari; quidenim verat ens participatum ab ente per essentiam sustineri, & portari Verbo virtutis ejus? At verò intellectio est operatio vitæ, à principio interiori essentialiter promanans, & in eo manens à quo manat. Quæ ratio convincit etiam contra Nominales intellectiōem beatam non infundi à Deo, intellectu merè passivè se habente; id enim characteristicæ actionis vitalis notioni repugnat.

Non est etiam existimandum, formalem beatitudinem in aliqua Dei unione, vel aliquorum donorum apparatu operationem Beati antevertente consistere. Quantumcunque enim Deus intimè in animam vel potentias ejus illabatur, & quamlibet exquisitus sit habitualium virtutum ornatus, nondum tamen potitur vel fruitor summo bono, qui ipsum operatione non assequitur, vel tenet; Deus verò sola visione tenetur, ut postea dicemus. Et quomodo beatus esset, qui se beatum esse non perciperet? Quomodo autem perciperet, nisi actu videret? Vnde Benedictus XII. determinavit animas *visione & fruitione fieri beatas*. Accedit quod beatitudo formalis est ultima perfectio hominis in genere  
vitæ

vita intellectualis ; habitus autem non est ultima perfectio , cum tendat ad ulteriorem perfectionem actus. Non est etiam perfecta vita , nisi ubi est motus vitæ , quia habere virtutem in actu primo commune est non viventibus. Relinquitur ergo , beatitudinem formalem in aliqua Beati operatione consistere , nec aliter posse intelligi quomodo beatitudo ad creaturam intellectualem pertineat , nisi ab ipsa per modum operationis procedat. Potest quidem Deus effectum quem producit causa secunda producere , aut se solo conservare , qui causarum omnium virtutem eminentissime præhabet , sed tamen efficere non potest , ut operatio vitalis sit, si à solo Deo procedat. Sicut potest quidem Deus producere hominem sine generante ; efficere tamen nequit ut homo ille productus sit filius alterius hominis , qui ipsum non generavit. Plura contra huiusmodi veterum nonnullorum Theologorum , beatitudinem in habitu, vel illapsu divinæ essentiae , vel in operatione infusa , & de foris adventitia constituentium positiones dicenda occurrerent , nisi forent ipsa suâ improbabilitate obsoleta. Nec est verum, ut quidam ignoranter dixerunt , opinionem Thomistarum negantium verbum creatum in visione Beati , confundi cum aliquo ex illis placitis ; nam rationem verbi seu speciei expressæ distingui ab intellectione , in schola D. Thomæ notissimum est.

Supposito ergo, summum bonum non nisi operatione obtineri , restat explicandum quænam operatio formaliter bonum illud assequatur. Et quidem non est difficultas de operationibus sensitivis ; purissimus enim spiritus Deus est omni-

no extra sphaeram objecti adequati potentiae sensitivae, quae materialia & sensibilia transilire non potest; sed dubium duntaxat est de operatione intellectus & voluntatis; quae potentiae cum sint universales, illa in cognoscendo, ista in appetendo, ad universale bonum ferri possunt, & internis cognitionis & amoris motibus veluti pennae ad ipsam volant, ut in ipso quiescant.

---

## CAPVT I.

*In quo actu consistat formalis beatitudo, cum Patria, tum via.*

**N**emo ambigit plures in beatitudine actus reperiri; cum enim per eam constituatur homo in statu bonorum omnium aggregatione perfecto, planum est in beatitudine facultates omnes bonis omnibus repleri, & ut ait Scriptura, inebriari ab ubertate domus Dei, & torrente voluptatis ejus potari. Quare restat inquirendum quidnam in tot operationum apparatu se habeat ut formale & essentiale, quid per modum comitantis, consequentis, & complementi, sive in beatitudine patriae, sive in beatitudine viae.

## SPECVLATIO I.

*Hæc est plena, & formalis beatitudo hominis videre faciem Dei sui.*

**H**anc veritatem totidem ferè verbis ex Augustino desumptam satis clarè indicat Scriptura. Joan. 17. *Hæc est vita æterna, ut cognoscant te solum Deum verum.* Visio etiam illa sæpe proponitur tanquam tota merces. Matth. 5. *Beati mundo corde, quoniam ipsi Deum videbunt.* 1. Joan. 3. *Cùm apparuerit, similes ei erimus* (subindéque beati) *quia viabimus eum sicuti est.* Joan. 17. *Pater quos dedisti mihi, volo ut ubi sum ego, & illi sint mecum, ut videant claritatem meam, quam dedisti mihi.* Quod benè noverat Philippus dum dicebat, Joan. 14. *Domine ostende nobis Patrem, & sufficit nobis.*

Subscribunt SS. Patres. Nazianz. orat. ad plag. grand. *Regnum Cælorum est contemplatio Trinitatis.* Ambros. lib. 2. de off. cap. 2. *Scriptura divina vitam beatam in cognitione posuit Trinitatis.* Chrysost. hom. 81. in Ioan. dicit beatos non participare gloriam Dei, sed videre; quia *omnis requies est filium Dei videre.* Cyrill. Alexand. lib. 3. cont. Jul. *Hominum felicitas est habere summam contemplationem.* Basil. const. monast. c. 19. *Contemplatio summi boni est thesaurus Angelorum.* Sed præcipuè sententiam suam ex Augustino Magistro suo deprompsit Angelicus Doctor. Quid enim apertius his verbis libri 1. de Trinit. cap. 8. *Hæc contemplatio promittitur nobis omnium actionum nostrarum finis?* Sed nihil planius, nihil evidentiùs istis lib. 83. qq. quæst. 35.

*Nemo beatam vitam novit, & miser est: hoc est eam nosse, quod habere. Quid est aliud beatè vivere, nisi aeternum aliquid cognoscendo habere? Aeternum est enim, de quo solo rectè fидitur, quod amanti auferri non potest; idque ipsum est, quod nihil fit aliud habere, quàm nosse. Omnium enim rerum praestantissimum est, quod aeternum est, & propterea id habere non possumus, nisi ea re quā praestantiores sumus, id est mente. Quidquid autem mentè habetur, noscendo habetur.*

Scio aliquos testimonia Scripturarum & Patrum hac in controversia fastidire, utpote quæ facile eludi possint dicendo significari solum beatitudinem formalem appellari visionem, quia ad eam præsупponitur. Unde inferunt recurrendum esse ad solas rationes metaphysicas, quibus unicè confidunt. Verum id sine ulla specie veritatis obtenditur. Cum enim expressissimè Scripturarum Patrumque conspiratio inculcet visionem esse totam mercedem, totum Sanctorum thesaurum, veramque & plenam beatitudinem constituere, profectò negari non potest visionem claram Dei ingredi essentiam beatitudinis. Cum enim tota Scriptura & Traditio ad hunc scopum unicum collimet, ut creaturas rationales ad ultimum finem verum dirigat, profectò dum tam constanter visionem Dei præmio laborum, & mundi cordis mercede proponit, illam pertinere ad beatitudinem nemo negare potest. Unde funditus evertitur sententia Scoti, quæ solum amorem amicitiae ad essentiam beatitudinis requirit, visionem excludit. Maximè (est eximii Magistri Joannis à S. Thoma ponderatio) quia Scriptura sacra à capite ad calcem nullibi unquam mentionem facit nisi visionis &



gaudii; nullibi meminit amoris amicitiae pro beatitudine nostra futura explicanda: Ergo dicere visionem non ingredi essentialem rationem beatitudinis formalis, est ut videtur, sacris literis contradicere; pertinuit enim ad sacram Scripturam, pertinuit ad Patres veram & propriam beatitudinis rationem non solum objectivam, sed etiam formalem indigitare, alias valde diminutè procederent. Cum ergo indicent solum visionem & gaudium, in alterutro, vel in utroque beatitudo essentialiter consistit. Ergo visio non debet excludi ab essentia beatitudinis, ut voluit Scotus.

Duplicem rationem nostrae sententiae tradit Augustinus loco antè citato, quam ex tanto Doctore derivavit S. Thomas. Prima continetur his verbis: *Quid est aliud beatè vivere, nisi aeternum aliquid cognoscendo habere?* Ex quibus sic formatur discursus: Beatitudo formalis consistit in assequutione & possessione Dei; in eo quippe essentialiter sita est beatitudo formalis, per quod essentialiter possidetur, & sit nostra beatitudo objectiva, quæ Deus est: possidetur autem Deus, dum illum Beatus assequitur, eique veluti centro conjungitur: Atqui creatura intellectualis perfectè possidet & assequitur Deum per actum intellectus, non verò per actum voluntatis: Ergo in sola operatione intellectus, scilicet clara Dei visione, sita est formalis beatitudo nostra. Probatur minor. Tum quia hæc est differentia inter intellectum & voluntatem, quod intellectus trahit res ad se, easque sibi præsentis efficit, vel secundum esse intelligibile, si cognitio sit rei aut absentis, aut materialis; vel secundum esse enitativum, si cognitio sit objecti

spiritualis intimè præsentis, qualis est Deus clarè visus. Voluntas verò non trahit ad se res, sed potius fertur in illas; nam *amor mens pondus meum, eo feror quòcumque feror*. Atqui trahere res ad se, easque sibi facere præsentis, est eas consequi & possidere; trahi verò, est possideri, vel potius impelli in rem amatam, ut ibi mens vivat ubi amat, non ubi animat.

Tum quia illa operatio est vera assequutio & possessio beatitudinis objectivæ, quæ ita Deum ponit in potestate ipsius Beati, ut ex eo omne commodum percipere possit, quod percipi potest, quia tunc Deus fit bonum nostrum: Sed per visionem Deus fit ita præsens Beato, & si dicere fas est, ita in ejus potestate constituitur, ut ex Deo omnia commoda, omnesque fructus percipere possit, quæ ex Deo percipi possunt; ex visione enim amor intensissimus, delectatio suavissima, potentiarum omnium perfectio cumulatissima continuo derivantur: ergo visione intuitiva verè Deum possidemus. Visio quidem auri, vel agri (ut occupetur tacita instantia) non est eorum possessio; benè tamen visio Dei. Tum quia ager, & aurum non per se, sed per emissam speciem uniuntur visui; Deus seipso illabitur. Tum quia, per solam visionem agri ager non ita fit præsens videnti, ut omnia sua commoda in intuentem derivet: Deus autem visus est omnia in omnibus, & singulis.

Tum quia per illam operationem Deum possidemus, per quam in eum intimè transformamur, & transformatione ei assimilamur: Atqui per solam visionem intimiùs in eum transformamur, sumusque Deiformes; ait enim Joannes: *Cum apparuerit similes ei erimus, quia* (at-

tende causalem) *videbimus eam sicuti est.* Ratio est, quia sola operatio intellectus est perfecta assimilatio cognoscentis cum re cognita; & ideo processio Verbi Divini est generatio, non verò processio Spiritus sancti, quia illa est assimilativa, ista impulsiva: Ergo actio intellectus per se tendit ad uniendum, & veluti identificandum cognoscentem cum re cognita: unde, teste Philosopho, *intellectus intelligendo fit omnia.* Quid autem intimius coniungitur cum alio quam quod per se tendit ut sit idem cum ipso? Ergo per visionem Dei clarè & sine specie visi Deum assequimur, & summo bono intimè coniungimur, & in eum veluti transfundimur. Pulchrè D. Thomas in 4. dist. 49. q. 1. art. 1. q. 2. *Per visionem Dei fit quasi quidam contactus Dei ad intellectum, cum omne cognitum sit in cognoscente secundum quod agnoscitur: & ideo ultimus finis hominis est in actu intellectus.*

Tum demùm, quia nullus ex actibus voluntatis potest habere rationem possessionis. Non desiderium, quod est de re absente nondum habita. Non delectatio, quæ bonum non possidet, sed possessum supponit, & de possessione gaudet. Non amor amicitiae, ut vult Scotus, quia abstrahit à bono præsentis & absenti, solùmque tendit in bonum amici prout est in se. Unde charitas viæ est vera amicitia erga Deum, ejusdem speciei cum illa quæ habetur in Patria, nam charitas nunquam excidit, & utraqus respicit idem objectum, & eandem formalem rationem objecti, nempe Deum summè bonum, & propter se amandum. Imò in quibusdam viatoribus major & intensior est charitas, quàm in pluribus Beatis, v.g. charitas B. Virginis longè charitati Angelo-

rum præstabat ; & tamen beata non erat Mater pulchræ dilectionis ante Deum clarè visum, quia nimirum Deum nondum possidebat. Ergo solus actus intellectus, non voluntatis, est summi boni possessivus. Scrutentur quantum libuerit Adversarii omnes actus voluntatis, omnesque eorum formalitates ; & in nullo invenient formalem rationem assequutionis objecti, quæ tamen est ratio essentialis & characteristica differentia formalis beatitudinis. Quia nimirum voluntas omnibus suis actibus non potest nisi velle objectum ; velle verò non est habere illud, quia ut solidè & lepidè ait S. Thomas hic, q. 3. art. 4. *Si consequi esset per actum voluntatis, statim à principio cupidus consequutus esset pecuniam, quando vult habere illam.* At verò clarè videre objectum sine specie ulla, est ipsum tenere & possidere.

Secundam rationem indicat Augustinus supra citatus, his verbis : *Omnium rerum præstantissimum est quod æternum est, & propterea id habere non possumus, nisi ea re, quâ præstantiores sumus, id est mente.* Sic ergo argumentor. Beatitudo formalis creaturæ rationalis est perfectissimus actus perfectioris potentia ; sicut enim ad beatitudinem formalem requiritur operatio, ut initio hujus dissertationis supposuimus : ita inter operationes illa censenda est beatificare, quæ perfectior est, cum beatitudo sit ultima hominis perfectio. Atqui intellectus est altior & nobilior potentia quàm voluntas. Tum quia intellectus respicit objectum abstractius, & immaterialius, & modo ampliori & abstractiori attingibile ; sic enim verum movet intellectum, ut possit omnia penetrare quæ sunt in objecto, in quocumque statu & conditione, tam existentia, quàm non

existentiæ, præscindendo, dividendo, componendo, discurrendo, in ordine ad se, & in ordine ad alia, & secundum omnes formalitates quæ in illo reperiri possunt. Ergo modo ampliori & eminentiori fertur intellectus in suum objectum, quàm voluntas, quæ ad singularia in individuo practicè tendit sub illo solum statu, quo possunt ipsam allicere. Nobilitas autem potentiarum ex perfectione objecti, atque ex perfectiore modo attingendi pensanda est. Tum quia intellectus est propinquior ipsi animæ, cum intellectus sit radix voluntatis; sicut enim inclinatio innata sequitur formam naturalem, ita appetitus intellectivus, qui est voluntas, sequitur formam apprehensam per intellectum; & deo Verbum est secunda persona, Spiritus sanctus tertia; quia prius naturâ procedit Verbum, quod in posteriori signo spirat amorem. Ergo perfectior est intellectus quàm voluntas, non solum quia radix & causa reduplicativè ut talis perfectior est germine, sed etiam quia tanto aliqua passio est perfectior, quanto est immediatior essentiæ, à qua fluit; quia sicut aquæ sunt in fonte puriores, ita res omnes uberiores hauriunt ex propinquitate principii perfectionem. Scio aliquem recentiorum Thomistarum istam rationem veterum omnium Thomistarum calculo probatam non admittere; sed de hoc speculatione sequenti.

*Solvuntur objectiones.*

Eodem planè modo arguunt contra nos Scoticæ, quo ipsos aggressi sumus: primò auctoritates accumulavit in favorem voluntatis: secundò asserunt voluntati competere rationem assensuæ: tertiò contendunt operationem vo-



luntatis esse operatione intellectus perfectiorē. Et quidem in explicandis autoritatibus non immorabor, quia ut antea observavimus, nulli-  
bi Scriptura meminit amoris amicitiae ad consti-  
tuendam beatitudinem, sed solius visionis, vel  
gaudii & delectationis, quā satiantur, & ine-  
briantur Sancti ab ubertate Domus Dei, cū  
apparuerit gloria Dei. Porro his testimoniis po-  
tius juuatur nostra sententia, quia gaudium non  
est nisi de bono præsente & obtento: Ergo sup-  
ponit assequutionem Dei per visionem naturā  
anteriorē. Nihil quidem certius, quā quod in  
beatitudine futurum est gaudium plenum; sed  
gaudium esse assequutionem summi boni, ac  
proinde beatitudinem formalem, ubi invenient  
Adversarii vel in canone Scripturarum, vel in  
traditione Patrum? Accedit, ideo Scripturas &  
Patres persæpe gaudii & fruitionis meminisse,  
quia loquuntur de beatitudine consummata, nu-  
meris omnibus & proprietatibus absoluta, sub  
qua ratione importat & gaudiū, & gloriam cor-  
poris, cū sit status omnium bonorum aggrega-  
tione perfectus. Adde rursus, quod sæpe sapius  
in eodem contextu, quo gaudiū assignant ad cu-  
mulum beatitudinis, semper visionem tanquam  
essentiam ejus insinuant, ut postquam Augustin.  
*lib. 10. Confess. cap. 22.* dixit: *Hæc sola est vita ætera-  
na gaudere ad te, de te, propter te,* subdit *cap. 23.*  
*Beata vita est gaudium de veritate.* Similiter  
*serm. 53. de tempore,* dum dicit: *Charitas est sum-  
mum premium in cælo, quia in perenni gaudio nihil  
gratius, nihil dulcius habent Sancti perfecto amore  
Dei;* quis non crederet ibi definitam sententiam  
Scoti, nisi subderet S. Doctor: *Quem quia præ-  
sentem vident, suavisius diligunt, dulcius fruuntur.*



Unde amor & fructio manifestè Deum visione præsentem & præobtentum supponunt.

Objiciunt Scotistæ ex secundo capite: Beatitudo formalis est adeptio, & assequutio summæ boni, & intima cum ipso unio: atqui talis adeptio & unio fit per actum amoris. Tum quia, teste Dionysio, *amor est virtus unitiva*, & teste August. 8. de Trinit. cap. 10. *amor est junctura quadam duo aliqua copulans, vel copulare appetens*. Unde amicus dicitur alterege. Et benè quidam dixit de amico suo, *dimidium anima sua*, inquit August. 4. Confess. cap. 6. Tum quia per illammet potentiam quâ tendimus ad bonum aliquod, illud assequimur, eique unimur: Sed voluntas tendit ad summum bonum, seu ultimum finem; sperando, amando, bonaque opera elicendo, vel imperando: Ergo voluntatis est assequi summum bonum.

Respondeo, per amorem fieri unionem affectivam, secl non effectivam, & realem conjunctionem, ad quam requiritur contactus, & approxinatio objecti, quæ fit per intuitivam visionem objecti sine specie uniti, non per amorem. Cujus signum habemus valde universale, nam generali inductione constat, non pertinere ad appetitum realiter acquirere, & sibi unire realiter objectum quod quærit, sed in illud pondere, si sit absens, vel in illo quiescere, si sit præsens. Id apparet in appetitu tam innato, quam elicitò. Nam elementa gravitate & pondere, vel levitate quærunt centrum, cui ubicatione conjunguntur; non enim gravitant vel levitant in propriis locis. Appetitus sensitivus animalis finem sensibilem concupiscit, nec acquirit per seipsum, sed sensu externo, tactu, gustu, visu, &c.

bono sensibili per facultates externas obtento ipse fruitur, ipse quiescit. Similiter ergo appetitus rationalis finem intelligibilem amat, quem tamen solo actu intellectus assequitur. Et ratio radicalis hujus doctrinae est, quia omnis appetitus creatus fertur in bonum ut conveniens subjecto: quod verò bonum sit conveniens, ipse non facit, sed supponit: Ergo sicut debet supponi conveniens ut appetat, ita debet supponi unitum, ut in eo quiescat; sicut enim praesupposita convenientia reddit objectum appetibile, ita praesupposita unio reddit suave. Ex quibus facillimè respondetur objectioni; nam Patres loquuntur de unione affectiva. Major verò rationis subjunctae est evidenter falsa.

Instabis: Beatitudo formalis est assequutio Dei sub ratione summi boni & ultimi finis creaturae; unde Moysi ad beatitudinem suspiranti dixit Deus: *Ego ostendam tibi omne bonum.* Atqui intellectus non attingit Deum sub ratione boni & ultimi finis, sed tantum sub ratione veri; bene tamen voluntas: Ergo non actu intellectus, sed voluntatis constituitur beatitudo formalis. Hanc rationem magni faciunt Scotistae, & putant eam esse demonstrativam.

Respondeo beatitudinem esse assequutionem summi boni, non ut moventis affectivè & sub ratione allicientis per modum finis (sub qua formalitate est objectum voluntatis; ) sed sub ratione boni praesentis, perficientis & realiter possessi, sub qua ratione pertinet ad objectum intellectus, qui possidet divinam bonitatem dum eam contemplatur. Et manifestè insto in bono sensibili; nam appetitus quaerit bonum delectabile: ergo ne propterea pertinet ad appe-

titum assequi bonum illud? Minimè gentium; ea etenim quæ appetitus desiderat, tactu, manu, contrectatione, gustu visu, non actu interiori assequitur: similiter voluntas desiderat homini summum bonum, sed illud non assequitur homo nisi intellectuali attractu visionis intuitivæ: bonum ergo est res quæ habetur, sed cognitio est veluti os creaturæ intellectualis, quo eibus cœlestis fœlicitatis assumitur ut gustetur, juxta illud: *Os justî meditabitur sapientiam.* Adverte etiam, Joannem Poncium Scotistam, rationem adductam in instantia uti debilem despiciere; quia cùm dicitur solum verum esse objectum intellectus, non significatur intellectum non respicere bonum; id enim apertè falsum est, aliàs non posset distinguere inter verum & bonum: nec voluntas posset ferri in bonum, cùm non feratur nisi in illa, quæ sibi ab intellectu proponuntur. Cùm etiam dicitur, bonum esse objectum solius voluntatis, non est sensus, solum voluntatem posse consequi bonum, & perfici ab eo; nam voluntas vult scientiam intellectui, sanitatem corpori, quæ omnia immediatè voluntas non percipit. Quæ si rectè penetres, faciliè penetrabis sophisma illius objectionis.

Urgebis: Sancti non solum ex inclinatione gratiæ desiderant videre Deum, sed etiam ipsum clarè visum amare. Ergo amore beatifico assequuntur quod optabant: ergo amor est assequutio, subindeque formalis beatitudo.

Respondeo, omisâ solutione eorum qui distinguunt inter primariam & secundariam inclinationem, aiuntque primariam inclinationem ferri ad veritatem, secundariam ad bonitatem: illam satiari formaliter, istam ex consequenti.

Cæterum hoc patitur difficultatem, quia sicut intellectus primario inclinatur ad veritatem, ita voluntas ad bonitatem: ex quo saltem sequeretur, ad rationem formalem beatitudinis ex æquo desiderari actum intellectus & voluntatis, ut intendunt Suares & Valentia. Dicendum ergo, quod licet justus in via non solum desideret videre Deum, sed etiam ipsum ut in se est amare; licet etiam justus amore amicitiae, quæ respicit bonum amari, ardentius optet Deum amare, quam videre; non tamen amore concupiscen-  
tiae, cujus solius satiativum est vera beatitudo, quia beatitudo est bonum nostrum: non sit autem nostrum per amorem amicitiae, quæ sæpe fertur in absentia, & quæ volumus bonum non nobis, sed amico; sed per contactum intelligibilem, quo implemur eo bono, quo præ-  
sente fruendum est.

Insistes: Actus amoris est magis amabilis voluntati, quam actus visionis; amor enim bene ordinatus magis amat quæ sunt magis propria, magisque intima. Ergo voluntas plus appetit amare quam videre: ergo amando magis assequitur quod optabat.

Respondeo actum voluntatis magis amari à voluntate absolute in ratione effectus sibi conjuncti, & sub munere appetendi, non verò sub munere conjungendi ultimo fini, ad quod non est aptus; sicut appetitus concupiscens colorem, sonum, vel saporem, magis quidem amat actum suum absolute, sed non pro munere videndi, audiendi, vel gustandi, ad quod magis diligit aurem, oculum & gustum, qui ad istas functiones aptiores sunt.

Obijciunt secundo Scotistæ: Voluntas est



perfectior potentia quàm intellectus : Ergo in amore voluntatis, non in visione intellectus fixa est beatitudo. Probatur antecedens : sex possunt assignari characteres nobilitatis potentiæ, objectum, efficacia, proprietates, actus, effectus, & oppositi deterioritas. Illa ergo potentia est nobilior cujus objectum est perfectius, cujus virtus est efficacior, cujus proprietates sunt digniores & illustriores aliis, cujus actus est nobilior, cujus effectus est præstantior, & cujus oppositum est deterius. Atqui objectum voluntatis est perfectius, cum sit ipsum bonum actuale & existens, quod idem est ac perfectum; eo enim aliquid est perfectius, quo est actualius; & ideo Deus, qui est perfectio per essentiam, est actus purus. Virtus etiam voluntatis est efficacior; nam voluntas cæteras potentias movet, ipsi etiam intellectui imperat : nobilior autem est imperare quàm subjici. Proprietas etiam voluntatis est nobilior, nimirum libertas, quæ fulget in anima sicut gemma in auro, ratione cujus habet dominium & in actus suos, & in actus aliarum potentiarum. Actus etiam charitatis est nobilior, nempe amor Dei super omnia; nam teste Paulo, major horum est charitas, quæ est vinculum perfectionis. Et ideo Ordo Seraphim est perfectior cæteris, quia excellit amore : & teste D. Thom. 1. part. q. 82. art. 3. licet cognitio eorum quæ infra nos sunt, sit perfectior amore eorum, tamen amor superiorum est melior eorum cognitione. Effectus etiam voluntatis est præstantior; nam à voluntate simpliciter denominamur boni vel mali, non ab ingenii præcellentia. Demum quod opponitur amoris Dei, qui est actus voluntatis, nempe odium Dei, vitiorum omnium

pestimum, & ipsa infidelitate deterius est. Ergo voluntas intellectu longè antecellit.

Respondeo hoc argumento probari quidem, voluntatem esse nobilem potentiam, sed minimè esse intellectui præferendam. Dicendum igitur ad primum, simili modo probatum iri, sensum esse perfectiorem intellectu, cum sensus ad singularia & existentia unicè feratur. Quare licet objectum voluntatis sit perfectius in ratione entis, non tamen in ratione objecti, & in modo immutandi potentiam. Præsertim quia intellectus attingit etiam existentiam, non quidem exercitam, sed signatam, id est sub ratione quidditatis; nam bonum est quoddam verum: unde totum quod attingit voluntas, universaliori, & altiori modo attingitur ab intellectu.

Ad secundum dicendum, quod licet voluntas moveat intellectum ad exercitium, ipsa tamen movetur ab intellectu quoad specificationem, quia proponit voluntati objectum & finem unde specificantur actus, qui sanè modus movendi eo est nobilior, quo altius est dirigere quam exequi. Videmus enim superiores artes dirigere opus, quod inferiores & ancillæ exequuntur. Per quod patet ad tertium; licet enim dominium formale, & libertas actualis sit in voluntate; origo tamen ejus est in ratione: unde dicitur liberum arbitrium, liberum propter voluntatem, arbitrium propter rationem, ut observat D. Bernardus. Quis autem neget radicem esse perfectiorem fructu, fontem rivo? Maxime quia amor Patriæ est etiam necessariùs, sicut visio; unde ei hac in parte non præminet. Nec libertas est semper perfectior necessitate, saltè in genere physico, aliàs perfectior esset Deus.



dum agit ad extra, quàm dum ad intra operatur.

Ad quartum respondeo, perfectissimum actum voluntatis non esse physicè perfectiorem perfectissimo actu intellectus, nempe clara visione, quanvis sit perfectior aliis actibus intellectus. Ad agnoscendam autem nobilitatem potentiae oportet comparare actus unius cum alia ex æquo, id est perfectissimum unius cum perfectissimo alterius, non cum aliis minùs perfectis, quos potest vincere actus potentiae inferioris. Sed de his operosiùs speculatione sequenti, ubi dicemus charitatem & amorem esse perfectiorem cognitione fidei; & ideo Seraphim, qui denominantur ab amore viæ, primum in Hierarchia Angelica occupant locum, & de hoc amore viæ loquitur Paulus, ait enim: *Fides, spes, charitas, tria hæc: major autem horum est charitas.* Et in hoc sensu loquutus est S. Thomas loco citato, q. 83. quamvis dici possit, ibi S. Doctorem seipsum accuratè explicuisse. Ibi enim ait, quod *simpliciter intellectus est nobilior, quàm voluntas; secundum quid autem voluntas invenitur interdum altior intellectu, ex eo scilicet, quod obiectum voluntatis in altiori re invenitur, quàm obiectum intellectus.* Sicut si dicerem, auditum esse secundum quid nobiliorem visu, in quantum res aliqua, cuius est sonus, nobilior est aliqua re cuius est color; quanvis color sit nobilior & simplicior sono. Et hoc modo ait amorem superiorem esse nobiliorem cognitione. Ubi S. Præceptor intendit solum amorem rerum superiorum magis dignificare & elevare hominem, quia fertur ad rem ut est in se; cognitio verò fertur ad modum suum, unde deprimat obiectum nobilius se: subindeque melius est, & utilius amare quàm

cognoscere Deum per fidem, sicut melius est audire suavissimum concentum, quàm videre vultum deformem, quanvis visio sit simpliciter & ex intrinseco modo potentia auditu dignior. Plura speculatione sequenti.

Ad quintum dicendum, bonam voluntatem reddere simpliciter bonum bonitate morali; sed contemplationem Dei clarè visi reddere simpliciter hominem bonum in ordine physico, qui tunc est perfectus quando obtinet centrum. Maximè quia voluntas non reddit bonum nisi ut subiecta regulis rationis, quas dum sequitur, bona est. Melior ergo est ratio; nam propter quod unumquodque tale, & illud magis. Ex quibus patet ad sextum. Nam licet odium Dei sit in ordine morali pessimum, in ordine tamen physico pessima est privatio visionis, quæ constituit damnationem malorum omnium abyssum, & summam miseriam. Certè hoc argumento probaretur actum cuiusvis virtutis moralis esse perfectiorem visione; nam malum culpæ etiam veniale est pejus in genere moris, quàm privatio gloriæ; & nullus est Sanctorum, qui si daretur optio, non eligeret carere visione, quàm in minimum peccatum labi.

Ex his refutata manet eorum sententia, qui ad essentiam formalis beatitudinis actum intellectus & voluntatis ex æquo requirunt. Cum enim actui voluntatis non conveniat ratio affectionis, quæ formalem beatitudinem constituit, non potest actus voluntatis essentiam formalis beatitudinis ingredi, sed tantum præcedere per desiderium, vel sequi per fruitionem. Item si formalis beatitudo est perfectissima operatio, nequit ex duabus integrari, quia cum

specie distinguantur, una aliam perfectione antecedit: imperfectior ergo non erit formalis beatitudo, quæ est operationum perfectissima, sicut beatitudo objectiva est bonorum omnium cumulativissimum.

## R E F L E X I O.

*Annuntiat de ex amico suo quod possessio ejus sit, & ad eam posse ascendere. Job 36. idest, ut exponit Gregorius lib. 27. Moral. cap. 8. De luce æternæ patriæ amico suo Deus annuntiat quod possessio ejus sit, ut nequaquam infirmitatis suæ fragilitate desperet; sed tanto certius sciat, quia illius lucis claritatem possideat, quanto nunc vitiorum pulsantium tenebras verius calcat. Ergo in possessione primæ lucis, quæ utique visione obtinetur, sita est ratio spei nostræ. Quàm dulce nuntium, quàm suave Evangelium, quod ad eam amicus Dei possit ascendere. Difficile id quidem videbatur homini in terra edito, fragilia membra gestanti, materia lutea corporato: sed postquam purus spiritus ad nos venit, & incarnatus est mirâ potentiâ, mirabiliore pietate, ima vilitatis humanæ ad summa suæ divinitatis assumet. Cujus cor in hujus pietatis admiratione non exsiliat? Cujus torpor in sublevatione tanta considerationis non expaviscat? Homo de terra editus, atque à cœlesti Patria exigentibus meritis longè damnatus, non solum ad statum conditionis reducitur, sed etiam gloriosius exaltatur: ut qui paradysum perdidit, cœlum recipiat, & usque ad celsitudinem contemplantia intima lucis ascendat, subdit Gregorius. Unde etiam statim subjungit Job: Super hoc expavit cor meum, & motum est de loco suo. Expavit per admirationem; motum est per conversionem. Nun-*

quam enim perveniet homo ad promissam possessionem, nisi post sinceram vitæ cordis mutationem. Quomodo autem mutetur de loco suo cor humanum, ut ad annuntiatam Dei per visionem possessionem possit ascendere, divinè explicat Gregorius cap. 9. sequenti. *Locus humani cordis est delectatio vitæ presentis. Sed cum divina aspiratione tangitur locus nostri cordis, fit amor æternitatis. Consideratione igitur æterna Patriæ de loco suo animus movetur, quia derelictis infimis, in supernis cogitationibus ponitur. Prius enim qua essent æterna nesciebat, in presentium delectatione torpuerat, simulque ipse transiens amore transeuntia tenebat. Sed postquam qua essent æterna cognovit, postquam superna lucis radios raptim contemplando contigit, admiratione summorum sese ab infimis suscitatus elevavit, ut nulla jam ei, nisi qua æterna sunt, libeant; & despectis transeuntibus, sola qua permanent, requirat.*

## SPECVLATIO II.

*Beatitudo supernaturalis via in amore Dei sita est.*

**H**anc assertionem expressè docet S. Doctor in expositione Cantici Canticorum, quam morti proximus, subindèque scientiâ consummatus, in Monasterio Fossienovæ, Ordinis Cisterciensis dictavit. Sic autem in illa verba, *Melliora sunt ubera tua vino*, scribit: *Notandum quod dulcedo quam sponsa Christi desiderat, potissimè habeatur secundum contemplativam vitam. Vita autem contemplativa secundum quod de ea loquuti sunt Theologi, & Philosophi, non accipitur unifor-*

miter: nam Philosophi finem contemplationis ponunt in sapere; ideo in 10. Ethic. ubi declaratur de felicitate, ostenditur operationem per actionem perfectam secundum speculationem esse felicitatem: nam speculari in sapientia secundum Metaphysicum est summa felicitas, quam posuerunt Philosophi. Sed contemplatio, ut de ea loquuntur Theologi, magis consistit in sapore quàm in sapere; & magis in dilectione & dulcedine, quàm in contemplatione. Et si invenitur studium litterarum aliquando pertinere ad contemplativam vitam, secundum Theologos, hoc est quantum per huiusmodi studium manuducimur in amorem Dei. Si ergo ad hoc studeas aliquis non ut adificet, & in dilectione Dei proficiat, cognoscat se vivere vitam contemplativam secundum Philosophos, & non secundum Theologos. Quæ verba sunt ita perspicua, ut ponderatione non egeant.

Antequam probemus ratione, sciendum quod beatitudo consistit in perfectiori operatione: perfectiori, inquam, tum in ratione assequutionis finis, tum absolute in ratione entis, ut præcedenti speculatione ostendimus. Utramque hanc conditionem apponimus, quia aliqui contendunt ex excessu entitativo unius operationis supra aliam non bene inferri unam esse præ alia beatitudinem formalem, nisi habeat rationem assequutionis; quia si per impossibile perfectissima operatio non esset assequutio ultimi finis, in illa formalis beatitudo non consisteret. Quæ quidem doctrina mihi semper displicuit. Tum quia non solum Thomistæ passim, sed etiam ipsemet D. Thomas sæpe probat beatitudinem futuræ vitæ consistere in cognitione & visione Dei, quia hæc est perfectissima operatio. Sic 1. part. quæst. 26. art. 2. *Beatitudo significat bonum*

*perfectum intellectualis naturæ. Id autem quod est perfectissimum in qualibet intellectuali naturæ est intellectualis operatio. Unde cujuslibet naturæ intellectualis creata beatitudo consistit in intelligendo. Et 1. 2. quæst. 3. art. 5. Si beatitudo hominis est operatio, oportet quod sit optima operatio hominis: optima autem operatio est, qua est optima potentia respectu optimi objecti: optima autem potentia est intellectus, & ideo ultima & perfecta beatitudo, qua expectatur in futura vita, tota consistit in contemplatione. Vides ergo S. Doctorem non solum ex ratione allequutionis, sed etiam ex præcellentia operationis statuere formalis beatitudinis rationem; & ideo invictè probat in visione futuram consistere beatitudinem, quia est & perfecta allequutio, & nobilissima operatio; proinde alterutra conditione deficiente, deficeret etiam perfectio beatitudinis. Quod potest hoc exemplo demonstrari: Si beatitudo consisteret in aliqua operatione sensibili, profectò magis consisteret in visione, quàm in tactu: optabilius enim est videre hortum amœnum, quàm manu vel pede contrectare, quanvis solus tactus illum realiter allequatur. Si verò daretur aliquod objectum, quod simul videndo allequeretur, & allequendo oculus videret, qualis est lux quæ sine ulla specie unitur potentiæ visivæ, tunc visio lucis beatitudinem sensibilem constitueret, quia est perfectior operatio, & simul allequutiva. Utrumque ergo requiritur ad essentialem rationem beatitudinis, & allequutio boni, & perfecta operatio circa illud, ita ut operatio quæ minùs habet de allequutione, minusve de perfectione, magis etiam à beatitudine formali recedat. Hoc præmissò*



Sic formatur ratio : Quanvis absolutè voluntas sit imperfectior intellectu , nec actui voluntatis conveniat ratio assequutionis ; tamen datur quidam actus voluntatis , nempe amor charitatis , qui est perfectior , magisque accedit ad rationem assequutionis & possessionis , quàm aliquis actus intellectus , scilicet actus fidei : Ergo in actu amoris , non actu fidei sita est beatitudo supernaturalis hujus vitæ. Antecedens est D. Thomæ 1.2. quæst. 66. art. 6. *Magnitudo virtutis secundum suam speciem consideratur ex objecto. Cum autem virtutes theologica respiciant Deum sicut proprium objectum , non potest una earum dici major ex eo quod sit circa majus objectum , sed ex eo quod una se habeat propinquiùs ad objectum quàm alia. Et hoc modo charitas est major aliis ; nam alia important quandam distantiam ab objecto ; est enim fides de non visis , spes autem de non habitis ; sed amor charitatis est de eo quod jam habetur , est enim amatum quodammodo in amante , & etiam amans trahitur per affectum ad unionem amati ; propter quod dicitur 1. Ioan. 4. Qui manet in charitate , in Deo manet , & Deus in illo. Ex quibus sic argumentor.*

Ille actus est perfectior non solùm in esse moris , sed etiam in esse physico , magisque habet rationem assequutionis , qui fertur in objectum modo perfectiori , eique propinquiùs unitur : Atqui amor charitatis fertur in objectum modo perfectiori ; nam charitas fertur in Deum ut est in se ; fides verò fertur in Deum prout cognoscitur per speciem creatam. Nam operatio intellectus ( inquit S. Doctor 2.2. quæst. 23. art. 6. ) *completur secundum quod intellectum est in intelligente , & ideo nobilitas operationis intellectualis*

attenditur secundum mensuram intellectus : operatio autem voluntatis, & cujuslibet virtutis appetitiva perficitur in inclinatione appetentis ad rem sicut ad terminum : idè dignitas operationis appetitiva attenditur secundum rem qua est objectum operationis. Ea autem qua sunt infra animam, nobiliori modo sunt in anima quàm in seipsis ; quia unumquodque est in aliquo per modum ejus in quo est, ut habetur in libro de causis. Qua verò sunt supra animam, nobiliori modo sunt in seipsis quàm in anima ; & ideo eorum qua sunt infra nos, nobilior est cognitio quàm dilectio ; sed eorum quæ sunt supra nos, & præcipuè dilectio Dei, cognitioni præfertur, & ideo charitas est excellentior fide. Ergo sicut Deus habet esse nobilius in se quàm in intellectu nostro per fidem cognoscente, ita amor viæ est physicè perfectior cognitione fidei.

Quod verò amor propinquius uniatur Deo, intimius eum possideat suo modo quàm actus fidei, subindeque magis accedat ad rationem assequutionis, peregreque probat & explicat idem Angelicus Doctor 2. 2. quæst. 27. art. 4. *Actus cognoscitiva virtutis perficitur per hoc quod cognitum est in cognoscente : actus autem appetitiva virtutis perficitur per hoc quod appetitus inclinatur in rem ipsam : & ideo oportet quod motus appetitiva virtutis sit in res secundum conditionem ipsarum rerum ; actus autem cognoscitiva virtutis secundum modum cognoscentis. Est autem ipse ordo rerum talis secundum se, quod Deus est propter seipsum cognoscibilis & diligibilis, utpote essentialiter existens ipsa veritas & bonitas, per quam alia cognoscuntur & amantur. Secundum hoc ergo dicendum est, quod dilectio, qua est appetitiva virtutis actus, etiam in statu viæ tendit in Deum primò, & ex ipso deriva-*  
tur

tur ad alia : & secundum hoc charitas Deum immediate diligit, alia vero Deo mediante. In cognitione vero est è converso, quia scilicet per alia Deum cognoscimus, sicut causam per effectus, vel per modum eminentia, aut negationis. Et quia statim sese offert difficultas, quomodo possimus Deum ut est in se immediate diligere, si Deum non immediate cognoscamus ; cum amor non feratur in Deum nisi prout cognoscitur, & eo perfectius Deus ametur, quo perfectius cognoscitur ; ideo hanc difficultatem præoccupavit in responsione ad 1. Dicendum ( inquit ) quod quamvis incognita non possint amari, tamen non oportet quod sit idem ordo cognitionis & dilectionis ; nam dilectio est cognitionis terminus, & ideo ubi desinit cognitio, scilicet in ipsa re qua per aliam cognoscitur, ibi statim dilectio incipere potest. Et ad 2. Quia dilectio Dei est majus aliquid, quam ejus cognitio, maxime secundum statum via, ideo præsupponit ipsam : & quia cognitione non quiescit in rebus creatis, sed per illas in aliud tendit, in illo dilectio incipit, & ideo per hoc ad alia derivatur per modum cujusdam circulationis, dum cognitio à creaturis incipiens, tendit in Deum, & dilectio à Deo incipiens sicut ab ultimo fine, ad creaturas derivatur. Qua doctrina nihil præclarius. Et hujus signum est, quod licet amoris unio de se non sit physica & possessiva, tamen Deum advocat, & facit ipsum realiter præsentem, quia amicitia vera & perfecta requirit convictum realem amicorum. Unde illud : Si quis diligit me, diligetur à Patre, & ad eum veniemus, & mansionem apud eum faciemus. Unde Gregor. hom. 30. in Evang. Qui mente integra Deum desiderat, perfectò jam habet quem amat ; neque enim quisquam posset Deum diligere, si eum quæ-

*diligit non haberet.* Quod sola fides non præstat, ut patet in fideli peccato mortali inquinato. Ergo in actu amoris, non in actu fidei sita est beatitudo hujus viæ, & in charitate est finis omnium operationum hujus viæ, ut docet S. Thomas 2. 2. *quæst.* 44. *art.* 1. Quod probat ex illo Pauli: *Finis præcepti charitas.* Hinc Augustinus docet amore Dei contineri veram religionem, quâ verum finem peccato perditum reeligimus, & ad eum pervenimus. *Ipsè* (inquit lib. 10. de Civit. cap. 4.) *fons nostra beatitudinis, ipse omnis appetitionis est finis, hunc eligentes, seu potius reeligentes; amiseramus enim negligentes. Hunc ergo reeligentes, unde Religio dicta perhibetur, ad eum dilectione tendimus, ut perveniendo requiescamus: ideo beati, quia illo fine perfecti.*

Dices: Fides etiam cum sit virtus theologica, habet Deum immediatè pro objecto: unde Theologia quæ derivatur à fide, per hoc distinguitur à Metaphysica, quòd ista à creaturis ascendit in Deum, illa à Deo descendit ad creaturas. Ergo fides immediatè attingit divinam veritatem cui innititur, & prius attingit quàm amor: Ergo primitus in actu fidei sita est beatitudo viæ.

Respondeo, in fide distinguendam esse rationem assensus, & rationem cognitionis. Ratio assensus immediatè quidem, id est sine ullo medio primæ veritati innititur: sed ratio cognitionis non immediatè Deum repræsentat, quia non habet propriam speciem ejus. Charitas autem immediatè attingit Deum, ibi incipiens ubi fides desinit, & ut loquitur Hugo Victorinus, *intrat dilectio ubi scientia foris est.* Quia nimirum ad rationem amoris per accidens se habet

quod amatum sit clarè vel obscurè cognitum, quia non fertur in cognitionem, sed in rem cognitam, quæ eadem est sive clarè, sive obscurè cognoscatur. Et licèt cæteris paribus tanto perfectiùs amemus, quanto perfectiùs cognoscimus, non tamen hoc provenit ex eo quod cognitio clarior faciat magis tendere amorem ad objectum ut est in se, sed quia facit tendere intensiùs.

Instabis : In illo actu consistit formalis beatitudo viæ, qui magis assimilatur formali beatitudini Patriæ; nam primum in unoquoque genere est mensura cæterorum, subindeque quod magis accedit ad illud primum, perfectiùs rationem illius participat. Atqui contemplatio supernaturalis fidei magis assimilatur formali beatitudini patriæ, scilicet visioni, cuius fides est expressio & vicaria; non verò amor. Ergo in contemplatione supernaturalis fidei sita est formalis beatitudo viæ. Unde D. Thomas q. 3. art. 5. disertè ait: *Ultima & perfecta beatitudo, qua expectatur in futura vita, tota consistit in contemplatione beatitudo autem imperfecta, qualis hic haberi potest, primò quidem & principaliter consistit in contemplatione, secundariò verò in operatione practici intellectus ordinantis actionem & passiones humanas.* Et D. Cyrillus lib. 3. contra Iulian. illud dictum Veritatis, Joan. 17. *Hæc est vita æterna, ut cognoscant te Deum verum,* intelligit de contemplatione viæ, dicens: *Nihil vera Dei contemplatione est pretiosius, quandoquidem nos summa beatitudinis facit esse participes.* Unde Dominus Iesus Christus loquens ad Patrem & Deum, qui in cælis est, inquit: *Hæc est vita æterna.*

308 Respondeo, actum fidei magis imitari visio-



nem beatam in ratione cognitionis, sed non in ratione assequutionis & unionis cum summo bono, in quo tamen consistit ratio beatitudinis formalis. Itaque actus intellectus & voluntatis possunt considerari dupliciter, tum secundum rationem intellectiois, tum secundum modum specialem quem habet quidam actus intellectus, vel quidam actus voluntatis. Primo modo actus intellectus sunt perfectiores actibus voluntatis, quia linea intellectualis est perfectior lineâ voluntatis quâ talis: sed secundo modo aliquis actus intellectus potest excedi ab actu voluntatis; sicut licet visio sit perfectior tactu in ratione communi sensitiva, tamen in ratione unionis tactus visioni præstare potest.

Ad authoritatem S. Thomæ dicendum, ipsum loqui de contemplatione prout contraponitur actioni, ut patet ex verbis subjunctis, & in argumento relatis; non verò prout contraponitur amoris charitatis, quæ est præcipua pars contemplationis, ad quam tendere debet omnis speculatio, quæ sine amore & unctione inanis est, & evanida occupatio, afflictio spiritus, & evisceratio mentis. Nam contemplatio secundum Theologos magis consistit in sapore quàm in sapere, ut ex D. Thomæ retulimus. In eodem sensu intelligitur S. Cyrillus; loquitur enim de contemplatione affectiva, prout distinguitur contra actionem, de contemplatione Magdalenæ, quæ est optima pars præferenda sollicitudini Martiæ. Vide quæ diximus tom. I. in secunda appendice ad dissertationem præambulam, ubi de commercio Theologiæ cum pietate.

Insistes: Species generis perfectioris antecellit cuicumque speciei generis inferioris; hac



enim ratione dicimus vermiculum esse perfectiorem cœlo : Sed actus fidei pertinet ad genus cognitionis, quod est perfectius genere volitionis : Ergo actus fidei est physice perfectior actu charitatis, subindèque in illo beatitudo viæ posita est.

Respondeo, maiorem esse universaliter falsam. Nam corpus incorruptibile est perfectius corruptibili; & tamen istud dividitur per differentias animati, viventis, & hominis, quæ longè præstantiores sunt differentiis cœlorum, quibus contrahitur genus corporis incorruptibilis. Et ratio est, quia genus est totum potentiale continens suas differentias non actu, sed potentia, ut dicitur in Logica, assimilaturque materia in ordine ad formas. Sicut ergo materia imperfectior potest actuari per formam perfectiorem, ut patet in materia sublunari, quæ est imperfectior cœlesti, & tamen nobiliori forma perficitur: ita similiter dicendum de genere respectu differentiarum, inter quæ non requiritur proportio æqualitatis, sed tantum habitudinis, qualis est inter materiam & formam.

### REFLEXIO.

Si in amore Dei hujus vitæ felicitas sita est: ergo qui non amat, miser est, anathema est, manet in morte. Sed amandus Deus non Judaïco ritu & externis tantum officiis, sed evangelico cultu in spiritu & veritate; non corpore tantum, sed potissimum in corde; non corde variis quasi amoribus distracto atque diviso, sed toto corde, tota anima, tota mente. *Ut omnes cogitationes tuas, & omnem vitam, & omnem intellectum in eum conferas, à quo habes ea ipsa qua confers. Et totam dile-*

*dilectionem tui & proximi referas in illam dilectionem Dei, quæ nullum à se rivulum duci extra patitur, cuius derivatione minuat, ait Augustin. lib. 1. de doctr. Christ. cap. 22. Hoc amore Deum possidemus, & jure dicimus cum Propheta Psal. 7. Domine Deus meus. Dominus per creationem: Deus per gubernationem: meus per amorem. Quàm beatus autem populus, cujus Dominus Deus ejus! Quàm fortunati illi, de quibus dicitur Jerem. 24. Et dabo eis cor, ut sciant me, quia ego sum Dominus: & erunt mihi in populum, & ego ero eis in Deum. Sed quàm rarus in terris (subdit Ambros. in Psal. 118.) qui potest dicere: Portio mea Dominus. Quàm rarior qui potest dicere cum sponsa: Tenui eum, nec dimittam: vel, Dilectus meus mihi, & ego illi. Ille mihi, quia benignus & misericors est: ego illi, quia amorem rependo. Ille mihi gratiam ex gratia: ego illi gratiam pro gratia. Ille meæ liberationi: ego illius honori. Ille salutis meæ: ego illius voluntati. Ille mihi, qui dilexit me, & tradidit semetipsum pro me: ego illi, qui est Deus cordis mei, & pars mea in æternum. Ille mihi, qui me sic amat quasi solam amaret: ego illi, quia si quæ amo, propter illum solum amo. Crede mihi, Lector, incumbamus dilectioni Dei. Quid proderit tam diuturna rerum meditatio, & speculationum defatigatio, nisi verum Dei interiorem, actuale, & supernaturalem amorem consequamur, tum in actu cum operibus conjunctum, tum in affectu: ardentem illum intelligo, tenerum, & plenum suavitatis, & abundantia quadam dulcedinis circumfluentem, cujus torrente in patria Sanctos inebriat Deus, & nunc in via quibusdam stillicidiis stillantibus super terram, & unda cœlestis rivulis.*

nonnunquam religiosas solatur animas, & spiritus pinguedine reficit. Porro si magna miseria est Deum non amare, quid erit docere, homines Christianos ad amorem Dei non teneri? Quis ante aliquot annos præceptum amandi Dei, tam clarè, tam significanter expressum, tam horrenda novitate ludificatus fuerat, quæ vix audita credi potest? Libenter cum Augustino 3. *contr. Parmen. cap. 4.* scripserim: *Va cecis ducentibus, va cecis sequentibus!* Sed benedicta sit Ecclesia Catholica, & terque quaterque beatus sit Alexander VII. qui tantam blasphemiam semel, iterum, & tertio compressit. Næ hic unus error omnium sæculorum præcedentium virus complectitur, futurorum præoccupat iniquitatem, possibilem superat horrorem. Non habent jam quo crescant flagitia doctrinæ, si ista toleretur. Ad hoc summum errorum fastigium meritò summa Sedes, meritò tota Ecclesia cohorrui. Non immorabor hoc loco pluribus, idem argumentum aliquando rerum latius prosequuturus. Sed ad propositum redeuntibus ploremus tempus quod in amando Deo non insumpsimus, cujus tamen amore in hac vita beamur. Relege præclarum locum Pici Mirandulani in fine tomi primi relatum, cui istum Augustini connecte extract. 10. in epist. Joan. *Quid tibi jubet Deus? Dilige me. Aurum diligis, quesiturus es aurum, & fortè non inventurus. Quisquis me querit, cum illo sum. Amaturus es honorem, & fortè non perventurus. Quis me amavit, & ad me non pervenit? Patronum vis facere, aut amicum potentem ambis, per alium inferiorem? Me ama, non ad me ambitur per aliquem, ipse amor præsentem me tibi facit.*

## SPECVLATIO III.

*Beatitudo Christiana in tribulatione & cruce potissimum percipitur.*

**H**anc veritatem, quæ statim paradoxum videtur, expressit Salvator *Matth. 5.* ubi legem Evangelicam promulgare incipiens, sapientissimè à Beatitudine inchoavit, quia in actionibus humanis primum principium est finis, ex quo ratio actionis & operis sumitur; beatitudo autem est actionum & laborum nostrorum omnium finis. Sic autem exorsum est Verbum caro factum: *Beati pauperes spiritu, beati mites, beati qui lugent, beati qui esuriunt & sitiunt iustitiam, beati misericordes, beati mundo corde, beati pacifici, beati qui persecutionem patiuntur propter iustitiam.* Mirum profectò beatitudinis genus, & cui ægrè fidem daret animalis homo, nisi ipsum Veritas propalasset. Observarunt autem Patres & Interpretes, quinque ex sex beatitudinibus intermediis promississe Christum mercedem in vita futura, primæ tamen, id est paupertati spiritus, seu humilitati, beatitatem præsentem spondidisse. *Beati, inquit, pauperes spiritu, quoniam ipsorum est regnum cælorum.* Et similiter Octavæ, *Beati qui persecutionem patiuntur propter iustitiam, quoniam ipsorum est regnum cælorum.* Et non tantum in spe, sed in re, ait Anselmus. Unde subdit Veritas: *Beati estis (pondera tempus præsens) cum maledixerint vobis homines, & persecuti vos fuerint, & dixerint omne malum.* Vides quàm diversæ sint cogitationes Dei & hominum, viæ Domini, & viæ nostræ. *Inde incipit*

*Beatitudo iudicio divino, ubi arumna aestimatur humano, inquit Ambros. lib. 1. de offic. cap. 16.*

Ut autem probetur hæc momentosa & plena solatii speculatio, considerandæ sunt tribulationes, quibus tota nostra vita contextitur ( nam *triplici morbo laborat genus humanum, principio, medio, & fine*, ut ait D. Bernard. ) Considerandæ, inquam, sunt non oculis carnis, sed spiritus; non oculis Paganorum, sed Christianorum, ut ait Augustin. in Psalm. 56. *Intendite, fratres mei, Christianos oculos habete, nolite habere oculos Paganorum.* Fides enim quanvis sit obscura, est tamen valde oculata, quia est expressio scientiæ Beatorum; unde eam vocat Guillelmus Parisiensis *crepusculum gloria.* Unde in tribulatione patienter tolerata reconditam percipit suavitatem & felicitatem, quam animalis homo non percipit: hoc posito,

Probatur speculatio: Triplex est nota verū boni, ut post Platonem docet S. Dionysius, nimirum quod sit *à bono, per bonum, in bonum.* Id est, debet procedere à bono principio, quia arbor mala non potest bonos fructus facere; debet transire per bonum medium, quia sæpe aqua pura in fonte, in decursu inficitur & sordidatur; debet tendere in bonum finem, & ad eum perducere; quod enim in malum proclive est, bonum esse non potest. Atqui triplex hæc conditio in tribulatione pro Christo patienter tolerata invenitur. In primis tribulatio est à bono, Deo scilicet, qui affligi Sanctos sinit, non impotentiâ, cum ejus virtus sit infinita; non incuriâ, cum nec unus passer cadat in terram sine voluntate ejus; non odio, nam diligit omnia quæ sunt; & nihil odit eorum quæ fecit; non invidiâ, nam

Deus charitas est; sed sincera dilectione, quia quos diligit, castigat & corripit, ut virtutis materiam amplissimam suppeditet. Hac de causa præcepit Dominus Abraham, ut filium in monte dissito immolaret, ad quem non nisi post tres dies perveniret. *Ut dum ambulat* (inquit Orig. homil. 8. in Genes.) *dum iter agit, per totam viam cogitationibus discerpatur, ut hinc perurgente præcepto, hinc verò unci affectu obluante crucietur. Propterea ergo etiam via iungitur, etiam montis ascensio, ut in his omnibus spatium certaminis accipiat affectus & fides, amor Dei, & amor carnis, presentium gratia, & expectatio futurorum.* Hinc Sancti pressuras tanquam præcipuam propensæ voluntatis Dei significationem accipiebant; quia sicut virga Moyse in terra ut serpens repebat, in manu Prophetæ miracula patrabat; & sicut quidam pisces Bæticæ in aquis aureum, extra aquas solitum colorem præ se ferunt: sic adversitas in seipsa amara, in corde vel in manu Dei considerata suavissima est. Hinc Sanctus Job in sterquilinio volutans consolatus exultabat: *Si bona suscepimus de manu Domini, mala autem quare non suscipiemus? Quia nimirum infirmitates, dolores, calumnias, persecutiones, nec in ipsis, nec in causis secundis infensis contemplantur Sancti, sed in causa prima, scientes cum Prophetæ, quod ignis, grando, nix, glacies, spiritus procellarum faciunt verbum ejus.* Et illud August. in Enchir. cap. 93. *Non fit aliquid, nisi omnipotens fieri velit, vel sinendo ut fiat, vel ipse faciendo.* Et illud ejusdem, quod refert Proseper. sent. 58. *Nihil fit visibiliter & sensibiliter, quod non de visibili & intelligibili summi Imperatoris aulam aut iubeatur, aut permittatur.*



His de causis, Lector, eodem modo te gere ac infirmus, cui adhibentur hirudines, seu sanguisuga. In huiusmodi appositione non considerat appetitum animalculi sese sanguine saturantis, sed benignam applicantis medici voluntatem. Inimicus homo fortunas tuas direptione exinanivit, iniquis litibus intentatis persequitur, falsis criminationibus infestat, plagis omnibus contudit: ne respicias hanc harpiam, vel sanguisugam; intende in cælum oculos, & paternum divini medici cor intueri, & in eo veluti in speculo cernes consilia amici fingentis se esse inimicum, juxta illud Jerem. 2. *Tetendit arcum suum velut inimicus*, qui mortificat ut vivificet; percutit ut sanat, affligit ut compellat nocentem, erudiat ignorantem, protegat infirmantem, excitet torpentem, roboret pugnantem, humiliet superbientem, purget poenitentem, perseverantem coronet.

Secundò tribulatio transit per bonum, quia per Christum veluti canale ducta dulcescit, & consecratur. Ut hanc solidè profundam Theologiam penetres, considerato cum Card'nali Cajetano 3. *part. quest. 46. art. 5.* quod Verbum Divinum sibi uniens humanitatem, totum universum extulit, quia aliquid omnis creaturæ est homo, qui ideo compendium, & horizon mundi, imò & parvus mundus dicitur, subindeque omnes mundi partes in homine sublimatae sunt, non secus ac Rex puellæ nubens totam familiam illustrat & attollit. Porro homo non solum est epilogus perfectionum universi, sed etiam nissiarum ejus summa, & veluti *elixir*; & ideo appellatur à Propheta, *universa vanitas omnis homo vivens*. Est enim obnoxius peccato Angelorum,

mobilitati cœlorum, corruptioni mixtorum, mortalitati plantarum, dolori animalium. Verbum autem assumpsit omnes humanos defectus, solâ exceptâ culpâ & ignorantîâ. Ergo cæteras misérias, ut egestatem, dolorem, mortem assumendo inauguravit, consecravir, deificavit, & ut ait Damasc. lib. 3. fid. cap. 20. *Omnes itaque accepit, ut omnes sanctificet.* Tertullian. apolog. 12. ut probet Martyres per tormenta consecrari & deificari, ait: *Solacium poenarum est, quod eadem patiantur Dii vestri ut fiant. Ungulis deraditis latera Christianorum: an in Deos vestros per omnia membra validius incumbunt a scia, & runcina, & scobina? Ignibus urimur: hoc & illi à prima quidem massa in metalla damnantur: Ergo qui puniuntur consecrantur, & numina erunt dicenda supplicia.* Quantò majus nobis solacium poenarum est, quod eadem passus sit Deus verus, quæ nos persequimur.

Illustratur hæc veritas. Per Incarnationem mirabile commercium initum est; nam sicut Deus factus est homo, & homo Deus: sic virtutes divinæ factæ sunt humanæ, & passiones humanæ factæ divinæ mirabili illa idiomatum communicatione suo loco explicanda. Sic fortitudo Dei ita debilis facta est, ut Deus-homo sit mortuus: infirmitas verò humana tam fortis evasit, ut principem mundi hujus foras eiecerit. Divitiæ Dei in tantam paupertatem commutatae sunt, ut Filius hominis non haberet ubi caput suum reclinarer: cunæ nascentis præsepe fuit, lectus morientis crux: paupertas verò hominis ab omnibus copiis tam luculenter parata: & instructa fuit, ut in ipso absconditi sint omnes thesauri sapientiæ & scientiæ Dei. Felicitas De-

in tantam miseriam conversa est, ut homo-Deus merito vir dolorum dictus sit : & miseria, calamitatesque humanæ ita suaves factæ sunt , ut in persona Christi dicat Psalter : *Converisti plantum meum in gaudium mihi ; concidisti succum meum , & circumdediti me lætitia.* Et ratio est, quia Christus quæcumque assumpsit , quæcumque tetigit , consecravit : hinc est quod aqua & panis sine prævia benedictione possunt esse materia Sacramenti, illa Baptismatis, iste Eucharistiæ ; secus verò oleum vel chrisma, quod prius debet esse ab Episcopo benedictum, quàm possit esse materia Confirmationis, Ordinis, vel Extremæ-unctionis. Unde hoc ? Quia Christus tactu mundissimæ carnis aquas Jordanis, & panem in ultima cœna, consecravit ; oleum verò tetigisse non legimus. Atqui nihil proximius tetigit Christus quàm crucem, nihil intimius sibi univit quàm dolores ; nam à planta pedis usque ad verticem non erat in eo sanitas. Ergo crucem & tribulationem potissimum sanctificavit, & bonam effecit. Quod considerans Andreas exclamabat : *O bona crux ! diu desiderata , &c.*

Quin etiam tribulatio non solum bona , sed etiam suavis per Christum facta est , juxta illud præclarum Hieronymi epist. ad Oceanum : *Felle & aceto potatus est, ut in nobis jam nec fellis amaritudo , nec aceti esset asperitas.* Hinc Propheta comparat Christum unicorni. Sciunt cosmographi numerosam serpentium multitudinem. Libyæ fontes & stagna inficere. Cætera animalia venenum naturali instinctu præsentientiastant juxta fluentia, & siti adusta bibere non audent, donec veniat moneceros aquas purgans, & continuo non solum largius bibunt, sed & co-

pus totum immergunt. Peccatum protopararentum, & sibilus antiqui serpentis aquas tribulationum affuso veneno & amarore, gustatu ita fecerat injucundas, ut nemo vellet bibere: at postquam Verbum incarnatum potatum est aceto, & ut loquitur Apostolus Hebr. 9. *pro omnibus gustavit mortem*, jam Sancti juxta Moysis Prophetiam, Deuteron. 33. *inundationes maris quasi lac sugunt*. Quia sicut aqua maris per subterraneos ducta meatus salcedinem perdit, sic & tribulatio amaritudinem, dum per Christum fluxit, amisit. Sicut enim ejus mors vivificavit nos, sic ejus & trepidatio robustos, & mœstitia lætos, & tædium alacres, & turbatio quictos fecit, & desolatio consolatos.

Hinc Laurentius tristis quòd non moreretur cum Sixto, sublevatus fuit dum audivit: *Majora tibi debentur pro Christi fide certamina*. Quod meritò suspicit August. tract. 27. in Joann. dicens: *Qua consolatio ista?* Hinc S. Ignatius Martyr, Beatus Dominicus, & alii sexcenti sitiebant martyrium, sicut desiderat cervus ad fontes aquarum, quia à tempore passionis Christi, ut ait S. Leo, *Crux omnium est fons benedictionum*, per quam credentibus datur virtus de infirmitate, gloria de opprobrio, vita de morte. Amandus prorsus talis medicus, qui amaritudinem medicinæ bibendo abstulit, ut non nisi suavitatem infirmus inveniret. Hac de causa in mediis tormentorum carnificinis stabant Martyres & triumphantes; in laboribus, vigiliis, jejuniis Confessores; imò & delicatæ Virgines, aut mori, aut pati anhelantes non modò fortiter, sed alacriter. Unde hoc? Unde tantum prodigium, tam animalì hominì incredibile? Non faciebat hoc stupor, sed amor.

non amittebatur sensus, sed perfusus cœlesti delectatione submittebatur; non deerat dolor, sed victrici delectatione superabatur. Igitur si tribulationem patimur, si aporiamur, si deficimus, recogitemus eum qui talem pro nobis sustulit adversus semetipsum contradictionem, ut non fatigemur animis nostris deficientes: & Christo in carne passo, eadem nos cogitatione armemur. Nam nobiscum est in tribulatione, & carni infirmæ & murmuranti dicit, quod olim B. Petro Martyri: *Et ego Petre quid feceram?*

Tertiò deiniùm tribulatio tendit in bonum, Nam sola est arcta via quæ ducit ad vitam: & ideo Apostolus Rom. 5. inculcat: *Gloriamur in spe gloria filiorum Dei: non solum autem, sed & gloriamur in tribulationibus, scientes quoniam tribulatio patientiam operatur, patientia autem probationem, probatio verò spem, spes autem non confundit.* Miram gradationem! Totidem verba, totidem documenta, quæ tuæ meditationi expendenda relinquo. Certè si oportuit Christum pati, ut intraret in gloriam suam; si caput regnare noluit, inquit August. neque levare sursum corpus nisi per tribulationis viam, non speremus meliorem viam: quâ præcepit, eamus; quâ duxit, sequamur: si enim à vestigio ejus aberraverimus, perimus. Ne nobis perperam blandiamur: nemo potest transire à deliciis in deliciis: qui in labore hominum non sunt, in labore profectò dæmonum erunt, jait S. Bernard. Non potest quis, inquit August. in hoc seculo & in futuro gaudere; sed unum necesse est ut perdat, qui alterum voluerit possidere. Et ideo Abraham dicebat diviti epuloni, Luc. 16. *Fili recordare quia bona recepisti in vita tua, & Lazarus similiter mala. Nunc autem*



*hic consolatur, tu verò cruciarius. In quæ verba Gregor. homil. 40. ait: Ista sententia pavore potius indiget, quàm expositione.*

Dices: Beatitudo & miseria, felicitas & calamitas è diametro oppònuntur: Ergo. tolerantia: adversitatum non potest constituere beatitudinem Christianam.

Respondeo adversitatem in se & nudè sumptam non posse constituere felicitatem, sed unctiōe divina conditam, & amore Dei lævigatam esse istius vitæ maximum bonum, honestum, utile, & delectabile: honestum quidem, quia nihil gloriosius quàm pati pro gloria Dei; nihil honorificentius, quàm sequi Christum: utile verò, quia si compatimur, & conregnabimus: delectabile autem, quia in eo quod amatur, non laboratur; aut si laboratur, & labor amatur. Cujus signum est, quod Sancti pati volunt, & in tribulatione gaudent, quoniam digni habiti sunt pro nomine Jesu contumeliam pati. Hanc rationem præclare illustrat Salvian. lib. 1. de provident. Sancti quàmlibet videantur ignorantibus esse miseri, non possunt tamen esse aliud quàm beati. Superfluum autem est ut eos quispiam vel infirmitate, vel paupertate, vel aliis istiusmodi rebus existimet esse miseros, quibus se illi confidunt esse felices. Nemo enim aliorum sensu miser est, sed suo; & ideo non possunt cujusquam falso judicio esse miseri, qui sunt verè sua conscientia beati. Nulli enim, ut opinor, beatiore sunt, quàm qui ex sententia sua, atque voto agunt. Humiles sunt Religiosi, hoc volunt: pauperes sunt, pauperie delectantur: sine ambitione sunt, ambitum respuunt: inhonori sunt, honorem respuunt: lugent, lugere gestiunt: infirmi sunt,



infirmirate lætantur. Itaque quidquid illud fuerit, quicumque verè Religiosi sunt, beati esse dicendi sunt; quia inter quàmlibet dura nulli beatiore sunt, quàm qui hoc sunt quod volunt: soleant quanvis esse nonnulli, qui turpia atque obscœna sectantes, etsi juxta opinionem suam beati sunt, quia adipiscuntur quod volunt; re tamen ipsa beati non sunt, quia quod volunt, nolle debuerant. Religiosi autem hoc cunctis beatiore sunt, quia & habent quæ volunt, & meliora quàm quæ habent omninò habere non possunt. Labor itaque, jejunium, & paupertas, & humilitas, & infirmitas non omnibus sunt onerosa tolerantibus, sed tolerare nolentibus. Sive enim gravia hæc, sive levia, animus tolerantis facit. Nam sicut nihil est tam leve, quod ei non grave sit qui invitatus facit; sic nihil est tam grave, quod non ei, qui id libenter exequitur, leve esse videatur.

### REFLEXIO.

Audiant, quæso, inimici crucis Christi, qui terrena sapiunt, & quorum Deus venter est: nec putent se esse felices, quia quod malè volunt, consequuntur. Nam velle quod non decet, miserimum est: nec tam miserum est non adipisci quod velis, quàm adipisci velle quod non oporteat. Quàm dolendum quosdam sic à Deo esse desertos, ut ipsis in infelicissimis consiliis tam felicibus eventis uti sinat! Nihil ista eorum felicitate miserius, nec invideri ipsis potest, nisi ab eo qui veram felicitatem ignoret. Vivere omnes beatè volunt, sed ad discernendum quid sit quod beatam vitam efficiat, terreni homines caligant. Felicitatem longo studio, sed irritò la-

bore quærunt, quia omnes mundi viæ devia quædam sunt, quæ eò perducere non valent, quò se perductura falsò promittunt. Oculata sanè, & valdè artificiosa Ethica Christiana, quæ felicitatem ibi invenit, ubi mundus miseriam arbitratur. Stoïco supercilio dicebat olim Seneca epist. 85. *Sapiens est artifex domandi mala: dolor, egestas, carcer, ignominia, exilium, & cætera horrenda, cum ad hunc pervenere, mansueta sunt. Quid miraris, si uri, vulnerari, alligari juvat? Aliquando etiam libet.* Hæc quidem Ethnicus effutiebatur, sed ad praxim minimè redigebat. *Præclara verba*, inquit Ambros. epist. 7. *verbatimamen.* Sola Religio Christiana plus facit, quàm fabula finxit, quamve arrogans Stoïcorum bucca crepuit. Sola etiam in catenis, atque suppliciis beatitudinem vel invenit, vel infundit. *Si enim* ( inquit Salvian. antè laudatus ) *à quibusdam nunc etiam sapientibus viris miseri non putantur, qui nullos laboris sui fructus nisi ex præsentis tantum laude capiebant, quanto magis religiosi ac Sancti viri miseri non putandi sunt, qui & præsentis fidei oblectamenta capiunt, & beatitudinis futura præmia consequentur.* Porro advertant spirituales illi ( si superis placet ) rectores, qui nolunt loqui nisi placentia, & crucem Christi evacuantes, delicias corporis cum pietate Spiritus sociare nituntur. Et tamen viri Sancti mortificationem Jesu in corpore suo circumferentes, infirmi esse volunt. *Quia si fortes fuerint, Sancti esse vix possunt*, inquit idem Salvianus. Corpus suum cum Apostolo castigant, & mentis subjiciunt servituti, ne reprobi efficiantur. Si infirmitatem corporis appetendam sibi etiam Apostolus putat, quis sapienter evitat? Si fortitudinem carnis Apostolus me-

tur, quis rationabiliter fortis esse præsumit? Legimus Timotheum carne infirmissimum fuisse; quemque etiam ipse Apostolus Paulus, licet nimis jam infirmitatibus laborantem, non tamen nisi pauxillum vini sumere ac delibare permisit: hoc est, ita cum voluit infirmitati suæ consulere, quod noluit tamen ad fortitudinem pervenire. Et ratio est, quia caro immodicis distenta blanditiis, & nimis deliciis affluens, concupiscit adversus Spiritum. Quod si repugante exundantis voluptatis fortitudine, quæ optamus facere non possumus, infirmandum nobis est carne, ut optata faciamus. Infirmitas autem carnis vigorem mentis exacuit, ut mortificatis membris, affectisque artubus, vires corporum in virtutes transferantur animorum, ut non turpibus flammis medullæ æstuent, ut mentem latentia concupiscentiæ incentiva non succendant, ut non vagi sensus per varia oblectamenta lasciviant; sed sola exultet anima, lata corpore infirmo, quasi adversario subjugato. Hæc ferè omnia Salvianus.

---

## CAPVT II.

### *Prerogativa, & proprietates Beatitudinis.*

**O**Cto sunt beatitudinis gradus. Primus est Iustorum, qui inter vitæ hujus ærumnas hinc timore perculsi, hinc spe allekti, absque certitudine perseverantiæ vivunt. Secundus est is

quem habuere in Paradiso Protoplasti ante peccatum, quemve semoto peccato habuissent posterius. *Quàm felices erant*, inquit August. lib. 14. de civit. cap. 10. *primi homines? Nullis agitabantur perturbationibus animorum, nullis corporum ladebantur incommodis.* Hoc gradu potiebantur etiam Angeli in statu viæ, tametsi eo perfectius, quo natura angelica longè præstat humanâ. Tertius gradus est justorum habentium revelationem de salute, cujus securi sunt. Quartus est ille quem habent Enoch & Elias, non solum justitiâ præditi, securitate quieti, sed etiam à miseriis omnibus immunes. Quintus est animarum Purgatorii, quæ in mediis flammis non solum justitiâ habent & securitatem, sed etiam consummatunt finalem agonem, solveruntque terribilissimum debitum mortis, cui adhuc Enoch & Elias obnoxii sunt, nec constat utrum ad statum mortalitatis reversi immunes futuri sint à noxa veniali, quam non tollit confirmatio in gratia. Sextus est gradus ille quem habebant olim Patres in sinu Abrahamæ, seu limbo, qui supra animas Purgatorii addebat à pœna temporali immunitatem. Septimus est animarum beatarum nondum corpori reunitarum, fruuentium quidem Deo, sed beatitudine accidentali corporis orbatarum. Octavus est eorum, qui resumpto corpore immortalitate donato consummatè beati nihil ultra desiderant, sed suaviter cantant: *Cor meum & caro mea exultaverunt in Deum vivum.* De proprietatibus sex priorum graduum non agimus in præsentia, de octavo verò plenius agemus in fine Theologiæ, ubi quæ S. Doctor in Supplemento edisserit, exponemus; sed de proprietatibus septimi gradus agendum est, quæ



sunt potissimum tres, perpetuitas, impeccabilitas, & felix Dei amandi necessitas.

## SPECVLATIO I.

*Perpetuitas est per se & ab intrinseco  
annexa beatitudini.*

**H**Anc veritatem perspicuè tradit Scriptura, quæ beatitudinem nostram vocat, *hereditatem incorruptibilem, incontaminatam, immarcescibilem, vitam æternam, gaudium quod nemo tollet.* Ut patet 1. Petr. 1. Matth. 25. & Joan. 22. *Nullum enim modo esse poterit vita veraciter beata, nisi fuerit sempiterna,* inquit August. lib. 15. de Trinit. cap. 8.

Probatur ratione: Beatitudo formalis est visio Dei assequens summum bonum, satians & implens omne animæ desiderium, ut ex dictis constat: Atqui visioni & assequutioni summi boni ab intrinseco convenit perpetuitas, & per se connaturaliter repugnat corruptibilitas. Visioni quidem quæ non potest cessare ex voluntate videntis, qui percipit in illa visione sitam esse suam ultimam felicitatem, ac proinde tam non potest illam respuere, quàm non potest velle non esse felix: & impossibile est quod aliquis à bono quo fruitur, velit discedere, nisi propter aliquod malum quod in fruitione illius boni apprehenditur. Quodnam autem malum apparere potest in visione illa quæ est consummatio omnis desiderii, possessio summi boni, conjunctio fonti totius bonitatis, vita æterna, & operatio attollens hominem ad modum agendi divinum. Nec in

eius duratione potest esse fastidium, quod accidit solum propter hoc, quod res, quâ prius aliquis delectabiliter fruebatur, immutationem faciat in re, corrumpendo vel debilitando virtutem ipsius. Unde post longam, vel vehementem meditationem fastidium patimur, quia potentia sensitivæ organis addictæ, à quibus pro hoc statu pendet intellectualis operatio, fatigantur; divina autem substantia non corrumpit, sed perficit intellectum, nec ad ejus visionem concurrunt aliquis actus qui per organa corporalia exerceantur. Non potest etiam cessare visio ex parte Dei, qui nunquam recedit à nobis, nisi nos recesserimus ab ipso, cum ejus dona sint sine pœnitentia, qui nunquam infligit pœnam, & tantam pœnam qualis est privatio Dei visi; nisi præcedat culpa, juxta Augustini communem doctrinam, cui præcinuerat Tertull. lib. 2. cont. Marcion. *Deus ex seipso bonus est, ex nobis justus: prior est bonitas Dei secundum naturam, posterior se veritas secundum causam: illa propria, hæc accommodata: illa edita, hæc adhibita.* Nullum autem peccatum committi potest à vidente Deum, ut postea ostendemus. Nullum denique assignari potest principium naturale corruptivum visionis, quæ cum sit actionum creaturarum perfectissima, nulla potest creata potestate dissolvi; & cum perfecte compleat totam intellectus beati capacitatem, totamque ejus satiet & impleat potentiam, nulla prorsus rimula est, per quam subintrare possit corruptio. Sicut quia forma cœlorum totaliter replet materiæ appetitum, nulla potest naturali causa corrumpi.

Perpetuitas etiam per se convenit assequutioni summi boni, quæ talis esse non potest nisi



justis desideriis satisfaciat ; cum enim voluntas sit appetitus boni , tandiu non adipiscetur summum & omne bonum , quandiu inquietus erit appetitus. Quid autem iustius , quid conaturalius Beato quam desiderare non privari summo bono, cuius possidendi si desit securitas, non potest non affligi timore, non intermisceri dolore? *Quid enim illa beatitudine falsus vel fallacius,* ait Aug. *ubi nos futuros miseros aut in tanta luce nesciamus aut in summa felicitatis arce timeamus?* Ergo ex intrinseca conditione possessionis summi boni exigitur ut Beatus habeat claram notitiam, firmum iudicium, & perenne dictamen de securitate suae felicitatis. Vel ergo illud iudicium verum est, vel falsum & erroneum; si verum, igitur revera beatitudo est de se incorruptibilis; si falsum, phantastica erit eorum beatitudo, similisque felicitati somniantium, nihil post somnum in manibus suis invenientium; si quidem falso iudicio, & ignorantiae inniteretur. Ergo beatitudo ex sua ratione, ex intrinseca conditione, atque ex intimis assequationis summi boni visceribus sicut petit securitatem, ita & exigit perpetuitatem. Nunquam enim obtinetur summum bonum, vel saltem non beatè obtinetur, si cum anxietate perdendi habeatur; formalis namque beatitudo est radix omnium bonorum. Si autem radix illa sit de se corruptibilis, est etiam origo amittendi tanta bona, quod est grande malum. Quomodo autem arbor bona, & tam bona posset tam malum fructum facere? Vel quid infelicius esse potest, quam assequi summum bonum, & posse perdere illud?

Dices : Nonne satis est ad removendum timorem & anxietatem, quod malum non sit fu-

turum, tamen non sit possibile? Futuram autem incorruptibilem visionem potest scire Beatus, cognoscendo decretum Dei de futuritione illius.

Respondeo quod licet ad perpetuam visionis durationem sufficiat voluntas Dei, cujus virtus deficere non potest; & ad remotionem timoris sufficiat privationem visionis non esse, vel non apprehendi ut futuram; tamen visio beatifica petit ex propria ratione conservationem sibi titulo connaturalitatis non minus debitam, quam cœlo, Angelo, vel animæ rationali; quia aliàs nisi Deus faceret gratiam indebitam, visio corrumpi postulare ex natura sua, utpote non petens ab intrinseco perpetuitatem. Ergo visio illa ex natura sua non esset beatificans, afferens omne bonum, nec excludens omne malum; grande enim malum est posse de se desinere, grandius non tollere de se timorem amittendi. Quod sanè malum excludere debet possessio & abundantia omnis boni, juxta illud Proverb. 1. *Qui me audierit, absque terrore requiescet, & abundantia perfruetur, timore malorum sublato.*

Instabis: Lumen gloriæ, & visio beata non debentur intellectui creato, nec illi sunt, vel esse possunt connaturalia: Ergo gratuita Dei voluntate tribuuntur & conservantur, subindeque de se perpetuitatem non petunt. Etenim forma in subjecto extraneo recepta, in eo amissibiliter inest, quæ in connaturali invariabiliter manet; sicut calor qui transeunter est in aqua, immobilitè igni inhæret, & lux in transcurso aërem perfundens, Soli indissolubili nexu vincitur.

Respondeo

Respondeo, quod licet Deus gratuito det gloriam & visionem; ex suppositione tamen quod illam det, illam incorruptibilem præbet, quia ex natura sua perpetuitatem postulat, quæ illi subinde connaturaliter debetur. Forma autem in subiecto extraneo recepta inest amissibiliter, si subordinetur & subjiciatur subiecto; secus verò si subiectum sibi plenè subjiciat, perfectè subordinet, & ad suam immutabilitatem sublimet. Visio autem Dei quæ est gratia consummata, terminus & centrum creaturæ rationalis, mutabilitati intellectus, vel voluntatis instabilitati non subjicitur, sed potius totam creaturæ defectibilitatem firmat, consolidat, & æternitate participata donat. Per quod differt à gratia & charitate viæ, quæ voluntatis infirmæ & peccatricis nutationi subditur. Cum quo tamen stat, lumen illud, visionemque illam de potentia Dei absoluta posse destrui, & ad nihilum redigi, unde produxit omnia. Sed hoc nihil obest visionis perpetuitati, quia non est regulanda interna corruptibilitas alicujus, per ea quæ Deus supremâ suâ potentiâ & suspensione concursus efficere potest, sed per intrinseca principia, ut libro tertio agentes de incorruptibilitate Angelorum satis superque monstratum est.

Urgebis: Visio beata fuit in Paulo amissibiliter, & transeuntiter communicata, & de facto defuit: Sed visio Pauli, quam habuit in via, est ejusdem speciei cum illa quam habet in patria, cum habeat utraque idem specificativum, nimirum divinam essentiam clarè visam: Ergo utraque peræquè corruptibilis est ab intrinseco.

Respondeo visionem Paulo in raptu communicatam postulasse quidem ex principiis intrin-

fecis perpetuitatem, supernaturaliter tamen per miraculum destructam fuisse, quia Deus res perpetuas destruere, & vivificare destructas eadem facilitate potest. Sicut ignis ex principiis intrinsecis petit calorem, & tamen in fornace Babylonis divinitus refrigerabat. Sol connaturaliter lucem postulat, & tamen tempore Passionis Redemptoris obscuratus est. Corpus Christi dotes gloriosas ex redundantia beatitudinis animæ exigebat; & tamen illis tota vita mortali caruit, ut pro nobis pateretur. Similiter ergo visio Pauli perpetuitate sibi debita privata est, ut Doctor Gentium plantaret Ecclesiam, & ad visionem illam innumeros alios sua prædicatione perduceret. Nemo autem negat quin per subtractionem divini concursus possit visio desinere; sed inde pensari non debet intrinseca rerum corruptibilitas, vel incorruptibilitas, sed ex internis causis necessitatis, vel defectibilitatis.

Instites: Impossibile est quod aliqua proprietas sit magis perpetua & immutabilis quam essentia à qua profluit: Sed visio beata est proprietas gratiæ, cui non est per se annexa perpetuitas, ut patet ex hominum & Angelorum lapsu: Ergo visio non est de se perpetua.

Respondeo primò, visionem & lumen gloriæ esse proprietates gratiæ, non absolutè & secundum se sumptæ, sed gratiæ ut consummatæ, & in statu connaturali positæ: quem quidem statum habet in patria, ubi incorruptibilitas est ei connaturaliter debita. Verùm hæc solutio grandes patitur difficultates; non enim est facile explicatu quid sit gratiæ consummatio antecedens visionem, ita quod à gratia ut consummata promanet visio & lumen. Etenim ista consum-

ratio vel addit confirmationem; & hoc non sufficit, siquidem Beatissima Virgo in gratia confirmata nondum erat beata: vel significat positionem extra viam; & hoc adhuc non satisfacit, nam gratia animarum Purgatorii est extra viam & meritum, nec est consummata: vel importat gratiam cum gloria seu visione; & jam visio non fuit à gratia consummata, sed gratiam consummatam constituit. Certè si gratia de se petit perpetuitatem sicut gloria & visio, cur ad illam permanentiam non trahit subiectum, sicut visio? Utut sit de probabilitate, vel difficultate hujus responsionis,

Respondeo planius & facilius cum Joanne à S. Thoma *disp. 2. art. 6. num. 62.* lumen & visionem non esse proprietates rigorosas dimanantes physicè à gratia, sicut dimanant aliæ virtutes supernaturales. Tum quia à gratia dimanat fides, quæ repugnat visioni: nequeunt verò proprietates repugnantes ab eadem essentia profluere. Tum maximè, quia visio & lumen gloriæ dantur in præmium gratiæ sanctificantis: quod autem datur in præmium alicui, non dimanat per modum passionis naturalis ab illo, præmium quippe non à principiis intrinsecis, sed ab extrinseco derivatur. Dicitur tamen gloria proprietas gratiæ quadantenus, quia gratia & charitas tendunt ad Deum clarè videndum, illi inhiant, illumque mereatur. Ex his,

Inferes quam verè dixerimus *lib. 1. dissert. 6. cap. 2.* visionem beatam mensurari æternitate participata, non solum quia non sunt in illa volubiles cogitationes ab aliis in alia redeuntes, ut ibidem ex Augustino diximus; sed etiam quia cum conjungat Beatos Deo immutabili, eis in-

commutabilitatem præstat, eoque immobili perpetuitate donat. Quæ quidem æternitas vocatur participata, quia beatitudo quocumque modo sumpta, semper est aliquid creatum, ac proinde existentia non est illi essentialis, sed liberè à Deo communicata, liberè à Deo conservata, subindeque defectibilitatis absolutè capax. Quia tamen esse radicem, & principium incorruptibilitatis per se convenit visioni, imò illi est essentialis, sicut est essentialis substantiæ esse ens per se existens, tametsi actualis existentia non sit de ejus essentia; ideo visio beata mensuratur non tempore, quod variabiliter fluit; non ævo, quod compatitur accidentales varietates; sed æternitate, non essentiali, quæ est ipse Deus, sed participatâ, quia ad modum divinum, ejusque uniformitatem maximè accedit; & non solùm ad Deum clarè visum fertur immutabiliter, sed etiam habet essentiam divinam vices speciei tam impressæ, quàm expressæ gerentem, cujus proinde immutabilitatem veluti ingreditur, & quantum creaturæ licet exseribit.

### REFLEXIO.

Pulchrè dixit Aristoteles I. Ethic. cap. 7. *Verneque una hirundo facit, neque unus dies; & beatum eodem modo felicemve nec unus dies, nec breve efficit tempus.* Pulchriùs Augustinus lib. cit. de Trinit. *Si verè beati esse omnes volunt, profectò & esse immortales volunt: immortalitas ergo est de ratione beatitudinis.* Et rationem egregiam addit, quia vel perpetuitas defereret volentem, aut nolentem, aut neutrum. Non volentem, cùm



nulus velit non esse beatus. Si nolentem, magna esset beatitatis miseria, quæ posset etiam à nolente auferri. Non neutrum, quia summum bonum clarè visum & possessum non potest indifferenter amari, quippe cujus nec conversatio amaritudinem, nec tædium convictus habet. Quod si beatitudini per se connexa est incorruptibilitas perpetua, immutabilis, immarcescibilis, certò scias te nunquam ad beatitudinem perventurum, nisi gratiâ stabilias cor. Bellè de Seraphinis dicitur Isaia 6. *Stabant, & duabus alis volabant.* Ad quid tunc alæ, si stant? Et si stant, quomodo volant? (inquit Bernard. serm. 4. de verb. Isai.) Credo autem, sicut in volatu alacritatem, sic & in statione immobilitatem promitti. Stare simul & volare tenemur futuræ beatitudinis candidati, in fide stabiles, in opere efficaces. Frustrà sperat beatitudinis perpetuitatem, qui non fuerit in operum bonorum praxi assiduus, & indefessa bonorum operum sectatione, acrique virtutis studio bonis operibus insudarit. Sola perseverantia mater est æternitatis: ergo solus ille ad hæreditatem perveniet immarcescibilem, qui seriò virtutibus insistit, qui animum in illarum actionibus sacro rigore extensum retinet, qui de solitis exercitiis, præscriptisque pietatis officiis nihil remitti patitur, nec sinit constantem intrepidi animi vigorem ullatenus inflecti, vel tantisper inclinari. Ille ille Deum sine fine videbit, cujus oculi semper ad Dominum: illum sibi acceptabilem mundabit Deus, qui ut docet Paulus, fuerit bonorum operum sectator; quia non sufficit cum Psalmista iniquitatem odio habere & abominari, nisi cum eodem legem Dei diligamus; nec solum *odientes malum*, nos jubet

esse Apostolus ; sed *adhaerentes bono* : id est , ut exponit Chrysostomus , eo debemus virtutis amore flagrare , eo eam animi diligentis & accurati prosequi studio , ea in illam impendere officia , easque navare operas , quibus ardens sponsus unicè dilectam modis omnibus satagit demereri , quem nullus labor frangit , nulla flectit difficultas , nulla deterret repulsa , cui dies videntur pauci præ amoris multitudine , modò illà tandem fruatur , cujus dilectione captus est. Denique *nemo fugit iniquitatem* , inquit Ambrosius , *nisi qui diligit equitatem*. Vel virtutibus , vel vitis animum plenum esse oportet ; quia sicut in rerum natura , ita in ordine gratiæ vacuum nihil admittitur. Ergo nisi assidue opera virtutis exerceas , in peccata prolabère , quibus à beatitudine excides. Ergo si velimus ad perennis vitæ fontem pervenire , juxta monitum Cypriani lib. de zelo & livore , *meditatione corroborandus est animus , exercitatione contra omnia diaboli jacula firmandus*. Sit in manibus divina lectio , in sensibus dominica cogitatio : oratio jugis omninò non cesset , salutaris operatio perseveret , spiritualibus semper actibus occipemur , ut quotiescunque inimicus accesserit , quoties audire tentaverit , & clausum adversus se pectus inveniat , & armatum.

SPECVLATIO II.

*Beatitudinem formalem essentialiter  
comitatur felix amandi Dei  
necessitas.*

**D**Vplicem distinguere solent in actibus voluntatis necessitatem duplici oppositam libertati. Prima dicitur necessitas specificationis, quæ potest quidem suspendere actum; sed si voluerit in aliquem prorumpere, non potest non elicere actum talis speciei. V. g. voluntas hominis viatoris non arctatur ad amandam actu semper beatitudinem, sed si circa illam velit negotiari, non potest nisi amare. Secunda dicitur necessitas exercitii, quæ non solum tollit indifferentiam ad diversas species actuum, sed etiam non permittit suspendi actum, vel tantisper ab eo divertiri. Nemo dubitat quin Beati Deum videntes necessitentur necessitate specificationis ad Deum amandum; cum enim in fonte bonitatis essentialis nulla possit apparere mali obumbratio, nullo pacto ipsum odisse, vel fugere potest voluntas, quæ est appetitus boni. Sed difficultas est de secunda, propter Scotistas contententes amoris beati exercitium esse liberum. Nos verò asserimus voluntatem ejus ita rapi, ut amorem vel divertere, vel suspendere nequaquam possit. Quod

Probat: Libertas voluntatis essentialiter dependet & supponit indifferentiam judicii, quæ

est radix libertatis, quatenus proponit voluntati  
 objectum liberè amabile. Cum enim voluntas  
 sit potentia cæca præeuntis rationis facem se-  
 quens, impossibile est quod quandiu iudicium  
 rationis ad diversa se habet, & non est determi-  
 natum ad unum, voluntas feratur in objectum  
 propositum absque indifferentia; si verò judi-  
 cium sit determinatum & per modum naturæ,  
 voluntas objectum propositum naturaliter & si-  
 ne ulla prorsus indifferentia amabit; & ideo mo-  
 tus subiti non sunt liberi, quia non subsunt judi-  
 cio indifferenti & collativo, quod ad exercen-  
 dam libertatem tanquam dux & lucifer à natura  
 datum est. Unde D. Thom. 1. p. q. 83. art. 1. ait:  
*Quia iudicium rationis ad diversa se habet, & non*  
*est determinatum ad unum, necesse est quod homo sit*  
*liberi arbitrii.* Atqui posita visione Dei intuitiva,  
 nulla manet indifferentia iudicii non solum cir-  
 ca bonitatem objecti, sed neque circa exercitium  
 actus. Ergo in conspectu Dei visi voluntas non  
 potest suspendere amorem. Probatur minor.  
 Non potest voluntas liberè suspendere actum  
 amoris, nisi exercitium amandi proponatur ut  
 malum & disconveniens, vel impeditivum ma-  
 joris boni, vel tædio molestum, vel labore & fa-  
 tigatione importunum; si enim semper apparet  
 ut bonum, ut maximum bonum, ut suave, sem-  
 per alliciens, semper inescans, non poterit judi-  
 cium rationis proponere objectum illud ut dese-  
 rendum, & exercitium ut liberè suspendendum.  
 Atqui stante clara Dei visione non potest pro-  
 poni voluntati exercitium amoris aliqua mali  
 specie vestitum vel inumbratum, cum per illud  
 conjungatur voluntas fontali bonitati, in quo  
 quiescat cor humanum semper inquietum donec

ad illud perveniat: nec in continuatione exercitii tam suavis labor ullus, nausea ulla erit, ut speculatione præcedenti ostensum est. Quia ut *dissert. 6. lib. 1.* operosius ex Gregorio diximus: *Cum ad fontem vite devenimus, erit nobis delectabiliter impressa sitis simul & satietas; sed longè aberit à siti necessitas, longè à satietate fastidium; quia sitientes saturabimur, & saturati sitiemus.* Et ideo dicit Scriptura, quod in Deum semper Angeli prospicere desiderant, ut ibidem exposuimus. Ergo voluntas videntis Deum nequit suspendere actum amoris.

Confirmatur radicitus, & præoccupantur omnes objectiones. Tunc inducitur necessitas exercitii, quando non remanet in voluntate potentia actus suspendendi: Sed in conspectu Dei clarè visi non remanet huiusmodi potentia bilanx & indifferens: Ergo amor beatus est in exercitio necessarius. Probatur minor: Voluntas est potentia capax boni, à quo cognito & proposito movetur: Ergo cum totaliter impletur, vincitur, & adæquatur huiusmodi potentia, tunc non manet facultas resistendi, vel ad aliud divertendi, vel circa illud non operandi; si enim non totaliter vinceretur, sed posset se subducere objecto proposito, potentia voluntatis non esset plena: Atqui potentia voluntatis omnifariam vincitur, adæquatur, impletur, imò & inundatur à Deo clarè viso; quia objectum adæquatum & extensivum voluntatis est bonum: Deus autem clarè visus est omne bonum, & ut tale ostensum & cognitum, secundum illud *Exod. 33. Ego ostendam tibi omne bonum.* Ergo in conspectu & præsentia Dei clarè visi non remanet indifferens voluntatis, sed omnis ejus potestas superatur, &

satiatur, ac proinde necessitatur non necessitate  
 æqua & inanimi, proveniente ex defectu, vel  
 minutione judicii, ut in brutis aut motibus in-  
 deliberatis contingit; sed oriente ex perspicui-  
 tate cognitionis objecti, plenitudine sua non  
 ligantis, sed adæquantis voluntatem, & cordis  
 creati infinitam capacitatem. Certè si divina vo-  
 luntas non obstante infinita perfectione liber-  
 tatis suæ necessariò rapitur à bonitate sua, quan-  
 to magis vincetur capacitas voluntatis creatæ,  
 ut non possit tantis obistere illecebris amabili-  
 tatis infinitæ?

Objicies: Nullum objectum necessitat vo-  
 luntatem quoad exercitium, ut sæpius inculcat  
**D. Thomas**, quia objecti quidem est specificare  
 potentiam, sed non movere illam quoad exer-  
 citium; vel si necessitat, duntaxat quoad spe-  
 cificationem necessitat: Ergo Deus etiam clarè  
 visus non necessitat voluntatem ad exercitium  
 amoris.

Respondeo quod licèt objectum ex vi & for-  
 malitate objecti non necessitet potentiam ad  
 exercitium actus; tamen cum hoc stat, quod  
 præsupposito objecto tali modo repræsentato,  
 voluntas ita disponatur, ut necessariò prorump-  
 pat in actum: sic autem disponitur per intuiti-  
 vam Dei visionem, ex qua formatur judicium  
 clarum & evidens, bonitatem universalem in-  
 tuitivè visam totam vincere voluntatis indiffe-  
 rentiam abundantia plenitudinis suæ: quo stan-  
 te judicio, immobilitatur voluntas in amore  
 bonitatis. Mitto quod licèt objectum in statu  
 viæ propositum non possit necessitare exerci-  
 tium amoris, quia potest aliquis cogitationem  
 divertere, & consequenter illud non amare, &



de hoc objecto loqui D. Thomam patet ex contextu locorum, qui possent asserri in contrarium; ) nihilominus objectum clarè & necessario visum, & semper menti repræsentatum ut vestitum omnibus amabilitatis motivis, non potest non rapere exercitium amoris, quia adepto centro, non potest non illud amare appetitus, non potest non in illo quiescere quandiu cognoscit se illud possidere.

Instabis: Omnis actus potentia libera est liber: Sed voluntas est potentia libera: Ergo amor beatus est liber, saltem quoad exercitium. Unde August. in Enchir. cap. 105. *Aut voluntas non est, aut libera dicenda est.* Et Bern. lib. de grat. & lib. arb. *Ibi ergo consensus, ubi voluntas. Porro ubi voluntas, ibi libertas.* Certè cum ex una parte modus agendi liber sit perfectior naturali, utpote universalior, & in quo magis nos movemus; perfectius verò sit movere quàm moveri, sit inde amorem beatum, qui est omnium actuum perfectissimus, non esse necessarium, sed liberum. Quis enim credat perfectissimam & splendidissimam operationum intellectus hominem à culmine rationis in modum agendi brutalem dejicere?

Respondeo, quod sicut in intellectu nostro invenitur & discursus, & simplex intelligentia principiorum, quæ naturaliter adest: ita in voluntate reperitur modus agendi naturalis, & electivus. Omnis ergo actus voluntatis ut naturæ, est naturalis; omnis verò actus voluntatis ut libera, liber existit. Porro non dixit August. voluntatem in omni actu liberam esse, sed quod voluntas non est, si in aliquo actu libertatem non habet. Et similiter Bernardus loquitur de

voluntate, ut formaliter voluntas est, non in quantum natura; voluntas autem ut talis formaliter libertas est. Ille autem modus agendi naturalis est imperfectior libero, quando ejus necessitas oritur ex imperfecta cognitione, quando verò provenit ex majori plenitudine luminis & advertentiæ boni universalissimi implentis totam voluntatis capacitatem, tunc necessitas est omni libertate perfectior. In tantum enim libertas est perfecta, in quantum est universalis, quam universalitatis amplitudinem arctare videtur necessitas. Quando autem necessitas oritur ex apprehensione objecti implentis totam voluntatis vastitatem, tunc non minoratur, nec decoloratur perfectio & universalitas voluntatis, sed consummatur; non ligatur, sed satiatur: & ideo tunc perfectior & eminentior est necessitas, quàm libertas; nec per eam deicitur homo, sed attollitur, & coronatur; quia ab instabilitate & fluxu in perpetuam Sanctorum stabilitatem erigitur, ut modum illum æmuletur quo Pater & Filius producant Spiritum sanctum, amore utique necessario, sed infinitè perfectissimo; quia hæc necessitas non ex imperfectione cognitionis, sed ex plenitudine & superplenitudine sapientiæ incircumscriptæ promanat.

Urgebis: Amor necessarius non potest crescere, neque esse major, cum necessariò à voluntate dimanet: Atqui amor beatus potest esse major & intensior; nam in beatiori ardentior est amor: Ergo amor ille non est necessarius, sed liber.

Respondeo, quod sicut visio est in beatiori perfectior, quanvis visio non sit libera, sed necessitata & amor majori impetu posset erumpere, tamen semper necessario; sicut etiam in

motibus subitis quidam sunt aliis vehementiores, licet omnes sint necessarii; sicut etiam corpora gravia feruntur omnia necessario ad centrum, majori tamen impetu fertur saxum quam lignum, & lignum quam fœnum. Et ratio est, quia cor Beati toto quidem conatu eructat amorem, sed non omni totalitate, quæ potest esse major in infinitum, sicut potest in infinitum crescere charitas à qua fluit, & visio à qua regulatur.

Insistes: Beatus inferior potest desiderare gradum altiore amoris superioris: Ergo amor ille debet esse liber, aliàs illum appetere non posset appetitu efficaci.

Respondeo, inferiorem Beatum gaudere quidem de nobiliore gradu superioris, sed ita esse de sua beatitate contentum, ut ad superiorem ascendere non concupiscat, ut latius diximus dum de visione beata. Et ratio est, quia Deus satiat cor nostrum hoc ipso quod est summum bonum clarè visum, & reverà possessum: quod verò ampliùs, vel plenius possideatur, facit quidem ad inæqualitatem & modum beatitudinis, sed non ad substantiam, quæ obtinetur per hoc quod habetur in veritate centrum bonitatis, juxta modum capacitatis charitatis uniuscujusque. Quod familiari exemplo illustro. Qui in lauto convivio parum comedit ob stomachi debilitatem, æquè satiatur atque ille qui plura ob stomachi voracitatem absorbet; uterque tamen per æquè gaudet, per æquè contentus est, si eodem cibo, tametsi non in eadem quantitate recreetur. Sicut etiam parvæ staturæ homo, qui eodem paucò vestitur, quo alter proceri corporis, non minùs contentus est, quia vestem habet molli corpo-

ris justam, & concinnè accommodatam. Et similiter erit in gloria, in qua disposuit nobis Christus ut edamus & bibamus super mensam suam in regno suo panem vitæ & intellectus, & torrentem voluptatis : in qua etiam omnes erunt amicti lumine sicut vestimento, ut ait Scriptura. Opportunè Gregorius Magnus lib. ultimo Moral. cap. 14. *Vnusquisque juxta dispar meritum locum disparem percipit, sed ejusdem disparilitatis damna non sentit, quia tantum sibi, quantum perceperit, sufficit.* Et præclare Aug. 15. de civit. cap. 5. *Nullo modo fit minor accedens, seu permanente consorte, possessio bonitatis; imò tanto fit latior, quanto concordior eam individua sociorum possidet charitas. Non habebit istam possessionem, qui eam noluerit habere communem: & tanto eam reperiet ampliore, quanto ibi amplius potuerit amare consortem.*

Perfistes adhuc : Idem amor charitatis vix perseverat in patria; charitas enim nunquam excidit : Ergo sicut in via est liber, ita & in patria; non enim posset actus idem manens transire de libero in necessarium.

Respondeo perseverare in patria eundem amorem viæ, sed non eo modo regulatum, quia in via dirigitur & originatur à judicio & dictamine indifferenti, defectibili, obscuro, & sæpius passionum motibus, vel tentationum impetu obnubilato. In patria verò subest judicio proponenti determinatè bonum universalissimum sine ulla mali umbra. An verò amor perseverans sit idem numero, vel tantum specie, parum refert, ut non excidat charitas, quæ sufficienter manet per hoc quod idem habitus perseverat: Sicut non excidit charitas viatorum dum inter-

rumpunt exercitium amoris, & de uno actu in aliuna prorumpunt. Hic posset fieri difficilis instantia de amore beato Christi, cui non videtur deneganda libertas, sicut nec meritum: sed de hoc abundantius dum de merito Christi Domini.

Obstites rursus: Deus liberè producit mundum, quanvis immobili voluntate, quam retractare non potest, illum producat; quia pro priori ad suum irrevocabile decretum ex vi principii quo se applicavit ad volendum, sine necessitate voluit, nimirum ex indifferentia iudicii representantis bonitatem creaturarum ut non necessariò amandam, quanvis semel statutum decretum revocare nequeat divinæ immutabilitatis constantia. Atqui amorem beatificum antecedit saltem in via iudicium indifferens etiam per modum principii influentis & elicentis, ut patet maximè in amore viæ Angelorum, quem nulla interrupit mors, sed idem numero perseveravit in patria, qui erat in via: Ergo amor patriæ quantumvis sit immobilis, & indefectibilis, nihilominus verè liber dicendus est.

Respondeo amorem Angelorum viæ perseverare adepto termino, sed non cum indifferentia viæ, quia non manet iudicium indifferens, sed succedit intuitiva visio boni infiniti absorbentis indifferentiam rationis, & implentis libertatem voluntatis. In quo differt amor Beatorum ab amore quo Deus prosequitur & producit creaturas, qui est immobilis, non mutatione iudicii divini, quod semper proponit creaturarum contingentiam liberè amandam; sed ex natura voluntatis, quæ mutationem, vel vicissitudinis obumbrationem non compatitur.

Ex his inferes, visionem & amorem Beatorum



comitari ineffabile gaudium & delectationem, secundum illud Psalm. 19. *Adimplebis me letitia cum vultu tuo; delectationes in dextera tua usque in finem.* In primis gaudent de bono divino; vera enim amicitia, qualis est charitas, congaudet bonis amici. Secundò gaudent de bono proprio, & de felicitate qua potiuntur, fruendo Deo tantum proprio bono, quod gaudium non elicitur à spe, ut ait Suares, quia non manet in patria; nam *quod videt quis sperat?* ut dicitur *Rem. 8.* Et ratio est clara, quia spes fertur in bonum futurum & arduum: in patria verò omne bonum est præsens & possessum. Elicitur ergo tale gaudium à charitate, quâ non solum Deum, sed etiam nosmetipsos, & proximum diligimus propter Deum, quando bonum proprium & proximi non opponitur, sed potius subordinatur bonis amici, ut contingit in beatitudine. Tertiò gaudent de bonis aliorum Sanctorum, apud quos non erit invidia imparis claritatis, quoniam regnabit in omnibus unitas charitatis. Unde Gregor. *homil. 16. super Ezech.* explica ns illud, *Mensura una trium*, ait: *Diversa quidem beatorum civium dignitates erunt, sed tamen una requies aterna retributionis. Nam etsi dispar erit meritum singulorum, non erit diversitas gaudiorum; quia etsi alter minus, atque alius amplius exultat, omnes tamen unum gaudium de Conditoris sui visione latificat.*

Sed quis poterit gaudii abundantiam illius, & torrentem voluptatis, quam nec oculus vidit, nec auris audivit, nec in cor hominis ascendit, tantisper exscribere. Protus ineffabile percipiet Beatus gaudium considerans quod habet vitam sine corruptione, æternam, immarcescibilem, indefe-



stabilem; ad hoc enim debet unicuique prodesse bene vivere, ut detur illi semper vivere. Habet notitiam sine errore; nam in lumine Dei videt lumen, & in Deo omnia ad se pertinentia absque ulla tenebrarum permixtione contemplatur; nam Deus lux est, & tenebrae in eo non sunt ullae. Habet gloriam & honorem sine depressione, vel confusione. *Quem honorem majorem*, inquit August. tract. 51. in Joan. *accipere poterit adoptatus, quam ut sit ubi est unicus; non aequalis factus Divinitati, sed consociatus aternitati?* Habet lætitiā sine mœrore, abstergente Deo omnem lacrymam ab oculis Sanctorum. *Reverà* (inquit Bernard. epist. 114.) *illud verum & solum est gaudium, quod non de creatura, sed de Creatore concipitur; & quod cum possederis, nemo tollet à te: cui comparata omnis alia jucunditas, mœror est; omnis suavititas, dolor est; omne dulce, amarum; omne decorum, sedum; omne postremò quodcumque delectare potest, molestum.* Habet abundantiam sine defectione, & indigentia. Pulchrè Hugo Victorinus aliàs laudatus: *Quando satietas est? Quando satis est, tunc satietas est. Veniant plura, & habeas ea; adhuc non dices, Sufficit. Apponantur universa, & invenies te egentem, & nondum satis habentem. In omnibus ergo his satietas esse non potest. Veniat autem illud unum bonum, & satietas erit. Quare satietas ibi? Quia satis est. Propter quod bene dicitur: Satiaber cum apparuerit gloria tua. Et August. in illud Psalmi. 102. Qui replet in bonis desiderium tuum, ait: Summum bonum hoc est tuum bonum. Quid ergo deest, cui summum bonum, bonum est? Nihil planè; tunc enim erit Deus omnia in omnibus, omnis veritas intellectui, omnis convenientia*

voluntati, omnis pulchritudo aspectui, omnis abundantia suavitatis indigenti, ubi fulgebit animæ, quod non capit locus; ubi sonabit, quod non rapit tempus; ubi olebit, quod non spargit flatus; ubi sapiet, quod non minuit edacitas; & ubi hærebit, quod non divellit satietas, ut loquitur August. Denique ibi erit plenitudo à Deo non nisi de Deo, qui futurus est menti plenitudo lucis, voluntati multitudo pacis, memoriæ continuatio æternitatis; quia Deum viderimus ad voluntatem, habebimus ad voluptatem, fruemur ad jucunditatem, ut Bernard. prosequitur *serm. 9. in Cant.*

### REFLEXIO.

Deum visum necessariò non amabit in patria, qui Deum liberè non amarit in via. Igitur omnes cogitationes nostras, omnem vitam, omnem intellectum in illum amore conferamus, à quo habemus ea omnia quæ conferimus. Totis ergo viribus, totis orationum instantiis amorem ab eo postulemus, à quo omne donum de sursum est, ut radice cupiditatis evulsâ, bonorum omnium radix charitas in corde plantetur, plantata nascatur, nata nutriatur, nutrita roboretur, roborata perficiatur, & cum ad perfectionem venerit, dicat: Mihi vivere Christus est, & mori lucrum; & ad hoc tandem perveniat, ut patienter vivat, delectabiliter moriatur, cupiens dissolvi, & esse cum Christo. Terimus tempus, Lector, & miserè terimur, si quidquid aliud diligendum venerit in animum, illuc non rapiatur quò totus impetus dilectionis currit; veridicè enim dixit August. de nat. & grat. cap. 70. *Charitas inchoat*

*ta, inchoata justitia est; charitas proventa, proventa justitia est; charitas magna, magna justitia est; sed charitas de corde puro. Ergo sine amore Dei nulla justitia. In illo solo pura, & mirimè adulterina delectatio invenitur; in illo placida & fida tranquillitas; in illo prægustata felicitas paradisi. Faceſſant hinc (inquit Bernard. ſermon. de Magdal.) ſæcularis plauſus infania, & lætitia mundialis abſcedat. Nanquid qui veſtiuntur purpura & byſſo, & epulantur quotidie ſplendide, gaudium & lætitiâ obtinebant? Abſit ut in terra ſuaviter viventium gaudiorum inveniat materia, cùm tantis alternationibus tota mundi facies immutetur, ut elevans allidatur, & reſpiret alluſus. Sed eſt gaudium continua ſibi jucunditate firmiſſimum, quod perfectus animus ſecurâ ſibi conſcientiâ pollicetur. Mens enim ab hujus mundi aſpergine purè, preſſeque deterſa, & in divinæ contemplationis acumen totum deſiderii ſui figens affectum, gaudens gaudet in Domino, & exultat in Deo ſalutari ſuo. Et quia parum eſt quod amat, ad illum inceſſanter ſuſpirat locum, ubi ferventiſſimus amor erit. Beatitudinem quidem futuram extremis veluti labiis præguſtat, ſed adhuc ſe miſeram putat, & ſentit, quia ut dixit Auguſtinus de moribus Eccleſ. cap. 3: *Beatus, quantum exiſtimo, nec ille dici poteſt, qui non habet quod amat, qualecumque ſit; nec qui habet quod amat, ſi nexum ſit; nec qui habet quod non amat, etiamſi optimum ſit.* Illò ergo tendit amore languens, ubi omnes amoris cauſæ certatim concurrunt, abſentibus procul cunctis amoris impedimentis. Diligit quàm dilecta tabernacula Domini virtutum, & in atria Domini concupiſcit, ubi erit cognitio pulchri, præſentia boni, be-*

nevolentia amari, concordia amantium, beneficentia amoris. Ibi enim postquam aspiravit dies, & inclinatae sunt umbræ noctium, cognoscitur veritas increata, & sub umbra illius qui diu desideratus fuerat, degustabitur suavissimus dilectionis fructus, plenitudo pacis, securitas æternitatis.

### SPECVLATIO III.

*Impeccabilitas necessarium est futurae vitae consuetarium, & visioni Dei repugnat essentialiter quodvis peccatum.*

**H**Æc assertio variis solet rationibus confirmari; sed quia intentionis nostræ non est argumenta congerere, sed ima veritatis fundamenta penetrare, totum rationum momentum ad unicum discursum reducemus, quo omnes simul partes suadebimus, hoc pacto. Non potest voluntas amare aliquid contrarium Deo, vel ab ipso deficiens, nisi proponatur ab intellectu ut amandum, non obstante repugnentia quam habet cum fine recto, vel deficientia ab illo; voluntas enim est potentia cæca, quæ sequitur ductum intellectus, nec potest peccare, nisi præcedat iudicium imprudens. Unde dicitur, quod omnis peccans est ignorans, supple practice: & Proverb. 14. *Errant qui operantur malum.* Atqui voluntati Beati Dei videntis non potest proponi aliquod objectum contra, vel præter Deum, ei repugnans, vel ab eo deficiens, mortale, vel ve-

niale : quia potius viuo beata proponit practice Deum ut summum bonum , implens omnem voluntatis capacitem , & totam vincens illius indifferentiam, subindeque ut in exercitio preferendum omni alteri minori bono : ex quo iudicio derivatur amor necessarius quoad exercitium , ut ex speculatione precedenti manifestum est. Ergo repugnat , quod stante visione maneat in voluntate potentia ad ullum prorsus peccatum, sive mortale , sive veniale ; siquidem per visionem extinguitur omne dictamen defectuosum, subindeque omnis radix peccandi convellitur, & ab imis fundamentis subruitur. Quia repugnat proponi summum bonum, ut summum bonum est , & simul proponi ut relinquendum, quia sic proponeretur practice ut minus bonum , & alteri postponendum. Sub illa enim ratione, qua proponeretur ut deserendum, utique non proponeretur ut summum bonum, nec ex omni parte amabile. Ergo si proponatur ut summum bonum , non solum impedit ne proponatur aliud bonum repugnans , sed etiam ne proponatur sine subordinatione & relatione ad ipsum. Illud enim non proponitur ut summum bonum , quo majus potest excogitari ; majus autem bonum est omnia allicere , omnia sibi subordinare , quam pati aliquod a se diverticulum , vel deflexum.

Dices : Hac ratione convincitur quidem immobilem esse in Beato firmitatem , ut peccare non possit ; sed minimè suadetur visioni repugnare præteritum peccatum antecedens visionem.

Respondeo, ex ratione adhibita confici etiam, vi & efficacia visionis expelli omne omnino peccatum , non solum actuale , sed etiam habi-

tuale. Tunc enim expellitur omne prorsus peccatum, quando persona manet conversa ad Deum, & Deus remittit offensam; quid enim aliud requiri potest ad justificationem? Atqui formaliter ex vi visionis homo convertitur ad Deum; ita quippe disponitur, ut nihil nisi Deū, vel in ordine ad Deum diligere possit: non autem esse major potest, aut concipi rectitudo creaturæ rationalis, quâ stante funditus tollitur omne peccatum: Deus etiam tunc condonat offensam; siquidem gloriam largitur, & gratiam consummatam, quæ collatio non potest non esse effectus gratiæ voluntatis Dei: si enim collatio gratiæ quæ dat tantum jus ad gloriam, remittit offensam, reconciliat, & gratificat reum, quanto magis ipsius collatio hæreditatis? Absit enim quod via melior sit quàm terminus; meritum dignius, quàm præmium. Absit quod summa felicitas, quæ visione obtinetur, non excludat summam infelicitatem, in quam per peccatum incurrimus. Nam si, teste Petro, per gratiam divinæ sumus consortes naturæ; per gloriam visionis, teste Joanne, similes ei erimus, quia videbimus eum sicuti est. Imò Beatus non esset ex vi & efficacia visionis conversus in Deum, nisi Deus esset placatus & conversus ad hominem, quia ut *lib. 2. dissert. 9. c. 1. spec. 2.* diximus, amor divinus est infundens & creans bonitatem in rebus, unde nec Deum amaremus, nisi amore suo nos redderet ipse amantes. *Confidit enim amari qui se sentit amare, quia amor Dei amorem animæ parit*, ut ibidem ex Bern. vidimus. Ergo non stat visionem permanenter & habitualiter esse in Beato, nisi simul expellatur omnis peccati macula, omneque peccatum ha-



bituale, cum per visionem permanentem radicaliter, virtualiter, & eminenter convertatur homo ad bonum, adeoque firmetur ut in actum peccati prorumpere non possit, quod repugnat aversioni peccatoris. Quid enim implicantius, quàm esse simul aversum à Deo per peccatum, & simul conversum ad Deum, & ita ad illum inclinatum, ut nisi per miraculum & suspensionem concursus non possit impediri amor.

Instabis: Peccatum est privatio gratiæ & charitatis: Ergo quandiu non infundetur gratia sanctificans, vel charitas, tandiu manebit macula peccati, quantumvis intellectus lumine gloriæ perfusus visionem beatam eliciat.

Respondeo ad expellendam privationem, vel formam, non exigi aliquid formaliter oppositum, si habeatur forma eminenter opposita. Nam per introductionem formæ ignis sufficienter expelleretur frigus: & per unionem hypostaticam, etiamsi non resisteret gratia habitualis in anima, emundaretur humanitas ab omni peccato: & ita similiter visione beata eminenter opponitur peccato, non reduplicativè prout est in intellectu, sed quia mediante intellectu informat animam, & rectificat voluntatem; quia est radix totalis conversionis in Deum, quatenus firmiter & immobiliter dictat esse adhærendum Deo; & quia intellectus est radix voluntatis, ideo sanctificata radice, ipsa quoque sanctificatur; sicut sanctificatâ essentiâ animæ per gratiam, sanctificatâ personâ per unionem hypostaticam, mundatur & sanctificatur ipsa voluntas, quatenus redditur immobiliter conjuncta dictamini recto, ac proinde minimè à Deo averfa. Quorum omnium ratio adducta

est, quia ad destruendum ex omni parte peccatum, & potentiam peccandi, sat est quod destruat<sup>ur</sup> radix illius; convulso enim fundamento, corruant parietes necesse est, eradicata rationalitate perit risibilitas, & destructo sole, lux deficit. Radix autem potestatis peccandi est dictamen defectuosum, quod totum extinguitur per claram visionem, subindeque extollitur potentia voluntatis ad peccandum, sed manet determinata ad Deum in omnibus super omnia diligendum determinatione permanenti, indefectibili, æterna, conferente statum perfectissimum, subindeque excludente omne malum, maximè peccatum, quod malum summum, & summa malorum est. Nec obest quod visio non recipiatur immediatè in anima, in qua est macula, quia sufficit, quod inhæreat intellectui, & eo mediante animæ, quæ consequenter manet indefectibiliter unita summx bonitati. Et similiter rectificatur voluntas, quia ex vi visionis practicè dictantis amandum esse Deum, virtualiter retractatur omne præteritum peccatum. Scio aliquos aliter se expedire ab hoc argumento, dicentes visionem beatam necessario, essentialiter, & indispensabiliter supponere gratiam habitualem; quia sicut actus vitales naturales supponunt principium radicale vitæ naturalis, scilicet animam: ita actus vitales vita supernaturali, quorum apex est visio beata, supponunt omninò principium radicale vitæ supernaturalis, scilicet gratiam. Unde sicut implicat hominem mortuum elicere operationes vitæ, ita hominem gratiâ destitutum Deum videre. Verùm hæc ratio patitur difficultatem, quia fortè suppleri potest gratia habitualis per auxilium actuale; & quia actus fidei supernaturalis

turalis est vitalis vitalitate supernaturali; & tamen elici potest à peccatore, in quo desinente gratia manet fides: & demùm quia illa solutio videtur concedere solam visionem non sufficere ad excludendum quodvis peccatum, saltem habituale præteritum, quod rigidæ S. Thomæ doctrinæ non quadrat.

Urgebis: Esto quod per visionem determinata maneat voluntas circa Deum ipsum immediate, tamen voluntas manet libera circa creaturas, in quibus potest nimis immorari, ac consequenter peccare venialiter, vel mortaliter peccato omissionis, non adimplendò aliquod præceptum de illis: ergo visio beata non est essentialiter infociabilis cum peccato.

Respondeo voluntatem videntis Deum habere libertatem circa creaturas, non defectivam, sed effectivam; quia potest sese circa diversa exercere, servato semper ordine finis. Sane si beneficio gratiæ, auxilii, & protectionis Dei voluntas Beatissimæ Virginis ita erat in bono firmata, ut non peccaret venialiter, quanto magis id præstat gratia consummata, felicitas sempiterna? Nulla siquidem est gratia, nulla auxilii protectio, vel infusio æquè potens ac visio beata, quæ radicem peccati evellit, nimirum dictamen omne, & inconsiderationem defectuosam; nullum donum ita constans ac solidum, sicut visio cui per se annexa est perpetuitas, & est vita æterna ponens Beatum in termino, illumque indeclinabiliter uniens centro: Ergo habet vim & efficaciam super omnem gratiam, super omne auxilium ad rapiendam voluntatem ad Deum, ad regulandam voluntatem, ne in actibus liberis

aberret, vel ab amulsi divinæ legis quadante-  
nus deflectat.

**Insistes :** Beatus est capax legis imperantis,  
vel prohibentis opus faciendum: Ergo est capax  
transgressionis, aliàs frustra imponeretur lex.

**Respondeo ,** Beato posse imponi præcep-  
tum, non quia prævaricari potest, sed quia di-  
rigi potest, & subjici optat superiori, cuius re-  
gulæ immobiliter adhæret, ac subinde legem  
cognitam necessariò amplectitur; quæ tamen ut  
cognoscatur, debet imponi & intimari, & ideo  
est capax legis.

**Persistes :** Semel imposita lege, indiget Bea-  
tus auxilio ad eam implendam, & debet orare  
Deum ut illud sibi largiatur; potest enim illud  
Deus denegare, sicut liberè confert: quo de-  
negato omittet implere legem, subindeque  
peccabit.

**Respondeo ,** Beatum indigere auxilio ad ser-  
vanda præcepta, quod est quidem gratia respec-  
tu naturæ, non tamen respectu status beatitu-  
dinis, quæ cum sit adeptio immobilis summi  
boni, titulo connaturalitatis exigit omnia ne-  
cessaria ad benè agendum. Quod si urgente  
præcepto denegaretur præmotio physica, tunc  
omissio operis non esset peccaminosa, quæ sem-  
per supponit dictamen pravum & defectuosum,  
quod omninò impossibile est cum visione  
clara summi boni. Maximè quia nunquam est  
omissio voluntaria sine actu, qui sit causa, vel  
ocasio omittendi; subtracto autem omni con-  
cursu, profectò Beatus nullum actum eliceret.

**Obstites adhuc:** Non est magis impossibili-  
le peccatum cum visione beata, quàm dolor aut  
tristitia; si enim visio beata compatiatur secum

malum poenae, cur non malum culpae? utrumque enim peræquè repugnat beatitudini, seu statui omnium bonorum aggregatione perfectio. Atqui visio beata compatitur malum poenae, ut patet in Christo Domino, qui fuit viator & comprehensior, simul fruens Deo, & vir dolorum. Ergo statui illi absolutè non repugnat peccatum.

Respondeo, esse toto cœlo disparitatem inter malum culpae & malum poenae, quia istud non avertit à Deo, nec procedit ex judicio erroneo; sed est defectus vel disconvenientia naturæ, quam quidem per se nata est excludere visio, cujus abundantia redundare petit in corpus; sed hic effectus miraculosè potest impediri, quia non est essentia, sed accidens beatitudinis. At verò peccatum est aversio à Deo, quæ omninò repugnat conjungi cum visione dictante summum bonum clarè visum esse necessariò amandum.

Totam hujus speculationis doctrinam compendiosè tradit Angelicus Doctor *quæst. 24. de verit. art. 8.* inquit: *Divinam essentiam videntes cognoscent ipsum esse finem maximè amandum; cognoscent etiam omnia quæ ei uniunt, vel ab eo disjungunt in particulari, cognoscentes Deum non solum in se, sed prout est ratio aliorum; & hæc cognitionis claritate in tantum mens roborabitur, quod in inferioribus virtutibus nullus motus insurgere poterit, nisi secundum regulam rationis.* Ubi principium intrinsecum impeccabilitatis Angelorum conferens immobilem firmitatem reducit S. Doctor ad visionem, & valde consentaneè ad doctrinam Patrum. Isidori lib. 1. de sum. bono, cap. 12. *Quamvis Beati sint maxime*

*les naturâ , non tamen finit eos contemplatio mutari divina. Anselmi lib. de casu diab. cap. 6. Iam vident quod plus velle possunt , & propter hoc peccare non possunt. Eliæ Cretensis , qui in orat. 3. Nuzianz. ait Angelos esse immobiles per defixionem mentis in Deum.*

Ex quibus patet , impeccabilitatem Beatorum non reduci solum ad extrinsecam Dei protectionem , ut opinati sunt Scotus & Nominales , sed in causam intrinsecam , visionem scilicet & amorem , quibus conjunguntur immobiliter regulæ rectæ operationis. Et certè id maxime verum esse debet in sententia Scoti , qui credit amorem esse de essentia beatitudinis : amor autem perpetuus , æternus , & nunquam interpolatus , non compatitur ullum prorsus peccatum , quia omnia actu refert in Deum. *Ubi amor boni immutabilis est ( inquit August. 14. de civit. cap. 9. ) profectò , si dici potest , mali cavendi timor securus est.*

Certè si voluntas videntis Deum ex vi talis visionis necessario Deum amat super omnia , omnia consequenter amat sub ordine ad Deum , & se habet ad minus sicut voluntas viatoris ad bonum in communi , quod solum necessitat quoad specificationem. Sicut ergo impossibile est , quod voluntas vel amet aliquid oppositum bono in communi , vel præter ordinem ad ipsum : ita impossibile est , quod voluntas videntis Deum aliquid contra , vel præter ipsum concupiscat , aliàs non videret in Deo summum bonum , & ipsam bonitatis essentiam , ut satis superque ponderavimus.



## REFLEXIO.

Impeccabilitas est necessarium beatitudinis corollarium, & fuga peccati in via est necessaria ad beatitudinem. Nam *aliquid coinquinatum non intrabit in eam.* Apocal. 21. Ergo *sequimini sanctimoniam, sine qua nemo videbit Deum.* Hebr. 12. Nec habitabit in tabernaculo Domini, nec requiescet in monte sancto ejus, nisi *qui ingreditur sine macula, & operatur justitiam.* Et præclare August. lib. 3. cont. duas epist. Pelag. *Hic præceptum est, ut non peccemus: ibi præmium est, non posse peccare.* Porro sicut felix Beatorum impeccabilitas ex jugi visionis Dei immobilitate derivatur; ita fugam peccati assidua Dei præsentia, quâ providemus Dominum in conspectu nostro semper, efficiet. Pulchrè observat Hugo Cardinalis in Psalm. 113. expendens illud, *A facie Domini mota est terra, à facie Dei Jacob*, quadruplicem posse assignari faciem Dei: nimirum faciem *viventis, morientis, judicantis, regnantis*, quæ oculis mentis continuo debent obversari, ut peccata vitemus. Prima est facies paupertatis, secunda doloris, tertia indignationis, quarta delectationis. Primam faciem ostendit nobis in nativitate, & in omni vita sua, pro nobis factus egenus, non habens ubi caput reclinaret, in alieno natus, in alieno conversatus, in alieno sepultus. Secundam faciem ostendit in passione, ubi visus est non habens speciem, neque decorem, à planta pedis usque ad verticem plagis supra modum, vel potius uno continente vulnere percussus. Tertiam faciem ostendet reprobis in judicio,

qui ejus perterriti aspectu dicent montibus, *Cadite super nos, & abscondite nos à facie sedentis super thronum, & ab ira Agni.* Quartam faciem demonstrabit Sanctis in Patria videntibus eum facie ad faciem, absconditis in abscondito faciei Dei à conturbatione hominum. *A facie Domini mota est terra;* quia à prima facie, & aspectu ejus debet moveri terra cordis nostri ad contemptum terrenorum: secunda facie ad compassionem & patientiam ciemur, ne simus duriores petris Christo patiente scissis. Et certè *devotus miles sua non sentit, cum benigni ducis vulnera intuetur,* ut ait Bernardus. A tertia facie movemur ad timorem & poenitentiam, timeantes Deum quasi tumentes super nos fluctus. A quarta facie impellitur ad amorem æternorum, & futuræ vitæ desiderium. Si Deum sub aliqua facie præsentem contemplamur, citò novam faciem induet vita, induet conversatio nostra, juxta illud Isaia 26. *A facie tua Domine concepimus, & quasi parturivimus spiritum salutis.* Veridicè Hieron. in cap. 8. Ezechiel. *Memoria Dei excludit cuncta flagitia.* Et rursum: *Quando peccamus, si cogitaremus Deum videre, & esse præsentem, nunquam quod ei displiceret, faceremus.*



# LIBER SEXTVS.

## De Deo prima regula vitæ humanæ.

### PRÆLOQVIUM.

**I**NDIGITATO beatitudinis scopo, in quem collimare tenemur, quærenda est via quâ ad ipsum perveniamus. Nam ut prudenter scripsit Seneca lib. de vita beata, cap. i. *Proponendum est primum quid sit quod petamus; tunc circumspectendum est, quâ contendere illò celerrimè possimus. Decernatur itaque & quò tendamus, & quâ.* Sed dicet fortassis nemo: Quomodo tam arduum, tam sublime bonum, in quo beatitudinem hominis collocavimus, asciscere nobis valebimus? Quis audebit ambire magnitudinem præmii, quod in cor hominis non ascendit? Verùm noli diffidere, ne desperes illuc posse pervenire, si bene volueris non pedibus, sed affectibus ambulare. Actibus humanis comparatur felicitas: Ergo tuæ tu faber eris fortunæ, si volueris; &

Deum summum bonum , & ultimum finem consequeris , si ipsum primam regulam sequaris. Nihil homini facilius velle , nihil felicius bene velle. *Regnum cœleste* , inquit Augustinus , *aliud non quarit pretium quàm teipsum. Tantum valet , quantum es tu. Te da , & habebis illud.* Dat autem se homo actibus humanis & moralibus , de quibus pròinde impræsentiarum differendum est. O *summam Dei Patris liberalitatem !* inquit eximie Picus Mirandulanus , *summam & admirandam hominis felicitatem ! Cui datum id habere quod optat , id esse quod velit.*

Ut autem materia infinita certis limitibus , præfiniatur , ut suus cuique libro ordo constet , ne in materia , ut ita dicam , immensa temerè ac sine lege vagemur , ut denique in tanta , tamque multiplici rerum moralium disquisitione levamen habeat memoria , in hoc sexto libro de actibus humanis ad amussim divinæ regulæ exigendis agemus , in septimo sequenti de virtutibus à Deo summo exemplari exscribendis , virtutisque quibus divina obliteratur imago , sermo instituetur ; in octavo tandem supremi Legislatoris mandata proponemus , quibus servatis honestè , christianèque vivamus.

Quærant autem , & conqueruntur non pauci & pietate insignes , & doctrina conspicui , & dignitate præfulgidi , potissimum verò Pastores animarum , unde non multis abhinc annis tanta in doctrina morali irrepserit laxitas , effrenisque noviter opinandi libido. Videmus enim & legimus nova quotidie prodire volumina , egregio Theologiæ moralis titulo corruptelas tegere innumeras , ut sordidarum opinionum faeces

illustri fūco velentur, non secus ac profundum cœnum & graveolentem paludem vestit viridanti fronde fragilis cæspes, vel sicut fumum: nubes induunt, ipsisque anguibus pulchrum veneni tegmen verficoloris tergo & squamis fulgentibus non deest. Cernimus & flemus nusquam se latius effudisse scribendi licentiam, nusquam majorem criminibus veniam datam, nusquam magis contra Deum & naturam peccasse impotentis ingenii humani lasciviam; & post tot corruptelas nescio quid dicam, nisi ut cum Augustino doleam præsumptionem humanam, & mirer patientiam divinam. Unde hoc quæso? Unde hoc? Unde nova quotidie adduntur pejora prioribus? Unde sicut in corporibus infirmis fœssulæ quædam, vel cavi imprimuntur (cauteria vocantur) quæ sunt velut cloacarum ostia & emissaria, quibus sordes ex universis ædibus educuntur, in quæ cæterorum membrorum infesta pituita nexiique humores derivantur: sic in non paucas hujus sæculi scriptiones præteritorum omnium fæces, cunctarumque immanitas culparum confluisse videntur?

Duplex hujus morbi, quo laborat orbis, mihi & sapientioribus origo occurrit. Prima, quia nonnulli (heu non tot!) narrationes Patrum & seniorum prætereuntes propriæ innituntur prudentiæ: non ad amussim lapidem, juxta Philosophi præceptum, sed ad lapidem amussim aptantes, mores non ad normam canonum componunt, sed canones ad morum corruptelam turpi accommodatione inflectunt: non ad Evangelium opinionationes suas, sed ad suarum opinionationum præjudicia Evangelium mo-



tuntur : non legibus subjiciendo voluntatem, sed ad voluntatem. voluptatemque trahunt obliquantque legem, inductoque probabilitatis specimine, fucatoque involucro omnia ita fatagunt honestare, ut nullus jam supersit casus, in cujus gratiam bivium protinus non sit apertum, & quæ hactenus pugnantia & repugnantia videbantur, opinantium beneficio conciliata sint. Cernere enim est in non paucis Neotericorum lucubrationibus sententiarum pugnas perpetuas non ullo Scripturarum, Canonum, Patrumque præsidio munitas, sed modernorum & coætantorum Doctorum syllabo benè longo hinc inde vallatas. Ut huic ingenti, præsentique malo provideretur, monui dissertatione prima superioris libri, Theologo recurrendum esse ad fontes, quorum purissimas aquas ibi propinavi. Et certè indignum est controversias quasque morales ad solos humanæ rationis calculos, vel ad dialecticos, vel metaphysicos laqueos contrudere. Quid perniciosius Fidei, quid hæreticis favorabilius esse potest, quàm Ethicæ Christianæ, divinarumque institutionum auctoritatem, quarum una propemodum ratio, æterna lex, una revelatio, una Dei voluntas est, offuso minutiarum inanissimarum pulvere importuno obducere, ut illis animorum oculis majestas Religionis, splendorque vilescat? Sanè præposterum & levis ingenii est res tam sacras, tam augustas ad meras distinctiones metaphysicas, & Logicæ præcisiones admetiri. Suus cuique ordini genius : sancta sanctè tractanda sunt, & Christiana instituta non sunt lubricis humanæ mentis evagationibus, vel corruptæ voluntatis proluyiis expendenda. *Apagge*



ergo apage illos egregios scilicet instauratores, qui cum ex legibus abusus inolitos emendare deberent, ex ipsis abusus perpetuam Romanæ Ecclesiæ disciplinam intolerabili rerum theologicarum distorsione & contumelia delere conantur. Captivanda est ratio in obsequium fidei; castiganda lascivientis animi subtilitas utilis amans, & in propriis commodis quæritandis ingeniosa: nec ad pueriles Logicorum argutias & captiunculas revocanda sunt Catholica dogmata, & Ethicæ capita; quia nullis sophismatis, nullo rationum apparatu aut ornatu mutabitur veritas, quæ neque cælo ipso & terra transeunte transibit: nec ullis temporum corruptelis depravabitur incorruptus Ecclesiæ Romanæ, seu Catholicæ sensus, à primis Christianismi cunabulis ad hæc tempora confirmatus. Etenim diebus nostris gavisus sumus gaudio magno valde, dum summi Ecclesiæ Præsules novitatum monstra cum speculativa, tum moralia, tot venenis tumentia, tot erroribus facta confixere.

Alter tot malorum fons est, quia facilius quam par sit in materia morum deseritur S. Thomas. Audivi nonnullum de discipulatu D. Thomæ gloriantem, sed reverà pseudothomistam temere effusiisse, S. Doctoris sensis speculativis se adhærescere, sed resolutionum ejus moralium non esse tenacem. Veritas tamen est, veros Angelici Præceptoris discipulos rigidiores esse moralis ejus doctrinæ sectatores, adeo ut si aliquando rerum deserendus foret Magister ille, in cujus verba jurarunt, data optione mallet ab ejus speculativis assertionibus recedere, quam decisiones morales quadantenus temerare.

Sciunt de nullo seorsim moderno Doctore, nec de omnibus simul sumptis neotericis Scriptoribus dictum fuisse, quod de Aquinate asseruit Innocentius VI. quod qui ejus doctrinam tenuit, nunquam inventus est à veritatis tramite deviasse, & qui eum impugnavit, semper fuit de veritate suspectus. Sciunt quod, teste Clemente VIII. ad Neapolitanos, S. Thomas in omni disciplinarum genere sine ullo prorsus errore scripsit. Sciunt consultò & de industria à Sapientia incarnata scripta Thomæ consecrante dictum esse: *Benè scripsisti de me Thoma.* Quæ particula *benè*, licet omnia elogia compendiosè concludat, potissimè tamen illo adverbio significatur, Angelicam doctrinam bonos efficiere suos sectatores.

Ratio verò, cur S. Doctör licet ubique reverenter audiendus sit, in moralibus tamen sit omnibus, etiam sibi præferendus; ratio, inquam, est duplex. Prima quia cum in negotio salutis nulla sit satis magna securitas, ubi tota periclitatur æternitas, illius profectò Doctöris assertis immobiliter hærrere debemus, cujus doctrina est ex omni parte tuta, & Deo dante eam sectando salutem consequemur, quam ille docendo adeptus est sanctitatem. Dicebat olim confidenter Hugo Victorinus, tantum esse fidei credibilitatis argumentorum concentum, ut si error foret, planè essemus à Deo decepti. Eandem ferè ingenerat mihi Angelici Præceptoris nostri doctrina fiduciam, quam sequens si devio, à Pontificibus, à Conciliis, à Christo inaugurante deceptus sum.

Altera ratio, & valde profunda est; quia immodè speculativis ingenium subtile, acre judi-

cium, vigor mentis, eruditionis supellex plurimum valent; sed in moralibus determinandis sanctitas vitæ potissimum desideratur, ut iudicium sit rectum, quia moralia pendent à prudentia, prudentia verò à recta intentione & pietate eximia; qui enim non habet appetitum rectum, facile ingenii subtilitate legem nititur depravare, ut suis faveat desideriis, & concupiscentias suas honesti fuce præcoloret; nam qualis unusquisque est, talis & finis videtur ei, teste Philosopho. Intus etiam existens prohibet extraneum: unde sicut icterico morbo correptus omnia flavo colore inducta & tincta videt; sic vir quàmlibet doctus, pravis affectibus inquinatus, sæpius bonum malum, & malum bonum definit. At verò Sancti prius faciunt quàm doceant, more illius qui cœpit facere & docere. Unde non legem ad privata detorquent præjudicia, sed de omnibus in spiritu & veritate judicant; & ideo dicitur, quod spiritalis homo judicat omnia, ipse verò à nemine judicatur: item quod iusto non est posita lex, quia de omnibus juxta interiorem Spiritus sancti motum sententiam ferunt, & in bonum veluti sponte & connaturaliter appetitus eorum propendet. Quare sicut facta Sanctorum approbata sunt ab Ecclesia per publicam canonizationem, quâ fidelibus veluti conspicua pietatis exemplaria exponuntur; ita doctrina eorum in tuto posita est, quia sicut docuerunt, ita & fecerunt. Doctor autem qui non sedulam operam navat sanctitati, qui non gustavit quoniam suavis est Dominus, qui non est spiritalis, nec experimentum habet Christi in se loquentis, talis in moralibus consiliis dandis

sæpe cæcutiet, sæpe cæcis ducatum præbens. ambo in foveam cadent. Præclarissimè, nec minùs tempestivè Ambrosius lib. 2. de officiis: *Advertendum quod in acquirendis consiliis plurimum valet vita probitas, virtutum prærogativa, benevolentia usus, facilitatis gratia. Quis in cœno fontem requirat? Quis de turbida aqua potum petat? Itaque ubi luxuria est, ubi intemperantia, ubi victorum confusio, quis inde sibi aliquid hauriendum existimet? Quis utilem judicet causa aliena, quem videt inutilem sua? Quomodo enim potero eum judicare consilio superiorem, quem video moribus inferiorem? Supra me debet esse, cui committere paro. An eum idoneum putabo qui mihi det consilium, quod non dedit sibi? Et mihi animi vacare credam, qui sibi non vacat, cujus animum voluptates occupant, libido devincit, avaritia subjugat, cupiditas perturbat. Quid elegantius, vel opportunius?*





# DISSERTATIO I.



UMANORVM actuum physicam entitatem non physicè vel metaphysicè examinabimus, sed quatenus sunt fundamenta, quibus Ethica Christiana superstructa est.

---

## CAPVT I.

*Representatur Oeconomia mirabilis  
actuum humane voluntatis  
in esse physico.*

**S**UPER omnia opera sua effudit quidem Deus sapientiam suam, sed in animam rationalem profudisse videtur. Res digna admiratione: anima cæterarum rerum naturas describit, & seipsam vix novit, oculata in rebus alienis, cæca in propriis. Solus qui condidit Deus, eam rectè definivit, dum ait esse ad imaginem & similitudinem suam; quia elucet in ejus ingenio sapientia, fecunditas in memoria, in voluntate libertas, ut in universitate vires Dei gerat anima, & homo sit in orbe spe



stabilis Deus. Sed inter animæ miracula suspi-  
cienda occurrit humanorum actuum harmonia.  
Quis enim non miretur assiduos voluntatum  
fluxus, voluntatumque refluxus? Quis non  
stupeat ad tot organorum motum, passionum  
impetum, potentiarum exercitium, quæ vo-  
luntatis subduntur imperio? Quem non rapiat  
actuum successio assidua, multitudo infinita,  
concertus singularis, & tantus virtutum orna-  
tus, quo (si charitas non desit) quasi vestitu  
deaurato circumamicta ineffabili circumdatur  
varietate. Unde non desunt quæ eam harmoniæ  
musicæ conferunt, quæ in sonorum concordi  
discordia sentiri solet, & quasi fluere. Unde be-  
nè nonnullus dixit, cor humanum infinitam  
esse profunditatem; ibi sunt triclinia, cubilia,  
fores, vestibula, ministeria multa, & exitus  
multi: ibi est officina, tum justitiæ, tum ini-  
quitate: ibi abyssus immensa, ubi tot specus,  
tot antra, tot latibula, quot affectuum ostia, in  
quibus immanes passionum feræ latent. Con-  
jice qualis sit voluntas ex secunda Summæ D.  
Thomæ parte, quæ quâmlibet immensa sit  
quantitate molis & virtutis, tota quanta in spe-  
culanda voluntatis supellectile occupatur. Ex-  
hibeamus primùm actus humanos in esse physi-  
co, sed operæpretium est prius rationem vo-  
luntarii & involuntarii delibare.



## SPECVLATIO I.

*Omnes de voluntario difficultates  
ex ejus definitione liquidò  
derivantur.*

**P**Lures & spinosæ agitari hîc solent difficultates; sed quia eas diffusè pertractant Philosophi morales, earum duntaxat medullam exprimemus, eaque seligemus, quæ Theologico sunt opportuna instituto. Porro nemo mentis compos in dubium revocare potest, num detur voluntarium; id enim peræquè certum est, ac dari voluntatem. Definitur autem communiter voluntarium, *Quod est à principio intrinseco cum cognitione finis*. Dicitur à principio intrinseco, ut distinguatur à violento & artificiali, quorum principia sunt extrinseca; principium namque artefacti est ars existens in intellectu artificis; principium violenti est agens inferens vim passivæ rei. Distinguitur etiam per illam particulam à voluto, quod est idem ac obiectum terminans voluntatem: unde non est nisi denominatio extrinseca petita ab actu voluntatis: voluntarium verò est aliquid à voluntate procedens, cum debeat à principio intrinseco, vel eliciente, vel imperante, vel aliquo tandem pacto influente profilire. Additur, *cum cognitione finis*, ut voluntarium distinguatur à merè naturali, cujus principium est quidem internum, sed nulla prælucente cognitione dirigitur. Per hoc etiam

distinguitur ab actibus intellectus, qui licet sint à principio intrinseco, & cognoscant finem, imò ex cognitione finis ad cognitionem mediorum progrediantur; non tamen essentialiter cognitionem finis moraliter allicientis præsupponunt, aliàs daretur in infinitum processus. Maximè quia actus intellectus non procedunt ex cognitione finis formaliter, ut finis & bonum est, sed ut est quoddam verum: unde unum inferunt quidem ex alio, sed non alliciuntur ab illo: atque adeo particula illa, *cum cognitione finis*, formalissimè intelligenda est de cognitione practica finis, quà finis est.

Dices: Actus supernaturales sunt maximè voluntarii, cum sint motus bonæ voluntatis: Sed illi actus sunt à principio extrinseco, nempe auxilio Divino de foris adveniente: Ergo non omne voluntarium est à principio intrinseco.

Respondeo actus salutes non à sola gratia procedere voluntate merè passivè se habente, sed à voluntate divino quidem adjutorio præventa, adjuta, & roborata, sed agente: *Aguntur, ut agant, non ut ipsi nihil agant.* Et Bernardus aliàs laudatus: *Non partim gratia, partim liberum arbitrium, sed totum singula opere individuo peragunt; totum quidem hoc, & totum illa; sed sicut totum in illo, ita totum ex illa.* Ex hac definitione voluntarii benè penetrata continuò deducuntur innumeræ difficultates, ut sequentibus corollariis dearticulatè monstrabimus.

**COROLLARIUM I.** *Duplex est voluntarium, aliud perfectum, aliud imperfectum.*

Probat<sup>ur</sup> : Voluntarium est à principio intrinseco cum cognitione finis : Ergo distinguenda est ratio voluntarii penes cognitionem finis, quæ duplex est, perfecta scilicet & imperfecta. Perfecta apprehendit non solum rem, quæ est finis, sed etiam rationem finis, & proportionem mediorum ad ipsum, & sic convenit naturæ rationali agenti ex deliberatione : imperfecta in sola rei, quæ finis est, apprehensione sistit, nec rationem finalem considerat ; & sic reperitur in brutis animantibus, quorum appetitus fertur in bonum apprehensum, non ex prævia deliberationis luce, sed naturali impetu ; à quo agendi modo non multum recedunt actus hominis subiti & indeliberati, qui cum rationis advertentiam præveniant, ex perfecta finis cognitione & directione minime procedunt.

Dices : Primus amor finis est perfecte voluntarius : Sed ille amor ex prævia deliberatione non procedit : Ergo ad perfectum voluntarium prævia deliberationis apparatus minime exigitur.

Respondeo primum amorem finis non subijci deliberationi consummative, sed inchoative, quia ex illo amore finis procedit voluntas ad mediorum electionem ; sicut motus cordis vitalis est, quantumvis ab alio vitæ principio non promanet, quia ab ipso ut à fonte omnis vitæ motus profluit. Accedit quod licet de fine in

communi non sit deliberatio, omnes quippe volunt beatè vivere, & bonum quà tale nemo odisse potest; tamen finis in particulari sub deliberationem cadit. V.g. omnis bonus Christianus vitam rectè instituere concupiscit, verùm an statum Regularem saculari præferre debeat, examini deliberationis subijcit.

**COROLLARIUM II.** *Amor beatificus est perfectè voluntarius.*

Probatur contra Vasquem & Lorcam existimantes perfectam rationem voluntarii in solis actibus liberis inveniri. Voluntarium est id quod procedit à principio intrinseco cum cognitione finis: Ergo ille actus est perfectè voluntarius, qui à principio maximè intrinseco & à perfectissima cognitione finis procedit: Atqui amor beatificus talis est; procedit enim à voluntate toto corde, totis præcordiorum affectibus, totisque viribus Deum amante; procedit etiam ex perfectissima cognitione finis, scilicet visione beata ipsam bonitatis essentiam ut in se est clarissimè repræsentante: Ergo amor ille est perfectissimè voluntarius.

Dices: D. Thomas *quest. 6. art. 2.* perfectam rationem voluntarii iis solum actibus asserit, qui cum libertate & deliberatione procedunt, quosve laus & vituperium comitatur: Sed amor beatificus est necessarius, non liber, nec subinde meritorius, vel laude dignus: Ergo non est perfectè voluntarius.

Respondeo S. Doctorem ibi rationem voluntarii non adæquatè in tota sua latitudine expli-

care, sed illud exemplo actus liberi nobis notioris declarare. Nisi dicas S. Præceptorem loqui de actibus voluntariis viæ, quod patet ex eo, quod ibi distinguat voluntarium perfectum ab imperfecto, quod in motibus subitis rationem prævenientibus invenitur: constat autem amorem beatificum visionem beatam consequentem non esse motibus illis repentinis annumerandum.

Hæc profundius penetrabis, si consideres quod licet in amore beato non inveniatur libertas formalis, sed necessitas; illa tamen necessitas non ex ligatæ potentia coarctatione, vel tenuitate aut imbecillitate apprehensionis objectum proponentis oritur, sed ex plenitudine & eminentia summi boni clarè visi, satiantis & implentis totam voluntatis universalitatem & amplitudinem, quæ est germana radix libertatis, quia cum nullo bono creato expleri possit, circa illa habet indifferentiam. Necessitas autem orta ex plenitudine cognitionis, & universalitate objecti adæquantis capacissimum voluntatis sinum, non minuit rationem voluntarii, sed perficit, & coronat. Et in hoc sensu amor ille omni laude eminenter dignus est, cum illi conferatur æterna gloria, quæ est omnis laudis cumulatissimum coronamentum. Præsertim quia amor beatus est expressio ipsius increati amoris, quo Deus se amat, quovè producit Spiritum sanctum; quem Dei amorem esse perfectissimè voluntarium, non minus videtur esse per se notum, quàm voluntatem Divinam esse perfectissimam. Quid enim absurdius vel dici, vel cogitari potest, quàm si asseratur Deum magis voluntariè creaturas, minus voluntariè seipsum redamare? Quo exem-



plō omnes adversariorum instantiæ evanescent, quæ fundantur in hoc, quod perfectius sit agere cum libertate & dominio super actus suos, quàm cum necessitate: sed hoc principium falsitatis convincitur in actu Dei necessario, qui non solum perfectissimus, sed mera perfectio est. Igitur necessitas non impedit quominus amor beatus perfectè voluntarius sit, cum perfectissima cognitione dirigatur, sitque maxime à principio intrinseco, utpote ex intima voluntatis propensione, & totali inclinatione procedens. Sicut enim voluntas Deum videntis totaliter summo bono præsente impletur, ita totaliter in illud fertur.

**COROLLARIUM III.** *Ratio voluntarii non convenit univocè hominibus & brutis, sed tantum analogicè.*

Probatur: Voluntarium est à principio intrinseco cum cognitione finis: Ergo juxta modum cognitionis est modus voluntarii, nec potest esse univoca ratio voluntarii, nisi sit univoca ratio cognoscitivi: Atqui bruta non conveniunt univocè cum homine in ratione cognoscitivi; cognitio enim rationalis & intellectiva, quæ est character hominis, non est simpliciter eadem in bruto, cum per eam differat à bruto, in quo ratio non invenitur, nisi penes imperfectam imitationem & participationem deficientem, multò minorem participatione entis, quæ invenitur in accidente comparato substantiæ: unde non simpliciter eadem, sed simpliciter diversa est ratio voluntarii in natura rationali, & brutali; & in ista participativè & deficienter, in illa



essentialiter invenitur, ut docet S. Thom. 9.6.  
*art. 2. ad 1.*

Et certè cùm in brutis non inveniatur voluntas, falsò omninò ratio voluntarii illis simpliciter asseritur, cùm illis desit principium illud internum, à quo voluntarium nomen & essentiam fortitur. Deest etiam illis cognitio finis; bruta siquidem non cognoscunt rationem finis formaliter, non solùm quia finis quidditatem non attingunt, quam etiam non omnes homines, sed soli sapientes norunt; sed etiam quia munus & officium finis correlati ad media, nec mediòrum ad finem proportionem norunt, sed instinctu & impetu ab Authore naturæ indito feruntur, subindeque carent utraque voluntarii conditione, moventurque duntaxat vitaliter à principio interno, modo quidem super plantas & arbores altiori, sed ad voluntarii rationem nequaquam pertingente.

**COROLLARIUM IV.** *Remoto omni actu voluntatis, omissio non potest esse voluntaria, etiam advertente ratione, & urgente precepto.*

Ratio est; Voluntarium est id quod procedit à principio intrinseco cum cognitione finis: Atqui si nullus sit actus voluntatis, nihil intelligitur procedere à voluntate, nec voluntas potest actualem libertatem exercere per solam actus suspensionem; voluntas namque carens omni actu est veluti mortua, vel saltem dormiens, carens omni actu secundo vitæ: quis autem intelligat ibi esse libertatem actualem, ubi non est vita actualis? Quomodo autem est vita actua-

lis, si nullus sit motus voluntatis? Ergo omissio non potest causari à voluntate modo proprio voluntati, idest vitaliter & voluntariè, & ab omni actu suspendatur.

Confirmatur: Duplex est voluntarium, aliud in actu primo, aliud in actu secundo. Primum solam facultatis potentiam requirit: secundum exigit quod illa facultas sit quodammodo redacta in actum. Cùm enim voluntarium dicat habitudinem ad voluntatem ut causam, voluntarium in potentia est illud ad quod voluntas est indifferens; voluntarium verò in actu requirit aliquam voluntatis causalitatem & influxum. Atqui si nullus sit actus voluntatis, nulla est causalitas, nullus positivus influxus, sed mera operationis carentia, & suspensio manens in statu indifferentiæ? Ergo omissio non potest esse voluntaria sine aliquo actu, qui sit causa, vel occasio illius.

Ad quorum claritatem & æquivocationum ambages dissipandas considerandum est, non requiri actum ut omissio sit voluntaria ex vi & natura omissionis, de cujus essentiali ratione est privatio & cessatio actus voluntarii; sicut cæcitas est carentia visus, & mors privatio vitæ: Sed sicut cæcitas ex positiva actione oculum alterante consequitur, mors ex actione corrumpente animal resultat; ita omissio voluntaria & privativa non consequitur nisi ex aliquo actu, qui sit causa vel occasio omittendi. Et ita expressè tradit S. Thomas quæst. 71. art. 5. *Si in peccato omissionis consideretur id quod per se pertinet ad rationem peccati, sic aliquando est omissio absque omni actu, tam exteriori quàm interiori. Si verò in peccato omissionis intelligantur etiam causa, vel occasiones*

*casiones omittendi, sic non est emissio aliusque aliquo actu.* Quibus verbis intelliguntur & conciliantur plura alia S. Doctoris testimonia, in quibus ait voluntarium posse esse absque omni actu, tam exteriori, quam interiori, scilicet cum homo non vult; & omissionem posse esse peccaminosam sine actu, præcisè ex hoc quod homo dum tenetur, non vult: in illis enim loquitur de omissione secundum propriam & essentialem rationem; quæ tamen ut in individuo exerceatur, exigit actum, qui sit causa & occasio illius: sicut licet corruptio passivè sumpta in sua essentiali ratione non dicat actum, sed carentiam, tamen reapse nunquam causatur sine aliqua actione; corruptio namque sequitur actionem generativam introducentem novam formam, & expellentem veterem.

Quod diximus de actu voluntatis, à fortiori verum est de actu intellectus, ita ut ommissio nullatenus voluntaria sit, si nullus præcedat, vel comitetur actus intellectus; tunc enim ommissio nec procedit à principio intrinseco, cum à nullo voluntatis actu originetur; nec cum cognitione finis, siquidem nullus supponitur esse actus intellectus: ergo tunc deest utraque conditio essentialiter ad voluntarium requisita, subindeque ommissio illa non est voluntaria, sed ignorata ignorantia invincibili, nisi fortè esset negligentia in expellenda illa ignorantia, quod semper formidant viri Sancti, & orant: *Ignorantias meas ne msemneris.* Quod si Sancti tam studiosi, tam vigiles incuriam in ignorantia sua timent, quomodo se excusant desidēs, & peccatis ignorantie cum novis Probabilistis colores prætexunt? Sed de his alibi.

Dices : Voluntas est potestas ad velle & non velle: Sed non velle dicit negationem actus, cum contradictoriè opponatur velle, qui est actus voluntatis: Ergo voluntas exercetur & per velle, & per non velle, suppositâ tamen advertentiâ rationis. Certè in hoc distinguitur libertas contradictionis à libertate contrarietatis, quod illa elicit unum actum, vel oppositum ejus, v. g. amorem vel odium: at verò libertas contradictionis exercetur vel eliciendo actum, putà amorem, vel advertenter suspendendo illum: Ergo omissio est sufficienter voluntaria eo ipso, quod homo prudens & sciens non vult elicere actum.

Respondeo, voluntatem habere potestatem ad non velle non merè negativè, sed privativè vel contrariè sumptum, quatenus tale non velle causatur à voluntate: nam ipsa potentia secundum se, & nudè considerata dicit carentiam velle, sed tunc non causat omissionem, sed eam patitur. Nec refert quod homo sciens & prudens actum illum omittat, quia hoc probat quidem tunc adesse cognitionem finis, sed non influxum principii intrinseci, qui tamen est essentialiter requisitus ad rationem voluntarii. Ad id verò, quod additur de differentia inter libertatem contrarietatis & contradictionis, similiter respondetur, libertatem contradictionis ad amandum exerceri quidem per non amorem, sed supposito actu qui antecedit vel comitetur hujusmodi amoris suspensionem; voluntas etenim nequit seipsam, vel alias facultates vitaliter suspendere, nisi talem suspensionem velit vel directè per actum expressum, vel indirectè eliciendo alium actum, ad quem divertit. Præsertim quia propter sympathiam intellectus & voluntatis, stante cognitio-

ne de aliquo objecto, non potest dormire voluntas, sed ad velle, vel nolle, aut directè, aut saltem indirectè necessitatur. Cujus ulterior ratio est, quia omissio voluntaria est fuga & recessus ab objecto proposito per intellectum: voluntas autem nunquam actu recedit ab aliquo objecto, quod sibi proponitur ut malum, nisi ex prosecutione alicujus boni ad quod afficitur. Unde necessariò omnis ommissio supponit aliquem actum, seu affectum erga bonum amatum, qui affectus antecedit, vel comitatur, subindeque fundat omissionem voluntariam.

**COROLLARIUM V.** *Vt omissio sit indirectè voluntaria, non solum physicè, sed etiam moraliter, non requiritur præceptum.*

Ita Martines & Joannes à S. Thoma contra Medinam, Lorcam, aliosque: & probatur. Voluntarium est à principio intrinseco cum cognitione finis: Atqui etiamsi non sit præceptum, ommissio est à principio intrinseco cum cognitione; supponimus enim intellectum advertere, & voluntatem elicere aliquem actum, ex quo immediatè consequatur ommissio à voluntate: Ergo semoto præcepto & obligatione, ommissio est verè voluntaria; non enim aliter ommissio à voluntate indirectè procedit: ommissio namque cum sit aliqua carentia, non petit immediatum influxum, sed quod sequatur ex actu voluntatis incompossibili cum actu cujus est privatio.

Urgetur hæc ratio: Sicut voluntarium est à principio intrinseco cum cognitione, ita quod

impertinenter se habet ad rationem principii intrinseci & rationem cognitionis, impertinenter etiam se habet ad rationem voluntarii: Atqui præceptum nihil omninò facit, sed penitus impertinenter se habet ad rationem principii intrinseci, cum præceptum forinsecus sonans sit omninò extrinsecum, versans circa voluntarium tanquam materiam quam dirigit, non causat; subindeque omissionem in potestatem voluntatis non ponit, sed supponit. Nihil etiam conducit præceptum ad rationem cognitionis, quia licet addat & ingeneret cognitionem obligationis, non tamen parit maiorem cognitionem omissionis, quæ sola influit in omissionem, dum eam proponit voluntati ut respuendam, vel acceptandam.

Quod autem omissio etiam secluso præcepto sit voluntaria non solum physicè, sed etiam moraliter, facile ex eodem principio iuatur. Voluntarium est à principio intrinseco cum cognitione finis: Ergo nullum datur voluntarium, quod non dirigat cognitio rationis, subindeque quod non subijciatur rationi, sicut nihil est volitum quin præcognitum: Sed quod subijcitur regulæ & directioni rationis, pertinet ad ordinem moralem: Ergo omissio, secluso præcepto, non solum physicè, sed etiam moraliter est voluntaria. Idque illustrari potest exemplis; nam plures omissiones nullo urgente præcepto sunt meritorie, v.g. qui sciens & volens omittit nubere, vel sæculi bonis uti, quia Clericalem, vel Regularem statum ingreditur, utique copiosè apud Deum meretur, tametsi nullum sit præceptum de assumendo statu clericali, vel regulari: qui sciens & volens caret aliqua re-



creatione, quia eo tempore vacat orationi, quo posset licitis illis solatiis indulgere, sine dubio meritorie omittit, nec oppositum videtur posse dici sine sensus & pietatis communis manifesta offensione. Quod si omissio est meritoria sine præcepto & obligatione, profectò est libera, proindeque voluntaria.

Objicies auctoritatem S. Thomæ q.6. art.3. docentis, quod non semper id quod sequitur ad defectum actionis reducitur sicut in causam in agens ex eo quod non agit, sed solum tunc cum potest & debet agere.::: Quia igitur voluntas velle & agendo potest impedire hoc quod est non velle & non agere, & aliquando debet; hoc quod est non velle & non agere imputatur ei, quasi ab ipsa existens. Ergo ut omissio sit voluntaria, requiritur debitum & obligatio.

Respondco S. Doctorem seipsum aperte interpretari; manifestè enim dat intelligere se loqui de omissione ut imputabili, quæ tunc solum contingit, cum quis potest & tenetur agere; ait enim: Quia voluntas debet, hoc quod est non velle, imputatur ei quasi ab ipsa existens. Cum quo tamen stat, omissionem illam esse physicè & moraliter voluntariam, eo modo quo actus, ex quo sequitur omissio, est voluntarius. V. g. omissio Missæ in die profectò est eo modo voluntaria, quo labor propter quem contingit est voluntarius, qui utique & physicè, & moraliter voluntarius est: omissio tamen illa Missæ non imputatur voluntati, quia ad eam audiendam non tenetur; sicut labor ille non imputatur, nec reputatur malus, quia ab eo relinquendo non obligatur: in moralibus autem non imputatur omis-

sio, vel effectus ullus, nisi cum adest obligatio, urgetque præceptum.

Dices: Omissio Missæ die feriali non est voluntaria, secluso præcepto, si non habeat rationem privationis, sed meræ negationis; omissio enim purè negativa erat, etiam antequam voluntas veller: unde ut negativa est, causari nequit à voluntate, subindeque non potest esse voluntaria: Atqui semoto præcepto, omissio non habet rationem privationis, sed meræ negationis; privatio enim est carentia formæ debitæ subjecto: secluso autem præcepto, non est debitum audiendi Missam: Ergo omissio absente, vel cessante præcepto, non est voluntaria.

Respondeo duplex esse debitum, unum morale seu legale, aliud physicum seu naturale, vel quod in idem coincidit; aliud est debitum obligationis, aliud exigentiæ & dispositionis: utrumque illud debitum comitatur duplex privatio; alia moralis, quæ est carentia actus debiti propter imperium legis; alia physica, quæ est carentia actus, cujus est aliqua dispositio, vel exigentia. Licet ergo opus, v.g. auditio Missæ, sublato præcepto non sit debitum debito morali & obligationis, est tamen suffieienter debitum debito physico exigentiæ vel dispositionis, hoc ipso quod est cogitatio vel dictamen proponens practicè opus, putà auditionem Missæ; quod rationis dictamen respicitur per hoc quod homo prudens & sciens aliud opus aggreditur; subindeque non obstante cogitatione disponente, & quadantenus exigente auditionem Missæ, homo voluntariè omittit Missam, nec merè negativè, sed privativè se habet ad illam; sicut materia quæ habet aliquam exigentiam & dispositionem

ad formam, dicitur ea privari, si non obstante tali dispositione alia introducatur. Manifestum est autem, quod cogitatio proponēs auditionem Missæ, de se & per se disponit ad illam audientiam; initium enim cuiusvis operis est cogitatio de illo: & ideo Semipelagiani convincebantur admittere dispositionem naturalem ad gratiam, hoc ipso quod initium congruæ cogitationis prævenientis auxilium naturæ viribus asserabant. Veritas ergo est, cogitationem esse dispositionem physicam ad opus, subindeque si non obstante cogitatione & advertentia Missæ aliquis voluntariè ludit, tunc omissio Missæ habet rationem privationis, & non meræ negationis.

Instabis: Si opus quod tempore Missæ exercetur, refunderetur in voluntatem tanquam in causam omissionis Missæ, eamque redderet indirectè voluntariam, efficeret etiam voluntarias omnes omissiones actuum impossibilium cum illo opere, quæ sunt innumeræ. Consequens est absurdum; nam aliàs infinitæ illæ omissiones essent meritoria, sicut libera voluntaria, quod tamen nullus admittit: Ergo & antecedens admitti non debet.

Respondeo quod cum voluntarium sit à principio intrinseco cum cognitione finis, non sufficit ad rationem voluntarii indirecti, quod producat aliquis actus impossibilis cum aliis actibus, sed insuper exigitur ut sit cogitatio actus omissi; & quia dum homo elicit aliquod opus, non semper, imò nunquam advertit ad omissionem omnium actuum impossibilium cum opere suo; ideo non sequitur, omissiones innumerorum actuum possibilium, & cum actu præfenti impossibilium esse voluntarias, sed

illius solum, quem sciens, & advertens omittit. Quis enim dicat, hominem existentem in Ecclesia audientem sacrum, in medio Missæ advertenter exire de Ecclesia ad ludendum; & tamen illum non voluntariè omittere Missam, quia id facit in die profesto, vel non magis voluntariè Missam prætermittere, quàm prandium, de quo non cogitat? Vides ergo cognitionem operis omissi & impossibilis cum actu qui elicitur, esse radicem cur omissio alicujus operis sit voluntaria, non verò omissio infinitorum operum, de quibus nulla subit cogitatio.

Urgebis: Omissio Missæ, secluso præcepto, non est bona vel mala in exercitio: non bona, si fiat intuitu minoris boni, qualis est ludus: non mala, cum non sit contra præceptum. Ergo omissio illa non est voluntaria, nullum quippe datur voluntarium indifferens in individuo.

Respondeo omissionem Missæ, secluso præcepto, eandem habere bonitatem & malitiam, quam habet actus ex quo consequitur, & in quo fundatur. Si ergo ludus propter quem Missa prætermittitur, die profesto benè fiat, omissio bona erit; si malè, mala erit, quod venandum erit ex fine, & aliis circumstantiis, quæ actum in individuo exercendum concernunt. Nec obest quod dicitur, omissionem illam non esse contra præceptum, id enim falsum esse suo loco monstrabitur; jubet enim, & lex, & ratio, ut omnia voluntaria ad bonum finem referamus.

**COROLLARIUM VI.** *Effectus tamen omissionem voluntariam indirectè consequens vel concomitans, nullatenus est voluntarius, si non sit præceptum, vel obligatio impediendi illum effectum.*

Probatür, & simul præoccupatur totum objectionum momentum afferendo rationem disparitatis, quæ omissionem inter, & affectum intercedit, & in hoc consistit. Omissio volendi est immediatè in potestate ipsius voluntatis, quæ non minorem habet facultatem ad non volendum, quàm ad volendum: Ergo ut omissio sit voluntaria, non indiget voluntas nisi advertentia rationis, & suspensione sui influxus modo vitali, quod præstat divertendo ad alterum actum; tunc enim omissio procedit indirectè à principio intrinseco cum cognitione. At verò eventus, seu effectus comitans omissionem, non est in sola potestate voluntatis, quia nisi interveniret alia causa, non sequeretur. V.g. submersio navis non sequitur solùm ex eo quod nauta non succurrat periclitanti, sed ex tempestate, & impetu procellarum: homicidium rixantium non venit solùm ex defectu ejus, qui eos non disjuxit, sed ex gladio occisoris: Ergo omissio succursus per se non influat in effectum illum contingentem, nec physice, cùm negatio non influat realiter in effectum positivum; nec moraliter, cùm supponamus nullam esse succurrendi obligationem: Ergo ut eventus ille quadatenus in voluntatem omittentem refundatur, eique interpretativè attribuat, exigitur neces-

fariò aliqua connexio moralis obligationis, ratione cuius talis effectus. pertineat ad voluntatem, cui commissa est talis eventus impeditio. Uno verbo, omissio quidem sequitur à voluntate mediante aliquo actu, sed non mediante alia potentia, quia ex eadem sua potestate voluntas divertit ad alium actum ex quo sequitur omissio, quæ proinde est à principio intrinseco cognoscente: At effectus sequitur mediante alia causa, quæ nec est ipsa voluntas, nec physicè movetur à voluntate; unde effectus ille non est à principio intrinseco, nec subinde voluntarius.

Dices: Præceptum est aliquid extrinsecum respectu talis effectus, sicut respectu omissionis: Ergo si effectus ille ante præceptum non sit à principio intrinseco, nec voluntarius, nec talis erit post præceptum.

Respondeo duplex esse voluntarium, aliud physicum, aliud morale: physicum est illud, quod procedit à reali & physico influxu voluntatis: morale est illud, quod non procedit quidem à voluntate, sed deberet procedere ab ejus potestate, quia tunc in æstimatione hominum voluntas perinde censetur ac si influeret. Effectus igitur iste urgente præcepto non est quidem voluntarius physicè, ut benè probat argumentum, eum non oriatum à voluntate, sed ab alia causa interveniente; sed est tantum voluntarius moraliter, interpretativè, & imputabiliter; quia quilibet scit, potest, debet & non impedit effectum, censetur moraliter velle eum, etiamsi voluntas non se exerceat circa illum, quia debebat se exercere, & poterat, si voluisset. At verò omissio immediata est in potestate voluntatis, quæ potestas



reducitur in actum vel directè, dum vult explicitè omissionem ; vel indirectè cùm advertenter elicit actum impossibilem cum eo qui omititur. Ex quibus obiter notabis, quod licet omne voluntarium physicum sit morale, cùm sit subiectum regulis morum ; non tamen omne morale, præsertim interpretativum, est semper physicum, quia voluntarium interpretativum est in solo intellectu interpretantis prudenter existimantis hominem velle illum eventum, quem impedire potest & debet. Loquimur autem impræsentiarum de voluntario physico, & à reali voluntatis influxu pendente.

Illustratur exemplis discrimen illud omissionis ab eventu concomitante. Deus permittens peccatum ex denegatione & omissione sui auxilii, non est causa peccati, tametsi sit causa omissionis & denegationis gratiæ ; quia peccatum non ex sola omissione auxilii, sed ex malitia & perversitate peccatoris consequitur. Quin etiam non solum eventus comitantes omissionem, sed etiam actum aliquem per accidens consequentes, nec sunt, nec reputantur voluntarii, si absit obligatio evitandorum eventuum, & interveniat alia causa à qua deriventur : sicut Deus concurrens ad entitatem materiale peccati non est causa deformitatis, quia deformitas non sequitur à peccati entitate ut est à Deo efficiente, sed ut est à creatura deficiente. Mulier formosa, & juxta statum suum modestè ornata, non est causa peccati eorum qui ejus venustate ad libidem incitantur, quia turpes illi & voluntarii concupiscentiæ motus ex perversitate cordis eorum nascuntur. Qui necessitate oppressus mutuum petit à feneratori, vel communionem à Parocho,

sacrilego, nec usurae causa est, nec sacrilegii, quia utens jure suo, non ex sua voluntate, sed ex aliorum iniquitae peccata illa consequi sinit. Idque posset innumeris aliis exemplis demonstrari, in quibus claret, quod licet ommissio, vel effectus aliquis sit voluntarius, eventus tamen ex illa omissione vel effectu sequuti, nec sunt, nec reputantur voluntarii, quantumvis aliquis eventus illos praevideat, si ad illos impediendos minimè teneatur.

Dixi in corollario, effectum comitantem omissionem *indirectè voluntarium*, non esse voluntarium; quia si ommissio sit directè voluntaria & volita, prout est causa talis effectus, tunc sine dubio eventus ille est voluntarius & volitus, siquidem tunc voluntas ordinat omissionem illam ut medium ad effectum illum obtinendum, quem voluntas positivè intendit. Sed hic non disputamus de voluntario directo, sed duntaxat de indirecto.

**COROLLARIUM VIII.** *Quatuor sunt causa involuntarii, violentia, metus, concupiscentia, & ignorantia; aliter tamen & aliter.*

Ratio generalis corollarii est, quia sicut ad rationem voluntarii duo essentialiter requiruntur, principium intrinsecum, & cognitio dirigens: ita involuntarium causari necesse est, quando operatio est à principio extrinseco, vel quando tollitur, vel ligatur, vel aliquo modo turbatur cognitio. Per violentiam operatio est à principio extrinseco, paulo nihil conferente, sed ren-

rente : v. g. motus primò primi dum antever-  
tunt deliberationem rationis sunt involunta-  
rii defectu cognitionis ; dum verò adverte-  
nte ratione resistit & repugnat voluntas , tunc illi  
motus sunt violenti , quia præcipua hominis  
pars vim patitur . Operatio etiam ex metu facta  
est quodammodo à principio extrinseco , quia  
licet voluntas consentiat & cedat metui , & pro-  
pter illum velit quod antea nòlebat ; tamen quia  
tunc voluntas agit contra propriam inclinatio-  
nem , & cum non mediocri difficultate & reni-  
tentia , talis actio dicitur à principio extrinseco ,  
non quantum ad suum egressum , sed quantum ad  
dispositionem , quæ introducta est contra incli-  
nationem voluntatis , quâ tamen stante mutatur  
inclinatio voluntatis de uno actu in alium . V. g.  
licet mercator velit simpliciter & absolutè pro-  
jicere merces urgente tempestate , ut servet vi-  
tam , illa tamen projiciendi necessitas dura est  
voluntati , quæ illi propterea per actus ineffica-  
ces renititur , ut postea dicemus . Concupiscentia  
verò licet simpliciter & absolutè augeat volun-  
tatem , ut majori cum complacentia atque suavi-  
tate eliciat actum , ad quem inclinat ; tamen quia  
sæpe sæpiùs rationis oculum turbat , vim con-  
siderationis obscurat , judiciumque in præceps  
agit ; ideo rationem perfecti voluntarii minuit ,  
quia voluntarium non solum ab intrinseca prin-  
cipii inclinatione procedit ; sed etiam cognitio-  
nem finis , & accuratam circumstantiarum inqui-  
sitionem , quam fanè vel funditus tollit , vel ad-  
modum præpedit concupiscentiæ motus ante-  
cedens & comitans rationis judicium , quod sæ-  
pe passionum æstu exoculari solet . Auget ergo  
concupiscentia voluntarium , ut ita dicam , bre-

tale, sed minuit & obnubilat liberum & rationale, nisi concupiscentia sit consequens, seu fluens. & redundans ex voluntate, ut cum ex amore voluntatis & pinguedine spiritus cor & caro exultant in Deum vivum. Alia etiam de causa comparitur per accidens concupiscentia involuntarium, quatenus passionibus quandoque inter sese pugnant, ut cum ad acquirendam pecuniam accendit libido, & in ea prodigenda dolorem patitur avaritia. Ipsas etiam voluptates trepidas & inquietas reddit timor, turbat sollicitudo, minuit fastidium, & comitatur amaritudo.

Denique ignorantia si sit antecedens, causat involuntarium simpliciter; quia ignorantia antecedens est ea, quæ nullo modo est volita, & tamen est causa faciendi aliquid quod nullatenus vellet voluntas, si non ignoraretur. V. g. cum aliquis omni diligentia adhibitâ ignorans, amicum transire per viam, vibrat sagittam, quâ ipsum occidit, tunc ignorantia est causa (sumendo nomen causæ pro eo ex quo aliud quovis modo sequitur) effectus planè involuntarii & inclinationi voluntatis repugnantis. Si autem ignorantia sit concomitans, id est merè per accidens & concomitanter se habeat, nec sit ratio cur voluntas aliquid faciat vel omittat, quia eodem modo se gereret præsentē scientia, tunc causat voluntarium negativum, seu non voluntarium. V. g. sit aliquis ardentex hostis necem exoptans, qui casu per sylvam obambulet, & credens interficere feram, necet inimicum: hæc hostis internecio ex una parte non est involuntaria positivè, cum inclinationi occisoris nequaquam repugnet; non est etiam positivè voluntaria, cum voluntarium debeat esse à principio

intrinsicco cum cognitione. Quare quantumvis hæc occisio sit consentanea inclinationi habituali voluntatis, & etiam actuali conditionatæ, quatenus si sciret ibi latitasse hostem, eum lubenter interfecisset; tamen si factâ sufficienti diligentia ignoret ibi esse inimicum, & credat syncerè esse feram, non habet, nec habere potest actualem hostis occidendi voluntatem ex vi emissionis sagittæ, quæ non imperatur, nisi ex voluntate necandi feram.

Quod si ignorantia sit consequens actum voluntatis, vel expressè, & dicitur ignorantia affectata; vel implicite & indirectè, & dicitur crassa vel supina, cum quis potest & tenetur scire aliquid quod negligit, tunc causat voluntarium simpliciter; quia sicut ignorantia illa est voluntaria, ita & effectus ex illa sequutus. Causat tamen involuntarium secundum quid; quatenus sic ignorans sæpe non produceret effectum, si scientia adesset, nisi fortè sit ingens malitiæ cumulus, qualis fortè in illis qui dicebant, *Job 21. Scientiam viarum tuarum nolumus*; non ut à peccatis præsentè scientiâ abstinerent, sed ut sine remorsu omnibus sese flagitiis effreni impetu dederent. Ex quibus vides, ignorantiam antecedentem excusare, consequentem accusare, concomitantem nec excusare, quia non tollit omnem voluntatem, saltem conditionatam peccati; nec accusare de se, quia voluntas non peccat dum omnem debitam, & sufficientem adhibet diligentiam. De ignorantia juris naturalis agemus dum de opinionum probabilitate.

**COROLLARIUM IX.** *Voluntas non potest cogi in productione actuum elicitorum.*

Quia quod est voluntarium, non potest esse violentum: Sed omnes actus eliciti à voluntate sunt voluntarii, cum sint à principio intrinseco cum cognitione, sintque semper secundum inclinationem voluntatis, imò sint ipsa actualis inclinatio voluntatis, & pondus affectivum, quo fertur in objectum: Ergo in actibus elicitis nulla potest esse coactio, nulla violentia, juxta illud Anselmi: *Nemo invitus potest velle, quia non potest velle nolens velle.* Cum quo tamen stat, voluntatem interdum elicere actum contra inaequatam inclinationem suam, quæ tamen vincitur per aliam, ut cum peccat, agit quidem contra inclinationem naturalem ad bonum honestum naturaliter homini inseminatam; sed prævalet inclinatio ad bonum apparens omni creaturæ ex nihilo productæ innata, & per peccatum originale immensum aucta, ad malum sponte proclivis, nisi adjuvetur ab omnipotenti bono.

**COROLLARIUM X.** *Voluntas potest cogi in actibus imperatis aliarum facultatum.*

Nam aliarum potentiarum actus possunt vel exerceri, vel impediri contra inclinationem voluntatis. V. g. possunt homini volenti videre, oculi vi claudi, vel nolenti aperiri. Unde actus



aliarem potentiarum, quæ motioni voluntatis subsunt, dupliciter considerari possunt, nimirum per ordinem ad potentiam à qua eliciuntur, & per ordinem ad voluntatem à qua imperantur. Primo modo nullatenus possunt esse violenti, cum procedant à principio intrinseco; bene tamen secundo modo considerati, si renitente voluntate eliciantur, vel ipsa nitente impediuntur. Et tunc actus ille imperatus simpliciter violentus dici debet, utpote præcipue suppositi potentix, aliarumque facultatum reginx repugnans, cui omnes aliæ obedire propensæ sunt, quarum proinde inclinatio universalis veluti extinguitur, vel impeditur, vel retardatur.

Dices: Vel voluntas vult efficaciter ut potentia executiva imperata operetur, vel inefficaciter: si efficaciter, sortietur effectum, sine quo non est efficax: si inefficaciter, non petit effectum habere, subindeque non patitur vim, dum non habet.

Respondeo, efficaciam voluntatis humanæ non esse semper pensandam ex effectu, sed ex sinceritate & constantia affectus; quoniam voluntate sæpe conante impeditur effectus ab extrinseco impedimento executioni sese opponente. Unde voluntas stante affectus efficacia, in executione sæpe vim patitur, quia omnes occurrentes obices vincere nequit: in quo à divinæ voluntatis efficacia infinito distat intervallo; hæc enim est & in decernendo efficax, & in exequendo omnipotens, & in disponendo infallibilis, cujus ordinem nulla causa effugere, nulla declinare potest; quia cum ab ipsa recedere se credit, in ipsam relabitur. *Divina enim voluntati quis resistit?* Hic disputant nonnulli,

an Deus possit voluntatem, aliasque causas creatas cogere, ipsisque renitentibus vim inferre. Sed hæc operosius & opportunius dum de Deo primo motore, tractabuntur.

**COROLLARIUM XI.** *Ea quæ sunt ex solo metu, sunt voluntaria simpliciter, & involuntaria secundum quid.*

Dico, *ex solo metu*; nam aliud est fieri ex metu, aliud cum metu; particula enim *cum*, solam concomitantiam; particula verò *ex*, causalitatem importat. Quando autem metus est purè concomitans, tunc non causat involuntarium, quia ab alio motivo repugnantia omnis vincitur & absorbetur: sicut Redemptor pavidus & tristis ibat ad mortem; & tamen mortem non ex metu, sed exigenti charitate foras mittente timorem subibat. Et Sancti cum metu & tremore suam salutem operantur; & tamen voluntariè sacrificant Deo, quoniam bonum est. Intelligitur ergo hoc consuetarium de opere solo metu impellente elicitio.

Et probatur. Illud quod hîc & nunc est voluntarium, & solum secundum se est involuntarium, est simpliciter voluntarium, & involuntarium secundum quid; nam per hoc distinguitur voluntas ab intellectu, quod iste considerat res secundum se, & cum abstractione à materia singulari; illa verò respicit objectum existens & vestitum omnibus circumstantiis, cum quibus in exercitio ponitur, subindèque illud quod est voluntarium hîc & nunc, est simpliciter volunta-

rium, unde & de illo voluntas habet actum efficacem; Atqui quod est ex solo metu, est voluntarium hic & nunc, cum de facto ex imperio efficaci voluntatis exerceatur; & est duntaxat involuntarium secundum se, & præcisis circumstantiis: Ergo ea quæ fiunt ex solo metu, sunt voluntaria simpliciter, & involuntaria secundum quid, quatenus sunt juxta inclinationem efficacem, & contra inclinationem inefficacem. V.g. mercator ingruente tempestate simpliciter vult projicere mercēs ad propulsandum imminens periculum vitæ; ex amore tamen mercium patitur quandam in illis projiciendis tristitiam, quæ tamen amore vitæ vincitur, præeligiturque mercimoniarum jactura, tanquam medium utile salutis, non secus ac potio amara, scissio venæ, cauterii ustio quamlibet displiceant, eliguntur tamen ad vitandam mortem.

**COROLLARIUM XII.** *In homine agente ex solo metu concurrunt quatuor actus.*

Primus est amor vitæ & salutis, & studium declinandi periculi impendentis. Secundus est electio jacturæ, tanquam medii ad tuendam vitam necessarii. Tertius est amor mercium absolute sumptarum, unde sentitur tristitia dum projiciuntur, & immerguntur. Quartus est voluntas conditionata non eligendi medium istud amarum, si cessaret tempestas; non enim projectio illa posset dici involuntaria, nisi foret contra aliquem actum voluntatis: cum enim actus voluntatis nihil aliud sit quam tendentia vitalis, &

actualis inclinatio & pondus voluntatis, ubi sunt diversæ tendentiæ & propensiones actuales, profectò debent esse diversi actus : experienciâ autem compertum est in projiciente merces duas illas inclinationes actu reperiri, alteram per modum prosecutionis, & alteram per modum fuge. Verum quidem est, quod in amore conservande meremoniæ continetur, radicaliter nolitio eas projiciendi, non tamen formaliter; sicut licet in voluntate conservandi vitam contineatur radicaliter voluntas projiciendi merces in periculo, non tamen formaliter explicatur: Ergo sicut præter voluntatem conservandi vitam, requiritur volitio projiciendi merces, ita præter amorem conservandarum mercium absolutè datur etiam nolitio conditionata projectionis earum, sicut generaliter apparet in omnibus mediis, quæ licet radicaliter sint volita in fine, tamen postea formaliter concupiscuntur.

Objicies primò : Dolor de peccatis ex metu gehennæ conceptus, qui attritio dicitur, non est voluntarius simpliciter, & involuntarius secundum quid; nec in illo dolore reperiuntur quatuor actus præfati, aliàs in pœnitente esset amor conditionatus peccandi, si non esset infernus; esset etiam complacentia de peccato secundum se, esset tristitia aliqua de conversione ad Deum, ac de observantia mandatorum; esset denique voluntas conditionata non relinquendi peccati, si cessaret periculum damnationis, subindeque non excluderet omnem voluntatem peccandi, sed eam compareretur, ac proinde non esset actus simpliciter bonus, cujus oppositum determinavit Tridentinum *sess. 14. cap. 4. & can. 5.* Ergo do-

serina utriusque præcedentis conlectarii non est vera.

Respondeo, omiſſa ſolutione eorum qui admittunt in attrito quandam divinæ legis diſplicitiam ob difficultatem & moleſtiam operis præcepti ſecundum ſe ſpectati; omiſſa, inquam, quia licet diſplicitia appetitus ſenſitivi conducat ad virtutem & meritum, cum fuerit in Chriſto uſque ad mortem præ dolore trifti: tamen omnis diſplicitia & repugnantia voluntatis ad legem Dei veræ repugnat converſioni, quæ debet eſſe ex toto corde, omnemque peccati mortalis affectum excludere; & inde eſt quod tam ſæpe pœnitentia noſtra eſt falſa, quia læpius ſecretum & latentem peccati amorem non exſtinguit. *Sæpe* (inquit Magnus Gregor. 1. part. Paſtor. cap. 9. ſibi de ſe mens ipſa mentitur, ſicque ut aliud in intimis intentio ſupprimat, & aliud tractantis animo ſuperficies cogitationis oſtendat. Qua voluntate peccandi etiam inefficaci remanente, inanis eſt & merè naturalis contritio noſtra: quo ſenſu dixit Auguſt. epiſt. 144. *Times ardere, non peccare; non agitur foris negotium cupiditatis, ipſa tamen cupiditas intus eſt hoſtis.* Et ſerm. 19. de verb. Apoſt. *Audeo dicere, ſi timore gehennæ non facis malum, eſt quidem in te fides, quia credis futurum Dei iudicium: gaudeo fidei tua, ſed imo malitia tua.* Et hinc ſerm. 7. de temp. concludit: *Pœnitentiam certam non facit, niſi odium peccati, & amor Dei.* Quia nimirum ſi timor gehennæ ſit naturalis, ſicut eſt cum non tollit omnem peccati mortalis complacentiam, non efficit pœnitentiæ veræ aurum, ſed aurichalcum.

Hac ergo ſolutione prætermiſſa, dicendum



attritionem ex metu gehennæ conceptam, quæ est motus Spiritus sancti nondum quidem inhabitantis, sed moventis, excludere omnem prorsus peccandi voluntatem, ac proinde pœnitentiam tunc non esse ullatenus involuntariam; quia tunc solummetus causat involuntarium quando opus agendum est disconveniens & malum secundum se; si verò objectum sit non solum hic, & nunc, sed etiam absolutè, secundum se, & semper bonum, tunc opus agendum ex metu est omnibus modis voluntarium, & nullo modo involuntarium. Id exemplis elucidabitur. Si quis diceret Petro, Nisi citò deambules per hortum, vel haurias scyphum vini, morieris; statim ille metu mortis vel ambularet, vel biberet; & tamen nec ambulatio, nec potus haberent aliquid involuntarii ( præsertim si supponamus ipsum esse ad ambulandum bibendumque vel propensum, vel saltem indifferentem; ) quia ambulatio & potus vini de se nihil mali, nihil disconvenientis habent. Si autem præcipiatur Petro vel ut amaram potionem ebibat, vel membrum sibi scindi permittat, vel brachium, crurive ignito cauterio inusto aperiri, ut noxiis humoribus ejiciendis exitus patefiat; tunc adhibitum remedium erit quidem voluntarium simpliciter, sed tamen secundum quid involuntarium, quia minimè de se conveniens est, sed potius absolutè ingratum & molestum; unde non mirum si actum displicentiæ terminet. In proposito verò observantiæ divinæ legis, fugaque peccati non solum non est mala de se, sed etiam ipsa est verum & solum bonum, idque pœnitens & cognoscere, & diligere incipit, ut observat loco citato Tridentinum. Unde qui operatur & pœni-



tet ex metu, qualem sacra Synodus exigit, nihil habet involuntarii.

Instabis: Ergo metus ex vi sua non causat involuntarium, contra D. Thomam generaliter *q. 6. art. 5.* asseverantem ea quæ fiunt ex metu mixta esse ex voluntario & involuntario: Ergo deficimus ab universali doctrina S. Thomæ.

Respondeo, veram esse doctrinam S. Thomæ formaliter acceptam; loquitur enim S. Doctor de metu qui incutitur à causa extrinseca extorqueute opus; quod nullum habet fundamentum in ipsa voluntate, quæ potius renititur, & pro virili repugnat. In nostro autem casu incutitur quidem metus ab extrinseca voluntate divina minitante peccatores; sed tamen quia minæ illæ inferni hic & nunc non instant, vel saltem plenam libertatem non tollunt, & quia videt verus pœnitens quod nisi omne peccandi propositum, omnem de peccato complacentiam ab imis radicibus evellat, punietur, quia unum fundamentum pœnæ est culpa voluntaria; ideo ad evadendas minas, pœnasque inferni, omnis peccandi complacentia expungitur, ut omne fundamentum pœnæ convellatur; quia ipse metus ad hoc à Spiritu sancto salubriter incutitur, ut omnis peccati amor auferatur: unde & conditionata peccandi voluntas eradicatur, quia ipsa est sufficiens causa pœnæ, & nisi penitus extirparetur, incurreret pœnam quam reformidat. Sed hoc est per accidens, quia materia hujus sacri timoris in propria voluntate fundatur: Sanctus autem Thomas loquitur per se, & in his quæ regulariter metum consequuntur.

Insistes: In ipso etiam mercatore ratio involuntarii non provenit ex metu; metus quippe

non est causa voluntatis inefficacis servandi merces, cum ad eas projiciendas compellat, sed talis voluntatis causa est amor mercium : Ergo metus etiam in casu à nobis admissio non causat voluntarium simpliciter & involuntarium secundum quid.

Respondeo quod ut metus causet voluntarium & involuntarium, sufficit ut actio, quæ ex illo procedit, sit juxta inclinationem efficacem, & contra inclinationem inefficacem. Unde ad tollendos innumerorum sophismatum cavillos diligenter observa, quod non ideo metus dicitur causare involuntarium, quia est causa nolitiois inefficacis, à qua projectio dicitur involuntaria; sed quia mercatorem amantem merces suas ad projectionem earum inducit, victo earum servandarum desiderio, sicque metus non formaliter, sed consequenter involuntarium infert, quia dum voluntatem impellit ad prosequendum opus odibile projectionis, statim oritur nolitio inefficax illius.

Objicies 2. Qui contrahit matrimonium, vel emitit, vel celebrat alium quemvis contractum ex metu cadente in virum constantem, non obligatur, ut patet ex toto titulo *De his qua vi, metusve causa sunt*: unde Tridentinum concedit Religiosis ex metu professis facultatem reclamandi intra quinquennium: Sed si illi contractus essent simpliciter voluntarii, forent validi: Ergo ea quæ fiunt ex metu non sunt simpliciter voluntaria.

Respondeo contractus ex metu in ius jure quidem naturali obligare, jure tamen positivo rescindi; quia cum Ecclesia, omnisque Respublica rectè ordinata velit omnes contractus esse liberrimos,

liberrimos, ideo ea autoritate, qua valet quasi contractibus conditiones apponere, statuit contractus tanquam involuntarios reputandos, subindeque irritos esse, qui non fuerint ab omni metu alieni; sicut etiam promissiones, donationes, juramenta, aliaque metu extorta Judex declarat invalida ob defectum conditionum à jure, vel consuetudine requisitarum, vel in pœnam illius, qui iniquè metum incussit, consensumque extorsit. Quod autem actus vel contractus illi, attento jure merè naturali sint validi, patet: tum quia sunt voluntarii simpliciter: tum quia votum ingrediendi Religionem ex gravi metu tempestatis, morbi, persecutionis debet impleri: tum quia non major requiritur libertas ad validum contractum, quàm ad peccatum mortale. Constat verò, hominem negantem fidem metu tormentorum, vel adolentem thura idolis ad fugiendam mortem, gravissimè peccare.

Pro pleniori dictorum intelligentia nota, metum illum dici gravem, justum & cadentem in virum constantem, quando vir prudens & cordatus sapienter timere debet: v. g. quando timetur grave malum, ut mors, infamia, carcer, jactura fortunæ & status, servitus, exilium, aliaque similia quæ turpia, indecora, aut graviter nociva apud probos reputantur. Requiritur etiam ut qui talia mala intentat & comminatur, sit causa potens damna illa inferre, & ad exequendum probabiliter proclivis, quia vel solet exequi minas, vel insolitis iræ moribus percellitur, vel habet superiores sibi cæco affectu faventes, à quibus proinde nihil timet, vel quia ab aliis impelli & circumagi facile solet, vel denique ex aliis circumstantiis & gravibus præju-

dictis maturè pensatis rationabiliter præsumitur ipsum in executionem iturum. Et tunc ad evadenda intentata damna licet fugere etiam Religioso, aliisque omnia media assumere quæ non sint intrinsecè mala, monendo tamen legitimos superiores ad quos pertinet ( si fieri potest ) de toto processu, ut subalterni Prælati tyrannis clareat. Timor verò levis ille dicitur, vel quando damnum intentatum est parvi momenti; vel quando, si grave sit, non seriò vel graviter intentatur; vel si seriò ingeritur, nullum tamen est executionis periculum; vel si imminente periculo facilis sit ad majorem Prælatum recursus, cujus judicio humiliter se permittere tenetur.

Nota secundo quod licet præcepta naturalia negativa stante metu gravi nos obligent ad suam observationem, quia ad nullum evadendum periculum licet desperare, blasphemare, &c. Tamen præcepta quævis affirmativa, sive naturalia sive positiva jure divino, vel humano non obligant accedente metu gravi: quia præcepta affirmativa non obligant pro semper, maxime quia tunc occurrit præceptum majus de declinando periculo, servanda vita: in concursu autem præceptorum homo per charitatem ordinatam incipit à seipso. Excipe, nisi Legislator ipsum periculum vitæ præviderit, ut cum dux præcipit militi ad urbis impugnationem irrumperre, quantumvis explosarum catapultarum, sclopetorum, & bombardarum ictus instar creberimæ grandinis præcipitent. Sicut etiam cum Christus præcepit Episcopis & Pastoribus animam suam ponere pro ovibus suis. Excipe etiam quando metus infertur in derisum & contemptum præcepti, ut cum Machabæis detre-



Antibus comedere carnes porcinas mortem Tyranni comminabantur. Ratio exceptionis est, quia tunc præceptum affirmativum habet adjunctum negativum de non inhonoranda Religione & lege, cujus contemptio in ipsum Legislatorem refunditur cum non mediocri dehonestamento boni communis, quod omni privato anteponi debet.

Hic disputant multi de circumstantiis actuum humanorum, sed quia de illis iterum sermonem habet S. Doctor, dum explicat moralitatem, ideo de illis postea agemus. Quærunt etiam hic aliqui quæ conducatur habitus ad rationem voluntarii? Sed facilis responsio est, nimirum habitum secundum propriam rationem augere voluntarium, siquidem voluntati pronitatem, facilitatem, & promptitudinem ad agendum confert, omnemque repugnantiam & difficultatem aufert. Quin etiam habitus, si sit bonus, voluntarium liberum auget & perficit, cum inclinet voluntatem ad expedite operandum conformiter ad rationem, diminuatâ potentiâ peccandi, quæ non est perfectio, sed defectus, & excrementum libertatis. Si verò habitus sit pravus, causat etiam actus voluntarios voluntate deficiente. Unde actus mali ex habitu pravo non retractato prodeuntes sunt magis culpabiles, quia magis voluntarii, quam dum non procedunt ex habitu. Hoc retineant Confessarii, hoc audiant & serio timeant qui tam crebro jurant nomen Dei in vanum, sive pro vero, sive pro falso, nec ad excusandas excusationes in peccatis sibi blandiantur se ex habitu peccare. Vide, miser, eo magis te esse peccando reum, quo profundiores & penitiores radices habet

peccandi nefanda consuetudo. Quæ nisi secus  
rim admoveas, fiet necessitas tibi à tua libertate  
illata, & ex propria voluntate consequuta.

## REFLEXIO.

*Voluntariè sacrificabo tibi. Veluntaria oris mei  
beneplacita fac Domine.* His Regius Propheta  
vocibus bonæ voluntatis pretium indicat &  
commendat. Ita planè, *nihil offertur Deo ditius  
bona voluntate*, inquit Gregorius: & teste Sal-  
viano, *oblata affectu placent, animo commendantur  
data.* Unicum humanæ Christianæque felicitat-  
is organum bona voluntas, ideoque pax homi-  
nibus bonæ voluntatis denuntiatur; sicut certa  
ad miseriam via malâ voluntate sternitur, *sola  
quippe voluntate*, ut Augustinus tradit, *miser  
quisque efficitur, sed miserior potestate, qua æsi-  
derium mala voluntatis impletur.*

O quàm grata Deo, quàm utilis sibi, quàm fa-  
cilis omnibus bona voluntas! Grata Deo, quid-  
quid enim verè vis, & verè non potes, factum  
Deus computat: nimirum *Deus cor quarit, cor  
inspicit intus, testis est, iudex, approbator, coronator.*  
*Sufficit ut offeras voluntatem: cum potes, ore confi-  
tere ad salutem, cum autem non potes, corde crede ad  
justitiam. Corde laudas, corde benedixis, corde in ara  
conscientia victimas sacras imponis: & respondetur  
tibi, Pax in terra hominibus bonæ voluntatis,* inquit  
Augustinus. Utilis sibi bona voluntas, qua ap-  
petimus rectè honesteque vivere, & ad summam  
sapientiam pervenire; quia ut idem Augustinus  
& Bernardus docent, cum voluntas nihil liberum  
habeat nisi se, meritò non iudicatur nisi ex se.  
Nec tardum ingenium, nec labilis memoria,



nec inquietus appetitus, nec obtusus sensus, nec vita languens, nec corpus ægrotans, nec penuria rerum reum per se statuunt hominem, sicut nec contraria innocentem, quia præter voluntatem posse provenire probantur. Bona voluntas sola est fecunda aurifodina, unde solidi thesauri eruuntur; est lapis Philosophicus metallalla convertens in aurum, mala ipsa in bonum transmutans, tristitia in gaudium transformans, paupertatem ditans, vilitatem nobilitans, infamiam illustrans, mœrores amœnans; & ut rectè dixit Philosophus Moralis epist. 72. *Valentior fortunâ est voluntas: in utramque partem ipsa res suas ducit, beataque ac misera vita sibi causa est.* Denique facilis est bona voluntas, nam ut Augustinus tradit: *Dilige & fac quod vis, nihil tam facile bona voluntati, quàm ipsa sibi, & hoc sufficit Deo.* Voluntatem non impediunt carceres, non ligant vincula, non domant Tyranni dominantes: libera est, & maximè si spiritu ducitur, quia ubi spiritus, ibi libertas; unde voluntas teste Cassiodoro dicta est à volatù, quoniam quò vult nimia velocitate transfertur. Sciscitanti sorori, quid ad sanctitatem compendio asciscendam opus esset facto, respondit juvenis, sed super senes intelligens Aquinas: *Bona voluntas exigitur, & sufficit.*

## SPECVLATIO II.

*Actuum humanorum pictura & harmonia describitur.*

**V**T de articulatè processum appetitus intellectualis explicemus, sciendum in negotiis moralibus novem actus ordinariè intervenire, qui vel ad ordinem intentionis finis, vel executionis mediorum reducuntur, quibusque finis tandem obtinetur. Hoc egregium novendiale pedetentim decurremus.

*Cognitio finis.*

Primò itaque occurrit cognitio finis allicientis voluntatem, qua ejus amabilitas & convenientia proponitur, & veluti inspiratur. Nihil enim volitum quin præcognitum; sicut enim appetitus naturalis sequitur formam naturalem, sensitivus formam apprehensam per sensum: ita appetitus rationalis formam per intellectum propositam amore prosequitur; quæ apprehensio non solum debet esse speculativa, quæ semper voluntatem bilancem relinquit & dubiam, ut patet in peccatore bonum sciente, & non faciente, malum cognoscente, & non fugiente; sed debet esse practica, alliciens, & impulsiva, quatenus exhibet objecti bonitatem, quæ ad sui amorem invitet.

Unde quantumvis voluntas in sublimi orationis gradu, qui passivus dicitur, suspendi & extra se rapti videatur, nunquam tamen omni-

no cessat rationis intuitus , quamvis desinat meditationis circuitus : uno ictu & impetu voluntas inflammatur , sed tam divina flamma ardens est & lucens , quia nemo amat quod ignorat. Quod si aliqui Patres Mystici dicant solam voluntatem negotiari in profunda beatæ illius quietis oratione , quam propterea David & Salomon somnum vocant : *Cum dederit dilectus suis somnum. Nolite evigilare dilectam quoad usque ipsa velit* : Ideo est quia non discurret ratio , sed statim atque Deum proponit fervidæ voluntati , hæc continuò eructat suspiria , amorem effundit , & totum *cor liquefactum est, ut dilectus loquutus est.* Et quia amans amore trahitur , nec agit nisi quia ab objecto alliciente patitur , hinc est quod oratio illa passiva dicitur. Da amantem , & sentit quod dico : Da desiderantem , da ferventem , atque sitientem , & fontem æternæ patriæ suspirantem ; da talem , & scit quid dico. Sed lingua amoris omnibus ferè barbara est , & inaudita , quia inexpertis loquimur. Non potest capere ignitum eloquium frigidum pectus , inquit alicubi Bernardus ; quomodo enim græcè loquentem intelliget , qui Græcam linguam non novit , vel latinè loquentem , qui Latinus non est ? Sic lingua amoris ei qui non amat , barbara est & peregrina.

*Simplex volitio finis.*

Secundò cognitionem finis sequitur simplex volitio illius , quæ sæpe voluntas appellatur nomine suæ potentiae , cuius objectum adæquatum est bonum verum vel apparens , sicut

objectum adæquatum intellectiōnis est veritas. Quod si aliquando feratur ad malum per modum fugæ, id propter bonum, quo allicitur, operatur. In peccatis etiam puræ malitiæ aliquod bonum apparens quærit in objecto, cujus deformitatem perspectam habet. Sed de his plura in Philosophia, in qua disputatur an malum sub ratione mali possit terminare voluntatem, sicut & an media habeant bonitatem intrinsecam, relata tamen & dependentem à fine; aliaque plura examinantur; quæ Theologicis permiscere importunum esset.

Hæc autem volitio cū sit primus voluntatis partus, quo voluntas incipit in actum prorumpere, indiget motivo aliquo, quo veluti obstetrice emittatur; idque potiori jure ei convenit, quā aliis actibus, qui cū præcedentium actuum apparatus supponant, habent in illis à quibus moveri possunt. Et ideo specialiter inquit S. Thomas de motivo voluntatis, tam intrinseco, quā extrinseco, cujus rei tractationem in librum de Deo Motore operosius discutendum remittimus. Porro hic actus vocatur simplex volitio, quia vult finem in se, & secundum se, non in ordine ad media: unde & velleitas dicitur, quia arridet quidem bonitas finis, sed in ea sistit, nec de ea obtinenda meditatatur. Sic in tepidis frequenter est volitio simplex boni, vult enim, & non vult piger, & velleitatibus plenum esse infernum docet Bernardus. Rari enim sunt quibus ostensa virtutis pulchritudo non placeat, sed omnino multi in ea nuda complacentia sistunt, nec ad ejus intentionem respicientem media festinant. Pauci esuriunt & sitiunt justitiam, quam omnes semivolente & seminolente dili-

gunt voluntate, quod non sufficit, quia ut ait Hieronymus : *Non nobis sufficit velle iustitiam, nisi iustitia p atiamur famem.*

*Intentio finis.*

Tertiò volitionem finis comitatur efficax illius intentio, quæ respicit finem non absolute solum, sed comparative ad media; per hoc enim distinguitur à simplici volitione, quæ non duplicat objectum, sed solâ attingentiâ finis contenta est : intentio verò respicit finem ut est ratio volendi media, & quatenus est allequibilis per illa, unde in intentione finis virtualiter & implicite media appetuntur. Imò licet voluntas non possit eodem actu primario & per se ferri in finem & media, quæ sic terminant duos actus specie distinctos, intentionem scilicet & electionem : tamen si unum eorum attingatur primariò, aliud verò secundariò, in obliquo, & de connotato, tunc eodem actu respiciuntur ; sicut enim intellectus plura per modum unius ordinatè se habentia unica cognitione intuetur, ut cùm conclusiones in principiis intus legit : sicut potentia visiva in eodem corpore plures colores respicit adunatos, eodemque aspectu colores cernit & lucem : Ita similiter voluntas eodem motu in finem mediaque fertur, si unum se habeat ut ratio formalis amandi, alterum ut res amata. Præsertim quia media, esto quod habeant intrinsecam bonitatem, illam tamen ita relatam & dependentem habent, ut sine ordine ad finem nequaquam amarentur. Unde ait D. Thomas quæst. 8. art. 3. *Finis, ut est ratio volendi medium, eodem actu appetitur, quo medium.* Cum quo ta-

men stat intentionem & electionem esse actus distinctos realiter, ut patet quando medium appetitur propter finem virtualiter intentum, ut cum quis ex intentione videndi Romam quotidie proficiscitur, non est necesse quod in singulis peregrinationis passibus cogitet de suo fine, sed sat est quod ex intentione virtuali finis moveatur; sed tamen potest quando vult de fine illo expressè cogitare, & tunc eodem actu & finem & medium attingere: sicut lux potest seorsum à colore videri, & simul cum colore. Actus itaque electionis & intentionis formalis semper realiter distinguuntur, sed tamen intentio virtualis, vel si dicere fas est, virtualitas intentionis in electione mediæ relucens non distinguitur ab electione, sicut nec virtualis electio ab intentione, quia in omni causa ut tali includitur respectus ad effectum, & in effectu ordo ad causam.

Nota verò sæpe Patres intentionem inter actus intellectus annumerare, ut cum ait Bernardus: *Affectio in voluntate, intentio in ratione consistit.* Et Ecclesia in vigilia Ascensionis: *Nostre mentis intentio quò fide pergit, conversatione perveniat.* Sed hoc ideo dicunt, quia intentio actum intellectus præsupponit, vel intentionem pro attentione accipiunt, vel metaphoricè loquuntur, quia sicut attentio rationis dirigit operationes, ita intentio finis totius vitæ moralis & economiæ regulat, & ideo *oculus*, & *lucerna* à Domino appellatur, quia sicut oculus manuum operationes, pedumque gressus regit, ita pia intentio totam humanorum actuum seriem in ultimum finem ordinat & præcedere debet, ut ad debitum finem omnes actiones dirigere valeamus, non secus



ac naviganti portus, ad quem deveniat, ante omnia statuendus est, & sagittario prius inspiciendus est scopus in quem collimet. Necesse est enim multum in vita nostra casus possit, ut ait Seneca, si vivamus casu. Vivit autem casu, cui jam vitæ suæ summa per bonam intentionem proposita non est. Qualis intentionis oculus, quam fortunatus! Nam si fuerit simplex, totum corpus lucidum erit; si autem fuerit nequam, totum corpus tenebrosus erit. Necessarius oculus, sine quo qui merces congregat, mittit eas in sacculum pertusum vanæ gloriæ, quæ est dulcis spiritualium opum expilatrix, & jucundus animarum nostrarum hostis, in peccato primus, in conflictu postremus, ut loquantur Basil. & Bernard. Quam utilis oculus, quia dum holocausta medullata offert Deo, dies pleni inveniuntur in nobis, nec audimus illam Angelo Ecclesiæ Sardis scriptam exprobrationem Apocal. 3. *Non invenio opera tua plena coram Deo.* Quam efficax, cujus intuitus cor vulnerat sponsi, qui non pensat censum, sed affectum; non quantum, sed ex quanto; non munus, sed cor! Quam purus & fixus oculus, qui mercenarius non est, nec de spe vires sumit, nec aliud præter Deum quærit, solo amore contentus! Quia castus amor, per se sufficit, per se placet, & propter se. Ipse meritum, ipse præmiū sibi est amor: præter se non requirit causam vel fructum. Fructus ejus usus ejus. Amo, quia amo; amo, ut amem, ut proficiatur Bernard. lib. de dilig. Deo, & serm. 36. in Cant. Quam suavis oculus! Nam ut ait idem Pater: Amor iste mons est, & mons Dei excelsus, & vera mons coagulatus, mons pinguis. O amor sanctus & castus! O dulcis & suavis affectio! O pura &

*defecata intentio voluntatis ! Eo certe defecatio-  
 & purior, quo in ea de proprio nihil admixtum re-  
 linquitur ; eo suavior & dulcior, quo totum divi-  
 num est, quod sentitur. Sic effici, deificari est. De-  
 nique quàm facilis ! Nam quid tam promptum,  
 tam in manu voluntatis , quàm velle & amare ?  
 Offer ( inquit August. in Psalm. 50. ) Quid ? Sa-  
 ne in te habes quod offeras. Noli extrinsecus thura  
 comparare, sed dic, In me sunt Deus vota tua. No-  
 li extrinsecus pectus, quod mactes inquirere ; ha-  
 bes in te quod occidas. Sacrificium Deo Spiritus.*

### *Consilium de mediis.*

Quartò intentionem sequitur consilium, quod  
 est discursus intellectus practici inquirentis me-  
 dia ad obtinendum finem, & de eorum conve-  
 nientia judicantis : unde perfectum & comple-  
 tum consilium non solùm importat inquisitio-  
 nem & consultationem, sed etiam judicium de  
 mediorum utilitate, & secundùm hanc postero-  
 rem formalitatem, consilium invenitur in Deo,  
 qui operatur omnia secundùm consilium volun-  
 tatis suæ, non propter inquisitionem, sed prop-  
 ter certitudinem cognitionis & judicii, ad quam  
 consiliantes solent inquirentes pervenire, sicut  
 datur in Deo scientia non ratione discursus,  
 quam in nobis importat, sed ratione certitu-  
 dinis cognitionis effectuum omnium in prima  
 causa.

Itaque consilium importat inquisitionem &  
 judicium de mediis, quæ inquisitio supponit  
 media non esse determinata, sed incerta & du-  
 bia, quæ enim determinata sunt, sub inquisitio-  
 nem non cadunt: supponit etiam rem de qua

agitur esse alicujus momenti, frivolum enim esset ingentem inquisitionis sollicitudinem rebus levibus adhibere. Sicut autem discursus speculativus procedit à duplici virtute intellectuali, scilicet intelligentia quantum ad præmissas, & à scientia quantum ad conclusionem; ita in discursu practico consilii duæ concurrunt virtutes, nempe eubulia, quæ benè consiliatur in inquisitione mediorum, & synesis seu gnomè, quæ de mediorum convenientia judicium & sententiam fert.

Ex quo sequitur consilium semper præcedere electionem, ad hoc enim consulimus, ut eligamus, & ex consultatione mediorum causetur electio unius præ alio. Ad electionem quippe nunquam sufficit simplex apprehensio convenientiæ vel disconvenientiæ objecti, ut docet Vasques, quia voluntas capax est non solum actus prosecutionis, sed etiam fugæ: Ergo ut possit reprobare malum & eligere bonum, præexigitur omnino ut objectum voluntati proponatur cum discretione convenientis aut nocivi, quod fieri nequit absque præeuntis consilii indagine & judicio. Quin etiam ipse brutorum appetitus sensitivus non fertur in suum objectum, nisi præcedat actus potentiæ æstimativæ, quæ licet non componat & dividat, habet tamen judicium simile affirmationi & negationi. In quo appetitus tam rationalis, quam sensitivus differunt ab aliis potentiis, putà visu, auditu, quæ à simplici objecti sui propositione moventur.

Consilium adhibendū in agendis non solum inculcant Philosophi morales, sed Scriptura frequenter & Patres monent in rebus seriis præ oculis semper habendum, an liceant, an deceant,

an expediant, & inconsultè facta comitem habere pœnitentiam. *Turpe est* (ait Bernard. lib. 4. de consid. cap. 4.) *tibi sapius retractare quod feceris, & iudicium tuum frequenter periclitari non decet. Diligenter proinde omne quod faciendum erit tracta apud te, & cum his qui te diligunt, tracta ante factum, quia post factum sera retractatio est. Sapientis consilium est: Omnia fac cum consilio, & post factum non pœnitebis.* Ad consilium autem vocandi sunt soli prudentes & benevoli quia imprudens errat, malevolus prodit. Hinc hominum Sapientissimus monet Proverb. 9. *Ego sapientia in consilio habito, & eruditio intersum cogitationibus.* Et cap. 25. *Causam tuam tracta cum amico, & secretum extraneo ne reveles.* Ubi ad consiliarii munus obeundum duo exigit necessaria, & prudentiæ eruditionem, & amicitia benevolentiam. Unde rara avis in terris bonus consiliarius, qua de causa Eccles. cap. 6. dicitur: *Multi sint tibi amici; unus autem sit tibi consiliarius de mille, qui nimirum sit fidelis & prudens, nec præceps in sententia, nec vehemens in vindicta, nec remissus in correctione, nec austerus in punitione: non citus ad promittendum, non tardus ad reddendum, non superfluous in victu, nec curiosus in vestitu, nec prodigus in sumptu.* Uno verbo dilectus Deo & tibi, sed potissimè pietate & doctrina conspicuus, juxta illud Ambrosii 2. de officiis: *Talis debet esse qui consilium dat, & seipsum formam aliis ad exemplum bonorum operum exhibeat in doctrina, in integritate, in gravitate: ut sit ejus sermo salubris atque irreprehensibilis, consilium utile, vita honesta, sententia decora.* Si talem invenias, thesaurum invenisti. Nam amicus fidelis medicamentum vite. Amico

*fideli nulla est comparatio: Non est digna ponderatio auri & argenti contra bonitatem fidei illius, ut Ecclesiast. cap. 6. ingeminat. Et certè experientia compertum est nullum esse ad pietatem utilius compendium, nullum in adversitatibus promptius solatium, quàm amici & prudentis consiliarii remedium. Sicut enim vulnera clausa plus cruciant; & putredo, quæ intrinsecus fervet, ad salutem eiicitur; sic celata in sinu cordis mœstitia corrodit animam: scriptum est enim Psalm. 31. Quoniam tacui, inveteraverunt ossa mea. Et Job 19. Quare tacens consumor?*

Advertant autem consiliarii nunquam licere malum culpæ suadere sub specie, vel spe cuiusvis boni; non enim sunt facienda mala, ut veniant bona. Tamen si ille qui consilium petit sit determinatus ad alterutrum è duobus malis, tunc non licet quidem ad minus malum hortari, cum sit intrinsecè inhonestum positivè influere, vel inclinare in quodcumque peccatum; sed tantum licet minus malum dissimulare, permittere, & tolerare, passivè, vel negativè se habendo. Sic licet furtum latronis tolerare, ut mortem, quam inferre decrevit, evitemus.

### *Consensus approbans mediâ.*

Quintò consilii inquisitionem & iudicium sequitur consensus voluntatis approbans mediâ proposita, eaque acceptans tanquam utilia & conducentia ad finem præintantum, qui actus distinguitur ab electione uniùs præ alio. Potest enim fieri, & sæpe contingit, quod per consilium inveniuntur, & proponantur voluntati plura me-

dia ad finem obtinendum idonea, quibus complacere & consentire voluntas potest, quanvis deinde per electionem unum alteri præferat. Si tamen contingat in ordine ad finem dari unicuique medium idoneum, tunc consensus non distinguitur ab electione, quæ tunc non est determinativa alicujus medii inter plura; sed idem actus est consensus prout complacet in medio proposito, est electio prout præfert illud aliis quæ non placent.

Ex quibus habes, consensum esse actum voluntatis adhærentis propositioni consilii, seu acceptantis media ab intellectu consiliata. Dico media, quia de fine non est propriè consensus. Cum enim consensus sit applicatio & complacentia voluntatis in eo quod ex consilio judicatum est, de illis tantum est consensus, de quibus est consilium. Constat autem consilium non esse de fine, sed tantum de mediis; finis enim est principium in operabilibus: unde sicut in speculabilibus non est quæstio de principio, sed de conclusione; ita non est consilium de fine, sed de mediis, & ideo dicitur consilium *quasi confiduum*, eo quod multi confident ad simul conferendum de mediis opportunis ad finem consequendum. Quod si aliquando inquirimus de fine an sit amandus, dubitantes de bonitate ipsius, hoc provenit ex eo quod bonitas finis in particulari nos latet: & ideo potiùs inquirimus, an tale objectum materiale debeat habere rationem finis, quàm an finis sit appetendus; quia si constaret talem rem esse finem, non inquireremus de ea. Sicut etiam dum inquirimus utrum unus finis debeat amari præ alio, hoc non est, nisi ratione finis ulterioris quem prætendimus,



aliàs non esset ratio inquirendi vel dubitandi, cum finis semel cognitus ut talis sit per se appetibilis, & ideo nunquam sit inquisitio de fine, nisi sit finis intermedius; sicut discurremus de principio unius demonstrationis, quod est conclusio alterius anterioris. Quare sicut non datur scientia de principiis, sed intellectus, ita non datur consensus de fine, sed voluntas.

Occasione hujus actus adverte communem Patrum & Theologorum doctrinam distinguendum in tentationibus sensum à consensu. Hinc Bernardus de interiori domo, cap. 8. *Locum superiorem ratio semper obtineat. Si verò aliquem motum ad id quod non debet, vel quomodo non debet, senserit, non consentiat, sed illico resistat. Nam solus consensus reos nos facit. Tunc enim anima mori, sicut scriptum est, dicitur cum ipsa ratio ad peccatum per consensum curvatur. Anima enim qua peccaverit ipsa morietur. Resistat ergo ne moriatur; pugnet, ut coronetur: molesta est lucta, sed fructuosa; quia si habet poenam, habebit & coronam. Non nocet sensus, ubi non est consensus: imò quod resistantem fatigat, vincentem coronat.* Idem etiam distinguendum est in motibus piis: nonnulli enim putant se multum Deum diligere, quia pios motus sentiunt, quibus eos non consentire inertia eorum convincit; inanis enim est pietatis sensus, si desit exhibitio operis, quæ est vera probatio dilectionis: est ergo ibi sensus, sed non consensus, qui solus salvat, juxta illud Bernard. tract. de grat. & lib. arb. cap. 1. *Gratia operanti salutem cooperari dicitur liberum arbitrium dum consentit, hoc est dum salvatur; consentire enim salvare est.* Hæc diligenter advertant & scrupulosi, ne turbentur de tentationum

sensu, & repidi ne inflentur de consolationum  
quarundam, vel divinorum motuum inertī  
gustu.

### *Electio mediorum.*

Sextò consilium sequitur electio, quæ est actus  
voluntatis versans circa media, quorum unum  
acceptat præ alio in ordine ad finem. Dicitur  
actus voluntatis, licet enim electio præsupponat  
actum rationis ordinantis & conferentis, earum-  
que utilitatem ponderantis, tamen exercitium  
electionis consummatur in ipsa voluntate.  
Quando enim duo principia concurrunt ad ali-  
quem actum, unum ut dirigens, aliud ut directum  
præbens materiam ordinandam, tunc actus ille  
non elicitur à potentia dirigente, sed à directa &  
imperata, ut patet in omnibus actibus imperatis  
& regulatis à potentia superiori. V.g. cum actus  
virtutis moralis, putà temperantiæ, refertur à  
charitate in Deum ut ultimum finem, actus ille  
non ab habitu charitatis, sed temperantiæ elici-  
tur. Et generaliter in omnibus potentiis &  
habitibus subordinatis ordinatio pertinet ad fa-  
cultatem dirigentem, exercitium verò à directa  
procedit, cum ideo solùm dirigatur ut agat.  
Atqui in electione mediorum homo fertur in  
bonum ordinatum per rationem: Ergo substan-  
tia actus electionis à ratione quidem dirigitur,  
sed à voluntate entitat'vè elicitur. Accedit quod  
objectum electionis est bonum utile liberè ac-  
ceptabile: ergo ab ea facultate procedit, cujus  
est respicere bonum, & ad quam pertinet liber-  
tas: ad illam quippe potentiam attinet actus, ad  
quam pertinet objectum actus: patet autem

respicere bonum, & liberè ferri in illud esse voluntatis vel naturam, vel corollarium.

Dicitur deinde electionem versari circa media, non circa finem, quia cum electio sit præacceptio unius præ alio, præsupponit amorem finis, qui sit ratio discernendi & postponendi unum alteri. Notat tamen S. Doctor quod sicut principium unius scientiæ potest esse conclusio alterius: ita bonum, quod est finis respectu inferiorum, potest esse medium ad finem ultimum, sicque potest esse electio finis, non ut finis est formaliter, sed ut medium. In lata tamen significatione dicitur finis ultimus particularis eligi, quatenus bonis aliis omnibus antefertur, juxta illud Deuter. 26. *Dominum elegisti hodie, ut sit tibi Deus, & ambules in viis ejus.* Et Luc. 10. *Optimam partem elegit sibi Maria, qua non auferetur ab ea.*

Dices: teste D. Thoma q. 13. ordinatio se habet ut formale in electione: quod autem est formale in actu, est magis intrinsecum, cum pertineat ad constitutivum, & ut sic dicam, ad medullam rei: ergo essentia electionis ab intellectu elicitive procedit, ad quem pertinet ordinare.

Respondeo diligenter & attentè advertendum esse quod cum S. Thomas ait in moralibus unum se habere ut formale, aliud ut materiale, non loquitur de formali constitutivo & specificativo, sed de formali movente. Cujus eruditæ loquutionis ratio est, quia cum forma dicat actum, illud formale merito nuncupatur, quod est in actu; omne autem movens est in actu respectu mobilis, quod est in potentia: & quia in moralibus finis habet præcipuam rationem formalis.

finē movendi; ideo principium ordinans actum ad finem dicitur informare actum ordinatum, sicut actus fidei & virtutum à charitate in Deum relatarum dicuntur à charitate formati; & tamen entitas huiusmodi actuum à suis specialibus virtutibus elicitur. Regula ergo generalis ad intelligendam reconditam S. Thomæ doctrinam, cuius sæpe in tota morali meminit, est: Quando duo principia concurrunt ad aliquem actum, attendenda est formalis ratio movendi. Ad illud quod movet, pertinet formale actus: ad illud quod movetur, materiale & substantia actus.

Instabis: In actu electionis sunt duæ formalitates, nempe prosecutio rei utilis, & ordinatio seu collatio unius medii cum alio, quarum prima pertinet ad voluntatem, secunda ad rationem: ergo à voluntate & ab intellectu electio ex æquo procedit.

Respondeo quod cum electio sit actus immanens & vitalis, non transit de una potentia in aliam, nec in duplici recipitur. Præsertim quia à potentiis specie & genere diversis, quales sunt intellectus & voluntas, non potest actus ejusdem speciei ex æquo promanare, sed ab una elicitur, ab alia movetur: & ita contingit in electione; quantumcunque enim intellectus media ordinet, & conferat, nunquam tamen electio consummabitur, donec unum præ alio à voluntate acceptetur; supposita tamen directione rationis imprimantis voluntati modum ordinatè & cum collatione procedendi, cuius tamen impressionem nulla necessitate voluntas sequitur. Uno verbo, voluntas quidem non ordinat, sed

tamen in objectum non tendit, nisi secundum ordinem rationis.

Instites : Ergo potius electio consistet in actu ordinativo præsupponente actum efficacem voluntatis acceptantis medium, & moventis intellectum ut unum ordinet præ alio ; sicut imperium & prudentia sunt actus intellectus, quia licet præsupponant efficacem voluntatis applicationem, important tamen formaliter ordinationem unius ad aliud, quæ ordinatio est formalissimus rationis character. Unde ergo disparitas, cur potius voluntati, quam intellectui electionis partus asseratur?

Respondeo magnum esse discrimen, ex quo magis S. Thomæ doctrinæ profunditatem mirabilem penetrabis. Ad discernendum ad quam potentiam spectet entitas actus à duplici potentia pendentis, semper præ oculis habendum est, quid in illo actu se habeat ut motum, quid verò se habeat ut movens & dirigens extrinsecè : & quia gemina illa ratio aliquando se tenet ex parte intellectus, aliquando ex parte voluntatis; ideo reconditum D. Thomæ principium, & ab Antithomistis non intellectum oportet diversimodè applicare, juxta naturam actus de quo agitur : & quia voluntas, quæ est movens cæteras potentias, interdum se habet ut mota, nec movet nisi in virtute prioris ordinationis & motionis intellectus, interdum verò se habet tantum ut movens & applicans intellectum; ideo actus moralis quandoque in intellectu, quandoque in voluntate consummatur.

In proposito ergo imperium, prudentia, & lex sunt actus elicitæ ab intellectu, quia ad illos voluntas se habet quidem ut movens & applicans,

sed tamen ratio se habet ut mota & exercens; imperium siquidem est practica denuntiatio, & intimatio efficacis decreti voluntatis; præceptum etiam prudentiæ, necnon dictamen legis quod est regula & lux agendorum exercentur in intellectu, tametsi efficaciam habeant à voluntate obligante intellectum, ut denuntiet, ut præcipiat, ut dicat quæ voluntas intendit, & elegit. At verò in electione ordinatio se habet tantum ut movens, & non ut mota & exercens, unde non in actu ordinante, sed in acceptante ordinationem perficitur; unde completur in voluntate, & ex participatione voluntatis in appetitu sensitivo, in quo residere virtutes morales dicemus. Alias non paucas de electione & libertate difficultates, quas hic versant Interpretes consultò prætereo, tum ne Ethicam Philosophicis plus justo implicem, tum quia libro de Deo motore operosè ventilabuntur.

### REFLEXIO.

Parce, Lector, si de his tam speculativis fortè plus satis egimus; sed speculationis contentionem hoc pietatis emolumento reportato compensabo, & subtilitatum prolixitatem & molestiam hoc documento levabo. Si electionem ordinatio rationis prævenire debet, clarum est frequentes actiones nostras, non electiones, sed impetus, sed motus brutales esse nominandos. Quid mirum si sensualitas premar, excandeat ira, insoleseat autoritas, evagetur ratio, fugiat prudentia, labatur lingua, quia considerationis ordinatio & turrina motus nostros non præcedit. Considerationi ergo aliquid cordis & tem-



poris quotidie sequestrandum est, si vis rectè in agendis eligere, affectus regere, dirigere actus, corrigere excessus, componere mores, & vitam ordinare totam. Si non semper, saltem sæpe loquere tecum, considerationi vaca, quæ eligenda præordinet, acta recogitet, agenda prævideat, & in omnibus moribus tuis suavissimus quidam concentus complexusque virtutum elucebit, si ut aliàs ex Bernardo diximus, omnem electionem tuam trina hæc consideratio præveniat, *an liceat, deinde an debeat, postremo an expediat*. Vel si velis cum eodem Patre lib. 5. de consider. cap. 2. omnem electionem præcedat, vel comitetur, vel sequatur consideratio triplex, *dispensativa, aestimativa, speculativa*. Prima rebus ordinatè utitur, ad promerendum Deum: Secunda res diligenter scrutatur ad vestigandum Deum: Tertia ab humanis rebus se eximit, ad contemplandum Deum, quem nisi respiciamus dum eligimus & postquam elegimus, inter electos non computabimur. Prima multa ferit, parùm meret. Secunda vadit, sed nondum evadit. Tertia venit, & ad Deum pervenit. *Quod prima optat, secunda operatur, tertia gustat*. Pura erit electio, si sic incipiat: constans, si sic pergat: felix, si sic finiatur.

Hic etiam diligenter advertas ad bonum opus non solam desiderari bonæ intentionis rectitudinem, nisi bona electio consequatur. Verum quidem est pravâ intentione bonum opus corrumpi, quia ut dixit Magnus Gregorius, si semel cor intentione corrumpitur, sequentis actionis medietas & terminus ab hoste callido securè possidetur: *Quoniam totam arborem sibi fructus ferre conspiciat, quam veneni dente in radice vulne-*

*rauit.* Verùm planè summâ nobis cura vigilandum, ne vel bonis operibus serviens mens reprobâ intentione polluat, servandusque omni cura à malitiæ pulvere oculus cordis, ne quod in actione rectum hominibus ostenditur, insidiantē superbia vel concupiscentia destruat. Cæterùm id non sufficit: nam sicut bonum condemnat intentio prava, ita malum opus non excusat intentio recta. Piam intentionem sequatur recta electio necessum est, ut christinè operemur; quia nihil interest quo animo facias, si vitiosum est quod facis; nec definit esse pestifera labes putredinis, tametsi bonæ intentionis specie & colore recta obducatur. Hinc observat Bernardus serm. 40. in Cant. per sponsæ faciem mentis intentionem designari, ex qua nimirum pulchritudo operis, sicut ex facie pulchritudo corporis æstimatur: signanter tamen genas pluraliter nominasse Spiritum sanctum, cujus sapientiæ non est fas vel modicum quid omninò ascribere otiosum, aut secus dictum quàm oportuerit: *Pulchra, inquit, sunt gena tua sicut turturis.* Quia duo quadam in intentione (quam faciem animæ esse diximus) necessaria requiruntur, res & causa, id est quid intendas, & propter quid. Ex his sanè duobus vel decor, vel deformitas judicatur: ut anima, quæ ambo ista recta atque pudica habuerit, illi meritò veraciterque dicatur: *Pulchra sunt gena tua sicut turturis.* Quæ verò altero horum caruerit, non poterit dici de eâ, quod pulchra sint gena ejus sicut turturis, propter eam quæ adhuc ex parte erit deformitatem.

Idipsum divinè & juxta peropportunè profequitur idem Doctor Mellissus lib. de præcep. & dispens. cap. 14. longiusculis, sed nullis non ob-

servandis

servandis verbis : *Ut interior oculus verè sit simplex*, duo illi esse arbitror necessaria, *charitatem in intentione, & in electione veritatem*. Nam se bonum quidem deligat, sed verum non eligat, habet quidem zelum Dei, sed non secundum scientiam; & nescio quemadmodum iudicio Veritatis vera esse possit cum falsitate simplicitas. Volens denique ad veram discipulo. instruere simplicitatem magistra Veritas : *Estote*, inquit, *prudentes sicut serpentes, & simplices sicut columba*. Præmisit ergo prudentiam, sine qua neminem satis esse posso simplicem sciret. Quomodo denique verè simplex erit oculus cum ignorantia veritatis? aut verè vera dici potest simplicitas, quam simplex ignorat veritas? Scriptum est enim : *Ignorans ignorabitur*. Patet ergo laudabilem illam, & à Domino laudatam simplicitatem absque his duobus non esse bonis, benevolentiam atque prudentiam, ut oculus videlicet cordis non solum pius, qui fallere nobis, sed & cautus sit, qui fallere non possit. Hinc Sancti tam sæpe, tam solide trepidi sunt, ne fortè displiceat Deo quod ab ipsis bona intentione rectum existimatur; quia apud Gregorium aliosque doctos à Domino Patres legerunt, plerumque se nobis vitia sub specie virtutum tegere, quasi blanda ad nos facie venirent. Sæpe immoderata ira, justitia; sæpe dissoluta remissio, misericordia vult videri. Sæpe incautus timor, humilitas; sæpe effrenata superbia, appetit libertas apparere. Sæpe, inquit lib. 5. Moral. cap. 6. opus nostrum causa damnationis est, quod profectus putatur esse virtutis. Sæpe unde placari iudex creditur, inde ad irascendum placidus instigetur, Salomone attestante, qui ait : *Est via qua videtur homini recta, & novissima illius ducunt ad mortem*.

*Unde Sancti viri cum mala superant, sua etiam bene gesta formidant, ne cum bona agere appetunt, de actionis imagine fallantur, ne pestifera tabes putredinis sub boni specie lateat coloris. Sciunt enim quia corruptionis adhuc pondere gravati dijudicare bona subtiliter nesciunt; & cum ante oculos extremi examinis regulam deducant, hac ipsa in se nonnunquam & qua approbant metuant, & tota quidem mente interna desiderant; sed tamen de incertitudine operum trepidi quò gradiuntur ignorant.*

Quod si intentio gloriæ & honoris Dei per se honesta, per se casta, & semper laudanda opus malum non justificat, quomodo excusabuntur cædes, vindictæ, gulæ, ambitiones, aliaque id genus scelera, vel ob voluntatem dandi signa excellentia, vel ob existimationem apud homines captandam, vel ut appetitus suis actibus fruatur, vel ut Sacerdotium pinguius obtineatur, vel ob naturalem fastus inclinationem, vel propter temporalem commoditatem, ut quidam novelli corruptores excogitarunt. Ubinam gentiû sumus, mi Lector? An qui has publicis voluminibus sparserunt sordes Theologi, Christiani, vel hominis nomenclaturâ digni sunt, qui tam apertè contra trina illa officia peccarunt? Illudne est adco mirabile & momentosum dirigendæ intentionis methodi inventum veteribus ignoratum, quo res tam æqua temperatione componuntur, ut servata conscientia integritate, & honor Dei, & amor mundi, quâmlibet inter sese oppositi, concilientur; quo arctæ & latæ viæ hætenus existimata repugnantia in concordiam adducitur, inique commercium; quod Sanctis omnibus non dicam arduum, sed inaccessible, sed in-

possibile visum est? Comburatur prorsus, comburatur Evangelium necesse est; deleantur de libro viventium Contiliorum sanctiones, expungantur Romanorum Pontificum veneranda decreta, extinguantur ipsa naturalis pietatis & virtutis semina omnibus implantata, si tales, tamque exitiales maximæ locum habeant, si actiones per se nocentes emendet finis innoxius, si actus noxâ purget imaginarius animi flexus in eo situs, ut peccatum pro fine non habeat, ut hac arte Deo & hominibus dilectus utrique satisficiat; mundo opera, Deo intentionem bellè concedat; & legem carnis, quam Apostolus captivantem in lege peccati, & spiritui repugnantem sentiebat; cum divinis præceptis urbanissimè copulet, & ficulneis quasi foliis turpia contegat & scelerata.

Hujus perversissimi principii horrenda consectaria prudens missa facio, ut iterum moneam, iterum inculcem, non satis esse ut benè agere dicaris, si bonum finem tibi præstituas, nisi ipsum officium per se sit licitum; quia & bonum opus prava intentio viciat, & piam intentionem corrumpit operis illiciti turpitudine: immò hoc ipso pia esse desinit intentio, si malum imperet opus, quia arbor bona non potest malos fructus facere, nec in Deum summum bonum referri potest, quod à Deo summo bono immiti nequit opus malum. In omnibus ergo priùs respice Deum, propter quem si non facis quæcumque facis, peccare convinceris; veræ quippe virtutes, quæ carnalibus delectationibus, vel quibuscunque commodis, & emolumentis temporalibus serviunt, veræ prorsus esse non possunt, ut Augustinus non semel tradit. Hæc in-



tentio summi momenti, summæ necessitatis est; sed reapse non sufficit, nisi vera sequatur electio, quæ frustra intentionis bonitate purgatur, nisi vel opus sit bonum, vel saltem naturâ suâ indifferens & licitum, quod redditur bonum non quidem perversissimis & distortissimis obtrusis intentionibus, de quibus suprâ; sed vel charitate movente, vel necessitate cogente, vel urgentiori præcepto concurrente, vel aliis circumstantiis supervenientibus, quibus opus aliàs otiosum, vel inane, vel interdum malè sonans, sed nunquam intrinsecè malum efficitur bonum, & conditionibus rem ipsam immutantibus emendatur, purgatur, decoratur. Audi non me, sed Augustinum lib. contra mendac. cap. 7. *Interest quidem plurimum qua causa, quo fine, qua intentione quid fiat. Sed ea quæ constat esse peccata, nullo bona causa obtentu, nullo quasi bono fine, nulla velut bona intentione facienda sunt.* Audi Gregorium Magnum lib. 3. Moral. cap. 10. *Scriptum est, si rectè offeras, non autem rectè divides, peccasti. Sed rectè non dividitur, si non hoc quod præ agitur, etiam subtiliter discernatur. Oblata quippe rectè dividere, est qualibet bona studia nostra sollicitè discernendo pensare. Quod nimirum què agere dissimulat, etiam rectè offerens peccat; & nonnunquam hoc sit reatus criminis, quod putatur causa virtutis.* Hæc, inquam, audi, & instanter operare. Sic eligens eris non ex multis solum vocatis, sed ex paucis electis. Quod tibi & mihi concedat ille qui nos elegit, ut essemus Sancti & immaculati.



## SPECVLATIO III.

*Prosequutio ejusdem materiei , & eorum qui supersunt, actuum explicatio.*

**T**Res adhuc supersunt actus , imperium, usus , & fructio , de quibus continenti serie agemus.

*Imperium intimans executionem.*

Septimò ergo electionem efficacem comitatur imperium intimans mediorum executionem, & vocatur imperium monasticum , quo intellectus ex efficacia electionis imperat omnibus potentiis internis & externis, ipsi etiam voluntati, in qua post electionem datur usus activus, seu executio, quæ post electionem vincenda superest, ut patet in Petro, cujus electionem non executio, sed fuga sequuta est. Unde in intellectu debet dari actus specialis regulans talem usum, rumpens moras , intimans præstitutæ electionis executionem , ad quam non sufficit judicium intellectus , ut ait Vasquez. Quia post inquisitionem & judicium videns & meliora probans, voluntas deteriora sequitur , prava eligit , & in executione deficit, veniens ad partum, & vires non habens parturiendi. Quia , ut egregiè ait Scholæ nostræ decus & ornamentum Joannes à S. Thoma , eligere est actus merè internus , in quo voluntas secum duntaxat certat , nec habet aliud impedimentum , quàm velle , quod est in

manu ejus : in exequendo autem non solum se-  
 oium pugnat, sed cum aliis & potentiis, & sub-  
 jectis, & circumstantiis, quorum concursus &  
 experientia difficultates accumulatur, ipsumque  
 voluntatis impetum quâlibet ferventem, vel  
 detinet, vel minuit, vel fatigat, & sæpe fran-  
 git, nisi urgeat imperii vis, & instet pondus præ-  
 cepti. Ergo præter judicium de agendis oportet  
 relinquere locum alteri tribunali ultimò re-  
 solventi, & dicenti : *Fac hoc etiam in illarum in-*  
*dividualium circumstantiarum concursu.* Hinc  
 præter eubuliam, quâ rectè inquirimus & con-  
 sulimur; præter synesim, quâ rectè judicamus,  
 exigitur prudentia, quâ id quod electum est  
 ordinatè præcipiamus, & exequutionis tem-  
 poris superemus : quod per electionem adhuc fa-  
 ctum non fuerat, quia nondum occurrerat cir-  
 cumstantiarum exequutio electionem sæpe re-  
 tardans, sæpe inflectens ob emergentes difficul-  
 tates, quarum discussio & victoria novo eger  
 rationis imperio insistente, & cum manifesta-  
 tione imperante & opus agendum, & modum  
 actionis, & temperamentum conatûs. Ideo im-  
 perium & lex dicuntur Proverb. 6. *Lucerna &*  
*lux :* & Psalm. 4. *Lumen vultus Domini signat*  
*super nos.*

Ad horum omnium clariorem intellectum,  
 atque totius humanorum actuum œconomix  
 harmoniam perspicendam, præ oculis habenda  
 est præclara D. Thomæ doctrina de mutua in-  
 tellectus & voluntatis sibi correspondentium  
 sympathia, dependentia, & subordinatione,  
 ob quam & ratio voluntatem, & voluntas ra-  
 tionem in diverso genere cause & movet, &  
 movetur; & imperat, & obedit. Hinc quoties-

cumque altera potentiarum harum agit, semper in actibus ejus aliquid secundum modum propriæ naturæ, aliquid ex impressione alterius, cui subordinatur, relucet; non quòd actus immediate ab utraque facultate profiliat, sed quia ab una elicitur, ab altera movetur; una proximè, altera præsuppositivè se habet; una communicatur, altera participatur. Et quia ordinare est proprium rationis, movere verò efficaciter est proprium voluntatis; ideo quidquid ordinationis in actibus voluntatis relucet, à ratione provenit; quidquid efficaciam in operationibus intellectus apparet, totum à voluntate derivatur. Atque in hoc sensu non solum intellectus in voluntatem, sed etiam voluntas dominatum superioris exercet: impressio autem superioris agentis semper splendet in inferiori. Et ex hoc (inquit præclare D. Thom. q. 22. de verit. art. 13.) *inferius agens non solum agit actione propria, sed actione superioris agentis; sicut sphaera Solis movetur proprio motu, qui spatio unius anni expletur, & motu primi mobilis, qui est motus diurnus. Similiter & aqua movetur motu proprio tendendo in centrum, & habet quendam motum ex impressione Lune, qua movet ipsam, ut patet in fluxu & refluxu maris. Corpora etiam mixta habent quasdam operationes sibi proprias, qua consequuntur naturam elementorum, ut tendere deorsum, calefacere, infrigidare; & habent alias operationes ex impressione cælestium corporum, ut magnes attrahit ferrum. Ratio autem & voluntas sunt quedam potentia operativa adinvicem ordinata: & absolute considerando ratio prior est, quanvis per reflexionem efficiatur voluntas prior, & superior, in quantum movet rationem.*

Hinc in actu electionis voluntatis resplendet ordo rationis, & in actu imperii efficacia voluntatis impellentis ad opus. Unde sicut substantia actus electionis est à voluntate elicitus, ita substantia actus imperii manifestantis, distantis, & imperantis executionem, est ab intellectu productus, quantumcunque motivè à voluntate originetur: aliàs imperium non procederet modo rationali & humano, sed ferè modo brutali, cum imperu non discernente opus agendum, sed merè exequente, nec prout oportuerit, sed cæco modo conante. Sanè idem dicendum est de actu imperii ac de lege, cum lex sit præceptum & imperium, & Legislatoris sit præcipere & prohibere. Dictamen autem legis, aut ejus intimatio non potest esse actus voluntatis, cum dictamen illud sit id cui conformari debet voluntas tanquam regula: actus autem voluntatis non potest esse regula sui, aliàs esset impeccabilis; nam peccatum non committitur in operatione, nisi cum recedit à regula; nec posset recedere, si esset sua regula: Ergo similiter imperium debet esse actus intellectus expressus, non per modum puræ enuntiationis, sed per modum denuntiationis, quæ dirigitur immediate ad voluntatem ut utatur, & exequatur; mediatè verò ad alias potentias voluntati subordinatas. Unde electionem sequitur imperium, sed usum præcedit. Quia (inquit S. Thom. q. 17. art. 3. ad 1.) *post determinationem consilii, quæ est iudicium rationis, voluntas eligit, & post electionem ratio imperat ei per quod agendum est quod eligitur; & tunc demùm voluntas alicujus incipit uti exequendo imperium rationis; quandoque quidem voluntas alterius, cum aliquis imperat alteri.*

*quandoque autem voluntas ipsius imperantis, cum aliquis imperat sibi ipsi.*

Dices: Voluntas est potentia cæca, quæ nequit percipere ordinationem imperii rationis: Ergo frustra ponitur imperium executionem dirigens & dictans.

Respondeo hoc sophismate probatum iri ( si quid probaret ) voluntatem nullo iudicio, imò nulla apprehensione posse moveri, quia rationis lumen videre nequit. Dicendum ergo cum D. Thoma, quod sicut oculus non solum sibi, sed toti corpori videt, ita intellectus non modò sibi, sed etiam omnibus facultatibus intelligit: sicut ergo ridiculè diceretur, pedem vel manum non posse dirigi ab oculis, quia videre non possunt; ita perperam obtenditur, voluntatem non posse rationis intimatione moveri, quia nullum objectum cognoscit; quia quod percipit homo per intellectum, appetit per voluntatem, & per alias potentias inferiores mandat executioni. Unde intellectus oculos spirituales, voluntas pedes seu affectus mutuatur: quod explicant nonnulli emblemate duorum hominum, quorum unus sit cæcus, & alter claudus: cæcus claudum gestat humeris, claudus verò cæcum dirigit oculis suis; *quodque deest socio prestat uterque suo.*

Pro solutione aliarum objectionum, in quibus operosè confutandis immorari nimis philosophicum esset, advertendum est primò, quod licet in intellectu speculativo sint tantum tres actus, apprehensio, iudicium, & discursus; tamen in intellectu practico plures alii reperiuntur, ut vocare, interrogare, orare, imperare.

Advertendum 2. quod licet ad voluntatem pertineat exercitium actus, cum voluntas sit pri-



num movens ad executionem operis ; tamen exercitium ordinatum & temperatum est effective ab intellectu, seu potius ipsa ordinatio, denuntiatio, & temperamentum operis agendi in intellectu consummantur, præsupposita tamen efficaci motione voluntatis : unde imperium illud movet voluntatem & quoad specificationem, & quoad exercitium ; quia non solum allicit & suadet, sed obligat & impellit : ita tamen ut non cogat, sed ordinet, ut rationabile sit obsequium voluntatis obediens.

Advertendum ; in intellectu & voluntate continuum dari actuum directorum & reflexorum fluxum & refluxum : per actum directum facultas fertur in objectum suum ; per reflexum supra seipsam redit. Quod sit vel formaliter, vel virtualiter : formaliter quidem, quando unus actus est objectum alterius ; virtualiter verò, quando plures actus implicite in uno involvuntur & veluti implicantur : v.g. cum voluntas eligit media, virtualiter eligit electionem, consentit se eligere, utitur seipsa ad eligendum. Licet ergo imperium formale requiratur ad usum activum strictè sumptum, virtuale tamen reperitur ubi est usus virtualis. Ex quibus solves difficilem instantiam, quâ dici posset, quod si requiratur imperium ad applicandam voluntatem usui & executioni, ita etiam requiritur ad eam applicandam intentioni, & electioni. Sed ab hac difficultate, aliisque hæc sine sophismatis te expedies, si consideres in actibus intellectus & voluntatis perpetuum esse reflexionis vel formalis, vel virtualis labyrinthum. Quod verò dicunt aliqui se huiusmodi imperii actum minimè experiri, non urget ; quia interiores animi mo-



tus non experientia, sed ratio discernit : ex effectibus tamen dignoscit ille qui difficultates executionis vincere conatur, dum resistit vitiis & concupiscentiis, dum ratio dominatur in medio inimicorum suorum, dum regnum Dei intra nos est, in quo vera viæ felicitas posita est. Unde dicebat Philosophus Moralis : *Si vis tibi subijcere omina, subijce te rationi, rationem subijce Deo.* Quomodo autem imperio rationis subdantur actus & motus qui sunt in homine, alibi dicetur.

*Usus & exequutio voluntatis.*

Octavo imperium sequitur usus activus voluntatis exequentis præceptum, quæ actus omnino distinguitur ab electione; habet enim objectum formaliter diversum, electio siquidem versatur circa medium ut futurum; usus verò attingit medium ut præsens & in executione ponendum per egressum actualem à potentiis externis, quas applicat voluntas per actionem virtualiter transeuntem juxta exigentiam & difficultatem negotiorum occurrentium, & finis præintenti naturam; quod grandem sæpe difficultatem addit, ad quam promptè & celeriter evincendam novo conatu voluntatis opus est superante laborem & tedium; quibus sæpe frangitur animus, nisi virtute constantiæ & perseverantiæ roboretur.

Hinc crebrò & sanè nimis in inceptis deficiamus, & sæpe desistimus, quia fatigantur duratione facultates, nisi ob instantiam voluntatis exequentis firmentur, atque fastidium & labor amore mollescantur & temperentur, quia in eo

*quod amatur, non laboratur; aut si laboratur, & labor amatur.* Hinc etiam experientiâ comper-  
tum est, nonnullos summa cum facilitate rectè  
judicare, consiliari, & eligere, qui deinde in exe-  
cutione torpescunt. Unde bonæ memoriæ R.  
P. Petrus Girardellus, inſtaurata vitæ regularis  
Ordinis nostri in Gallia decus & columna,  
ante obitum à Reverendiſſimo P. Nicolao Ro-  
dulpho Generali Ordinis Magistro juſſus, ut vi-  
tæ ſpiritualis (cujus erat callentiſſimus) com-  
pendium Fratres ſtrato circumfuſos doceret,  
eructavit hoc verbum bonum: *Totum noſtrum  
negotium conſiſtit in executione.* Et iterum cui-  
dam Fratri aienti ſe viſiſſe radios caput Patris  
orantis illuſtrantes, feſtivè & ſolidè reſpondit  
religioſiſſimus Pater: *Optandi ſunt radii ma-  
nibus, ut abjiciamus opera tenebrarum; & qua  
cognoſcimus, ſine mora faciamus.*

Atque ideo viris ſanctis ineſt materia juſti  
doloris à quotidianis jaſturis voluntatis ſemel  
ſtatuta pia propoſita miniinè exequentis; quia,  
vel eleganter ait Aug. lib. 8. confeſſ. cap. 10. *Ego  
deliberabam ut ſervirem Domino meo: ego eram  
qui volebam, ego eram qui nolebam: ego eram, nec  
plene nolebam; ideo contendeſſam & diſſipabar à  
meiſſo, & ipſa diſſipatio me invito quidem fiebat,  
nec tamen oſtendebat naturam mentis aliena, ſed  
pœnam mea.* Nec minùs egregiè Bernard. lib. 1.  
de confid. cap. 1. *Quoties viſ, & in caſſum? Quo-  
ties moves, nec permoves? Quoties conaris, & non  
datur ultra? Eniteris, & non obtines; parturiſ,  
& non paris; tentas, & abriperis; ubi incipis, ibi  
deſicis; & dum adhuc ordiris, ſuccidunt te. Vene-  
runt filii, que ad partum (ait Propheta) & vi-  
res non habent parturiendi.* Quorum omnium ra-

Ex est infirmitas voluntatis, quæ à benè iudicatis, consiliatis, electis in executione recedit. Hinc videmus firmissimas columnas ad unius auræ impulsū contremiscentes, cedros sanctitatis uno tentationis statu eradicatos, Petrum ad mulieris auditum, David ad aspectum corruisse. Unde hoc? Ex ægritudine voluntatis, quæ vult in electione, & in usu non vult, & non quod vult bonum hoc agit, sed quod non vult malum hoc facit; sicque nunquam est plena nisi per usum, ut describit August. lib. 8. conf. cap. 9. ubi sic: *Imperat animus, ut velia animus, nec facit tamen. Unde hoc monstrum Non ex toto vult, non ergo ex toto imperat: nam in tantum imperat in quantum vult, & in tantum non fit quod imperat, in quantum non vult. Voluntas imperat, non utique plena imperat; ideo non est quod imperat. Non igitur monstrum parim velle, partim nolle; si d. ægritudo animi est, quia non totus assurgit veritate sublevatus, ægritudine prægravatus.*

*Assequutio finis, seu fruitio.*

Nonò denique omnium actuum humanorum: corona est fruitio, quæ non est actus intellectus, ut putat Soto, sed voluntatis. Sicut enim voluntatis est desiderare finem possidendum, ita ipsius est eo possessio frui; ejusdem namque potentie est motus in finem, & quies in ipso. Est ergo fruitio quies appetitus cum suavitate, & gaudium seu delectatio de fine amato. Neque enim audiendus est Scotus, qui existimavit fruitiorem esse actum amoris. Nam in Scriptu-

ra fruitio pro suavi delectationis experimento usurpatur. Sapient. 2. *Venite fruamur bonis.* Rom. 5. *Si vobis primum ex parte fruitus fuero.* Id est, si præsentiâ vestrâ fuero delectatus. In eodem sensu accipitur à Grammaticis ac Oratoribus, & patet ex etymologia nominis desumpti ex fructu, qui est ultimus arboris effectus, qui suaviter carpitur, & suavius gustatur. Similiter ergo fruitio est actus ultimus potentiae percipientis fructum cum jucunditate: *Fru* enim dicitur ea re de qua capimus voluptatem, & rebus cognitus fruimur, in quibus voluntas delectata conquiescit, ut Augustin. semel & iterum dixit. Fruitio ergo non est formaliter amor, sed ex amore, vel ex præsentiâ objecti amati sponte fluit, sicut tristitia ex præsentiâ objecti odio habiti pullulat.

Porro quia finis dupliciter haberi potest, vel perfectè ac consummatè, vel imperfectè, seu inchoativè; ideo duplex fruitio distinguitur, alia initiativa, quæ est complacentia de fine cognito & sperato, secundum illud Rom. 13. *Spe gaudentes*; alia plena & cumulata, quæ habetur solum post finem adeptum. Non enim quiescimus simpliciter, dum adhuc sumus in via, & ad patriam tendimus; sed quando finito itinere & consummato nihil restat acquitendum, sed datur merces illa magna nimis, & ostenditur summum bonum, quo omnia desideria in bonis implentur. Et quia per primam fruitionem sternitur via ad intentionem, electionem, impetrium, usum, & delectationem perfectam; ideo de fruitione prius egit S. Thomas, quàm de aliis actibus differeret.

*Si autem quæras, an illæ fruitions specie in-*

ter se differant? Respondeo probabilius esse  
distingui, quia distinctio specifica & formalis  
actuum ex ratione formali objecti venanda est;  
nam circa idem objectum materiale sæpe sæpius  
versantur actus specie distincti. Ratio autem  
formalis imperfectæ complacentiæ finis, & per-  
fectæ fruitionis est planè distincta; prima enim  
fertur ad bonum fide cognitum & speratum, ac  
nondum habitum; unde elicitur ab habitu spei:  
secunda fertur ad bonum præsens, possessum,  
& cognitum visione intuitiva, & ideo elicitur  
in patria ab habitu charitatis: sed bonum diver-  
simodè propositum voluntati est diversa ratio  
formalis objecti voluntatis, quia cùm objectum  
voluntatis sit bonum apprehensum, & per ratio-  
nem propositum, distincta apprehensio & pro-  
positio rationis diversitatem in actus voluntatis  
refundit: neque enim alia ratione distinguitur  
amor, & gaudium, intentio, & fruitio; electio  
versans circa media futura, usus circa præsentia  
hic & nunc: Ergo simplex complacentia finis  
amati & obtinendi specie differt à fruitione in  
bono possessio quiescente.

Et confirmatur breviter (est enim res levis  
momenti.) Delectatio & fruitio sequitur opera-  
tionem, eamque perficit & adornat, inquit Phi-  
losophus, sicut pulchritudo juventutem; quia est  
corollarium operationis, & veluti ejus condi-  
mentum à natura institutum, ut in opere insista-  
mus, nec deficiamus: Ergo distinctam specie  
operationem sequitur distincta specie fruitio &  
delectatio, aliàs delectatio non saperet naturam  
operationis, cujus est comes individua: Atquæ  
fruitio imperfecta d. Deo, v.g. in via, sequitur  
cognitionem fidei, & ipem futuræ visionis; frue-



tio in Patria sequitur visionem Dei summe amati, quæ duæ cognitiones sunt utique operationes specie diversæ: Ergo fruitiones illæ distinguuntur non solum sicut perfectum & imperfectum intra eandem speciem, putà puer à viro; sed sicut actus ejusdem potentiae habentes objectum formale distinctum, ut amor, gaudium, & desiderium, vel sicut diversæ habitudines lapidis ad centrum, putà motus ad centrum, & quies in centro. Unde illæ fruitiones distinguuntur in esse physico.

Dices: Charitas viæ & patriæ sunt ejusdem speciei, tamen objectum charitatis viæ sit obscure cognitum & absens, charitatis verò patriæ objectum sit intuitivè præsens: ergo sicut objecto charitatis accedit esse obscure vel clarè cognitum, esse absens, vel præsens; ita similiter & objecto fruitionis, quæ proinde eadem erit essentialiter, sive in via, sive in patria.

Respondeo quod licet idem habitus charitatis sit idem specie in via & in patria, quia charitas nunquam excidit; tamen omnes actus charitatis non sunt ejusdem speciei in esse physico, esto quod ad eandem speciem moralem pertineant. Paragolizat ergo vehementer arguens dum fruitionem comparat charitati, quia charitas est habitus, fruitio actus; & ab habitu ejusdem speciei procedere possunt diversi specie actus in esse physico, ut à virtute Religionis procedit oratio, devotio, votum, juramentum; ab eadem charitate profilit desiderium de Deo, amor ad Deum, gaudium de Deo, qui actus non differunt specie physica, nisi quia objectum idem habentes, illud sub diversâ ratione præsentis, vel absentis, vel abstrahentis à præsentia & absentia respecti-



vè attingunt. Similiter ergo complacentia viæ,  
& fruitio patriæ erunt actus specie distincti,  
multò magis quàm amor & delectatio Beatorum.

R E F L E X I O.

Vide quò collimat tota humanorum actuum  
œconomia, ad fruitionem nempe, ad quam  
tendit & conatur studium cognitionis, deside-  
rium voluntatis, fervor intentionis, inquisitio  
consilii, approbatio consensus, electio medio-  
rum, ordinatio imperii, fidelitas exequutionis,  
ut perveniat ad fructum delectationis Dei. Sed  
miser homo ratione vicens, & ratione non  
utens, derelinquens fontem vivum, fodiens-  
que sibi cisternas dissipatas, totam humanorum  
actuum seriem eò inflectit, ut iis fruatur, qui-  
bus tantum debuerat uti. Amor delectationis in  
causa est; ideo sese totos voluptatibus corpo-  
reis homines tradunt; volunt coronare se rosis  
antequam marcescant: nullum est pratum quod  
non pertransire velit luxuria eorum; sed extre-  
ma falforum ejusmodi gaudiorum luctus occu-  
pat, quia in materia transmutabili non magis  
fixum gaudium inveniri potest, quàm in arena  
solidum ædificium construï: quod hoc eleganti  
simili declarat Bernard. serm. 1. de divers. *Ac-  
cendiur cereus, non purum lumen est, sed lucer-  
na; siquidem ignis ipse propria fomenta consumit,  
nec nisi ipsi consumptione fovetur. Porro deficiente  
materia, etiam ipse deficiet: & ubi illam videris  
prorsus exustam, hunc quoque extinctum esse  
reperies. Sicut ergo flamma illius novissimæ fu-  
mus occupat & caligo, sic latitia lata rei in tristitia  
commutatur.*

Solidum & verum gaudium, quod nemo tollet à nobis, in Deo positum est. *Si gaudes de nummo, times furem*, inquit August. in Psal. 37. *Si autem gaudes de Deo, quid times, ne tibi quisquam auferat Deum? Deum tibi nemo auferet, si tu eum non dimiseris.* Securus est ergo de Deo gaudium in hac quidem vita degustatum, sed in futura consummatum, dum intrabimus in gaudium Domini nostri, quando erit torrens voluptatis, fluminis impetus, inundatio lætitiæ, flumen gloriæ & pacis; flumen planè, sed quod affluat, non quod fluat, vel effluat; flumen non quod transeat, vel pertranseat, sed quod abundet. Hujus sacri fluminis in hac vita stillas guttatim & per minutias bibit anima sancta, in oratione liquescens, mente excedens, desideriis æstuans, ardentè sitiens, assiduè meditans, hora videlicet quâ se intus astringi quibusdam æternæ sapientiæ brachiis, infundique sibi senserit sancti suavitatem amoris. Felix hora, sed brevis mora; quâ mens ungitur unctione misericordiæ Dei, & oleo lætitiæ & exultationis perfunditur, dum cogitat de civitate Dei, de pace civitatis, de æternitate pacis, de statu æternitatis, de felicitate, situtus, de plenitudine felicitatis! *Quid enim pulchrius, quidve dulcius, quàm inter tenebras hujus vite, multasque amaritudines, divina dulcedini inhiare & æterna beatitudini suspirare, illicque teneri mente, ubi verà haberi gaudia certissimum est.*

Verùm ut ad has divinæ fruitionis hîc inchoatæ, in Patria consummandæ delicias admittaris, humanas floccifacias necesse est. *Pretiosa divina consolatio est, nec omninò tribuitur admittenti alienam*, inquit Bernard. tract. de vita & morib. Cleric. cap. 21. Quæ renuît consolari

anima, centuplum imperfectæ fruitionis accipiet in vita, & vitam æternam in perfectâ fruitione Patriæ possidebit. Illa consolatio præsentis laboris, hæc futuræ felicitatis consummatio; illa cibis in opere, hæc merces in fine operis: illa militantibus stipendium pro necessitate laboris, hæc novissimum donarium pro quantitate laboris: illa manna in deserto; ista copia terræ promissionis. Hunc divinarum consolationum rorem, hanc victricem delectationem tam necessariam ad incipiendum, tam utilem ad proficiendum, tam opitulante[m] ad pugnandum, tam animantem ad perseverandum; hoc manna absconditum quod victori promittitur, quod nemo scit nisi qui accipit, quod nemo videt nisi gustaverit, quod nullus intelligit nisi crediderit; hoc datum optimum desursum descendens à Patre luminum in filios adoptionis, has delicias charitatis, hanc conscientiæ pacem, hoc regnum Dei, quod intra nos est, quodve non est esca vel potus, sed justitia, & pax, & gaudium in Spiritu sancto; hunc ignem, quem mittere venit Salvator in terra, quoque voluit nos vehementer accendi; hanc virtutem de alto, quæ Andream fecit amplecti crucem, Laurentium ridere carnificem, Stephanum orare pro lapidantibus; hanc pacem quam reliquit Christus, nec quomodo mundus dat, dedit, quæque exsuperat omnem sensum; hanc denique gratiam devotionis, teneritudinem compunctionis, fervorem orationis, pinguedinem Spiritus, Dei præsentis experimentum, unctionem docentem de omnibus, fruitionem inchoatam tibi opto, Lector, & mihi, obsecro; precibus obtrine, ut in hac valle plorationis, quæ militia est super terram, certemus, vincamus,

coronemur : ut per immixtas gaudiis terrenis tribulationes , sentientes amaritudinem mundi , discamus æternam desiderare suavitatem : & præventi in benedictionibus dulcedinis non deficiamus in via , sed de exhibitione præsentium munerum firma sit expectatio futurorum.

---

## CAPVT II.

*De moralitate actuum humanorum,  
& de prima ejus specie, scilicet  
indifferentia.*

**Q**uia proprium voluntatis est agere propter bonum regulis rationis conveniens , quod idem est ac morale, quod ratio proponit, lex regulat, conscientia dicitur, voluntas divina jubet; ideo explicatis actibus humanis sub ratione voluntarii, agendum est de illis sub ratione moralis, idest prout subsunt regulis morum, vel ab eis deficiunt. Soli namque actus voluntarii & liberi sunt capaces subjectionis ad normas vitæ moralis, quia in illis solis tenetur homo rectæ rationi conformari, cum in illis duntaxat operetur cum advertentia rationis, seu cum indifferentia iudicii apprehendentis bonum, & malum. Et certè *ubi non est lex, nec pravaricatio*. Lex autem non decernit supplicium aut præmium pro actibus necessariis, sed liberis, qui soli sunt materia regulabilis per prudentiam, & ordinabilis.

per legem, sicut res externæ factibiles sunt mensurabiles per artem. Ut autem in hac materia perspicuè & utiliter procedamus, implexos difficultatum nodos, & importunas nimiarum subtilitatum remoras, prætermitemus.

Mirari enim subit cur apud non paucos de moralitate disputantes illud minùs actum videatur, quòd fuerat tractationis argumentum. Non docent vivere, sed disputare, & accitis totius Dialecticæ & Metaphysicæ subtilitatibus inconcinnis non disponunt vitæ statam, non formant mores, non temperant affectus, non componunt vitam, non tradunt scientiam Sanctorum Christianæ vitæ doctricem & ductricem; non parant animis medicinam, pietatis officinam, sed artem cavillandi instituunt. Ethicam non ex limpidis Ecclesiæ fontibus derivant, sed formularum argutiis implicant, litium infinitarum laqueis irretitam tenent, chartasque abstrusis & spinosis dissertationibus implent: sicut evenit in labyrintho properantibus, qui longiùs ab eo quod petunt semper abscedunt, & quo plus operæ impendunt, eo se magis impediunt.

His de causis prius certa præmitemus, deinde utilia dubia & Theologo digna resolvemus, aliis vel omninò prætermiſſis, vel brevissimè insinuat, vel in Philosophiam amandatis, ut juxta præscriptum nobis finem Theologia nostra operam det parandis virtutibus, vitiis profligandis, voluptatibus coercendis, libidinibus arcendis, timoribus, cæterisque animi labibus abstergendis: ut non eruditis solum intersit sapientiæ cogitationibus, sed moribus potissimum infor-  
mandis incumbat, refellatque non modò fidei Christianæ hostes, sed etiam non minùs pericu-

Iustos Catholicæ pietatis adversarios. Primum igitur de moralitate universim, deinde de prima ejus specie in hoc capite disputabimus.

## SPECVLATIO I.

*Moralitas superaddit actui libero  
subjectionem ejus ad regulas  
morum.*

**H**anc assertionem perspicuè tradit S. Thomas *per totam q. 18.* passim, & nominatim *art. 10. ad 3.* ubi docet species moris esse accidentarias actui considerato in esse physico; quia, inquit, idem actus physicus potest habere plures species moris, ex quibus eruitur ratio fundamentalis. Non potest variari moralitas, aut multiplicari invariato & immultiplicato illo in quo essentialiter consistit, ut de se patet. Sed potest variari & multiplicari moralitas invariata & multiplicata libertate; sicut celebratio Missæ initio bona sit mala & illicita, si adveniente interdicto continuetur: idem etiam actus liber potest duplici affici moralitate, v.g. duplici bonitate, vel duplici malitia ex fine & circumstantiis derivata; imò secundum plures potest idem actus bonitatem ex fine, malitiam ex circumstantiis sortiri; & idem actus in materia indifferenti transire de bono in malum, sicut eadem propositio in materia contingenti transire de vera in falsam. Ergo moralitas est quid distinctum à libertate, quatenus voluntas ut principium morale operatur cum subjectione ad regulas mo-



rum, quibus conformat vel deformat suam operationem : voluntas verò præcisè ut principium physicum operatur cum subiectione ad rationem solummodò ut proponentem objectum cum indifferentia vel amandum , vel respiciendum : unde non est idem formaliter principium liberum, & principium morale. Moralitas erga actus est tendentia actualis voluntatis in objectum ut subiectum regulis morum. Quod melius intelliges , si consideres esse morale non parvam cum esse artificiali affinitatem habere : unde sicut in artefactis distinguimus materiam dirigibilem, regulas artis dirigentis , & formam artificiosam resultantem in opere conformiter ad normas artis elaborato : ita in moralibus materia dirigibilis sunt actus liberi voluntatis, qui debent ad amissum rationis & legis exigere regulæ sunt lex , voluntas Dei , & conscientia ; forma verò moralitatis in actu est subiectio, seu conformitas ad regulas bonæ operationis.

Dices : Habitus voluntatis distinguuntur specie & essentialiter per differentias boni & mali : ergo & actus ejusdem voluntatis, per quos habitus producuntur ; eadem quippe ratio quæ in actu primo invenitur in habitu , relucet & explicatur in actu secundo, sive operatione.

Respondeo esse disparitatem inter actus & habitus, quia habitus generantur ab actibus ut subiectis regulis morum, unde in illis moralitas est essentialis , bonitas scilicet virtuti , & vitio malitia & deformitas. At verò actus non procedunt essentialiter à voluntate ut directa per regulas rationis & honesti ; quia tametsi nulla daretur regula morum, manente indifferentia vo-

luntatis, actus liber à voluntate profueret: unde moralitas est tantum proprietas libertatis, sicut veritas est proprietas actus intellectus, licet sit essentialis habitui intellectuali; & artificium est forma accidentalis in artefacto, etsi sit essentialis habitui artis. Quod si aliquando S. Thomas actiones voluntatis esse per se in genere moris doceat, ly *per se* idem est ac non per aliud, quia loquitur de actibus interioribus, qui sunt immediate moralitatis capaces, per quod distinguuntur ab exterioribus, qui non nisi mediantibus internis regulis morum subjiciuntur. In communi etiam modo loquendi actus liber & moralis pro eodem crebro usurpantur, quia licet distinctio formalis inter utrumque intersit, idem tamen est entitative, materialiter, convertibiliter, & inseparabiliter actus liber & moralis.

Si autem quæras quid illud tandem sit quod moralitas libertati superaddit? In longum imus, & ad illas subtilitates me reducis quas decreveram declinare. Breviter tamen quid Authores sentiant exponam tibi verisimiliora electuro.

In primis Vasques existimat moralitatem nihil reale adjicere libertati, sed merum ens rationis. Sed quia hujus positionis inanitas per se abit in fumum, cum actus temperantiæ sit bonus, actus intemperantiæ malus, nemine cogitante; ideo addit hæc sententia actum non dici bonum vel malum per præcisam relationem rationis regulabilitatis per legem, sed propter suum fundamentum quod est potentia passiva, quam habet actus ut dirigatur per rationem; & hoc modo aliqua entia rationis denominant subjectum, etiam nemine cogitante, ut tituli Ducis, Prælati, Magistratus, non quidem ut sunt mera entia  
rationis,

rationis, sed ratione fundamenti, puta electionis, quæ licet transierit, moraliter tamen in hominum memoria perseverat. A qua sententia parum vel nihil recedit illa, quæ astruit moralitatem in denominatione extrinseca petita à regulis morum, quibus actus subjicitur. Fundatur verò utraque, tum quia moralitas in objecto non est nisi denominatio extrinseca, vel respectus rationis; cum idem objectum transeat de bono in malum, de licito in illicitum absque ullius realis entitatis adjectione per solum Legislatoris intimatum vel suspensum imperium: Ergo idem dicendum est de actu; nam sicut moralitas objecti in commensuratione & habitudine ad rationem consistit, ita & moralitas actus; præscribit enim ratio quæ sunt ad ejus bonitatem necessaria. Tum quia relatio signi ad placitum, valor monetæ, titulorum insignia & decora, dignitatum splendor sunt entia rationis (vide obiter quid sint idola quæ adorat mundus,) quia pendent ex libera hominum voluntate non operante physicè mediâ potentiâ executive, sed ut constituyente aliquid circa officia humana: atqui similiter quod actus sint boni vel mali, dependet ex libera voluntate Legislatoris; nam si Deus præciperet, homicidium esset licitum, & celebratio Sabbathi esset illicita, si Deus eam prohiberet. Quorum omnium radix est, quia relatio quæ pendet ex libera voluntate aliquid præscribente, non habet aliud fundamentum præter institutionem voluntatis superioris, quæ sicut nihil influit reale in actum humanum, ita non potest illi tribuere nisi denominationem extrinsecam.

Alii verò opinantur, moralitatem superaddere

*Tom. III.*

Q

actui libero modum realem dicentem habitudinem transcendentalem ad objectum ut subiectum regulis morum; quia actus specificantur ab objectis nedum in esse physico, sed etiam in genere morali: sicut enim actus in esse physico comparatur ut via & tendentia ad objectum in esse naturæ, tanquam perfectibile ad suum extrinsecum perfectivum; ita actus moralis tendit ad objectum in esse moris, ad quod proinde dicit ordinem intrinsecum. Qui sanè ordo & tendentia sunt aliquid reale in actibus non minùs quàm in habitibus moralibus, qui per distinctas realiter bonitates specificè distinguuntur, cum habitus per actus generentur; subindeque quidquid in habitibus impressum est, in actibus relucere necessum est. Ex quo planè consequitur, illam habitudinem esse transcendentalem, & in habitu, qui est qualitas habens entitatem absolutam, & in actu; quia per actus morales habitus gignuntur, ut ab iis genitis faciliùs actus & veluti sponte fluant. Tum quia bonitas moralis habet contrarium, scilicet vitium; relationi autem nihil est contrarium. Tum quia relatio prædicamentalis respicit terminum ut purum terminum, non ut objectum, aut principium: at bonitas respicit terminum ut objectum specificativum, circumstantias ut causantes bonitatem. Tum quia relatio prædicamentalis dependet ab existentia termini, quo desinente evanescit: moralitas verò non sic; actus enim complacentiæ de bono præterito bonus est, & delectatio morosa de præterito malo perversa est. Tum demùm quia quantumcunque affingatur relatio prædicamentalis ad constituendam moralitatem, putà bonitatem, debet assignari ali-

quod illius fundamentum, quod utique morale est, habens conformitatem cum ratione relatione prædicamentali priorem. Ergo in actibus moralibus invenitur ordo & habitudo intrinseca & transcendentalis ad objectum subjectum regulis morum; quæ habitudo cum non inveniat in objecto ipso, nec in moneta, nec in titulis dignitatum, mirum non est horum moralitatem per denominationem extrinsecam abundantissimè constitui.

## REFLEXIO.

Actus est moralis, qui morum subditur regulis: Ergo bruti animantis instar agit, qui normæ detrectat leges: Ergo adhuc bestialior est, qui renisu leges despicit, & conculcat. Ergo perfecta obedientia non servili metu, sed charitate servata, non timore pœnæ, sed amore justitiæ suscepta non deprimit hominem, sed attollit; non terminis arctat, non ligat angustiis, sed ut ait Bernard. lib. de præcept. & dispensat. *Largiori voluntate fertur in latitudinem charitatis, & ad omne quod injungitur, spontaneo vigore liberalis, alacrisque animi motum non considerans, in infinitam libertatem extenditur.* Tu itaque, Christiane Lector, qui veram requiem, quæ post hanc vitam fidelibus servis promittitur, quæris, etiam hîc eam inter amarissimas vitæ hujus molestias suavem jucundamque gustabis, si ejus qui eam promisit, præcepta dilexeris; quia mandata ejus gravia non sunt, sed jugum suave, & onus leve. Et ratio est, quia qui divinæ regulæ subjicitur, Deo adhæret, unus cum illo spiritus efficitur, suoque centro.

unitur. Sicut ergo elementa non gravitant in propriis locis, sic sarcina Christi, dum nos Deo nectit, non pondus, sed pennas habet; non labore premit, sed requie implet & gaudio illo, quod cum acceperimus, nemo tollet à nobis. Præclare August. 10. Confess. cap. 20. *Nunc quem tu imples, sublevas eum. Et quoniam tui plenus non sum, oneri mihi sum.*

Væ homini refugienti regulam, & suæ tradito voluntati. Nam sicut bonus etiamsi servit, liber est; sic malus etsi regnet, servus est non unius hominis, sed tot dominorum, quot vitiatorum. Servit prorsus quicumque vel metu frangitur, vel delectatione irretitur, vel cupiditatibus ducitur, vel ira percellitur, vel indignatione exasperatur, vel mœrore dejicitur, quibus noctu, & interdiu premitur, qui à domesticis passionum tyrannis subjugatur. Nulla spera pacem, si in te non sit tranquillitas ordinis. At nullus ordo, sed Babylonicâ deterior confusio est constitutis à Deo non subjici regulis. Non erit sanè caro subjecta animæ, nec vita rationi, si animus non sit subditus Creatori. Tunc autem tibi subjicientur omnia quæ sub te sunt, si ei subjiciare, à quo omnia tibi subjecta sunt. Talis enim vicissitudo jure recipitur, ut qui amanti Domino servire noluerunt, odientibus inimicis cogantur esse subjecti. Nam *quid iniquius*, inquit Augustinus, *quàm velle sibi obtemperari à minoribus, & nolle obtemperare majoribus?*



SPECVLATIO II.

*indifferentia est vera species actus  
moralis.*

**H**ic assertioni, cui adversantur Salmanticensis, subscribit verò Martines & Joannes à S. Thoma, favet Angelicus Doctor *tota q. 18.* ubi passim tria membra dividentia moralitatem assignat, seu tres tritas illas species moralitatis, quas membra dividentia appello, ut abstraham ab illa controversia alibi dirimenda, an malitia sit vera & positiva species moralitatis. Expresse autem *quest. 2. de malo, art. 5.* d' visionem actus humani sub ratione moralis, in bonum, malum, & indifferentem tradidit, & omnes Curielis & Salmanticensium oppositum sententiarum solutiones præcludit dicens: *Si loquamur de actu morali secundum suam speciem, sic non omnis actus moralis est bonus, vel malus, sed est aliquis indifferens.* Ubi S. Doctor perspicuè admittit speciem indifferentiæ, nec potest explicari de indifferentia tantum negativa; actus enim indifferens indifferentiâ negativâ non est moralis, sed merè physicus, cum ejus objectum non sit in esse moris constitutum.

Fundamentalis ratio hujus responsionis jacta est à S. Thoma: Ille actus est verè & formaliter moralis, qui procedit à voluntate deliberata ut subjecta regulis morum; cum enim, ut vidimus, moralitas nihil aliud sit, quàm subjectio actus humani ad regulas morum, profectò omnis actus procedens à voluntate ut subjecta regulis

morum, non potest non esse moralis, & ad aliquam moralitatis speciem pertinere. Atqui non solum actus boni & mali, sed etiam actus indifferentes ex objecto possunt procedere à voluntate deliberata subiecta regulis morum: à voluntate quidem deliberata, si aliquis consultò & de industria velit peragere rura, v. g. per agros hortorum ambulare, quia id licitum est, quia nulla lege prohibitum, sed potius à Deo summo & primo Legislatore concessum & permissum, tunc & plenà advertentiâ, & deliberatione præviâ agit voluntas: agit etiam ut subiecta regulis morum, ideo namque in actum illum sine scrupulo liberè prorumpit, quia cernit ipsum à lege & ratione toleratum. Res exemplo illustris & aperta fiet. Petrus surgens nescit an hodie sit festum de præcepto, hæc de causa suspendit opus ad quod se accingebat: accipit deinde à Parocho nullum festum diem agi, continuò evellit scrupulum, & manus applicat operi. Ille autem cum consilio & deliberatione agit, elicitque opus non bonum ex se, neque malum; si verò ordinetur ad bonum vel malum finem, erit bonus vel malus in individuo ob appositam circumstantiam; sed est ex natura & specie sua indifferens, idque præstat ex subiectione ad legem quam consultit, & cujus reverentiâ ab opere abstinerebat. Ergo actus indifferens potest esse, & sæpe est deliberatus, subiectusque regulis morum, rationi scilicet & legi; siquidem voluntas in opus externum minimè se diffunderet, nisi sciret ratio opus illud esse à lege indultum & toleratum.

Hanc rationem peregre tradit Angelicus noster Præceptor 1.2. *quæst.* 92. *art.* 2. ubi docet legem habere triplicem actum, *prohibere, praci-*

pere, & permittere: & hinc infert, quod sunt tres differentia actuum humanorum. Quidam sunt boni ex genere suo; & respectu horum ponitur legis actus precipere, seu imperare: quidam autem sunt actus mali ex genere suo, sicut actus viriosis; & respectu horum lex habet prohibere: quidam verò ex genere suo sunt actus indifferentes; & respectu horum lex habet permittere. Quid luculentius? Dicere verò actum indifferentem esse duntaxat negativè subditum legi, quatenus ejus objectum neque precipitur, neque prohibetur; hoc, inquam, dicere est manifestè S. Thomæ contradicere; nam circa illud lex non se habet negativè, circa quod exercet actum: at teste S. Thoma, triplex est actus legis, precipere, prohibere, permittere. Et ratio est, quia legislator vel ratio consulta an talis actus sit licitus, positivè respondent illum ex se esse licitum; & nisi sic responderet ratio, faceretque eliciendæ licentiam & facultatem, vir timoratus in actum illum non prorumperet, ut antea expendimus, & experienciâ compertum est: ergo nedum negativè, sed etiam positivè actus indifferens subditur legi, & regulis morum dictantibus illum esse licitum, & à Deo permissum. Et certè sicut non solùm entia naturalia & effectus necessarii, sed etiam actus liberi cadunt sub divinam providentiam omnia fortiter, & juxtà suaviter disponentem: ita nullus est actus humanus, qui non subjiciatur legi æternæ, quæ est fontalis ratio, & primitiva radix totius moralitatis; subjiciatur, inquam, non solùm per ordinem ad Deum, sed etiam in ordine ad nos, & prout est regula voluntatis creatæ, medio dictamine rationis nobis intimatæ. Siquidem de illo actu.

potest consuli, & sæpè consulitur ratio, ut patet in eo qui continet opus, donec ratio denuntiet opus illud esse licitum; agenda enim quælibet juxta præclarum Bernardi monitum triplex consideratio præcedere debet, an liceat, an deceat, an expediat; si licet, actus non est malus, sed indifferens; si decet, actus est bonus; si expedit, actus est perfectus: sed & indifferenter, & bonum, & perfectum consideratio præcedit; subindeque de quolibet ratio dicitur: unde ex habitudine ad illam actus moralitatis speciem non induere non potest.

Dices: Omnis species moralitatis debet per aliquid positivum constitui, cum moralitas ut sic, sive in communi, sit aliquid positivum: Sed indifferentia, quam habet actus ex objecto, non consistit in aliquo positivo, sed in mera negatione bonitatis & malitiæ, cum capacitate ad alterutram aliunde quàm ex objecto habendam; etenim omnis species positiva debet posse salvari in aliquo individuo; non potest verò dari actus indifferens in individuo in doctrina SS. Augustini & Thomæ postea propugnanda: Ergo indifferentia non constituit speciem moralitatis mediam inter bonitatem & malitiam.

Respondeo utrasque præmissas nutanti niti principio in sententia S. Thomæ. Majorem quidem; nam in satis frequenti Thomistarum sententia, divisio moralitatis in sua membra dividentia non est generis in species, sed subjecti in accidentia, quia malitiam non per aliquid positivum, sed per privationem formaliter constituent. Minor etiam est apertè falsa, indifferentia enim actus deliberatè elicitæ est aliquid positivum; est enim habitudo positiva, & tendentia

ad objectum ut permissum à lege; actus enim indifferens hoc ipso quod est deliberatus, dicit habitudinem realem ad objectum; & quia objectum illud respicit ut à lege permissum, habitudo ad objectum illud non potest non esse moralis, siquidem respicit objectum ut subjectum regulis morum illud permittentibus. Cum verò additur, quod si indifferentia sit differentia positiva pertinens ad ordinem moris, poterit dari actus indifferens in individuo, quia non datur positiva species cui repugnet individuum, existentia quippe speciei non est nisi in singularibus: facile respondetur cum D. Thoma, illud idem argumentum sibi obijciente, ut mirum sit illud potuisse à Thomistis nobis opponi. Dicendum ergo, non in eo sensu dari actum indifferentem secundum speciem, quasi ei repugnet bonitas, vel malitia ex fine vel circumstantiis; sed eatenus dicitur indifferens secundum speciem, quatenus ex sua specie, & ex meritis objecti etiam à lege permissi non habet quod sit bonus vel malus, sed per aliquid aliud potest fieri bonus vel malus, appositione nimirum finis, vel circumstantiæ. Hic est planus & naturalis sensus S. Doctoris *q. 18. art. 9. ad 1.* quibus clarè significat actum indifferentem habere quidem speciem indifferentiæ moralis ex vi objecti attracti sub ratione liciti & permissi à lege; supervestiri tamen adventitiâ bonitate, vel malitia finis, vel circumstantiarum.

Instabis: Unum individuum non potest participare duplicem speciem, v. g. idem animal non potest esse homo, & equus; id autem contingeret si indifferentia esset species moralitatis; nam actus in individuo præter indifferentiam ex-

objecto habet semper bonitatem vel malitiam ex circumstantia.

Respondeo idem individuum posse pertinere ad duplicem speciem subordinatam secundum diversam rationem, maximè in genere moris; quia ea quæ pendent à ratione vel voluntate, sicut diversam possunt impetrare habitudinem, ita ratione diversorum ad diversam speciem pertrahuntur: sic eadem materialiter propositio sub diversa consideratione ad distinctas scientias attingit: idem actus pietatis à diversis specie virtutibus diversis motivis bonitatem geminantibus elicitur. Similiter ergo nihil vetat eundem actum ex meritis objecti solam haurire speciem indifferentiæ; ex fine tamen & circumstantiis bonitate vel malitia superindui.

Alia quæ frustra multiplicant Adversarii argumenta supponunt non dari medium inter actum bonum & malum, inter objectum consonum vel dissonum rationi. Verùm hæc suppositio est manifestè contra D. Thomam sæpe sapius asserentem bonum & malum in moralibus non opponi immediatè, quia inter utrumque actum medius est actus indifferens. Est etiam contra veritatem; nam præter objectum consonum, vel dissonum regulis morum, datur objectum licitum à lege permixtum, de se neque bonum, neque malum, sed intrinsecè indifferens; vel bene sonans, si suapte natura in bonum propendeat, ut esse in Ecclesiâ; vel malè sonans, si sua sponte in malum proclive sit, quamvis quibusdam circumstantiis positis laudabiliter fieri possit. Quale est celebre illud quod à S. Thoma memoratur exemplum illius, qui propter ingentes Ecclesiæ utilitates, non ob proprias com-



moditates, plures præbendas retinet, quanvis de se malè sonet, & avaritiam vel ambitionem præ se ferat plarium Sacerdotiorum occupatio. In eundem numerum jure reponitur absentia Episcopi à diœcesi & grege sibi commissis, quæ per se malè olens, adjunctis tamen veræ, & non imaginariæ boni communis necessitatis, aut propriæ plebis gravissimæ utilitatis circumstantiis excusatur & purgatur, si non licentiosa libertate, vel aulæ frequentandæ pruritu, sed necessaria servitute cogantur Episcopi peregrinationes, & labores quoque marinos & transmarinos sustinere, ut instaurandæ gratiâ disciplinæ, vel fidei Orthodoxæ in periculum vocatæ conservandæ Episcoporum conventibus vel Romanæ Curiaæ adsint. His affinis & conterminus est exquisitus mulierum cultus à christiana modestia abhorrens, & ab Apostolo circumpositiones auri vetante reprobatus; qui tamen dura mariti jubentis conditione cogente fit rectus, quia mulier viro suo subesse jubetur, qui proinde si exorari non possit, non peccabit mulier, si vanis citra scandalum assumptis ornamentis habeat in superbo cultu cor humile. Et de his actibus monet August. lib. 2. de serm. Dom. in mont. *Sunt quadam facta media, quæ possunt bono vel malo animo fieri, de quibus judicium temerarium est.*

**R E F L E X I O.**

Triplex bonum distinguit Philosophia, honestum, utile, delectabile: unicum agnoscit Theologia, unum honestum prædicat, & unum honestum amat; cætera vel ut mala rejicit, vel

ut indifferentia floccifacit. Quia nimirum divino illustrata lumine suis ponderibus res quasque examinat. Quaecumque sunt vera, quaecumque pudica, quaecumque iusta, quaecumque sancta, quaecumque amabilia, quaecumque bonæ famæ, si quæ virtus, si quæ laus disciplinæ, hæc cum Apostolo cogitat, hæc probat, & commendat, cætera quæque ut inania & falsa, ut umbram, larvam, & picturam inanem, quibus nihil veri aut solidi subest, aspernatur, vel ad summum ut indifferentia, unde actus neque bonus, neque malus efficitur, tolerat. Nam in conspectu veri boni, in claritate æterni Solis quodnam poterunt terrenorum bonorum scientillæ & nebulæ habere momentum? Oculata planè Christiana Theologia, quæ cœlestia cogitans, terrena despicit, in cœlestibus inardescenti nihil in terris libet, deforme conspiciit quidquid de terrenæ rei placebat specie, quia sola christianæ vitæ puritas & claritas refulget in mente. Imitatur navigantes sapientia nostra; sicut enim in navi positus videt terras, montes, & promontoria transeuntia, quæ prospero flante vento, & impellente subducta moveri videntur: sic Christianus secundis Spiritus sancti motibus afflatus temporalium blandam & fucatam speciem, ementitamque pulchritudinem cernit ac pertransit, & æternitati defigens oculos, quaecumque videt, transisse & non esse pronuntiat, quia aliquando desitura in Dei veritate cognoscit. Unde Propheta Regius Psalm. 36. *Vidi impium super-exaltatum & elevatum sicut cedros Libani; & transiit, & ecce non erat.*

Divinis erudita cogitationibus, & in lumine

Dei ambulans cuilibet suum designat pretium. Quæ vulgus bona existimat, mala cernit esse, aut vana: bona illa vera existimat, quæ ratio dat, quæ fides exhibet & promittit; illa solida arbitratur, quæ sempiterna, quæ nec cadere possunt; nec decrescere. Cætera opinione bona esse, non re pronuntiat. Quos spargit voluptas odores, quos avaritia demonstrat thesauros, quos spondet amores mundus, insidias laqueosque arbitratur. Quæ sese oculis ingerunt, non continuò amplectitur, sed suis quæque momentis examinat: internam rerum faciem, interiora velaminis pervadit, ad rerum inanitatem & fluxum, ad peccati fœditatem & vindictam, ad impudicitiae indecorem, & marcentes libidines, & tetram colluvionem, ad animæ vulnera, & conscientiae cicatrices attendit; & ibi cernit vanitatem aut sordes, ibi advertit venenum inaurato sibi atque gemmato poculo propinatum, ubi pulchritudinem & bonitatem inesse arbitratur; quia omnia ad rationis trutinam, ubi non exterior rerum facies, sed veritas & rectitudo præsident, vocat. His cogitationibus mente conceptis, libido penitus effugata discedit, & miranda quædam quies & tranquillitas animæ reparatur: *Veluti* ( inquit Zeno Veronensis. serm. de præcep. ) *si inverecundarum, protervarumque tumultus ac strepitus famularum per adventum & præsentiam gravis ac severa domina acprimatur.*

## SPECVLATIO III.

*Omnis actus deliberatus , quantumvis  
ex objecto indifferens , in individuo  
semper vel bonus , vel malus est  
ex fine vel circumstantiis.*

**H**Anc veritatem variis Patrum testimoniis confirmare necesse non est ; nam Vasques oppositum sentiens ultrò confessus est , & non negavit , sed confessus est suam sententiam SS. Augustino & Thomæ , eorumque discipulis adversari. Et meritò ; nam *in libro de peccat. merit. & remiss.* apertè tradit voluntatem non posse in medio quodam ita consistere ; ut nec bona, nec mala sit ; quia *voluntas in omni actu aut bona est , aut mala.*

Totum autoritatum pondus , & rationum momentum ad unicum discursum D. Thomæ sic revoco : Omnis actus advertenter in individuo exercitus , & à voluntate procedens , vel ordinatur ad finem bonum , vel malum , vel indifferentem , vel nullū determinatum. Si in bonum vel malum finem referatur , nemo ambigere potest ; quin actus vel bonus , vel malus sit. Si verò in indifferentem ordinetur , vel si nullo fine præintento voluntas advertenter casui operationes suas committat , tunc actum malum esse probatur.

Quotiescunque homo liberè operatur , tenetur dirigere operationes suas in bonum & honestum finem : tum quia homo tenetur operari propter finem consonum suæ naturæ , & sibi ut

rationalis est, proprium, quod non est aliud quàm bonum conforme rationi: tum quia est præceptum prohibens verbum otiosum, Matt. 12. *Dico autem verbo, quoniam omne verbum otiosum, quod loquuti fuerint homines, reddent rationem de eo in die iudicii.* Quo eodem præcepto vetatur etiam actus otiosus, quia teste Hieronymo in Psalm. 16. *Si de verbis otiosis redditur ratio, quanto magis de operibus?* Et ideo generaliter dicitur Ecclesiastis ultimo: *Cuncta quæ sunt adducet Deus in iudicium.* Et 2. Cor. 5. *Omnes nos manifestari oportet ante tribunal Christi, ut referat unusquisque prout gessit, sive bonum, sive malum.* Ille autem actus est otiosus & inutilis, cui debitus finis non apponitur, quive ut ait Gregorius Magnus, caret vel pia utilitate, vel iusta necessitate, quibus utique carent verba & opera in ventum defluentia, quibus inaniter exercetur anima, & teritur ac prodigitur tempus, de quo ait Bernard. *Nihil pretiosius tempore, & heu! nihil hodie eo vilius invenitur. Transivit dies salutis, & nemo recogitat. Nemo sibi perire diem, & nunquam rediturum causatur. Sed sicut capillus de capite, sic nec momentum peribit de tempore.* Tum quia operari propter solam utilitatem, vel objecti delectationem, non est agere ut hominem, cùm id etiam brutis commune sit, imò id apertè rationi, quâ homines sumus, repugnet; quia cùm operationes non sint institutæ propter delectationes, sed è contra operationibus, quas condiunt, debeant deservire, operari propter delectationem est pervertere ordinem naturæ rationalis. Unde in veridica Augustini sententia, conjux petens debitum matrimonii ob solam carnis delectationem, peccare:

**I** op  
 ne  
 Au  
 ve  
 &  
 in  
 ne  
 na  
  
 mo  
 rev  
 ex  
 ad  
 vel  
 fine  
 act  
 ren  
 vol  
 con  
 C  
 zur  
 nest  
 pro



otiosè agit, proindeque malè : quia si prodigalitas inaniter expendens pecunias mala est, quomodo peccato carebit actus otiosus, tam vanè expendens tempus omni auro preciosius?

Respondebis, voluntatem solam commoditatem, vel voluptatem facultatum humanarum in actibus de se licitis quærentem non peccare, quia licitè potest appetitus naturalis suis actibus frui ob temporalem commoditatem, ob naturalem fastus, vel sensibilis delectationis inclinationem : sic v.g. comedere & bibere ad satietatem citra necessitatem ob solam voluptatem peccati non damnatur, nisi fortè obsit valetudini, & gravia inde sanitatis incommoda exoriantur.

Sed contra hanc responsionem à nonnullis modernis magnificatam, non tam argumentis agendum esset, quàm gemitibus ; nec tam instillandum esset scribendo atramentum, quàm lacrymæ fundendæ. *O ubi estis fontes lacrymarum! Et quid faciemus? Quò ibimus?* ut in simili dixit Augustinus. Enimverò quid contra hanc doctrinam tam spurcam, tam obsecræam, tam Epicuro magis quàm Christiano, tam pecude magis quàm homine dignam occurrere potest nisi lacrymæ, quæ ut ait Augustinus, *testes sunt nostræ miserie*. Nihil planè aliud occurrit, quia ut bellè dixit Ambrosius in Luc. *Quod defendi non potest, velui potest*; & tantum recentis Theologiæ delictum lavare possunt lacrymæ, quod voce pudor est dicere, vel refellere. Et fortè sicut Deum non vocis clamor flectit, sed cordis dolor lenit, & lacryma cogit, quæ teste Hieronymuo *vincit invincibilem, ligat omnibotentem, inclinat superbum Virginis* : sic lascivientium ingeniorum sibi plus justo indulgentium licentiam & contentiones

sedabunt magis fletus quàm argumenta, quia ut Chrysostomus tradit : *Sicut post vehementes imbres mundus aer ac purus efficitur ; ita & post lacrymarum pluvias serenitas mentis sequitur, atque tranquillitas.* Pudeat Theologos quosdam non ita sanè sentire ac Philosophum Moralem *epist.* 88. aientem : *Temperantia voluptatibus imperat, alias odit, atque abigit, alias dispensat & ad sanum modum redigit ; nec unquam ad illas propter illas venit. Scit optimum esse modum cupiditatis, non quantum velis, sed quantum debeas sumere.* Porro quod addunt, licere facultatibus actibus suis frui, est deploranda doctrinæ Patrum ignorantia. Quid enim tam pervulgatum, quàm illud Augustini lib. 83. qq. quæst. 30. *Omnis humana perversio est, quod etiam vitium vocatur, fruendis uti velle, & utendis frui.* Et rursus : *Omnis ordinatio, que virtus etiam nominatur, fruendis frui, & utendis uti.* Cui præluserat Seneca lib. de vit. beat. cap. 10. *Tu voluptatem complecteris, ego compeasco : tu voluptate fruoris, ego utor.* Denique illud sanguineis lacrymis flendum, quod solius nocuementi corporis, non animæ meminerint. Verùm ne infirmitati asserant adversarii, quod à compassione proficiscitur, & imbellis animi significationem esse pronuntient pignus charitatis, contra hanc responsionem

Sic insurgo : Nihil magis repugnat rationi, quàm rationem ipsam concupiscentiæ & appetitui inferiori deservire ; quia ut ipsemet Philosophus Moralis lumine naturali ductus *epist.* 65. scripsit : *Major sum, & ad majora natus, quàm ut mancipium sim corporis mei, quod equidem non aliter aspicio, quàm vinculum aliquod libertati meæ circumdatum.* Et certè nihil indignius, nihil ma-

gis contra ordinem, quàm facultatum reginam  
iis potentiis ancillari, quibus debuerat princi-  
pari. Atqui si voluntas deliberatè procedens age-  
ret tantum propter finem delectationis sensi-  
bilis, utque potentiæ inferiores suis fruerentur  
actibus, major serviret minori, ratio concupis-  
centiæ obsequeretur; illa namque facultas,  
scientia, & habitus dicuntur alteri subordinari &  
deservire, quorum objectum & finis, objecto &  
fini alterius subordinantur. Sicut ars dolandi lapi-  
des deservit ædificatoriæ, siæ freno factoria mili-  
tari; operatio pariter voluntatis deliberatè  
agentis propter finem delectationis vel com-  
moditatis sensibilis illi utique manciparetur: Ego  
per illam præposteram ordinationem peccatum  
& perversitas ordinis admittitur.

Confirmatur: SS. Patres, præsertim verò D.  
Augustinus luculentissimè docent, libidinem sen-  
tiendi per se vitiosam, per se rationi repugnan-  
tem, utpote primævi peccati miserimum ger-  
men; docent, inquam, esse necessitatis limitibus  
astringendam. Quia inquit S. Doctor lib. 4. contra  
Julian. cap. 14. *Cum suppleta necessitate amor eden-  
di animum sollicitat, jam libido est, jam malum est,  
cui cedendum non est, sed resistendum.:: Discernere  
ac nosse debemus, quid necessitas refectiois, quid li-  
bido edacitatis exposcat, quorum negotium est con-  
tra concupiscentem carnem spiritu concupiscere, &  
condelictari legi Dei secundum interiorem homi-  
nem, ejusque delectationis serenitatem nullis libidi-  
nis delectationibus nubilare.* Hinc tam crebrò  
docet expugnandum, frenandum, comprimen-  
dum cibi & potus appetitum, non illi omnia ci-  
tra cruditatem indulgendum, non esse laxandas,  
cæteris sensibus habenas. Nam si cum iis pugnare

*dejeritis, vincemini & vinciemini, & ad immun-  
da omnia pertrahemini. Ergo peccat qui propter  
solam delectationem operatur, intenditque so-  
lùm visibus inferioribus satisfacere, quia à  
conditione rationali degenerans fit sicut equus  
& mulus, quibus non est intellectus; assimila-  
tur jumentis insipientibus, & similis fit illis;  
imitatur prodigum, quem vitæ luxuriosæ pruri-  
tus à domo paterna disjiciens deputavit porcis,  
porcis addixit, porcorum tradidit servituti, ut  
porcorum pascua lutulenta percurreret. Junxit  
porcis, inquit Chrysol. serm. 1. à Patre piissimo  
quem se junxit, ut serviret cæno so pecorì, qui ple-  
tati sancta parere contempsit. A se migrat, & ab  
homine totus transit in bestiam paterna pietatis  
immemor, gratia genitoris oblitus.*

Dices: sugum est importabile, & labyrinthus  
scrupulosis conscientiiis inextricabilis, si omnes  
omniò actiones suas, quantumvis indifferentes  
& leves teneatur homo in bonum finem referre,  
si omnibus teneatur delectationibus valedicere  
& renuntiare, si absque ulla voluptate carnali  
alimenta vel naturalia blandimenta debeat su-  
mere, sicut sumimus hæc aëgia, quæ ut loquitur  
Angustius, de circumfusiis auris respirando &  
sorando sorbemus & fundimus. Austerior sanè  
& horridior illa Theologia est, quæ pulchrum  
vetat prospectuæ carapum, fragrantem rosam  
odoratui ob voluptatem admoveere, suavi melo-  
diæ liberas aures dare. Durum planè, & juxtà  
ridiculosum est in omnibus operibus meram  
naturæ commoditatem sectantibus peccatum  
committi. Quid mali est, quæso, dum homo  
a depellendum frigus manus fricat, vel ambu-  
lationi ad concoctionem conferenti indulget.

*Bonum est continentia, inquit Hieronimus ep. 89. malum est luxuria, inter utrumque indifferens ambulare, egerere alvi sterocra, capitis naribus purgamenta projicere, sputis rheumata jacere, hoc non est bonum, nec malum; sive enim feceris, sive non feceris, nec justitiam habebis, nec injustitiam. Ubi S. Pater loquitur de actibus in individuo; ly enim feceris, practicum operis exercitium significat.*

Respondeo nostrâ sententiâ non gravari conscientias, sed levâri; ex amore enim honesti finis sicut melior, ita suavior efficitur operatio agentis, qui exoneratur sarcina peccatorum animum aggravantium. Non implicatur etiam scrupulis, vel anxia efficitur ac inquieta piorum vita, quia non exigimus actualem operum quorumvis in Deum relationem, sed sola virtuali contenti sumus, quâ in Deum sincerè amatum omnes discretas utilitates, & moderatas delectationes referimus: nam *hoc ipsum*, inquit S. Thomas q. 18. art. 9. *Quod aliquis agit ordinatè ad sustentationem vel quietem sui corporis, ad bonum virtutis ordinatur.* Unde assignantur quædam virtutes morales recreationibus & delectationibus modum apponentes; quia postulat rationabile obsequium nostrum quandoque jocosa seriis permisceri, ut temperetur conversatio, ut reficiatur animus fatigatus, quia quod caret alterna requie durare nequit.

Quare non rejicimus omnes vitæ commoditates vel delectationes, sed eas ut par est, rationi subjicimus: ultrò permittimus delectationibus conditi operationes necessarias; sed nolumus quod delectatio corporis sit finis, sed medium ad faciliùs & perseverantiùs in opere insistentum. Non est ergo molesta Theologia nostra, sed

ut indifferentia floccifacit. Quia nimirum divino illustrata lumine suis ponderibus res quasque examinat. Quaecumque sunt vera, quaecumque pudica, quaecumque justa, quaecumque sancta, quaecumque amabilia, quaecumque bonæ famæ, si quæ virtus, si quæ laus disciplinæ, hæc cum Apostolo cogitat, hæc probat, & commendat, cætera quæque ut inania & falsa, ut umbram, larvam, & picturam inanem, quibus nihil veri aut solidi subfit, aspernatur, vel ad summum ut indifferentia, unde actus neque bonus, neque malus efficitur, tolerat. Nam in conspectu veri boni, in claritate æterni Solis quodnam poterunt terrenorum bonorum scientillæ & nebulæ habere momentum? Oculata planè Christiana Theologia, quæ cœlestia cogitans, terrena despicit, in cœlestibus inardescens nihil in terris libet, deformem conspiciit quidquid de terrenæ rei placebat specie, quia sola christianæ vitæ puritas & claritas refulget in mente. Imitatur navigantes sapientia nostra; sicut enim in navī positus videt terras, montes, & promontoria transeuntia, quæ prospero flante vento, & impellente subducta moveri videntur: sic Christianus secundis Spiritus sancti motibus afflatus temporalium blandam & fucatam speciem, ementitamque pulchritudinem cernit ac pertransit, & æternitati defigens oculos, quaecumque videt, transiisse & non esse pronuntiat, quia aliquando defutura in Dei veritate cognoscit. Unde Propheta Regius Psalm. 36. *Vidi impium superexaltatum & elevatum sicut cedros Libani; & transiit, & ecce non erat.*

Divinis erudita cogitationibus, & in lumine



Dei ambulans cuilibet suum designat pretium. Quæ vulgus bona existimat, mala cernit esse, aut vana: bona illa vera existimat, quæ ratio dat, quæ fides exhibet & promittit; illa solida arbitratur, quæ sempiterna, quæ nec cadere possunt; nec decrescere. Cætera opinione bona esse, non re pronuntiat. Quos spargit voluptas odores, quos avaritia demonstrat thesauros, quos spondet amores mundus, insidias laqueosque arbitratur. Quæ sese oculis ingerunt, non continuo amplectitur, sed suis quæque momentis examinat: internam rerum faciem, interiora velaminis pervadit, ad rerum inanitatem & fluxum, ad peccati fæditatem & vindictam, ad impudicitiae indecorem, & marcentes libidines, & retam colluvionem, ad animæ vulnera, & conscientiae cicatrices attendit; & ibi cernit vanitatem aut sordes, ibi advertit venenum inaurato sibi atque geminato poculo propinatum, ubi pulchritudinem & bonitatem inesse arbitrabatur; quia omnia ad rationis trutinam, ubi non exterior rerum facies, sed veritas & rectitudo præsident, vocat. His cogitationibus mente conceptis, libido penitus effugata discedit, & miranda quædam quies & tranquillitas animæ reparatur: *Veluti* (inquit Zeno Veronensis. serm. de præcep.) *si inverecundarum, protervarumque tumultus ac strepitus famularum per adventum & præsentiam gravis ac severa domina comprimatur.*

## SPECVLATIO III.

*Omnis actus deliberatus, quantumvis  
ex objecto indifferens, in individuo  
semper vel bonus, vel malus est  
ex fine vel circumstantiis.*

**H**Anc veritatem variis Patrum testimoniis confirmare necesse non est; nam Vasques oppositum sentiens ultrò confessus est, & non negavit, sed confessus est suam sententiam SS. Augustino & Thomæ, eorumque discipulis ad-vertari. Et meritò; nam *in libro de peccat. merit. & remiss.* apertè tradit voluntatem non posse in medio quodam ita consistere, ut nec bona, nec mala sit; quia *voluntas in omni actu aut bona est, aut mala.*

Totum authoritatum pondus, & rationum momentum ad unicum discursum D. Thomæ sic revoco: Omnis actus advertenter in individuo exercitus, & à voluntate procedens, vel ordinatur ad finem bonum, vel malum, vel indifferentem, vel nullū determinatum. Si in bonum vel malum finem referatur, nemo ambigere potest, quin actus vel bonus, vel malus sit. Si verò in indifferentem ordinetur, vel si nullo fine præintento voluntas advertenter casui operationes suas committat, tunc actum malum esse probatur.

Quotiescunque homo liberè operatur, tenetur dirigere operationes suas in bonum & honestum finem: tum quia homo tenetur operari propter finem consonum suæ naturæ, & sibi ut

rationalis est, proprium, quod non est aliud  
quàm bonum conforme rationi: tum quia est  
præceptum prohibens verbum otiosum. *Matt. 12.*  
*Dico autem verbo, quoniam omne verbum otiosum,*  
*quod loquuti fuerint homines, reddent rationem*  
*de eo in die iudicii.* Quo eodem præcepto vetatur  
etiam actus otiosus, quia teste Hieronymo in  
*Psal. 16. Si de verbis otiosis redditur ratio, quan-*  
*to magis de operibus?* Et ideo generaliter dicitur  
*Ecclesiastis ultimo: Cuncta quæ sunt adducet*  
*Deus in iudicium.* Et *2. Cor. 5. Omnes nos mani-*  
*festari oportet ante tribunal Christi, ut referat*  
*unusquisque prout gessit, sive bonum, sive malum.*  
Ille autem actus est otiosus & inutilis, cui debi-  
tus finis non apponitur, quive ut ait Grego-  
rius Magnus, caret vel pia utilitate, vel iusta ne-  
cessitate, quibus utique carent verba & opera  
in ventum defluentia, quibus inaniter exerce-  
tur anima, & teritur ac prodigitur tempus, de  
quo ait Bernard. *Nihil pretiosius tempore, & heu!*  
*nihil hodie eo vilius invenitur. Transiit dies*  
*salutis, & nemo recogitat. Nemo sibi perire diem,*  
*& nunquam rediturum causatur. Sed sicut capil-*  
*lus de capite, sic nec momentum peribit de tem-*  
*pore.* Tum quia operari propter solam utilita-  
tem, vel objecti delectationem, non est agere ut  
hominem, cùm id etiam brutis commune sit;  
imò id apertè rationi, quâ homines sumus, re-  
pugnet; quia cùm operationes non sint institu-  
tæ propter delectationes, sed è contra operatio-  
nibus, quas condiunt, debeant deservire, ope-  
rari propter delectationem est pervertere ordi-  
nem naturæ rationalis. Unde in veridica Augu-  
stini sententia, conjux petens debitum matri-  
monii ob solam carnis delectationem, peccare:

convincitur. Quare tunc solùm operatur homo, ut homo est, quando propter bonum honestum, operatur: Ergo si homo nullum bonum vel indifferentem intendat finem; si solâ concupiscentiâ, non ratione ad agendum exstimuletur; si Deum sibi in singulis actionibus vel formaliter vel virtualiter non præponat; si soli corpori, vel hominis parti vegetativæ tantummodò consulat; si seipsum, & quæ sua sunt duntaxat quærat in circuitu ambulans, à se recedens, in se semper reflexus, profectò peccabit. Quia bonus finis apud Christianos nullus est, nisi Deus. Bonum ergo opus tunc solùm rectè fit, quando propter Deum fit: quod si ad ipsum aliquo saltem pacto non referatur, hoc ipso non rectè fit, quantumvis aliunde rectum esse videatur.

Certè si in fundatissima Patrum doctrina ipsa pietatis officia per se bona, per se honesta, & suapte naturâ in Deum ipsum tendentia hoc ipso non rectè fiunt, quòd propter commodum temporale fiunt; si asserente Augustino lib. 3. contra Jul. cap. 4. *Virtutes quæ carnalibus delectationibus, vel quibuscumque commodis & inolumentis temporalibus serviunt, vera prorsus esse non possunt; quæ autem nulli servire volunt, nec ipsæ vera sunt. Vera virtutes Deo serviunt in hominibus, à quo donantur hominibus: Deo serviunt in Angelis, à quo donantur & Angelis*; procul dubio ille peccare censendus est, qui actus indifferentes recto fine in bonum non flectit. Itaque totum rationis momentum ad hoc tandem reducitur: Quidquid homo deliberatè agit, vel fit propter bonum finem, & tunc benè agit, modò aliunde opus non sit malum; vel propter malum finem, & tunc perverse agit; vel propter indifferentem, & tunc

otiosè agit, proindeque malè : quia si prodigalitas inaniter expendens pecunias mala est, quomodo peccato carebit actus otiosus, tam vanè expendens tempus omni auro preciosius?

Respondebis, voluntatem solam commoditatem, vel voluptatem facultatum humanarum in actibus de se licitis quærentem non peccare, quia licitè potest appetitus naturalis suis actibus frui ob temporalem commoditatem, ob naturalem fastus, vel sensibilis delectationis inclinationem : sic v.g. comedere & bibere ad satietatem citra necessitatem ob solam voluptatem peccati non damnatur, nisi fortè obsit valetudini, & gravia inde sanitatis incommoda exoriantur.

Sed contra hanc responſionem à nonnullis modernis magnificatam, non tam argumentis agendum esset, quàm gemitibus; nec tam instillandum esset scribendo atramentum, quàm lacrymæ fundendæ. *O ubi estis fontes lacrymarum! Et quid faciemus? Quò ibimus?* ut in simili dixit Augustinus. Enimverò quid contra hanc doctrinam tam spurcam, tam obſcœnam, tam Epicuro magis quàm Christiano, tam pecude magis quàm homine dignam occurrere potest nisi lacrymæ, quæ ut ait Augustinus, *testes sunt nostræ miseriæ*. Nihil planè aliud occurrit, quia ut bellè dixit Ambrosius in Luc. *Quod defendi non potest, abluì potest*; & tantum recentis Theologiæ delictum lavare possunt lacrymæ, quod voce pudor est dicere, vel refellere. Et fortè sicut Deum non vocis clamor flectit, sed cordis dolor lenit, & lacryma cogit, quæ teste Hieronymo *vincit invincibilem, ligat omnipotentem, inclinat fœdum Virginis*: sic lascivientium ingeniorum sibi plus iusto indulgentium licentiam & contentiones

sedabunt magis fletus quàm argumenta, quia ut Chrysostomus tradit: *Sicut post vehementes imbres mundus aer ac purus efficitur; ita & post lacrymarum pluvias serenitas mentis sequitur, atque tranquillitas.* Pudeat Theologos quosdam non ita sanè sentire ac Philosophum Moralem epist. 88. aientem: *Temperantia voluptatibus imperat, alias edicit, atque abigit, alias dispensat & ad sanum modum redigit; nec unquam ad illas propter illas venit. Scit optimum esse modum cupiditatis, non quantum velis, sed quantum debeas sumere.* Porro quod addunt, licere facultatibus actibus suis frui, est deploranda doctrinæ Patrum ignorantia. Quid enim tam pervulgatum, quàm illud Augustini lib. 83. qq. quæst. 30. *Omnis humana perversio est, quod etiam vitium vocatur, fruendis uti velle, & utendis frui.* Et rursus: *Omnis ordinatio, quæ virtus etiam nominatur, fruendis frui, & utendis uti.* Cui præluserat Seneca lib. de vit. beat. cap. 10. *Tu voluptatem complecteris, ego contemasco: tu voluptate fruëris, ego utor.* Denique illud sanguineis lacrymis flendum, quod solius nocuenti corporis, non animæ meminerint. Verùm ne infirmitati asserant adversarii, quod à compassione proficiscitur, & imbellis animi significationem esse pronuntient pignus charitatis, contra hanc responsionem

Sic insurgo: Nihil magis repugnat rationi, quàm rationem ipsam concupiscentiæ & appetitui inferiori deservire; quia ut ipsemet Philosophus Moralis lumine naturali ductus epist. 65. se ipse: *Major sum, & ad majora natus, quàm ut incipium sim corporis mei, quod equidem non aliter aspicio, quàm vinculum aliquod libertari mor circumdatum.* Et certè nihil indignius, nihil ma-



gis contra ordinem, quàm facultatum reginam  
iis potentiis ancillari, quibus debuerat princi-  
pari. Atqui si voluntas deliberatè procedens age-  
ret tantum propter finem delectationis sensi-  
bilis, utque potentia inferiores suis fruerentur  
actibus, major serviret minori, ratio concupis-  
centia obsequeretur; illa namque facultas,  
scientia, & habitus dicuntur alteri subordinari &  
deservire, quorum objectum & finis, objecto &  
fini alterius subordinantur. Sic ars dolandi lapi-  
des deservit ædificatoria, siæ frenofactoria mili-  
tari; operatio pariter voluntatis deliberatè  
agentis propter finem delectationis vel commo-  
ditatis sensibilis illi utique manciparetur: Ergo  
per illam præposteram ordinationem peccatum  
& perversitas ordinis admittitur.

Confirmatur: SS. Patres, præsertim verò D.  
Augustinus luculentissimè docent, libidinem sen-  
tiendi per se vitiosam, per se rationi repugnan-  
tem, utpote primævi peccati miserrimum ger-  
men; docent, inquam, esse necessitatis limitibus  
astringendam. Quia inquit S. Doctor lib. 4. contra  
Julian. cap. 14. *Cum suppleta necessitate amor eden-  
di animum sollicitat, jam libido est, jam malum est,  
cui cedendum non est, sed resistendum.::: Discernere  
ac nosse debemus, quid necessitas refectiois, quid li-  
bido edacitatis exposcat, quorum negotium est con-  
tra concupiscentem carnem spiritu concupiscere, &  
condellectari legi Dei secundum interiorem homi-  
nem, ejusque delectationis serenitatem nullis libidi-  
nis delectationibus nubilare.* Hinc tam crebrò  
docet expugnandum, frenandum, comprimen-  
dum cibi & potus appetitum, non illi omnia ci-  
tra cruditatem indulgendum, non esse laxandas  
cæteris sensibus habenas. Nam si cum iis pugnare

*dejeritis, vincemini & vinciemini, & ad immun-  
da omnia pertrahemini. Ergo peccat qui propter  
solam delectationem operatur, intenditque so-  
lùm visibus inferioribus satisfacere, quia à  
conditione rationali degenerans fit sicut equus  
& mulus, quibus non est intellectus; assimila-  
tur jumentis insipientibus, & similis fit illis;  
imitatur prodigum, quem vitæ luxuriosæ pruri-  
tus à domo paterna disjiciens deputavit porcis,  
porcis addixit, porcorum tradidit servituti, ut  
porcorum pascua lutulenta percurreret. Junxit  
porcis, inquit Chrysol. serm. 1. à Patre piissimo  
quem se junxit, ut serviret canoso pecori, qui ple-  
tati sancta parere contempsit. A se migrat, & ab  
homine totus transit in bestiam paterna pietatis  
immemor, gratia genitoris oblitus.*

Dices: Sugum est importabile, & labyrinthus  
scrupulosus conscientiiis inextricabilis, si omnes  
omniñò actiones suas, quantumvis indifferentes  
& leves teneatur homo in bonum finem referre,  
si omnibus teneatur delectationibus valedicere  
& renuntiare, si absque ulla voluptate carnali  
alimenta vel naturalia blandimenta debeat su-  
mere, sicut sumimus hæc ægia, quæ ut loquitur  
Augustinus, de circumfasis auris respirando &  
spirando sorbemus & fundimus. Austerior sanè  
& horridior illa Theologia est, quæ pulchrum  
verat prospectuæ campum, fragrantem rosam  
odoratui ob voluptatem admove, suavi melo-  
dicæ liberas aures dare. Durum planè, & juxtà  
siliiculosum est in omnibus operibus meram  
naturæ commoditatem sectantibus peccatum  
committi. Quid mali est, quæso, dum homo  
a depellendum frigus manus fricat, velambu-  
lioni ad concoctionem conferenti indulget;

*Bonum est continentia, inquit Hieronymus ep. 89. malum est luxuria, inter utrumque indifferens ambulare, egerere alvi sterocra, capitis naribus purgamenta projicere, sputis rheumata jacere, hoc non est bonum, nec malum; siue enim feceris, siue non feceris, nec justitiam habebis, nec injustitiam. Ubi S. Pater loquitur de actibus in individuo; ly enim feceris, practicum operis exercitium significat.*

Respondeo nostrâ sententiâ non gravari conscientias, sed levâri; ex amore enim honesti finis sicut melior, ita suavior efficitur operatio agentis, qui exoneratur sarcina peccatorum animum aggravantium. Non implicatur etiam scrupulis, vel anxia efficitur ac inquieta piorum vita, quia non exigimus actualem operum quorumvis in Deum relationem, sed sola virtuali contenti sumus, quâ in Deum sincerè amatum omnes discretas utilitates, & moderatas delectationes referimus: nam *hoc ipsum*, inquit S. Thomas q. 18. art. 9. *Quod aliquis agit ordinatè ad sustentationem vel quietem sui corporis, ad bonum virtutis ordinatur.* Unde assignantur quædam virtutes morales recreationibus & delectationibus modum apponentes; quia postulat rationabile obsequium nostrum quandoque iocosa feriis permisceri, ut temperetur conversatio, ut reficiatur animus fatigatus, quia quod caret alterna requie durare nequit.

Quare non rejicimus omnes vitæ commoditates vel delectationes, sed eas ut par est, rationi subijcimus: ultrò permittimus delectationibus conditi operationes necessarias; sed nolumus quod delectatio corporis sit finis, sed medium ad faciliùs & perseverantiùs in opere insistendum. Non est ergo molesta Theologia nostra, sed

casta, sed ordinata, Deumque ipsam imitatur, nam ut ait S. Doctor 1.2.q.2.art.2.ad 2. *instinctu naturæ delectationes appositæ propter operationes.* Fateor tamen, quod quia appetitus delectationis valde sæpe fallit, quia voluptas quæ propter operationem admittitur, *præcurrere aut ducere conatur*, ut in se experiebatur Magnus & humilis Augustinus; ideo septies, id est sæpius cadunt iusti in die, & *in ipsis bonis operibus positi trepidant, ac ne in eisdem occulto aliquo errore displiceant, continuis lamentis vacant*, inquit Magn. Gregor. *lib. 5. Moral. cap. 7.* Nec propterea scrupulosis superstitionibus angimur, sed coram Deo confundimur & humiliamur. Quotidie peccare nos fatemur, anne propterea ab operando cessandum, vel tristitiâ animus obruendus? Minime gentium, sed potius in Domino gaudendum, & ut ait Psaltes, exultandum Domino in tremore. Sanctorum enim timor non turbat, sed humiliat, & humilians sublevat, quia cor contritum & humiliatum non despicit Deus, sed illi eam infundit pacem, quæ in ipsis quoque timoribus exsuperat omnem sensum. Quare D. Thomæ sententia non misera, non inquietam efficit vitam, sed quietam & felicem; quia sicut in luctu, paupertate, & persecutione beatitatem Christus, ita in timore felicitatem Sapiens collocavit, dum dixit: *Beatus homo qui semper est pauidus.* Itaque illos omnes actus, qui inter obijciendum enumerati sunt, ex objecto indifferentes esse non inficior, sed in exercitio esse bonos, si ad bonum finem referantur; malos, si in prævum ordinentur; otiosos, subindeque malos, si bono fine non honestentur. S. autem Hieronymus vult solùm quod si illa fecerimus ex vi, &

meritis objecti, nec malitia, nec bonitas in actum refunditur; sed non negat ex circumstantiis in alterutrum trahi, cum ipse supra docuerit, non solum de verbis, sed etiam de operibus reddendam esse rationem.

Instabis: Communiter assignantur quatuor motiva, per quorum alterutrum rectificari dicitur usus matrimonii, nimirum proles in Dei cultu procreanda, carnis concupiscentia sedanda, sanitas propria uxorisve conservanda, propria obligatio obeunda. Sed in illis omnibus motivis non quaeritur aliquid honestum, sed utile, vel delectabile: Ergo non peccat qui solo utili, vel delectabili ad agendum movetur.

Respondeo majorem propositionem esse e diametro oppositam S. Thomae in 4. dist. 26. & 31. cum Magistro docente: *Duobus solis modis conjuges absque omni peccato conveniunt, scilicet causam procreanda proli, & debiti reddendi, alias semper est ibi peccatum ad minus veniale.* Quam doctrinam S. Praeceptor e sacris Doctoribus hauserat; nam Aug. lib. de bon. conjug. c. 6. & 7. ait: *Conjugalis concubitus generandi gratiam non habet culpam; concupiscentia vero satianda, sed tamen cum conjuge, propter fidem tori, venialem habet culpam. Reddere debitum conjugale nullius est criminis, exigere autem ultra generandi necessitatem, est culpa venialis.* Succinit Magnus Gregor. lib. 32. Moral. cap. 20. ibi: *Tunc solum conjuges in admixtione sine culpa sunt, cum non pro explenda libidine, sed pro suscipienda prole miscentur. Unde necesse est (addit 3. part. Pastor. admonit. 28.) ut crebris exhortationibus moneantur, ut desistant, quod pulchram copula speciem admixtis voluptatibus foedant.*

Notant tamen iidem Patres, in casu quo non

possit aliquis à libidine lethaliter mala sibi tem-  
perare, indulgendum esse ei ut ad sedandam con-  
cupiscentiam uxorem ducat, juxta illud Aposto-  
li : *Hoc autem dico, sed non secundum veniam, se-  
cundum imperium.* Quia nimirum cedere libidini  
etiam non prohibet, non laudatur quidem, sed  
in comparatione mali peioris ignoscitur : et si  
enim non præcipienda, toleranda tamen sunt mi-  
nora mala, si sit evidens periculum mali grandio-  
ris. *Cum in dubiis constringimur*, inquit prælau-  
datus Gregorius, *utiliter minimis subdimur, ne in  
magnis sine venia peccemus.* Itaque plerumque ner-  
vorum Behemot perplexitas solvitur, dum ad vir-  
tutes maximas per commissà minora transitur. Quæ  
regula est summè observanda à viris spiritualibus  
ad deponendos de levibus scrupulos, necnon à  
rectoribus animarum, qui specie levissimi mali  
vitandi infinita bona præpediunt. V. g. nolunt  
subditis idoneis, & aliàs probatæ vitæ licentiam  
prædicandi impartiri, ne regulare silentium  
frangant, neve in alia etiam citra scandalum ob-  
servantia dispensent; similes imprudentibus rei  
familiaris, & œconomicæ administris, qui ne  
obolum impendant, thesaurum perdunt.

Urgebis : Scotista, vel discipulus Vasquesii  
authoritate & rationibus suorum Magistrorum  
confisi, elicientes actus ex objecto & fine indif-  
ferenti, non producent actum bonum, cum nulla  
ei bonitatis ratio affulgeat; nec etiam malum,  
cum nulla in eo malitia appareat. Cum enim  
sententia opposita ( præcisa ab illis sordibus re-  
centiorum quorundam, quas in responsione ad  
rationes nostras attulimus ) sit probabilis, qui  
illam sequetur, actum indifferentem in individuo  
saltem probabiliter eliciet : Ergo tunc dabitur  
saltem



saltem per accidens actus indifferens in individuo ex conscientia probabili, vel ignorantia invincibili. Sicut si aliquis ignoraret se teneri ad restitutionem, non peccaret illam omitendo: sic qui auctoritate Scoti fretus credit se non teneri ad dirigendos actus in bonum finem, omitteus dirigere non peccabit.

Respondeo nullius Doctoris auctoritatem posse bonum efficere actum, quem lex naturalis æternæ legis expressio vetat: lumen autem naturale signatum super nos, & generale dictamen synteresis & prudentiæ gentibus omnibus implantatum, sicut præcipiunt omnia opera deliberata in finem rationali naturæ consonum referre, ita actum otiosum ex fine solius utilitatis vel delectationis elicitum prohibent. Lex etiam naturalis omnibus sese ingerens dictat Deo omnium factori & fini ultimo esse offerenda, & in ipsum saltem virtualiter opera cuncta referenda. Unde qui in otiosis occupatur, & inclinationi naturæ rationalis, & præcepto Dei super omnia diligendi adversatur. Nec est simile quod dicitur de restitutione; quia licet in quaestione juris nemo possit ignorare bonum alienum esse restituendum; in quaestione tamen facti, an hoc, vel illud sit alienum, potest ignorari, nec potest ex solis syntereseos principiis determinari: secus verò an omnia opera sint in honestum finem referenda. Ad quam veritatem perdiscendam non est opus Doctore, sed ratione, qua persuasi Philosophi, inuò & Poëtæ ante fidem, quibusdam Theologis Christianis æquiores finem præcisæ delectationis damnarunt, ut patet his versibus sequentibus:

*Vina sitim sedont, natis Venus alma creandis  
Seruit: finem horum transfiliisse nocet.*

**Instites :** Datur actus indifferens secundum speciem : Ergo & secundum individuum ; nulla enim est species quæ non habeat, vel saltem habere possit aliquod individuum.

**Respondeo**, bonam non esse consequentiam, quia actus secundum speciem attenditur duntaxat penes ordinem ad objectum, quod cum sæpe neque bonum, neque malum per se sit, nullam bonitatem vel malitiam, sed specificam tantum indifferentiam in objectum refundit. At verò actus in individuo consideratur ut vestitus omnibus circumstantiis, quarum præcipua est finis, qui debet esse honestus, ne actus sit otiosus.

**Persistes :** Ideo actus nullam percipit ex objecto bonitatem vel malitiam, sed meram indifferentiam, quia objectum est indifferens : Ergo similiter si voluntas agat propter finem indifferentem, nulla derivabitur malitia in voluntatem : tum quia eadem est, & par utriusque ratio : tum quia finis non potest refundere in actum, nisi quod habet : Ergo indifferens indifferentiam causabit, nec potest finis innoxius noxiam efficere actionem ; fructus quippe naturam arboris sapit & exprimit.

**Respondeo** non teneri quidem hominem respicere semper objectum honestum in suis actibus, quibus tamen finem honestum apponere tenetur. Et ratio disparitatis est, quia etsi objectum non sit intrinsecè honestum, modò aliàs sit licitum, potest superveniente bonitate finis honestari : si verò & objectum, & finis sint ambo indifferentia, nihil erit per quod honestetur operatio creaturæ rationalis, quæ in omnibus

actibus deliberatis benè & honestè agere tene-  
tur. Nec verò ista veritas adeo obscura est, ut à  
solis Doctõribus Ecclesiasticis doceatur: vidie  
enim eam, scripsitque infidelitas Paganorum,  
ut pietas Christianorum erubesceret. Quid enim  
crebrius apud Tullium in suis libris de legibus,  
& de officiis, & de finibus bonorum & malo-  
rum, ac Tusculanis quæstionibus legitur, quàm  
solum bonum esse quod rectum, & honestum,  
& cum virtute est, & quod nisi quod honestum  
est, nihil putari bonum potest. Hinc docet nos  
*occultare appetitum voluptatis, etiam cum sumus  
erectiores ad virtutem*; quia generosos animos  
pudet voluptatis primò intentæ, etiam cum  
virtuti student. Hinc infert, *corporis voluptatem  
non satis esse dignam hominis præstantiâ, & per-  
tinere ad omnem officii quæstionem, semper in  
promptu habere, quantum natura hominis pecudi-  
bus, reliquisque bestiis nihil nisi voluptatem sen-  
tientibus antecellat*. Qualis pudor, cõ post fidem  
non pervenisse Theologos, quò ante fidem  
Philosophi pervenere! Quod additur, finem  
indifferentem non posse in actum nisi indiffe-  
rentiam refundere, verum est quantum est ex  
meritis finis indifferentis; falsum verò est, si  
attendatur obligatio agentis rationalis, qui fi-  
nem rationi consonum sibi in actibus delibera-  
tis præstitui teneatur. Nam ut ait Augustinus  
lib. I. de nupt. & concupisc. cap. 4. *Malè utitur  
qui bestialiter utitur, ut sit ejus intentio in vo-  
luptate*.

Obstites demùm: Illud non est malum, ad  
quod natura inclinatur; cum enim opus naturæ  
sit opus intelligentiæ, in Deum refunderetur  
talis propensio: Atqui natura non modò non

rejjicit , fed etiam inclinât in voluptatem, faltem licitam , & in utilitates convenientes : ergo actus propter delectationem vel utilitatem eliciti non funt mali , fed indifferentes.

Refpondeo, naturam inftituiffè delectationes propter operationes , unde naturalis ordinis perversitas eft fi operatio in delectationem referatur. Tunc ergo folùm rectè delectationes adhibemus , cùm per eas agimus , non propter illas. *Hoc malo* ( id eft carnali voluptate ) *benè utuntur nuptia , cùm conjuges procreant filios per illam , nihilque faciunt propter illam*, ait Auguft. Fateor quidem naturam vegetativam & fenfitivam in voluptatem & utilitatem etiam contra rationis ordinem propendere , voluntatem etiam in fuas partes & castra pertrahere : fed homo ut animal fibi ipfi ut rationalis eft fubjici debet; quâ rationalis eft, fibi ut Chriftiano fupponi, cùm longè major fit intercapedo inter hominem ex primo Adamo natum , & ex fecondo regeneratum , quàm intercedat inter hominem & brutum. Unde omnes fenfualitatis motus , de quibus omnis pudens , impudensque confunditur , vel comprimendi funt , dum in malum feruntur ; vel parti fuperiori fubdendi , dum in indifferentia invitant. Nec obefit quod hic voluptatis appetitus in pecoribus inveniat , fubindeque innoxius videatur ; quia ut divinè dixit Auguftinus lib. de peccat. origin. cap. 40. *Tanta excellentia eft in comparatione pecoris homo , ut vitium hominis natura fit pecoris.*

## R E F L E X I O.

Magna est nobis imposita necessitas bene agendi, quibus de omnibus & minimis agenda ratio est, de singulis aut pœnas subituris, aut præmia. *O celsitudinem Religionis Christiana!* (exclamat alicubi P. Granatensis) *Aculei ligula rationem quis dominus à servis exposcere cogitavit!* Et tamen Christus minutias factorum, verborum otia ad districti examinis advocabit tribunal, & ut loquitur Scriptura, interrogabit opera, scrutinium in lucernis instituet super usu abusuque libertatis, inquireret facta, cogitationes scrutabitur, intentiones appendet, justitias ipsas judicabit; & quidquid invenerit non esse honesti gratiâ & virtutis amore patratum, totum respuet tanquam pannum menstruatum. Dic, sodes, crederesne Philosophos Deo esse æquiores, & rigidiores virtutis exactores? Tunc patereris eò infamiae Evangelium Christi delabi, ut laxioris sit disciplicæ quàm Ethica Philosophorum, quæ ut suprâ vidimus, voluptatem damnat non solum ex turpibus consequutam, sed ex sola virtute justissimè profluentem, si sola, aut prima delectatio illa quaeratur. Minimè sanè ita credere licet, sed certissima fide tenendum, hominem toties à ratione aberrare, & à suæ sortis gradu in brutorum ordinem vili degeneratione desciscere, quoties semota, aut postposita honestate, utilitatem, aut voluptatem, vel solum, vel primò aucupatur. Quis ferat eloquia Domini eloquia casta, legem ejus immaculatam convertentem animas à Pagana sapientia vinci, eaque indul-

gere quæ Philosophi prohibuerunt. *Obsecro*, ut aliàs ex Augustino diximus ) *non sit honorior Philosophia Gentium , quàm Christiana*. Si Tullius , si Seneca virtutem solâ convenientiâ cum natura , non nuda aut sana , sed geniali peccato corrupta dimetientes , adeo puram absolutamque esse voluerunt , ut nedum libidinis sordes , sed etiam voluptatem ex rebus bonis perceptam sua sponte honestam reprobarint , si prima spectetur , *si ducat* , ait Seneca , *& non sit accessio* , si sit scopus unicus , & non condimentum ; quid à Christianis exiger , vel non exiger Christus ? Quid à membris suis tam sanctum caput postulabit , quæ gratiâ in Baptismo regeneravit , sancto oleo inuncta in Confirmatione sacrauit , carne sua in Eucharistia pavit , diviniſque præſidiis munivit & donis , ut novæ creaturæ personam gererent , & ad finem vires & vota nostra excedentem pervenirent ?

Hæc cum ita sint , *delicta quis intelligit* ? Rara enim avis in terris homo , qui in omnibus moribus deliberatis solo honesti amore permoveatur , cum omnes quæ sua sunt quærant , non quæ Jesu Christi. Accepi ab uno Ordinis nostri insigni Concionatore , peccatum tempore esse conferendum , eo quod sicut natura utriusque occultissima singulos quosque latet , sic utriusque usus notissimus & frequentissimus est. Omnes de tempore loquuntur , omnes temporis jacturas & bonum usum norunt , omnes ferè tempus terunt , aut fallunt ; & tamen si ab eis quæras quid sit tempus , nesciunt , & cum Augustino vix posse definiiri credunt. Similiter quid sit peccatum , explicatu difficillimum est , quia illud exponere perobscurum est , quod



nec in Deo ideam habet ; & tamen peccatum singulis fermè monentis nobis obrepens , per omnes sensus quasi aquam ebibimus , quasi aërem haurimus , quia ubique voluptatem , aut solam utilitatem captamus. Quin etiam in ipsis sacrae Religionis exercitiis semper occurrit, semper se insinuat circumstans nos peccatum: nam Litterarum sacrarum studium per se honestum , ex una sciendi voluptate initum, curiositatis vitium pascit : ipsa etiam oratio mentalis, Sacramentorumque frequentia , quibus in vita spiritus nihil utilius, solâ deliciarum cœlestium voluptate susceptæ , & cum minùs sapiant neglectæ , nonnihil sordescunt , quia libidinis spiritualis aliquid respiciunt.

Agnosce ergo , ô Christiane , Religionis tuæ puritatem , agnosce & dignitatem tuam , & Divinæ consors factus naturæ , noli infra te reperire , noli in brutorum ordinem & vilitatem degeneri conversatione deciscere. Memento cujus capitis , cujus corporis sis membrum , cujus Evangelii discipulus , & quorum Sanctorum filius. Reminiscere quod quia erutus es de potestate tenebrarum , translatusque in Dei lumen & regnum , plura à te exiguntur quàm Christiano , quàm ut homine. Fecit te Dominus ad se : ad paradysum ergo mente transgredere , & esse incipe quod futurus es. A Christo regeneratus novum habes esse , novam vitam : novas ergo operationes habeat nova creatura necesse est, ne inveniaris coram Domino vacuus , & postquam tota vitæ tuæ nocte laboraveris , nil te cepisse convincaris. Triplex est bonorum genus , infra nos , intra nos , supra nos : infra nos voluptas , & fortuna : intra nos virtus moralis,

& merè humana; supra nos Deus, summum bonum. Si prima quæras, brutum eris: si secundis contentus sis, Philosophus vocaberis: si tertiis inhies, Christianus eris. Semper nos agere oportet hominem, vel Christianum: imò solius Christiani personam gerere decet; quia sicut ratio est fides hominis (juxta illud, *Quod non est ex fide, id est ex rationis regula & conscientia, peccatum est:*) ita fides est tota ratio Christiani, ex qua nobis vivendum est, quia justus ex fide vivit: at quomodo vivit ex fide, qui ex fide non operatur? cùm vita in operatione posita sit.





## DISSERTATIO II.

*De bonitate & malitia actus  
moralis.*



EXPLICATA actus humani cū entitate, tum moralitate, necnon primā ejus specie indifferentiā; de duplici alia, bonitate nimirum & malitia agendum superest, ut per æquo totius conatus impetu illam prosequamur, istam detestemur. Eō namque totum collimat Ethicæ Christianæ studium, ut declinantes à malo faciamus bonum, & ad ipsum tandem perveniamus summum bonum. Nec illi sola Regilio Christiana incumbit; honestatis decorem vidit & amavit Philosophia Gentium, cui nihil bonitate pretiosius, nihil antiquius erat; cæteras artes & scientias arti vitæ comparatas floccipendebat. Nam ut prosequitur Seneca *epist.* 88. quid Geometriæ studes, ut discas metiri latifundia? Id potius disce, quomodo metiaris quantum tibi sit satis. Quid me doces, quomodo inter se acutæ & graves voces consonent, quomodo nervorum disparem reddentium sonum fiat concordia? Fac potius quomodo animus meus secum consonet, nec consilia mea discrepent. O egregiam artem! Scis rotunda metiri,

in quadratum redigis quamcunque acceperis formam; nihil quod in mensuram tuam non cadat. Si artifex es, si Geometra, metire animum, dic quàm magnus sit, d'c quàm pusillus sit. Sc'is quæ recta sit linea; quid tibi prodest, si quid in vita rectum sit ignores?

---

## C A P V T I.

### *De principiis & regulis bonitatis moralis.*

**E**X his quæ suprà de moralitate in communi diximus, sitis superque con stat quid de bonitate sentiendum sit. Si enim moralitas actus nihil aliud sit quàm ejusdem subjectio ad regulas morum, ille actus bonus erit qui regulis bene agendi conformabitur. Quævis enim ad bonitatem moralem actus exigatur multiplicium conditionum concursus, variarumque collectio circumstantiarum, quas recta ratio præse ibit, unde eam S. Doctor *plenitudinem essendi* appellat, quâ nihil actioni humanæ deest ex his quæ ad ipsius rectitudinem, sive quoad finem, sive quoad locum, sive quoad tempus, aliaque id genus desiderantur; ille tamen conditionum apparatus magis se tenet ex parte objecti, quod debet omnibus illis circumstantiis obvestiri, ut actus in ipsum debitè tendat; unde in illa actus tenentis habitudine, proportionem, relationem, & commensurationem ad objectum debitis omni-

bus circumstantiis instructum bonitatem actus sitam esse perspicuum est, subindeque plenitudinem essendi objectivè & præsuppositivè; respectum verò ad objectum regulis morum consonum formaliter bonitatem constituere, probatum sufficienter manet. Quare de principiis & regulis moralitatis agendum superest, ut ex illis, & juxta illas bonorum operum praxi sedulam operam navemus. Nam ut ait August. lib. 8. de Trinit. cap. 3. *Quarendum bonum anima, non cui supervolitet cogitando, sed cui hæreat amando.* Imò nec ipse amor boni plenè bonus est, si sterilis est; quia ut idem Pater lib. 4. contr. Julian. cap. 3. scripsit: *Fieri non potest ut steriliter boni simus.*

## SPECVLATIO I.

*Tria sunt principia bonitatis, objectum, circumstantia, & finis; unde multiplex in actum honestas derivatur.*

**P**ROBÀTUR prima pars: Actus bonus est prosequutio, via & tendentia ad objectum ut consonum regulis morum: ergo primò inspicit objectum, ab eoque haurit priùs bonitatem, quàm eam à fine extrinseco, vel circumstantiis mutuetur. Unde ut tradit S. Doctòr, objectum se habet ut forma extrinseca mensurans bonitatem illius. Quod quidem intelligitur de objecto non secundùm entitatem realem considerato, sed de

codem regulis morum consono, & induto circumstantiis honestatis. Siquidem ad idem materiale objectum non minus mali quàm boni feruntur actus: eandem pecuniam amat avarus vir divitiarum, floccificat Sanctus thesaurizans sibi thesauros in cœlo: eundem cibum modestiâ utentis accipit temperatus, libidine fruētis & amantis affectu helluo vorat. Scut etiam in speculativis idem objectum prout diversorum subest lumini principiorum, à diversis etiam scientiis consideratur. Quod objectum coincidit cum fine operis, seu fine intrinseco operationis; omnis enim potentia tendit per operationem in objectum circa quod operatur. Et hoc est quod sibi vult S. Doctor, dum interdum ait actus humanos specificari à fine; loquitur enim non de fine operantis, quem sibi agens præstituit, sed de fine operis in quod actio sua sponte propendet.

Dices: Dantur plures actus qui nullam hauriunt ex objecto bonitatem: v.g. actus fortitudinis nullam ex tolerantia passionum præcisè sumpta dignitatem recipit, nisi in finem justitiæ & religionis referatur: & similiter abstinentiâ à venereis non est actus virtutis virginitatis, nisi ad cultum Dei & cœlestium contemplationem referatur, ut docet S. Thomas 2. 2. q. 124. & 152. Imò S. August tam crebrò, tam constanter docet, non ex officiis, sed ex fine pensandas esse virtutes. *Quidquid fit ab homine, inquit lib. 4. cont. Jul. cap. 3. & non propter hoc fit, propter quod fieri debere vera sapientia præcipit, etsi officio videatur bonum, ipso non recto fine peccatum est.* Idem etiam apparet in actu indifferenti in individuo, in quem nulla ex objecto bonitas, sed ex fine tota refunditur. Idem quoque in actu interiori, cujus



objectum est actus externus : nec tamen ex hoc in illum , sed ab illo in hunc tota bonitas derivatur. Denique iste actus, quem in fervore spiritus elicit Christianus, *Volo piè vivere, & in novitate vitæ studiosè ambulare* ; vel Clericus post attentam status sui præcellentiam eructans hoc verbum bonum, *Volo ad normam canonum meam exigere vitam* ; vel Religiosus laxatæ disciplinæ misérias deplorans, & inquiring, *Volo juxta rigorem regulæ meos componere mores* : illi omnes actus non desumunt honestatem ab objecto , alias omnium continerent virtutum bonitatem , cum in earum omnium objecta & materias implicite protendantur.

Respondeo, in omnibus illis actibus primariâ ex objecto bonitatem derivari. In primis fortitudo ex tolerantia passionum, virginitas ex omnium venereorum contemptu commendatur, cum in objecto illarum sit gravis evincenda difficultas , quam sola superat virtus. Requiritur tamen per modum conditionis finis extrinsecus bonus , quia bonum nisi fiat benè , nihil valet apud Deum , qui affectum magis pensat quàm censum, nec quantum, sed ex quanto, nec verba, inquit Granatensis, sed adverbia pluri facit : & hoc est quod intendit S. Thomas locis memoratis , necnon D. Augustinus libro adducto : non quod negent ex objecto bono refundi in actum honestatem, sed volunt talem effluxum apposto malo sine penitus impediri. Unde ait S. Pater: *Noveris itaque non officiis, sed finibus, à vitiis discernendas esse virtutes : officium autem quod faciendum est ; finem verò propter quem faciendum est.* Hinc Sancti ( ut hoc obiter dicam ) tanto per amore proprii insidias , & falsarum virtutum

vel observantiam: quod objectum licet sit commune & genericum, tamen prout respicitur sub uno motivo consonantiæ ad rationem, vel Evangelium, vel institutum regulare, est unum unitate objecti; sicut objecta scientiarum, habituum, & potentiarum, quantumvis ampla sint & latè diffusa, tamen ut substernuntur uni rationi formali unitatem specificam in ratione objecti obtinent. Quia nimirum virtutum omnium varietas, Christianismi multiplex officium, & status Clericalis aut Regularis præclarissima instituta ab illo actu respiciuntur sub una sola ratione; in illis enim omnibus quàmlibet variis una placet conformitas ad rationem, una Christianismi puritas, una Cleri vel Religionis sanctimonia. Ad venandam quippe specificam actuum unitatem, non est sola objecti unitas, aut multiplicitas consideranda, sed motivum potissimè pervidendum est, unde speciem sortiuntur. Adde quod licet objectum illius actus, *Volo studiosè, Christianè, & regulariter vivere*, multa virtualiter contineat, ad unum tamen tendit, nempe ad ultimum finem bonum, quem sibi proponit, dum seridè in corde nascitur diligendi Dei propositum; amor enim sæpe in hujusmodi actus prorumpit, si verus est; quia germana amoris Dei nota est firma & constans studiosè vivendi, & à peccato recedendi voluntas. Quod si hic actus amorem Dei præcedit, proficiscitur ab appetitu boni, quem Deus nobis implantavit veluti virtutum omnium seminarium, quive fundatur in illo universalissimo principio à synteresi attacto: *Declina à malo, & fac bonum*. Unde actus ille ante justificationem elicitur ab amore naturali boni; post justificationem à charitate.

Secunda pars, quæ asserit actum humanum desumere bonitatem ex circumstantiis in quibus elicitur, manifesta est. Tum quia sic naturalis perfectio non in sola forma posita est, sed ex variarum proprietatum & accidentium comitatu confurgit: humana v.g. perfectio non solâ animâ constat, sed ex variis animæ facultatibus, corporisque concinno habitu, membrorumque proportionem, elegantiam, aliisque accidentibus integratur; quia generaliter omnis creata bonitas composita est, solus Deus in inexhausto indivisibilis essentiae suæ fundo infinitam reperit perfectionem: Ergo similiter bonitas actus moralis non à solo objecto, quod habet rationem formæ extrinsecæ à qua specificatur, sed ab adjunctarum circumstantiarum concursu derivatur. Tum quia actus humanus ab illo accipit bonitatem quod respicit juxta regulas morum, quibus conformatur: Sed actus humanus non solum respicit objectum nudè sumptum, sed fertur in illud ut est circumstantiis vestitum; quia non solum est conveniens circa tale objectum operari, sed etiam tali modo, tali loco, tali tempore: v. g. non solum congruit subvenire miseræ alienæ, sed etiam decet eleemosynam cum affectu, magis indigenti, tempore & loco necessitatis erogare. Et idem apparet in actu malo; rationi enim non solum repugnat alienum eripere, sed magis ab egeno, quàm à divite; magis in loco sacro, quàm profano; magis cum vi, quàm dolo; magis ad mœchandam, quàm ad elargiendum pauperibus de mammona iniquitatis. Similiter malum est percutere quemvis innocentem, pejus ferire benefactorem, & adhuc detestius in Sacerdotem manus inferre violentas.

Confirmatur idipsum discurrendo per singulas circumstantias, quæ septem enumerari solent hoc versiculo comprehensæ, *Quis, quid, ubi, quibus auxiliis, cur, quomodo, quando*. Circumstantia *quis* sæpe exaggerat opus bonum vel prævum; commendabilior enim est humilitas Regis quàm plebei; damnabilior quoque iniquitas Clerici vel Regularis, quàm sæcularis: facit enim ad operis pretium status & conditio personæ conjugatæ, vel solutæ; voto astrictæ, vel liberæ; subditæ, vel in dignitate aut potestate constitutæ. Circumstantia *quid*, est accidens objecti, vel effectus ex actione consequuti. Sic commendatur eleemosyna à quantitate profusionis, furtum augetur ex quantitate rei alienæ raptæ, gravitas percussionis crescit ex personæ læsæ dignitate, vel consecratione. Circumstantia *ubi*, explicat locum, in quo patrat, operatio, quæ est scandalosa, si fiat in publico; sacrilega, si fiat in Ecclesia; utilis & in ædificationem, si lux bonorum operum luceat coram hominibus, ut videant opera bona, & glorificent Patrem qui in cœlis est. Circumstantia *quibus auxiliis*, enumerat varia instrumenta, quibus utitur operans: v.g. commendatur zelus Prædicatoris, qui ad convertendas animas præter verba & exempla adhibet crebras & diuturnas preces, pœnitentias, fletus, &c. pro salute eorum quibus evangelizat. Sicut è contra crescit & amplificatur malitia operantis, si ad assequendum propositum, fraudibus, dolis, malis artibus, magicis incantationibus utatur. Circumstantia *cur* non designat finem intrinsecum operis, qui ab objecto non distinguitur, sed finem significat operantis, quæ circumstantia in moralibus præcipuum locum habet, quia intentionem dirigit,

quæ cæteris actibus humanis præit, quia est prima motio, & veluti prima rota vitæ moralis, ut postea patebit. Circumstantia *quomodo* exponit modum & actionis, & operis, & mediorum ad finem ducentium. Sic considerare solemus an opus fiat tardè, velociter; rectè, ineptè; spontè, ægrè; ferventer, tepidè; sincerè, insidiosè; temperanter, luxuriosè. V.g. in gula attenditur an quis comedat præpropere, lautè, nimis, ardentè, studiosè. In aliis quoque excessibus perpendetur modus, cultus, consecratio, fastus, nimis exquisitus deliciarum delectus, affectatio vanitatis, libidinis fluxus, & effrænata licentia. Ex oppositis verò circumstantiis opera virtutum non mediocrem hauriunt honestatem. Circumstantia *quando* expendit qualitatem temporis, & quantitatem durationis. V.g. opus servile, reprobatur in die festo, & eo pejus est, quo diutius exercetur.

Circa hujusmodi circumstantias tria notanda sunt. Primum, nos hic loqui de circumstantia superveniente actui in sua specie constituto, quæ est accidens actum humanum in ordine morali circumvestiens, & veluti circumstans: & tunc circumstantia non est volita primariò & directè, sed secundariò, accessoriè, & consequutivè. V.g. aliquis intendit furari præcisè, sed quia non se offert occasio nisi in loco sacro, ideo oblatam in Templo latrocinii opportunitatem arripit, sed tunc malitia sacrilegii supervenit furto. Quod si circumstantia transeat in rationem objecti, ut si in allato exemplo aliquis intendens violare locum sacrum furatur, tunc sacrilega profanatio non est circumstantia, sed objectum nefariæ intentionis. Secundum notabile est,

circumstantiam loci tunc solum exaggerare opus bonum aut malum, quando aliquid indecori, vel decori ex loco redundat in opus, vel in locum; si secus, circumstantia materialiter, & impertinenter se habet: sic firmum pœnitentiæ propositum, sive in Ecclesia, sive in cubiculo conceptum per æqui meriti est: actus superbiæ interioris non minùs malus in agro, quàm in templo, nisi fortè in Ecclesia fieret specialis reflexio domus Dei, quam decet sanctitudo, præsentia Christi, celebrationis augusti Sacrificii, quorum venerationi repugnat ad alia quævis, & multò magis in peccata excursus, & mentis evagatio. Tertiò observandum est ab aliquibus, inter circumstantias præfatas annumerari *Quoties*, seu numerum: sed frustra; numerus quippe pertinet ad substantiam actus pluries repetiti, & ideo est specialiter in confessione exprimendus, ut declaravit Tridentinum *sess.* 14.

Dices: Omnis circumstantia moralis afficiens objectum, transit in rationem objecti, cum nullam afferat actui, quem circumstat, bonitatem, nisi sit volita: quod autem volitum est, utique est objectum voluntatis, sicut omne visum est objectum visus: Ergo perperam distinguimus bonitatem ex objecto à bonitate ex circumstantiis petita.

Confirmatur enumeratione singularum circumstantiarum. In primis circumstantia *Quis*, seu conditio, status, aut dignitas personæ, non amplificat actum amoris Dei, v.g. cum eadem intentione elicatum; Deus enim qui acceptor personarum non est, operis pretium, & intentionis puræ rectitudinem respicit, non agentium inæqualitatem. Circumstantia *Quid*, seu quantitas



materiae & objecti, si augeret bonitatem, aut malitiam actus qui in infinitum objectum protenderetur, puta qui desideraret infinitis pauperibus subvenire, infinitis nocere, infinitam bonitatem vel malitiam respectivè perciperet, si juxta proportionem objecti nova accipiat actus clementia bonitatis aut turpitudinis. Circumstantia *Vbi*, & *Quibus auxiliis*, cum sint valde extrinsecæ actui humano, nullam queunt illi bonitatem intrinsecam afferre. Circumstantia *Quomodo*, v. g. intensio actus non auget bonitatem, quia est incognita latitudo gradualis actuum; si autem non est cognita, nequit esse volita; si autem non est volita, profectò nullam in voluntatem refundere bonitatem potest. Denique circumstantia *Quando*, si augeret bonitatem, actus per horam durans haberet infinita bonitatis crementa correspondentia singulis instantibus & partibus temporis in infinitum divisibilibus.

Respondeo ad argumentum, circumstantias non transire in rationem objecti, quando non sunt per se primò, & immediatè volitæ, sed tantùm mediatè per modum accidentis & accessorii supervenientis: tunc nihilominus dicuntur volitæ secundariò, virtualiter, implicitè, & indirectè: & in hoc sensu dixit S. Thom. *q. 19. art. 2.* actum interiorem à solo objecto bonitatem desumere, quia etiam circumstantiæ intra objectum saltem secundarium voluntatis continentur, subindeque in aliquo vero sensu rationem objecti voluntatis induunt. Sicut ergo rectè distinguimus objectum primarium à secundo, ita & bonitatem petitam ab objecto, ab ea quæ supervenit ex circumstantiis.

Ad confirmationem dicendum, ex singulis cir-

cunstantiis singularem in actus effluere bonitatem, quia omnis circumstantia moralis convenientiam, vel repugnantiam habet cum ratione, aliàs non esset circumstantia moralis, sed merum accidens physicum nihil conferens honestatis, vel turpitudinis. Itaque conditio & dignitas personæ materialiter & merè concomitanter se habens, nihil quidem adjicit bonitati, sed si ex illa aliquid decoris, vel dedecoris consequatur, ut cum personæ dignitas subjicitur, cum consecratio profanatur, tunc opus majoris bonitatis lucem, vel peioris turpitudinis tenebras contrahit. Maximè quia personæ in sublimitate constitutæ vel Deo specialiter sacre exemplum alios ad se pertrahit; nam Regis ad exemplum totus componitur orbis, & omne animi vitium tanto conspectius in se crimen habet, quanto qui peccat major habetur. Hinc scriptum est: *Potentes potenter tormenta patientur.* Quia ut Gregorius in *Past.* scribit: *Nemo amplius in Ecclesia nocet, quàm qui perversè agens, nomen vel ordinem sanctitatis habet. Delinquentem namque hunc redarguere nullus præsumit, & in exemplis culpa vehementiùs extenditur, quando pro reverentia ordinis peccator honoratur.*

Ad id quod dicitur de quantitate objecti, dico per illam augeri bonitatem, stando intra limites quantitatis capacitati intellectus, & voluntatis proportionatæ: cum enim bonitas non augeatur ex quantitate objecti in esse rei, sed in esse objecti, prout nimirum voluntati ab intellectu proponitur; aliunde verò hæc propositio sit imperfecta & confusa, quia intellectus nequit infinita clarè, distinctè, & declarativè proponere secundum individuas singularium partium ratio-

nes, fit inde actum voluntatis, qui fertur in ob-  
jectum quantitate infinitum, non propterea ha-  
bere bonitatem infinitam. Quod verò dicitur  
circumstantias *Ubi*, & *Quibus auxiliis*, utpote  
extrinsecas, nihil internæ bonitati opitulari, fa-  
cillimæ est solutionis, quia licet circumstantiæ,  
sicut & objectum, externa sint, ordo tamen ad  
illa interior est, in qua habitudine sitam esse in-  
trinsecam bonitatem actuum, ex suprâ dictis  
manifestum est.

Quod verò additur de intensione actus, quæ  
ad circumstantiam *Quomodo* reducitur, dico quod  
licet intensio non sit cognita in actu signato de-  
terminatè, & veluti speculativè, est tamen cog-  
nita in actu exercito, & practicè; quia sentitur,  
& experimento percipitur fervor aut tepor vo-  
luntatis, & hoc ipso quod voluntas illum actum  
fervidum vel tepidum exercet, intensiorem, vel  
remissionem illius amat.

Quod si urgeas: Intensio indeterminatè volita  
& cognita determinatum causat bonitatis gra-  
dum, quidni similiter quantitas objecti infiniti  
indeterminatè volita non afferet bonitatem ma-  
jorem quacumque finita, subindeque infinitam?  
Respondeo grandem esse disparitatem, quia in-  
tensio se tenet ex parte actus, & quia actus non  
est directè volitus nisi per actum reflexum, &  
tunc unus actus habet rationem objecti alterius,  
ita intensio non debet esse directè volita, ut spe-  
cialem addat bonitatem. At verò, quantitas se  
tenet ex parte objecti, unde eo modo communi-  
cat bonitatem, quo objectum: Ergo sicut obje-  
ctum ut eam distinctè communicet debet esse  
distinctè, formaliter, & explicitè volitum, ita ut  
ex quantitate objecti bonitas actioni superac-

crescat, debet distinctè desiderari. Nota etiam ad solutionem argumenti ex quantitate objecti infiniti petiti (quod fateor esse difficile & importunum, ut contingit in omnibus argumentis calculatoriis) deservire posse ea quæ antea dicebamus de objecto illius actus, *Volo studiosè vivere*: sicut enim objectum illud est indeterminatum & quadantenus infinitum, ita & quantitas objecti. Sed hæc iterare non expedit, tum quia brevitati studemus, tum quia bona mens tua, Lector, multis non indiget litteris.

Denique quantum ad durationem actus dicendum illâ non augeri bonitatem actus juxta numerum instantium, vel partium proportionalium, sed juxta partes aliquotas, & æquales, utique finitas, sicut aliæ omnes qualitates sine interruptione per aliquod tempus adauctæ non intenduntur gradibus infinitis, sed in determinato numero perfectioribus. Notandum verò, durationis diuturnitatem non parum amplificare operis moralitatem, quia si sit duratio operis mali, arguit majorem appetitus corruptionem, ardentioris peccandi libidinem, profundiores peccati radices; sicut è contra continuatio operis boni specialem habens difficultatem à perseverantia vincendam, præcipuam meretur laudem, quia singulare est firmi, & intrepidi animi constantiam, patientiam, soliditatem significat. Unde vocatur à Bernardo epist. 129: *Nutrix ad meritum, mediatrix ad præmium, soror patientia, constantia filia, amica pacis, amicitiarum nodus, unanimittatis vinculum, sanctitatis propugnaculum. Tolle perseverantiam, nec obsequium mercedem habet, nec beneficium gratiam, nec laudem fortitudo. Denique non qui inceperit, sed*

qui perseveraverit usque ad finem, hic sal-  
vus erit.

Tertia pars quæ tradit, finem esse principium bonitatis, satis superque constat ex præcedenti, cum finis sit una ex præcipuis operis circumstantiis. Specialiter tamen de illa disputat S. Thomas, quia potissimus fons bonitatis, finis est. Et ita indicat Scriptura, in qua ex fine pensantur opera. Matth. 6. *Lucerna corporis tui est oculus tuus? Si oculus tuus fuerit simplex, totum corpus lucidum erit; si autem oculus tuus fuerit nequam, totum corpus tuum tenebrosum erit.* Ideo tam seriò monet Salvator, ut à perversa superbiæ, vel alterius vitii intentione caveamus. Attendite, inquit Matth. 6. *ne iustitiam vestram faciatis coram hominibus, ut videamini ab eis, alioquin mercedem non habebitis apud Patrem vestrum.* Ad quæ alludens Augustinus in Psal. 31. inquit: Non valde attendas quid homo faciat; sed quid, cum facit, aspiciat. Et Ambrosius in cap. 1. Luc. Bona est misericordia, bona est oratio; sed potest injustè fieri, si jactantia causâ aliquis pauperi largiatur, ut videatur ab hominibus. Hac de causa præcipit Apostolus omnibus operibus etiam sua sponte innoxiiis & indifferentibus finem bonum præstitueret, 1. Cor. 10. *Sive manducatis, sive bibitis, sive aliud quid facitis, omnia in gloriam Dei facite.* Quæ verba sic ponderat Basiliius homil. 11. in Sanctam Julit. *Accumbens mensa, ora; esitans panem, largitori gratiam rependito; bibis vinum, memeto ejus qui illud tibi dedit ad letitiam, & infirmitatum solamen; tunicam indueris, gratiam agito benigno datori; suspicis in cælum & siderum pulchritudinem intueris, procide Deo, & cole eum qui omnia hac in sapientia condidit.* Et sic continens

& indivisa erit oratio, si recta sit in omnibus intentio nostra.

Ratio verò est, quia omnis actus humanus ex deliberata voluntate procedens dependet à fine, ejusque influxu, ut *dissert. 2.* demonstravimus; quia per hoc actus humanus, & actus hominis distinguuntur, ut ibidem ex S. Thoma vidimus: Ergo si finis sit bonus, non potest non influere bonitatem; si pravus, non potest non refundere pravitatem: unde opus ex objecto bonum in ulteriorem finem bonum relatum, magis esse meritorium nemo ambigit. Ideo passim hortantur Patres, nominatim verò Gregorius, ne in bonis actibus, per intentionem titubemus, néve inter recta opera sinistra cogitatio illudat; quia *sicut fabrica columnis, columna autem basibus innituntur: ita vita nostra in virtutibus, virtutes autem in intentione intima subsistunt.* Quarta pars speculationis sequentibus confectariis clarebit.

*Corollaria qua observentur dignissima.*

Ex his infert S. Doctor *q. 19. art. 4.* quadruplicem posse contingere bonitatem in actu. Prima quidem considerari potest secundum genus, prout scilicet est actio: quæ bonitas dicitur generica, non quòd sit genus ad alias bonitates, sed quia sequitur rationem genericam actionis physice spectatæ; nam quantum aliqua operatio habet de actu & entitate, tantum habet de bonitate, cum ens & bonum convertantur. Secunda est bonitas ex objecto & specifica, quam S. Doctor vocat absolutam, non quòd non dicat relatio-



nem transcendentalem ad objectum, sed ut distinguatur à bonitate ex fine profluxa, quæ convenit actioni prout ordinatur ad finem accidentalem extrinsecum: unde ista dicitur adventitia, illa absoluta, quia hæc convenit actui absolute, & independenter à relatione accidentali. Tertia desumitur ex circumstantiis adjacentibus, quibus actus condecoratur. Quarta denique ex fine defluit, quâ tota operationis perfectio coronatur. Non est tamen sensus, quod bonitas in illo aggregato sita sit, sed in habitudine ad illud, quatenus qui benè agit, in objectum bonum, convenientibus indutum circumstantiis, & fine recto impellente tendit.

Infert 2. S. Præceptor *art. 6. & 7.* actum tendentem in objectum bonum ex fine bono, duplici gaudere bonitate. Quod & repetit *lib. 3. cont. Gent. cap. 138.* ubi: *Contingit, inquit, unum actum duorum vitiorum esse, dum actus unius vitii ad finem alterius vitii ordinatur, ut cum quis furatur ut fornicetur, actus quidem secundum speciem suam est avaritia, secundum intentionem vero, luxuria. Eodem modo in virtutibus contingit, quod actus unius virtutis ad aliam virtutem ordinatur: sicut cum aliquis dat sua, ut cum altero amicitiam habeat charitatis, actus quidem ex sua specie est liberalitatis; ex fine autem, charitatis.* Ratione etiam probatur contra Vasquem: In actu bono ex objecto & fine duplex est habitudo conformitatis ad rationem, quarum una non pendet necessario ab alia, à qua potest separari: nec una se habet ut differentia respectu alterius, quia inter genus & differentiam deberesse ordo per se, qualis non reperitur inter bonitatem ex objecto & fine petitam, cum una alteri accidentaliter superveniat:

Ergo in actu bono ex objecto & fine duplex bonitas invenitur, quæ à duplici virtute procedit, quarum una actum imperat, altera elicit actum. *Nihil prohibet*, inquit S. Thomas 2. 2. q. 31. art. 2. *actum, qui est propriè unius virtutis elicitive, attribui alteri virtuti sicut ordinanti & imperanti ad suum finem.* Et q. 124. art. 2. ad 2. *Martyrium*, inquit, *est actus charitatis ut imperantis, fortitudinis autem ut elicentis.* Quia nimirum qualibet virtus & determinatum objectum, & specialem difficultatem vincendam habet: unde una quidem potest actum alterius imperare, sed non elicere; quia nequit præfixam sibi sphaeram transilire: aliàs unica tantum necessaria foret virtus, si illa sola eliceret actus, ad quam pertinet finis intentio, sicque innumerabilis virtutum honestas deperiret; & charitas, cujus est finem ultimum supernaturalem intueri, non esset forma, sed expulsio; non corona, sed ruina virtutum, quas non perficeret, sed destrueret, eorumve actus non attolleret, sed extingueret, & ad nihilum redigeret.

Quare sententia Vasquelii non solum repugnat veræ Theologiæ, sed etiam vitæ spiritali, & solidæ pietati. Etenim Patres spiritales docent, quod sicut coqui ut cibum efficiant acceptum innumeras species salsamentorum adhibent, quibus palatum delectent; alias atque alias de omnibus succis efficiunt permixtiones, quibus esculenta condiant, gulam provocent, excitent appetitum, quia illis nomina mille, mille demulcenti artes: sic in vita spiritus monent pietatis opera variis esse diversarum virtutum adornanda motivis, ut ad Deum ascendat operatio deliciis affluens, sicut virgula fumi ex aromati-

bus myrrhæ & thuris, & univerti pulveris pigmentarii. Hæc autem frustra docerent Sancti; si enim nulla ex objecto bono fini ulteriori subordinato bonitas refluat in actum, planè in congregandis virtutum omnigenarum thesauris oleum perdimus & operam. Parvi profectò referet heroïcis vel mediocribus virtutibus insudare, modò quæcumque fiunt de radice charitatis proveniant. Sic nihilo melius erit martyrium jejunio unius diei, nec majoris apud Deum meriti status virginitatis quàm connubii, si in omnibus illis operibus & statibus unica refulgeat bonitas charitatis: quod & communissimis pietatis notionibus, & Patrum documentis diversa præmia accidentalìa seu aureolas heroïcorum actuum praxi asserentibus repugnat.

Dices: Quando aliquod bonum ex objecto opus eligitur relatum ad finem honestum ulteriorem, tunc opus assumptum habet rationem medii utilis & conducentis ad finem, propter quem amatur, non propter se: Ergo in ipso amatur sola bonitas finis, quæ sola proinde redundat in actum, quia ab illo duntaxat haurit actus bonitatem, à quo allicitur & movetur.

Respondeo in electione operis boni in finem superiorem honestum ordinati arridere simul & objecti honestatem, & finis rectitudinem. Utræque placet, tametsi una alteri subjiciatur; utraque movet, licet una dependenter ab alia impellat. Sicut enim causa prima secundæ influxum non consumit, sed juvat & perficit: ita finis superioris illicium objecti honestatem non extinguit, sed auget, & dum sibi subordinat, decorat. Unde objectum honestum in finem bonum relatum non habet conditionem puri medii, sed

etiam finis intermedii ratione propriæ bonitatis inescantis appetitum; non secus ac medicina sapida, & gustui suavis, propter sanitatem assumpta, præter bonitatem utilis conducentis ad sanitatem, habet etiam internam suavitatem, quæ per se placet. Similiter ergo objectum honestum ad ulteriorem finem relatum amatur etiam propter se, quia in se, & in proprio fundo habet internam amabilitatem, etiam si non ordinetur ad aliud; qua ordinatione propriam non perdit, licet eam subjiciat, & subjiciendo nobilitet.

Infer 3. S. Doctor multis in locis, actum ex objecto bonum, & ad finem extrinsecum ordinatum desumere bonitatem essentialem ab objecto, & accidentalem à fine. Et ratio est, quia quod advenit enti in sua essentia constituto, advenit ipsi accidentaliter: Sed actui circa objectum bonum versanti in sua essentia constituto advenit imperium & ordinatio in ulteriorem finem: Ergo bonitas ex fine derivata non potest non esse accidentalis, cum possit adesse & abesse, permanente eodem actu. V. g. idem misericordiae actus in sua specie permanens accidentaliter in finem poenitentiae, vel religionis, vel charitatis refertur. Cujus etiam signum est, quia habitus eliciens actum imperatum non desumit speciem essentialem à fine operantis; cum enim essentia habitus sit invariabilis, nequit speciem sortiri à fine, qui pro operantis arbitratu variatur; absurdum verò est, toties habitum mutare essentiam, quoties mutatur intentio agentis: Atqui idem est specificativum habitus & actus ab ipso eliciti, cum habitus non specificetur ab objecto, nisi mediantibus actibus: Ergo actus circa ob-

jectum bonum versantes , quantumvis imperati ab intentione finis superioris speciem essentialem ab objecto desumunt. V. g. actus martyrii à charitate imperatus essentialiter specificatur ab objecto fortitudinis , quia actum bonum ordinari ad ulteriorem finem non mutat ejus naturam , quam proinde ordinatio supponit , non causat ; ideo enim intentio actum illum imperat , quia circa tale objectum occupatur , aliàs casu & fortuito actum illum imperaret : Ergo illum actum non præcipit nisi ut specificatum ab objecto , & fine operis.

Objicies authoritates & rationes. Ex authoritate quidem ; nam sæpe post Aristotelem inculcat D. Thomas , quod qui furatur ad mœchandum est magis fur quàm mœchus , & consequenter ille actus est magis in specie mœchiæ quàm furti , subindeque illa , non ista est essentialis. Addit etiam S. Doctor *art. 6.* quod sicut actus exterior accipit speciem ab objecto circa quod versatur , ita actus interior accipit speciem à fine , quia finis est objectum actus interioris. Et *art. 7.* docet , quod quando actus ordinatur per se ad finem , bonitas ex objecto continetur sub bonitate ex fine tanquam sub genere ; species autem non continetur accidentaliter sub genere : Ergo bonitas ex fine in actu imperato non est accidentalis , sed essentialis.

Ratio à priori est : Actus voluntatis non specificatur ab objecto materiali , sed à formali , id est à ratione formali volendi , à qua desumitur differentia essentialis : Sed quando actus imperatur à fine , ratio volendi illum actum est finis , cujus gratiâ objectum illud eligitur ; tota enim ratio quæ movet ad eligendum , non est nisi bo-

nitas finis: Ergo actus ex fine bonus, in ulteriore finem honestum ordinatus, à solo fine specificatur: sicut assensus conclusionis non accipit speciem ab objecto assensus materialiter sumpto, sed à motivo, & medio illius.

Ratio à posteriori est: Multi actus distinguuntur specie morali ex sola & præcisa intentione operantis, putà idem actus mendacii jocosì prolatus sine recreationis, distinguitur specie ab officioso proximi sublevandi gratiâ commodato, & à pernicioso nocendi causâ conflato. Similiter idem verbum molestum à Prælato zelo disciplinæ prolatum est actus observantiæ; animo moderatè jocandi, actus eutrapeliæ; animo admonendi ne noxa deterius putrescat in corde, actus misericordiæ; animo detrahendi, actus contumeliæ; animo seminandi discordias inter amicos, actus susurrationis; animo confundendi, actus irrisiõnis: Ergo signum est actus morales non ab objecto, sed à fine speciem sortiri.

Respondeo ad auctoritates, quod ille qui furatur ut mœchetur, non ideo dicitur magis mœchus quàm fur, quia actus furandi speciem sumit à fine luxuriæ, sed quia actus imperans est principalior, & erga luxuriam magis afficitur sic operans, quàm circa bonum alienum eripiendum. Certè cùm dicatur magis fur quàm mœchus, profectò utramque malitiam contrahit, utriusque turpitudine inficitur actus, quamvis finis perversi iniquitas magis ibi appareat. Adde Philosophum & Doctorem Sanctum loqui de actu imperante in quantum hujusmodi, qui ut est formaliter & reduplicativè imperatus, reputatur unus & idem cum imperante, & idem objectum respicit; si tamen ille actus specificativè, & in se spectetur,



speciem prius desumit ex objecto : qua distinctione omnes authoritates, quæ specie tenus videntur oppositæ, conciliatu facillimæ sunt. Ad alium locum dicendum cum Cajetano, S. Præceptorem nomine actus exterioris intelligere actum imperatum, sive ab alia potentia, sive à voluntate elicitum : per interiorem verò actum intelligere imperantem, quia sicut actibus aliarum potentiarum accidit ordinari in ulteriorem finem, ita & actui interiori voluntatis ; nam ideo S. D. asserit actum exteriorem ordinari ad finem, quia interior comparatur ad illum sicut formale ad materiale : patet autem ex eodem S. Thoma supra, *quæst. 13. art. 1.* quod actus imperans comparatur ad imperatum sicut formale ad materiale : unde pro eodem accipit actum exteriorem, & actum imperatum. Cum ergo ait actum interiorem specificari à fine, *quia finis est objectum voluntatis*, illa causalis intelligenda est de fine ut abstrahit à fine operis, vel operantis ; & ita universaliter verum est, finem esse objectum voluntatis ; finem quidem operantis respectu voluntatis imperantis, finem verò operis respectu voluntatis imperatæ.

Cum verò tradit S. Doctor, bonitatem ex objecto contineri sub ea quæ est ex fine, tanquam speciem sub genere, facile verum esse probatur, quando bonitas ex objecto nonnisi ratione distinguitur ab ea quæ ex fine petitur, ut cum bonitas abstinentiæ ordinatur ad finem temperantiæ ; quia tunc bonitas ex fine est essentialis, utpote indivisa ab ea quæ petitur ex objecto. Si autem sit diversa bonitas, tunc est difficilius explicatu, quomodo finis sit genus. Id tamen dupliciter intelligi potest. Primò bonitas finis di-

icitur generica, quia ut vidimus libro præcedenti, *differ. 2. cap. 1. specul. 2.* finis est universale & genus, non in prædicando, cum finis sit circumstantia, genus verò ad substantiam pertineat; sed in causando, sicut Sol est causa universalis corporalium, & sicut justitia legalis respiciens bonum commune alias virtutes ad finem boni communis ordinat, religio ad cultum Dei, charitas ad ejus bonitatem. Quia ergo finis subijcit sibi media, meritò genus & universale in causando nominatur, subindeque bonitas ex illo petita generica dicitur. Secundò explicari potest cum Conrado, bonitatem finis appellari genericam, non in stricta, sed lata acceptione, quatenus nimirum genus sumitur pro quacunque re communicabili multis; bonitas autem finis, putà quæ à charitate profluit, in actus justitiæ, misericordiæ, aliosque effunditur, per se quidem in actus virtutum insularum sibi subordinatarum, per accidens verò in actus virtutum naturalium & moralium.

Ad rationem à priori dicendum, motivum adæquatum eliciendi actum ex objecto bonum non esse solam finis honestatem; per se enim voluntatem allicit objecti boni rectitudo, etiamsi in finem ulteriorem non referretur; quia non puri mediū, sed finis intermediū rationem habet, à fine quidem dependentem, sed in proprio sinu interna bonitate gaudentem: unde & actus imperatus habet & rationem intentionis respectu finis intermediū, & electionis, prout objectum quod prosequitur fini superiori subijcit; aliàs ille actus non haberet duplicem bonitatem, quod non negat Valentia cum quo in præsentī disputamus. Nec est simile quod subjungitur de

assenſu conſuſionis, quia obiectum conſuſionis non habet rationem ſcibilis, niſi prout ſubſtat lumini principiorum; unde nec aſſenſum conſuſionis ſpecificat, niſi ratione medii, propter quod aſſentitur: at verò honeſtas obiecti per ſe bona eſt, per ſe nata allicere appetitum, & etiam à fine extrinſeco minimè dependet, licet ei ſupponi poſſit. Obiectum quippe virtutis per ſe amabile eſt. Unde aiebat Seneca epiſt. 114. *Iuſtum eſſe gratis oportet, non eſt quod expectes, quod ſit iuſta rei pretium majus, quàm iuſtum eſſe.*

Ad rationem à poſteriori dicendum, omnes illos, qui enumerantur, actus diſtingui ſpecie ex intentione operantis, non præciſè quâ intentio eſt, ſed prout finis intentus reſluit & tranſit in conditionem obiecti, ſicque intrinſecam cauſat in actibus diverſitatem; quando nimirum finis operantis, qui ſolet obiecto eſſe extrinſecus, obiectum ipſum ingreditur, & quadantenus in illo imbibitur. Et ita contingit in propoſito. Cùm enim mendacium ſit prolatio falſi cum intentione fallendi, planum eſt, intentionem pertinere ad obiectum mendacii.

Quoniam ratio radicalis eſt, quia cùm lingua ſit interpres mentis, expandens quod in mente latet, ſpeciale eſt omnibus peccatis linguæ pro diſtinctione intentionis diſtinctam habere malitiam, quia ad mentis, cordiſque cogitationes & intentiones exprimendas verba ſunt inſtituta. Et ideo linguam appellat Jacobus *universitatem iniquitatis*, quia verbis omnes cordis ſordes, omnes mentis noxæ; omnes obliquarum intentionum putores veluti apertis emiſſariis, & cloacarum oſtiis funduntur. Idcirco Sancti cuſtodiam ori, & oſtium circumſtantiæ labiis ponere

tam seriò, tam crebrò monent : quia periculum est non solum falsa, sed etiam vera sine cautela dicere : quia in multiloquio non deest peccatum, in silentio vix adest. Alligant ergo Sancti sermones suos, advocant ad limam potius quàm ad linguam, ut sit gravitas in sensu, in sermone pondus, in verbis modus ; ne per verba se inaniter lingua solvat, cum restringi debet ; aut cum loqui utiliter potest, semetipsà pigrè restringat ; ne aut laxa in vitium defluat, aut arctata nimis ab utilitate torpescat ; ne sint loquutione præcipientes, & quod volatilis animus cirò concipit, levior protinus lingua prodat ; ne per multiloquium exterius sparsum cor vim intimæ considerationis amittat. Audiamus Senecam epist. 40.

*Summa summarum hæc erit tibi, tardilquente te esse jubeo. Imago animi sumo est : qualis vir, talis oratio.* Audiamus meliùs clam item Bernardum : *Tenerum membrum lingua, & tamen vix teneri potest. Levis sermo, quia leviter volat, sed graviter vulnerat : leviter transit sed graviter urit ; leviter penetrat, sed non leviter exit : leviter profert, sed non leviter revocat ; faciliè volat, ideò charitatem faciliè violat.* Legebis cap. 1. & 3. Epistolæ Jacobi.

Inferes 4. bonitatem quam actus habet ex circumstantiis esse etiam accidentalem, utpote non minùs adventitiam illi quæ est ex objecto, eâ quæ est ex fine : & idem proportionaliter dicendum est de malitia. Nec obest quod aliquando circumstantiæ mutatio novam & distinctam speciem invehat ; quia quando dux species morales ordine quodam afficiunt actum, una dicitur accidens respectu alterius, nimirum ea quæ supervenit. Non obest etiam, quod bonitas, vel malitia ex circumstantia aggravante petita sint

partes, vel modi intrinseci ipsius substantiæ actus, putà duratio, intensio, &c. Quia illæ circumstantiæ non afficiunt actum individualiter sumptum, nisi accidentaliter: cujus signum est, quod modò major, modò minor intensio, aut duratio in actu invenitur. Variatur enim quotidie iudicium, & in contrarium vertitur, sæpeque mutatur anirus nondum habens vigorem suum. *Mirum enim non est*, inquit Magnus Gregor. lib. 12. cap. 24. *si quis bona inchoet; sed valde mirabile est, si intentione recta in bono opere perduret.*

Inferes 5. quantitatem bonitatis actus imperati aliquando commensurari bonitati actus imperantis, aliquando illi non correspondere. Etenim si actus imperatus consideretur ut tendens ad proprium objectum, tunc non est necesse quod bonitatem actus imperantis adæquet, sive quoad substantiam, sive quoad intensiorem; quia objectum imperantis potest esse nobilius, subindeque nobilior erit entitativè actus imperans; & sine intensè amato, potest deinde medium, quod est objectum actus imperati, remissè appeti. Si verò actus imperatus reduplicativè consideretur ut tendens & relatus in finem actus imperantis, tunc bonitas imperantis refuit & redundat in actum imperatum, & quoad substantiam, & quoad intensiorem; quia quanto finis actionis est excellentior, tanto & præstantior est actio; & qui desiderat intensè finem, media etiam ut conducunt ad finem ardentè concupiscit. Si verò intensio actus imperantis comparatur ut objectum ad actum imperantem, tunc intensio non derivatur in actum imperatum actu exercitum: v. g. si quis intendat elicere intensè

finum actum amoris Dei, non propterea intensissimi amoris fervorem & meritum continuò habebit, si in exercitio tepidum actum amoris eliciat. Unde sequitur, quemvis non mereri quantum mereri intendit; quia quantitas meriti non petitur ex eo quod concupiscat desiderare; sed ex quantitate, intensione, & sinceritate actus exerciti. Qua in re multi semispirituales persæpe falluntur, qui magno se Dei amore flagrare confidunt, quia desideriis æstuant, quæ tamen in praxim nequaquam redigunt. Vellem, inquit, ut nihilo minus quàm Seraphim arderem igne Dei & igne Deo, utinam Apostolorum zelum, Martyrum constantiam, Virginum candorem exprimerem. Bene est, sed si velles, cur non vis? Cur tepidus es? Cur minima negligis, qui tam magna animo & superficie cogitationis revolvis? Cur tam citò, dum tentaris, & sine mora proruis, qui magnis in speciem conatibus ad summa pervenire moliris? Timeo ne igne volatrico fatuæ vanitatis ardeas, non solido genuinæ charitatis. Timeo ne ex illis sis, quorum graves culpæ superducta specie virtutes imitantur, quia imaginaria eorum pietas non solum in poenitentiam non humiliat, sed etiam superbiam inflat. Plerumque, inquit Magnus Greg. lib. 1. in Ezech. hom. 5. *impetus carnis, se sub velamine spiritualis impetus palliat; & quod carnaliter facit, mentitur sibi ipsa cogitatio, quia hoc spiritualiter facit. Et quamvis* (addit part. 1. Pastoral. cap. 9.) *hoc elationis intentione appetunt, operaturos tamen se magna pertractant: fitque ut aliud in imis intentio supprimat, aliud tractantis animo superficies cogitationis ostendat. Nam sæpè sibi de se mens ipsa mentitur, & fingit se de bono opere amare quod*



*non amat, de mundi autem gloria non amare quod amat.*

## R E F L E X I O.

Si ad bonum opus & intentio recta, & obiectum bonum, & circumstantiæ debitæ exiguntur, profectò ponentes corda nostra super vias nostras, videbimus cum Aggæo Propheta nos seminare multum, sed inferre parum; comedere, & non satiari; bibere, & non inebriari; operiri, & non calefieri; mercedes congregare, & eas in facculum pertusum mittere, vel in dolum perforatum. In primis igitur huc noster animus, huc nostra intentio tendat, ut quidquid boni agimus, in Dei honorem & laudem sedulo referamus: quia *quidquid agitur*, inquit Magnus Gregor. lib. 1. in Ezechiël. hom. 7. *id radice intentionis pensandum est, quo merito apud iudicium Creatoris habeatur.* Cum enim, addit lib. 1. Dialog. cap. 10. *perversa est intentio quæ præcedit, pravum est omne opus quod sequitur, quamvis esse rectum videatur.* Si verò Dei gloria unus sit scopus, non solum sancta perficiuntur, sed indifferentia & humana iusta fiunt & divina. *Radix sive iatus dilectionis*, inquit August. tract. 7. in epist. Joan. *non potest de ista radice nisi bonum existere.* Quid prodest altam virtutis arborem erigere. si radicem ejus inanis gloria arefaciat? Cum teste Bernardo, Deo quodammodo insulsa sit quævis operatio, *nisi omnium quæ agimus & patimur, ipse sit causa.* At quomodo Deus est nobis causa agendi, qui propria commoda tam avidè quærimus, proprium honorem tam anxie ambiamus, tam jucundè excipimus.

Illéne verè canere potest illud propheticum:  
*Non nobis, Domine, non nobis, sed nomini tuo da  
gloriam,* qui omnia ad proprium referens hono-  
rem in omnibus vult videri, nesciri odit, extolli  
aver, externa pietatis opera, si quæ edit, & quæ  
offert Ecclesiæ munera, sexcentis sui nominis  
titulis, familiæ tesseriis, nobilitatis insignibus,  
Majorum inscriptionibus, Deo vacuus opplet.  
Et tamen Deo non tam munus quàm affectus  
placet, ut duarum viduarum exemplo claret,  
quarum altera victu modico Eliam pavit, altera  
duo minuta in gazophylacium misit. Quia ut  
ait Ambros. lib. i. offic. cap. 30. *Affectus tuus no-  
men imponit operi tuo. Quomodo à te proficitur,  
sic æstimatur. Vides quàm moralem judicem ha-  
beas, te consulit quomodo opus tuum suscipias, men-  
tem tuam prius interrogat.* Illéne sincerè Deum  
quærit, qui omnia propriis emolumentis meri-  
tur, ita priorum avarus commodorum, ut  
nullam aliorum rationem habeat; quasi solus  
terræ spatium occupaturus sit, aliis è toto ter-  
rarum orbe exulaturis?

Certè cùm video non paucos (quotidie autem  
flentes videmus) sibi solis optare quidquid illu-  
stre, quidquid splendidum, quidquid utile in Re-  
publica Christiana invenitur; ubique non modò  
primos, sed & solos esse peroptare, ut soli lu-  
ceant, soli micent, soli colantur, aliis quibusli-  
bet inumbratis; cùm, inquam, hæc video, cum  
August. tract. 27. in Joan. concludo: *Vix quar-  
itur Iesus propter Iesum.* Certè si Iesum propter  
Iesum quæreres, si non quæ tua sunt, sed quæ  
Jesu Christi concupisceres, utique gauderes ab  
aliis quibusvis gloriam Dei propagari, cùm sit  
messis multa, operarii autem, saltem boni &

fideles dispensatores, pauci. Ubinam gentium sumus, & quonam in sæculo nati sumus? Multi bona operari satagunt, sed per alios sancta patrari ægrè ferunt: & tantum abest ut aliorum commodis aliquid cum propria incommoditate præstent, ut omnes vel maximè suis commodis cum aliorum incommodo consulant. Clerico Regularis, & Religioso Clericus invidet, eorumque nonnulli sunt, ut Gregorii lib. 1. dialog. c. 10. verbis utar, qui idcirco bona facere student, ut gratiam aliena operationis obnubilent. Si unus Dei honor in se & propter se placeret, parum tua referret an à Presbytero, an à Monacho, sive albo, sive nigro, an à laïco obveniret. Mosem imitare re Num. 11. objurgantem Josue: *Quid amularis pro me? Quis tribuat ut omnis populus prophetet, & det eis Dominus spiritum suum.* Et Jacobum audires seriò & Apostolicè increpantem cap. 3. *Si Zelum amarum habetis, & contentiones sunt in cordibus vestris, non est illa sapientia de sursum descendens, sed terrena, animalis, diabolica.* Magnò Gregorio obtemperares lib. 22. Moral. cap. 16. monenti: *Pia Pastorum mens, quia non propriam gloriam, sed authoris querit, ab omnibus vult adjuvari quod agit. Fidelis predicator optat, si fieri valeat, ut veritatem, quam solus loqui non sufficit, ora cunctorum sonent.* Augustino pareres in Regula dicenti: *Charitas enim, de qua scriptum est, quod non querit que sua sunt, sic intelligitur, quia communia propriis, non propria communibus anteponebat.* Succinit Bernard. homilia de discipulis Emaus: *Charitas nescit angulum, non amat proprium, de se vivere desiderat utilitatibus singulorum.*

Itaque exigitur planè intentio pura, sed sola non sufficit, nisi boni objecti sequatur electio:

quia ut dissertatione superiori vidimus ex Bernardo, ut rectus sit intentionis oculus duo requiruntur, nempe *charitas in intentione*, & *in electione veritas*, & quod de se malum est, nulla potest intentione honestari; non enim facienda sunt mala, ut veniant bona.

Necessaria etiam est prudens circumstantiarum consideratio, & matura ponderatio, præsentia ordinans, futura prævidens, præterita recordans, & quæ possunt contingere, cuncta secum proponens, ut nihil à nobis prodeat subitum, nihil præceptum, nihil incautum. Quia ut Gregorius, Bernardus, aliique Patres tradunt, quanto majora timentur esse dispendia, tanto promptior & perfectior debet esse cautela. Minus enim jacula feriunt quæ prævidentur, & tolerabilius mala mundi suscipimus, si contra hæc per providentiæ clypeum munimur. Maximè verò in cunctis debet præesse discretio virtutum moderatrix, affectuum ordinatrix, doctrix morum, quæ omni virtuti ordinem ponit, modum tribuit, decorem & perpetuitatem confert: quam si collis, & virtus vitium erit, ipsaque affectio naturalis in perturbationem magis convertetur, exterminiumque naturæ. Ex studio namque arcus interdum distenditur, ut in tempore cum utilitate tendatur. Tutiùs, teste Chrysostomo, interdum chorda remittitur, quàm nimium protendatur; quia remissa artificis peritiâ citius convalescit, quàm semel rupta ejusdem artificio reparetur. Cunctam ergo disciplinam moderetur æqualitas discretionis, ne vel nimia remissio nutritiva sit criminum, vel impia discretio sit parricida virtutum. Benè Seneca epist. 107. *Optimum est pati quod emendare non possis, & Deum*

*sine inurmuratione comitari. Sed meliùs Papa Gregorius lib. 24. Moral. cap. 5. loquens de Prælatiſ : Neceſſe eſt ne iſ qui præeſt vigilanter inſpiciat, ne jura debita poteſtatiſ immoderatiùs exigat, ne diſciplina juſ mutetur in rigorem ſuperbiæ; & unde à perversitate ſubditos reſtringere poterat, inde magis inveniunt corda pervertat. :: Inde ſe qui præſunt circumſpiciant, ut ſibi, & ſubditis vivant; ut ſubditorum animadvertenter culpas corrigant, nec tamen per vim ejusdem animadverſionis intumeſcant; ut quadam leniter correpta tollerent, nec tamen diſciplina vincula eadem lenitate diſſolvant; ut quadam tolerando diſſimulent, nec tamen ea creſcere diſſimulando permittant. Si hæc diſcretionis temperatura fortis & ſuavis, intrepida in perditos, pluſquam mitis in humiles adhiberetur, citò ad primam obſervantiam Regulares revocarentur, citò reſtauraretur Clerus, citò in officio continerentur Chriſtiani. Væ ergo, væ Prælatiſ negligentibus, væ cæciſ ducentibus, væ cæciſ ſequentibus. Si Epicoſpus, ſi Paſtor, ſi Reſtor quilibet & Deum præ oculiſ pura intentione haberet, & bona ſemper eligeret, quia eſt in ſtatu perfectioniſ, & prudentiâ ſpirituſ omnia condiret, ſi miniſterium ſuum impleret arguendo, obſecrando, increpando in omni patientia & doctrina, tandem aliquando collapſam diſciplinam reſarciret. Sed qui honorem prælatiſ & dignitateſ amant, innumeri ſunt; qui verò laborem miniſteriſ appetant, pauci, inquit alicubi Gregorius Magnus.*

## SPECVLATIO II.

*Actus exterior nullam intrinsecam bonitatem actui interiori sincero & efficaci superaddit. Commendatio vite interioris.*

PLures Patrum sententias hanc speculationem aperte significantes reflexione proxima referemus, interim eam hac ratione demonstramus. Sola potentia libera capax est moralitatis, siue bonitatis, aut malitiæ; cum sola subiiciatur regulis morum, quibus minimè subduntur actus necessarii, ut ex prædictis manifestum manet: ergo solus actus interior est formaliter moralis, exterior verò extrinsecè, designatione ab interiori petita: Sed actus qui non est intrinsecè moralis, non potest augere intrinsecam bonitatem: Ergo actus exterior nullam intrinsecam bonitatem actui interiori superaddit; actui, inquam, sincero & efficaci, quia inefficaci & semipleno voluntatis motui actus exterior adjicit bonitatem, non ex propriis actus exterioris meritis, sed ex conjunctione ad interiorem efficacem unde derivatur. Quare qui vellet diligere Deum, sicut Beatissima Virgo, non tamen æquè mereretur ac Desipula; quia non per æquè intenso efficacis amoris fervore flagraret:

Intelligitur etiam assertio, modò actus interior conjunctione ad opus non fiat intensior & diuturnior, quod sæpè contingit tam in actibus



bonis quàm malis. Et in hoc sensu veridicè dixit Augustinus lib. 13. de Trinit. cap. 6. *Mala voluntate vel solà quisque miser efficitur, sed miserior potestate, quâ desiderium mala voluntatis impleretur.* Quia nimirum dum potentia exteriores prouiores siue ad bonum, siue ad malum redduntur, suavior efficitur operatio, subindeque amabilius; unde crescit actus interior experientiâ operis. Et etiam, quia dum exercitii sentitur difficultas, crescit voluntatis conatus, ut obicem vincat, rumpat moras, teporem excitet, tollatque fastidium. Quod si voluntas eadem permanere supponatur, nulla procul dubio bonitas interna superadderetur; quia ut S. Thomas in 2. dist. 40. q. 1. art. 3. scribit: *Actus exterior nihil adiungit ad primum essentiale; tantum enim meretur qui habet perfectam voluntatem aliquod bonum faciendi, quantum si faceret illud; ut si faciat unum actum, quantum si faceret multos, voluntate aqualiter perfectâ manente.*

Dices: Actus interior & exterior prohibentur distinctis præceptis, donantur etiam diversis præmiis, si boni sunt, & differentibus pœnis puniuntur, si mali sunt. Nam in Decalogo non solùm adulterium & furtum prohibentur, sed etiam concupiscentia alienæ & alieni. Duorum æqualem habentium audiendæ Missæ, vel ad sacram Synaxim accedendi voluntatem, sacra participans maiorem percipit fructum. Qui reuera jejuniis corpus affligit magis satisfacit debili, vel impedito voluntate jejunandi in actum se non exerente. Item aureola Martyrii non confertur nisi actu passo, secus verò illi qui æquali, vel etiam maiori moriendi pro Christo voluntate æstuarer, quæsitæ etiam totis viribus patiendi

pro causa religionis occasione. Denique per actum exteriorem irregularitas, excommunicatio, carcer, obligatio restituendi incurruntur; quibus tamen pœnis sola peccandi voluntas quàmlibet efficax minimè plectitur.

2 Respondeo præceptorum distinctionem malitiæ diversitatem non arguere, quando ex eodem motivo statuuntur. Patet autem actum internum & externum à Deo eadem de causa vel præcipi, vel prohiberi. Fuit tamen conveniens, ut concupiscentia cordis, & exequutio nefandi operis diversis præceptis vetarentur, ne carnalēs hominēs sufficienter divinæ legi crederent obtemperare, si ab externis se facinoribus continerent; & divinæ legis immaculatæ convertentis animas puritas commendaretur, quæ non solos externos corporis, sed cordis potissimum motus componit.

3 Ad exempla subjuncta dicendum, eum qui sacris, venerandisque mysteriis interest, vel potitur, non ideo majorem obtinere fructum, quia actu exteriori interno bonitas accrescit, sed quia gratia ex opere operato profluit ex fontibus Salvatoris, quâ effusione carent, qui ad Sacramenta non accedunt. Ad id quod subditur de satisfactione & aureola martyrii: respondeo, satisfactionem & aureolam non requirere opus magis meritorium, sed magis pœnale; quia congruum est ut actuali laboris experimento aliquod speciale solamen, aut decus respondeat. Unde sæpe contingit opus magis meritorium esse minus satisfactorium, proindeque satisfactio & aureola sicut non sunt majoris meriti essentialis signa, ita nec majoris bonitatis. Plectuntur autem actus externi ab Ecclesia, quia de internis non judicat;

seu Deus qui scrutatur renes & corda, non minori afficiet poena voluntatem efficacem mali, quam operis executionem, quia apud eum voluntas pro facto reputatur, juxta illud Servatoris Matth. 5. *Omnis qui viderit mulierem ad concupiscendum eam, jam mœchatus est eam in corde suo.* Unde Aug. lib. 1. de lib. arbitr. cap. 3. *Si cui non contingat facultas concumbendi cum conjugē aliena, planum tamen aliquo modo sit id eum cupere, & si potestas detur, facturum esse, non minùs reus est, quàm si in ipso facto deprehenderetur.*

Instat Pontius ratione quæ sibi, ut ait, est unicuique suæ sententiæ fundamentum: Actus malus externus superaddit malitiam actui interno, quia aliàs non teneremur exprimere in confessione actum externum, v. g. homicidium aut adulterium, sed sufficeret si diceremus nos habuisse efficacissimum patrandi peccati desiderium; si enim actus externus non augeat malitiam, nec peccatorem vituperabiliorem efficiat, nulla esset ratio cur externum opus exprimereinus. Non ut gravitatem & intentionem actus interni aperiremus, quæ sufficienter exponitur, dum dicitur tale extitisse desiderium quod ad operis positionem sufficeret. Non ad videndum an peccator sit obnoxius restitutioni; nam poenitens potest firmissimum restituendi propositum habere, & multa sunt peccata ex quibus non oritur restituendi obligatio, ut violatio festi, & pollutio voluntaria. Non propter scandalum inde sequutum; nam sæpe nimis peccata externa clam peccator perpetrat. Uno verbo, non tenemur aperire in confessione, nisi quod requiritur ad explicandam speciem & numerum peccatorum: atqui si actus externus non addit malitiam interiori, expri-

mendo solum internum cum suo objecto & circumstantiis, explicat quis speciem & numerum suorum peccatorum, tamen non explicet externum: ergo non tenetur externum exprimere. Quod si actus externus malus aliquid malignitatis adjiciat interiori unde procedit, idem de actu bono perspicuum erit, cum sit par utriusque ratio.

Respondeo nihil omnino referre ad hoc ut actus externus sit in confessione aperiendus, quod interiori malitiam superaddat, modo revera malus sit, sive denominatione intrinseca, sive extrinseca à malitia interiori petita. Quia præceptum confessionis abstrahit ab eo unde malitia proveniat, sed quodvis opus malum imperat aperiri. Quare non propter illas duntaxat rationes, quæ inter arguendum referuntur, peccata externa aperire tenemur; sed propter Dei præceptum, quo actus externos explicandos juberi continens Ecclesiæ usus & praxis demonstrat. Cujus præcepti ratio sufficiens est voluntas Legislatoris, quæ peccatores ad illud onus astrinxit. Convenientia tamen præcepti non deest, quia nunquam perfecte efficacia voluntatis explorari potest, nisi per operis executionem; nam à *fructibus eorum cognoscetis eos*, & sæpe mens sibi interiori blanditur, sibi que videtur velle quod reapse non vult, saltem plena & consummata voluntate.

Pro solutione aliarum objectionum adverte, quod licet bonitas objectiva prius inveniat in actu externo debitis circumstantiis vestito, in quantum proponitur voluntati à ratione ut quoddam bonum apprehensum refundens bonitatem in actum interiorem, qui ab objecto spe-

cificatur; tamen bonitas formalis, quæ convenit actui prout est tendentia in finem & alias circumstantias, primordialiter convenit actui voluntatis, unde in actus externos derivatur. Adverte iterum, difficultatem posse adhuc urgeri contra nostram sententiam; tum quia secundum aliquos actus appetitus sensitivi participant internam libertatem, subindeque distinctam bonitatem & malitiam ab ea quæ convenit actibus voluntatis: tum quia secundum alios voluntas movendo alias potentias influit & imprimit aliquid reale in illas, subindeque bonitatem, vel bonitatis internæ aliquem radium derivat. Sed quia gemina hæc difficultas supponit multa alibi discutienda, ideo non possumus hic in ea dissolvenda immorari.

Atque hinc sponte fluit vitæ interioris, seu internæ conversationis, quæ vitæ spiritualis medulla est, commendatio, necnon Angelicæ præstantiæ doctrinæ, quæ Deum docet in spiritu & veritate adorare, dum totam honestatem, totum meritum solis actibus internis robustis asserit. Felix ergo, ut prosequitur Bern. *lib. de interiori domo*, qui interiorem domum, id est conscientiam ædificat, dum in pace Christi fundatus, & in Dei amore solidatus, si exterius bella patitur, interiorius tamen non turbatur; si molestiæ foris perstrepunt, tamen usque ad silentium intentæ quietis non irrumpunt; quoniam gustu internæ dulcedinis tactus, intus colligitur, intus Deum possidet, & in externa sese fundere non valens, totus per amorem intus quiescit. Facit Deo sanctuarium, dignum parat habitaculum, & domum cordis sic à peccatorum sordibus studet emundare, ut nec ratio decepta, nec voluntas perversa,

perversa, nec memoria sit inquinata. Ibi sapientia ædificat sibi domum conscientiæ, erigitque columnas septem, bonam nimirum voluntatem, gratam beneficiorum memoriam, cor mundum, animum liberum, spiritum rectum, mentem devotam, rationem illuminatam.

In primis intus erigitur columna bonæ voluntatis. Nam, inquit cap. 8. *primum & principale bonum bona voluntas esse cognoscitur. Primum, quia à bona voluntate bonum omne inchoatur: principale, quoniam bona voluntate nihil hominibus utilius datur. Voluntas bona nec dare potest invito, nec auferri nisi volenti. Quantum vis, tantum mereris: quantum crescit voluntas tua bona, tantum crescit meritum tuum. Ita est piissimus & misericordissimus Pater in eo redemptionem nostram posuit, in quo nullus nisi velit, potest egere. Amare namque homines aqualiter possunt, & divites & pauperes, etiamsi pecuniam aqualiter dare nec possunt. Voluntas tamen bona non est, si non operatur quod potest.*

Excitatur deinde memoria beneficiorum Dei, qui bona tribuit, in periculis constitutos clementer eripuit, peccatis vinci non potuit, oblitos sui de se admonuit, averfos à se revocavit ad se, venientes benignè suscepit, pœnitentibus indulgit, perseverantes custodivit, stantes tenuit, cadentibus ne colliderentur, manum supposuit, malas delectationes in amaritudinem convertit, salubriter amaricatis consolationes tribuit, tribulatione purgatis quietem restituit & pacem. Anima ergo intus collecta memoriam suavitatis Dei eructans recogitat quanta sibi Deus impetratus est, non roganti aut desideranti, sed ingrato, sed recusanti, & penè invito. Quidni omni mo-



imento Dei recolat beneficia, cum nullum sit momentum quo non ejus obruatur misericordia? Gratiarum memoriam sequitur cordis munditia, ut eum toto corde diligamus, à quo tanta beneficia accepimus. Munditiam cordis comitatur libertas animi, ut nulla perturbatione concussus, nullis capiatur illecebris, nullis frangatur molestiis, sed possit cum voluerit, aut sibi intendere, aut proximorum saluti inservire, aut in cœlestium contemplatione quiescere. Ex libertate mentis profluit spiritus rectitudo, obliqua & tortuosa ad amissum applicans; quia dum intra se habitat, nec exit, mentis speculum quotidie inspicit, quotidie tergit, quotidie tenet, quotidie custodit; inspicit, si quid displicet Deo; tergit, ut nihil remaneat, quod offendant Deum; tenet, ne deorsum corruens, & terrenorum affectu sordescens recedat à Deo; custodit, ut quotiescumque intrare voluerit, receptaculum mundum inveniat Deus. Rectitudini spiritus adjungitur mens devota, totum absorbens affectum, non nisi JESUM, & ea quæ sunt JESU sentiens; cuncta quæ adsunt, tanquam non sint considerans, sola interiora amat, solis cœlestibus inhiat, soli divinorum incumbit amor. Mentem devotam veri luminis perfundunt radii, & scientiæ Sanctorum plenitudo, quia dum seipsum animus sedulo intuetur, surgit in Deum. *Præcipuum enim, & principale speculum ad videndum Deum, est animus rationalis intuens seipsum. Si enim invisibilia Dei per ea quæ facta sunt intellecta conspiciuntur, ubi quæso, quàm in ejus imagine cognitionis ejus vestigia expressius impressa repariantur?* inquit laudatus Pater.

Bonum est, Lector, bonum est nos hîc esse;

Quàm fortunata anima, quæ ad dilecti sui adventum summo cum desiderio semper inhiat; semper parata & expedita est, ut pulsantem cœlestem sponsum absque ulla dilationis injuria suscipiat, ut vocanti cum omni alacritate occurrat, ut ingredientem toto amore complectatur, ut sola deinde cum solo moretur, & exteriorum omnium oblita ejus duntaxat dulcedine perfruat-  
 tur! Quàm suave ascensiones in corde suo disponere, mentis excessu experiri, quoniam suavis est Dominus, meditatione assurgere in contemplationem, contemplatione in admirationem, admiratione in mentis alienationem!

Attende ergo tibi, Lector Theologe: vitæ interiori seriam operam da, loquere ad Deum intra te, & loquentem ad te Deum intus audi. Spiritus enim Deus est, spiritus & anima tua, & habent ambo linguas suas, quibus sese vicissim alloquantur. Verbi lingua favor dignationis, animæ lingua fervor est devotionis. Verbum Dei loqui ad animam, est infundere unde illa amet. & confidat amari: animam loqui ad Deum, est mirari dignationem, & stupere ad gratiam. *Loquentis Verbi, infusio doni*, ait præfatus Doctor Mellissus serm. 45. in Cant. *responsio anima, cum gratiarum actione admiratio. Et idcirco plus diligit, quod se sentit in diligendo victam; & ideo plus miratur, quod se præventam agnoscit.*

Ejusdem interioris vitæ inchoatam felicitatem alibi sæpe, sed nominatim homilia de duobus discipulis euntibus in Emaus, explicat idem doctus à Domino Bernardus, cujus tibi succum, detractis nonnullis, additis aliis, claritatis gratiâ verbis, Lector, eliquabo; utinam tibi, & mihi interdum liceat experiri. Convertere anima

mea in requiem tuam : elige intus conversari cum Deo tuo , cujus dulcor præsentiæ omnem excedit eloquentiam , totam absorbet conscientiam , & transformat in supernæ jubilationis imaginem , & deliciarum cœlestium novitatem. Quàm mira suavitas , quæ totas inebriat medullas animæ ! Quàm dulcia faucibus mentis Dei loquentis ad cor eloquia , ex quorum singulis verbis sentitur quidam ignis erumpere , qui totos depascit angulos amantis conscientiæ ; cum nimirum per orationem illuminatur meditatio , in meditatione exardescit oratio , & in contemplatione suspenditur admiratio. Meditatio ruminat beneficia , quæ ante mentis oculos digna cum gratiarum actione reducens , & in vasculo pectoris pistillo crebræ considerationis conterens , igne sancti desiderii suavissimè inardescit. Oratio verò fundit suspiria , piæ devotionis stillat aromata , tota resolvitur in lamenta. Contemplatio autem radius est suavissimus , quo anima per cinnamum capitis elevatur , cum meditatione exardescente , & oratione scintillante. Unde nascitur in corde jubilus quidam , scilicet mellifluus cordis rivus , quem nemo scit , nisi qui sentit , nec etiam ipse qui sentit , quia citò pertransit. *Felix hora , sed brevis mora , qua factum est silentium in cœlo quasi mediâ horâ. Norunt experti quæ dico , qui hæc experientia suavitatis intimè didicerunt.* Quando nimirum erumpit de medio ignis decori contemplationis radius , & scintillæ quasi æris candentis , suspiria scilicet conscientiæ jubilantis. Quando effunditur stilla dulcedinis totam mentem inebrians , totam mentis latitudinem novis deliciis coangustans : quando Deus cordi illabitur , & interiùs loquens amo-

ris subministrat incendia, & quasi oleum projicit in flammam. Quando illo, quem diligimus, nec videmus, ad memoriam reducto, dulcis dolor augmentatur, & amor semimortuus in caminum prorumpens de igniculo, purus in medullis reviviscit, & refloret. Deus, Deus quantas jubilationes concepta de tua absentia tristitia gignere solet! Et quàm suaves suavitates ruminatæ, & quàm dulcia suspiria tunc percurrunt in corde! Bone JESU, quàm jucundo consolaris sussurro, quos de tua vides absentia contristatos! Quàm libenter astas orantibus, assistis suspirantibus, respiciens per fenestras, prospiciens per cancellos! Quàm jucundus latitas post parietem nostrum, ut audias voces orantium, & dulcescant tibi dolores diligentium, de pœnis rideas innocentium!

Si hæc aliquando rerum experirere, Lector, quàm libenter exteriora contemneres! Quàm ardentem ad regnum Dei, quod intra nos est, quodque non est esca & potus, sed gaudium & pax in Spiritu sancto, suspirares! Quàm festinè & festivè ante lucem surgeres ad quærendum dilectum, ut vigiliis interesses, ut effunderes cor tuum coram Domino, ut cœlestibus abundans deliciis super hoc expavesceret cor tuum, & dulci suavitate moveretur de loco suo; ut in lectula etiam tuo quæreres per noctes quem diligit anima tua, & ad ejus loquelam liquefceres. Scaturire enim solent sponsi verba teneritudinem amoris, & quasi mustum quod dirumpit novas lagunculas, de medullis procedere diligentis. Solet inæstimabilis redundare in labiis intus loquentis sermonis elegantia super mel & favum, & dulcescere ejus eloquium super omnia aromata.

Solet inter gratiosa susurra, inter devota suspiria non diu abscondere multitudinem dulcedinis suæ, quam abscondit timentibus & diligentibus se. Solet per occultam inspirationem, per sacram psallentium conspirationem, per Scripturæ sacræ lectionem tristitiam in jubilum commutare. Quod si aliquando recedere, & ab oculis evanescere videatur, sentitur quidem dolor, sed suavis, utpote de amoris fonte promanans. *Mirra res, cum incipit Magister cordi dulcescere, tunc fugit, ut de absentia sua faciat nos dulciter dolere. Tales sunt amoris delicia.*

Quod si nondum tam felicitis experientiæ gustum noveris, si quadam duritiâ cor tuum sensibus indevotum, instat orationibus, intende meditationibus,ingere te vigiliis, sint oculi tui sicut piscinæ in Hesebon præ multitudine lacrymarum, indolenti & sacra obstinatione vince Dominum majestatis, & dic ei, ut maneat tecum, quoniam advesperascit. Quia nimirum te obnubilant tenebrarum angustiae, te confundit mœror tristitiæ, omnes mentis angulos ventus tentationis concutit, timor & tremor venerunt super te, contexerunt te tenebræ, & infirmata est in paupertate virtus tua. Ad ipsum ergo clama, ne cesses; ad eum intenti sint oculi tui, de multitudine miserationis ejus concipe fiduciam, ne tradat animam confidentem sibi potestatibus tenebrarum. Viriliter age, confortetur cor tuum, & sustine Dominum, & orietur ut lucifer splendor ejus, cum te consumptum putaveris; si enim instantibus & humilibus precibus eum advoces, veniet, & non tardabit, & tunc dulciter coges eum ad manendum, invitabisque ad cœnandum, juxta quod scriptum est: *Si quis aperuerit mihi*

*Januam, intrabo ad eum, & cenabo cum eo, & ipse mecum.*

## REFLEXIO.

*Non minùs solves, Domine, non minùs solves, in-*  
*quiebat è modernioribus viris sanctis nonnul-*  
*lus post exantlatos sine fructu Apostolicæ vitæ*  
*labores, quia per ipsum nullo modo steterat,*  
*nulla in ipso mora fuerat, quominus felicem*  
*sua prædicatio sortiretur effectum. Quantum in*  
*se erat, toto corde plantaverat, tota solitudine*  
*rigaverat, sed Deus incrementum non dederat.*  
*Quàm bonus, quàm suavis, quàm commodus*  
*negotiator Deus, apud quem sincera voluntas*  
*pro facto reputatur! Vide quid dixerit Abraham*  
*non mactanti filium, sed mactare parato: Quia*  
*fecisti hanc rem, & non pepercisti filio tuo unige-*  
*nito propter me, benedicam tibi, ut dicitur Genes.*  
*22. Et rationem dat Chrysostomus hom. 47.*  
*quia quantum ad voluntatem cruentaverat dex-*  
*teram Patriarcha, perfectumque obtulerat sacri-*  
*ficium; & idcirco Dominus quasi sacrificio re ipsa*  
*consummato, laudat justum. Vide quomodo duo*  
*pauperis viduæ minuta in gazophylacium missa*  
*profusis divitum eleemosynis Salvator prætule-*  
*rit, quia non operis externi decus, sed effica-*  
*cem puri cordis respexit affectum. Viduam, in-*  
*quit Cyprian. tract. de operib. & eleem. cum vi-*  
*deret Dominus, non de patrimonio, sed de animo*  
*opus ejus examinans, & considerans non quan-*  
*tum, sed ex quanto dedisset, dixit: Vidua ista*  
*plus omnibus misit in dona Dei.*

Profectò malus mercator est, qui non vult  
 cum Deo inire commercium, cui non minùs ac-



cepta est sinceri animi promptitudo, si revera  
 desit operis externi facultas. *Ante oculos Dei,*  
 inquit Magnus Gregor. hom. 5. in Evangel. *un-*  
*quam vacua est manus à munere, si fuerit arca*  
*cordis repleta bona voluntate.* A jejuniis excusatur  
 infirmus, ad eleemosynam erogandam non te-  
 netur mendicus: sed quoniam, obsecro, per fugio  
 utetur, quam speciosam obtendet causam, qui  
 bona caret voluntate? *Quia,* inquit August. in  
 Psalm. 105. *si non habet saccus vel arca quod do-*  
*nes, habet cor & voluntas.* Nihil autem facilius  
 quàm velle, sicut nihil utilius benè velle. *Si*  
*enim voluntas prompta est,* inquit Apostolus 2.  
 Cor. 8. *secundum id quod habet accepta est, non*  
*secundum id quod non habet.* Age ergo, Lector:  
 euge serve fidelis, animum erige, ne corde ca-  
 das, ne mentem despondeas: quæcumque non  
 potes, si verè velis, apud Deum fecisti, à Deo  
 mercedem accipies. *Mens enim boni studii ac pii*  
*voti,* inquit Salvian. in prol. lib. de provid.  
*etiamsi effectum non inveniat cepti operis, habet*  
*tamen premium voluntatis.*

### SPECVLATIO III.

*Triplex est regula bonæ operationis,  
 lex æterna, ratio recta, & divina  
 voluntas cognita vel per præcep-  
 tum, vel per inspirationem.*

**P**Rima ergo regula est lex æterna, quæ est  
 veluti ratio Dei, quæ de se est firma, con-  
 stans, invariabilis, quæ sunt conditiones neces-

saria, ut aliquid sit primum in aliquo genere. Etenim effectus qui pendet à causis subordinatis, magis à prima dependet, quàm à secunda, quia ista agit in virtute illius. Sed omnis regula creata, ipsa etiam ratio recta subordinatur legi æternæ, secundum illud: *Mulci dicunt, quis ostendit nobis bonæ? Signatum est super nos lumen vultus tui Domine*, id est lumen rationis mentibus nostris divinitus insculptum, quatenus est participatio vultus & luminis divini, seu legis æternæ, dictat nobis quomodo sit declinandum à malo, & bonum faciendum; ideoque peccatum dicitur, *Dictum, factum, vel concupitum contra legem æternam*. Ergo prima regula totius honestatis est lex æterna animabus nostris sine magistro inspirata, sine apparitore intimata. Unde August. *lib. 2. de serm. Domini in mont. c. 9.* ait: *Nulla anima est qua ratiocinari possit, in cujus conscientia non loquatur Deus*. Et ita agnovit ipse Tullius *lib. 1. de legib.* dicens: *Sapientissimorum fuit sententia, legem neque hominum ingentis fuisse excogitatum, neque scitum aliquod esse populorum, sed æternum quiddam, quod universum mundum regeret imperandi prohibendique sapientia.*

Et certè hanc æternæ legis notionem nobis impressam esse, & in aliqua saltem sui irradiatione conspicuam, constantissimum est. Veritatis enim inserta cognitio, innata ad bonum propensio, & à malo averfio sunt æternæ legis derivationes, & quædam veluti transumptæ, & exscriptiones, quibus & ad æternæ legis noticiam manuducimur, & ad ejus observantiam Dei nomine allicimur ac munimur. Quod sanè arcanum celebriores Philosophos non latuit, qui propterea felicitatem, *Vitam natura convenient-*

tem, definitur. Naturæ autem nomine non solum rationem intellexerunt, juxta illud Senecæ: *Multos reges, si te ratio rexerit: vis tibi subijce omnia, subijce te rationi.* Nec solum pro universi ordinatissima constitutione acceperunt, secundum illud ejusdem Philosophi: *Quàm suave est eum universo rapi!* Sed etiam legem æternam in mente Dei existentem, & variis in nobis characteribus inscriptam interpretati sunt, juxta illud ab eodem Stoico identidem repetitum: *Deum sequere. In regno natum sumus, Deo parere liberitas.*

Secunda regula est ratio. Quia bonitas voluntatis pendet ab objecto; objectum autem voluntatis est bonum per rationem propositum, non solum speculative, sed & practice, quatenus & hic & nunc, tali vel tali modo agendum: Ergo ratio recta habet rationem regulæ & amissis, ad quam exigenda & mensuranda est boni operis rectitudo. Unde in progressu rectæ operationis mira contingit circulatio; nam ratio non est recta nisi per conformitatem ad appetitum rectum, & rursus ut appetitus rationalis sit rectus, debet esse conformis rectæ rationi. Qui tamen circulus non est vitiosus, quia ideo appetitus circa media est rectus, quia est conformis rationi debita media proponenti; ratio verò ideo circa media recta est, quia est conformis appetitui recto circa finem; intentio verò finis recta est per conformitatem ad judicium synteresis: judicium autem synteresis per conformitatem ad legem æternam rectitudinem sortitur. Intelligitur autem hæc doctrina de ratione practica, & non tantum speculativa; sæpe enim contingit quod judicio speculativo existente falso circa media, appetitus rectus est circa illa, ut patet in

illis qui peccant ex ignorantia invincibili, sicut cum Jacob accessit ad Liam, quam suam arbitrabatur: & è contra iudicio speculativo existente vero, potest appetitus esse perversus, ut patet in eo qui iudicans furtum esse malum, nihilominus furatur, videns meliora, probansque, & deteriora sequens. Verùm id non continget post iudicium & dictamen prudentiale hìc & nunc præcipiens & informans operationem: quod dictamen intelligimus in præsentì per rectam rationem, quæ etiam revera coincidit cum jure, & lege naturali.

Tertia regula est divina voluntas, quæ cum sit ipsa rectitudo, ipsa sanctitas per essentiam, illi conformari debet omnis humanæ vitæ rectitudo, juxta illud Aug. in Psal. 32. *Rectum cor habet, qui vult quod Deus vult.* Vnde in omnibus operibus nostris tenemur ex præcepto dilectionis Dei super omnia eundem finem ultimum, quem habet voluntas divina, vel formaliter, vel virtualiter prætereendere, quod est ei in genere causæ finalis, & in volito formali conformari; quia tunc ad idem scopum divina & humana voluntas sub eadem boni divini ratione collimant. Non tamen semper tenetur creata voluntas divinæ in volito materiali conformari; quia licet omne quod Deus vult sit bonum per ordinem ad bonum universale, quod ipse, qui est provisor generalis, querit; illud idem tamen potest esse malum respectu agentis particularis. Hac de causa *tomo 1. dissert. 8. c. 2. spec. 3.* diximus, quod quia Deus est provisor universalis, cujus est commune universitatis bonum curare, potest multa mala pœnæ inferre, & ipsa etiam mala culpæ permittere, ob latentes



profundissimorum consiliorum suorum rationes; quæ tamen amare, vel procurare, vel in illis complacere, nec debet, nec potest voluntas creata, quia est causa particularis, cujus est peculiare bonum providere, & mala imminencia à se depellere, & totis viribus amoliri. *Aliquando bona voluntate*, inquit August. in Enchirid. c. 10. *homo vult aliquid, quod Deus non vult. Tanquam si bonus filius patrem velit vivere, quem Deus bona voluntate vult mori.* Sic etiam infirmus potest adhibere remedia adversus infirmitatem, quam tamen divina voluntas decrevit; potest, inquam, non conando voluntatem divinam infringere, aut impedire, quia non solum irrita foret contentio (voluntati enim Dei efficaci quis resistit? & qui eam frustrare conatur, in illam volens nolens relabitur, ut aliàs demonstravimus;) sed etiam perversus foret ille conatus, adoranda enim, reverenda, amanda sunt divine voluntatis, & supremi provisoris arcana, tametsi non sint à nobis agentibus particularibus in exemplum proponenda.

Imò licet volitum materiale divinæ voluntatis non sit à nobis semper eligendum, tamen ipsa ratio, propter quam Deus vult, nimirum iustissima & sanctissima rerum omnium dispositio à sapientissimo gubernatore provisa, semper amanda, semper optanda est; ut fiat sicut in cælo, & in terra. Et fortè hoc pacto in concordiam vocari possunt antiqui quidam Theologi affirmantes nostram voluntatem divinæ debere in volito materiali conformari, ex lege perfectæ amicitiae, quæ concordem in omnibus amantium exigit consensum, idem velle, idem nolle, eorundem, & animam unam postulat. Sed illi

Doctores absque negotio explicari possunt de volito materiali, non præcisè secundum se ipse-  
taro, sed prout subternitur fini agentis supre-  
mi, & Regis totius universi; qui finis est summa  
Dei bonitas omnium aliorum volitorum regula  
& mensura, cui conformari exigit amicitia, quæ  
magis in concordia voluntatum quoad finem,  
quàm quoad ipsa volita consistit. Præsertim  
quando ipse amicus vult quidem laudari, pro-  
bari, & amari sua consilia; sed non in exem-  
plum trahi ab agentibus particularibus, quæ  
debent intra sphaeram suæ, ut sic dicam, parvi-  
tatis contineri, cætera verò divinæ providentiæ  
committere, eique ultrò parère, cum quo semper  
tenere & frustra pugnatum est; cui omnes vo-  
luntates bonæ, malæque militant; cui rationes  
factorum suorum sine dubio constant, etiam  
eum de illis nihil nobis constat; cui nihil diffi-  
cile, nihil impossibile, cum non vincat solum  
obluctantes hostes, sed ita vincat, ut arma pro  
Dei victoria ferant; ita flectat, ut quæ contra  
voluntatem ejus creaturæ moliuntur, ejus ser-  
viant voluntati. Cæterum investigabiles vias  
ejus, latentes fines, supremas ideas nec rimari  
debemus, nec imitari, sed mirari, & venerari.  
Nec propterea erit discordia voluntatum, quia  
idem materiale objectum sub ratione superiori  
& æterna vult Deus, sub ratione particulari non  
vult creatura: sicut nullum est inter voluntatem  
antecedentem & consequentem dissidium, quia  
sub diversa ratione procedunt, dum illa salu-  
tem reprobis vult, ista justam statuit damnatio-  
nem; quia prima personam reprobis in se præci-  
sam à circumstantiis inspicit, secunda ut eisdem  
involutam attendit. Et ita ferè in proposito.



Tunc ergo solum divinæ voluntati conformari tenemur, quando innotescit per præceptum, vel per afflantis spiritus inspirationem. Tenemur quidem, quando præcepto manifestatur. Quia ut docet S. Thomas 2.2. q.104. art.4. ad 3. *Et si non teneatur homo velle quod Deus vult* (scilicet quoad volitum materiale). *semper tamen tenetur velle quod Deus vult eum velle; & hoc homini præcipue innotescit per præceptum divinum, & ideo tenetur homo in omnibus divinis præceptis obedire.* Secundò innotescere potest divina voluntas secretis inspirationibus, quibus interdum ad insolita cientur viri Sancti, quæ vix honestari possent, nisi in illum refunderentur, qui est conditor legum, ut cum S. Apollonia majori igne succensa sese in ignem præcipitem dedit; & alii per multos dies & hebdomades abstinerunt à cibo, & idem dic de cæteris similibus, quæ ad miracula revocantur. Per inspirationes etiam internas intelligimus sacras illas immixtas cordi cogitationes, quibus ad opera consilii, vel ad æmulanda charismata meliora permovemur. Nec enim probari potest eorum laxissima sententia, quæ affirmat, nihil peccare eos, qui sacros inspirationum motus vel negligunt, vel repellunt. Licet enim non teneamur, nec scire debeamus omnes quæ occurrunt pias cogitationes sequi, quia probandi sunt spiritus si ex Deo sunt, nec omnia possumus omnes; si quis tamen eò rerum spiritualium fastidii, eò erga salutem & profectum corporis deveniret, ut nullum sacris inspirationibus ad meliora exstimulantibus locum dare constitueret; certè qui sic esset comparatus, peccati saltem venialis reus esset: nam juxta communem Christianæ pietatis sen-

sum, quotquot non solidæ virtutis expertes, de divinarum inspirationum neglectu & repulsa humiliter se accusant, non secus ac de infidelitate spiritali, quâ Deo ad majora vocanti non respondent. Quia nimirum sciunt Deum hujusmodi repulsam interdum non leviter punire, dum eos cadere sinit qui progredi non nituntur, & ab illicitis & lethalibus rapi, qui semper permissis indulgent, juxta illud August. epist. 143. *Tandem non relabimur, quando ad priora contendimus: at ut coeperimus stare, descendimus, non firmique non progredi, reverti est. Si velamus non redire, currendum est.* In his tamen magnâ prudentiâ & discretionem opus est, præsertim circa cogitationes inspirantes status per se boni, & non corrupti mutationem. Si enim in eo positus sis, in quo tuæ vocationis perfungi officiis non valeas, sine mora ad alium tutiorem transendum est, & in re tam iusta nulla est consultatio. Quia licet semper ad perfectiora, & salutis viciniora contendere debeamus, nemo quippe perfectus, qui perfectior esse non appetit; quia cum consummatus fuerit homo, tunc incipit nihilominus non debemus omni spiritui mutationem status per se boni specie melioris suadenti credere, nec citò moveri certa pro incertis deserendo, scientes diabolum soli semper perseverantiæ insidiari, quam solam virtutum novit coronari; tutiusque esse in ea vocatione, quâ vocati sumus, simpliciter perseverare, quam sub specie quasi melioris boni, id quod jam cœpimus, amittere, nec ad id quod præsumimus, fortassis sufficere.

Objicies contra primam partem: Illa non potest dici primaria regula bonitatis & malitiæ,

quæ supponit actum esse bonum, aut malum, frustra enim diceretur prima alicujus operis regula, postquam opus factum esset: Atqui lex æterna supponit actum esse bonum, aut malum, præsertim quando actus est bonus vel malus ab intrinseco ex objecto essentialiter bono, vel malo: v.g. amor Dei est actus intrinsecè bonus, sicut odium Dei est actus intrinsecè malus: nec tales sunt, quia Deus judicat, sed ideo Deus judicat esse tales, quia reipsa ita se habent: Ergo prima regula bonitatis moralis non est lex æterna. Major est clara, minor etiam videtur perspicua, & insuper suadetur. Etiam si nulla lege præciperetur amor Dei, aut vetaretur odium, aut certè non intelligeretur vetitum, semper amor esset bonus, semper odium esset malum, & disconveniens. Certè sicut calor non ideo est malum aquæ, quia Deus judicat illud esse malum, sed ideo Deus judicat, quia reapse illi malum est: ita judicium Dei de bonitate ac malitia objectorum & actuum, præsupponit bonitatem, aut malitiam eorum, aliàs nullus esset actus, quem Deus non posset permittere.

Respondeo, essentialiter esse actui cuius bono esse juxta legem, sicut malo esse contra legem. Unde in Scriptura peccatores dicuntur prævaricatores. Psal. 118. *Prævaricantes reputavi omnes peccatores terra.* Rom. 4. *Vbi non est lex, nec prævaricatio.* Unde Ambros. lib. de parad. cap. 8. *Quid est peccatum, nisi divina legis prævaricatio, & cælestium inobedientia mandatorum?* Licet ergo dentur actus intrinsecè boni, & alii intrinsecè mali; ideo tamen tales sunt, quia essentialiter concordant, vel repugnant legi æternæ, per quam non debet intelligi judicium, vel cognitio libera

subsequens Dei decretum, & supponens bonitatem, aut malitiam in actu, ut putant adversarii; sed debet intelligi dictamen Dei præcipiens, quod est ipsa Dei essentia, ut habet rationem speciei expressæ respectu intellectus divini, cui ea quæ sunt de jure naturali necessario repræsentat. Unde sicut verum est dicere: Homo est rationalis, quia est conformis divinæ ideæ sic hominem repræsentanti, licet homo sit essentialiter rationalis; ita odium Dei non est malum, nisi quia prohibitum lege æterna, seu expressione necessaria divini dictaminis, licet odium illud sit ab intrinseco malum. Quare si per impossibile non esset Deus, nec lex æterna, vel in se, vel participata in dictamine rationis, tunc non daretur peccatum morale, sicut non datur in brutis, sed solummodo daretur peccatum prout dicit defectum naturalem, eo ferè modo quo calor dicitur malus respectu aquæ; vel ad summum daretur bonum, vel malum morale fundamentaliter, non formaliter, utpote non consonum, vel dissonum ulli regulæ morum.

Hinc fit, peccatio essentialiter esse rationem injuriæ Dei, ut primi & supremi legislatoris; omnis quippe peccator sciens transgreditur legem naturalem, quæ est emanatio æternæ, nec deest illi sufficiens notitia; sicut enim natura ita sentit Creatorem, ut illum non possit invincibiliter ignorare: ita lex naturalis percipit æternam, cui veluti clientelæ jure obstringitur. Cujus argumentum est, quod scienter peccans percipit se reum pœnæ à supremo judice, quem propterea timet, infligenda. Idque Philosophi ratione duce noverunt; Plato enim, teste Ang. lib. 8. de Trinit. cap. 10. & 14. dicebat, in rebus.

humanis nihil esse Deo & virtute gratius, nihil vitio & peccato ingratius. Quod si aliqui id non sentiunt, magna est obstinati, & multitudinis peccatorum obscurati cordis poena. Ex quo fit, omnia peccata esse rebelliones, & contra obedientiam latè sumptam, quæ est virtus generalis in omnibus actibus bonis inclusa; non strictè sumptam, nisi quando violatur præceptum ex contemptu, vel ex speciali amore libertatis eximentis se à lege, excutientis jugum superioris, & in veritum singulari complacentia nitentis, vel tandem odio subjectionis ad legem, quia tunc prodit ex adipe iniquitas, & est manifesta rebellio.

Objicies 2. contra secundam partem, seu alteram regulam honestatis. Regula bonitatis antecedit, non subsequitur bonitatem actuum: Sed recta ratio subsequitur bonitatem objecti; nam objectum non dicitur honestum, quia judicatur tale; sed ideo tale judicatur, quia revera ita se habet: Ergo recta ratio non est regula bonitatis actus. Ex quo etiam sequeretur circulus vitiosus inter actum bonum, & rectam rationem; nam recta est ratio, quæ præcipit actum bonum; actus verò bonus est, quem præcipit recta ratio, subindeque & actus bonus per rectam rationem, & vicissim recta ratio per actum bonum definirentur. Imò recta ratio in sui definitione involveretur; recta enim ratio est quæ bonum objectum præscribit; objectum verò bonum est conforme rectæ rationi, unde recta ratio definitur per ordinem ad objectum, in quo ipsamet implicatur.

Respondeo, rectam rationem non posse excludi à ratione regulæ bonitatis, cum teste Phi-

lofopho 6. *Ethic. cap. 1. & 2.* recta ratio definit modum virtutibus omnibus moralibus consentaneum, ideoque in illam veluti signum respiciunt, & tanquam in scopum collimant universæ, sicut artifex ad ideam operis attendit, ut opus perfectum elaboret. Hinc etiam communiter docent Theologi, quod sicut triplex est regula operationum omnium, natura, ars, ratio; ita vitia sunt in triplici differentia; alia sunt defectus naturales & peccata, naturæ scilicet monstra; alia sunt aberrationes artificum à recta linea declinantium; alia inquinamenta morum à recta ratione declinantium. Et certè mirari subit, cur aliqui recentiores, quos sequitur P. Georgius, de Rhodes, rectæ rationi manus regulæ vitæ moralis denegarint, cum ipse homo non sit agens morale nisi per rationem, quam solemus consulere ut rectè agere valeamus, cum etiam actus quantumlibet sint intrinsecè boni aut mali, nunquam tamen tales moraliter dicantur, si absit iudicium, & dictamen rationis, ut patet & in pueris, & in amentibus, & in operantibus vel ex conscientia erronea, vel ex ignorantia invincibili.

Ad argumentum ergo dicendum, falsum esse, actum bonum præsupponi ad dictamen prudentiale præscribens & mensurans bonitatem; cum enim ad ipsum pertineat determinare medium & modum operis agendi, non potest præviè, & independentè ab ipso opus dici bonum. Peccat etiam hoc argumentum sicut præcedens, quia confundit iudicium de bonitate actus cum dictamine inspirante, & informante opus bonum, sicut idea artis præscribit & informat opus artificiale. Unde tunc opus iudicatur bonum, quando



vitemus esse conforme dictamini prudentiæ; maius verò, si disforme. Nec ullus committitur circulus vitiosus, ut inter probandam speculationem dicebamus; quia actus est bonus, qui est consonus rationi, non speculativæ tantum, sed practicæ, id est dictamini recto: ratio autem, & dictamen recta sunt, si sint conformia legi æternæ: unde nec idem involvitur in definitione sui ipsius, quanvis si sub diversa ratione id contingat, nullum sit inconveniens, præsertim in entibus respectivis, quorum unum clauditur in conceptu alterius; quia relativa sunt simul naturâ, & cognitione.

Ex his apertè sequitur, primariam regulam vitæ moralis non esse naturam rationalem, ut præfati recentiores opinantur. Natura enim rationalis præcisè sumpta pertinet ad ordinem physicum; ipsa sicut indiget dirigi regulis, ita eis subijcitur, nec est regula dirigens, sed subjectum directionem recipiens. Regi enim debet natura rationalis, & per rationem, & per præcepta, quibus in suum finem permovetur, & via illi, quam sequi debet, præmonstratur.

## R E F L E X I O.

Non in solo clastro præscribendæ sunt, & observandæ regulæ. Omnem Christianum, imò omnem hominem regularem esse necesse est; quia & in sæculo, & in Religione, & in civitate non minùs quàm in Cœnobio ad tres præfatas exigere regulas singula opera nostra & possumus, & debemus.

In primis præ oculis habenda est lex æterna, seu supremi Domini & Legislitoris jus, quod

est fons legum omnium, quæ ab ipso velut à sole radii continuò exoriuntur. Illam nemo fugere potest, nemo eludere, nemo declinare; ab illa nulli appellare, vel adversùs illam allegare quidquam, neque quid excipere, neque replicare, neque ad alium Judicem licet provocare. Quia ut ait August. lib. 2. confess. cap. 4. *Lex tua, Domine, in cordibus hominum scripta est, quam nec ulla unquam delet, aut delebit iniquitas.* Eam Deus indelebilibus exaravit characteribus, nec tam inscripta est, quàm innata, & profuso quodam naturæ fonte in singulis expressa. Excogita quantum volueris glossas, inquire favorabiles interpretationes, accumula probabilitatum benignitates; nusquam tamen, & nunquam excusabitur quod lex æterna damnat, nusquam, & nunquam licebit, quod per illam semper & ubique non licuit, quia ut dixit Tertull. de spect. cap. 20. *Omnia penes veritatem Dei fixa sunt.* Æternæ, & incommutabili Dei legi tam non potest humana solertia adjicere digitum unum latitudinis, quàm non potest ad staturam hominis adjicere cubitum unum longitudinis; quia qui vitæ hominis constituit parvitas & magnitudinis terminos, qui præteriri aut transiliri non possunt; ille idem æterna & indispensabili lege præfinivit terminos honestatis, qui nec contrahi possunt, nec dilatari. Audi Ethnicum Christianè scribentem, Tullium inquam nonnullis Theologis æquiores, cujus verba exscripta refert Lactantius lib. 1. Divin. instit. cap. 8. *Est vera lex recta ratio natura congrua, diffusa per omnes, constans, sempiterna, qua vocet ad officium jubendo, vetando à fraude deterreat.* Huic igitur legi nec prorogari fas est, neque derogari aliquid licet, nec

*totā abrogā i potest* ( etiam conante & existente malitiā. ) *Nec verò per Senatum , aut per populum solvi hæc lege possumus : nec est quarendus explātor , aut interpres alius. Non erit alia lex Romæ , alia Athenis , alia nunc , alia posthac ; sed & omnes gentes , & omni tempore una lex , & sempiterna , & immutabilis continebit.* Hæc lex , quæ est divinum de agendis dictamen , inducit vim coactivam & obligantem pro præceptis , & consultivam pro consiliis , quorum posteriorum observatio est maximè secundum legem , tametsi transgressio non sit contra legem ; quia plenius , & abundantius finem legis attingit , qui consiliis morem gerit ; magis quippe præceptum de non inœchando observat virgo , quàm uxoratus ; & fini præcepti de non furando magis obsequitur qui omnia pauperibus erogat , quàm qui aliena tantùm non eripere contentus est.

Post consultam , & adoratam divini numinis æternam legem , ito in tuæ penetralia mentis , & intus incisos apices , & inscripta volumina mentis inspicere , & natam tecum rationis tuæ agnosce legem , æternæ legis participationem , divini luminis impressionem , vultus Dei lumen signatum super te , & transfusum in animum rationalem , quo homo vivit ut homo est , & à brutis distinguitur. Erige intra te tribunal adversum te , reduc ante oculos cordis incessanter admitta , quia Deus non respiciet iratus peccata tua , si illa pœnitens respicere ipse non cesses. Constitue te ante faciem tuam , ne tibi aliquando rerum audias dici : *Arguam te , & statnam contra faciem tuam. Constituto in corde iudicio , inquit August. hom. 50. adsit accusatrix cogitatio , testis conscientia , carnis ex timor.*

Felix,heu! nimium felix,qui præcuntis rectæ rationis prælucentem faciem semper sequitur. Nam ut dicitur Proverb.15. *Secura mens iuge convivium.* Hinc Bern.lib.de inter.dom. cap.23. *Nihil est, inquit, iucundius, nihil tutius, nihil diutius conscientia bonâ. Premat corpus, trahat mundus, terreat diabolus, illa erit secura.* Porro quàm miser & miserabilis homo ratione præditus, & rationis iudicium despiciens! Quid deplorandum magis, aut molestum esse potest, quàm in se experiri rationem accusatricem sui, juxta illud Psal.50. *Peccatum meum contra me est semper?* Ipsa, ut observat Chrysostom. hom. 20. in Matt. compulit Lamech seipsum accusare, dum dixit Genes. 4. *Occidi virum in vulnus meum.* Quis ipsum, obsecro ad confessionem adegit? Nullus planè, quàm ratio, & conscientia inclamans, & ostendens magnitudinem peccati. Nec solum accusat ratio, ipsa testis est. Unde Bernard. lib. 5. de considerac. expendens illud Job 7. *Quare posuisti me contrarium tibi, & factus sum mihi met ipsi gravis,* ait: Nullus molestior oculus suo cuiusque, non est aspectus, quem tenebrosa conscientia suffugere magis velit, minùs possit. Non latent tenebra vel se ipsas. *Se vident quæ aliud non vident.* Nec testis dubitaxat ratio: tribunal est, cum sit thronus luminis divini signati super nos. Hoc tribunal, inquit Chrysost. hom. 3. de verbis Isaiæ, non pecuniâ corrumpitur, non adulationibus acquiescit, eo quòd divinum est, & à Deo nostris impositum membris. Quid, inquam, tribunal? Ipsa ratio iudex est: *Unusquisque,* ait Ambr. lib. 7. epist. 47. *animum suum severem iudicem, sui ultorem sceleris, & vindicem criminis habet.* Nullum profecto severius iudicium, quàm domesticum, quo

unusquisque sibi est reus, sibi iudex; quidni sibi met ipsi sententia? Ita planè ipsa ratio decretoria sententia est, quâ homo de suo volens nolens damnat iudicio. Nec iudicium modò, ipsa ratio hominis carcer est; nec carcer tantùm, sed carnifex secum sedens, secum habitans, secum ambulans, & ut ait Chrysost. hom. 10. in Genes. *Peccator secum carnificem circumgestat.* Quid plura? Non solùm carnifex & tortor est ratio, & conscientia rea, sed etiam supplicium ipsa est, ipsa tortura; iussisti enim, Domine, & ita est, ut omnis inordinatus animus pœna sit sibi. Tandem post supplicia infert mortem, quia ut verè alicubi scripsit Philo: *Impii multas sustinent mortes ante ultimam.* Et veriùs Psalmographus Psal. 114. *Circumdederant me dolores mortis.* Unde Cain tremulus, & mortis labore ante mortem oppressus aiebat: *Omnis qui invenerit me, interficiet me.* Mortem comitatur horror, fœtor, & tenebræ sepulturæ. Eccl. 11. *Error & tenebra peccatoribus concreta sunt.* Et Joëlis 2. *Ascendet fœtor ejus, & ascendet putredo ejus, quia superbè egit.* Et Matth. 23. *Similes estis sepulchris dealbatis, quæ à foris parent hominibus speciosa, intus verò plena sunt ossibus mortuorum, & omni spurcitia.* E sepulchro formicant vermes. Isaia 66. *Vermis eorum non morietur in aeternum.* Quia in hac vita incipit, & in inferno corrodere animam non cessabit; nam ut eleganter ait Bern. lib. 5. de consider. cap. 12. *Hic est vermis qui non moritur, memoria præteritorum.* Semel injectus, vel potiùs innatus per peccatum hæsit firmiter, nequaquam deinceps avellendus. Nec cessat rodere conscientiam, eaque pastus esca, utique inconsumptibili, perpetuat vitam. Horreo vermem mordacem, & mortem vivacem.



*vivacem. Horreo incidere in manus mortis viventis, & vita morientis. Hac est secunda mors, qua nunquam peroccidit, sed semper occidit. Et post pauca: Itaque durante anima, durat & memoria: sed qualis? Fœda flagitiis horrida facinoribus, vanitate tumida, contemptu hispida & neglecta. Quæ priora transierunt, & non transierunt. Transierunt à manu, sed non à mente. Quod factum est, factum non esse non potest. Proinde etsi facere in tempore fuit, sed fecisse in sempiternum manet. In æternum ergo necesse est cruciet, quod perperam te egisse in æternum memineris. Justum profectò est, ut qui rationem calcavit, ratione ipsa obruatur: perpetuò tundatur, perpetuòque confundatur lumine propalatae veritatis æquissimum est, qui rationis dictamen perpetuò floccifecit.*

Denique viri spirituales æmulantes charismata meliora, cogitant semper quæ sit voluntas Dei bona, & beneplacens, & perfecta, cui conformantur per amorem, quia est summa bonitas; per imitationem, quia est pura perfectio; per subjectionem, quia est summi Imperatoris decretum. Læti canunt cum Propheta: *Paratum cor meum Deus, paratum cor meum.* Et iterum: *Paratus sum, & non sum turbatus, ut custodiam mandata tua.* Si non semper, saltem sæpe frequentant illud verbum Apostolicum, verbum breve, sed plenum, sed efficax, sed dignum omni acceptione, *Domine quid me vis facere?* Hinc pace imperturbabili, & felicitate inchoata perfruuntur: gaudium eorum plenum est, & gaudium eorum nemo tollet ab eis, quia solam Dei voluntatem quærunt, quam necesse est semper impleri. Pax Dei, quæ exsuperat omnem sensum, eorum corda custodit; quia dum adhærent illi



qui sempiternus est, contristare justos non potest quidquid acciderit eis; & uni Dei voluntati inhiantes, nolentes propriam explere voluntatem, illam semper explevisse inveniuntur. Hoc scuto bonæ voluntatis coronati æquales sunt in inæqualitate fortunæ, iidem in prosperis & in adversis, repleti consolatione, superabundantes gaudio in omni tribulatione sua; quia mens in Dei voluntatem forti intentione directâ, quidquid sibi in hac vita amiarum est, in Dei voluntate dulcescit; omne quod affligit, requiem putat: quin & transire per mortem non reformidat, sed appetit, ut divinæ voluntati adhærere strictius, conjungi intimius, perfrui plenius possit.

Nihil justius quàm divinam in omnibus quærere voluntatem; nihil suavius quàm se summi provisoris totum committere voluntati, quam non dstringit, aut distinet magnitudo rerum, aut varietas; sed sic intendit singulis, ac si vacet à cunctis, & sic omnibus simul intendit, ac si vacet à singulis; sed potissimum eruit sustinentes se, & ponentes in Domino Deo spem suam. Spargit quidam superna lux quoquo versum suos radios, & uno, eodemque ictu, sive nictu sinus omnes & abyssos penetrat cœli, terræ, maris; sed præcipue oculi ejus in pauperem respiciunt sperantem in Domino, & divinæ sese permittentem voluntati. Necessitatem saltem in virtutem convertamus. Ultrò voluntatem illam amemus, ultrò parcamus, quam effugere non valeamus, cui inscii & inviti servimus. Sponte Deum sequere, cum quo temerè, & frustra pugnabis; nam autem quædam veluti catena à Dei voluntate supernè demittitur, ad quam omnia infe-

rora alligantur. Conare, enitere, versa, reversa, volve te in omne latus, voluntatem Dei non declinabis; quia nihil omnino præter peccatum in hac grandi machina geritur, turbatur, miscetur, cujus non causa & origo sit à prima illa causa. Omnis humanarum rerum fluxus & refluxus, eventuum ortus & occasus ab illa dependere. Quid ergo indignum magis, quam ut in eam homo insurgat, & indignetur, illique pro virili eripiat sceptram, cui omnia creata parent non invita? Eleganter Lipsius de constant. lib. i. c. 14. *Caca moralitas! Sol, Luna, sydera, elementa, & omnia hac sola obediunt suprema illi legi: nobilissimus rerum homo solus in conditorem suum calces jacit, & resistit. Atqui si vela ventis dedisses, sequerere non quò voluntas impelleret, sed quò illi. & in hoc vita oceano spiritum illum s. qui recusos imperatorem universi? Et recusos tamen frustra, quia aut sequere, aut trahere: & cælestia illa decreta vim suam ordinemque servabunt, sive in volentem, sive in rebellem. Rideamus, si is qui cimbam ad rupem alligavit, & funem identidem trahat, rupem ad se accedere censeat, cum ipse ad illam. Et non major nostra stultitia est, qui ad rupem illam aeterna providentia nexi, trahendo & reluctando volumus eam nobis obsequi, non nos ipsi. Mittamus aliquando hac vana; & si sapiamus, sequamur ab alto attrahentem illam vim, & æquum censeamus, ut homini placeat anidquid placuit Deo. Et paucis interjectis affert hæc auro meliora verba Senecæ: Ad hoc sacramentum adacti sumus, ferre mortalia, nec perturbari his, qua vitari nostra potestatis non est. In regno nati sumus: Deo parere libertas est.*

## CAPVT II.

*De malitia actus moralis.*

**D**Vra sanè, & ingrata de peccato & malitia sermonem habendi necessitas! Quid de eo tractat Theologia, cujus ne nomen utinam audivissem? Et quomodo de eo facillè erit verba facere, quod vix sub conceptum cadit, quod nec Deus ipse primò & per se novit, quia nec ejus ideam habet? *Nemo ex me scire querat quod me nescire scio*, ait alicubi omniscius Augustinus, *nisi fortè ut nescire discat, quod sciri non posse sciendum est*. Ea quippe quæ non in specie, sed in ejus privatione sciuntur, si dici aut intelligi potest, quodammodo nesciendo sciuntur, ut sciendo nesciantur: cùm enim acies etiam oculi corporalis currit per species corporales, nusquam tenebras videt, nisi ubi cœperit non videre. Tale autem est peccatum, quod nullam habet modum, nec speciem, nec ordinem. Sed tamen de illo tacere non possumus, quia jam de tertia specie actus moralis agendum restat, nimirum de actibus malis, quos dari de facto infelix nedum experientia, sed & ratio convincit. Cùm enim nihil aliud sit peccatum & malitia sive in rebus naturalibus, sive in artificialibus, sive in voluntariis & moralibus, quàm defectus & inordinatio propriæ actionis operantis aliquid non secundùm quod debitum est agi, ut dicitur 2. *Physicorum*; manifestum est volunta-

tem toties peccare, quoties à regulis honestatis superiori capite constitutis recedit: quod sanè sæpe nimis contingit. Tum quia voluntas creata ratione suæ indifferentiæ non est determinata ad immutabilem amorem boni. Tum quia quod ex nihilo creatum est, ad nihilum continuò tendit. Tum quia nulla creatura est prima sui actus regula, sed subjicitur superiori, à quo divertere potest: peccare autem nihil est aliud, quàm declinare à regulis, ad quas exigi debent actus liberi. Tum quia charitas in hac vita non implet rotam voluntatis potentialitatem, ut patet ex eo quod voluntas non actu semper fertur in Deum; forma autem, quæ non implet totam subjecti potentialitatem est in illo amissibiliter, ut patet in formis corporum sublunarium. Unde sicut materia sublunaris transit de una forma in aliam, ita crebrò voluntas de actu bono in malum. Certum ergo est, dari peccatum commissionis; & malum morale, à quo voluntas naturâ suâ bona simpliciter mala dicitur, juxta illud August. lib. 2. de nupt. cap. 28. *Ecce ex bono oritur malum, nec fuit omnino unde oriretur, nisi ex bono: ipsam dico voluntatem malam.*

Sed difficultas, & quidem gravis in hoc tota fita est, an malitia peccati commissionis sit formaliter aliquid positivum, vel privativum. Neque enim immorandum nobis est in rejicienda Authorum illorum sententia, qui volunt peccatum esse de formali extrinsecam tantum denominationem, vel purum ens rationis. Quia hujusmodi sententiæ fundantur in antea refutatis de moralitate in communi sententiis. Et certè siue malitia sit formaliter aliquid positivum, siue privativum, necessariò tamen importat vel sup-

ponit habitudinem realem actus ad objectum  
 dissonum regulis morum, superadditam actui  
 libero; quæ habitudo ad objectum malum non  
 est minùs intrinseca, quàm tendentia, & habi-  
 tudo ad objectum physicum, cum utraque per-  
 æquè à voluntate producat. Maximè quia ma-  
 litia peccati verè inest actui malo à parte rei,  
 nemine cogitante, ut per eam actus malus di-  
 stinguatur à bono: Ergo est aliquid reale, eo  
 saltem modo, quo privationes realiter dantur;  
 nec potest dici merum ens rationis, licèt pen-  
 deat à ratione, sicut artefactum ab artifice. To-  
 tum ergo controversiæ momentum in hoc po-  
 situm est, an malitia actus moralis, quæ est for-  
 male peccati commissionis, consistat in positivo,  
 an in privativo, an in utroque. Licèt enim cer-  
 tum sit, actum malum, seu peccatum commissio-  
 nis importare relationem, habitudinem, & or-  
 dinem positivum ad objectum dissonum; cer-  
 tum etiam sit, in actu malo dari privationem  
 rectitudinis debitæ inesse actui humano, & dif-  
 formitatem ad regulas morum; dissidium ta-  
 men est, an ordo fundans privationem disso-  
 nantiæ, an verò ipsa privatio fundata sint for-  
 male constitutivum mali moralis, seu peccati;  
 seu an actus sit ideo & priùs malus moraliter,  
 quia tendit in objectum dissonum; an quia ten-  
 dendo privatur ordine rationis. Occasione  
 etiam malitiæ moralis explicabimus an idem  
 actus possit esse simul bonus & malus sub diver-  
 sa ratione, putà bonus ex objecto, malus ex  
 fine & circumstantiis, vel è contra.

## SPECVLATIO I.

*Sententia affirmans constitutivum  
formale mali moralis esse quid po-  
sitivum, proponitur, & iudicio  
Lectoris permittitur.*

**D**El'cta quis intelligit? Nemo sanè nec quoad numerum, nec quoad essentiam. Adeo enim obscura est natura peccati, ut nulli apti, vel satis atrii colores occurrant, quibus horrendum peccati vultum depingam. Diversitas etiam sententiarum quibus ipsimet inter sese pugnant Thomistæ, & varia S. Thomæ testimonia, quibus modò uni, modò alteri sententiæ favere videtur Angelicus Doctor, me diu pendulum & ancipitem tenere. Et certè non levis eorum conjectura est, qui suspicantur S. Doctorem hac in controversia quadantenus ambiguè loqui studuisse, modòque in unam, modò in aliam propendisse, ut indigitarer hac in controversia vix certi aliquid posse definiri. Quapropter visum est, primam sententiam priùs cum omni suo robore, tuo (Lector) permittendam arbitrio proponere, quàm ut nostram longè probabiliorē confirmemus, ut unusquisque in suo sensu abundet; parvi quippe interest scire peccati definitionem, sed summi momenti est ejus in nobis exstirpare dominationem.

Cajetanus ergo, Curiel, Martines, Salmanticenses, Joannes à S. Thoma, alii que non pauci opinantur, rationem formalem constitutivam



peccati esse quid positivum, nimirum habitudinem transcendentalem actus humani tendentis ad objectum ut dissonum legi æternæ, & rationi. Triplici viâ suaderi potest hæc sententia: primò autoritate: secundò impugnatione sententiæ oppositæ: tertio rationibus positivis.

Primò ergo sic proceditur: In sacra Scriptura, Patribus & Conciliis peccata sæpe sapius vocantur mala opera, ut præsertim videre est in Tridentino, *sess.6. can.6.* ubi sermonem habet de peccatis formaliter, cùm dicat ea esse solum permissivè à Deo; mala autem opera non constituuntur sine aliquo positivo. Idem videtur satis perspicuè docere D.Thomas. Nun 1. *p. quest.48.art.1.* quærit an malum sit natura quædam? Et cum sibi proposuisset, malum debere esse aliquam naturam, quia constituit speciem in moralibus, respondet: *Malum in quantum malum non esse differentiam constitutivam in moralibus, sed ratione boni adjuncti.* Unde censet, malum morale esse quoddam bonum, ut fundat privationem. Idem repetit 2. *cont. gent. cap.9.* & alibi sapius, ubi docet differentiam constitutivam actus mali in moralibus esse habitudinem ad objectum ut dissonum; & quod peccatum non sortitur speciem ex parte privationis, vel aversionis, sed ex conversione ad objectum. Denique expressa videntur illa verba quæstionis 2. de malo, art. 11. ad 13. *Peccatum non est privatio pura, sicut tenebra, sed est aliquid positivè.*

Secunda via ad eam sententiam stabiliendam petitur ex refutatione oppositæ sententiæ. Nam illud non est formale constitutivum mali moralis, seu peccati commissionis, quod non est ejus

distinctivum ab aliis. Sed privatio rectitudinis non potest esse formale distinctivum peccatorum; nam peccata extremè opposita eidem virtuti mediæ, v. g. prodigalitas & avaritia oppositæ eidem liberalitati, distinguuntur specie, cum specificent diversos specie habitus; & tamen non habent privationem rectitudinis specie diversam, privationes quippe non distinguuntur aut multiplicantur, nisi ratione formarum, forma verò quâ privant hæc duo vitia, est unica specie, scilicet rectitudo liberalitatis: igitur privatio rectitudinis non potest constituere formaliter malum morale, seu peccatum commissionis.

Confirmat idipsum Curiel, quia constitutivum peccati commissionis debet esse quid afficiens & actuans actum pravum; per hoc namque distinguitur peccatum commissionis à peccato omissionis, quod istud est carentia actus involuntate, illud verò est actus difformis, sed positivus. At privatio rectitudinis non potest intrinsecè afficere actum malum, cum rectitudo non sit forma debita actui malo, qui (maximè si sit intrinsecè malus) est essentialiter incapax bonitatis, nec ulla potest ratione honestari. Ergo privatio rectitudinis non est formale constitutivum peccati commissionis.

Tertia via fundatur in variis rationibus positivis. Prima & præcipua est: Illud est formale constitutivum peccati, à quo peccatum habet primò quod sit malum morale; essentia enim alicujus rei est primum quod concipitur in ea, si sit ratio propria, & distinctiva ab aliis. Atqui peccatum commissionis habet esse malum morale primò per habitudinem positivam & vitalem tendentiam ad objectum dissonum. In pri-

mis per illam habitudinem habet actus malitiam moralem; nam illa habitudo procedit à voluntate ut subiecta regulis morum, & simul respicit objectum morale, nempe dissonum regulis morum: Ergo illa habitudo pertinet ad lineam moralem, contrahiturque ab illo objecto sic attracto aliquam speciem moralem; non desumit autem bonitatem aut indifferentiam cum per illam homo recedat à Deo, & ratione: Ergo malitiam formalem. Quod autem illa habitudo prius conveniat actui pravo, quam privatio rectitudinis, videtur manifestum; nam ideo actus peccati est privatus rectitudine, & caret debita commensuratione ad omnes leges, quia tendit ad objectum pravam; omnis quippe motus tendens ab uno termino ad alium, per se primo respicit terminum ad quem, ex quo sequitur aversio & recessus à termino à quo: Ergo positiva illa tendentia ad objectum dissonum primitus in actu malo invenitur, quam in illo privatio ulla intelligatur. Certè sicut actus haurit ab objecto consono honestatem, ita ab objecto dissono non potest non desumere malitiam; facti enim sunt abominabiles sicut ea quæ dilexerunt: Sed actus malus non derivat ab objecto malitiam, nisi mediante respectu positivo: Ergo ille respectus positivus, ille ordo, illa tendentia, illa pravi objecti prosequutio fruens utendis, & amplectens stercorea, mala sunt ante ultimus privationis accessum.

Secundam rationem pro hac sententia urget Cajetanus, quæ est huiusmodi: Non datur oppositio contraria, nisi inter extrema positiva, inter quæ datur mediū, & quæ sub eodem genere maximè distant: Sed bonum & malum morale

opponuntur contrariè, & non secundùm privationem & habitum, ut expressè docet S. Thomas multis in locis post Aristotelem *cap. de oppositis*. Cujus etiam signum est, quod inter bonum & malum datur medium, scilicet actus indifferens. Ergo.

Tertia ratio talis est: Moralitas in communi, quæ dividitur in bonitatem, malitiam, & indifferentiam, est de formali quid reale positivum, ut ex supradictis est manifestum: Ergo malitia peccati, quæ est membrum dividens moralitatem in communi, est necessariò aliquid positivum. Tum quia ratio superior positiva non contrahitur, nisi per differentias positivas inferiores. Tum quia rationes, quas supra pro moralitate in communi attulimus, vel nihil evincunt, vel Adem; si quid probant, de malitia moralis persuadent.

Hæc sunt præcipua authoritatum & rationum momenta, quibus sententia peccatum & malitiam moralem in aliquo positivo sitam affirmans stabilitur, quibus procul dubio non tenuis, aut mediocris probabilitas ei vindicatur. Fateor tamen singulas non per æquè urgere rationes, & nihil ferè confici ex authoritatibus adductis. Scriptura enim & Patres, dum sermonem habent de peccato commissionis distincto ab omissione, sine dubio debent dicere, peccatum esse malum opus, & involvere aliquid positivum; commissio enim peccaminosa duo necessariò includit, & quod sit commissio, & quod sit peccaminosa: in ratione commissionis utique per actum constituitur; sed in ratione peccaminositæ ubinam Patrum ullus vel leviter indigitavit constitui per positivum, & non per privationem?

Nullibi sanè : cujus etiam argumentum est clarissimum, quod semper S. Thomas meminit privationis, dum peccati essentiam explicare curavit. Hac ergo distinctione peccati considerati in ratione commissionis, & in ratione peccaminosi, solvuntur omnia testimonia S. Thomæ : cum enim ait, actum malum constituere speciem in moralibus, & causare diversitatem specificam per aliquid positivum, loquitur de peccato & malo morali in ratione commissionis, quæ subternitur malitiæ, sub qua consideratione importat bonum adjunctum, & non est pura privatio, sed includit necessariò, & essentialiter aliquid positivum, per quod distinguatur à peccato omissionis. Sed in illis iisdem locis, in quibus admittit aliquid positivum ad constituendum peccatum commissionis, quo distinguatur ab omissione, & ad explicandum quid sit commissio reduplicativè ut commissio est; in illis, inquam, iisdem locis apertissimè tradit privationem constituere essentialiter peccatum commissionis in ratione peccati & mali morali, quæ privatio est communis tam peccato commissionis, quam omissionis, ut videre est in omnibus locis, quæ pro se citant Authores hujus sententiæ, in quorum antecedentibus, vel consequentibus statim meminit S. Præceptor privationis, sine qua nullum malum intelligitur, ut *in illa q. 48. 1. p.* expresso ostendit, & in aliis testimoniis claret, quæ propterea ab his Authoribus non nisi truncata, nec cum suo ingenito splendore referuntur; quia statim seipsum interpretatur S. Doctor, ut demonstrare in promptu foret, si id nostræ opellæ brevitatis permitteret: sed tu ipse, Lector, proprio experimento comprobabis. Addunt aliæ



S. Præceptorem, quando in peccato involvit positivum, sumere malum morale fundamentaliter; quia cum ex illo fundamento infallibiliter sequatur privatio, quæ sola est essentialiter malum morale, jure merito fundamentum illud malum esse dicitur. Nec dici potest, hanc S. Thomæ explicationem esse vel voluntariam, vel obtortam, vel violentam. Nam S. Præceptor semper sollicitus fuit distinguere in peccato commissionis id quod se tenet ex parte actus, ab eo quod se tenet ex parte aversionis, quam clarissimè semper voluit esse rationem formalem peccati. Ita apertissimè seipsum explicat S. Doctor 2.2. q. 10. art. 5. ad 1. verbis, quæ merito dixeris spongiam, nisi mavis interpretationem omnium adversarum autoritatum: *Si consideretur, inquit, peccatum secundum rationem mali, illud bonum à quo receditur, est formale objectum peccati; sed ex hac parte peccatum non habet speciem, imò est privatio speciei.* Illud etiam observandum, quod licet sæpè dixerit S. Doctor, actum malum importare aliquid positivum; quod est per se notum, cum omnis actus sit positivus, nunquam tamen, & nusquam S. Præceptor affirmavit malitiam esse quid positivum, de quo sola est quæstio.

Tota etiam rationum adductarum congeries facili negotio dissolvitur. Prima quidem evidenter retorqueri potest in suos authores, qui volunt vitia extrema distingui specie per ordinem ad objecta mala, & rationi dissona: ab illis itaque quæro, num illa objecta dissona sint specie diversa, vel non? Secundum dici non potest, cum habitudines non possint specie distingui, nisi per ordinem ad objectum specie distinctum. Si au-



tem primum dicatur, explicent quæso hi Authores, quomodo objecta, quorum malitia est quid privativum, & non positivum secundum omnes, possint specie distingui, cum utraque sint privata rectitudine objecti virtutis mediæ? v.g. quomodo distinguatur malitia objecti avaritiæ, & objecti prodigalitatis, quod utrumque honestate rectitudinis objecti liberalitatis caret?

Quare huic rationi occurrere possumus dicendo, peccata extremè opposita eidem virtuti mediæ, putà liberalitati, distingui quia important privationes specie non physica, sed morali distinctis. Distingui autem specie hujusmodi privationes, patet, & quia in materia liberalitatis sunt duo modi attingendi medium rationis per recessum à duobus extremis; & quia in materia liberalitatis sunt duo dictamina, unum non excedendi, alterum non deficienti. Unde actus prodigalitatis, & avaritiæ eadem quidem liberalitatis honestate, sed modo essentialiter diverso privantur. Quia nimirum virtus liberalitatis, si non formaliter, saltem virtualiter duplicem includit rectitudinem, & quatenus inducit ad convenientem & prudentem pecuniæ conservationem, quadantenus distinguitur à seipsa ut ad decoram effusionem inclinat; & ideo privationes illæ distinguuntur moraliter, non secus ac maculæ diversorum peccatorum sunt ejusdem speciei physicae, quatenus remonent eundem gratiæ nitorem; sunt tamen distinctæ moraliter speciei, propter distinctos actus voluntarios, à quibus eo ferè modo causantur, quo diversæ umbræ è diversis corporibus lucem impredientibus, & opacantibus indicuntur. Neque hinc inferas, dari etiam plures hominis ejusdem mortis,

quia anima est virtualiter vegetativa, & sensitiva; vel dari plures pariter tenebras, quia lux solis est virtualiter multiplex. Non, inquam, hæc inferre licet, quia non sunt plures moriendi, vel tenebras offundendi modi, sed unus per recessum animæ à corpore, vel corporis illuminati à Sole.

Cæteræ verò rationes sunt paulò efficaciores, & difficiliore, præsertim ea quam urget Curiel in confirmatione adducta, sicut & prima quæ inter positivas recensetur; & ideo eas specialiter speculatione sequenti refellemus. Porro aliæ duæ, prima ex contrarietate, altera ex ratione moralitatis depromptæ, nihilo meliores eâ sunt, quam itatim refutavimus. Illa quidem quæ ex contrarietate elicitur, facile corrui, quia sufficientissimè salvatur oppositio contraria, quæ malum inter & bonum actum intercedit, per hoc quod fundamentum malitiæ contrariè actui bono opponatur. Diligenter etiam observanda est differentia, quæ inter contraria, naturalia & moralia invenitur; illa enim sunt absoluta, ista relativa. Porro absoluta contrarietas exercetur positione, vel remotione alicujus dispositionis, sicut introductio caloris expellit frigus. Unde non oportet quod unum sit capax alterius, sed quod subjectum sit capax utriusque; & ideo unum non importat privationem alicujus perfectionis, quæ sit in alio, quia utriusque contrarietas non dependet ab exteriori. At verò actus bonus, & malus per hoc sunt contrarii, quod opposito modo se habent ad regulas morum, quibus ille se subjicit, iste recedit: quo recessu obliquatur, & fit malus carentiâ debitæ subjectionis; unde malitia formalis non adversatur

sed tantum fundamentalis. Ratio etiam ex moralitate in communi desumpta non urget; quia moralitas in communi non est ratio univoca, sed analogica, importans duas rationes simpliciter diversas; alteram positivam, negativam alteram. Sicut in sententia Cajetani malum non est univocum, sed analogum respectu moralis & transcendentalis.

Quare tota hujus sententiæ medulla in duobus consistit: primo quomodo actus intrinsecè malus non sit talis, independenter à privatione rectitudinis, cum ipse sit essentialiter incapax honestatis, cujus carentia proinde, non privatio, sed mera negatio censenda est. Secundò, quomodo ordo vitalis & positivus, quem dicit actus malus procedens à voluntate moraliter operante circa objectum morale, non sit malus moraliter ante privationem quam præcedit, cum sit in linea morali ante illam nec bona, nec indifferenti. In his duobus continetur summa difficultatis, & ut verum fatear, utraque difficultas summa est, sed Deo dante summa accusatione postea explananda.

### REFLEXIO.

Malitia actus moralis vel positivum in sua essentia ordinem probabiliter involvit, vel necessario supponit; quia nimirum, ut eleganter ait Salvianus lib. 5. de provid. *non in scientia, sed rebellionem peccamus. Scientes enim bona non bene agimus, & discretionem recti ac pravi intelligentes prava sectamur. Legem legimus, & legitima calcamus; & ad hoc tantum præceptorum sacrorum scita cognoscimus, ut gravius post interdicta pecca-*

*mus.* Vah nefandam humani generis temeritatem, mala malis addentem, Deo indicentem bellum, capeffentem arma, & fanctiffimæ ejus voluntati jugiter repugnantem! Hic nunc interrogo, non Catholicos vel Chriftianos, fed omnes qui fanæ mentis funt, quis unquam credidiffet in hanc ufque Dei contumeliam humanæ cupiditatis & impudentiæ progrefsuram efle audaciam, ut in eum armet fe infirmitas, cujus poteflatti nihil refiftit? O facinus inæftimabile & prodigiofum, fed nihilo minùs ftupidum, & infanum! Et illud perpetras, Lector, quotiefcumque perversè agens, malum profequeris, & in Deum tuum intolerabili molimine infurgis.

Positivus ille ordo, quo ftercora iniquitatis amplexaris, clamor eft ingens fimilis illi Gommorrhæorum, & Sodomorum divinis auribus obftrepenti, & ultionem divinam extorquenti, immanitate fcelerum, turpitudine criminum, obfcœnitate libidinum. *Pulchrè*, inquit idem Salvianus lib. 1. citato, *clamorem dixeris in fe habere peccata. Grandis abfque dubio peccantium clamor eft, qui à terra afcendit ad cœlum. Et verè clamor, & grandis clamor eft, quando pietas Dei peccatorum clamoribus vincitur, ut peccantes punire cogatur.* Illam, illam positivam, & fœtentem peccati profequutionem, utendis frui aventem, felicitatem in his nugis nugarum quæritantem jufto judicio invitus quidem, fed graviffimè Deus plectit. Illam internæ, occultæque pœnæ comitantur, angores fcilicet, pœnitudines, metus, & confcientiarum mille morfus, mille remorfus, quos improbi effugiunt nunquam. Illi ipfi qui in bonis videntur ducere dies fuos, qui coronant fe rofis antequam marcefcant, & omne

pratum, ut loquitur Scriptura, pertranseunt luxuriâ suâ; illi, inquam, nisi fortè in profundum venerint, animum sibi sentiunt lancinari; & quandiu aliquod sanitatis intervallum habent, quandiu prorsus duri non sunt, obdurati, & occallentes, quâdiu non sunt ad omne flagitii nefas projecti, tantiu acria quædam flagella, & veluti repetitos intestini ulceris ictus experiuntur, sive in patiendo scelere, sive magis post patratum. Verè enim olim Plato: *Subsequa injuria pœna.* Fortius Hesiodus: *Contanea & aequalis est culpa multa.* Sed divinè Augustinus: *Jussisti Domine, & ita est, ut omnis inordinatus animus pœna sit sibi.* Cognatum planè, imò & innatum omni sceleris supplicium sceleris, & illicitæ turpium prosecutioni aspersa est amaritudo. Non ea sola punitio censenda est, quæ in oculos incurrit, & externis sese ingerit obtutibus. Graviores sunt quæ intus latent, quàm quæ foris patent. Nam sicut cruciarii quondam Romano ritu crucem gestabant suam, ab ea mox ferendi: sic perverso & positivo voluptatum amorì positivam imponit Deus conscientia crucem, lentis quidem & minutis, sed quotidianis pungentem ictibus, quibus laniatus animus etiam in aurato corpore cœditur & laceratur. Sed quid justius, quàm ut ille semper angatur, semper metuat impressum immissi supplicii terrorem, semper interna impendentis, & onerantis torturæ imagine supra equuleos, fidiculas, uncas acerbiorè positivè prematur, qui positivo in Deum impetu insilire non dubitavit?

Sed quia de te, Lector, confidimus meliora & viciniore salutis, aliud emolumentum spiritale ex positiva peccati tendentia reporta. Si pecca-



tum vel consistit, vel fundatur in positivo, quo voluntas fertur in objectum dissonum: Ergo omni custodia serva cor tuum; ab exteriorum & sæcularium cura negotiorum quantum poteris abstine, quia vix ac ne vix quidem creata quisquam prosequitur, quin sordes contrahat peccatorum; nam qui tetigerit picem, inquinabitur ab ea. Tantum à Deo & cœlestibus avertêris, quantum ad creata convertêris; quia dum anima in exteriora effunditur, tot modis inquinatur, quot sensibus per externa divagatur. Nam ut dicitur Jerem. 9. *Ascendit mors per fenestras nostras*, quia dum foras per sensus in mala egredimur, mors intus ingreditur. Unde Hugo Victor. *serm. 35.* ait quod sicut erant quinque porticus piscinæ, in quibus jacebat multitudo magna languentium, sic unusquisque sensus tot servat languentes. *quot appetituum patitur corruptiões.* Et S. Basilii *lib. de sanct. Virgin.* notat animam per quinque sensus assimilari torrenti, quod emittens fluentum suum, quidquid corruptum occurrerit, ad se pertrahit, limoque implet. Ergo si non vis positivis peccatorum sordibus infici, contine corporis sensus, quibus in externa dilabatur animus. Ne incautè aspicias, audias, & tractes, quod postmodum invitus amabis; quia intueri non decet, quod non licet concupisci. Time ne oculus tuus depreddetur animam tuam, & si in faciem virginis intenderis, ne te scandalizet vultus ejus. *Non potest*, inquit Hieronymus *lib. 2. cont. Joynian. cap. 7.* antè *Jeropolis & arx mentis capi, nisi per portas ejus irruerit hostilis exercitus.*



## SPECVLATIO II.

*Formale malitia actus moralis, seu peccati essentialiter in privatione debite rectitudinis consistit.*

**H**Oc assertum, cui subscribunt Capreolus, Ferrariensis, Araujo, aliique innumeri, tam domestici, quàm extranei, perpetua & constans S. Thomæ doctrina clarissimis verbis tradit. Quid enim apertius his testimoniis inter mille aperta apertissimis? 1. 2. q. 18. art. 1. *Actus est malus moraliter, in quantum ei deficit aliquid de plenitudine essendi.* Et q. 71. art. 6. *Peccatum nihil est aliud quàm actus humanus malus; & quod sit humanus, habet ex hoc quod sit voluntarius; quod verò sit malus, ex hoc quod caret debita commensuratione.* Et subdit quod carentia illa commensurationis est quasi formale in peccato. Et q. 88. art. 4. *Est quoddam bonum, quod est ipse actus ordinatus, & huius privatio est essentialiter ipsius peccatum.* Idem inculcat 2. 2. q. 10. art. 3. *Omne peccatum formaliter consistit in aversione à Deo.* Et q. 118. art. 5. ubi docet quod privatio boni formaliter se habet in peccato, conversio autem ad bonum commutabile materialiter. Quod & repetit 3. p. q. 86. art. 4. ad 1. *Culpa mortalis utrumque habet, aversionem à Deo, & conversionem ad bonum creatum: sed aversio à Deo est sicut formale, conversio autem ibi est sicut materiale: remoto autem formali cujuscumque rei, tollitur species, sicut remoto rationali tollitur species hu-*

mana; & ideo ex hoc ipso dicitur culpa mortalis remitti, quod per gratiam tollitur mentis aversio à Deo simul cum reatu pœna æterna. Quæ testimonia sunt adeo evidentiæ, ut nulla ponderatione egeant.

Illud tamen statim se menti offert, quod in testimoniis pro nostra sententia adductis Angelicus Magister expressis, conceptis, & explicatissimis verbis loquitur; in illis verò quæ pro opposita sententia referuntur, per consequentiã non sponte fluentem, sed vi & veluti invitè deductam trahitur. Libenter etiam hic Adversarios interrogare averem, utrum S. Doctor potuerit clariùs nostram sententiam significare? Respondeant, fodes, sed apertè, sed ingenuè, sed candidè, & ut sic loquar, nudè & citra effugia & subtilitates conquiritas. Esto quod D. Thomas nostram sententiam non tenuerit, dicant tamen, amabò, si illam tenuisset, potuissetne tam accuratus Doctor, cui utique idonea ad se explicandum verba non deerant; potuissetne, inquam, nostram sententiam significantiùs exprimere? Quæritur utrum actus malus, seu peccatum consistat formaliter in privativo? Quid ad hoc Adversarii! Quid ad hoc S. Præceptor? Illi contendunt positivum esse formale & essenziale, privationem se habere consequutivè. D. verò Thomas ait positivum se habere *sicut materiale, privationem sicut formale, & privationem esse essentialiter peccatum*. Certè velint nolint, fateri coguntur Adversarii, D. Thomam ea in favorem nostræ sententiæ scripsisse verba, non semel, sed sæpe, sed semper, sed ex professo, quibus expressiora nullus Author nostræ sententiæ hætenus excogitavit, vel excogitare unquam potuit. Postquam

D. Thomas dixit, *formale peccati, essentialiter peccati commissionis* consistere in privativo, qui dixerit eum non stare à nobis, poterit etiam dicere me opinari peccatum consistere in positivo, quantumvis reclamem; nam clariora verba ad exprimendum sensum meum invenire non potui iis quæ D. Thomas usurpat. Quod si dicas, nos in voce Sancto Doctore congruere, in sensu verò, in ipsa re, in vi nominis ab ipso dissidere, & discordes esse. Hæc, inquam, si dicis, manifestè veritati contradicis. Nam S. Doctor ly *formale*, ly *essentialiter*, eodem planè sensu accepit, quo cæteri omnes Theologi, & Philosophi accipiunt. Vocabulorum, quibus sententia exprimitur, vulgarem sensum in alienum, & tritas notiones in insolitas & peregrinas non commutavit Doctor communis, antiquitatis amans, novitatis impatiens. Hoccine simplex, hoccine sincerum est, dicere S. Thomam in his verbis *formale*, & *essentialiter peccati*, tam crebrò iteratis, singularem & inauditum sensum reposuisse distinctum ab eo quem Thomistæ, Scotistæ; Neutristæ, ad extremum omnes Philosophi & Theologi quotquot scripserunt hæctenus semper habuere? Sic D. Thomam interpretari ludere est, & tanto Doctore illudere. Ergo vocum nostrarum, & S. Thomæ indivulsa societas, vel invitis omnibus sensuum quoque conjunctionem notat.

Multa congerunt Adversarii, quibus tam expressa testimonia elevent, tam perspicua & illustria obscurant. Alii enim volunt S. Thomam non loqui in sensu formali, sed tantum illativo; quia infallibiliter illud malum est, cui est adjuncta privatio. Vel S. Præceptorem intelligere per carentiam & privationem, carentiam & pri-

vationem causalem, non formalem; privationem in fieri, quæ est positiva tendentia ad obiectum dissonum, non privationem in facto esse; & aversionem accipere non purè privativam, quæ consistit in recessu, separatione, & carentia conjunctionis cum Deo; sed positivam, contrariam, & in Deum rebellem. Denique contendunt S. Thomam vel loqui de peccato omissionis, non commissionis; de habituali, non actuali; de formali, non primario, sed secundario, & completivo. Sed quis non videt has responsiones esse mera effugia, quæ sola verborum in fonte legendorum vi per se corruunt & evanescent? Nec enim nostra brevitatis patitur tam prolixum D. Thomæ testimoniorum contextum huc adducere. Quod verò S. Thomas non accipiat aversionem contrariè, sed merè privativè, hinc manifestè colligitur, quod *q. 71. art. 6.* explicans illam definitionem peccati ab Augustino traditam, *Dictum, vel factum, vel concupitum contra legem æternam*, qua contrarietas aliqua expressè significari videtur; tamen D. Thomas ait quod per *ly dictum, factum, vel concupitum*, significatur actus humanus, qui in peccato commissionis se habet per *sicut materiale*, per *ly autem contra legem*, significatur carentia debitæ commensurationis, quæ se habet *ut formale*. Quomodo alibi per privationem potuit intelligere aversionem contrariam D. Thomas, qui eò loci ubi contrarietas positiva indicari videbatur, illam de privatione pura interpretatus est?

Sed ut omnis evasionis aditus præcludatur, placet referre decretoria S. Thomæ verba, quæ habet *op. sculo 2.* seu in compendio Theologiæ, quibus omnes ab adversariis excogitatas

solutiones prævidit, & omnes excogitabiles occupavit, & totam controversiam definivit. Postquam enim c. 114. probavit quod nomine mali nihil aliud intelligitur, quàm privatio esse perfecti, & quod manifestum est, quod ex hoc aliquid dicitur malum, quod caret perfectione quam debet habere: postquam cap. 115. demonstravit impossibile esse quod malum sit aliqua natura, vel actus, vel potentia, vel compositum ex actu & potentia; cap. 116. descendit ad malum morale, & proponit sibi argumentum, quod est unum è fundamentis oppositæ sententiæ, his verbis: *Considerandum igitur restat, quomodo bonum & malum dicuntur contraria, & contrariorum genera, & differentia aliquas species, scilicet habitus morales constituentes. Contrariorum enim est aliqua natura; non ens enim non potest esse, neque genus, neque differentia, cum genus predicetur de re in eo quod quid; differentia verò in eo quod quale quid.* Ecce geminum adversæ sententiæ fundamentum ex eo petitum, quod cum inter actum bonum & malum contrarietas exerceatur, & actus morales mali differant specie inter se, necesse est actum malum per aliquid positivum constitui. Sed quid ad hæc S. Doctor? sciendum est igitur, inquit, quod sicut naturalia consequuntur speciem à forma, ita moralia à fine, qui est voluntatis objectum, à quo omnia moralia dependent. Sicut autem in naturalibus uni forms adjungitur privatio alterius, puta forma ignis privatio forma aëris; ita in moralibus uni fini adjungitur privatio finis alterius. Cum igitur privatio perfectionis debita sit malum, in naturalibus formam accipere, cui adjungitur privatio forma debita, malum est, non propter formam, sed propter privationem ei adjunctam; sicut igniri malum est

est ligno. Et in moralibus etiam inherere fini, cui  
 adiungitur privatio finis debiti, malum est, non  
 propter finem, sed propter privationem adjunctam;  
 & sic due actiones morales, quæ ad contrarios fines  
 ordinantur, secundum bonum & malum differunt;  
 & per consequens contrarii habitus differunt bono &  
 malo, quasi differentiis existentibus, & contrarie-  
 tatem adinvicem habentibus, non propter privatio-  
 nem ex qua dicitur malum, sed propter finem cui  
 privatio adiungitur. Ecce manifestam adver-  
 sententiæ jugulationem, & convincentem no-  
 stræ assertionis decisionem. Ibi enim S. Doctor  
 loquitur de peccato commissionis, non omission-  
 is, vel habituali, cum sermonem habeat de dua-  
 bus actionibus moralibus, quæ ad contrarios fi-  
 nes ordinantur, ex quibus produciuntur per con-  
 sequens contrarii habitus. Non loquitur etiam  
 de privatione in fieri & causali, sed de privatio-  
 ne in facto esse, quæ est adjuncta actioni inhæ-  
 renti malo fini. Et tamen affirmat actionem il-  
 lam non esse malam per hoc quod inheret &  
 tendit ad finem malum, sed quia illi actui adju-  
 ngitur privatio; & in hoc convenire malum mo-  
 rale cum malo naturali, quod utrumque for-  
 maliter importat privationem, illud formæ de-  
 bitæ, istud finis debiti. Ergo ex D. Thoma ma-  
 lum morale consistit in privativo. Quam quidem  
 sententiam S. Doctor non è proprio ingenio pe-  
 perit, sed ex Scripturis, & continenti Patrum  
 traditione, potissimum verò ex Augustino Magi-  
 stro suo proxima reflexione referendis derivavit.

Probatur rationibus, quas ne contra nostrum  
 institutum nimis multiplicemus, sed tantum  
 veritatem è fundamentis eruiamus, ad tres redu-  
 cemus. P. imò ratione à priori, deinde ratione



à poster ori, tertiò positiva impugnatione adversæ sententiæ hanc speculationem confirmabimus.

Ratio à priori sæpe traditur à S. Thoma. Malum ut sic, prout abstrahit ab omni particulari malo, est privatio, & non ens, ut probat ex professo S. Doctor 1. p. q. 48. art. 1. ex D. Dionys. c. 4. *de divinis nominibus*, ubi S. Pater ait : *Malum, quemadmodum sæpe diximus, infirmitas, imbecillitas, ac privatio est. Malum est non existens.* Et ratio est, quia omne ens in quantum ens, bonum est, cum entitas & bonitas convertantur. Unde malum quod opponitur bono, non potest esse ens, sed privatio entis. Ergo similiter malum morale in aliqua privatione, nimirum rectitudinis debitæ, positum est. Probatur consequentia : tum quia malum morale est directè inferiorius ad malum transcendente, sicut bonum morale ad bonum transcendente : Ergo si malum transcendente in privatione sit situm, ita etiam & morale. Tum quia inductivè in omnibus aliis generibus malum est privatio alicujus perfectionis, malum v. g. naturale est privatio perfectionis naturalis ; & nulla forma haberet rationem mali etiam respectivi, nisi illi adjungeretur privatio alterius formæ debitæ subiecto, ut dicebat D. Thomas opusculo ultimum adducto. Malum item artificiale est privatio conformitatis ad regulas artis : & licet tam in malo naturali, quàm artificiali detur aliquod positivum fundans talem privationem ; tamen nec malum naturale in operatione vel forma naturali, nec malum artificiale in positiva tendentia artificis operantis, sed in privatione formæ aut operationis naturalis, vel in privatione

conformitatis ad regulas artis respectivè consistunt. Quidni ergo similiter dicemus, malum morale consistere in privatione rectitudinis? Nam mala præfata non possunt consistere in privativo, nisi quia hæc est natura mali ut sic importare essentialiter privationem. Certè cum peccatum sit malorum omnium maximum, imò ferè solum malum, malorum summum & summa, profectò minus debet habere de bono, quàm malum physicum: Atqui si malum physicum, seu naturale, sicut & artificiale consistant in pura privatione, morale verò in positivo, malum naturale non habebit minùs de bono, sed è contra morale habebit magis de bono; siquidem essentialiter importabit aliquid positivum, quod ut tale bonum est, & à Deo amabile, & in ipsum referibile, non obstante contrarietate ad virtutem, sicut amatur malum pœnæ non obstante contrarietate ad naturam: Ergo si malum naturale & artificiale consistant in privativo, multò magis malum morale.

Tum denique, quia privatio debitæ rectitudinis est aliqua malitia moralis, sicut privatio bonitatis physicæ est malitia physica, privatio visus est malum cæcitatis, privatio vitæ est malum mortis: unde etiam in peccato originali, in macula peccati, in peccato omissionis invenitur ratio mali moralis, quia important privationem gratiæ & rectitudinis Christianæ, & morâlis: Ergo quidquid positivi invenitur in peccato commissionis, nequit habere rationem formalem mali moralis, aliàs duo essent formalis malitiæ constitutiva, quod est planè impossibile. Maximè quia ratio formalis peccati mortalis etiam commissionis, non sumitur formaliter ex

conversione, sed ex aversione; dicitur enim tale, quia per illud recedimus à Deo, qui est animæ anima, & sic perit vita spiritalis; tantoque culpa gravior est, quanto magis recedit à Deo, à quo qui minùs recedit ininùs peccat, tametsi tendentia & conversio ad objectum pravam sit intensior & vehementior: sic difformitas infidelitatis, desperationis, odii Dei deterior longè est ardentissimo libidinis æstu. Qua de causa S. Thomas 2.2. q. 20. art. 1. ait, *peccata qua opponuntur virtutibus Theologicis, principaliter consistere in aversione.* Nec placet subtilis evasio authoris ubique subtilitatem, ubique soliditatem spirantis Joannis à S. Thoma, dicentis eò loci insinuari à S. Doctore, reliqua peccata his virtutibus non opposita non consistere in privativo. Non placet, inquam (si quid tamen displicere potest in Doctore omnibus Theologiæ gratiis instructo) quia de vitiis oppositis virtutibus theologicis, putà de odio Dei, est potissima difficultas. Si ergo de illis affirmet S. Præceptor, quod principaliter in aversione & privatione consistunt, quàm potiori jure id de aliis omnibus affirmandum est?

Ratio à posteriori nostræ sententiæ talis est: Si malitia moralis esset aliquid positivum, Deus esset causa peccati formaliter æquè ac virtutis; Deus enim debet esse causa omnis positivi, aliàs non esset omnium prima, & universalissima causa, quæ exigit ut omne reale positivum sub omni reali formalitate & positiva sit ab eo qui est fons totius esse. Unde si formale peccati, & malitia moralis sint essentialiter aliquid positivum, Deus per æquè erit author & causa realis boni ac mali, per æquè in utrumque influet, per æquè in Deum ultimò utrumque referri poterit, per-

æquè erit participatio divinæ bonitatis & entitatis, peræquè erit à Deo amabile & amatum, peræquè habebit ideam in Deo, in quo rerum omnium positivarum exemplaria relucet. Consequens autem non solum repugnat lumini rationis, quia ut Augustinus ait: *Nemo Deo auctore sit deterior*; sed etiam expressè damnatur in Tridentino sess. 6. can. 6. his verbis: *Si quis dixerit mala opera ita ut bona Deum operari, non permissivè solum, sed etiam propriè & per se, adeo ut sit proprium ejus opus non minus proditio Iudæ quàm vocatio Pauli, anathema sit.*

Urgetur hæc ratio ex Araujo, & præveniuntur omnes Adversariorum evasiones. Saltem positivæ malitiæ assertores non possunt inficiari Deum producere formale peccati sub ratione entitatis, si formale illud entitas sit. Cùm ergo dicunt Deum producere formale peccati sub ratione entis, vel particula *sub*, reduplicat rationem qua producitur, ita ut sit sensus, Deum producere duntaxat rationem communem entis; & hoc est apertè falsum, tum quia aliàs gradus specificus Dei causalitatem subterfugeret, tum quia gradus communis & gradus specificus realiter identificantur, & produciens unum alium producit: vel est sensus, quod reduplicat rationem *sub qua* res producitur, ita ut Deus attingat omnia positiva, in quibus imbibitur ratio entis, sed sub ratione entis ea producat. Sed adhuc insisto, quia jam gradus specificus peccati verè causabitur à Deo, licet sub universaliori ratione. Sicut licet Deus non attingat rationem vitalitatis sub ratione vitalitatis, si ly *sub*, dicat rationem sub qua, quocirca Deus non potest denominari volens, videns, audiens, quantumvis volitionem, visio-

nem, & auditionem producat; tamen attingit Deus rationem *quæ* est in vitalitate, licet sub ratione entis eam producat, quia talis vitalitas est aliqua ratio entis: Ergo similiter licet Deus non possit attingere malum sub ratione malitiæ, si ly *sub*, importet rationem sub qua, sicut etiam sub ea ratione non attingit meritum; unde sicut non potest denominari peccans, ita nec merens: bene tamen erit causa malitiæ, non secus ac meriti, si causet omnem realem rationem formalem, quæ in malitia invenitur. Quorum omnium radix est, quia ratio superior imbibita in inferiori est eadem cum illa: ratio entis, v.g. inclusa in homine homo est, quia ens non præscinditur perfectè ab inferioribus; & similiter ratio entis inclusa in malitia, si sit positiva, est ipsamet malitia: Ergo quod est causa entitatis est etiam causa iniquitatis, si malitiæ iniquitas sit de formali aliquid positivum.

Penetratur profundius vis hujus rationis. Deus erit vera & formalis causa peccati, si attingat in peccato nedum rationem entitatis, sed etiam rationem deformitatis; hæc enim distinctio est ultimum adversæ sententiæ perfugium. Atqui si formale peccati sit aliquid positivum, Deus attinget in peccato rationem deformitatis; cum enim deformitas non solum sub conceptu entitatis, sed etiam sub conceptu & ratione deformitatis sit aliquid positivum, non potest Deus attingere entitatem peccati, quin attingat deformitatem: divinus namque concursus cum sit universalissimus, profundens totum ens & differentias ejus, totam rei entitatem, omnesque ejus modos pervadit, non secundum nostram phantasiam & considerationem, sed prout est à parte



rei; nec est præcisivus, sed omnium productivus. Ergo si formale peccati consistat in positivo, Deus erit causa & author, sin particularis & specialis, certè universalis peccati; quomodo enim poterit concursus divinus intactam malitiam relinquere, & ab ea præscindere, à qua nec intellectus præscindere valet, si malitia sit essentialiter aliquid positivum? Nam essentia nec quidem ratione separari potest à re quam constituit, cum sit formalissimè ipsa.

Nec valet quod quidam aiunt, quod sicut in divinis productio ad intra terminatur ad personalitatem Filii, non tamen ad naturam divinam cum illa identificatam, quia natura sub ratione naturæ est extra sphæram actionis interioris Dei: ita conceptus deformitatis identificatus cum ratione entitatis non attingitur à concursu Dei, quia est extra sphæram actionis Dei ad extra. Non valet, inquam: tum quia comparare entitatem peccati arcano totius Religionis reconditissimo, & difficultatem concursus divini explicare similitudine mysterii rationis vim transcendentis, non est eam mollire, sed insuperabiliorem & intricatiorem efficere. Tum quia si comparatio subsistat, sicut verum est dicere quod aliquid reale in Deo non producit, scilicet natura, tametsi identificetur cum aliquo reali quod producit: ita in peccato erit aliquid reale quod fugiet divinam causalitatem, nimirum ratio specifica peccati, quod nemo concedit. Tamen quia licèt natura in Deo non producat, productâ personâ, tamen impossibile est quod producatur personalitas, nisi producatur substantia; quia una est de conceptu & importatur in definitione formali alterius:



quod non est verum de natura respectu personæ & relationis, quam formaliter non includit. Atqui si malitia moralis consistat formaliter & essentialiter in positivo, aliquid positivum erit de conceptu, & importabitur in definitione malitiæ moralis, positivus nimirum ordo, & tendentia ad objectum dissonum: Ergo Deus erit causa deformitatis per actionem transeuntem extra se, quanvis non sit principium naturæ divinæ intra se, si deformitas peccati consistat formaliter in positivo.

Dices, hac quidem ratione vehementer stringi, & ferè opprimendam fore oppositam sententiam, nisi idem in nos telum retorqueri posset; & tamen idem argumentum æquè militat adversum nos. Etenim quod est causa fundamenti reduplicativè ut fundamentum est, causa etiam est privationis ex illo consequutæ; quia privatio non per se primò, & directè causari quit, sed secundariò resultat ad positionem fundamenti. Atqui Deus est causa fundamenti quæ talis, cum sit aliquid positivum, non consistens in mera negatione, vel privatione. Ergo Deus erit causa peccati.

Respondeo disparitatem esse toto cælo diversam, & argumentum factum nullam adversum nos habere vim. Quia nimirum entitas, & materiale peccati, licet sit quid reale & positivum, non tamen est à Deo, in quantum est fundamentum privationis; quia esse fundamentum privationis rectitudinis dicit duo, unum in recto, aliud in obliquo, seu de connotato: in recto dicit entitatem, quæ est à Deo & à creatura; in obliquo, & de connotato importat causam deficientem, à qua egreditur, nimirum voluntatem averten-

tem se à regula rationis & legis, sub qua ratione non dependet à Deo, sed ipsa est causa prima in ratione deficiendi. Unde fundamentum quò tale non est à Deo.

Quod si urgeas: Fundamentum quò fundamentum est aliquid positivum: Ergo est à Deo, qui est causa omnis positivi. Facile ex his respondebo, fundamentum quò fundamentum est quid positivum secundum id quod dicit in recto, concedo; secundum quod importat in obliquo, nego: nam connotat voluntatem deficientem, voluntas verò non constituitur deficiens per aliquid positivum, sed per carentiam regulae rationis, & directionis legis, ut apertè tradit S. Thomas q. 75. art. 1. *Provenit defectus ordinis in actu ex defectu directionis in voluntate. Voluntas sine adhibitione regulae rationis vel legis divinae est causa peccati.* Nec datur propterea processus in infinitum, quia quod voluntas agendo non attendat ad legem & regulam dirigentis rationis, non est alia causa, nisi quia ipsa ita vult, & in genere deficiendi ipsa est primum principium ab alio independens.

Hanc totam doctrinam expressis verbis tradit S. Doctor q. 79. art. 2. dicens: *Peccatum nominatur & actionem cum quodam defectu; defectus autem ille est ex causa creata, scilicet libero arbitrio, in quantum deficit ab ordine primi agentis, scilicet Dei. Unde iste defectus non reducitur in Deum sicut in causam, sed in liberum arbitrium: sicut effectus claudicationis reducitur in tibiam curvam sicut in causam, non tamen in virtutem motivam, à qua tamen causatur quidquid est motionis in claudicatione: & secundum hoc Deus est causa actus peccati, non tamen est causa peccati: quia non est*

*causa hujus, quod actus sit cum defectu.* Quibus verbis non solum aperte docet nostram sententiam, dicens peccatum esse actum cum defectu, sive privatione; sed etiam mirè explicat quomodo actus ille non sit fundamentum malitiæ prout est à Deo, sed tantum prout est à libero arbitrio: quia nimirum sicut motio prout est ab anima, non est fundamentum claudicationis, sed tantum prout est à tibia curva, quia esse fundamentum claudicationis supponit curvitatem, seu defectum rectitudinis in principio: ita esse fundamentum malitiæ non convenit entitati actus prout est à Deo, sed prout est à voluntate subducente se à regulis honestatis. Unde esse fundamentum malæ operationis duo importat, alterum in recto, & hoc fatemur esse à Deo; & alterum in obliquo, & hoc non est à Deo, qui ut ait Doctor Sanctus, *non est causa hujus, quod actus sit cum defectu.* Quod sanè in opposita sententia non salvatur, quia esse malum morale essentialiter purum positivum importat, quod proinde omni prorsus modo à Deo esse necesse est.

*Confutantur positivè objectiones.*

Denique probatur hæc speculatio convellendo duo præcipua fundamenta oppositæ sententiæ, quæ præcedenti speculatione retulimus, in hancque rejecimus, omnibus aliis dissolutis. Primum, quo movetur Curiel, in eo innititur, quod actus intrinsecè malus, putà mendacium, vel odium Dei, non est capax rectitudinis, cum nulla unquam ratione vel circumstantiâ honestari possit: Ergo non habet privationem, quæ est

caréntia formæ in subiecto apto, proindeque in ratione mali moralis per privationem constitui nequit, cum actus malus semel egressus non sit capax reformationis, sicut artefactum distortum instaurari, & debitæ formæ reddi potest, adhibitis regulis artis.

Verum hæc ratio manifestæ insufficiéntiæ convincitur. Constat enim nullum esse actum quantumcunque pravum, cui non sit debita rectitudo, nec actum posse dici malum moraliter, qui non sit privatus rectitudinæ morali, sicut actus bruci non est malus moraliter, quia nullius rectitudinis est capax. Quia nimirum actus quantumcunque intrinsicè malus, consideratus ut actus humanus ac liber, est regulabilis per rationem, ut distinguatur ab actibus partis vegetativæ & sensitivæ, qui sunt incapaces legis, & punitionis. Et certè repugnat actui egredienti à voluntate libera non posse mensurari per rationem: Sed actus qui petit mensurari per rationem, est capax rectitudinis, & illam ut sibi debitam exigit, aliàs non deberet dici actus deficiens, irregularis, & obliquus: Ergo actus quivis liber & deliberatus est capax rectitudinis. Quorum omnium radix est, quia omnis actus quàmlibet malus, & à Deo recedens, habet pro motivo aliquod bonum, saltem apparens, & fugam alicujus mali, putà fugam alicujus afflictionis. Unde ille actus habet ex parte motivi aliquid mensurabile per rationem: quod apertè insinuat D. Thomas q. 18. art. 1. dum ait, actum esse malum in quantum ei deficit aliquid de plenitudine essendi, innuens omni actui morali talem deberi plenitudinem, non solum ratione subiecti, scilicet voluntatis, quæ est capax honestatis; sed etiam

ratione ipsius considerati ex parte motivi.

Pro profundior, & simul clariori difficultatis hujus intelligentia accipiamus actum inter omnia peccata commissionis pessimum, minusve honestatis capax, scilicet odium Dei. Sed prius supponendam est, adequatam voluntatis objectum esse bonum, ita ut non possit prosequi aliquid sub ratione mali; unde quidquid velit, & quacumque ratione velit, bonum aliquod latenter vult, & ab hac voluntate nunquam recedit, nec potest. Quia cum voluntas sit appetitus rationalis, & inclinatio totius suppositi, necesse est ut in bonum sibi conveniens semper tendat, aliàs non esset inclinatio voluntaria; quia inclinari, & ultro ferri nemo potest, nisi in sibi conveniens bonum, & ad disconveniens nullus inclinatur, nullus propendet, sed fugit omnis & abhorret. Quæ doctrina etiam locum habet in actu odii, etiam inimicitie, quæ vult malum etiam ut malum est hostis, sicut amor amicitie vult bonum amico; ut illi bonum est. Tunc enim inimicus malum hosti peroptat in ratione effectus, non in ratione objecti, quia vult quidem aliquid quod inferat damnum & destruat adversarium; sed illud sub ratione boni cupit, quatenus hosti illarum nocumentum induit rationem boni apparentis, exterminii scilicet hostis sibi contrarii. Nec obest quod interdum aliquis peccet ex certa malitia, & non tantum ex passione succumbente delectationi, vel ex infirmitate præ labore & tristitia sæpe prostrata; quia tunc peccatores etiam amantes malum ut est offensio Dei, dicentes Deo, *Recede à nobis, scientiam viarum tuarum nolumus*, prodeunte quasi ex adipe iniquitate; tunc, inquam, perversa voluntas delectatur in illis.



peſſimis ex perverso judicio, quo practice hic & nunc judicat conveniens eſſe ſibi ſic averti à Deo, ab ejus regula ſubduci, & erecto collo, elato corde, ac diabolicâ audaciâ in Deum impudentiſſimè, & juxta inaniffimè arma ſumere. Unde malum illud reapſe veſtitur aliqua ratione boni, ſaltem ſatiſfacientis propriæ perversitatis; & cùm averſio à Deo placeat tam malignæ voluntati, utique ſub aliquo boni colore placet, aliàs non placeret, ſed diſpliceret. Et in veritate ita contingit peccatori in profundum venienti, in Deum de induſtria recalcitranti; quia Deus, qui ut ait Bernardus, *pœna perverſorum eſt*, apparet peccatori oneroſus, & moleſtus, cujus proinde jugum excutere, legem extinguere, & legiſlatorem ipſum exterminare vellet, ſi poſſet, & optat poſſe. Et ſanè ſi illis Deus bonus appareret (ſicut revera totius eſt centrum bonitatis) impoſſibile foret quod illum odio haberent. Quare ſceleſti illi Deum non odio habent ratione ſui, ſed ratione effectuum diſplicantium, ob quos Deum conſiderant ut illatorem mali, non ut fontem boni.

Ex hac fundatiſſima doctrina omninò ſequitur, quod actus peccati commiſſionis, ipſius etiam odii inimicitia Dei, peccatorum omnium nefandiſſimi cumuli eſt aliquis amor, ſubindeque tendentia ad aliquod bonum, ſaltem beatitudinem, quam in omni actu inquirimus. Quæ amor beatitudinis per ſe bonus malus efficitur, quando recedit à regula præſcribente modum quærendi illam. Ille ergo Dei hoſtis non peccat quærendo beatitudinem, ſed eam appetendo, non ſervata regula præſcripta; unde dicebat Auguſtinus aliàs relatus: *Quarite quod, quaritis*



*sed ibi non est ubi quaritis. Quaritis vitam in regione umbrae moris, non est hic.* Hinc actus odii abhorrentis à Deo ut iudice prohibente delicias, altore criminum, dicitur privatus rectitudine, quia amor beatitudinis in illo imbibitus est de se per rationem regulabilis, sicut motus tibiae curvae dicitur privatus rectitudine, quia motus animae est de se capax rectitudinis, quavis per accidens incurvetur, & inflectatur per tibiam claudicantem.

Dices: Tendentia ad objectum pravum est essentialis actui malo: Ergo in illo non est aptitudo ad rectitudinem: ergo rectitudo non est illi debita, nec ejus subinde carentia habet rationem privationis.

Respondeo, tendentiam in objectum pravum esse essentialem actui reduplicativè ut versanti modo obliquo circa objectum dissonum, quam ut sic exuere non potest; tamen ille actus consideratus specificativè ut humanus est, praebet rationi materiam regulandam, cum procedat à principio operante ex amore boni, sub lege, & cum deliberatione rationis. Sicut motui obliquo tibiae ut vitali debita est rectitudo, licet in sensu composito, & in actu exercito ut procedenti à tibia clauda non possit rectitudo convenire. Sic etiam syllogismus imperfectus privatur perfectione debita syllogismo, quamvis reduplicativè ut imperfectus talem perfectionem habere nequeat. Denique in omnibus ferè speciebus, & physicis, & artificialibus, & moralibus id verum esse probatur: in illis enim inveniuntur opera, quae etiam in individuo considerata sunt capacia rectitudinis ratione ma-

terix regulabilis, licet de facto non possint reformari, nisi destruantur.

Instabis: Actus intrinsecè malus talis est antequam prohibitionem legis; odium enim Dei, tametsi nulla lege vetaretur, semper foret malum: Ergo privatio legis, & regulæ, & honestatis ex conformitate ad illam non constituit malum morale, & peccatum commissionis.

Respondeo patere ex dictis capite præcedenti solutionem hujus instantiæ; monstravimus enim ibidem, omnem actum malum esse recessum à lege æterna: unde si per impossibile non daretur illud dictamen æternæ legis in Deo, odium Dei non esset peccatum, quia sublato illo judicio & dictamine, non esset Deus, cui dictamen illud non liberè, sed necessariò inest: aliàs veritas in ipso non esset, & seipsum Deus negaret: Quid autem mirum, si destructo Deo non remaneret peccatum: Sed relege dicta capite superiori, *specul. 3.*

Secunda ratio adversæ sententiæ, cujus vim speculatione præcedenti non dissimulavimus, sed cum omnibus suis nervis proposuimus, petita ex eo, quod tendentia positiva ad objectum malum sit mala moraliter, & prior privatione, sic etiam refellitur: Actus non constituitur malus per aliquid positivum ante privationem, si ante illam non caret perfectione sibi debita, nec plenitudine essendi; si enim habet totam perfectionem cujus est in suo genere capax, perfectò malus esse, nec dici potest; illud enim censetur bonum & perfectum in quocumque genere, cui nihil deest perfectionis sibi debite: unde actus qui non caret perfectione moraliter debita, non potest esse formaliter malus. Atqui ante priva-

tionem actus non caret perfectione ulla sibi debita, nec plenitudine essendi; quia si caret perfectione debita, jam est privatio: Ergo non per ordinem tendentiæ positivæ, sed per privationem rectitudinis malum morale formaliter constituitur.

Dices: Illa habitudo & dilectio objecti abominabilis est in linea morali procedens à voluntate deliberata, & tendens ad objectum dissonum regulis morum, à quo desumit, & veluti ebibit non bonitatem, nec indifferentiam, sed pravitatem, sitque abominabilis sicut objectum dilectionis suæ; idque totum contingit antecedenter ad privationem, quæ supponit objecti dissoni attingentiam, cui unice innititur, & ex qua resultat: Sed illa tendentia est positiva: Ergo in aliquo positivo malum morale primitus invenitur. En totius difficultatis medullam. En argumentum, in quo dissolvendo ingenia acuunt Authores nostræ sententiæ, sed magis torquent. Quæ ipsi eruditè afferunt non exscribam, quia ex inexhausta S. Thomæ doctrinæ uberrimæ copia aliquid fortè non novi, sed novè eruam, quibus hanc difficultatem, quam adversarii putant insuperabilem, D. Thoma magistro molliam, & efficiam non modò planam, sed etiam favorabilem.

Dicendum ergo, nos posse concipere privationem se habere ad actum moralem vel consequenter, vel concomitanter, vel etiam quantantenus antecedenter. Consequenter se habet privatio, quia intelligitur resultare ex actu tendente in objectum dissonum; unde actus amplectens objectum pravius est causa receptiva, seu subiectum & fundamentum privationis. Con-

comitanter intelligitur se habere privatio, quia quantumcunque conversio & tendentia ad obiectum dissonum rationi sit realis, importat tamen necessario privationem adjunctam & immixtam, ita ut non prius tendat quàm sit privatio, quia est tendentia ad finem indebitum amatum; qui amor simul & semel privatur sine debito, nec elicitur ut privetur, sed elicitur debito sine privatus. Vnde in actu malo privatio non se habet quidem ut genus vel differentia; quia cum sit non ens, non potest privatio esse genus contrahibile per differentias positivas, nec differentia contrahens genus positivum; genus enim, & differentia debent esse ejusdem generis: Sed habet se privatio tanquam modus imbibitus in actu malo, constituens rationem essentiali malitiæ, eo fere modo quo obscuritas involvitur in actu fidei, & negatio divisionis in ratione unitatis. Antecedenter denique aliquo modo intelligitur se habere privatio ad conversionem, quia nimirum ille idem actus qui tendit ad obiectum commutabile, recedit à bono incommutabili, & à rectitudine rationis. Et sicut corruptio in genere causæ materialis & positivæ præcedit generationem, & recessus à termino à quo in eodem genere causæ antecedit accessum ad terminum ad quem; nam verum est in aliquo genere causæ ideo Petrum se movere ad orientem, quia relinquit occidentem: ita similiter ideo voluntas ultrò amplexatur obiectum abominabile, quia recedit à Deo, bonum rationis fugit, divertit à regulis, & veluti bono incommutabili terga vertit. Quia nimirum, ut antea ex Angelico Magistro dicebamus, peccatum egreditur à voluntate deficiente. *Nemo,*

inquit August. 12. de Civit. cap. 7. *quærat causam efficiens* *na pravitatis, non enim est efficiens, sed deficiens, quia nec illa affectio est, sed defectio.* Voluntas autem est deficiens, quia despicit directionem rationis, nec adhibet regulam legis: Ergo dum malè agit, prius aliqua vera ratione intelligitur recedere à Deo, & privari ejus directione, quàm fruatur utendis, & inhæreat creaturæ. Quam sanè doctrinam ipsa indigitat Scriptura, Jeremiæ 2. *Duo mala fecit populus meus* (in unico idololatriæ peccato, de quo ibi loquitur) *me dereliquerunt fontem aquæ vivæ, & foderunt sibi cisternas dissipatas.* Vides peccatorem non prius fodere sibi cisternam dissipatam perversa objecti prosecutione, quàm Deum dereliquisse voluntaria privatione. Opportunè Magnas Gregorius lib. 4. *Moral. cap. 15.* expendens illud Job 3. *Pereat dies in qua natus sum, & nox in qua dictum est, Conceptus est homo,* inquit: *Homo in die nascitur, sed in nocte concipitur; quia nequaquam ad delectationem peccati rapitur, nisi prius per voluntarias mentis tenebras infirnetur. Antè enim cæcus in mente fit, & postmodum se reproba delectationi substernit.*

Juxta hanc triplicem privationis considerationem solvi potest argumentum, juxta primam quidem difficilius, sed juxta secundam & tertiam evidentissimè difficultas evacuatur. Si prima explicatio, quæ apud Authores communior est, magis placet, respondendum est, tendentiam illam nondum esse formaliter & essentialiter malam, sed tantum fundamentaliter proximè, eo ferè modo, quo in sententia Thomistarum natura per præcisionem intellectus possibilis est universalis, non formaliter ante comparisonem,

sed fundamentaliter, non remotè, sicut est à parte rei, vel in abstractione. intellectus agentis, sed proximè. Et cum urgetur, tendentiam illam non esse in ordine physico, sed in linea morali, quia procedit à principio morali, & tendit ad objectum morale, eodem modo respondeb's, quo Thomista Logicus respondet ad hoc argumentum: Natura per præcisionem intellectus possibilis non est in statu, ordine, vel conditione singularitatis: ergo est formaliter universalis: & sicut iste negat consequentiam, quia inter singulare & universale formaliter datur medium, scilicet universale fundamentaliter: ita inter esse in ordine physico, & esse in ordine morali formalis malitiæ datur medium, nempe malum fundamentale proximè. Et ratio hujus radicalis, & omninò Thomistica suprà insinuat, est quia quandiu actus non est privatus rectitudinæ, non potest esse formaliter, sed tantum causaliter malus, cum perpetuus sit in hac doctrina D. Thomas, quod actus humanus non habet esse malus, nisi ex carentia debitæ commensurationis, & in quantum ei aliquid deficit de plenitudine essendi: Ergo tendentia illa antecedenter ad privationem potest quidem esse fundamentaliter, sed non formaliter mala. Sicut etiam in sententia Thomistarum sublatâ ratione superaddita, subjectum non formaliter, sed tantum fundamentaliter proximè, positâ ratione fundandi ad terminum referretur. Et quæ ad hanc de relatione sententiam explicandam afferri solent, huic nostræ sententiæ adornandæ omninò deservire possunt.

Quod si secundæ, aut tertiæ explicationi, quæ cum sint communiores, & à nobis D. Thomæ



luce inventæ, vel potius ex ejus doctrinæ fundo inexhausto erutæ, certè nihilo minùs solidiores sunt, inhiæreas; abit in fumum argumentum, quod supra omne quod dicitur demonstrativum extollebat profundissimus ordinis nostri Theologus P. Joannes Franciscus Dufaur, quodve ipse unicè urgebat in suis manuscriptis nondum prælo commissis, sed immortalì luce dignissimis. Sed salvâ reverentiâ, quæ viro eruditissimo & juxtâ piissimò debetur maxima, & bonâ illius veniâ, cujus amicitia nihil mihi antiquius, si consideretur privatio ut concomitans & intermixtâ actui malo, & multò magis si actus consideretur privatus rectitudine per recessum à Deo, diversionem à lege, & fugam regulæ non adhibitæ priùs quàm feratur motu prosecutionis in objectum abominabile, argumentum factum nullam habet vim, siquidem prosecutio & tendentiâ illa non erit prior, sed concomitans, vel subsequens privationem, à qua habet actus primò & per se, quod sit malus.

Et cum urgetur: Illa habitudo est moralis, tendens ad objectum morale, ab eoquè hauriens non honestatem, aut indifferentiam: ergo malitiam. Responderetur tripliciter juxta alterutram considerationem: Illa habitudo est moralis ratione privationis intermixtæ, concedo; ratione entitatis, nego: nam ratione illius habet tantum esse subjectum malitiæ. Vel iterum: Illa habitudo est moralis, quia tendit præcisè, nego; quia obliquè tendit, concedo: non est autem obliqua tendentiâ nisi ratione permixtæ privationis. Vel tertio: Illa tendentiâ ad objectum pravum est & supponit in genere causæ materialis recessum à Deo, fugam illius, & privationem regulæ ra-

tionis, ratione cujus habet primitus malitiam, concedo; & non supponit, nego. Nam ille actus non solum est privatus rectitudine, quia prosequitur objectum commutabile, sed quia derelinquit fontem aquæ vitæ, & privat se voluntariè ordine rationis. Cujus signum manifestum est, quia si per impossibile actus prosecutionis tendentis ad objectum non esset privatus debita rectitudine & carentia conformitatis ad legem, non esset malus, ut patet in actibus indeliberatis, & ex his quæ de regulis bonitatis superiori capite diximus. Ex quo fit, quod sicut omnis actus peccati est & recessus à bono incommutabili, & accessus ad bonum commutabile: ita in illo duplex privatio importatur; altera, quia est aversio à Deo; altera, quia conversio ad creaturam: unde prius quàm sit conversio & tendentia, est malitia privativa Dei, & boni rationis, ac proinde in illa sita est formale peccati, quia primitus in illo invenitur. Imò sine illa privatione nequit dici actus formaliter moralis, quia esse morale dicitur tale per ordinem ad regulas morum: actus autem non ordinatur ad regulas morum, nisi vel per subjectionem, & est actus bonus; vel per privationem, & est actus malus prius terga dans, & à Deo faciem avertens, quàm stercora, & nugas nugarum amplexans.

Duplex aliud argumentum posset fieri contra nostram sententiam. Primum, quia videtur sequi, omnia peccata esse omissionis, si peccatum nihil formaliter importet nisi carentiam rectitudinis debitæ. Secundum, quia videtur etià sequi, omnia peccata esse æqualia, siquidem privatio in qua consistunt, non suscipit magis & minus. Sed utraque hæc difficultas multa supponit in

materia de peccatis elucidanda, ubi de peccato omissionis, de æqualitate, & comparatione peccatorum ex professo disputabimus, unde eam illum in locum rejicimus. Pro nunc dicito, peccatum omissionis non dici tale ex sola carentia rectitudinis, sed ex carentia actus; peccatum verò commissionis ex positione actus privati rectitudine debita; quia omittere est non agere, tametsi sit præceptum affirmativum urgens operationem; committere verò est agere contra præceptum negativum: & in hoc distinguuntur peccatum omissionis, & commissionis, non penes carentiam rectitudinis debitæ utriusque peccato communem.

Non sequitur etiam omnia peccata commissionis esse æqualia, quia ratione fundamenti suscipiunt magis & minus, secundum quod per illud plus minus diminuunt de inclinatione naturali; repugnant synteresi, & opponuntur legi naturali, quæ penitus extinguere non potest, sicut est major infirmitas una quam alia, quia magis corporis vires minuit. Unde D. Thomas *q. 18. art. 8. ad 1.* & alibi vocat privationem actus mali privationem in fieri, non in facto esse. Ad cujus intellectum sciendum, privationem in fieri removere quidem formam, sed non totaliter eam extirpare, quia non tollit radicem ejus: v. g. ægrotudo removel sanitatem, sed eam funditus & radicitus non evellit, quia non aufert vitam, quanvis ad eam destruendam disponat, sicque relinquit aliquid de opposita forma, saltem in radice. Privatio autem in facto esse non tendit remotione unius ad aliam veluti suffodiendam, sed omnem oppositam formam & in se, & in radice ab imis subruit fundamentis, ut cæcitas, &

mors. Sic igitur privatio peccati dicitur in fieri, quia licet rectitudinem auferat, tamen totaliter boni radices & semina non labefactat, nec destruit principia vitæ honestæ, nimirum rationem, synteresim, & libertatem, licet primam obnubiler, secundam impediat, tertiam sauciet. Illud porro observandum, utrumque hoc argumentum in adversarios facile retorqueri, qui de eo dissolvendo non minùs laborant. Nam explicent, quæso, quomodo peccata omissionis sint, ut revera sunt, inæqualia; pejus enim est cibum extremè indigenti, quàm famem citra periculum mortis patienti denegare. Et tamen utriusque peccati malitiam in privatione sitam esse nemo adversariorum inficiatur. Rursum peccatum commissionis & omissionis conveniunt in ratione mali moralis, cujus sunt membra dividenda: quomodo autem id fiet, si malitia peccati commissionis sit aliquid positivum? Unde hoc argumentum fortiùs militat contra adversarios.

Hactenus cum Thomistis positivæ malitiæ duce Cajetano architectis certamen inivimus. Verùm quia plures recentiores extra Scholam S. Thomæ formale peccati in positivo statuentes diverso calle procedunt, paucis eorum mens perstringenda, paucis confutanda est. In primis quidam recentiores, quos sequitur P. Georgius de Rhodes, novissimus Societatis Scriptor, sed eruditione, acumine, & perspicuitate nulli sociorum secundus, censent malitiam moralem esse formalitatem aliquam positivam, sive relationem prædicamentalem disconvenientiæ ad naturam rationalem & legem, quæ non producitur per ullam actionem, sed advenit actui malo immu-

tato, prout fit ab homine. Ex quo principio explicant, quomodo Deus non sit author peccati; quia formalitates actuum nihil aliud sunt quàm connotationes, quæ sunt quidem entia realia, nec per intellectum ficta, sed non actui superadduntur, sed sunt ipsemet actus, prout respiciens extrinsecum connotatum. Unde inferunt, hujusmodi formalitates non esse aliquid producibile in actu per influxum alicujus causæ, sed resultare ab actu, non fluxu alicujus entitatis, sed connotatione alicujus extrinseci. Unde licet causa formalitatis sit etiam causa entitatis, quia formalitas est ipsamet entitas; causa tamen entitatis non illicò est causa formalitatis, quia formalitas non est entitas absolutè & nudè sumpta, sed entitas prout respiciens aliquid extrinsecum; ideoque non potest tribui causæ nudè sumptæ, sed causæ per quam ut respicientem connotatum extrinsecum talis entitas produci-  
tùr. Cùm igitur malitia formalis sit solum connotatio & formalitas nihil adjiciens entitati actus, malitia illa non est producibilis per aliquam actionem, sed resultat in actu, prout actus produci-  
tùr à causa subjecta legi, & quæ tenebatur in actum illum non prorumpere, sub qua utique ratione Deus actum illum non producit.

Verùm illa doctrina, quàmlibet subtilis, est tamen soliditate destituta. Tum quia fundamentum est valde incertum, nimirum quod formalitates reales libertatis, bonitatis, & malitiæ (si sitæ sint in positivo) non sunt aliquid distinctum actui superadditum, cùm secundum adversarios possint adesse & abesse realiter ab actu, & separabilitas sit manifestissimum distinctionis realis argumentum. Tum quia natura ut  
respiciens,



respicens, ut connotans aliquid extrinsecum, ut procedens à principio libero & advertente suam obligationem, vel importat aliquid reale præter entitatem actus, vel nihil: si aliquid, ergo aliquid reale non erit à Deo, & ruit fundamentum præfatae doctrinae: si nihil, ergo quotiescumque erit actus, erit formalitas, & connotatio, quod negant adversarii: ergo qui producet entitatem, producet connotationem: ergo per illa verba, *ut connotans, ut respiciens, ut procedens*, & alia innumera quæ ex Nizolio vel Calepino eruere possunt, nihil significant, quod non significetur nomine actus. Tum quia, ut superius argumentabamur, licet Deus non sit causa formalitatum, ita ut ab eis possit denominari, quia non agit modo limitato causæ particularis, sed modo universalissimo, & sub ratione altiori causæ primæ; tamen Deus est causa omnis realis formalitatis creatæ & creabilis, quæ cum sit ens ab alio, & per participationem, necessario debet esse ab ente per essentiam, sive per efficientiam, sive per resultantiam procedat. Tum quia si ideo formalitas positiva malitiæ non est à Deo, quia formalitas actus ut producti à causa secunda, non est à Deo, formalitas etiam bonitatis ob similem rationem non erit à Deo: quod licet concedat P. de Rhodes, nescio tamen qua veri specie; nam secundum Tridentinum, supra recitatum, Deus est causa operis boni, non mali, & anathemate percutiuntur qui dixerint conversionem Pauli non esse magis à Deo, quam prodicionum Judæ. Et certe tribuere Deo entitatem, & denegare bonitatem, eamque soli libertati creatæ asserere, est ut alicubi argumentatur Augustinus, creaturæ



quod melius est tribuere. Accedit, quod actus bonus est sæpe numero supernaturalis; actus autem supernaturalis quia talis non potest non esse à Deo fonte gratiæ, & hoc negare est purum putum hærelicæ Pelagianæ virus secundum omnes Theologos.

Dices: Illud est formale peccati commissionis, per quod formaliter repugnamus præcepto negativo prohibenti exercitium actus, & imperanti actus negationem; peccatum enim commissionis est illud, quo violamus & transgredimur præceptum negativum, cui conformamur dum ab actu vetito abstinemus. Atqui præcepto negativo prohibenti exercitium actus, & imperanti actus negationem non repugnamus formaliter per privationem, sed per aliquid positivum, quia negationi non possumus repugnare formaliter per aliam negationem, cui opponitur solum quod est positivum, aliàs daretur negatio negationis, & processus in infinitum. Ergo in aliqua formalitate positiva sita est ratio constitutiva peccati. En quò devolvitur tota istorum Formalistarum subtilitas.

Respondeo præceptum negativum non violari quidem negatione actus, sed violari per actum habentem privationem rectitudinis & conformitatis ad legem ipsum prohibentem; non enim qualiscumque actus violat legem, ut patet de actu deliberato & primò primo, sed actus privatus subiectione ad regulam legis, qualis est actus deliberatus, voluntariè avertens se à lege, & oblique tendens in objectum prohibitum. Non ergo per meram negationem repugnamus præcepto negativo, sed per actum affectum privatione: quocirca Ambrosius ap-

pellat peccatum nihilum rebelle, & armatum  
contra Deum.

## REFLEXIO.

*Filii hominum usquequò gravi corde, ut quid diligite vanitatem, & quaritis mendacium? Psal. 4.*  
Væ vobis qui, ut dicitur Amos 6. *latamini in nihilo*, ad nihilum redacti, & nescistis. Quia nimirum peccatum nihil est, inquit Augustinus *tract. 1. in Ioan.* & nihil fiunt homines cum peccant. Nec homo solum, sed & Angelus ad nihilum redigitur dum peccat, eo longè pejus unde creatum est; nam sicut de viro iniquo dictum est Psalm. 14. *Ad nihilum deductus est malignus*: ita & de Angelo rebelli scriptum est Ezech. 28. *Tu Chorub extentus, donec inventa est in te iniquitas, & nihil factus es.* Vide quid ambias, quid confecteris, Lector, quoties peccas umbras persequeris, nihilum ambis, vanitati litas, idolum adoras, quod teste Apostolo nihil est in mundo. O curas hominum, o solitudines peccantium ridiculas, o quantum est in rebus inane! Post susceptos labores, post extantlatos labores, post exhaustas vires, dum beatitatem reperisse se credunt, lassati in via iniquitatis peccatores nihil inveniunt in manibus suis. Nam *quid est malum*, inquit Ambrosius lib. de Isaac, cap. 7. *nisi boni indigentia? Non est iniustitia*, subdit Anselm. lib. de concord. cap. 1. *qualitas, aut actio, aut aliqua essentia, sed tantum absentia debite iustitie.* Malum, addit Damascenus lib. 2. de fid. cap. 4. *nihil aliud est quam boni privatio, aut virtutis defectus.* Fecisti peccatum, ut carperes voluptatem; præterit momentaneum, quod fugitivè delectat; remanet

infame nihilum, quod lethaliter damnat. Nam *quid est peccatum*, inquit Gregor. exposit. in 7. Psal. *pœnit. nisi mors? Mors namque est, qua animam à Deo separat, sensuum internorum intercludit officia, divinam deturpat imaginem, lucis adimit claritatem.* Et adhuc post hæc malum amabis, & saporem mali habebis, & lætaberis in rebus pessimis? Si amara est mors, quomodo tibi dulce est peccatum, quo mors intravit in mundum? Sed si nondum times peccatum, time quod perducit peccatum. Sed proh cæcitas! Illud non modò non times, sed sicut aquam bibis, & consuetudine vilescit, & fit tibi quasi nullum sit. Certè si sentires hujus mortis horrores, si perciperes onus peccati & animæ læsionem, exteriorum utique aut parum sentires, aut ex toto non sentires corporis pœnam, nec reputares laborem, quo peccata scires deleri præterita, futura caveri. Sed quid mirum, si non sentit peccator, qui mortuus est. *Mors equidem*, inquit August. in Psal. 48. *quam timent homines, separatio est animæ à corpore: mors autem vera, quam non timent homines, separatio est animæ à Deo.* Et qui timent istam, quæ separat animam à corpore, ultrò incidunt in illam, ubi anima separatur à Deo. Quod non dolet, addit homil. 28. inter 50. *non pro sano habendum, sed pro mortuo computandum est. Quando aliquid pungitur & dolet, aut sanum est, aut est in illo spes aliqua sanitatis. Quando autem tangitur, pungitur, vellicatur, nec dolet, pro mortuo habendum est.* Ergo morieris, dum malè agis, quicumque tantæ privationis ruinam non sentis, qua Deo summo bono orbaris.

Nec mirum quod homo per peccatum in nihilum prolabor. Cùm enim homo flante Deo

factus est in animam viventem, inspiravit Deus in faciem ejus spiraculum vitæ, in interiora statim transmissum, & per universa corporis spatia diffusum. Sicut ergo homo divina aspiratione densatus, & ut ait Tertullianus, in forma gelatus est: ita recedente per peccatum Deo, totus homo diffluit, totus evanescit. *Qui enim*, inquit optimè Petrus Damian. epist. ad Desiderium, *ab illo qui verè est, recedit, necesse est ut non sit, quia ad nihilum tendit.* Huic cogitationi mirè concinit Rupertus lib. 7. de glorificat. Trinit. cap. 12. ubi & nostram sententiam de peccati constitutivo egregiè illustrat his verbis: *Esse in eo quod est, verè est esse. Quod si quis ab esse excidit, is non est in esse; esse enim in peccato non est propriè esse, quia ipsamet in se, & secundum se malitia non est, cum malitia sit privatio, & non existentia boni. Quemadmodum igitur ille, qui est in eo qui est, in esse est; sic qui in nihilo est (tale verò est malitia) itidem nihil fit, & annihilatur.* Unde observant Patres, rectè ad interrogata respondisse Petrum, dum dixit se, negando Christum, non esse: *Non sum. Quia videbatur Christi negare societatem, utique se negavit*, inquit Ambros. lib. 10. in Lucam.

Sed quia te à peccato sicut à facie colubri fugere confido, pie Lector, saltem dum totam vides mundi universitatem peccatis sordentem, fle super illam. Talem vitam vivere, vel potius tali morte mori, nonne lacryinis & lamentis dignum est? Nullus certè meliori jure defletur, quàm à Christianæ sortis dignitate degenerans; nulli potiori ratione debetur lacrymarum profusio, quàm qui è vivis excessit. Et heu! cerne peccatorum strages, & clades per mundum sub cælo totum

longè lateque, & ubique grassantes. *Mortalis est ista vita*, inquit Chrysologus serm. 1. *qua moritur virtutibus, qua vitiis vivit.* Nec minùs eleganter serm. 19. *Quomodo mortui sepeliunt mortuos suos? Fratres, ipse dixit: Ego sum vita. Qued est anima corpori, hoc est anima Christus. Sine anima corpus non vivit: non vivit anima sine Christo. Recedente anima, mox corporis factor, corruptio, putredo, vermis, cinis, horror, & omnia visu detestanda succedunt: discedente Deo confestim venis in animam peccatorum factor, corruptio criminum, vitiorum putredo, conscientia vermis, vanitatis cinis, infidelitatis horror, & fit in corporis sepulchro vivo funus anima jam sepulta.*

Peccatum privatio est: Ergo mors est: Ergo peccatores dum vivunt, portant funera sua, & in eorum corporibus veluti sepulchris omni putredine vitiorum, omnium immunditiarum sanie anime fœdantur. Igitur ob mundi peccata effusæ ut profuant lacrymæ, nec desinant ex imo pectoris recessu jugiter proflire suspiria. Quia ut monet Scriptura Eccles. 22. *Supra mortuum plora, defecit enim lux ejus.* Si quem de tuis charis mortalitatis exitu perdidisses, utique ingemisceres; quin & barba inculta, veste mutata, habitu lugubri, neglecta cæsarie, flentibus ocellis, facie demissa, ore pallente & dejecto interni ostenderes mœroris indicia. Dum ergo vides tot homines animas suas miserè perdere; & spiritaliter mori, & fanus gestare suum, & vitam agere nihil à mortuis distinctam, imò & mortuis deteriorem, quia ut inquit Chrysostomus hom. 28. in Matth. *Certè si posses animam hominis peccatis involutam oculis ternere, non dubitares multò melius esse in sepulchro jacere, quàm*

delictis irretitum detineri, & lapide potius quam gravi peccatorum pondere premi. Hæc, inquam, dum viles, & acriter plange, & graviter ingemisce, & jugiter lamentare. Et pro virili ad vitandum sive in te, sive in aliis peccatum nullo parce labori, vires omnes confer tuas, profunde facultates, nullum non move lapidem, omnes adhibe machinas, nec credas te tempus vel operam perdidisse, si unum mortale peccatum ne patraretur obtinuisti. Quàm præclare August. tract. 49. in Joan. *Laborat ne moriatur homo moriturus, & non laborat ne peccet homo in aeternum victurus: & cum laborat ne moriatur, sine causa laborat; id enim agit, ut multum mors differatur, non ut evadatur: si autem peccare nolit, non laborabit, & vivet in aeternum.* O si possemus excitare homines mortuos, & cum ipsis pariter excitari, ut tales essemus amatores vita permanentis, quales sunt homines amatores vita fugientis! Quid non facit homo sub mortis periculo constitutus? Gladio impendente cervicibus prodiderunt homines quidquid sibi unde viverent reservabant. Quis non continuo prodidit, ne percuteretur? & post prodicionem fortasse percussus est. Quis non ut viveret, continuo perdere voluit unde viveret, eligens vitam mendicantem, quam celerem mortem? Cui dictum est, *Naviga ne moriaris, & distulit?* Cui dictum est, *Labora ne moriaris, & piger fuit?* *Levia Deus jubet, ut in aeternum vivamus, & obedire negligimus?* Non tibi Deus dicit, *Perde quidquid habes, ut vivas exiguo tempore in labore sollicitus; sed, Da pauperi unde habes ut vivas, semper sine labore securus.* Accusant nos amatores vita temporalis, quam nec cum volunt, nec quandiu volunt habent. Et nos invicem non accusamus, tam pigristam tepidi ad



*caessendam vitam aeternam, quam si voluerimus, habebimus; cum habuerimus, non amittimus.* Faxit Deus, ut ad illam fugâ peccati perveniamus.

Superioribus speculationibus peccati naturam, & malitiæ formalem rationem diutiùs forsan quàm par erat exposuimus. Viri enim pii convenientius fortassis judicarent, mallentque Theologos peccati terrorem atque horrorem incutere, quàm in ejus constitutivo explicando plus justo immorari. Nam & legimus Principem Apostolorum Simoni Mago in celebri illa disputatione sciscitanti, quid esset peccatum, an natura, an privatio & nihil? despectâ illa subtili controversiâ, his verbis à D. Clemente relatis, & Apostolo dignis respondisse: *Non praecepit nobis Dominus de natura peccati disputare, sed docere quomodo sit fugiendum peccatum.* Verumtamen non inanis censenda est hujus monstri pervestigatio, quo cognito & audito pietas humana tota cohorret, tota animo respuit, & auribus ipsis, & sapit, aspernatur.



## SPECVLATIO III.

*Idem actus moralis respectu diversorum bonus simul & malus esse potest: & saepe sunt mala mixta bonis, sunt bona mixta malis.*

**D**ixi respectu diversorum; nam respectu ejusdem rei, & eodem modo attactæ actum esse bonum & malum repugnat. Actus enim hoc ipso bonus est, quo est rectæ rationi conformis, malus verò, quatenus est eidem rationi difformis. Patet autem impossibile esse eundem numero actum habere simul conformitatem & difformitatem ad rationem respectu ejusdem. Vnde difficultas duntaxat esse potest, utrum idem actus possit ex diversis principiis esse simul bonus & malus, putà bonus ex objecto, malus ex fine; honestus ex fine, pravus ex objecto, vel ex circumstantiis. Dixi etiam *simul*, quia non est dubium, quin idem actus successivè possit transire de bono in malum ex variatione objecti ex natura sua indifferentis ad bonitatem, vel malitiam, si uno tempore permittatur, alio præcipiatur, vel prohibeatur. V.g. labor voluntarius ob honestum finem die profesto inchoatus, & in diem Dominicum sine interruptione continuatus, fit malus ob Dei interdicens inhibitionem. Et in hoc assimilatur intellectui voluntas; nam idem intellectus judicium in materia contingenti transit de vero in falsum, putà hæc propositio mentalis per horam in mente perdurans, *Petrus studet*, primâ mediâ vera est, quia Petrus ope-

ram dat litteris; sed secundâ, in qua Petrus in studio abscedit, falsa est. Quæstio ergo est de eodem actu, & pro eodem tempore, an possit respectu diversorum principiorum esse simul bonus ratione unius, & malus ratione alterius. Sicut in naturalibus idem subiectum perfectione naturali secundum unam partem ornat, quâ secundum aliam caret, ut si decora facie speciosus homo, gibbosus sit, vel claudus. Et in artificialibus idem opus secundum unam partem regulis artis consonans, ab eis secundum aliam recedit. Quod in moralibus posse contingere asserit speculatio cum Cajetano, in cujus gratiam superioribus speculationibus violatam hac assertionem redimus.

Sed antequâ probeatur efficaciter speculatio, & simul occupetur tota rationum moles, cui adversa sententia innixa est, advertendû quod quando elicitur actus ex objecto bonus propter finem prævum, tunc opus bonum vel eligitur præcisè per modum puri medii conducentis ad finem, vel per modum finis intermedii, ita ut voluntas non solum alliciatur à fine, sed etiam ab objecti bonitate moveatur, quamvis illi objecti amor superadjiciatur finis mali relatio, vel intermiscetur importunæ circumstantiæ inordinatio. V. g. videns quis pauperem indigentem misericordiâ movetur, & placet voluntati alienæ miseriæ sublevatio. Sed quia egenus petit eleemosynam in Ecclesia, præsentem fidelium coronam, subintrat vanæ gloriæ stimulus, & voluntatem fortassis pigram excitat ad citò erogandam pecuniam, quam tamen ultrò largitur ut fratris laborantis necessitati opituletur: vel etiam voluntatem subveniendi, & ipsam largitionem comitan-

eat, tepor, repulsæ motus, inconsideratio, vel indiscretio non advertens magis indigentem, vel aliæ imperfectionum labes, quibus veluti asperso pulvere nonnihil sordescit opus. Sed sit alius qui videas mulierem paupertate adactam mendicare, & necessitate cogente ad turpia, esse ad omnia fanda & nefanda paratissimam; tunc ille opportunam libidini occasionem nanciscens, ejus miseriæ opem ferre proponit, ut eam ad illicita pertrahat. In primo casu erogatio pecuniæ habet rationem finis intermediæ, quia aliena miseria sublevanda per se amatur, per se, & in se placet, licet fini ulteriori inhonesto supponatur, vel circumstantiæ indiscretæ permixtione sordidetur; sicut medicina sapida, & suavitate condita per se inescat appetitum, quanvis ob ventris dolores, quos ciere solet, vel propter fœtores quos emoveret, ingrata esse possit; sed tamen non habet rationem puri mediæ conducentis, & utilis ad sanitatem. In secundo autem casu largitio pecuniæ habet rationem puri mediæ, quia eatenus tantum placet eleemosyna, quatenus est instrumentum & adiutorium libidinis. De hoc secundo non est difficultas, quia tunc electio boni operis non solum bona est, sed peior; non diminuit malitiam actus, sed auget; quia quoddam sacrilegii genus est opus de se bonum non alio motivo assumere, quam ut serviat iniquitati. De primo autem casu est controversia, & contendimus tunc actum bonitatem ab objecto, malitiam à fine & circumstantiis desumere.

Probatur à priori, & à posteriori. Ratio à priori est: Actus, quo voluntas per se & propter se amat levamen & solatium alienæ miseriæ, quanvis feratur in suæ malum, vel infirmitatem

intempestivæ circumstantiæ inordinatione , aliquam tamen ex objecto illo honesto haurit bonitatem, si objectum illud prosequatur tanquam finem intermedium & non tanquam purum medium : atqui voluntas potest esse , & sæpe est ita comparata , ut solamen alienæ miseriæ in se , & propter se amet , quanvis illud fini ulteriori vanitatis referat , vel malâ circumstantiâ inumbret & sordidet : Ergo tunc actus largitionis eleemosynæ bonitatem ab objecto , militiam à fine & circumstantiis mutuabitur. Omnes & singulæ propositiones sunt apertæ, si penetrentur termini. Minor quidem est evidens, & experienciâ ipsâ comperta; quid enim vetat, quin voluntas sit ita disposita , ut honestate misericordiæ alliciatur, quanvis ad effundendam sine mora pecuniam sine vanæ gloriæ veluti calcaribus excitetur? Certè hoc tantum supposito disputamus; si enim eleemosynam tantum ut medium conducens ad vanam gloriam , & nulla alia de causa eligeret, fatemur tunc actum ex objecto bonum non reddi , sed deteriorem potius effici affirmamus; quia nullus ibi est amor boni , sed profanatio illius , & mera idolorum servitus , & hypocrisis, seu simulata æquitas, quæ duplex est iniquitas, ut aiunt Patres ; quia totum & unicuique fructum in laude hominum ponit, nec studet virtutes colere, sed vitia colorare ; clausa vitia abscondit & palliat , ac in usum propriæ laudis assumit, dum per ipsa quoque, quæ se agere sancta ostendit, non objecti amat honestatem , sed auras favorum. Major verò videtur etiam clara , & insuper cum minori sic efficaciter suadetur. Bonitas objecti per se volita & amata refundit aliquam bonitatem in actum; nam ut ex dictis

suprà, dum de moralitate, constat, actus imperatus ad finem extrinsecum ordinatus speciem essentiali defumit ab objecto, & non à fine, quia objectum primò & immediatè respicit: ergo moralitas quæ à fine, vel circumstantiis supervenit, est tantum accidentalis, supponitque actum in sua essentia constitutum, quam proinde non potest tollere; quia quando manet id per quod res in sua essentia constituitur, à nullo superveniente destrui potest. Unde ordinatio actus ad finem extrinsecum operantis non mutat ejus naturam, sed solum addit novum ordinem, novamque speciem accidentalem inducit, quia objectum actus imperati, & finis imperantis accidentaliter conjunguntur; siquidem idem opus pro voluntate agentis potest ad innumeros fines bonos malosve ad libitum ordinari, ac proinde bonitas vel malitia ex fine proveniens variabilis est, potestque adesse & abesse ab actu; moralitas verò quæ ex objecto convenit, inseparabilis est, ut superiori capite cum torrente Theologorum diximus: Ergo actus qui fertur in objectum bonum allectus ab ejus bonitate, non definit esse bonus, quanvis inficiatur vel pravi finis, vel alterius inordinatæ circumstantiæ accidentali accessu.

Et radix horum omnium loco citato allata est, quia licet actus qui est pura electio, à solo fine specificetur; tamen actus qui non solum est electio, sed etiam intentio, tenditque in objecti bonitatem tanquam finem intermedium, primò & per se ab objecti bonitate speciem sortitur, quia nimirum non respicit objectum illud ut purum medium utile ad finis assequutionem, sed etiam ab interna ipsius bonitate cietur, quippe



quæ habet aliquid in se unde quærat, habet in natura sua aliquid movens ad diligendum, tamen ad aliud ordinatur. Ordinatio autem objecti ad finem quemcunque ulteriorem, non auferit ab eo rationem finis intermedii, sicut dependentia causæ secundæ à prima, non tollit, vel absument rationem causæ in secunda. Unde D. Thomas 1.2. quæst. 18. art. 4. ad 3. *Nihil prohibet, inquit, actioni habenti unam prædictarum bonitatum, deesse aliam. Et secundum hoc contingit actionem, quæ est bona secundum speciem suam, vel secundum circumstantias, ordinari ad finem malum, vel è converso; non tamen est actio bona simpliciter, nisi omnes bonitates concurrant.*

Quæ verba sunt ita expressa, & in illis tam perspicue nostra sententia continetur, ut identidem mihi excidat, quo pacto Adversarii conentur illa ad suum sensum detorquere. Cum enim dicunt, verba illa non facere sensum compositum, sed divisum, & significare actum illum habitum esse bonitatem, nisi malitia finis supervenisset; sicut si diceretur, nihil prohibet parietem habentem albedinem fieri nigrum, & hominem sanum fieri infirmum; cum, inquam, hæc dicunt, manifestè S. Thomæ contradicunt, & textui vim inferunt. Etenim S. Præceptor affirmans actioni habenti unam bonitatem deesse aliam, inde infert actionem illam non posse dici simpliciter bonam, quia non concurrunt omnes bonitates: Ergo credit ibi unam adesse bonitatem, licet non sit concursus bonitatum, alias actio non solum deberet dici non bona simpliciter & purè, sed nullatenus bona. Unde in 2. dist. 36. quæst. unica, art. 3. ut clarè innueret se loqui in sensu composito, ait: *Contingit actum*

*habere bonitatem ex materia, & tamen eum malè fieri propter indebitas circumstantias. Quod autem contingit fieri, non potentiam ut fiat, sed actum & sensum compositum apertissimè declarat. Sicut si diceretur, Contingit hominem habere præmotionem ad bonum, & tamen eum malè operari propter liberum arbitrium, manifestissimè significaretur, præmotioni posse liberum arbitrium dissentire in sensu composito, imò & de facto dissentire, siquidem dissensus contingeret, & eveniret. Eandem suam mentem perspicuè aperit Angelicus Præceptor *suprà citata quest. 18. art. 7.* ubi rationem radicalem hujus assertionis tradit his verbis: *Quando objectum non est per se ordinatum ad finem, differentia specifica, quæ est ex objecto, non est per se determinativa ejus quod est ex fine, nec è converso. Unde una istarum specierum non est sub alia, sed tunc actus moralis est sub duabus speci-bus quasi disparatus. Nec potest dici quod S. Doctor loquatur in casu quo objectum & finis sunt in eodem ordine boni. Nam id exemplo ejus qui furatur ad dandam elemosynam, illustrat S. Doctor inquitens: Dicendum quod objectum exterioris actus dupliciter potest se habere ad finem voluntatis: uno modo sicut per se ordinatum ad ipsum, sicut bene pugnare per se ordinatur ad victoriam: alio modo per accidens, sicut accipere rem alienam, per accidens ordinatur ad dandam elemosynam.**

Ratio verò à posteriori est, quia sæpè, & ferè semper contingit, actus bonos supervenientis finis, vel circumstantiarum malitiâ, veluti terreno halitu obnubilari, cùm enim nullus ferè sit actus bonus in viris etiam Sanctis, quantumvis vigilantibus, cui in hac vita non desit aliqua circumstantia, vel non admisceatur aliqua mala, licet

levis, sequeretur nullum dari actum meritorium, si quavis circumstantia veniali in actum quàmlibet heroicum irrepente, tota bonitas extinguatur; meritum enim soli innixum est bonitati, quâ absumptâ, omnis operum fructus perdat necesse est. Consequens autem est valde durum, imò & Patrum doctrinæ, & suavi, & solito summi Provisoris modo agendi repugnans. Etenim licet Sancti fateantur omnes iustitias suas esse tanquam pannum menstruata, ideoque se servos inutiles prædicent; non tamen despondent animum, nec corde cadunt, sed bonis operibus incessanter insistunt, scientes quod Deus, qui scrutatur renes & corda, separabit pretiosum à vili, & bonorum operum sordes veluti puleas igne Purgatorii examinabit, sicut examinatur argentum; qui ignis propterea appellatur à Patribus *rationalis*, quia in ra discretionem actus bonitatem non punit, sed circumstans peccatum purgabit, ut per opera sancta veluti aurum obrysum, legitimum, & non adulterinum, possint emergere regnum cælorum. Hortantur quidem sacri Doctores, ut curemus ne bona nostra pauca sint, curemus ne indiscussa; quia pauca agentes inveniuntur steriles, & indiscussa relinquentes socordes: sed tamen humites & veri fatentur in hac valle miseriæ opera iusta à venialibus circumstantiis aut separari vix posse, aut certè nequaquam posse. *Nonnunquam*, inquit Magnus Gregorius lib. i. Moral. cap. 16. *virtutes aliquantula elatione nos polluant. Sæpe*, addit cap. 19. *bono operi dum laus humana obviat, mentem operantis immutat; qua quavis quaesita non fuerit, tamen oblata del. et it.*

Quod idem Pater humillimus, & Magistri

humilitatis discipulus, semper pavidus, atque ex omni latere circumspectus adversum jacula elationis pugnans, suo experimento confirmat in fine Moralium, his verbis Christi bono odore refertissimis: *Redeundum est ad curiam cordis, ut quasi in quodam concilio consultationis ad meipsum discernendum convocem cogitationes mentis, quatenus ibi videam, ne aut incautè mala, aut bona non benè dixerim. Tunc enim benè dicitur bonum, cum is qui dicit, soli ei à quo accipit, per id appetit placere quod dicit. Et quidem mala me aliqua ei si dixisse non invenio, tamen quia omninò non dixerim, non defendo. Bona verò si qua divinitus accipiens dixi, meo videlicet vitio minùs me dixisse profiteor. Nam ad me intrinsecus rediens, postpositis verborum foliis, postpositis sententiarum ramis, dum ipsum subtiliter radicem meae intentionis inspicio, Deo quidem ex ea me summopere placere voluisse cognosco; sed eidem intentioni, qua Deo placere studeo, furtim se, nescio quomodo, intentio humana laudis interserit. Quod cum jam postmodum, tardeque discerno, invenio me aliter agere, quod scio me alior inchoasse. Sic etenim saepe intentionem nostram, dum ante Dei oculos rectè incipitur, occultè sibi subijuncta, & eam velut in itinere comprehendens intentio humana laudis assequitur: sicut pro necessitate quidem cibum sumitur, sed in ipso esu, dum fatim gula subrepat, edendi delectatio permiscetur. Fatendum est igitur, quod rectam quidem intentionem nostram, quae soli Deo placere appetit, nonnunquam intentio minùs recta, quae de donis Dei placere hominibus querit, insidiando comitatur. Si autem de his divinitus districtè discutimur, quis inter ista remanet salutis locus, quando & mala nostra pura mala sunt, & bona quae nos habere credimus, pura*

*bona esse nequaquam possunt? Vides ex veridica Gregorii sententia, vix ac ne vix quidem dari in hac vita pura bona, & tamen non esse omni ex parte vacua bonitatis. Ergo sicut in naturalibus bonitas essentialis etiam cum defectu accidentali subsistit, sicut pavo oculatis & ad aspectum præclaris pennis elegantissimè discriminatus fordescit in pedibus: ita in moralibus actus ex objecto honestus potest circumstantiarum maculis aspergi. Nam ut ait S. Thomas quæst. 18. art. 1. De bono & malo in actionibus oportet loqui, sicut de bono & malo in rebus. Ex quo infert: Quia de ratione boni est ipsa plenitudo essendi, si alicui aliquid defuerit de debita essendi plenitudine, non dicetur simpliciter bonum, sed secundum quid.*

Plures alias rationes ab Authoribus nostræ sententiæ ad ductas missas facio. Mitto quod per actum venialibus circumstantiis inquinatum impleri potest præceptum, quod utique secundum S. Thomam non potest esse nisi de bono, sicut prohibitio de malo, & permissio de indifferenti. Mitto quod actus eleemosynæ propter honestatem illius elicitus, tamen circumstantiarum labe foedatus, elicitur à virtute misericordiæ objectivam difficultatem evincente, & facilitatem eliciendi conferente, non solum per remotionem impedimentorum facultatem retardantium, ut quidam dicunt, sed etiam inclinante ad objecti honestatem; cum supponamus eleemosynam non eligi ut purum medium, & instrumentum iniquitatis, sed ut finem intermedium ratione nativæ bonitatis placentem, sed circumstantiis adventitiis maculatum. Mitto plures actus supernaturales ex objecto bonos à virtute infusa, vel saltem auxilio gratiæ elicitos posse malâ

circumstantiâ sordidari, ut si quis sit ita comparatus, ut nolit quidem credere nisi propter infallibile primæ veritatis revelantis testimonium, nec prædicare nisi propter majorem Dei gloriam propagandam enarrandamque, nec ad Sacramentum pœnitentiæ accedere, nisi ut iuri divino læso satisfaciât; ad illa tamen solet opera concitari & veluti inescari vel commoditate occurrente, vel amoris proprii titillatione irrepente, vel consuetudine ducente, vel sociorum choro & comitatu invitante, vel aura populari demulcente; rara enim avis est in terris, cujus operibus non nihil humani affectus sensim sine sensu miscetur. Et tamen sic credens, sic prædicans, sic ad pœnitentiæ tribunal vitæ suæ noxas expiaturus contritus accedens, non committit sacrilegium (supponimus namque illa supernaturalis pietatis opera non assumere ut mera instrumenta vanitatis, quia in hoc casu grande foret peccatum, & quoddam simoniæ genus opera de se tam sacra pro vano gloriolæ flatu, vel temporalis commodi lucro vendens; ) sed opera supernaturalia, quanvis non omni ex parte defæcatissima edit ope divini adjutorii, operis boni honestatem à circumstanti malitia præscindentis. Has, inquam, rationes aliasque missas facio, quia duplex à nobis ficta affatim probat intentum; nec nostri instituti est rationes congerere, sed selectiores è rei visceribus ductas urgere.

Objicies: Objectum de se bonum, seu in malum finem relatum, vel malâ circumstantiâ vitiatum nullo modo est conforme rationi, & idem est de fine aliàs bono acquirendo per malum medium; velle enim objectum relatum in malum finem, & finem per malum medium ob-



tinendum, nulli rationi consentaneum est, sed omninò repugnans: Sed quod nullo modo bonum est, & quod omni modo rationi adversum est, nullam tribuit actui bonitatem: Ergo actus non potest ex objecto bonitatem, & ex circumstantiis malitiam fortiri.

Confirmatur: Nulla, quantumvis minima potest esse bonitas in actu, nisi prout est conformis iudicio prudentiali, quod est proxima & immediata regula actuum humanorum: Atqui actus circumstantiâ vel levissimâ vitiatus, nequit esse conformis iudicio prudentiali, quod non est de actu vel objecto præcisè, sed ut vestito circumstantiis hic & nunc occurrentibus; prudentia enim dicitur bonum esse faciendum bonè, nec facienda mala, ut veniant bona. Ergo actus aliquâ circumstantiâ sordidatus nullam prorsus retinet bonitatem.

Confirmatur rursus: Cùm aliquis dat elemosynam propter inanem gloriam, objectum illius actus desinit esse bonum, & fit malum, cùm evadat medium conducent ad finem pravum, instrumentum criminis, & materia in qua exercetur peccatum sub specie & larva misericordix: Sed objectum quod desinit esse bonum, & incipit esse malum, nequit refundere bonitatem in actum: Ergo electio actus de se boni in finem malum relati nullam derivat ab objecto honestatem, sed malitia finis in medium refusa totam objecti, subindeque electionis bonitatem absorbet, & extinguit. Unde D. Thomas q 19. art. 7. ad 2. *Qui vult dare elemosynam propter inanem gloriam consequendam, vult id quod de se est bonum sub ratione mali, & ideo prout est volitum ab ipso, est malum, unde voluntas ejus est ma-*

la. Et ad 3. *Sive voluntas sit ejus quod est secundum se malum, & sub ratione boni, sive sit boni sub ratione mali, semper voluntas erit mala.* Et fortius in 2. dist. 38. q. 1. art. 4. *Cum aliquis vult dare elemosinam propter inanem gloriam, hic est unus actus voluntatis, & hic actus totus malus est, licet nunquam ad omne id quod in eo est, malitiam habeat.* Hæc sunt argumenta, quibus innixi Salmanticenses, Joannes à S. Thoma, alii-que non pauci valde probabiliter, sed nimis durè existimant, nullum dari bonum in moralibus nisi purum, & desinere esse penitus bonum, si minima sit circumstantia mala.

Respondeo hæc omnia argumenta ex suprà positis manere occupata distinctione illa de opere bono electo ut puro medio in ordine ad finem malum, vel assumpto ut fine intermedio propter suam intrinsecam bonitatem placente, sed accessorii finis, vel circumstantiæ vestientis malitiâ vitiato. Ex qua doctrina ad objectionem dico, actum bonum ordinatum ut purum medium in finem turpem, nullo modo esse consonum rationi, sed omninò dissonum, quin potius esse malitiam auctiorem, dum vult bonitatem servire iniquitati; sed tamen actum qui fertur in objectum bonum, propter istius bonitatem in se amatam fortiri aliquam honestatem, quantumvis accedente, & circumstante aliquo defectu non puram, sed permixtam.

Qua eadem distinctione infringitur vis utriusque confirmationis, & exponuntur S. Thomæ recensita testimonia. Licet enim actus prout relatus in finem pravum, & ut indutus malâ circumstantia, nequeat esse prudentiali dictamini consentaneus; tamen amari objecti il-

lius honestatem propter se ardentem, omni prudentiæ conforme est, cui omne bonum ubicumque sit, placere debet, in ore Dei qui bonum, ut ait alicubi D. Thomas, in omnibus amat absque acceptione rerum, vel personarum. Certè sicut prudentia & bonum objectum, & bonas circumstantias præcipit: ita actus qui objecti honestate allicietur, tametsi circumstantias omnes non eligat, erit partiali prudentiæ dictamini consentaneus, ejusque regulæ partim conformis, partim difformis erit. Præcipit, fateor, prudentia bona benè fieri; sed inde duntaxat sequitur, actum circa bonum non benè versantem, prudentiæ amissi ex parte consonum, ex parte dissonum esse, subindeque non purè bonum, sed mixtum; secundùm quid bonum, malum autem simpliciter. Non enim est actio bona simpliciter, nisi omnes bonitates concurrant; quia quilibet singularis defectus causat malum, bonum autem causatur ex integra causa.

Secunda autem confirmatio, sicut & testimonia D. Thomæ probant solùm, objectum bonum fieri malum cum eligitur ut medium ad iniquitatem, ut instrumentum sceleris, & ut materia, in qua sub pietatis umbone peccatum exerceatur, subindeque actum ut est mera electio, esse perversum, & totum malum: Sed sicut illud objectum habens rationem finis intermedii per se ob ingenitam bonitatem amari honestum est, ita actus qui fertur in illum ut intentionis rationem habet, pariter bonitate afficiatur necesse est. Et hoc ipsum indicat S. Præceptor in locis objectis, affirmans voluntatem esse unicè & totaliter malam, quando *bonum sub ratione mali, vel malum sub ratione boni eligitur*. Cum autem bo-

num sub ratione mali eligitur, tunc bonum non amatur in se, sed tantum ut deserviens malo, subindeque est purum medium, non finis intermedius. Nihil autem mirum, si actus sit tunc omni ex parte malus, quia malitia finis transit in rationem objecti, cum voluntas nulla objecti nativâ honestate alliciatur, sed eam materialiter assumat, ut sit instrumentum perversitatis; grandis enim perversitas est fruendis uti, id est ea quæ propter se amari debent, non alia ratione diligere, quam ut sint gradus ad scelera. Sic agens nec bonum, nec benè agit, sed bonum profanat, foris Cato, intus Nero, totus ambiguus, in vestimentis ovis, intrinsecus autem lupo rapax. Et in hoc sensu Patres, & eorum echo S. Thomas, veridicè dicunt bonum propter malum perpetratum esse pejus cordis malum; quia dum hypocrita externis simulatæ pietatis officiis vult bonus apparere, non esse, venusti latens vixus mellis dulcedine præcolorat; malitiam cordis depingit colore sanctitatis, adulatur, ut mordeat; ossa jejuniis atterit, ut mente targeat; despectis vestibibus corpus tegit, faciem exterminat, corpus torquet, ut appareat hominibus jejunans, & non esse sicut cæteri hominum. Hujusmodi quodcumque opus, quamlibet fulgeat, non virtus, sed pharisaïca justitia dicenda est, virtutum fucus, tinea sanctitatis; non pietas censenda est, sed impietatis medulla, vera simulans, simplicia fallens, sincera adulterans, religionem mentiens, videntibus illudens, sanctimoniam vendens, famæ gloriam emens, vulgi laudes solas captans, & arte crudeli virtutes truncans mucrone virtutum.

• Sed de his operibus specie bonis, & larvâ so-

lūm honestis non haberi quæstionem, iterum, & iterum monuimus, sed de illis in quæ veluti per rimulas subintrant guttæ iniquitatis. Quæ si bona esse prorsus delinunt labe cujusvis inordinatæ circumstantiæ, poterunt Authores oppositi totum orbem lustrare, & assumptâ etiam illius Philosophi hominem in meridie quærentis lanternâ, bonum aliquod opus vestigare, & vix ullum invenient, quia in hac vita nihil omni ex parte beatum, & omnis nostra justitia est tanquam pannus menstruatus. Cujus sequelæ vini subodoratus emunctissimæ naris Theologus, & omnium penè bonorum operum exterminium inferri benè videns oculatissimus Joannes à S. Thoma, dixit opera pietatis, fidei, & justificationis œconomiam compati quidem interdum imperfectionum, & minutiorum peccatorum sordes, aut pulveres, sed non amore illorum elici opera; fieri cum illis, non oriri ex illis. Benè est: atqui adjunctam habere malitiam, compati sordem, malum est, sicut eam non habere sociam, bonum esse nemo inficias eat: Ergo tunc opus habemus mixtum, non purum bonum, sed tantisper viciatum: quod intendimus.

Instabis: Voluntas eleemosynæ, vel jejunii ob vanam gloriam, vel in malis circumstantiis, derivatur à pravo dictamine: Ergo tunc jejunii voluntas non potest esse bona.

Respondeo semper eadem distinctione: Voluntas jejunii assumpti tanquam puri instrumenti vanitatis derivatur à pravo dictamine, concedo; assumpti propter internam honestatem, & amati per modum finis intermedii, nego. Ergo voluntas tunc non est bona, si sit pura electio, concedo; si sit simul intentio, nego. Vel  
iterum:

iterum : Non est bona prout subjicitur fini extrinsecò operantis, concedo ; prout allicitur ab ingenita honestate finis operis per se amati, nego. Vel tertio : Ergo non est bona, si finis transeat in rationem objecti, sicut contingit in opere hypocritarum, concedo ; si finis maneat intra limites circumstantiæ, ut sæpè accidit viris sanctis, nego. Quæ omnia hæcenus perspicuè exposita non debent iterari. Adde solum hæc D. Thomæ verba quæst. 2. de malo, art. 4. ad 2. *Actus bonus potest malè fieri, quia non requiritur quod sit integrum malum, sed sufficit quod sit particulariter malum.*

Instites : Arbor bona non potest malos fructus facere : Ergo eo ipso quod fert fructus malos, desinit esse bona, & fit mala : Sed finis bonus movens ad mala media, fit radix mali : Ergo tunc finis desinit esse bonus, subindeque nulla ex illo refluat bonitas in actum.

Respondeo quod sicut arbor bona edit per se fructus bonos, qui tamen ex accidenti temporis injuriâ, vel aëris inclementiâ, vel loci intemperie, aliisve de causis si non corrumpuntur penitus, certè inficiuntur, vel ex parte alterantur, vel saltem marcescunt; ita ex bona intentione nonnunquam sequitur per accidens opus pravâ electione, vel aliâ perversâ circumstantiâ aliquo pacto vitiatum.

Ad quorum pleniorē & clariorē intellectum diligenter advertendum est, quod sicut in opere bono malâ finis circumstantiâ viciato duo distinximus, rationem puri mediî, & rationem finis intermediî, asseruimusque quod si opus bonum non alia ratione ametur, quàm ut describat malo fini, sitque purum medium ad ejus ac-



sequutionem conducens, tunc actus est totaliter malus, tunc oculus nequam totum operis corpus tenebrosum reddit, tunc non est actus virtutis, sed simulationis, quæ cujus animum semel imbuerit, tota eum virtutum sinceritate & veritate fraudat, non secus ac modicum fermentum totam farinæ, cui injicitur, massam corrumpit, universamque mox conspersionem suo sapore commaculat. Si tamen opus illud placeat ratione honestatis nativæ, nec finis intrinsecus malus transeat in rationem objecti, sed sit non motivum totale, sed vehiculum, calcar & quadante-nus incentivum ad agendum, tunc actus nonnullam ex objecto percipit honestatem. Ita similiter amor finis honesti, ex quo sequitur mala vel vitiata electio, considerari potest vel ut est volitio finis ab ejus honestate illecta, vel ut est causa dicens ordinem ad media. Quatenus est volitio finis honesti, non potest non esse bona, quia amare bonum quæ tale, bonum esse necesse est; quatenus verò ille actus habet rationem causæ moventis & dicentis ordinem ad media indecentia, incipit esse mala. Si autem ille actus haberet solùm rationem motivi ad malum, id est si homo vellet finem illum de se honestum, quatenus est per malum medium obtinendum, & ut movet ad illud, tunc actus esset omnimodis malus, sicut diximus de eo qui mollet objectum bonum, nisi ut serviret iniquitati. Ex quibus facilè responderetur in forma distinctione minoris: finis bonus movens ad mala media fit radix mali; subindeque malus, quatenus amatur ut movens ad mala media, concedo; quatenus amatur ob innatam bonitatem in se & propter se placentem, nego.

Perfistes : Non est de hoc magna difficultas, sed quæritur, utrum electio objecti pravi, puta voluntas mendacii vel furti per se mala, habeat aliquam honestatem ex ordinatione ad finem extrinsecum bonum, puta solatium proximi egentis, vel periclitantis : illa autem electio est incapax omnis honestatis, actus quippe intrinsecè malus nulla potest intentione honestari, nulla circumstantia, nulla utilitate licitus reddi : Ergo actus ex objecto malus nullam ex fine extrinseco percipit bonitatem.

Respondeo sufficere ad veritatem nostræ assertionis, si habeamus aliquem actum in intentione bonum, electione sordidari, ut docet D. Thomas *in 2. dist. 38. q. 1. art. 5.* Et potest exemplis illustrari, in quibus claret electionem labe aliqua inquinatam non extinguere penitus intentionis honestatem. V.g. si quis fervida pœnitentiæ intentione permotus carnem acerbius comprimens, tantisper à modo & medio discretionis recedat, fructum suæ pœnitentiæ non perdet. Si parens, vel Magister zelo disciplinæ in juvenem lascivientem animadvertens paululum in correctione excedat, non continuò suæ sollicitudinis meritum amittit. Si quis ut satisfaciat necessitati, utque Deo validius inservire queat, cibum sumens, nonnihil insidiantī indulgeat voluptati, non illicò suæ temperantiæ & præstitutæ gloriæ Dei laude privatur; aliàs vix ulla daretur unquam honestatis intentio, quæ non in electione deperiret, quia sæpe, & ferè semper exequutionem peccati alicujus venialis furrim subrepentis circumstantiâ comitatur.

Quod si electio sit intrinsecè mala, ut voluntas furti, & mendacii ad sublevandum proximum.

dicendum tunc electionem illam esse omnino malam, quia furtum & mendacium habent ob-  
jectum essentialiter malum; moralitas autem ex  
objecto derivata est essentialis, quæ proinde  
semper manet, ut discurret S. Doctor quæst. 2. de  
malo, art. 4. ad 2. *Illud*, inquit, *quod consequitur*  
*speciem alicujus, semper inest.* Cum ergo actus ho-  
minis speciem consequatur ex ratione objecti, secun-  
dum quam est bonus vel malus actus, sic specifica-  
tus in malo nunquam potest esse bonus, nec specifica-  
tus in bono unquam potest esse malus. Ubi vides,  
actum retinere semper eam, quam ex objecto  
haurit moralitatem. Nihilominus liberandi, vel  
adjuvandi proximi affectus, ex bona intentione  
in electionem illam derivatus & permanens, est  
quidam bonitatis radius, licet nigricans. Cujus  
signum est, quod Deus licet electionem repro-  
bet & puniat, affectum tamen laudat, & remune-  
rat, ut patet in Ægyptiis obstetricibus, quæ licet  
contra præceptum Regis Ægypti conservassent  
mares Hebræorum, tamen accersitæ ad Regem  
id negaverunt, propter conservandum populum  
Dei, & cultum divinum, cui se obsequium  
præstare credebant, unde dixerunt, Exod. 1. *Non*  
*sunt Hebraeæ sicut Ægyptiæ mulieres; ipsæ enim*  
*obstetricandi habent scientiam, & priusquam ad*  
*eas veniamus, pariunt.* Qua in narratione licet  
peccarint obstetrices mentientes, earum tamen  
divini cultus propagandi amorem in illo men-  
dacio permanentem laudavit, & remuneravit  
Deus, cui nihil nisi bonum placere potest. Unde  
ibidem dicitur: *Quia timuerunt obstetrices Deum,*  
*edificavit eis domos.* De quibus mulieribus lo-  
quens D. Thomas 1. 2. quæst. 114. art. ult. ad 2.  
ait: *Obstetrices habuerunt bonam voluntatem*

quantum ad liberationem puerorum, non tamen fuit earum recta voluntas quantum ad hoc, quod mendacium confinxerunt. Ubi Cajetanus: Deus tanta bonitate affluit, ut etiam inter malas nostras voluntates gaudeat se ordinare opera, qua remuneret. Cui sit honor & gloria in secula seculorum.

Ad argumentum ergo dicendum, electionem furti, & mendacii semper esse malam, nunquamve reddi honestam ex bona intentione, quia semper est contra legem & rationem; desiderium tamen proximi vel sublevandi, vel à periculo gravi imminente liberandi in illa electione intermixtum, esse stillam bonitatis à pia intentione promanantem. Unde in hac parte bona intentio imitatur concursum Dei. Et sicut iste attingit actionem intactâ malitiâ, quia malum opus non quâ malum est, sed ut habet aliquam entis bonitatem, producit: ita bona intentio proximo succurrendi, vel gloriam cultus divini propagandi, in malam electionem non quâ malam influit (malum enim ut malum nequit in bonum referri, vel ei deservire,) sed quatenus opus illud materialiter sumptum proximo impendentem mortis vel famis calamitatem depellit & propulsat. Fateor tamen malitiam electionis bona intentione diminui, quia ut ait D. Thomas 2. 2. quæst. 110. art. 2. *Quanto bonum intentum est melius, tanto magis minuitur culpa mendacii.* Et juxta Augustinum lib. cont. mendac. cap. 88. *Pejor est qui concupiscendo, quam qui miserando furatur. In suo quippe genere aliis ejusdem generis peccatis leviora sunt, qua bono animo videntur admitti.*

Sed hîc diligenter unum explicandi modum advertas peroptem, ex quo tota hujus difficulta-

is elucidatio patet. Nimirum, quod cū elicitur actus ex objecto bonus malā circumstantiā vitiat, vel inten- litur finis bonus mala electio- ne deturpatus, semper & in producendo opere bono ob malum finem, & in eliciendo opere malo ob bonum finem interveniunt duo actus, qui tamen pro eodem computantur, quia ubi est unum propter aliud, ibi est unum tantum, ut ait Philosophus. Quam doctrinam perspicuè tradit S. Thomas q. 2. de malo, art. 4. ad 2. *Dare eleemo-  
synam pauperi est actus secundum se bonus, sed re-  
ferre actum huiusmodi ad finem aliquem inordi-  
natum, scilicet cupiditatis, aut inanis gloria, est  
quidam alius actus malus; qui tamen duo actus  
quodam ordine in unum rediguntur.* Ex qua do-  
ctrina omnia argumenta facta, & tota contro-  
versie difficultas evanescit; si enim voluntas or-  
dinans bonum in malum, & e contra, duos actus  
partiales pro lucit in unum velati coalescentes,  
quid mirum si tunc voluntas ratione unius bo-  
na sit, & mala ratione alterius?

Obstites demum: Ergo idem actus erit simul  
meritorius & demeritorius, cui simul debean-  
tur merces & supplicium.

Respondeo, non esse inconveniens quod actus  
bonitati respondeat merces, & malitiæ debeat  
aliqua pœna vel in Purgatorio, si sit malitia ve-  
nialis mixta operibus justorum; vel in Inferno,  
si sit malitia mortalis. Actus autem quā malus  
non est meritorius etiam imperatus à bono fine,  
quia ut talis nequit ordinari per charitatem in  
Deum. Certè Patres, ipse etiam Augustinus non  
semel docent, Romanos orbem unive- sum sub  
suam redigere conditionem meruisse ob præclara  
gesta ex objecto bona, tametsi vanæ gloriæ fine

Prudentia. *Frequenter*, inquit D. Thomas in 2. dist. 27. q. 1. art. 4. *Deus in hoc mundo remunerat eum, qui præmium futura gloriæ non meretur, ut sic nullum bonum irremuneratum inveniatur.*

Resistes demùm, & fortius adhuc insurges: Actus bonus est actus virtutis: Sed actus virtutis nequit ulla ratione esse malus: Ergo non potest dari actus bonus simul, & malus. Probatur minor: Tum quia virtute nullus malè utitur, ut post Augustinam docet D. Thomas *infra*, q. 55. art. 4. addens ibidem ad 5. *Virtute potest aliquis male uti tanquam obiecto, puta cum male sentit de virtute, cum odit eam, vel superbit de ea, non autem tanquam principio usus, ita scilicet quod malus actus sit virtutis.* Tum quia nulla virtus per suam actum potest ferri extra suum obiectum specificativum adæquatum, & multò minùs in illud quod opponitur & repugnat obiecto specificativo illius: atqui actus quacumque ratione malus, non solum est extra latitudinem obiecti specificativi virtutis, sed etiam repugnat obiecto virtutis; virtus enim moralis est perfectio potentie operantis cum subordinatione ad rationem: unde quod non est consonum rationi, est extra sphaeram obiecti illius; quod verò est dissonum, est illi repugnans & infensum. Ergo repugnat habitum virtutis elicere actum qui feratur in malum, vel ex fine, vel ex circumstantiis. Tum quia ut antea obiciebatur, & ampliùs confirmatur, bonitas moralis desumitur ex unica regula, & ex unico iudicio prudentiali, de cuius ratione est ferri in actum vestitum hic & nunc omnibus circumstantiis; unde nequit dictare actum vel minima malitia sordentem, nullumque obiectum potest esse conforme dictamini



prudentiæ, nisi secundum omnia bonum sit. Etenim ad iudicium prudentiale tria potissimè requiruntur. Primum rectitudo voluntatis per bonam intentionem finis; qua de causa prudentia præsupponit virtutes morales, quibus appetitus in ordine ad fines particulares rectus fit, unde actus ex objecto bonus, ad malum finem relatus non potest à prudentia elici, nisi fortè à prudentia carnis, quæ magna imprudentia est. Secundò ad prudentiam requiritur bonum consilium, & iudicium verum de mediis eligendis, ex quo fit prudentiam non posse dictare bonum finem esse per malum medium eligendum; sed hoc est proprium astutiæ, quæ est vitium prudentiæ oppositum. Tertiò necessaria est circumspectio, seu attentio & perscrutatio circumstantiarum hinc & nunc occurrentium, conferens eas cum fine, & mediis ad finem. Unde dictare opus sine ponderatione circumstantiarum, non est actus prudentiæ, sed levitatis, & inconsiderationis: ergo ut aliquid sit conforme dictamini prudentiali, debet illi obsequi secundum omnia, objectum nimirum, finem, & circumstantias; subindeque virtus ulla moralis, quæ immediatè per prudentiam regulatur, nequit influere in actum quacumque ratione malum.

Respondeo actum virtutis ut à virtute procedit nullam sortiiri malitiam, sed bonitatem; sed eundem ut est à voluntate ex parte deficiente, vel à malo habitu se ingerente, posse nonnihil sordium contrahere. Præsertim si tunc juxta ultimum dicendi modum duo actus partiales inveniuntur adunati, quorum unus est fructus virtutis, alter ab habitu vicioso, vel sola voluntate deficiente promanat. Sed ut ut sit, bonitas unius

rationis , seu ( ut dicunt ) unius lineæ , non destruitur nisi per malitiam sibi immediatè oppositam : malitia autem proveniens moderatæ comestioni ex vana gloria non est ejusdem ordinis , seu lineæ cum bonitate temperantiæ , cui vanæ gloriæ status extrinsecus est. Ad id verò quod eruditè additur de prudentia finem , media , & circumstantias moderante , satis superque diximus , actum illum non esse quidem secundum se totum dictamini prudentiæ consentaneum , ac subinde esse & denominari simpliciter malum ; ex parte tamen illi conformari , subindeque actum illum esse *particulariter* duntaxat bonum , ut dicebat S. Thomas. Dictat enim prudentia esse temperatè comedendum , licet non dictet , sed vetet sobrietatem vanâ gloriâ inficere. Et sufficit ad hoc ut actus sit à temperantia , quod non sit difformis dictamini prudentiæ , prout prudentia est regula in particulari temperantiæ ; neque enim per se , & ex propria ratione exigit conformari prudentiæ , ut est regula universalis omnium virtutum ; quia sicut temperantiam habet materia determinatam , ita directione prudentiæ circa illam contenta est. Sanè moderata comestio per se , & propter se amari nequit à mala voluntate , licet ab ea possit inquinari. [Ergo ut talis à virtute eligatur , necesse est. Ex quibus patet nec actum illum ex meritis objecti pensatum esse extra , vel contra latitudinem objecti virtutis , nec adæquatè dictamini prudentiali adversari.

## REFLEXIO.

*Verebar omnia opera mea.* Quia multa pura mala sunt, rara autem, aut fere nulla pura bona sunt: si enim aliqua circumstantia desit, bonum non bene fit. *Omne autem factum*, inquit August. lib. de utilitate credendi, cap. 12. *Si rectè factum non est, peccatum est.* Ergo quanto major es, humilia te in omnibus; quia non sunt opera tua plena, nec juxta D. Paulini expressionem *bonus nummularius* es, nec probabiles cedis nummos charitate signatos, sed vanis circumstantiarum percutis characteribus. Time ne tota nocte laborans nihil capias, nihilque invenias in manibus tuis, qui vir divitiarum tibi ipsi videris. Tam insidiosè, & juxta frequenter in opera nostra irrepunt circumstantiarum sordes, ut vix, ac ne vix quidem sit ullus, qui ab amoris proprii, vel inanis gloriæ cupiditate se extricet; ullus qui ad egregia opera peragenda accingatur, quin prius alicujus gloriolæ, vel commodi flatu non exstimuletur. Quoties dum putamur crucem portare, sic portamus, ut plus habeamus in crucis nomine dignitatis, quam in passione supplicii? Quoties abstinentiæ fluctus intramus, continentiae conscendimus undas, enatamus jejuniorum pelagus, & operis difficultate superatâ, in ipso externarum macerationum portu naufragamus? Ita est, ita planè, ita nimis. Laudari volumus in hac vita; quæ nostra sunt quærimus, à recta placendi Deo intentione ad inanis consolationis cupiditatem transinus, & dum favoris auras captamus, nec ad Deum referimus, ipsi quod suum est furamur.

Operari sequitur esse, & quia in iniquitatibus concepti sumus, & in peccatis conceperunt nos matres nostræ, hinc opera nostra sordibus confersa sunt. Maneat ergo oportet in hac vita sollicitudo quædam ac tremor, ut illud impleatur Apostoli præceptum: *Cum timore, & tremore vestram salutem operamini*. Sic affecti in ipsis bonis operibus positi trepidemus, ac ne in eisdem occulto aliquo errore displiceamus, continuis lamentis vacemus; quia semper & ubique nobis suppetit unde Deo dicamus: *Ignorantias nostras ne memineris, & ab occultis nostris munda nos Domine*. Opportunè, & ve è, sed terribiliter Mignus Gregorius lib. 5. Moral. cap. 6. Sæpe unde placari iudex creditur, inde ad irascendum placidus, intigitur, Salomone actante, qui ait: *Est via qua videtur homini recta, & novissima illius ducunt ad mortem*. Unde sancti viri cum mala superant, sua etiam benè gesta formidant, ne cum bona agere appetunt, de actionis imagine fallantur; ne pestifera labes putredinis, sub boni specie lateat coloris. Sciunt enim quia corruptionis adhuc pondere gravati dijudicare bona subtiliter nesciunt; & cùm ante oculos extremi examinis regulam deducant, hac ipsa in se nonnunquam & qua approbant metuunt, & tota quædam mente interna desiderant; sed tamen de incertitudine operum trepidi, quò gradiuntur ignorant.

Heu nos miseros, & fatali peccandi necessitate captivos! Quis nos liberabit à corpore mortis hujus, corpore corruptionis, in quo mala pura agere sæpè sentimus, pura bona vel raro, vel nunquam elicimus? Proh durum & intolerabile concupiscentiæ pondus, quo gravati pura bona agere nec sinimus, nec valeamus.




Bonum ex omni parte integrum non invenitur in terra viventium, quia ut ipsemet ratione duce Philosophus agnovit, uno solo modo contingit honesti operis rectitudo, peccatum autem infinitis modis subrepere valet, & sæpissimè insidiatur. Benè agere simpliciter, & omnibus modis uno duntaxat pacto contingit; sed peccare tot modis accidit, quibus subintrare quit circumstans nos undique peccatum. Tangere signum, & in scopum rectè collimare haud parum difficile est, quia unico modo centrum attingitur: ab ipso verò non ægè recedes, cum sint infinitæ lineæ à centro ductæ, sed quæ signum nequaquam sunt.

Ergo si sapias, time ne dum vigilans tentatoris insidiæ, ibi subrepat elatio, ubi proficere creditur devotio. Quanto magis in mandatis Dei te crescere arbitraris, tanto graviores tibi suppetunt causæ formidinis. Ne de ipsis prohibitatis verisimilibus incrementis mens tua sibi blandiens, in frivolæ vanitatis rapiatur excessus, & fiat immunda vanitate, dum sibi videtur clara virtute. Ne rursus ipsis operibus pietatis elata deferatur ope gratiæ, & remaneat in infirmitate naturæ. Scito ergo, & nullatenus dubites, quod inflatio, quod ambitio etiam fucata, quod propriorum bonorum, vel communitatis tuæ colore zeli latens, sed superba defensio possunt bonum sin omnino destruere, certè non mediocriter dedecorare. Scito, quod dum mala miscentur bonis, fortassis malitia inundans absorbet guttulas bonitatis, & evacuat merita, si ad illum de corde puro & optimo non referatur victoria laudis, à quo scire debent omnes se vires accepisse certaminis; si to-

tum quidquid sunt, misericordiæ ejus non alle-  
rant, qui est & coronæ author, & certaminis  
opitulator. Profectò imprudens eris, si innixus  
prudentiæ tuæ illi non fidem, spem, charita-  
témque, atque bonorum omnium operum  
committas puritatem, à quo bona cuncta pro-  
cedunt; cujus gratia ad bona permovet, cujus  
justitia mala tegit; qui pro nobis mortem se-  
mel vicit, & mortis reliquias semper vincit in  
nobis; qui militantes servos non tantùm spe-  
ctat, sed & luctatur in illis; in illis ipse congre-  
ditur; ne cadant, ipse tenet; cùm ceciderint,  
ne collidantur supponit manum suam. *Ipsc, in-  
quit Cyprian. epist. 9. in certamine agonis no-  
stri & coronat pariter, & coronatur.* Coronat  
Christus operis bonitatem; coronatur, quia  
misericordiâ suâ, & effusi cruoris copiosâ re-  
demptione irrepentium tegit labecularum ini-  
quitatem.







## DISSERTATIO III.

*De novello probabilitatis commento.*

ONSTITUTIS superiori disserta-  
tione regulis honestatis unanimi  
Theologorum calculo probatis  
novam adjecere vel substituere re-  
centiores antiquis omnibus incognitam, quâ  
puras Christianæ Ethicæ normas teneris, ce-  
reis, flexibilibus, & in quancunque velis for-  
mam ductilibus institutis dum mollire conati  
sunt, vel depravaverunt penitus, vel certè ad  
nihilum redegerunt. Celebrem illam intelligo  
probabilitatis assertionem, quâ nulla hujus sæ-  
culi post hominum memoriam corruptissimis  
moribus vel commodior, vel favorabilior, vel  
exoptatior potuit inveniri. Hujus etenim qua-  
estionis ramos persequenti manifestè pellucet  
advenisse tempus illud ab Apostolo prænutia-  
tum, quo hominibus sanam doctrinam non su-  
stinentibus, & ad sua desideria magistros pru-  
rientes auribus sibi coacervantibus fons proba-  
bilissimi apertus est; unde tot aberrationes, tot  
doctrinæ moralis flagitia scaturierunt, & innu-  
mera in dies scaturiunt, & in posterum scatu-  
rient magis, si ad opiniones securitate donan-  
das humanum sufficiat ingenium, nullis seve-  
rioris doctrinæ repagulis coercitum, sed la-  
xissimis volaticæ probabilitatis prolebus fu-

cato verisimilitudinis colore illis permissum.

Ut igitur lata porta & spatiosa, quæ ducit ad perditionem, obstruatur; ut præcludatur ingens ille ad omnem corruptelam aditus; ut retegatur pestiferum illud venenum, eo à nonnullis incautiùs, quo suaviùs obblibitum; ut denique securis ad radicem admoveatur, hic, vel nunquam recurrendum est ad puros Ecclesiæ Catholice fontes, ne si fortè incorrupto Romanæ Ecclesiæ lumini propriæ mentis lumen, aut potius tenebras anteponamus, in varia citò præcipitia ruituri de via veritatis exorbitemus. Quocirca tam momentosum totius Ethicæ Christianæ cardinem iis omnibus munive præsidis operæpretium est, quibus Ecclesiastica quævis veritas roborari potest. Et accitis cunctis Theologiæ locis, iis eam Scripturarum oraculis astruemus, eo perpetuarum traditionum consensu firmabimus, eo argumentorum pondere, ea vi Deo dante evincere confidimus, ut post tot probationum momenta nemo prudens dubitare queat, quin arbitraria in rebus moralibus inducta licentia à paucis lustris invec̃ta, sed in dies ad Christianæ pietatis excidium, & Catholicî nominis dedecus grassans firmis æternæ legis aggeribus cohibenda sit, postquam planum visum fuerit & apertum, novitium Probabilistarum inventum & divinæ authoritati, & Patrum documentis, & Sanctorum exemplis, & bonorum praxi, & ipsius rationis lumini, & ferè totius naturæ voci adversari.

## CAPVT I.

*Novitium probabilitatis commentum  
petitis ab authoritate argu-  
mentis evertitur.*

**A**Ntequam sacræ authoritatis testimonia, quæ primum, & supremum apud omnes Theologos occupant locum, in hoc priori capite expendamus, in sequenti rationibus veluti auxiliaribus copiis acturi, facturum me operæpretium existimavi, si præmissio præsentis controversiæ statu, Lectori in ipso limine certis prius principiis constitutis appareret quid impugnandum, quidve propugnandum suscipiamus.

Præmoneo 1. quod licet omnes sententiæ, siue speculativæ, siue morales, in se spectatæ sint veræ vel falsæ, quia reipsa sunt objecto suo vel conformes, vel diffformes; tamen quia sæpe sæpius nec veritas, nec falsitas certò percipitur, ideo præter sententiam veram, cujus certa veritas nobis patet; præter sententiam falsam, cujus falsitatis convicti sumus, datur alia sententia probabilis, quæ in se revera, & coram Deo vera aut falsa est, respectu tamen intellectus nostri rem penetrare non valentis, est tantum probabilis; quia licet ignoret verane, an falsa sit, verisimilitudinis tamen specie vestitur. In qua probabilitate latitudo g. adualis omninò

invenitur. Cum enim opinio sit probabilis, quia assertioni illi aliqua verisimilitudo inest, vel saltem ei attribuit intellectus veritatem objectivam, minimè persuadens, fit inde eo magis, minusve probabiles sententias apparere, quo pro diversitate luminis, vel humanæ mentis tenebrarum, magis vel minus controversiæ difficultas, & rei objectiva veritas perspicitur. Unde sæpè contingit, ut ea quæ uni probabilia, alteri probabiliora sunt, alteri certa & explorata videantur; quia major, vel minor luminis abundantia certa à dubiis, clara ab obscuris tanto discernit, quanto fuerit intellectus perspicacior; & affectus purgator.

Præmoneo 2. quod etsi duæ propositiones contradictoriæ non possint simul esse veræ, aut falsæ, ut lumine naturali constat; tamen ambæ contradictoriæ possunt probabilitatem præfatam sortiri: imò nulla propositio potest intra solius probabilitatis fines contineri, quia ejus opposita sit probabilis; quia eo ipso quod aliqua opinio est alicui tantum probabiliter, & non certò vera, ejus opposita non potest apparere certò falsa, aliàs prior appareret certò vera; certæ enim falsitati opponitur certa falsitas. Quod totum ex præmonitione superiori claret; quia sententia probabilis ea est, quæ opinanti non apparet evidenter & certò vera aut falsa, sed veri colore induta. Utraque ergo contradictionis pars verisimilis esse potest, licèt necessariò una vera, altera falsa existat.

Difficultas ergo modò est, utrum probabilitas sententiæ etiam falsæ, & æternæ legi & juri naturali reapse repugnantis, etiam in concursu probabilioris & turioris pro lege stantis sit recta

regula bonæ operationis, & ad conscientia securitatem sufficiat. Affirmant recentiores non pauci, licere cuique eam opinionem tutâ conscientia sequi, quæ probabilis sit, id est quæ non appareat evidenter falsa, ut ait Caramuel, quæ ratione, vel authoritate alicujus momenti nitatur, modo ex altera parte nihil appareat convincens, etiam opinione probabiliore reiecta, etiam omilla tutiore, etiam communi. Quia, inquit Tamburinus, dum probabilitate, sive intrinseca, id est rationi innixa; sive extrinseca, id est authoritate alicujus docti & pii munita, quantumvis confisi aliquid agimus, semper prudenter agimus.

Ex quo inferunt, ex falsa opinione, modò nonnullis Casuistis judicetur probabilis, quemlibet in jus naturale peccantem excusari: fas etiam esse minùs probabilem, & minùs tutam sententiam in conspectu probabilioris & tutioris cognitæ & repulsæ eligere: posse item consultum de aliquo casu Doctorem prudenter juxta minùs probabilem, minusque tutam, sprete suâ probabiliore, consilium dare. *Etsi*, addit Hermannus Busembaum in editione vigesima sue medullæ Theologiæ, lib. I. tract. I. cap. 2. dub. 2. *ad inconstantia notam fugiendam expediat virum doctum respondere semper secundum eadem principia, potest tamen vir talis consultus significare consulenti opinionem à quibusdam doctis tanquam probabilem defendi, quam proinde ipsi sequi liceat: quumvis ipse consultus eandem speculative falsum esse judicet, & proinde in praxi ipse sequi non audeat.* Quorum omnium consensu, aliorumque sine fine, numero, & modo pullulantium, sive fornicantium una ra-

tio omnibus loco hastæ & clypei est, quia opinio probabilis est regula tuta, ex qua qui vitam suam dirigit, non modò securus existit, sed etiam æternam vitam promereri, & rectà ad superos tendere possit.

At contrà veri S. Thomæ Discipuli, tanti Doctoris vestigiis à Sanctis Patribus designatis inhærentes huic novitati capitaliter adversantur, quia credunt hoc novo probabilitatis commento lascivientibus ingeniis ad depravandam Evangelii castimoniam laxissimas habenas remitti, ruinam Ecclesiasticæ disciplinæ imminere, tantamque in Theologia stragem edi, ut quomodo cum eo Romanæ Ecclesiæ fides, pietas, disciplina consistere possint; omninò non videant. Unde contendunt in primis, nulla opinione quovis probabilitatis fucò oblita neminem in jure naturali excusationem posse obtendere, præsertim si minùs probabili, minùsque tutæ sententiæ, relictæ probabiliore, & tutiore, adhærescamus; proindeque illicitum esse ad conscientiam consulta ex sententia quæ speculative falsa creditur consilium dare, quia consulenti gravior est & optatior, ut ex decursu magis magisque liquebit. Verùm ut tantæ molis opus solidè exstruamus, jacienda sunt altissima conscientiæ fundamenta, quibus tota ista controversia subnixa est.





## SPECVLATIO I.

*Definitio, divisio, & obligatio conscientia pramittuntur.*

**N**ihil conscientiam notius, nihil conscientiam obscurius: nihil quidem eam notius, quam nemo caret, si homo est; quam nemo non videt, si cæcus non est; nemo non sentit, si penitus insensibilis non est, aut insensatus. Quid conscientia lege apertius, quæ non tam lata est homini, quam nata; non accepta de foris, sed indita in intimis; non incisa lapidibus, sed cordis inscripta membranis? Quid clarius lumine vultus divini, æterni solis radio, increati Verbi vibrato splendore, imagine Deitatis, Trinitatis apographo, creaturæ rationalis charactere? Lumine, inquam, non humano, sed divino; radio non fluxo, sed stabili; splendore non caduco, sed perenni; imagine non mortuâ, sed vivâ & spirante; apographo non adulterato, sed fideli; charactere signato, ne defluat; impresso, ne eruat; inciso, ne deleatur; insculpto, ne eradatur; aperto, ut legatur; conspicuo, ut dirigat, & spectetur?

Verum quid conscientiam obscurius, quæ abyssus est multa, profundum inexhaustum, mare immensum, sinus inscrutabilis, anfractus sinuosus, interior domus densis septa tenebris, scrinium impervium, conclave secretissimum, labyrinthus mille meandris intertextus? Ita est, conscientiam sentimus & experimur, sed vix

definimus, & ut benè ait P. Labbé ingeniosissimus Societatis Theologus: *Sola conscientia est quæ præfari non amat*, quia hoc ipsum repugnare sibi conscientia putat, si laudetur, *quia mavult facere magna, quàm dicere*. Non avet conscientia fucatam verborum lenociniis orationem, quæ fucos odit, non quarit concinnos culti sermonis lepôres, non amat blandientis oratoris mella, non timet indignantis impetus; quia ipsi neglecta decoris cura plus placet, se ornata[m] credit, dum non affectat ornatum, nec blanditur nisi sincerè, nec irascitur nisi justè. Grammaticæ leges spernit conscientia, ne sit vana; Poësis metros, ne sit ficta; Rhetoricæ pompam, ne sit turgida; Philosophiæ argutias, ne sit curiosa; Scholasticorum distinctiones, ne sit casuistica; scrupulorum nænias, ne sit superstitiosa. Studet simplicitati, quæ non fallit; puritati, quæ non fallitur; prudentiæ, quæ non errat; orationi, ne aberret. Ut tamen de illa aliquid dicamus, quæ semper in corde loquitur, quidquid de ipsa à Theologis disputari solet, brevitat[is] & claritat[is] gratiâ sequentibus interrogationibus exponemus.

*Quares primò, quid sit conscientia?*

Respondeo conscientiam esse actum intellectus practici ex principiis synteresis deducens conclusionem syllogismi prudentialis, dictantem hîc & nunc quæ agenda sunt. Explicantur singula. Dicitur *actus*, & non habitus, ut existimavit Scotus. Tum quia possumus benè agere sine habitu, sed non sine conscientia. Tum quia conscientia sæpe deponitur & mutatur: potentia

autem est inseparabilis, & habitas difficilè mobilis. Tum quia conscientia est quoddam dictamen applicans scientiam ad actum; applicatio autem non fit sine actu, etiam habitu iuxistente. Tum quia ad conscientiam pertinet instigare, ligare, accusare, remordere, excitare, quæ omnia actum sonant.

Dicitur *actus intellectus*, & non voluntatis, ut opinatus est Durandus. Tum quia Scriptura ait, *Conscientiam testimonium reddere*, Rom. 9. & *scire*, Eccles. 7. Tum quia actus memorati pertinent ad intellectum. Tum quia Patres conscientia ea asserunt, quæ nonnisi actui intellectus possunt convenire. Conscientia, inquit Tertullianus, est *naturalis tabula*, in qua legit unusquisque opus suum, & agnoscit quod scripsit. Est *lex intellectus*, inquit Damascenus, quam ratio promulgat voluntati. Est *spiritus corrector*, & *anima pedagoga*, teste Origene; *naturale iudicatorium anima*, & *testis fidelissimus*, ut Basilio & Chrysostomo placet. Est *corde scientia*; inquit Bernardus, non in corde nata, sed circa cor dirigendum occupata. Dicitur *actus intellectus practici*, non verò speculativi; non enim sistit in contemplatione operis faciendi, sed instigat ad bonum, retrahit à malo, inferiores facultates ad opus accingit, nec solum præluce operantibus ne fallantur, sed etiam stimulos addit, ne otientur. Additur, *ex principiis synteresis deducens conclusionem syllogismi prudentialis*. Quia in processu voluntatis synteresis quæ est habitus primorum principiorum practicorum à natura inditus, majorem format, & mediantibus principiis particularibus in minori propositis conscientia elicit conclusionem; & teste Hieronymo, conscientia

est *scientilla animæ*, quam ratio silicem verocorando exprimit.

Denique dicitur conscientiam elicere conclusionem *dictantem hic & nunc quæ agenda sunt*. Quia ad conscientiam non sufficit consideratio bonitatis & malitiæ actuum humanorum in communi, nisi sit motio & applicatio ad opus, quâ inclinatur animus volens, impellitur nolens, adjuvatur laborans, reluctans arguitur. Ratio agenda examinat, virtus eligit, conscientia promulgat & imperat; & si voluntatem videat inobedientem, adversariam se gerit, ut arguat; testem, ut convincat; judicem, ut damnet; vindicem, ut castiget; tortorem, ut cruciet; vermem, qui non moriatur. Si verò voluntatem obtemperantem advertat, sed segnem & torpentem, proponit honestatem, ut moveat; utilitatem, ut persuadeat; mercedem, ut invitet; coronam, si vincat. O dictamen forte, & juxtà suave! illustre; & igneum; justis amabile, impiis terribile; apud quod non moritur omne quod gerimus: *cūque non habeat loquendi usum, nescit tamen tenere silentium*, ut ait Viçtor Carnotensis lib. de pœnitentia.

Dices: Omnis actus vel generat habitum, vel ex aliquo habitu generatur: Sed per nos conscientia est actus: Ergo generat aliquem habitum, vel ab aliquo producit; qui habitus generans vel genitus, conscientia est.

Respondéo actum conscientiæ procedere ab habitu sapientiæ, & scientiæ, ut docet S. Thomas q. 17. de verit. art. 7. ad 4. quia conscientia est scientia cum aliquo modo, nempe applicatione ad opus; unde geminatis conscientiæ actibus non producit novus habitus à scientia distia-

ctus, sed habitus scientiæ perficitur & extenditur, sicut intellectus speculativus fit extensione practicus; unicus enim est in homine intellectus, si spectetur entitas; quasi duplex, si virtus attendatur: ut speculativus, præcisionibus & abstractionibus contentus est; ut practicus, se accingit ad opus, & non secus ac primum mobile inferiores sphaeras secum rapit, sic intellectus practicus omnes animæ facultates ad opus pertrahit. Et quod in intellectu distinguimus, idem proportionaliter in habitu scientiæ contingit.

Instabis: Multa dicuntur de conscientia, quæ aliquid habituale exigunt: nam conscientia dicitur subjectum peccati, ad Titum 1. *Inquinata sunt eorum mens, & conscientia.* Subjectum autem significat vel potentiam, vel habitum, vel aliquid pertinens ad actum primum. Conscientia etiam semper in homine perseverat, etiam dormiente, in quo nullus est actus: Ergo conscientia non est actus.

Respondeo, conscientiam non dici subjectum peccati, quamvis dicatur inquinari à peccato; per hoc enim contrahit sordes mala conscientia, quod ad malum inclinat, & quia ex corruptione voluntatis oritur pravum dictamen intellectus. Unde ab Apostolo 1. *Timoth. 4.* appellatur conscientia *cauteriata*; quia ut ibi exponit D. Thomas: *Cauterium est corruptio in carne per ignem, ex qua egreditur continuè putredo; ita ex igne perversa voluntatis, ira, odii, concupiscentia ulceratur conscientia, & egreditur falsa doctrina;* falsa, inquam, si non in speculatione, saltem in exercitio & praxi, cum aliqui consentiant se nosse Deum, factis autem negant. Nam *sicut habens scientiam in universali potest errare in particulari,*

particulari, ita habens fidem in universali, in particulari tamen agibili corrumpitur propter corruptionem affectus, inquit idem Angelicus Doctor in expositione illius loci ad Titum. Ad id quod additur, conscientiam semper manere, respondeo manere non formaliter, si nullus est actus, sed virtualiter in suo principio habituali permanente, vel moraliter in hominum æstimatione, apud quos conscientia bona, vel mala tandiu dicitur remanere, quandiu non retractatur.

Ex his intelliges bonam esse definitionem conscientia, quam tradit P. Mercorus 1. part. art. 1. *Conscientia est iudicium praeconsultatum & certum, immediate directivum humanae operationis.* Dicitur *iudicium*, non imperium per modum exequentis, *Fac hoc*; quia istud semper sequitur operatio, & dictamen conscientia sapientius voluntas respuit: habet tamen aliquid de imperio per modum indicativi, *hoc est faciendum.* Dicitur *praeconsultatum*, quia conscientia supponit circumspectionem circumstantiarum. Dicitur *certum* certitudine morali, quæ necessaria est ad rectam operationem. Denique dicitur *immediate directivum operationis humanae*, quia conscientia, ut antea dicebamus, est conclusio particularis, qua ex regulis moralibus per se notis, & per principia proxima applicatis scientia moralis applicatur operationi hinc & nunc. Unde patet quod in sententia Thomistarum, actum conscientia sequitur actus imperii, qui est ultimus actus prudentia.



*Quare secundò, quotuplex sit conscientia?*

Respondéo, conscientiam dividi communiter in certam, dubiam, probabilem, rectam, erroneam, scrupulosam, & laxam. Cujus multiplicis divisionis ratio ex ipsa conscientiae definitione consequitur; cum enim conscientia sit judicium dictans voluntati quæ agenda sunt, tot modis accipi potest conscientia, quot intellectus in dijudicanda operis honestate se habet: intellectus autem aliquando determinatum judicium fert de objecti honestate vel malitia, & tunc est conscientia certa; interdum anceps & pendulus neutri contradictionis parti adhærens suspendit judicium, & tunc est conscientia dubia; quandoque determinatè de aliqua sententia judicat, quia sibi verisimilis apparet, formidat tamen de opposita, & tunc est opinativa conscientia: quod si judicio rationis veritas objectiva, & conformis ad rationem & legem æternam cor respondeant, tunc est conscientia recta; si verò aliter judicet de objecto, quàm sit à parte rei, dicendo bonum malum, & malum bonum, tunc est conscientia erronea: qui error si oriatur ex levissimis animæ se superstitiosè torquentis ratiunculis, dicitur conscientia scrupulosa ( si tamen non suspendat judicium, quia si hæret scrupulosi judicium, conscientia ejus ad dubiam reducitur, non apparentem, sed frivolam & irrationabilem. ) Si autem error ex inordinato corruptæ voluntatis affectu, vel effrænato lascivientis passionis æstu, vel ex affectata crassæ ignorantie culpa, vel ex nimio placendi

hominibus, laxandarumque concupiscentiæ habendarum studio nascitur, dicitur laxa. Fateor tamen, quod quia, ut antea vidimus, conscientia secum fert iudicium certum, ideo conscientia dubia, probabilis, & scrupulosa vix conscientiæ nomen promerentur: cuius signum est, quod quis operans in dubio, & minus tuta sequens peccat, quia contra conscientiam rectam operatur; & tamen operatur ex dubia conscientia: nemo autem habet simul duas conscientias, sed unam cui obtemperat, vel refragatur.

*Quares tertio, an & quomodo conscientia erronea liget, vel excuset?*

Respondeo expositione articuli 5. & 6. q. 19. i. 2. S. Thomæ. Sciendum igitur primò voluntatem agentem contra conscientiam erroneam non depositam, semper peccare. *Dicendum*, inquit S. Doctor art. 5. *quod simpliciter omnis voluntas discordans à ratione, siue recta, siue errante, semper est mala.* Ratio est, quia ut voluntas sit mala, etiam dum fertur in objectum ex natura sua bonum, sufficit quod prosequatur objectum iudicatum hîc & nunc malum, ratione & conscientia dictante illud esse illicitum; voluntas enim non fertur in objectum nisi ut propositum à ratione, & moralitas non pendet ab objecto, nisi ut à ratione exhibito voluntati cæcæ: Ergo si conscientia dictante aliquid esse malum voluntas in illud fertur, procul dubio peccabit, quantumvis objectum illud suapte natura honestum sit. *Omne enim quod non est ex fide, id est conscientia, & maximè quod est contra fidem, seu conscientiam, secundum Apostolum Rom. 14. ita à Patribus*

intellectum, peccatum est; qui & ibidem docet cibi esum per se innoxium, ei fieri prohibitum & immundum, qui conscientiam erroneam existimat esse vitium: *Si manduca verit, damnatus est, quia non ex fide.* Unde D. Thomas laudatus: *In bonum non fertur voluntas, nisi secundum quod à ratione proponitur. Si ergo proponatur ut malum à ratione errante, fertur in hoc sub ratione mali; unde voluntas erit mala, quia vult malum, non quidem id quod est malum per se, sed id quod est malum per accidens, propter apprehensionem rationis.* Et tunc peccatum illud reducitur ad speciem malitiae sub qua apprehendit objectum illud.

Nec obest quod opus illud sit legi aeternae consentaneum, cui lex conscientiae subordinari debet. Non obest, inquam; quia, ut optimè tradit idem Angelicus Doctor, lex aeterna non derivatur in nos, nec promulgatur voluntati nisi mediante ratione. Unde non solum legi aeternae, sed etiam rationi conveniens debet esse voluntatis actus, ut sit bonus. Et licet iudicium erroris non derivetur à Deo; tamen ratio errans iudicium suum proponit nomine Dei ut verum, & consequenter ut à Deo derivatum, à quo est omnis veritas. Certè quando praeceptum Imperatoris non nisi mediante Proconsule innotescit populo, Proconsuli e mentita Imperatoris auctoritate abutenti parendum foret; quia licet inferioris potestas non obliget, dum superioris praecepto adversari cognoscitur: *Si quis tamen crederet, inquit, quod praeceptum Proconsulis esset praeceptum Imperatoris, contemnendo praeceptum Proconsulis contemneret praeceptum Imperatoris.* Et similiter si aliquis homo cognosceret, quod ratio humana diceret aliquid contra pra-

*ceptum Dei, non teneretur rationem sequi, sed tunc ratio non totaliter esset errans; sed quando ratio errans proponit aliquid ut præceptum Dei, tunc idem est contemnere dictamen rationis, & Dei præceptum.*

Instabis: Ergo ex conscientia erronea obligabimur ad malè operandum; & ad æternam Dei legem violandam: consequens videtur absurdum, quia in homine non potest esse obligatio ad opposita, quia sic ex necessitate peccaret, & foret perplexus; sive enim sequeretur conscientiam, sive contra eam operaretur, semper peccaret.

Respondeo, quod quia habere conscientiam de re aliqua facienda, nihil aliud est quàm æstimare Deum illud præcipere, omnino sequitur eum qui non facit id ad quod conscientia inducit, peccare mortaliter, non ex genere operis, sed ex intentione operantis; conscientia enim obligat non virtute propria, sed virtute præcepti divini: unde non mirum si per accidens virtute præcepti divini obliget ad malum, quod conscientia proponit tanquam præceptum à Deo: non mirum etiam, hominem tunc, quocumque se vertat, peccare; quia ut optimè discurrit S. Thomas art. 9. ad 3. *Sicut in syllogisticis uno inconuenienti dato, necesse est alia sequi, ita in moralibus uno inconuenienti posito, ex necessitate alia sequuntur.* Sicut supposito quod aliquis querat inanem gloriam, sive propter inanem gloriam faciat quod facere tenetur, sive dimittat, peccabit. Nec tamen est perplexus, quia potest intentionem malam dimittere. Et similiter supposito errore rationis, vel conscientia, qui procedit ex conscientia non excusante, necesse est quod sequatur

*malum in voluntate ; nec tamen est homo perplexus , quia potest ab errore recedere , cum ignorantia sit vincibilis , & voluntaria. Nec propterea inferas , Deum obligare ad peccatum , sed tantum conscientiam errantem proponere ut bonum & præceptum à Deo , quod revera malum & prohibitum est.*

Sciendum secundò , quod licet agere contra conscientiam , etiam errantem , sit semper peccatum ; tamen agere juxta conscientiam errantem non continuò excusatur à peccato. Quia ut discurret S. Thomas *art. 6.* eo modo excusat conscientia erronea , quo ignorantia propter quam errat : Sed ignorantia non semper excusat à peccato , quia sæpe sapius est volita , vel directè , vel indirectè : directè quidem , quando voluntas expresse & explicito actu vult ignorare : indirectè verò , quando voluntas illud scire negligit , quod scire tenetur : Ergo qui agit juxta conscientiam erroneam , non continuò excusatur à culpa , tamen ille qui agit contra conscientiam erroneam semper labatur in culpam.

*Quæres quartò , quanam , & cujus rei ignorantia excuset , vel accuset voluntatem juxta conscientia errantis dictamen operantem ?*

Respondeo , gravissimam hîc , & ferè totius Theologiæ Moralis difficillimam quæstionem proponi excutiendam ; sed quia ea opportunè importunè abutuntur Probabilistæ , indeque suas laxitates colore oblinunt , ad penetrandum , vel potiùs exsiccandum tam virulentum proba-

bilisticæ facis fontem, ex eoque manantes corruptelarum rivos exhaustiendos, operæpretium est pauca, sed selecta ex S. Thoma documenta hinc inde deprompta libare.

In primis docet S. Præceptor, ignorantiam facti citra negligentiam excusare à peccato, subindeque voluntatem tunc rationi erranti concordem non esse malam. Sic docet art. 6. *Si sit error qui causat involuntarium proveniens ex ignorantia alicujus circumstantiæ absque omni negligentia, tunc talis error rationis vel conscientiæ excusat ut voluntas concordans rationi non sit mala.* Idque explicat hoc exemplo: *Si ratio erret in hoc quod credat aliquam mulierem submissam esse suam uxorem, & ea petente debitum, velit eam cognoscere, excusatur voluntas ejus ut non sit mala; quia error iste ex ignorantia circumstantiæ provenit, qua excusat, & involuntarium causat.*

Docet secundò S. Thomas, quod si ignorantia sit aliquo pacto voluntaria, sive directè, sive indirectè, tunc voluntas malum prosequens peccat, etsi ratio & conscientia dictent illud esse bonum, & licitum. Et satis apertè innuit S. Doctor tunc semper errorem esse culpabilem quando provenit ex ignorantia alicujus juris, quod aliquis scire tenetur; & semper esse reum negligentiae, quoties error provenit ex ignoratione legis, præsertim naturalis. Si ratio, vel conscientia, inquit articulo mox citato, erret errore voluntario, vel directè (quando nimirum actus voluntatis fertur in ignorantiam, quam amat, ut antea dixerat) vel propter negligentiam, quia est error circa id quod quis scire tenetur; tunc talis error rationis, vel conscientiæ non excusat, quin voluntas concordans rationi, vel conscientiæ sic erran-



*si sit mala, eo quod error iste provenit ex ignorantia legis Dei, quam scire tenetur.*

Ubi S. Doctor discrimen assignat inter ignorantiam juris & facti, seu circumstantiarum; asseritque ignorantiam facti, putà mulieris suppositæ, excusare si sit *absque omni negligentia*; ignorantiam verò legis quam homo scire tenetur, non excusare: putà si ratio errans dicat, quod homo teneatur ad uxorem alterius accedere, quia error iste provenit ex ignorantia legis Dei, quam scire tenetur. Nec addit errorem juris, quod homo scire tenetur, accusare si sit negligentia, & excusare si desit; sicut hanc exceptionem adjecit dum loquutus est de ignorantia facti; sed supponit semper adesse negligentiam culpabilem quando est ignorantia ejus juris quod homo scire tenetur, quia ut addit solutione ad primum, ad hoc: ut opus sit malum, sufficit vel quod apprehendatur ut malum, vel quod reipsa malum sit, tamen si bonum erroneè judicetur: ut verò opus bonum sit, utrumque omninò necessarium est; quia nimirum verum malum non justificat error, & bonum malè eligitur, si malum esse putatur. Cujus ratio est, inquit S. Thomas ad Galat. 5. lect. 1. *quia habere conscientiam de re aliqua faciendâ, nihil aliud est, quàm astimare quod faciet contra Deum, nisi illud faciat: facere autem contra Deum, est peccatum. Sic ergo dico, quod nisi faceret hoc ad quod inducit conscientia, peccaret mortaliter, non quidem ex genere operis, sed ex intentione operantis. Et similiter si facit, peccat quia hujusmodi ignorantia non excusat, cum sit ignorantia juris. Nec tamen est perplexus simpliciter, sed secundum quid, quia potest deponere erroneam conscientiam. Sed de his plenius quaesito sequenti.*

Docet, tertio D. Thomas *suprà*, *quest. 6. art. 2.* ignorantiam tripliciter se habere ad actum voluntatis, uno modo concomitanter, alio modo consequenter, tertio modo antecedenter. Concomitanter se habet ignorantia, quando ignorantia accidit actioni, quam producere æquè comparata est voluntas, sive sciat, sive nesciat; unde ad agendum ignorantia non inducit: v.g. si aliquis volens occidere hostem, factâ tamen diligentia putat se occidere cervum, quanvis revera hostem latitantem in sylva interficiat, tunc ignorantia non causat involuntarium, cum ex ea nihil fiat repugnans voluntati; nec voluntarium, seu non voluntarium facit, quia non potest esse actu volitum quod factâ diligentia ignoratum est. Consequenter autem se habet ignorantia, vel quando actus voluntatis fertur in ignorantiam, sicut cum aliquis ignorare vult, ut excusationem peccati habeat, aut ut non retrahatur à peccando; & tunc prodit quasi ex adipe iniquitas scientiam viarum Domini nolens: vel quando quis potest scire, & debet; sic enim non agere, & non velle, voluntarium dicitur, ut *suprà* dictum est. Hoc igitur modo dicitur ignorantia, sive cum aliquis actu non considerat quod considerare potest, & debet, quæ est ignorantia mala electionis, vel ex passione, vel ex habitu proveniens; sive cum aliquis notitiam, quam debet habere, non curat acquirere; & secundum hunc modum ignorantia universalium juris, quæ quis scire tenetur, voluntaria dicitur, quasi per negligentiam proveniens. Et tunc ignorantia cum sit aliquo modo voluntaria, non causat simpliciter involuntarium, sed secundum quid, ut addit S. Docto. *In quantum precedit motum voluntatis ad aliquid agendum,*

*quod non esset scientia presente.* Antecedenter autem se habet ad voluntatem ignorantia, quando nullo modo est voluntaria, & tamen est causa volendi quod aliàs non vellet: *Sicut*, inquit D. Thomas, *cùm aliquis homo ignorat aliquam circumstantiam actus, quæ non tenebatur scire, & ex hoc aliquid agit quod non faceret, si scires: putat cùm aliquis diligentia adhibitâ, nesciens aliquem transire per viam, projicit sagittam quâ interficit transcurrentem, & talis ignorantia causat involuntarium simpliciter.* Ex qua doctrina S. Doctor sibi constans tradit, sufficere ad hoc ut ignorantia sit consequens, subindeque causa peccati, & voluntaria, quod sit alicujus quod homo potest & debet scire: ad hoc verò ut ignorantia sit antecedens, subindeque inculpabilis, & omninò involuntaria, opus esse, ut sit alicujus circumstantia, quam operans scire nec potest, nec tenetur.

Docet quartò Angelicus Præceptor *quest. 76. art. 1.* ignorantiam posse esse causam peccati. Ad cuius evidentiam considerandum est, hic ignorantiam accipi in propria significatione, quâ distinguitur à nescientia, quæ est nuda carentia scientiæ indebitæ subjecto; quâ ratione in ipsis etiam Angelis invenitur, quâ etiam distinguitur ab errore importante pravam intellectus dispositionem, assensum scilicet positivum contrarium scientiæ: ignorantia verò strictè accepta est privatio scientiæ debitæ, quando ea nescimus, quæ scire possumus & tenemur. Quæ quidem ignorantia non potest esse causa peccati per se, quia non ens non est per se causa actionis malæ, sed per accidens, per modum removentis prohibens, quatenus ignorantia removet scientiam, quæ si adesset, impediret peccatum. Si-

cut enim gravi inclinato ad motum deorsum, ablatio columnæ sustentantis & prohibentis casum dat per accidens motum deorsum: ita voluntati inclinatæ in actum peccati negatio scientiæ, quæ prohiberet actum, si adesset, dare dicitur talem actum. *Vnde patet*, inquit S. Thom. *quod non qualibet ignorantia peccantis est causa peccati, sed illa tantum qua tollit scientiam prohibentem actum peccati* ( id est enim qua non fieret peccatum. ) *Vnde si voluntas alicujus esset sic disposita, quod non prohiberetur ab actu parricidii, etiamsi patrem agnosceret, ignorantia patris non est huic causa peccati, sed concomitanter se habet ad peccatum; & ideo talis non peccat propter ignorantiam, sed peccat ignorans.*

Observandum verò est cum Cajetano, S. Thomam in hoc articulo non determinare utrum illud peccatum, cujus ignorantia dicitur causa, sit imputabile, necne incurrenti ipsam, quia hoc in sequentibus articulis decidit; sed sat est quod opus quod de se peccatum est, causetur, sive imputabiliter, sive non. Tunc porro opus malum ex ignorantia factum imputatur, quando ipsa ignorantia peccatum est, quod resolvit *art. sequenti*; in isto verò explicat influxum ignorantie in opus peccati, asseritque ignorantiam per accidens, & concomitanter se habentem non esse causam peccati, quia sive adesset scientia, sive non, eodem modo se gereret operans. Unde sequitur ex mente D. Thomæ, quod sive ignorantia sit consequens, sive antecedens, si tollit scientiam cum qua non fieret peccatum, per accidens causat peccatum, & de tali verè dicitur quod peccat propter ignorantiam; quia si benè sciret quod facit, ab opere prohibito abstineret;

v.g. qui occidit hominem ex ignorantia antecedente, cum minimè occidisset, si adhibitâ omni diligentia ibi adesse advertisset. Qui etiam facit aliquid ignorantia consequente contra legem, quia neglexit inquirere illam, ab opere illo abstineret, si ad indagandam pro officio suo veritatem, diligentem navasset operam. Nec obest quod ignorantia antecedens causet involuntarium simpliciter, unde non videtur posse esse causa peccati, quod est voluntarium; nam, ut monui, non loquitur S. Doctor in hoc articulo, sed tantum in sequentibus, de peccato ut imputabili, sed de actu peccati quem causat per accidens ignorantia antecedens, sicut removens prohibens, vel sicut ipsa remotio prohibentis; quia removet scientiam, quæ si adesset, non prumperet homo in actum. Quod si sermo esset de actu ut imputabili, illa maxima D. Thomæ, *ignorantia causa est peccati, quia removet scientiam, quæ si adesset, impediret peccatum*, intelligitur de remotione voluntaria vel formaliter, quæ dicitur ignorantia affectata, cum quis de industria vult nescire; vel indirectè, quæ dicitur ignorantia crassa, quia est voluntaria ob incuriam negligentis voluntatis, quæ præ tepore veluti impinguatur, & increasatur: dicitur etiam supina, quia qui desides sunt, supini jacere solent.

Docet quintò S. Doctor *art. 2. ejusdem questionis*, ignorantiam eorum quæ scire tenemur, esse peccatum propter negligentiam; quia quicumque negligit habere, vel facere id quod tenetur habere, vel facere, peccat peccato omissionis. Ad cujus intellectum observa primò, S. Doctorem non loqui de ignorantia habituali, sed actuali. Cum enim præcepta non imponantur de habitibus,

sed de actibus eliciendis, vel omittendis, ad quos ordinatur directio legum, fit inde, ignorantiam habituales non esse contra legem immediate, sed ad summum mediate, quatenus homo actus ad acquisitionem debitæ scientiæ necessarios exercuisse tenetur. Unde ignorantia habitualis non tam peccatum, quam effectus peccati est; quia ex actibus, vel omissionibus peccaminosis originatur.

Observe secundo, tunc ignorantiam censeri actuales, quando urgente scientiæ acquirendæ præcepto, homo vel iponte claudit oculos sese obijcienti lumini, vel negligit eam vestigare quæ addiscere tenetur. *Dicendum*, inquit D. Thom. ad 5. quod sicut in aliis peccatis omissionis solo illo tempore homo actu peccat, pro quo præceptum affirmativum obligat; ita est etiam de peccato ignorantia; non enim continuo ignorans actu peccat, sed solum quando est tempus acquirendi scientiam, quam habere tenetur. Ex quo fit, non solum ipsam negligentiam sciendi, sed etiam ipsam actuales ignorantiam esse culpabilem & peccatum, tamen non nisi ratione negligentiae mala sit; multa enim verè in se peccata sunt, licet dependenter ab alio sordes contrahant peccati. Sicut in peccato transgressionis, inquit S. Doctor ad 3. peccatum non consistit in solo actu voluntatis, sed etiam in actu volito, qui est imperatus à voluntate; ita in peccato omissionis non solum actus voluntatis est peccatum, sed etiam ipsa ommissio, in quantum est aliquammodo voluntaria; & hoc modo ipsa negligentia sciendi, vel etiam ipsa consideratio est peccatum. Quæ quidem negligentia sciendi dupliciter potest incurri, vel commissione, cum quis vult positivè errare; vel omissione ne-



cellariæ inquisitionis. Quâ seclusâ negligentia nunquam ignorantia peccatum foret, ut patet ex eo, quod si quis adhibitâ omnis diligentia operâ, nulloque divino lumini obice posito, ignoraret aliquid scitu debitum, tunc ignorantia minimè peccatum foret, nec malum morale, sed naturale. Unde cùm præcipitur scientia, præcipitur etiam simul actus virtutis studiositatis, idest præcipitur necessariorum addiscendorum diligentia, quæ si sincerè, & strenuè, sicut oportet adhibeatur, juris naturalis ignorantia vincetur, & implebitur sciendi lex, cujus rationabile obsequium studiosâ inquirendæ veritatis sollicitudine contentum est. Tunc itaque ignorantia est peccatum, quando voluntariè est causa proxima, vel occasio transgressionis divini alicujus mandati.

Observa teritiò, ignorantiam per se loquendo non esse peccatum distinctum ab opere malo, cujus est causa, quia per se ignorantia non est prohibita, nisi ut vitetur opus malum; unde non habet specialem malitiam, sed eam duntaxat quæ ex opere malo prohibito derivatur: sicut actus qui est causa omissionis, non est distinctum ab omissione, sed unum numero cum illa peccatum. Aliquando tamen ignorantia est speciale peccatum, cùm nimirum scientia præcipitur, non propter aliud faciendum vel vitandum, sed propter seipsam: sic ignorantia articulorum fidei, præceptorum Decalogi, & aliorum quorum notitia propter se desideratur, speciale peccatum est contra præceptum studiositatis, speciali tunc intentione & veluti reflexione violatum: sicut cùm quis aliquod Decalogi mandatum transgreditur, non statim specialem inobe-

dientia malitiam incurrit, sed tunc solum cum perverse & recalcitrantis voluntatis intentione divinis amat repugnare mandatis.

Docet sextò Angelicus Doctor eodem articulo, quod ignorantia non imputatur homini ad negligentiam, si nesciat ea quæ scire non potest; unde horum ignorantia invincibilis dicitur, quia studio superari non potest: Et propter hoc talis ignorantia, cum sit voluntaria, eo quod non est in potestate nostra eam repellere, non est peccatum. Ex quo patet quod nulla ignorantia invincibilis est peccatum. Ignorantia autem vincibilis est peccatum, si sit eorum qua aliquis scire tenetur, non autem si sit eorum qua quis scire non tenetur. Quibus notandissimis verbis S. Doctor duo requirit ut ignorantia sit peccatum, alterum ut sit acquirendæ scientiæ obligatio, alterum quod sit ignorantia depellendæ potestas; quia si non sit debitum sciendi, ignorantia non privationis, sed meræ negationis & nescientiæ naturalis rationem habet; si verò desit sciendi potestas, non potest culpæ inculcari voluntas, quia ad impossibile nemo tenetur, & Deus impossibilia non jubet, sed jubendo admonet facere quod possis, petere quod non possis: unde si absit & faciendi facultas, & petendi possibilitas, nullum prorsus potest esse in ignorance peccatū. Quod si concurrant sciendi facultas & obligatio, tunc ignorantia peccatum est, & tunc illud verum est: Si quis ignorat, ignorabitur. Ad quorum pleniorē evidentiam

Docet septimò D. Thom. art. 3. quod tunc ignorantia de se excusat à peccato quando facit actum esse omninò involuntarium, eo quod voluntarium est de ratione peccati. Ad cuius doctrinæ elucidationem considera, quod sicut est

triplex ignorantia, antecedens, concomitans, & consequens, quæ diversimodè se habent ad rationem voluntarii; ita variè quælibet illarum se habet ad rationem peccati. Itaque ignorantia antecedens, quia omnem removet voluntarii rationem, & propter eam adhibita diligenti veritatis inquisitione fit opus, à quo abhorreret voluntas, si sciret esse prohibitum, de se etiam excusat à peccato. Quod tamen limitat S. Doctor in uno casu, in quo licet ignoretur antecedenter species peccati, manet tamen cognitio peccati; ut si quis adhibitâ sufficienti diligentia ignoret hominem transeuntem esse Patrem, in quem, si discerneret, nullo modo telum vibraret, & ab homicidio retraheretur, licet propter ignorantiam antecedentem circumstantiæ patris peccet; non tamen totaliter excusatur à peccato, quia licet fortè non sit reus parricidii, homicidii tamen meritò accusatur, quia hominem à se occidi non ignorat.

Ignorantia verò concomitans, quæ per se non influit in actum, quia voluntas est ita comparata, ut sive scientia adesset, sive abesset, eodem plane modo se gereret, nec ab opere illo patrandotemperaret; ignorantia, inquam, illa de se non excusat à peccato, quia non facit actum esse involuntarium. E.g. sit aliquis qui adhibitâ omnimorali diligentia occidit hostem putans interficere feram, retinens tamen habitualement & non retractatam occidendi inimici voluntatem. Quinetiam ita sit dispositus, ut si sciret ibi latitare adversarium, libentius catapultam explodiret, vel sagittam vibraret: imò ob capitale quo in illum æstuat odium, dicat intra se: Utinam inter pres lateret hostis, ut ipsum confoderem & jugu-

larem; vel iterum: Si id quod puto esse feram, sit inimicus, cuius sanguinem sitio, libentiùs emitto sagittam. Tunc ignorantiam excusare contendunt nonnulli, sed expressè contradicunt S. Thomæ dicenti: *Si scientia, quâ per ignorantiam privatur, non prohiberet actum propter inclinationem voluntatis in ipsum, ignorantia huius scientia non facit hominem involuntarium; sed non volentem, ut dicitur in 3. Ethic. Et talis ignorantia, quia non est causa actus peccati, quia non causat involuntarium, non excusat à peccato.* Quia nimirum hæc ignorantia in operante relinquit affectum peccati, maximè dum prorumpit in actus illos conditionatos recensitos; tunc enim interpretativè emissio teli imperatur à voluntate ferendi hostis.

Nisi dicas cum Cajetano, quod sicut actus tunc nec est voluntarius, utpote non cognitus, nec positivè involuntarius, seu repugnans voluntati, sed non voluntarius; ignorantia enim huius scientiæ facit non volentem, ut ait D. Thomas: ita ignorantia concomitans de se nec excusat, nec accusat operantem. Non excusat quidem, quia homo non potest dicere, Si scivissem ibi esse hostem, non occidissem; cum mortem inferendi votum habeat: non accusat etiam, quia supponitur venatorem invincibiliter ignorare ibi adesse hostem, nec vibrare telum nisi præmissâ diligentissimâ inquisitione, num inibi lateat hostis; impossibile enim est occisionem illam esse hîc & nunc voluntariam, nisi sit cognita, vel cognosci neglecta. Quanvis etiam replicari possit, quod est sufficienter occisio hominis cognita ad incurrendam malitiam homicidii, propter illos actus conditionatos, quos cruoris



fitibunda voluntas elicit, vel antea elicuit. Unde tutius esset, ut talis homicida peteret absolutionem ab irregularitate, & censuris; quia licet voluntas formalis & absoluta non imperet hostis necem, benè tamen interpretativa; subindeque ignorantia tunc non tollit omne voluntarium; saltem interpretativum.

Ignorantia verò consequens dupliciter contingit. Primò cum ignorantia est directè voluntaria, sicut cum aliquis studiosè vult nescire aliqua, ut liberè & effrænate omni se vitio dedat; & tunc ignorantia non solum non excusat à peccato, sed potius peccati granditatem exaggerat: illud namque auget peccatum, quod auget voluntarium; illud verò auget voluntarium, quod intendit voluntatis conatum: At ignorantia hoc modo consequens, quæ & affectata dicitur, id facit; ideo enim rebellis est lumini, affundenti se Soli justitiæ oculos claudit, tenebrasque ignorantiae amat, ut absque ullo exedentis conscientiae remorsu omnibus se libidinibus tradat, ut non retardetur aut impediatur peccandi conatus, ut nullo piæ cogitationis immissio vel intermixto amore perturbetur falsa peccati voluptas: Ergo tunc occallentis cordis obscuritas simpliciter auget peccati iniquitatem. Unde D. Thom. *art. 4.* ait: *Cum aliquis sua sponte nescit aliquid, ut liberiùs peccet, talis ignorantia videtur augere voluntarium, & peccatum; ex intensiōe enim voluntatis ad peccandum provenit quod aliquis vult subire ignorantia dñi in propter libertatem peccandi.* Dico *simpliciter*, quia per illam interdum quoad intensum minuitur peccatum in ratione inobedientiæ. Si enim duo perditæ conscientiae viri cum æquali voluntatis conatu, sed unus ex ig-


norantia affectata, alter ex certa scientia peccatum amarent, prior cæteris paribus minùs graviter posteriore peccaret, quia impudentius Legislatoris præceptum conculcaret.

Secundò ignorantia dicitur consequens indirectè, *sicut cum aliquis*, inquit S. Thomas, *propter laborem, vel propter alias occupationes negligit addiscere id per quod à peccato retraheretur. Talis enim negligentia facit ignorantiam ipsam esse voluntariam & peccatum, dummodo sit eorum quæ qui scire tenetur, & potest. Faterur tamen S. Doctor art. 4. hujuscemodi ignorantiam diminuire peccati malitiam: Putà, inquit, cum aliquis non vult laborare in studio, ex quo sequitur eum esse ignorantem: vel cum aliquis vult bibere vinum immoderatè, ex quo sequitur eum inebriari, & discretionem carere, talis ignorantia diminuit voluntarium, & per cons. quens peccatum. Cum enim aliquid non cognoscitur esse peccatum, non potest dici quod voluntas directè, & per se feratur in peccatum, sed per accidens: unde est ibi minor contemptus, & per consequens minus peccatum.*

Docet octavò S. Thomas art. 2. *ejusdem questionis*, tria esse quæ homo scire tenetur, sine quibus nemo actus humanos benè exercere potest. Primò quilibet debet scire articulos fidei; quia qui non crediderit, & baptizatus fuerit, salvus esse non poterit. Secundò debet homo universalia juris principia callere, ad quæ reducuntur præcepta Decalogi, quæ ad vitam honestè instituendam ordinantur. Tertiò nullus ea quæ ad proprium officium, vel statum pertinent, licitè ignorare potest. Sic quilibet fidelis præcepta Ecclesiæ scire & addiscere tenetur, suosque subditos ea docere. Sic Sacerdos, Parochus, Epif-



copus ea scire tenentur, quæ ad implendum officium Angelicis humeris formidandum desiderantur. Sic Religiosus regulam, & statuta suæ professionis legere, meditari, retinere tenetur, ut ea possit observare. Unde planè deploranda est quorundam laxatissimæ disciplinæ Regularium conditio, apud quos nunquam proponitur Regula sub cuius nomine militant in Ecclesia Dei. Vidi quosdam Canonicos Regulares contestantes se nunquam audivisse Regulam D. Augustini, ad eamque observandam minimè se teneri effutientes: & cum quævissem ab eis, quid toto Probationis anno profecissent, ingenuè responderunt se simplicibus modis Gregoriani cantus artem didicisse, sæpeque cantantes, & sæpius dissonantes flagis à Magistro severissimè exceptos fuisse: Regulam verò D. Augustini non magis audivisse, quàm si non extaret in orbe terrarum. Vah indignitatem! Ubi pudor mentis? ubi rubor frontis? Siccine irridetur Deus, & illuditur Ecclesia? Væ Abbatibus & Prioribus oscitantibus & dissimulantibus: væ Magistris sic Novitios educantibus: væ sic professis judicandis non secundùm adeo rationi adversam consuetudinem, sed secundùm vota quæ distinxerunt labia sua, quæve reddiderunt coram omni populo Dei.



*Quæres quintò , an requiratur semper prævium conscientia dictamen de malitia operis , ut contra jus naturale liberè facta sint peccata ; & an dari possit ignorantia invincibilis ejusmodi juris ?*

Responsioni præmitto primò , signanter inquiri de operibus contra jus naturale liberè commissis , v.g. an ille qui mendacium profert , vel vindictam de adversario sumit , excusetur à peccato ; quia licèt benè videat se veritati adversari & hosti nocere suo , ab illis tamen operibus sibi perspectis non retrahitur , quia erroneè putat id sibi licitum , vel saltem non cogitat id esse illicitum. De illis , inquam , operibus quæstio , & quidem momentosissima agitur. Quia de operibus ex ignorantia facti , vel juris positivi elicitis , vel nulla , vel sanè exigua controversia esse potest. Cujus discriminis rationes varias postea referemus. Conjugimus autem duas in hoc quæsito difficultates , ob indivulsam utriusque connexionem postea aperiendam.

Præmitto secundò , certum quoque esse , si daretur invincibilis juris naturalis ignorantia , homines à peccato excusatum iri , & actus ex illa admissos omni culpâ vacaturos. Etenim S. Doctor *in calce art. 3. q. 76.* quam in præsentiarum continuo fermè commentario explicamus , expressè ait : *si sit talis ignorantia , qua omninò sit involuntaria , sive quia est invincibilis , sive quia*

*est ejus quod quis scire non tenetur, talis ignorantia omnino excusat à peccato. Ubi perspicue S. Præceptor opus quodvis à peccati labe abstergit, si fiat ex ignorantia invincibili; & ad accusandum malitiæ opus ex ignorantia patratum, duo omnino requirit; & quod ignorantia illa non sit invincibilis, sed possit vinci; & quod ad eam vincendam homo teneatur. Quorum alterutrum si desit, deerit etiam ratio peccati, adcritque justa de peccato excusatio. Quam doctrinam deprompserat Aquinas ex Augustino Magistro suo lib. 3. de lib. arb. cap. 12. docente: Non enim quod naturaliter nescit, & naturaliter non potest, hoc anima deputatur in reatum; sed quod scire non studuit, & quod dignam facultati comparanda ad rectè faciendum operam non dedit. Quibus verbis non vult Augustinus aliquâ ignorantiam in jus naturale facta excusari, ut quidam non satis ad contextum advertentes interpretantur; sed concedit opera per ignorantiam perpetram adversum jus naturale admissa, ideo duntaxat culpanda, quòd caveri per diligentiam potuerunt. Non arguitur ergo in operante ignorantia veri, vel difficultas recti, si utraque sit naturalis, eo quòd à peccato originali oriatur, ut contendit Jansenius; sed quia eâ ignorantiam laborans perficere nescit, aut à profectu relabi voluit, inquit ibidem August. id est, non quia invincibilis, sed vincibilis ignorantia fuit. Et certè si propterea opera quævis ex ignorantia juris naturalis profecta damnari peccati possunt, quia talis ignorantia à peccato originali orta est, omnes actus indeliberati imputabuntur etiam ad peccatum, cum ex concupiscentia, quæ non minùs quàm ignorantia pœna primæ*

culpæ est, indeliberati illi impetus enascantur. His præmissis,

Respondeo nullam dari ignorantiam invincibilem juris naturalis, sed omnem esse vincibilem, & culpabilem, ac proinde opera contra jus naturale admissa perperam excusari ex eo quod nulla præcesserit prævia malitiæ cogitatio, quâ animus actu illustretur, & affectus vitandi peccati desiderio extimuletur, ut quidam moderni ad excusandas excusationes in peccatis committuntur; quia semper carentia scientiæ juris naturalis est vincibilis & voluntaria, sin directè & expressè, certè indirectè, & in suis causis propriâ & personali culpâ appositis.

Itaque ultrò quidem fateor, nullum esse tam impium, ad cujus cor non interdum loquatur Deus: fateor lumen divinum non ita à mentibus hominum abscedere, ut non quibusdam divini fulgoris radiis identidem illustrentur; unde proficiscitur ille scrupulus, qui nefanda conitatur, ille pudor quo, teste Tertulliano, flagitia perfusa sunt, illeque horroris sensus turpibus adjunctus. Fateor quoque nullum esse adeo scelestum, qui non habeat vires sensu Thomistico sufficientes ad pellendam juris naturalis ignorantiam, quam revera pelleret, si vellet, si peccatis suis ampliori gratiæ, id est victrici, & per se efficaci obicem non poneret voluntarium: & sibi benè notum. Ultrò, inquam, hæc in antecessum fateor, ea uberius postea data occasione expositurus. Sed nihilominus contendo hominem in jus naturale liberè operantem semper peccare, & imputabiliter peccare, tametsi fortè de peccati malitia hic & nunc non cogitet, eamque ignoret; quia ignorantia juris naturalis nunquam,

vel nusquam est invincibilis; semper & ubique vincibilis est in hominibus rationis compotibus. Duo ergo probanda sunt, & ignorantiam juris naturalis cujuscumque invincibilem nullam dari, & opera in jus illud liberè admittà non posse ex eo à peccato abstergi, quod sine prævìa malitiæ consideratione, sed ex ignorantia patrata sint.

Primò ergo sic ostendo, nullam dari juris naturalis non vincibilem ignorantiam. Tum quia ita tradit Augustinus, qui sæpè pronuntiat, neminem finì legem naturæ ignorare: quod idem est ac nullam dari invincibilem juris naturalis ignorantiam. Nullus est, inquit conc. 25. in Psal. 118. *qui faciat alteri injuriam, nisi qui fieri sibi nolit; & in hoc transgreditur natura legem, quam non finitur ignorare.* Et præclare in Psal. 57. *Quis de justitia interrogatus, quando non habet causam, non facillè respondet, quid sit justum? Quandoquidem manu Formatoris nostri in ipsis cordibus veritas scripserit: Quod tibi non vis fieri, ne facias alteri. Hoc & antequam lex daretur nemo ignorare permissus est, ut esset unde judicarentur etiam hi quibus non esset data. Sed ne sibi homines aliquid defuisse viderentur, scriptum est in tabulis quod in cordibus non legebant; non enim & scriptum non habebant, sed legere volebant. Appositum est oculis eorum, quod in conscientia videre cogerentur, & quasi forinsecus admoda voce Dei, ad interiora sua homo compulsus est.* Sed si nemo legem naturalem finitur ignorare, si semper habet in corde unde dijudicetur qui contra legem naturalem operatur, talis ignorantia non potest esse invincibilis & excusabilis, sed semper est vincibilis & inexcusabilis; Ergo nulla ex Augustino datur  
juris



juris naturalis invincibilis ignorantia. Plura ex eodem Patre addemus inter probandam secundam responsionis partem.

Tum quia ita apertè tradit S. Thomas iis omnibus locis, quæ superiori quæsito ponderavimus, nec hic repetemus, ubi nullam ignorantiam antecedentem agnoscit circa illa quæ juri naturali adversantur, sed in factis tantum contingentibus. Loqui autem S. Doctorem de lege & jure naturali, non verò divino vel positivo, hinc patet, quia ibi de actibus humanis disputat ex principiis vitæ moralis omnibus hominibus notis, & ab ipso Aristotele traditis. Id ipsum evidentissimè tradit S. Docteur *quodl. 8. art. 13.* verbis suo postea loco referendis, ubi inter alia sic decretoriè pronuntiat, & rem definit sententiâ, quâ veluti fulmine vagus probabilissimus conteritur & profligatur: *Illud quod agitur contra legem, semper est malum, nec excusatur per hoc quod est secundum conscientiam.* Sed de auri hujus loci efficacia infra.

Id ipsum apertè tradit D. Thomas cum Aristotele hac in re quibusdam recentibus Theologis æquiore, & legis naturæ zelantiore. Etenim Philosophus 3. *Ethic. cap. 1.* expressè docet, quod licet ignorantia facti, seu circumstantiarum, quæ sunt accidentia actibus nostris circumjecta & circumfusa, excuset à malo, ut qui rhombum catapultarium, seu ignariam rotatæ catapultæ machinulam intendens & explodens vulnerat fidissimum amicum, vel loco feræ interficit suavissimum filium; addit tamen ignorantiam juris naturalis non efficere ut actio sit involuntaria, sed mala, quia ipsa ignorantia vitio vertitur. Verba Philosophi sunt hæc: *Non ideo quisque*



*involuntariè agere dicitur, quia quid expediat, nescit. Omnino enim illa ignorantia, qua quis eligit certum aliquod malum, non efficit ut involuntaria sit actio, sed ut sit mala. Quod idem de ea dici potest, quâ quis præcepta benè vivendi generatim ignorat. Talem enim ignorantiam vitio vertimus. Qua verò involuntarias facit actiones, ac venia vel misericordia dignas, circa singulares rerum circumstantias tota versatur, & tunc est propriè venia locus. Quam ignorantiam vocat ibi Aristoteles universalem, & D. Thomas q. 76. art. 2. ignorantiam universalium juris præceptorum, non quòd sola universalissimorum principiorum juris naturalis ignorantia sit culpabilis; sed quia, ut explicat ibidem D. Thomas, & fatetur Vasques dist. 122. in 1. 2. cap. 1. nomine ignorantia universalis intelligitur ignorantia juris, quando videlicet quis in universum existimat fornicationem esse licitam, vel adulterium, & ignorat jus naturale quod in universum ostendit quid bonum, quidve malum sit.*

*Rationem fundamentalem hujus veritatis sæpè tradit S. Doctor, sed nominatim 1. 2. q. 94. art. 6. ubi sic habet: Ad legem naturalem pertinent primò quædam præcepta communissima, quæ sunt omnibus nota; quædam autem secundaria præcepta magis propria, quæ sunt quasi conclusiones propinqua principiis. Quantum ergo ad illa principia communia, lex naturalis nullo modo potest à cordibus hominum deleri in universali; deletur tamen in particulari operabili secundum quod ratio impeditur applicare commune principium ad particulare operabile, propter concupiscentiam, vel aliquam aliam passionem. Quantum verò ad alia præcepta secundaria, potest lex naturalis deleri de*

cordibus hominum, vel propter malas persuationes (eodem modo quo etiam in speculativis errores contingunt circa conclusiones necessarias) vel etiam propter pravas consuetudines, & habitus corruptos: sicut apud quosdam non reputabantur latrocinia peccata, vel etiam vitia contra naturam, ut etiam Apostolus dicit ad Rom. 1. Ex quibus sic formatur ratio: Illa ignorantia non est invincibilis, sed semper vincibilis, in quam non incurrimus nisi per peccatum personale; sicut enim peccatum est voluntarium, ita ignorantia ex personali proprii vitii corruptione profecta in illo peccato voluntaria est, subindeque non est invincibilis, sed superabilis proprii fugâ peccati: Atquæ ignorantia juris naturalis est hujusmodi, siquidem *lex naturalis scripta est in cordibus hominum, quam nec ulla quidem delet iniquitas*, ut ait Augustinus lib. 2. confess. cap. 4. Nec ejus præcepta communissima ad particularia operabilia malè applicantur, nisi propter concupiscentiam & passionem; nec possunt deleri secundaria ejus præcepta, nisi propter pravas consuetudines, vel habitus corruptos, ut tradit S. Thomas, ob quos in eam opinionem quis adducitur, ut credat illud esse licitum, quod illicitum esse cerneret, & cirò judicaret, nisi foret pravorum affectuum præjudiciis anteoccupatus. Ergo nulla ignorantia cujusvis juris naturalis est invincibilis, sed vincibilis, & superabilis. Quia cum ejus præcepta lumine naturæ omnibus implantato cognosci possint, suo quivis debet imputare vitio, si lumen illud pravis moribus offuscet.

Illustratur, & firmatur hæc ratio. Licet lumen vultus divini signatum super nos sit primigeniū peccati strage non extinctum quidem, sed obscu-

ratum : tamen ad excutiendas offusas menti tenebras divinus concursus semper præsto est, nec eo semper præsentem, semper oblato, nisi culpam nostram caremus : Ergo ignorantia illius juris invincibilis dici non potest, ad quam vincendam semper Sol justitiæ ut Author naturalis, & ut loquitur Augustinus, Formator noster suos offert radios, quos semper circumfundit, nisi cordis oculos voluntaria cæcitate clausos inveniat. Igitur quia Deus omnibus, & singulis auxilium sufficiens actualis illuminationis & sæpe confert, & semper offert; & tamen voluntas concupiscentia prævalente, & amore creaturarum fascinante sæpe naturale & divinum lumen rejicit, semper synteresis moribus benigna crudelitate sævientibus obstaculum ponit, & depravari affectus vitio sese domesticis, sese divinis subtrahit splendoribus; ideo non mirum si talis ignorantia non sit excusabilis, cum sit voluntaria in suis causis, nempe peccatis, ob quæ circumfusæ legis naturalis luci oculos non aperit voluntarius cæcus, nec pædagogum internum consulit, nec urgente concupiscentiæ tentatione ad divinum auxilium se convertit, quod si tantum invocaret quantum res tanta invocari debet & potest, illud profectò impetraret ab eo, qui nullum à se desertum patitur, nisi prius deseratur ab illo. In vitium ergo voluntatis ignorantia juris naturalis refunditur, quo vitioso statu durante, semper peccator interno & divino lumini oculos claudet, semper legis naturalis radiis obstaculum culpabile ponet.

Nec obest quod peccator eo devenerit, ut malitiam esse non suspicetur. Sic Mahometanus in opinione illa versatur, fornicationem esse criminis expertem, quia non suspicatur id esse no-

xium, quod in communi gentis suæ, id est, maximæ orbis partis more cernitur positum, & suæ sectæ sapientum judicio confirmatum, & majorum autoritate probatum, & parentum imitatione persuasum.

Nō obest, inquam, quia firma illa errantis & pertinacis iudicii asseverantia non nisi ex corrupto voluntatis habitu & affectu derivatur; si enim non tanto amore prosequeretur creaturas, si tam infrunitè post suas concupiscentias non iret, si considerationi Dei, sui que vacaret, si Deum (quem ut aliàs demonstravimus, invincibiliter ignorare nequit) invocaret, si in dubii animi anxietate tutioribus & securioribus adhereret, sine mora innatæ, imò & divinæ lucis semper præsentis, & sæpe pulsantis radios perciperet, quos non advertit, nisi quia vel malitia, vel socordia innato & divino lumini est rebellis. Ut enim ait August. lib. 3. de lib. arb. cap. 19. *Nulli homini ablatum est scire utiliter quærere quod inutiliter ignorat, & humiliter confitendam esse imbecillitatem, ut quærenti & confitenti ille subveniat, qui nec errat dum subvenit, nec laborat.* Ergo ignorantia juris naturalis fugâ peccati, vitiatione culpæ, appposito concupiscentiæ freno, terrenorum nimio amore abdicato, fusaque ad Deum oratione, cui citra miraculum Deus auxilium præberet, vincenda est.

Maximè quia juxta suavem Dei omnium salutem sincere volentis providentiam nullus est qui circa primum rationis diluculum (in quo ad Deū se convertere tenetur, ut veridica S. Thomæ sententia fert) aliquem divinæ lucis radium inter humanas tenebras intermicatē non experiatur (nisi fortè aliquo actuali notæ pravitatis scelere

divinum fulgorem impediatur, ) quâ divini splendoris scintillâ boni rationis conscientia, vel etiâ amor ingenerantur; quâ notitiâ si benè peccator uteretur, abundantiori immisâ luce omnes tenebras sensim depulsum iri certissimum est. Verùm quia hac luce ut plurimum & ferè semper abutitur prædictus Mahometanus suæ voluntati justo Dei judicio relictus ( lux enim in tenebris lucet, & tenebræ eam non receperunt, ) ideo oblatum lumen contemnens in diversa deinde scelera sponte sua ruit, quæ non semper præcedit cognitio malitiæ, quia eam in primo divinæ lucis contemptu, vel neglectu voluntariè extinxit. Nec eam postea quotiescumque vult habet, quia eam dum oblata fuit, noluit. *Illâ enim, ut Augustinus tradit, peccati poena justissima est, ut amittat unusquisque quo benè uti noluit, cum sine ullâ posset difficultate, si vellet; id est, ut qui sciens recta non facit, amittat scire quod rectum sit; & qui rectè facere cum posset, noluit, amittat posse cum velit.* Sic *lib. 3. de lib. arb. cap. 18.*

Illustratur & confirmatur ampliùs ex triplici differentia quæ inter ignorantiam facti & juris positivi, & ignorantiam juris naturalis intercedit, quibus innumeræ præoccupantur objectiones. Prima differentia, quam tradunt Cajetanus & Estius, est quia actus solo jure positivo prohibitus non est intrinsecè malus, sed de se licitus & indifferens; nec inter pravy annumeratur, nisi quia prohibitus est: unde si ignoretur prohibitio, sitque involuntaria prohibitionis ignorantia, tunc actus v.g. comestionis in die jejunii erit secundùm rationem peccati prorsus involuntarius. Cùm enim ignorantia juris positivi tollat cognitionem prohibitionis, nihil relinquit

in objecto quod malum sit, proindeque opus, non fractio jejunii, sed licita comestio dici debet, quæ nihil habet pravitatis, sive in se, sive in intentione operantis. In ignorantia autem facti opus quoque malum est prorsus involuntarium, cum operans orbetur cognitione rei per se malæ, v. g. qui interficit filium unicum volens interficere bestiam, qui cognoscit alienam putans cognoscere suam, non vult hunc actum qui est interficere filium, vel cognoscere alienam; unde nec voluntate facti, nec voluntate peccati vult opus pravum, quia nec ejus rationem specificam, nec rationem genericam peccati advertit. At verò in ignorantia juris naturalis res aliter se habet; licet enim ignorans jus naturale in actu signato non apprehendat rationem genericam peccati, eam tamen in actu exercito cognoscit, quia apprehendit rationem specificam actus, cui intrinseca, & essentialis est turpitudine; ac proinde opus illud non est involuntarium, etiam quia ratione peccatum est, quia operans non privatur cognitione rei per se malæ: v. g. non privatur adulter, nisi sit ebrius, vel insanus, cognitione mulieris alienæ; non privatur mendax cognitione veritatis, quam negat, etsi an opera illa habeant contrarietatem ad legem, passionis æstu abreptus non consideret.

Favent huic discrimini S. Augustinus, ejusque pedisequus D. Thomas. Ille enim *lib. 1. retr. c. 15.* sic luculentissimè loquitur: *Qui nesciens peccavit, quia voluit, fecit, etiamsi non quia voluit, peccavit, nesciens peccatum esse quod fecit: ita nec tale peccatum sine voluntate esse potuit, sed voluntate facti, non voluntate peccati, quod tamen factum fuit; hoc enim factum est quod fieri non debuit.* Quibus



verbis negat Doctor Sanctissimus, opera ex ignorantia juris naturalis facta esse involuntaria, quia sic operans benè cognoscit peccati speciem, tametsi ex sua culpa non reflectat super contrarietatem, quam habet ad virtutem. D. autem Thomas *quest. 76. art. 3.* proponens sibi argumentum quod est unicum recentiorum fulcrum, sic sibi objicit tertio loco: *Homo est subiectum virtutis & peccati in quantum est particeps rationis: Sed ignorantia excludit scientiam, per quam ratio perficitur: Ergo ignorantia totaliter excusat à peccato.* Cui S. Doctor: *Dicendum quod si effet talis ignorantia, quod totaliter usum rationis excluderet, omnino à peccato excusaret, sicut patet in furiosis & amentibus; non autem semper ignorantia causans peccatum talis est, & ideo non semper totaliter excusat à peccato.* Ubi S. Præceptor tunc solum ignorantiam juris naturalis invincibilem & excusabilem affirmat, cum usum rationis totaliter excludit.

Utriusque sacri Doctoris mentem optimè assequutus est Thomistarum ingeniosissimus Cajetanus in commentario articuli 4. ubi quidquid hac in parte desiderari à doctioribus potest, peregre complexus est; sic autem ait: *Ignorantia privans sola scientia ejus, quod quis tenetur scire, est duplex, scilicet ignorantia juris, sive universalis, sive particularis, ut quando quis nescit hunc actum esse peccatum; & ignorantia facti, ut quando quis nescit sua negligentia hominem esse in loco quò projiciat sagittam. Peccata autem facta ex ignorantia juris sunt duplicia; quaedam secundum se mala, ut fornicatio, furtum, & similia; quaedam solo juris positivi statuto, ut jejunare tali die, & similia. Inchoando autem à peccatis, quæ sunt secundum se*

*mala, & sunt ex ignorantia juris, dicendum est quod sunt peccata ejusdem speciei, cujus essent, si fierent à sciente. Et ratio est, quia sunt actus voluntarii in seipsis per se & directè, non solum materialiter, sed formaliter secundum conversionem ad objectum, quanvis secundum contrarietatem ad virtutem, indirectè & per accidens sint voluntarii. Gentes namque nescientes simplicem fornicationem esse peccatum, consentiebant in cognitionem mulieris non suæ, unde sumitur fornicationis species; quanvis fortè aliqui si scriuissent esse peccatum, non fecissent; & sic non directè & per se, sed per accidens in actum illum ex parte contrarietatis ad virtutem consentiebant. Et hoc modo Paulus consensit in mortem Stehani consentiens Iesum Nazarenum, unde sumitur peccati species; quanvis non nisi per accidens consenserit in contrarietatem illi actui intrinsecam, quam si cognovisset adesse, non consensisset actui.*

Dices: Ut operatio sit peccatum, non solum requiritur ut opus sit voluntarium in se, sed etiam quoad malitiam & contrarietatem ad virtutem; quomodo enim contrahet malitiam objecti, si eam non velit & veluti ebibat; & quomodo eam volet, si malitiam non advertat? Atqui nisi præcedat cognitio malitiæ, actus qui creditur bonus, vel indifferens, est omnino involuntarius quantum ad ejus malitiam: Ergo nisi semper præcedat actualis conscientia malitiæ, opus malum non erit voluntarium, sed involuntarium.

Respondeo, in argumento illo manifestum contineri sophismam, & in adversarios retorqueri. Si enim aliquid efficeret, probaret etiam opus ex ignorantia crassa patratum eximi

à culpa, imò nullum omninè dari peccatum ex ignorantia; omnis enim ignorantia quavis negligentia contracta tollit cognitionem malitiæ actus, subindeque malitiæ voluntatem, cum nihil sit volitum, quin præcognitum: Ergo si ad omnem peccati rationem tollendam sufficit, quod non præcedat actualis reflexio super malitiam, nihil ignorantia commissum poterit habere rationem peccati. Quod est & contra Ecclesiæ doctrinam orantis Deum ne meminerit fidelium ignorantias, & ad excusanda innumera peccata defensionem suppeditat, & Christianos ad negligendam scientiam salutis invitât.

Dicendum ergo, quod licet homo ille qui vult opus intrinsecè malum, non attenta ratione malitiæ, nolit, nec cognoscat malitiam in actu signato, ut dicunt, quia rationem peccati concupiscentiâ illectus non considerat; eam tamen in actu exercito novit, & vult, hoc ipso quod factum intrinsecè malum quoad suam rationem specificam cognoscit, & amat. Quod explicatur cum D. Thoma supra relato ex differentia quæ ebrium vel amentem inter, & ignorantem juris naturale intercedit. Ebrius enim, aut furiosus hominem occidens non modò pravitatem actus, sed ipsum factum ignorat, quia quid agat nescit; unde ejus factum homicidii speciem non servat, licet ebrietatem graviolem efficiat, ex qua tanquam è causa homicidium effluxit. At verò qui ignorantia juris naturalis hominem prudens occidit, interfectionem hominis privatâ authoritate patrâam cognoscit & vult; unde & actio ejus homicidii speciem verè retinet, quia voluntas fertur in objectum intrinsecè pravum, unde species derivatur, non ex contrarietate ad virtu-

tem ; sicut nec species ubi sumitur ex contrarietate ad nigrum , sed ex abundantia lucis in se , ut benè dixit Cajetanus.

Idipsum alio exemplo eruditè illustrat idem Cardinalis , petatum ex differentia quæ interest inter illum qui ex culpabili negligentia facti vacans venationi sagittat hominem loco cervi ex incircumspectiõne , & illum qui ex ignorantia juris naturalis in hominem propria autoritate manus injicit violentas : prioris enim actio non pertinet directè , sed ad summum reductivè ad speciem homicidii , quia interfectionem nec videt , nec intendit , sed ad speciem venationis periculosa & imprudentis , quam quidem prorsus aggravat ; sed in suam speciem non formaliter , sed tantum reductivè trahit , quia non est voluntaria in se , sed in sua causa. Qui enim interficit amicum volens interficere ferum , nullo modo vult hunc actum , qui est interficere amicum. At verò peccans ex ignorantia juris naturalis , ipsam interfectionem & videt & intendit , unde & propriè dictum homicidium perpetrat. Verba Cajetani sunt hæc : *Ex his habes differentiam velaminis inter peccata ex ignorantia juris , & peccata ex ignorantia facti ; quia in illis ignorantia non velat objectum , sed contrarietatem ad legem , seu virtutem : in istis ignorantia velat objectum , & ideo illa in eadem sunt specie , ista non , quia ab objecto per se intento species est. Nec obest quod malitiam fortè non mediteretur , quia id provenit ex libidine voluntatis utendis toto impetu fruents , & obscurantis congenitam juris naturalis notitiam. Sicut enim aqua calefacta citò redit ad congenitum f. ignis , si ab igne removeatur : sic animus rationalis facillè obli-*



honestatem vel malitiam pervideret, si vitiatorum castigatione cordis oculos aperiret.

Secunda, & plausibilior differentia est, quia nimirum ignorantia juris naturalis non aliunde proficiscitur, quàm ex perverso & pertinaci creaturarum amore, quo peccator se ab illo lumine continenter avertit, quod illuminat omnem hominem venientem in hunc mundum. Quod lumen semper præsens, semper peccatori circumfusum, illum identidem suis fulgoribus illustrat; nec enim est qui se abscondat à calore ejus, cujus ductum si sequeretur dum affulget, nihil est in jure naturali tam abstrusum, quod esset clausum, vel ignotum; sed quia mavult post suas concupiscentias ire, quàm illi oculos aperire, quid mirum si imputetur ad culpam quidquid ex illius juris ignorantia perperam operatur? Unde sponte fuit disparitas inter ignorantiam juris naturalis, & ignorantiam facti & juris positivi; quia juris positivi, factique quæstiones non ejusmodi sunt, ut mentis affectusque purgati castimoniâ, sed solâ scientiâ, vel oculis dijudicentur; quia nullam habent cum primis morum principiis in animo naturaliter inscriptis coherentiam, nec comparantur reflexione super se, nec per se obscurantur cupiditatis illecebris; unde in illis decidendis qui pejores sunt, sæpe sæpius sunt oculatiores, si sint ingenio, oculisque valentiores. At verò in jure naturali totum oppositum est, quia nihil in illo invenitur, quod non ex communissimis morum notionibus in ipsis humanæ mentis medullis & visceribus indelebiter impressis certa connexionione non pendeat; quam connexionem Deo juvante vident quotquot propriis, & voluntariis peccatorum tenebris non cæ-

cantur ; quia Deus ad illuminandum errantem in jure naturali semper paratus est , nisi à voluntate positum obicem inveniât , ut statim & clariùs exponemus , & Patrum auctoritate illustrabimus.

Denique (& est tertia disparitas ) quia licet in peccante ex ignorantia nativi juris, hic & nunc non alluceat hujus operis explicata apertaue malitia ; tamen semper adest principium agentis conspicuum, in quo opus suum mentita sibi iniquitas, damnat. V.g. nullus est homo quàmlibet ferus, quem licet hic & nunc ob libidinis æstum lateat fortè mendacium, furtum, adulterium, quæ meditatur, esse mala ; tamen semper scit aliquid quo seipsum condemnat, & in quo, licet subobscure, virtualiter videt sui operis pravitatem. Nam si ille interrogaretur, an vellet per mendacium falli, an libenter ferret bona propria vel uxorem suam ab alieno rapì, utique responderet illa mala se nolle pati : Ergo ore suo judicatur servus nequam, quia alteri facit quod sibi fieri non vellet, licet aggravante malitia, dum alteri facit non advertat, quod sentit dum sibi fit : Ergo facit aliquid repugnans naturali principio sibi noto, de quo Tob. 4. *Quod ab alio odoris tibi fieri, vide ne tu aliquando alteri facias.* Quod idem in usuris, vindictis, aliisque remotioribus juris naturalis consecrariis facile verum esse probatur. At verò in erroribus facti, vel in quæstionibus juris positivi totum contrà est. Nam quod mulier supposita nocte sit propria vel aliena ; quod cibus cæco datus sit furto sublatu, necne ; quod hac die præcipiatur jejunium, prohibeatur opus servile, nullo principio naturaliter noto determinari potest, nec orationibus



à Deo de via ordinaria impetrari, sed studio, oculis, & auribus addisci potest. Unde in iis quæ ad jus positivum spectant, ignorantia nonnunquam excusat, nonnunquam accusat, vel vitio vertitur, nisi cum ex nimia negligentia nascitur, & aliqua cognitione prævidetur. Uno verbo, Juris naturalis cognitio naturæ humanæ congenita est, ratione cujus gentes quæ legem non habent, sunt sibi lex, ut loquitur Paulus; unde non potest radicitus tolli, aut penitus obscurari. Unde ex ea emergunt plerumque cogitationes bonæ, quibus nullus homo per totam vitam caret. At verò juris positivi, factorumque notitia adventitia est; unde contingere citra culpam potest, ut nulla illorum cognitio suboriatur.

Dices: Non minùs necessaria est ad salutem cognitio Fidei, Baptismatis & nominis Christi, quàm scientia juris naturalis; qui enim non crediderit, condemnabitur; qui non regeneratus fuerit ex aqua & Spiritu sancto, non salvabitur, quia non est aliud nomen sub cœlo, in quo nos oporteat salvos fieri: Ergo non minùs flagitanda à nobis est istorum cognitio, quàm cognitio scientiæ naturalis juris: Ergo utraque peræquè dici potest vincibilis in negligentia orationis, qua rem tantam obtineremus, si quantum petenda est, peteremus: Ergo nulla est inter utramque disparitas, si vera sunt quæ hætenus affirmavimus. Quod in ignorantia facti similiter claret. Connubio; v. g. ex ignorantia facti inito, nulla inest veritas, seu consensio cum lege æterna, cum re ipsa sit incestus; & tamen opus illud culpâ vacat, quia ignoratur malitia operis primis syntereseos principiis repugnantis: Ergo opus repugnans remotioribus legis

naturæ corollariis , tametsi sit reapse contra legem æternam , excusabitur tamen, si ejus malitia ignoretur. Ergo ex præcisa conformitate, vel difformitate ad legem æternam, non debet operi alleri , vel negari rectitudo ; sed ex conscientiæ dictamine, cui consentiat, vel repugnet.

Respondeo, propter hoc argumentum nonnullos non ignobiles Theologos longè ante Jansenium natos & florentes (quod dico propter quosdam importunos & impertinentes recentiores, qui argumentis destituti sententiam negantem dari ignorantiam juris naturalis, Jansenismi pueriliter insimulant , & sicut iſtero laborantibus subflavus semper & ubique color occurrit, ita illi quamvis sententiam suis laxitatum præjudiciis adversam, Jansenismi & novi dogmatis ineptissimè notant) Theologos, inquam, celebres Hugonem à S. Victore, B. Bonaventuram , Gersonem, Adrianum , Guillelmum Parisiensem docuisse, nullam etiam apud infideles dari juris nedum naturalis , sed nec divini invincibilem ignorantiam ; quia, inquiunt, possunt recurrere ad supremum quem intra se habent Magistrum Deum facile exorandum , si veritatem studio quæsitam continuis precibus à Deo efflagitent, & se poenitentia vitæque emendatione divina luce dignos efficiant: unde fidei ignorantiam eis imputandam credunt, quia Deus fidem nutritis etiam in sylvis minimè negaret , si illam adhibitis omnibus, quibus potest comparari, mediis postularent.

Verùm quia illa sententia non solum durior videtur & austerior, sed etiam parum est SS. Augustino & Thomæ consentanea, ut deinde palam erit : dico disparitates allatas adhuc manere in sua vi. Dicendum ergo , quod licet ignorantia

juris divini nunquam sine damno contingat, cum tollat media ad salutem necessaria, lege divinâ constituta, qualis est vera religio & charitas infidelitate etiam negativâ sublata; non tamen hæc ignorantia peccatum est, sed pœna peccati. Quia ut aliqua ignorantia sit peccatum, non sufficit quod potentiâ remotissimâ possit operans scientiam obtinere; sic enim privatio visionis beatificæ non pœna tantum, sed peccatum esset, quia ad eam possunt infideles pervenire. Sed exigitur ut ignorans habeat in se principium proximum, in quo si velit, potest pervidere objecti honestatem aut turpitudinem: quod principium in manu sua positum, & sibi conspicuum, si non consulat, non invincibilis, sed culpabilis erit ignorantia, cujus sanandæ, quæ penes se habet media proxima negligit adhibere. Sic autem est in proposito; nam notitia factorum, & multo minus fidei supernaturalis, nullam habet naturalem colligationem cum principiis naturalibus, unde fidem non potentia naturali, sed solùm obedientiali Ethnicus sibi asciscere potest. At verò juris naturalis notitiam in manu habet, quia lex naturalis cordi inserta ad eam acquirendam est proximè potens, proximè sufficiens, nisi corruptæ voluntatis pravitate fuerit impedita. Utraque ergo cognitio est peræquè necessaria, utraque peræquè peccati pœna, sed non peræquè peccatum, quia non est peræquè superabilis. Qua doctrinâ solvitur id quod de incestu per ignorantiam facti admissio additur, quia nulli luminis naturalis virtute potest factorum scientia comparari. Maxime quia, ut antea dicebamus, cum illius facti turpitudine nec generica, nec specifica cognita sit, sub nulla ratione voluntaria esse potest.

Instabis : Potest contingere, ut nulla præcedat notitia obligationis sciendi aliquas remotiores juris naturalis conclusiones, ratione cujus eam vincere possimus ; si enim nulla cogitatio, aut dubitatio præcellerit, non magis erit in potestate nostra earum cognitio, quam sit fides mysteriorum supernaturalium : Ergo utriusque ignorantia potest esse æqualiter invincibilis, cum non sit in nostra facultate de ulla re deliberare, an amplectenda sit, vel rejicienda, de qua nulla in mentem venerit cogitatio.

Respondeo semper disparitatis allatas rationes subsistere, quia fidei supernaturalis principia non constant lumine naturali, sicut legis naturalis præcepta, quæ hominum cordibus ita altè insculpta sunt, ut non possint unquam obliterari ; & licet possint vitiis pravisque moribus obscurari, ipsis tamen imputandum est, qui conscientiam se sui que officii admonentem audire noluerunt, vel ne moneret, voluntarium obicem posuerunt. Uno verbo ignorans infidelis non cogitat se supernaturalium scientiam debere comparare, nec aliquod lumen in se habet, in quo possit talem obligationem intueri ; secus verò est de ignorante officia juris naturalis, ut ex dictis manifestum est.

Confirmatur & illustratur demùm autoritate Scripturæ & Patrum, ex qua sic formatur ratio verè theologica. Ex Scriptura & Patribus dantur plura peccata ignorantia, non solum directè crassæ & affectatæ, quæ magis accusat quam excuset, ut ex D. Thom. *quæst. superior* vidimus, sed etiam cum quis benè fieri putat quod malum est, nec solum dum non cogitat de malitia operis, sed etiam cum putat erroneè illi inesse boni.

tatem : Atqui nulla sunt peccata ignorantiae, nisi sit affectata, quæ non magis excusari possint, quàm illa quæ in jus naturale admittuntur; nec ulla est ignorantia magis vincibilis & inexcusabilis, quàm ignorantia juris naturalis: Ergo vel nullam ignorantiam censent Patres vincibilem, vel maximè ignorantiam juris naturalis. Minor, & consequentia per se patent, si intelligantur termini; cùm enim præcepta legis naturalis sint naturaliter insita, non verò scientia juris positivi vel factorum, evidens est ignorantiam juris naturalis esse magis vincibilem ignorantiam juris positivi, vel factorum contingentium, subindeque opera ex ignorantia juris naturalis facta multo magis peccati labe & nomine aspergi debere, quàm opera ex ignorantia juris positivi vel facti contingentis elicitæ, nisi ista ignorantia sit crassa, supina & affectata. Major ergo, in qua est difficultas, nota est cuivis in lectione Scripturarum & Patrum non omninò peregrino; cui enim non sunt obviæ illæ voces: *Delicta juventutis meæ & ignorantias meas ne memineris. Nihil mihi conscius sum, sed in hoc justificatus non sum.* Et tamen Apostolus nihil ex ignorantia supina operabatur. Quibus, aliisque postea referendis locis persuasa Synodus Palæstina damnavit Pelagianos arbitantes ignorantiam & oblivionem non subiacere peccato. Nec loquebantur illi hæretici de ignorantia crassa & directè affectata; siquidem Pelagius apud Augustinum *lib. de nat. & grat. cap. 17.* assererat, *ideo esse culpandam ignorantiam, quia id homo nescit negligentiâ, quod adhibitâ diligentiam scire debuiisset.* Loquebantur ergo Pelagiani de ignorantia juris naturalis, cui aliqua boni cogitatio prælucere; & ideo

eam culpandam affirmabant, si præeunte dictamine aliquo, scire officia sua homo negligebat. Ergo aliquid ampliùs voluit Concilium, nempe ignorantiam juris naturalis subjacere peccato, etiamsi non semper præcedat aliqua de ea expellenda cogitatio; quia nimirum quod talis interdum cogitatio non affulgeat, ex voluntario à libertate posito obice proficiscitur. Unde sæpè contingit, ut bonum malum, malum bonum dicat, ut cæcus cæco ducatum præstet, & videatur sibi via rectissima, cujus novissima ducunt ad mortem.

Sed satius est audire Bernardum non solùm sententiæ nostræ assertorem, sed etiam luculentum defensorem, qui accerctis variis Scripturæ testimoniis, sic habet epist. ad Hugonem à S. Victore: *Veritatis testimoniis paucis & manifestis manifestum mendacium confutetur. Is forsitan qui asserit nunquam posse peccari per ignorantiam, nunquam pro suis ignorantibus deprecatur, sed potius Prophetam irridet deprecantem & dicentem: Delicta juventutis meae & ignorantias meas ne memineris. Forsitan & reprehendet Deum exigentem pro peccato ignorantia satisfactionem. Si ignorantia nunquam peccatum est, cur dictum est in epist. ad Hebraeos: Quia in secundo tabernaculo semel in anno solus Pontifex intraret non sine sanguine, quem offerret pro sui & populi ignorantia? Si peccatum ignorantia nullum est, non ergo peccavit Saulus, quod persequutus est Ecclesiam Dei, quoniam quidem ignorans hoc fecit, manens in incredulitate. Bene itaque faciebat quod erat blasphemus, & persequutor, & contumeliosus; quod erat spirans minarum & cadis in Discipulos Domini: in hoc ipso quippe abundanter amulator existens paternarum*



suarum tradi ionum. Non ergo debuit dicere: *Misericordiam consequutus sum, sed mercedem recepi;* quippe quem ignorantia peccato reddebat immunitatem, insuper & emulatio remunerabilem indicabat. Si, inquam, ignorantia nunquam peccatur, quid ergo causamur adversus occisores Apostolorum, quoniam non quidem malum esse nescierunt interficere illos, sed insuper quoque id faciendo arbitrati sunt obsequium se prestare Deo? Sed & frustra in cruce Salvator pro suis erat crucifixoribus, quippe nescientibus (ipso teste) quid facerent, & ita nunquam peccantibus. Nunquid non ex his satis apparet, inquantis jacent ignorantia tenebris, qui ignorat peccari posse interdum per ignorantiam?

Quam veritatem ex Augustino hauserat Bernardus. Nam Doctor gratiæ, lib. 7. de peccat. merit. cap. 36. sic habet: *An nullum est ignorantia malum, & ideo nec purgandum? Et quid ait illa vox, Delicta juventutis meæ & ignorantias meas ne memineris? Et si enim dānabilia peccata sunt, quæ ab scientibus committuntur; tamen si ignorantia peccata nulla essent, hinc non legeremus, quod commemoravi, Delicta juventutis meæ & ignorantias meas ne memineris. Quod ipsum confirmat ex illo Salvatoris, Luc. 12. Ille autem servus qui cognovit voluntatem domini sui, & non præparavit, & non fecit secundum voluntatem ejus, vapulabit multis; qui autem non cognovit, & fecit digna plagis, vapulabit paucis. Quæ verba sic ponderat Augustinus: Ecce ubi ostendit gravius peccare hominem scientem, quàm nescientem. Nec tamen ideo confugiendum est ad ignorantia tenebras, ut in eis quisque requiratur excusationem; aliud est enim nescisse, aliud nescisse voluisse. Voluntas quippe in eo arguitur, de quo dicitur, Noluit intelligere ut bene*

ageret : sed & illa ignorantia , qua non est eorum qui scire nolunt , sed eorum qui tanquam simpliciter nesciunt , neminem sic excusat , ut sempiterno igne non ardeat , si propterea non credidit , quia non audiuit omninò quid crederet , sed fortassis ut mitius ardeat. Et paulò terribiliter, sed non minus verè epist. 105. ad Sixtum : *Inexcusabilis est omnis peccator, vel reatu originis, vel additamento propria voluntatis ; sive qui novit , sive qui ignorat, sive qui judicat, sive qui non judicat : quia & ipsa ignorantia in iis qui intelligere noluerunt, sine dubitatione peccatum est ; in iis qui non potuerunt, pœna peccati. Ergo in utrisque non est justa excusatio, sed justa damnatio.*

Quorum verborum sensus non est , ignorantiam invincibilem juris naturalis esse peccatum , ut quidam sentiunt ; sed germanus sensus est, juris naturæ violatores nunquam per ignorantiam excusari , sed ignorantiam illam semper esse vincibilem ; quia ut verbis infrà referendis docet idem Augustinus , per hujusmodi peccata transgredimur legem , *quam non sinimur ignorare.* Quod multis exemplis illustrat in *Psal. 57.* expendens illud Isaïæ 46. *Redite pravaricatores ad cor* , ut ibi legant legem in corde conscriptam. Unde ignorantia juris naturalis , & pœna peccati , & peccatum est : pœna , quia radicaliter ex primigenia labe proficiscitur : peccatum verò , quia semper vinci ac deponi potest diligentia & auxilio Dei , quod Deus solis voluntarium obicem ponentibus negat , ut infrà ampliùs exponemus. Unde sic ignorantes verè peccant , quia ut benè dixit Hilarius in *Psal. 118.* expendens illud , *Pravaricantes reputavi omnes peccatores terra : Pravaricatores*

*existimantur, qui quod à natura legis accipiunt, derelinquunt.*

Nec potest dici, Augustinum loqui de ignorantia prævisa, seu directè crassa vel affectata. Non potest, inquam, id dici. Tum quia solâ textus lectione hæc responsio corrui, cum damnet & illum qui non vult intelligere ut benè agat, & illum qui simpliciter ignorat. Imò & illum damnat, qui re pensata credens se benè agere, contra jus naturale ex malitia voluntatis obscurantis juris naturalis noticiam peccat. Sic enim habet epist. 134. *Si quis bonum putaverit esse quod malum est, hoc putando utique peccat: & ea sunt omnia peccata ignorantia, quando quisque benè fieri putat quod malè fit.*

Quibus verbis quàm reprehendatur illa eorum imaginatio, qui credunt actum intrinsecè malum, ex conscientia erroneæ dictamine bonum existimatum meritorium esse, nemo non videt. Et mirum est quod ad hoc probandum offerant doctrinam S. Thomæ q. 19. art. 5. ubi ait: *Non solum id quod est indifferens, potest accipere rationem boni & mali per accidens, sed etiam id quod est bonum, potest accipere rationem mali, vel illud quod est malum, rationem boni, propter apprehensionem rationis: puta abstinere à fornicatione, bonum quidem est: si ergo propenatur ut malum à ratione errante, voluntas erit mala, quia vult malum.* Sed quid inde inferri possit, planè non video. Licèt enim S. Doctor illo articulo 5. doceat quod voluntas etiam dum benè agit, si discordet à ratione errante, peccat; tamen articulo 6. sequenti ex professo demonstrat, quod non propterea voluntas concordans rationi erranti continuò bona est: *Quia*, inquit ad 2. *ratio humana*

*potest errare; & ideo voluntas concordans rationi humana non semper est recta, nec semper est concordans legi aeterna. Quia, inquit ad 1. bonum causatur ex integra causa, malum autem ex singularibus defectibus; & ideo ad hoc ut dicatur malum id in quod fertur voluntas, sufficit siue quod secundum suam naturam sit malum, siue quod apprehendatur ut malum: sed ad hoc quod sit bonum, requiritur quod utroque modo sit bonum.*

Doleo P. Mercorum, Thomistam celebrem & mihi variis titulis venerandum in re tam perspicua caligantem cespitasse, & ex doctrina generali articuli 5. illa derivasse, quæ S. Doëtor art. 6. ex professo refutat, & ipso turpitudinis exemplo, quo perperam intellecto, fornicationem meritoriam posse esse comminiscitur, sic ejus assertionem reprobat idem doctus à Domino S. Thomas in corpore articuli: *Si ratio errans dicat quod homo teneatur ad uxorem alterius accedere, voluntas concordans huic rationi erranti est mala, eo quod error iste provenit ex ignorantia legis Dei, quam scire tenetur.* Ergone ex D. Thoma meritoria est turpitudine, ideo voluta, quia à ratione tanquam bona apprehenditur? Imò S. Præceptor solutione ad 3. solvit principium hujus Authoris, nimirum: *Actuum oppositorum si unus malus est, alter bonus est.* Quod negat S. Thomas, asserens utrumque posse esse malum, & quocumque se vertat, voluntatem peccare. Angelica verba sunt hæc: *Supposito errore rationis, vel conscientia, qui procedit ex ignorantia non excusante, necesse est quod sequatur malum in voluntate; nec tamen est homo perplexus, quia potest ab errore recedere, cum ignorantia sit vincibilis & voluntaria, modis postea explicandis.* Constituit ergo D. Thomas

*art. 5.* hypothesin, in qua homo potest ex conscientia erronea credere, abstinere à fornicatione esse malum: sed nunquam, vel nusquam inde fornicationem purgavit, sed exerte articulo sequenti damnavit.

Dices: Patres laudati perinde damnant ignorantiam juris naturalis & positivi, perinde utramque imparem affirmant ad peccati excusationem, ut in illis ipsis, quæ retulimus, testimoniis non leviter indignant: Ergo vel nullam juris utriusque, vel aliquam juris etiam naturalis inculpatam admittere possumus, salvâ Patrum doctrinâ, quæ aliquo debet à nobis lenimento temperari.

Respondeo falsum esse, Patres ignorantiam juris naturalis & positivi semper æquiparasse, sed eam accuratè interdum distinxisse, nec eam parem fecisse, nisi quando in ignorantia juris positivi includitur aliquid juris naturalis; vel cum jus positivum ita proponitur, ut ejus ignorantia non minùs sit vincibilis, quàm ignorantia juris naturalis. In primis ignorantiam factorum excusare posse à peccato, clarè tradit Augustinus lib. 2. cont. Crescon. cap. 26. *Si tunicâ ex latrocinio nesciens vestiretur, ex eo fit iniquitatis vestis illa, ex quo cognoverit; & ipse iniquus, nisi abjecerit. Et qui nesciens uxorem duxerit alienam, ex illo fit adulter, ex quo cognoverit, nisi discesserit.* Vides excipere Augustinum ignorantiam latrocinii & adulterii, quæ tunc solum censet esse peccata, cum eorum specificam malitiam, & facti veritatem cognoverint operantes. Idem habet ep. 43. *Certè nullius crimen maculat nescientem. Cur ergo innocentes falsis criminibus accusantur, quia crimina aliena, seu falsa, seu vera nescierunt? Quis locus innocentia*

innocentia reservatur, si crimen est proprium nescire crimen alienum? Nam & facta nocentium, qua innocentibus demonstrari, vel ab innocentibus credi non possunt, non inquinant quemquam. Unde ex Augustino claret, ignorantiam factorum à peccato excusare.

Deinde ignorantiam quoque juris positivi, etiam divini, quod nullo modo, nullaque connectione pendet à principiis morum in animo naturâ consignatis, excusari à peccato, nec hominum vicio verti posse, clarè docet idem Augustinus epist. 50. *versus finem*, ubi exponens illud Servatoris, Joan. 15. *Si non venirem, peccatum non haberent*, ait: *Utique non omne peccatum intelligi voluit, quandoquidem pleni erant multis magnisque peccatis, si aliquod proprium peccatum, quod si non haberent, possent illis omnia dimitti quæ habebant, id est, quod in eum venientem non crediderunt.* Ergo infidelibus, quibus non proponitur Evangelium, non imputatur mysteriorum supernaturalium ignorantia. Idem repetit *cap. 89. in Ioan.* ubi expendens hæc verba: *Si non venissem, & loquutus eis fuisset, peccatum non haberent*, ait: *Nunquid sine peccato erant iudei antequam Christus ad eos in carne venisset? Quis hoc vel stultissimus dixerit? sed magnum quoddam peccatum, non omne peccatum, quasi sub generali nomine voluit intelligi. Hoc est enim peccatum, quo tenentur cuncta peccata, quod unusquis ne si non habeat, dimittuntur ei cuncta peccata: hoc est autem, quia non crediderunt in Christum, qui propterea venit ut crearetur in eum. Hoc peccatum, si non venisset, non utique haberent. Et ne crederemus Augustinum loquentem tantum fuisse de Judæis, subdit S. Pater: Sed quæ adjuuxit, æque*



*ait: Nunc autem excusationem non habent de peccato suo, potest movere quærentes, utrum hi ad quos non venit Christus, nec loquutus est eis, habeant excusationem de peccato suo. Si enim non habent, cur dictum est, propterea istos non habere, quia venit, & loquutus est eis? Ad hac inquisita pro meo captu Domino donante respondeo, habere illos excusationem, non de omni peccato suo, sed de hoc peccato, quo in Christum non crediderunt, ad quos non venit, & quibus non est loquutus. Eandem juris positivi exceptionem adducit Bernardus epistola memorata ad Hugonem Victorinum, quæ est 77. Si loquutus fuisset, inquit, sed non eis, inobedientia culpam ignorantia excusaret. Vides ergo Patres ignorantiam juris positivi aliquando excusabilem agnovisse, juris verò naturalis ignorantiam nullibi excusasse: Ergo cum nihilominus tam constanter, tam asseveranter testentur dari peccata ignorantia, illa procul dubio intelligere censendi sunt, quæ ex semper vincibili, semper damnabili juris naturalis ignorantia perpetrantur.*

*Sed dices: Quid ergo causæ est, quod interdum Augustinus ignorantiam juris positivi accusat? Cur dum contra Pelagianos disputat, & contra ipsos contendit ignorantiam malam esse & peccatum, plurima ignorantia facti & juris positivi exempla producit? Nam in insigni illo loco ex libro de gratia & libero arbit. relato, ait ignorantiam illum non excusare, si propterea non credidit, quia non audivit omnino quod crederet: non enim sine causa dictum est, Effunde iram tuam in gentes quæ te non noverunt.*

*Respondeo tunc solum Patres ignorantiam juris positivi & naturalis peræquè damnasse,*

quando in ignorantia juris positivi aliquid ignorantia juris naturalis permiscetur. Sic persequutores Apostolorum putabant quidem se obsequium præstare Deo ex ignorantia veritatis Christianæ; sed contra jus naturale peccabant viros tam Sanctos & innocentes morti sine causa tradentes. Sic ignorans in incredulitate Saul Christianismi veritatis non convincebatur, sed quod spirans minarum & cædis esset in discipulos Domini, jure naturali damuabatur. Et licet fortè hujus naturalis juris voces non audiret, non tamen simpliciter omni veniâ dignus erat, quia præ passionis & furoris voluntario impetu obsurduerat. Unde ejus juris ignorantia, vel non advertentia culpabilis erat. Nam sicut in dubiis contra jus naturale agere semper malum, ita & in agendis de jure naturali non dubitare sæpè malum est, dicente Bernardo epistolâ præfatâ: *Multa scienda nesciuntur, aut sciendi incuriâ, aut discendi desidiâ, aut verecundiâ inquirendi; & quidem ejusmodi ignorantia non habet excusationem.*

Adde etiam ideo Patres ignorantiam juris positivi non semel damnare, quia ob fidei & veritatis Catholicæ præsentem & propositam veritatem, ignorantia juris positivi desinit esse invincibilis, & fit vincibilis sicut ignorantia juris naturalis. Illam ergo ignorantiam juris positivi meritò æquiparant ignorantia juris naturalis. Nec hoc voluntariè dico, sed id luculentissimè tradit, & enucleatè distinguit Augustinus tractatu præfato in Joannem, ubi postquam asseruit illis omnibus infidelibus infidelitatem non imputari, qui nihil de Christo audierunt, subdit: *Sed non in eo sunt numero hi, ad quos in discipulis*

venit, & quibus per discipulo: est loquutus, quod  
 & nunc facit; nam per Ecclesiam suam venit ad  
 gentes, & per Ecclesiam suam loquitur gentibus.  
 Ad hoc enim pertinet quod ait: Qui vos recipit,  
 me recipit, & qui vos spernit, me spernit. Ergo  
 tunc censet Augustinus ignorantiam juris posi-  
 tivi esse ignorantiam juris naturalis æquiparan-  
 dam, cum Evangelii veritas Gentibus prædica-  
 tione affulget. Et tamen ibidem Gentes pec-  
 cantes contra jus naturale semper accusat, quia  
 licet possint in excusationem peccatorum suo-  
 rum dicere se nullam legem positivam audivisse,  
 non tamen possunt effugere damnationem, licet  
 propterea eam sint fortassis experturi mitiorem.  
 Verba Augustini seipsum planissimè interpre-  
 tantis, sunt hæc: Restat inquirere, utrum hi qui  
 priusquam Christus veniret in Ecclesia ad Gentes,  
 & priusquam Evangelium ejus audirent, vita hu-  
 jus sine præveni sunt, seu præveniuntur, possint  
 habere hanc excusationem? (nimirum se nihil au-  
 divisse.) Possunt plane, sed non ideo possunt effu-  
 gere damnationem. Quicumque enim sine lege pec-  
 caverunt, sine lege & peribunt. Quia nimirum  
 legem naturalem vel contempserunt, vel suâ  
 culpâ audire noluerunt. Illi ergo & qui ante  
 propositam legem Christi contra legem natura-  
 lem perperam agunt, & qui propositam legem  
 contemnunt, nec tantum contradicendo, sed &  
 eos à quibus audierunt, odiis persequendo re-  
 sistunt; & qui legem suscipientes eam infirmi-  
 tate non implent, illi omnes ad perditionem si-  
 ne dubio pertinebunt. Quamvis dici possit, ad-  
 dit S. Doctor, alios gravius, alios levius peritu-  
 turos; id est, alios graviores, alios leviores penas  
 in sua perditione passuros. Tanta est autem suppli-  
 ciorum, quanta est diversitas peccatorum, qua quo-

*modo se habeat, altius indicat sapientia divina, quam conjectura scrutatur, aut effatur humana.*

Itaque juxta doctrinam Patrum, Augustini, Bernardi, Aquinatis, Sole ipso clariorem dicendum est, omnem juris naturalis ignorantiam esse vincibilem & culpabilem; imò & juris divini per se invincibilem ignorantiam legitimâ & rectè factâ propositione vincibilem effici. Et quidem de ignorantia juris naturalis id pluribus demonstravimus, quia nulla tam profunda caligo æquitatis principia & boni honesti præcepta in cordis membranis scripta in totum tollit, nulla ita occupat mentem tenebrarum nox, quin residua semper sit, aliqua boni honesti scintilla, interdum ad meliorem frugem movens, quam si evacuatis præjudiciis in agendis, uti debet, consuleret peccator, pravitatem prospiceret sibi sæpius ob concupiscentiæ & passionum voluntarias nebulas ignoratam. Quod idem, duce Augustino, de illis omnibus generatim contestor, qui rejecta Evangelii rectè propositi luce, in multa deinde peccata sine reflexione ruunt; quia eorum omnium ignoratio jure merito culpatur, de quorum iniquitate catholicæ veritatis sibi propositæ, & à se repudiatæ ope erudirentur. Quocirca quotidiana illa & gravia, quibus se nostri Calvinistæ Lutheranique commaculant flagitia, per prætensam juris naturalis, vel catholicæ veritatis ignorantiam à peccato minime liberantur; quia illam vel propriis sceleribus, vel rejecta Catholicæ fidei luce sibi accersitam quotidiana obstinatione, & voluntario creaturarum amore fovent. Quapropter immeritò ignorantiam suam causantur, immeritò eam in excusationem proferunt, quia illam

non nisi voluntariâ divini luminis repulsâ contrahunt, quia divini splendoris radiis continuos obices ponunt, quibus si se permitterent, si suos illi oculos aperirent, jam jamque sine mora clarius illustrarentur, & de claritate in claritatem inducti, ita crescerent eorum semitæ in perfectum diem, ut nihil tandem in lege naturali clausum haberent, vel obscurum.

Dixi, *qui rejecto Evangelio ritè proposito*, ut non solum cum S. Augustino, & D. Thoma excusarem infideles negativè, qui nihil de fide unquam audiverunt; sed etiam juxta eorundem Patrum principia illos, quibus Evangelium malis artibus denuntiatur. Qua fortè de causa excusavit Deus Indos, quibus primùm innotuit Christus non prædicatione vel signis, sed militum corruptissimorum armis, cædibus, rapinis, quibus visis justa in illis poterat dubitandi suspicio suboriri. Immaculata enim Religionis Christianæ lex nec tam nefandis mediis, nec talibus Apostolis nihilo melioribus exigit introduci, vel se præcipit suscipi. Et ratio, quia restante Spiritu sancto, qui citò credit, levis est corde: unde ut infidelitas sit culpabilis, debet tam arduorum mysteriorum fides rationem immensum superans iis credibilitatis argumentis proponi, quibus perspectis fidei propositæ vel credere, vel ejus veritatem suspicari auditores teneantur.

Quæ sanè ratio Lutheranos & Calvinistas non excusat, sed vehementer accusat, nec habent de magno infidelitatis suæ peccato ullam excusationem, quâ possint dicere: Non vidimus, non audivimus, cum illis undique circumfusa sit Catholici luminis abundantia, & Orthodoxorum Doctorum beatissima copia, à quibus si

vellent, scientiam salutis edocerentur. Unde quod errent, quod veritatem ignorent, quod de suæ apostoliæ iniquitate nec minimam dubitationem patiantur, in ipsiis & pœna peccati, & peccatum est; quia affulgentem Catholicæ, Romanæque fidei toto orbe diffusæ inconcussum, inconcutiendamque veritatem citò Deo juvante perviderent, nisi cupiditatis voluntariis tenebris voluntariè cæcarentur. Quanvis si nolint dissimulare quod sentiunt, vel nulli, vel omnino pauci sunt, quorum cor si non semper, saltem sæpe non pulset Deus intus agens, intus coruscans, intus monens ut à profana novitate ad antiquam & immortalem Ecclesiæ Romanæ veritatem revertamur. Et quia in hac mentis anxietudine nec à peccatis abstinere, nec cordis munditiei incumbunt, nec Doctores haud suspectos consulunt, nec confugiunt ad Deum, ad quem, cum nescimus quid agere debeamus, hoc solum, testante Scriptura, habemus residuum ut recurramus; quia hæc, inquam, non præstant, quid mirum si ob obfirmatam nefariæ hæresis infidelitatem justo Dei judicio in æternum damnentur? Quos hîc obiter, & toto corde exoro, ut sin continuas, certè frequentes pro veritate impetranda preces apud Deum fundant; quia si tales Dei auxilio offerant, quales esse convenit; si de corde sincero, & veritatis amante exeant, ab illius, spero, misericordia sapientiam obrinebunt, qui dat omnibus affluenter, & non impropere. Et qui hætenus diu nimis ambulaverunt in tenebris, videbunt lucem magnam, & habitantibus in regione umbræ mortis lux orietur. Quod illis votis omnibus concupisco.



*Peccata saepe quidem , sed non semper  
præcedit malitia cogitatio.*

Atque hinc sponte consequitur , non requiri  
semper explicitam & actualem super malitiam  
reflexionem , ut opera adversum jus naturale  
admissa peccata esse dicantur. Cum enim ex  
perenni Ecclesiæ traditione constet dari pecca-  
ta ignorantia , quæ viris Sanctissimis non rarò  
sunt causa timoris , & pro quibus delectis ora-  
tionibus à se institutis deprecatur Ecclesia , pro-  
fectò non semper adest actualis attentio perci-  
piens & penetrans quid in actione mali insit,  
nec opus est , sicut nonnullus somniavit , ut  
inimici divini præcepti suavitate prius admo-  
neatur homo infirmitatis suæ , deinde inseratur  
cognitio medici , orandique cogitatio , & desi-  
derium instillentur. Si enim hæc omnia deside-  
rarentur , non daretur unquam ignorantia pec-  
catum , quod continenti Ecclesiæ traditioni ad-  
versatur ; sed omne peccatum malitia nomen,  
& iniquitatem promeretur , cum per illud præ-  
via semper inspiratio floccifiat , infusa dilectio-  
nis stilla in rem imperatam inclinans rejiciatur,  
præscripti à lege limites prudenter simul , &  
imprudenter transiliantur , & demùm Deo in-  
spirante notitiam medici , desiderium sanitatis,  
affectum implorandi auxilii , animus superbi-  
tumens orare negligat , medicum spernat , &  
malens in legem peccati , quàm Dei consentire,  
in peccatum ultrò ruat. Quis , quæso , cum ali-  
qua veri specie vel umbra affirmare potest , tunc  
peccatum ignorantia contigisse ? Attentio nam-  
que animi super operis malitiam meditantis ,

& præclara scilicet illa confictarum inspiratio-  
num semper occurrentium catena omnem pe-  
nitus ignorantiam excludit.

Accedit, sæpe sæpius, & nimis plures inveniri  
peccatores, qui non alia de causa peccatum fi-  
cut aquam bibunt, nisi quia vitia rationis usum  
pervertentia piarum cogitationum identidem  
pulsantium afflatum penitus extinxerunt. Et  
quia in limo profundæ iniquitatis infixi sunt,  
in captandis undique voluptatibus totam vitam  
suam consumunt, libidinibus se totos, & tota-  
liter tradunt; nullam de infirmitate curanda,  
nullam de cœlesti implorando medico, nullam  
de exorando precibus, aut placando contritio-  
nibus Deo cogitationem subeunt. Hos plenos  
& inveteratos peccatores quis non accusabit,  
quis excusare non abhorrebit? Et tamen illos  
non solum nulla de mutanda in melius vita co-  
gitatio incessit, sed de apponenda super iniqui-  
tatem iniquitate actualis cogitatio & concupis-  
centiæ motus semper sollicitant. Imò eò ali-  
quando perveniunt, ut libidinum impetum ne-  
minimus quidem scrupulus reprimat, quia con-  
suetudine in necessitatem conversa, illum mise-  
riæ cumulum assequuti sunt, ut Deum penitus  
obliviscantur.

Dicere verò, illos obdūratos piis cogitatio-  
nibus & desideriis semper pulsari, & actuali  
peccati notitiâ, vitandique peccati instinctu  
prius cœlitus donari quàm peccent, tam est in-  
fissum, quàm quod maxime. Nullum enim  
commentum est apertius cum experimento  
& ratione pugnans, quàm si asseratur, impios  
quosvis urgentes semper conscientiæ motus  
in se experiri, & divinis motibus etiam cum se

toros libidinibus dedunt, non carere; cum omnis Dei vocantis pulsus bonæ cogitationis motum immittens sit in nobis, & à nobis peccati malitiam sentientibus, possent attestari omnes quàmlibet scelesti, quàmlibet libidinum cœno demersi, quàmlibet cupiditatibus nefandis implicati, sibi pias cogitationes & remorsus non deesse: Atqui licentiores animi nulli sæpe se turbari remorsibus contestantur, & per se manifestum est, quia non solum sine dolore peccant, sed etiam cum gaudio & gloriatione lætantur cum malè fecerint, & exultant in rebus pessimis. Ergo absurdum est asserere, impios quoties (id est millies & infinities) ad peccandum illicitiuntur, toties pias cogitationes experiri. Absurdum est, & manifestam nimis præfert falsitatem credere, Stoïcos naturam integram, & illæsam arbitantes, de invocanda divini Medici ope semper dum peccarunt cogitasse. Absurdum est opinari, Epicuræos divinæ providentiæ curam obfirmatè negantes, & Deum ab implorantibus auxilium ejus injuriâ affici consentes, toties de Deo exorando desideria sensisse, quoties in peccata prolapsi sunt.

Et tamen à peccato non posse excusari impios prædictos, demonstratio S. Thomæ supra facta convincit. Quia tunc solum ignorantia excusat opus ex illa factum, quando est purè antecedens, id est quando propter eam fit opus à quo abhorreret voluntas, si sciret esse malum, & simul adhibetur omnis possibilis diligentia ad asciscendam veritatem: si verò voluntas vel directè nolit scire, vel etiam si sciret, ita se, eodemque modo gereret, vel propter alias occupationes scire negligat, vel in culpa sua sit quod non

advertat sese affundentis, & omnibus offerentis veritatis lumen; tunc ignorantia vel accusat, vel saltem non excusat, quia ignorantia tunc consequens est, si formaliter & directè, certè virtualiter & indirectè, etiam si piæ cogitationis instinctus & dictamen arguentis conscientia defint. Sæpe enim in pœnam præcedentium peccatorum actualium, vel incuria defidis & tepescentis voluntatis; vel nimii terrenorum affectus à Divinis cordis oculos avertentis, divinis motibus non tangimur; & tamen inæqualiter quidem, sed reverà peccamus, quia testante Veritate, & prudenter post cognitam Domini voluntatem peccantes, & imprudenter ignoratà ex culpa prohibitione malè agentes, verà pœnà, impari tamen plectendi sunt illi etiam, qui ad Ecclesiæ perniciem incunibentes, Deum promereri, illique se obsequium præstare arbitrantur. Quia justo Dei judicio suum lumen ob peccata non impertientis, in tenebris, & in umbra mortis sedent, à Deoque dimissi, & propria voluntati in reprobum sensum traditi ingrediuntur vias suas, ut loquitur Scriptura, quanvis scelera ignari, aut supra malitiam non reflectentes admittant.

Quod in justis quoque idem verum esse demonstratur; etenim secundum S. Thomam, & omnes alicujus notæ Theologos & Patres spiritales, vel his temporibus de pietate scribentes, sæpe committuntur peccata venialia non solum ex deliberatione & advertentia, sed sæpius per incogitantiam & subreptionem; quin etiam viri sanctitate eximii vix alio modo peccant, quia cum summo totius diligentia studio puritatem cordis sectentur, quidquid pec-



cogitationem apparet illis noxium, tota cautione declinant: & tamen ipsi Sancti de quotidianis peccatis suis testimonium perhibent, & verum est testimonium eorum: ipsi aggravans concupiscentiæ pondus, & occultos irretientis amoris proprii laqueos veritate coacti & experimento convicti confitentur, & orant cum Propheta: *Ab occultis meis munda me, Domine.* Nec tamen ab illis, sive à Deo, sive à se omnino excusantur; sed pro illis & puniuntur sæpe, & conteruntur sæpius, & semper humiliantur. Quia etsi de peccato non semper cogitent, liberè tamen titillans & subrepens peccatum veniale eligunt, liberè in creaturis plus justò immorantur, liberè epularum voluptati serviunt sub specie sanitatis, liberè passione moventur, & zelum putant, liberè quæ sua sunt quærunt, dum nihil aliud nisi quæ sunt JESU CHRISTI sibi videntur habere proposita; ut enim aliàs ex Gregorio dixi, & iterum repeto, quia non satis repeti tam momentosa doctrina potest: *Plerumque fit ut aliud in animis intentio supprimat, aliud tractantis animo superficies cogitationis ostendat. Nam sæpe sibi de se mens ipsa mentitur, & fingit se de bono opere amare quod non amat, de mundi autem gloria non amare quod amat.*

Hinc viri Sancti, & solidè pii obrepentes quotidianas culpas quotidianis lamentis plangunt, peccatorum suorum numerum & magnitudinem soli Deo nota censent, & quanvis nihil sibi malè conscii sint, in timore tamen & tremore salutem operantur suam, quia nesciunt utrum odio, vel amore digni sint. Invigilant quidem illi incessanter, & incumbunt in cupid-

tibus suis quàm possunt maximè comprimens, ut iis accisis, ad Dei lumen quandocumque fulserit suscipiendum retinendumque paratio-  
s sint: virtutum officiis jugiter & indefessè fun-  
tuntur, jejunia frequentant & orationes, elec-  
osynas profundunt, cupiditates domant, con-  
entiam pro virili humanis affectibus expur-  
nt; & quanvis inde multam non immeritò  
m, fiduciamque concipiant, plenam tamen  
innimodam, quam promittunt, & non dant  
obabilistæ, securitatem non habent; quia  
ant bonorum operum merita latentes sordes  
uscare; sciunt cum siligine latère furtures,  
mentoque lolium permisceri, quibus oppor-  
num sit incerniculum; sciunt quod nihil  
proderunt humani conatus, nisi ipsos spiritu  
suo in nobis operetur Spiritus sanctus; sciunt  
opera ab amore sui orta reverà vitiosa esse, &  
quando oriuntur in hac vita interuolsci non  
posse; sciunt nos latère voluisse Deum, utrum  
verus in nobis ipsius amor inhabitet, an divi-  
nam charitatem amor sui mentiat; num bona  
quæ agimus, vel agere videmur, amor sui, amor  
mundi, non patens, sed occultus, non sincerus,  
tamen apparens Dei amor edat. Ego ex ipso-  
rummet justorum testimonio non minùs vero  
quàm humili certum est, non semper adesse eis  
illorum conscientiam & reflexionem delictor-  
um, quæ quotidie multa committunt.

Obicies: Nullum est peccatum, nisi sit vo-  
luntarium: Atqui nisi toties quoties præcedat  
cognitio peccati, & conscientiæ morsus, quo  
neglecto progrediamur, & lineas virtutis transi-  
liamus, nisi adsit aliqua malitiæ conscientia, &  
oppositæ virtutis inspiratio, actus malus non



erit voluntarius : Ergo non erit peccatum , saltem imputabile ad culpam , & quod vitio vertatur. Probatum minor ; voluntarium enim est à principio intrinseco cum cognitione : Ergo nisi præcedat cognitio iniquitatis , actus non poterit dici voluntarius , nec malus , sed tantum cum proficiscitur ab eo qui videt & introspicit quid boni , malive in opere insit.

Respondet certum esse , actionem non posse vitio verti , si sit involuntaria ; sed falsum omnino esse , actionem desinere esse voluntariam , si desit illa commentatio , & actualis reflexio intellectus considerantis & inquirentis bonitatem , vel pravitatem ejus rei , in qua animus occupatur. Tunc enim actio est satis superque voluntaria , & à principio intrinseco , quando operans bene novit quid agat , nec ob aliud facit , nisi quia vult ; etenim qui ex vehementi passionis impetu inter ludendum jurat , in comestationibus luxuriat , vix ac ne vix quidem de rerum , quibus occupatur , nefandarum malitia vel bonitate cogitat , & tamen voluntarie agit , & peccat ; imò si ignoret se in his excessibus & infantiis falsis peccare , tunc error vitio vertitur , quia ut superius S. Thomas docebat , *error ipse provenit ex ignorantia legis Dei , quam scire tenetur.* Quam doctrinam tradit ipse Aristoteles *lib. 3. moral.* ut antea vidimus.

Adde quod peccata contra jus naturale commissa dicuntur simpliciter voluntaria , non solum quia peccans directe cognoscit & amat speciem peccati , sed etiam quia actum illum in ratione peccati & contrarii ad virtutem indirecte , & ignorantiam vincibili vult , quatenus circumfusus luminis naturalis radios vel repudiat dum af-

fulgent, vel ne affulgeant, voluntarium obicem ponit. Optinæ Cajetanus suprà laudatus, & in hæc materia nullis satís laudibus exæquandus: *Contrarietas intrinseca ipsi peccato à scienter peccante est directè & per se volita, ab ignorante aut errante per accidens tripliciter. Primò ex parte actus, quia est volita ad volitionem actus. Secundò ex parte ignorantia voluntaria, quia in ipsa volita sunt voliti omnes ejus effectus, quorum unus est incurrere in hoc contrarium: sicut homo voluntariè oculis velatis vult in sua causa quidquid mali inde sequi natum est: unde si impingat in lasivum aliquod, voluntariè impingit voluntate sua causa, scilicet velationis, vel velati inaccessus. Tertiò, &c. Quare in operibus contra jus naturale ex ignorantia admissis, vel malitia, vel negligentia in causa ignorantia invenitur. Unde Augustinus lib. 3. de lib. arb. cap. 19. Cum ubique sit presens, qui multis modis per creaturam sibi Domino servientem aversum vocet, docentem credentem, diligentem exhortetur, cenantem adjuvet, exaudiat deprecantem, non tibi deputa ut ad culpam quòd invitus ignoras, sed quòd negligis querere quòd ignoras.*

*Instabis: Qui nullam de Deo, vel peccatis cogitationem habet, nec apprehendit præcepti prohibentis, vel præcipientis instantiam, ille nullam habet gratiam actualem, quæ non infunditur absque inspiratione & pia cogitatione, quæ nobis divinæ voluntatis notitiam, & ejus implendi vel desiderium immitit, vel obligationem demonstrat: Ergo tunc ignorantia legis naturalis est invincibilis & excusabilis. Probatur consequentia: Illa ignorantia dicitur invincibilis, quæ nullâ potest diligentia ab*

non nisi voluntariâ divini luminis repulsâ contrahunt, quia divini splendoris radiis continuos obices ponunt, quibus si se permitterent, si suos illi oculos aperirent, jam jamque sine mora clariùs illustrarentur, & de claritate in claritatem inducti, ita crescerent eorum semitæ in perfectum diem, ut nihil tandem in lege naturali clausum haberent, vel obscurum.

Dixi, *qui rejecto Evangelio ritè proposito*, ut non solum cum S. Augustino, & D. Thoma excusarem infideles negativè, qui nihil de fide unquam audiverunt; sed etiam juxta eorundem Patrum principia illos, quibus Evangelium malis artibus denuntiatur. Quæ fortè de causa excusavit Deus Indos, quibus primùm innotuit Christus non prædicatione vel signis, sed militum corruptissimorum armis, cædibus, rapinis, quibus visis justa in illis poterat dubitandi suspicio suboriri. Immaculata enim Religionis Christianæ lex nec tam nefandis mediis, nec talibus Apostolis nihilo melioribus exigit introduci, vel se præcipit suscipi. Et ratio, quia testante Spiritu sancto, qui citò credit, levis est corde: unde ut infidelitas sit culpabilis, debet tam arduorum mysteriorum fides rationem immensum superans iis credibilitatis argumentis proponi, quibus perspectis fidei propositæ vel credere, vel ejus veritatem suspicari auditores teneantur.

Quæ sanè ratio Lutheranos & Calvinistas non excusat, sed vehementer accusat, nec habent de magno infidelitatis suæ peccato ullam excusationem, quâ possint dicere: Non vidimus, non audivimus, cum illis undique circumfusa sit Catholici luminis abundantia, & Orthodoxorum Doctorum beatissima copia, à quibus si

vellent, scientiam salutis edocerentur. Unde quod errent, quod veritatem ignorent, quod de suæ apostoliæ iniquitate nec minimam dubitationem patiantur, in ipsiis & pœna peccati, & peccatum est; quia affulgentem Catholicæ, Romanæque fidei toto orbe diffusæ inconcusfam, inconcutiendamque veritatem citò Deo juvante perviderent, nisi cupiditatis voluntariis tenebris voluntariè cæcarentur. Quanvis si nollint dissimulare quod sentiunt, vel nulli, vel omninò pauci sunt, quorum cor si non semper, saltem sæpe non pulset Deus intus agens, intus eoruscans, intus monens ut à profana novitate ad antiquam & immortalem Ecclesiæ Romanæ veritatem revertamur. Et quia in hac mentis anxietudine nec à peccatis abstinere, nec cordis munditiæ incumbunt, nec Doctores haud suspectos consulunt, nec confugiunt ad Deum, ad quem, cum nescimus quid agere debemus, hoc solum, testante Scriptura, habemus residuum ut recurramus; quia hæc, inquam, non præstant, quid mirum si ob obfirmatam nefariæ hæresis infidelitatem justo Dei judicio in æternum damnentur? Quos hîc obiter, & toto corde exoro, ut sin continuas, certè frequentes pro veritate impetranda preces apud Deum fundant; quia si tales Dei auxilio offerant, quales esse convenit; si de corde sincero, & veritatis amante exeant, ab illius, spero, misericordia sapientiam obrinebunt, qui dat omnibus affluenter, & non impropert. Et qui hactenus diu nimis ambulaverunt in tenebris, videbunt lucem magnam, & habitantibus in regione umbræ mortis lux orietur. Quod illis votis omnibus concupisco.

*Peccata saepe quidem , sed non semper  
præcedit malitia cogitatio.*

Atque hinc sponte consequitur , non requiri  
semper explicitam & actualem super malitiam  
reflexionem , ut opera adversum jus naturale  
admissa peccata esse dicantur. Cum enim ex  
perenni Ecclesiæ traditione constet dari pecca-  
ta ignorantia , quæ viris Sanctissimis non raro  
sunt causa timoris , & pro quibus delendis ora-  
tionibus à se institutis deprecatur Ecclesia, pro-  
fectò non semper adest actualis attentio perci-  
piens & penetrans quid in actione mali instet,  
nec opus est , sicut nonnullus somniavit , ut  
inimici divini præcepti suavitatem prius admo-  
neat r homo infirmitatis suæ , deinde inferatur  
cognitio medici , orandique cogitatio , & desi-  
derium instillentur. Si enim hæc omnia deside-  
rarentur , non daretur unquam ignorantia pec-  
catum , quod continenti Ecclesiæ traditioni ad-  
versatur ; sed omne peccatum malitia nomen,  
& iniquitatem promeretur , cum per illud præ-  
via semper inspiratio floccifiat , infusa dilectio-  
nis stilla in rem imperatam inclinans rejiciatur,  
præscripti à lege limites prudenter simul , &  
imprudenter transiliantur , & demùm Deo in-  
spirante notitiam medici , desiderium sanitatis,  
affectum implorandi auxilii , animus superbi-  
amens orare negligat , medicum spernat , &  
malens in legem peccati , quàm Dei consentire,  
in peccatum ultrò ruat. Quis , quæso , cum ali-  
qua veri specie vel umbra affirmare potest , tunc  
peccatum ignorantia contigisse ? Attentio nam-  
que animi super operis malitiam meditantis,

& præclara scilicet illa confictarum inspiratio-  
num semper occurrentium catena omnem pe-  
nitus ignorantiam excludit.

Accedit, sæpe sæpius, & nimis plures inveniri  
peccatores, qui non alia de causa peccatum fi-  
cut aquam bibunt, nisi quia vitia rationis usum  
pervertentia piarum cogitationum identidem  
pulsantium afflatum penitus extinxerunt. Et  
quia in limo profundæ iniquitatis infixi sunt,  
in captandis undique voluptatibus totam vitam  
suam consumunt, libidinibus se totos, & tota-  
liter tradunt; nullam de infirmitate curanda,  
nullam de cœlesti implorando medico, nullam  
de exorando precibus, aut placando contritio-  
nibus Deo cogitationem subeunt. Hos plenos  
& inveteratos peccatores quis non accusabit,  
quis excusare non abhorrebit? Et tamen illos  
non solum nulla de mutanda in melius vita co-  
gitatio incescit, sed de apponenda super iniqui-  
tatem iniquitate actualis cogitatio & concupis-  
centiæ motus semper sollicitant. Imò eò ali-  
quando perveniunt, ut libidinum impetum ne-  
minimus quidem scrupulus reprimat, quia con-  
suetudine in necessitatem conversa, illum misce-  
riæ cumulum assequeuti sunt, ut Deum penitus  
obliviscantur.

Dicere verò, illos obduratos piis cogitatio-  
nibus & desideriis semper pulsari, & actuali  
peccati notitiâ, vitandique peccati instinctu  
prius cœlitus donari quàm peccent, tam est in-  
sultum, quàm quod maxime. Nullum enim  
commentum est apertius cum experimento  
& ratione pugnans, quàm si asseratur, impios  
quosvis urgentes semper conscientia moris  
ipse experiri, & divinis motibus etiam cum se



totos libidinibus dedunt, non carere; cum omnis Dei vocantis pulsus bonæ cogitationis motum immittens sit in nobis, & à nobis peccati malitiam sentientibus, possent attestari omnes quàmlibet scelesti, quàmlibet libidinum cœno demersi, quàmlibet cupiditatibus nefandis implicati, sibi pias cogitationes. & remorsus non deesse: Atqui licentiores animi nulli sæpe se turbari remorsibus contestantur, & per se manifestum est, quia non solum sine dolore peccant, sed etiam cum gaudio & gloriatione lætantur cum malè fecerint, & exultant in rebus pessimis. Ergo absurdum est asserere, impios quoties (id est millies & infinities) ad peccandum illicitiuntur, toties pias cogitationes experiri. Absurdum est, & manifestam nimis præfert falsitatem credere, Stoïcos naturam integram, & illæsam arbitantes, de invocanda divini Medici ope semper dum peccarunt cogitasse. Absurdum est opinari, Epicuræos divinæ providentiæ curam obfirmatè negantes, & Deum ab implorantibus auxilium ejus injuriâ affici censentes, toties de Deo exorando desideria sensisse, quoties in peccata prolapsi sunt.

Et tamen à peccato non posse excusari impios prædictos, demonstratio S. Thomæ supra facta convincit. Quia tunc solum ignorantia excusat opus ex illa factum, quando est purè antecedens, id est quando propter eam fit opus à quo abhorreret voluntas, si sciret esse malum, & simul adhibetur omnis possibilis diligentia ad asciscendam veritatem: si verò voluntas vel directè nolit scire, vel etiam si sciret, ita se, eodemque modo gereret, vel propter alias occupationes scire negligat, vel in culpa sua sit quod non

advertat sese affundentis, & omnibus offerentis veritatis lumen; tunc ignorantia vel accusat, vel saltem non excusat, quia ignorantia tunc consequens est, si formaliter & directe, certe virtualiter & indirecte, etiam si pie cogitationis instinctus & dictamen arguentis conscientie desint. Sæpe enim in poenam præcedentium peccatorum actualium, vel incuriæ desidis & tepescentis voluntatis, vel nimii terrenorum affectus à Divinis cordis oculos avertentis, divinis moribus non tangimur; & tamen inæqualiter quidem, sed reverà peccamus, quia testante Veritate, & prudenter post cognitam Domini voluntatem peccantes, & imprudenter ignoratâ ex culpa prohibitione malè agentes, verâ poenâ, impari tamen plectendi sunt illi etiam, qui ad Ecclesiæ perniciem incumbentes, Deum promereri, illique se obsequium præstare arbitrantur. Quia justo Dei judicio suum lumen ob peccata non impertientis, in tenebris, & in umbra mortis sedent, à Deoque dimissi, & propriæ voluntati in reprobum sensum traditi ingrediuntur vias suas, ut loquitur Scriptura, quanvis scelera ignari, aut supra malitiam non reflectentes admittant.

Quod in justis quoque idem verum esse demonstratur; etenim secundum S. Thomam, & omnes alicujus notæ Theologos & Patres spiritales, vel his temporibus de pietate scribentes, sæpe committuntur peccata venialia non solum ex deliberatione & advertentia, sed sæpius per incogitantiam & subreptionem; quin etiam viri sanctitate eximii vix alio modo peccant, quia cum summo totius diligentie studio puritatem cordis sectentur, quidquid pec-

cogitationem apparet illis noxium, tota cautione declinant: & tamen ipsi Sancti de quotidianis peccatis suis testimonium perhibent, & verum est testimonium eorum: ipsi aggravans concupiscentiæ pondus, & occultos irretientis amoris proprii laqueos veritate coacti & experimento convicti confitentur, & orant cum Propheta: *Ab occultis meis munda me, Domine.* Nec tamen ab illis, sive à Deo, sive à se omnino excusantur; sed pro illis & puniuntur sæpe, & conteruntur sæpius, & semper humiliantur. Quia etsi de peccato non semper cogitent, liberè tamen titillans & subrepens peccatum veniale eligunt, liberè in creaturis plus justo immorantur, liberè epularum voluptati serviunt sub specie sanitatis, liberè passione moventur, & zelum putant, liberè quæ sua sunt quærunt, dum nihil aliud nisi quæ sunt JESU CHRISTI sibi videntur habere proposita; ut enim aliàs ex Gregorio dixi, & iterum repeto, quia non satis repeti tam momentosa doctrina potest: *Plerumque fit ut aliud in animis intentio supprimat, aliud tractantis animo superficies cogitationis ostendat. Nam sæpe sibi de se mens ipsa mentitur, & fingit se de bono opere amare quod non amat, de mundi autem gloria non amare quod amat.*

Hinc viri Sancti, & solidè pii obrepentes quotidianas culpas quotidianis lamentis plangunt, peccatorum suorum numerum & magnitudinem soli Deo nota censent, & quanvis nihil sibi malè conscii sint, in timore tamen & tremore salutem operantur suam, quia nesciunt utrum odio, vel amore digni sint. Invigilant quidem illi incessanter, & incumbunt in cupid-

tatibus suis quàm possunt maximè comprimendis, ut iis accisis, ad Dei lumen quodocumque affulserit suscipiendum retinendumque paratiores sint: virtutum officiis jugiter & indefessè funguntur, jejunia frequentant & orationes, elemosynas profundunt, cupiditates domant, conscientiam pro virili humanis affectibus expurgant; & quanvis inde multam non immeritò spem, fiduciamque concipiant, plenam tamen & omnimodam, quam promittunt, & non dant Probabilistæ, securitatem non habent; quia sciunt bonorum operum merita latentes sordes infuscare; sciunt cum siligine latère furtures, frumentoque lolium permisceri, quibus opportunum sit incerniculum; sciunt quod nihil proderunt humani conatus, nisi ipsos spiritu suo in nobis operetur Spiritus sanctus; sciunt opera ab amore sui orta reverà vitiosa esse, & quando oriuntur in hac vita internosci non posse; sciunt nos latère voluisse Deum, utrum verus in nobis ipsius amor inhabitet, an diviniæ charitatem amor sui mentiatur; num bonæ quæ agimus, vel agere videmur, amor sui, amor mundi, non patens, sed occultus, non sincerus, tamen apparens Dei amor edat. Ergo ex ipsorummet justorum testimonio non minus verò quàm humili certum est, non semper adesse eis illorum conscientiam & reflexionem delictorum, quæ quotidie multa committunt.

Obijcies: Nullum est peccatum, nisi sit voluntarium: Atqui nisi toties quoties præcedat cognitio peccati, & conscientiæ morsus, quo neglecto progrediamur, & lineas virtutis transgrediamur, nisi adsit aliqua malitiæ conscientia, & oppositæ virtutis inspiratio, actus malus non



erit voluntarius : Ergo non erit peccatum , saltem imputabile ad culpam , & quod vitio vertatur. Probatur minor ; voluntarium enim est à principio intrinseco cum cognitione : Ergo nisi præcedat cognitio iniquitatis , actus non poterit dici voluntarius , nec malus , sed tantum cum proficiscitur ab eo qui videt & introspectit quid boni , malive in opere insit.

Respondeo certum esse , actionem non posse vitio verti , si sit involuntaria ; sed falsum omnino esse , actionem desinere esse voluntariam , si desit illa commentatio , & actualis reflexio intellectus considerantis & inquirentis bonitatem , vel pravitatem ejus rei , in qua animus occupatur. Tunc enim actio est satis superque voluntaria , & à principio intrinseco , quando operans bene novit quid agat , nec ob aliud facit , nisi quia vult ; etenim qui ex vehementi passionis impetu inter ludendum jurat , in comestationibus luxuriat , vix ac ne vix quidem de rerum , quibus occupatur , nefandarum malitia vel bonitate cogitat , & tamen voluntarie agit , & peccat ; imò si ignoret se in his excessibus & infantiis falsis peccare , tunc error vitio vertitur , quia ut superius S. Thomas docebat , *error ipse provenit ex ignorantia legis Dei ; quam scire tenetur.* Quam doctrinam tradit ipse Aristoteles *lib. 3. moral.* ut antea vidimus.

Adde quod peccata contra jus naturale commissa dicuntur simpliciter voluntaria , non solum quia peccans directe cognoscit & amat speciem peccati , sed etiam quia actum illum in ratione peccati & contrarii ad virtutem indirecte , & ignorantia vincibili vult , quatenus circumfusus luminis naturalis radios vel repudiat dum af-

fulgent, vel ne affulgeant, voluntarium obicem ponit. Optimè Cajetanus suprà laudatus, & in hoc materia nullis satis laudibus exæquandus: *Contrarietas intrinseca ipsi peccato à scienter peccante est directè & per se volita, ab ignorante aut errante per accidens tripliciter. Primò ex parte actus, quia est volita ad volitionem actus. Secundò ex parte ignorantia voluntaria, quia in iis volita sunt voliti omnes ejus effectus, quorum unus est incurrere in hoc contrarium: sicut homo voluntariè oculis velatis vult in sua causa quidquid mali inde sequi natum est: unde si impingat in laevum aliquod, voluntariè impingit voluntate sua causa, scilicet velationis, vel velati incessus. Tertio, &c. Quare in operibus contra jus naturale ex ignorantia admissis, vel malitia, vel negligentia in causa ignorantia invenitur. Unde Augustinus lib. 5. de lib. arb. cap. 19. Cum ubique sit presens, qui multis modis per creaturam sibi Domino servientem aversum vocet, doceat credentem, diligentem exhortetur, errantem adjuvet, exaudiat deprecantem, non tibi deputa ut ad culpam quodam invitum ignoras, sed quod negigis querere quod ignoras.*

*Instabis: Qui nullam de Deo, vel peccatis cogitationem habet, nec apprehendit præceptum prohibentis, vel præcipientis instantiam, ille nullam habet gratiam actualem, quæ non infunditur absque inspiratione & pia cogitatione, quæ nobis divinæ voluntatis notitiam, & ejus implendi vel desiderium immittit, vel obligationem demonstrat: Ergo tunc ignorantia legis naturalis est invincibilis & excusabilis. Probatur consequentia: Illa ignorantia dicitur invincibilis, quæ nullâ potest diligentia ab*



operante superari : Sed qui caret gratiâ actuali  
piæ cogitationis, nullatenus potest ignorantiam  
superare, quia nisi Deus illam piæ cogitatio-  
nem inspiret, non sumus sufficientes aliquid  
boni cogitare ex nobis quasi ex nobis, sed suf-  
ficientia nostra à Deo est : Ergo si nulla præce-  
dat operis mali cogitatio, operans laborabit  
ignorantiâ invincibili, subindeque à peccato  
excusabitur.

Respondeo jam nos à quæstione totius Ethicæ  
Christianæ difficillima ad aliam speculati-  
vam nihilo faciliorem provocari, ut videas,  
quod aliàs monuisse me memini, non medio-  
crem esse sententiarum de gratia cum vitæ mo-  
ralis regulis connexionem. Sed utut sit, facili-  
mè ex dictis responderi potest, quia sicut erro-  
rem cum veritate conciliare maximi operis est,  
sic veritatem puræ & immaculatæ disciplinæ  
moralis cum veritate de gratia Christiana so-  
ciare nullius negotii, aut laboris. Misericordia  
divini adjutorii & legis Domini castimonia ob-  
viaverunt sibi, & osculatæ sunt : at verò ut Au-  
gustinianus & Angelicus D. Thomæ incorrup-  
tus de gratia sensus cum vagæ probabilitatis  
commento congruat, inflectendus, obscuran-  
dus, & obtorto collo trahendus est.

Dicendum ergo, hominem sine prævio gratiæ  
dictamine contra jus naturale peccantem, gra-  
tiam actualem habuisse semel ineunte rationis  
aurora ( nisi positivum obicem fortè posuerit )  
habere sæpe in vitæ decursu inonentem, habere  
semper à Deo paratam & oblatam ; unde ca-  
ventiam ejus ad excusandas excusationes in pec-  
catis obtendere peccator non potest, nec debet  
Dei gratiam accusare, sed suam perversam ar-

guere voluntatem divino lumini claudentem ostium cordis, & cœlestem lucem sibi circumfusa, ac legem naturalem in corde sculptam creatarum amore tenebrarum repellentem. Unde quod non semper habeat actualem bonæ cogitationis gratiam, suæ culpæ meritò vertere debet, quia qui non facit quando potest, justè perdit bonum posse. *Quod ergo ignorat*, inquit Augustinus superiùs laudatus, *quid sibi agendum sit, ex eo est quod nondum accepit; sed hoc quoque accipiet, si hoc quod accepit bene usus fuerit.* Est ergo ignorans, vel non actu advertens jus naturale semper reus, quia semper potentia antecedenti & expedita ignorantiam suam superare potest & debet. Potest, inquam, quia in ejus libera voluntate positum est Dei auxilio removere obstaculum, quod divino, naturalique lumini objecit, & etiamnum objicit.

Itaque peccatores ignorantia juris naturalis laborantes, præter exteriora librorum sacrorum auxilia, quibus vix aut nunquam carent, præter internam, nec extinctam luminis naturalis virtutem, sentiunt etiam identidem divini luminis fulgores, quos si fideliter sequerentur, ad uberius pleniusque lumen pervenirent: sed suo vitio non perveniunt, non defectu potestatis, sed perversitate voluntatis libero, sed tenacissimo creaturarum amore repentis. Ut enim aliàs ex D. Thoma didiscimus, licet non sit in potestate hominis divinum advocare lumen, in ejus tamen libertate est ejus luci objectaculum ponere, sicut Solis mundum illuminantis radiis potest homo velum obducere. Quem obicem tandiu ponet, sed liberè ponet, quandiu pertinaciter creaturis adherescet; tandiu verò adhæ-

rescet, quandiu Deus effuso victricis gratie auxilio obversos sibi aggeres non rumpet; tunc verò ponere desinet, quando Deus altius misertus, non necessitatem, sed constantem infuderit sibi serviendi voluntatem *Lumen divinum*, inquit August. lib. 1. retract. cap. 10. *non irrationalium animalium oculos pascit, sed pura corda eorum qui Deo credunt, & ab amore visibilium rerum & temporalium se ad ejus præcepta implenda convertunt: quod omnes homines possunt, si velint. Quamvis ii tantum velint, quibus voluntas à Domino præparatur.* Vide quæ aliàs de concordia libertatis creatæ cum gratia, & de retentione potentiæ activæ & antecedentis, etiam in justa gratiæ ob peccata actualia absentis denegatione satis operosè disputavimus.

Insistes: Gratia sufficiens omnibus datur, præsertim verò justis, quibus præcepta Dei possible sunt secundum præsentem quas habent vires, ut Innocentius X. & Alexander VII. definiverunt: Atqui si absente pia cogitatione culpentur facti in legem, deest gratia sufficiens etiam justis, qui sæpè sine reflexione in opera mala labuntur: Ergo ut actio sit mala, eamque possit vitare voluntas, requiritur prævia bonitatis, aut militiæ inquisitio, vel saltem cogitatio.

Respondeo hac instantiâ præmaturnius occupari abstrusas de auxiliis difficultates hic minimè discutiendis, ne omnia sus deque misceamus. Quia tamen in his materiis vix una ventilarî potest, quin altera occurrat, aliqua pingui minervâ libabo, aliquando rerum ea fusiùs Deo benè dante prosequuturus.

Dicendum ergo, quod si ad defendendum nulli deesse gratiam sufficientem, non alio præsidio

munirentur Theologi, quàm si affirmetur singulis & semper pias cogitationes, instinctus, & secretos monitus in ipsis etiam flagitiis inunitti, profectò actum esset de gratia sufficiente. Cum enim ex Scriptura & Traditione, compellatà etiam hominum peccantium experiencià compertum sit, non dari in singulis flagitiis expressas mali cogitationes, non potest non causà cadere gratia sufficiens, si dogmatistam incerto, & quod falsum esse multi intimo sensu percipiunt, innitatur. Uni tam ruinoso fundamento superstructa corruat machina necesse est; & injuriæ gratiæ sufficienti sunt, qui eam tam fragili scuto circundant, sub quo procul dubio timebit à timore nocturno, à sagitta volante in die, & à negotio perambulante in tenebris tam obscuræ opinionationis. Certè omnibus hominibus sicut deesse semper, ita & adesse semper internos afflatus, peræquè falsum est, peræquè est contra experientiam disputare.

Fateor ergo omnes, maximè verò justos secundùm præsentes quas habent vires posse divina servare mandata, imò & peccata venialia divisivè vitare; sed ad hoc ut possint, minimè requiritur, ut semper piis persentiant cogitationes, aliàs semper actu bona cogitent; sed sat est quod possint, ut revera possunt, ab actibus illicitis & animum nimis, sed venialiter occupantibus abstinere. Maximè quia piarum cogitationum subtractio voluntaria est, saltem in sua causa, amore nimirum sui, & creaturarum, unde ipsa inconsiderationis imprudentia, & peccatum & pœna peccati est, spargente Deo prænales cæcitates super illicitas cupiditates. Vnde ergo, catholicæque decreverunt Summi Pontifi-

ces justos secundum praesentes, quas habent vires, posse divina implere mandata; quia & gratiam, & virtutes infusas, & crebras habent inspirationes, & pro modo habitualis gratiae & statu modo majoribus, modò minoribus gratiis actualibus permoventur, amplioribusque permoverentur, nisi voluntaria cæcitate sæpe nimis clauderent oculos cordis. Sed quod actu infundantur omnibus, & singulis, & semper piarum cogitationum continentes motus, non solum non definiverunt, sed nec cogitare, vel imaginari sapientissimi Præsules potuerunt.

Quod verò dicunt nonnulli, voluisse Romanos illos Antistites Deum justis semper actu immittere bonas cogitationes, ut auxilium sufficiens semper habere dicamur, sed cogitationes illas animum fugere, mentemque latere; qui, inquam, hæc dicunt, Summos Pontifices & revera inhonorant, & sententiam suam magis infirmant, falsam doctrinam falsiori ratione cumulantes. Ubinam credo Pontificium aliquod diploma legerunt, ubi affirmetur dari in nobis cogitationes nobis ignotas, ut per eas auxilium sufficiens habere dicamur? Non potest cadere non dico in Pontifices, non dico in Innocentium X præjudicii acerrimi emunctione, vel Alexandrum VII. ob politissimi ingenii præstantiam, à testibus oculatis (qui mihi Romæ narrarunt) commendatissimos; non dico in Theologos, sed nec in homines, nec mulieres, nec infantes cadere inquam potest tale commentum. Ad irridendam & aspernandam tam ingentem à ratione exerrationem sufficit communis sensus; & ad eam refutandam sufficiunt communissima Theologorum notiones.

Non sponte homines tam absurdi nascuntur, ut credant pias cogitationes imminere, & non sentiri, & quod absurdius est, per eas sufficientes vires præberi. Gratiâ sufficientem hoc modo defendere, prodere est, prævaricari est; & qui eam penitus negant, desperatam merito credent ejus causam, cui tam desperatum adhibetur remedium.

Quas vires, amabò, dabit menti cogitatio, quæ utrum menti insit, nescio? Quomodo tentationis periculo opitulabitur non percepta inspiratio? Ne mirere, inquires, quia est auxilium fluens. Sed quid prodest ipsum fluere, si sine conscientiam non induit, si torporem non excitat, si surdo canit, si à peccante non percipitur? Hocine est sufficientes suppeditare vires? Hocine est voluntatem ad bonum agendum malumque vitandum satis instruere, satis firmare, satis munire? Deus! quales copię auxiliares, quæ sunt pugnantibus invisæ? Quale donum, quod est occultum? Quale subsidium, quod est ignotum? Qualis sufficientia, quæ ipsa inanitate inanior est? Certè qui gratiâ sufficientem omnibus indiscriminatim dari pernegant, parum tacitas illas cogitationes, & minime conspicuas, ut nihil suæ sententiæ incommodas; parùm, inquam, vel nihil curant: non enim illi chimæricas occultasque cogitationes impugnant.

Sed durum est, inquires, justos gratiâ sufficiente privare. Fateor: sed quo, quæso, privantur, si carent cogitatione, quam menti suæ inesse nesciunt? Non possunt certè ob illa præsidia sibi erepta queritari, quæ etiam dum adsunt nihil intellectum illustrent, nihil permo-



vent voluntatem. Ea sic habere, & iis carere perinde est, & ferè synonymum. Sed injustus erit Deus, addes, si dum præcipit, vires sufficientes non præbet. Esto ita sit (esto, inquam; nam quamcunque gratiam etiam sufficientem Deus non ex justitia, sed ex misericordia dat, aliàs non esset gratia.) Sed justiorne, quæso, erit Deus, si tale auxilium fluens, ut sufficienter possimus, det, quod nec intellectus videt, nec voluntas sentit? Si conqueri possint peccatores gratia sufficienti sibi debita carentes, nonne justius conquerentur, quod sibi debitam tam malè solvat Deus? Non indiget patròno & defensore Deus, qui justificatur in sermonibus suis, & vincit cùm judicatur; sed si ad tuendam justitiam Dei hæc adinvenerunt recentiores nonnulli, certò sciant se magis eam accusare quàm defendere. Sed Deus, replicabis, semper præsens est, semper stat ad ostium, semper monet & pulsat. In quo sensu id verum sit suprà monui, alibi ampliùs Deo juvante explicaturus. Sed quid inde lucri reportant Adversarii? Cogitatio de qua non cogitatur, auxilium fluens, sed non affulgens, motio transiens, & nihil permovens, quomodo monet, quomodo pulsat? Si hoc monere est, moneri quoque sufficienter dicetur dormiens, cui somno demerso, nec audienti imminens periculum denuntiatur.

Pro solutione aliarum minutiorum objectionum adverte, nonnullos recentiores punctum hujus difficultatis minimè attingere, dum nostram sententiam impugnant, quasi asserentem ignorantiam invincibilem juris naturalis non excusare à peccato: sed falluntur; omnem enim ignorantiam invincibilem inculpatam esse

credimus, sed contendimus nullam dari juris naturalis invincibilem ignorantiam. Breviter tamen eorum argumenta proponam & refellam, quia nonnihil, & veluti ex obliquo nostram videntur sententiam impugnare.

Arguunt 1. Videtur hæc sententia favere Luthero alicubi proferenti hoc spurciloquium: *Scholastici dicunt, invincibilem ignorantiam reddere excusabiles: tanta cecitas est in Papa scholis & Ecclesiis.* A quo non dissentit Hieronymus Zanchius hæreticus, dicens: *Falluntur Scholastici, cum talem ignorantiam, quam invincibilem vocant, ideo à peccato excusant, quia invincibilis est.*

Secundò: Nostra sententia videtur esse Janfeniana, etenim Janfenius lib. 12. de statu naturæ lapsæ, ignorantiam invincibilem juris naturalis nunquam excusare pronuntiat, benè tamen ignorantiam juris positivi.

Tertiò; Adversari etiam videtur nostra doctrina Augustino epistola 10. dicenti: *In illis qui non audierunt, neque potuerunt, pœna peccati est non credere, non autem peccatum.* Atqui similiter in jure naturali aliqui rustici sunt qui non audierunt, neque potuerunt aliquem consulere de remotioribus juris naturæ consuetudinibus: Ergo in illis ignorantia non peccatum, sed pœna peccati est.

Quartò: Nemo peccat in eo quod vitare non potest. Quod axioma, teste Augustino, unanimi concentu decantant & in montibus Pastores, & in theatris Poëtæ, & indocti in circulis, & docti in Bibliothecis, & Magistri in Scholis, & Antistites in sacris locis, & in orbe terrarum genus humanum: Atqui stante ignorantia juris naturalis, vitare peccatum non est in potestate ho-

minis, cùm illud solum in nostra censetur potestate, quod sit à voluntate cum plena advertentia rationis: Ergo ignorantia juris naturalis excusat à peccato.

Quintò: Lex virtutem obligandi non obtinet, nisi cum applicatur hominibus per promulgationem, ut docet D. Thomas 1. 2. *quest. 90. artic. 4.* Sed promulgatio legis fit per dictamen rationis intimantis homini agenda vel omittenda; quod dictamen in laborantibus ignorantia juris naturalis deest: Ergo lex naturæ non obligat ad sui observationem, dum adest ignorantia juris naturalis.

Sextò: Illud excusat à peccato quod tollit rationem voluntarii, quod usque adeò verum esse testatur Augustin. lib. de vera Relig. cap. 14. *Ut nulla Doctorum paucitas, nulla indoctorum turba diffentiat.* Sed ignorantia juris naturalis tollit involuntarium, cùm tollat cognitionem dirigentem, & voluntati faciem præterentem: Ergo ignorantia juris naturalis excusat à peccato.

Demùm ex nostra sententia sequuntur multa absurda. Primò, si ignorantia juris naturalis nunquam excusat à peccato, quia nunquam excusatur quod Deus per legem æternam damnat, sequeretur peccare eum qui probabilissimam sententiam eligit, cùm sæpe falsa sententia sit verâ probabilior, ut docet Aristoteles 2. *Topic.* Secundò sequeretur, peccasse Jacob, cùm accessit ad Liam, cùm actum per se illicitum perpetravit, & legi æternæ repugnantem; & tamen ejus ignorantiam excusavit ipse Dominus, dicens: *Et ego scio quod simplici corde feceris, & idcirco custodivite, ne peccaretis in me.* Tertiò fortunæ esset, & non voluntatis, quod homines peccarent, vel

non

non peccarent, prout opera sunt, vel non sunt æternæ legi consentanea. Quartò ex nostra sententia oritur perplexitas, & peccandi necessitas, quia qui ex ignorantia judicat malum bonum, tenetur illud efficere, ne repugnet conscientiæ, & efficiendo peccabit, quia à lege æterna recedet: unde quoquò se verterit, & faciendo quod in se est, peccabit. Unde nostra sententia videtur durissima.

Respondeo ex dictis hæc argumenta esse occupata, sed ad majorem prædictorum lucem singulis satisfacimus. Ad primum dicendum, sæpe sæpius me asseruisse ignorantiam invincibilem excusare à peccato, sed nullam dari ignorantiam invincibilem juris naturalis. Accedit argumenta ex testimoniis hæreticorum petita nullius esse ponderis vel momenti, ut aliàs diximus, & tradit Augustinus epist. 50. *Ipsa pietas, veritas, charitas nos non permittit eorum hominum accipere testimonium, quos in Ecclesia non vidimus, cui Deus perhibet testimonium. Qui enim divina testimonia non sequuntur, pondus humani testimonii perdididerunt.*

Ad secundum dicendum, pueriliter & ignoranter nostræ sententiæ authorem fingi Jansenium, atque impertinenter tam antiquæ doctrinæ Jansenismi notam inuri, ut illi vulgi creetur invidia. Num ut Valques in 1.2. diss. 122. c.1. & Paulus Comitulus lib.5. resp. moral. cap.1. aiunt, omnes antiqui Theologi in ea fuerunt sententia, nunquam invincibilem, sed semper vincibilem esse juris naturalis ignorantiam. Fortè Jansenistæ fuerunt Alexander de Hales, Gratianus, Durandus, Alphonsus à Castro, Antiochodorensis, Albertus Magnus, Gabriël, Hu-

go Victorinus, Guillelmus Parisiensis, Adrianus, S. Bonaventura, & ipsemet D. Thomas! Fortè Jansenista fuit Gerson, quia *lib. de vita spirituali, lect. 14. coroll. 3.* scripsit: *Quidquid sit de ignorantia facti aut juris humani positi, concors est sententia, nullam in his qua legis divina sunt, cadere ignorantiam invincibilem.* Certè nisi præjudicatarum opinionum amor adversus antiquæ doctrinæ studium invalescat, si ad illam, quæ Theologos decet, æquitatem nos reducamus, semotis odio, contentione, & litibus, quibus omne judicium exoculatur, fatebimur sententiam nostram ab omnibus Theologiæ luminibus longè ante Jansenium uno fuisse ore prædicatam. Et cum tot habeam securitatis præstitites ac fidejussores, libenter cum Augustino dixerim arguenti: *Vide cum quibus sit mihi causa communis, quam nullâ consideratione sobriâ pulsare calumniis, & expugnare cenaris.*

Adde Jansenium concedere, posse dari ignorantiam invincibilem juris naturalis, quæ nihilominus peccatum sit, quia per culpam primi parentis in hominum mentes injecta est, & est voluntaria voluntate capitis. At Ego contrà existimo, ignorantiam juris naturalis nunquam excusare, quia nunquam invincibilis est; invincibilemque esse primi peccati poenam, sicut & inordinatos concupiscentiæ motus; sed minimè peccatum actuale, de cujus ratione est quod propria voluntate admittatur. Ita enim tradit Aug. *lib. de duab. animal. cap. 11. Nec peccatum, nec rectè factum impurari cuiquam justè potest, qui nihil fecerit propria voluntate.* Et D. Thom. in 2. dist. 30. quæst. 1. art. 2. *Oportet quod secundum hoc quod aliquid rationem culpa habet, secundum*

hoc ratio voluntarii in ipso reperiatur. Sicut autem est quoddam bonum quod respicit naturam, & quoddam quod respicit personam, ita etiam est quoddam culpa natura, & quoddam persona. Unde ad culpam persona requiritur voluntas persona, sicut patet in culpa actuali, qua per actum persona committitur; ad culpam vero natura non requiritur, nisi voluntas in natura illa.

Quod si contendas Jansenium voluisse duntaxat ignorantiam juris naturalis eatenus invincibilem applicari, quia eam sine auxilio Dei superare non possumus, quo quidem auxilio nisi culpâ nostrâ caremus, imò quodam vero sensu nunquam caremus; hoc, inquam, si contendas, ad quæstionem facti devolveris, & Jansenium ad antiquorum sensum benigna interpretatione revocas. Verum licet parum curanda sit discordia verborum, si absque pugna sensus varietur duntaxat verborum notio, melius tamen est sicut D. Thomæ & antiquorum sensum, ita & verba retinere. Maximè quia fundamentum Jansenii ex eo repetitum, quod ignorantia ideo peccatum est, quia ex primigenia culpa proficiscitur, S. Thomæ adversum judicamus. Porro in his facti quæstionibus non vacat immorari, quia ut verbis August. epistol. 50. utar: *Ecclesia Christi non litigiosis opinionibus fingitur, sed divinis attestationibus comprobatur.* Neque enim, quod sine injuria innocentia illius dixerim, si peccavit Cæcilianus (Jansenius) ideo hereditatem suam perdidit Christus. Facile est homini seu vera, seu falsa de altero homine credere; sed scelerata impudentia est, propter crimina hominis, qua orbi terrarum non possis ostendere, communionem orbis terrarum velle damnare. *Verum Cæcilianus à tra-*



*istoribus divinarum codicum fuerit ordinatus* ( utrum Jansenius à sententia antiquorum de ignorantia juris naturalis recesserit ) *nescio, non vidi, ab inimicis ejus audiri. Non mihi de lege Dei, non de precorio Prophetarum, non de sanctitate Psalmorum, non de Apostolo Christi, non de Christi eloquio recitatur.:::Cecilianus Ecclesia Carthaginensis Episcopus* ( Jansenius Iprensis Ecclesie Episcopus, & in communione Ecclesie Romanæ mortuus ) *humanis litibus accusatur; Ecclesia Christi in omnibus gentibus constituta divinis vocibus commendatur.* Uni Ecclesie Romanæ adhæreo, impertinente Jansenismi suspicionem depulsa facilem, & jam depulsam flocificacio.

Adde rursum, iniquum esse, & planè tyrannicum, velle aliquem Authorem ob aliquot propositiones damnatum, in aliis omnibus reprobare, & illos damnatarum propositionum reos asserere, qui in aliis illæsis, intactisque dogmatibus cum eo consentiunt. Certè si juxta Patres licet veritates in libris Gentilium veluti in stercore gemmas latentes, tanquam ab injustis possessoribus extorquere; si Philosophicis disciplinis veluti ancillis vocatis ad arcem utitur semper D. Thomas, ipsumque Aristotelem fidei servire cogit; si teste August. lib. 3. quæstion. Evang. cap. 4. *Nulla falsa doctrina est qua non aliqua vera intersit*; si ipsis hæreticis de suo schismate gloriantibus applicat idem Pater illud Davidicum; *Quoniam in multis erant mecum.* Cur non licebit cum Authore aliàs Catholico, gravi, & erudito, tametsi per incogitantiam in nonnullis sine pertinacia lapsio, & Sedis Apostolicæ devotissimo quidquam habere commune?

Cùm non ex hominibus fides, sed ex fide homines judicandi sint. Aliàs suspecta foret fides Trinitatis, quia eam Calvinus tutatur; suspecta realis Christi in Eucharistia præsentia, quia illam Lutherus non est inficiatus.

Ad tertium dicendum, quicumque etiam rusticum posse legem naturalem cordi impressam audire dum monet, consulere cùm dubitandi ratio adest, & à voluntariis peccatorum obicibus sibi temperare: unde nullâ juris naturalis ignorantiam unquam potest nisi in amentia excusari. Porro nota, locum illum ex Augustino relatum, apud Augustinum non inveniri: (unde doleo celebrem Thomistam hoc testimonio ex aliquo Probabilista bona fide exscripto, agere contra Jansenium, adeo verum est optimos Authores à Casuistis non rarò decipi, nec posse istos sine falsitatis periculo, & contagio tractari.) Etenim totam epistolam decimam accuratissimè perlegi, & in ea ne verbum quidem facit de peccato ignorantie; sed Hieronymum dehortatur à libris veteris Testamenti ex Hebræo vertendis, & simul hortatur ut Septuaginta versionem mirè depravatam suæ reddat veritati. Quare crediderim locum illum ex epistola 105. depromptum, sed vitiatum & truncatum; sic enim habet Augustinus: *Ipsi ignorantia in eis qui intelligere noluerunt, sine dubitatione peccatum est; in eis autem qui non potuerunt, pœna peccati.* Illam verò particulam, quæ sola facit ad rem, *Non autem peccatum*, non habet Augustinus, sed addit adversarius in eo loco, ubi clarissimè ignorantiam juris naturalis culpabilem affirmat Augustinus. Exponens enim illa verba, Joan. 15. *Si non venissem, & eis loquutus non fuisset, peccatum non*

*haberent; nunc autem excusationem non habent de peccato suo: fatetur Gentes excusari quidem à peccatis infidelitatis, sed non ab illis quæ contra jus naturale peccarunt, quantumvis obtendant se ob carentiam fidei & Evangelicæ prædicationis illa peccata non agnovisse. Non utique, inquit, peccatum nullum haberent, qui pleni erant aliis magnis, multisque peccatis; sed hoc peccatum vult intelligi non eos habituros fuisse, si non venisset, quo cum audissent eum, non crederunt in eum. Et post pauca: Dei tamen judicium nec illis parcit qui non audierunt. Quicumque enim sine lege peccaverunt, sine lege peribunt. Et quantumvis se ipsi excusare videantur, non admittit hanc excusationem, &c. ubi ailerit, non damnari quidem infideles eo quod non audierunt, sed superbiam eorum falsò excusatam se putare à peccatis in jus naturæ admissis, ex eo quod nihil audierint; quia ignorantia juris naturalis reatu originis pœna peccati est, & additamento propriæ voluntatis peccatum.*

*Ad quartum dico, homines peccata contra jus naturale utique posse vitare, cum liberè in illa labantur; posse etiam ignorantiam superare, ut suprà fusè ostendimus, nec opus est ea iterum cum fastidio, & cruce lectoris iterare. Unde etiam patet ad 5. lex enim naturalis in corde scripta satis seipsam promulgat, nisi oculos cordis voluntariè clausos invenerit. Patet similiter ad sextum, fusè enim demonstravimus, peccata ignorantia juris naturalis patrata esse voluntaria directè voluntate facti, & indirectè voluntate peccati. Certè si hæc argumenta quicquam efficerent, probarent etiam omnia quæ ignorantia vincibili sunt, peccato eximi; nam*

ignorantia vincibilis tollit plenam rationis advertisementem; tollit actuale dictaminis promulgationem, tollit cognitionem dirigentem, & voluntati facem præferentem. Quare fateantur adversarii necesse est; sæpe nos incidere in peccatum sine cognitione non prælucente, sed in sua causa voluntariè extincta; unde non mirum si opera tenebrarum edant, qui sponte abjiciunt arma lucis. Quàm præclare, quàm doctrinæ nostræ consonè, & opportunè August. serm. 44. de divers. cap. 6. *Iustitia præsto est justè viventi: secundum ejus regulam videt quemadmodum justè vivat; & sicut justì benè vivendo eam vident, ita injusti malè vivendo eam non vident. Nam & ille justè vivit, cum eam videt; ut secundum eam actus suos dirigat; quia nisi secundum justitiæ regulam direxerit actus suos, in errorem iniquitatis impingitur.*

Ad septimum ex variis inconvenientibus conglobatum dicendum, nihil absurdi ex nostra sententia ab omnibus antiquis Theologis unanimi consensu tradita sequi. Unde ad 1. Fateor opinionem legi æternæ adversam non esse nisi ex errore probabilissimam, unde & à peccato non excusare. Et quid mirum si opinio relativè ad judicium peccato corruptum sit sæpe probabilissima, cum illi videatur etiam frequenter certa? Et tamen conscientia erronea legi naturali adversa, teste D. Thoma, nunquam excusat, quia error ille ex voluntariè offusa menti humanæ caligine nascitur. Laboranti etiam ignorantia vincibili sæpe opinio sua probabilissima videtur: Ergone excusatur à peccato? Igitur frivolum est, & D. Thomæ contrarium præsumptum primum absurdum. Aliàs & fornicationes Tur-

carum, & latrocinia Germanorum, quæ certò arbitrabantur innoxia, bona forent.

Frustra huc exempla congeram, quæ affatim referunt qui de gentium ritibus scripserunt; cum certum sit, nullum esse tam immane facinus quod non fuerit toti alicui populo non solum probabile, probabilius, probabilissimum, sed etiam certum, & legibus sancitum, & consensione populi firmatum, & religionis ritu consecratum; quibus præjudiciis omnis scrupulus & dubitatio ablegabantur. Et certè quid aliud volunt Patres dum aiunt, nihil esse deterius corde duro, & malâ conscientia simul & tranquillâ, quæ mala sine repugnantia, sine pudore, sine dubitatione operatur, quia bona esse deplorandis tenebris, sed peccatorum frequentia accersitis arbitratur. Hinc Bernardus *lib. de conscientia ad Religios. Ord. Cisterc. versùs medium*: Sequitur mala & tranquilla conscientia, quâ sicut nihil pejus, ita nihil est infelicius. Quævis quanam illa sit, quæ nec Deum timet, nec hominem revereatur, quæ cum venerit in profundum malorum, contemnit. De hujusmodi in Scriptura veritatis expressum est: Verberaverunt me, & non dolui; traxerunt, & non sensi. In brevi temporis spatio non solum non sentit, sed & placet, & dulce fit quod amarum erat, & asperum vertitur in suave. Ducitur deinde in consuetudinem, ut jam non modo placeat, sed & assidue placeat, & se continere non possit. Ad extremum verò non potest avelli, quia consuetudo vertitur in naturam, & quod prius ad faciendum erat impossibile, jam impossibile est ad continendum. Sic enim descenditur, imò caditur à Ierusalem in Iericho. Sic itur in aversionem & duritiam cordis. Hic peccator scetor, hic quadriuanus est. Hic lapis spelunca

superpositus illes misericordes radios divini luminis non admittit. Hac est mala conscientia, quæ per huiusmodi discrimina, imò precipitia ruit, & corruit, & irruit super seipsum. Quomodo tranquilla? Cùm mundi huius prosperitas ailudit, & illudit: cùm laudatur peccator in desiderio anima sua, & iniquus benedicitur; cùm peccantium favor, & peccare nolentium pavor, nolens & dolens arridet ei: cùm non est qui arguat, sed & qui arguere peccatorem audeat ex omnibus qui in circuitu ejus sunt. Nihil aquè exasperat illius tremendi judicis majestatem, quàm peccare, & securè peccare, & devitiis quasi de virtutibus gloriari. Non miserearis Domine, ait justus, omnibus qui operantur iniquitatem. Hac est iniquitas, cujus non misereatur Deus, cùm homo defendit quod Deus odit, & peccatum justitiam assertit... Resistere ex aquo est. Illa autem ex aquo Deo resistere proponit, qui quod Deus adstruit, destruit quantum in ipso est, dicens malum bonum, & bonum malum; amarum dulce, & dulce amarum; lucem tenebras, & tenebras lucem. Hanc verò tranquillitatem nutrit impunitas, securitatis & negligentia mater, noverca virtutum, religionis virus, tinea sanctitatis.

Secundum etiam nihilo magis valet, quia ab ignorantia juris ad ignorantiam facti nulla est consequentia, & discriminis rationes, hic minime iterandas superius adduximus. Tertium & quartum absurdum suprà ex Angelico Doctore illa sibi sæpius proponente & conterente refutavimus. Præclara ejus verba ex lect. I. ad Galatas, adduximus paulò superius pagina 560. & ex art. 6. testimonium elegantissimum & argumentosum pag. 557. retulimus.

Quod denique additur, nostram sententiam



durissimam apparere Probabilistis, fateor; divinæ legis amantibus, nego. Quomodo enim durum creaturæ rationali esse vel cēseri potest, ad insitam legis naturalis normam, quā homines sumus, & Dei imagines, mores componere suos? Nonne est omni rationis lumini renuntiare, fingere in illo præcepto laborem, quod Deus in hominum animis penitiùs infixit, quodve observandum esse natura clamat, ratio insonat, & invitat? Non ergo præcepti duritiem, sed obdurati cordis se voluntariè occæcatis malitiam accusemus. Nec imitemur Pelagianos similiter apud Hieronymum *lib. 1. adversus ipsos*, murmurantes: *Rego qua est ista justitia, ut in peccato tenear erroris, cujus reatum non habet conscientia? Nescio me peccasse, & ejus rei quam nescio, pœnas luo? Et quid plus faciam, si sponse peccaverò?* Notat etiam Augustinus *epist. 105.* hujusmodi querelas ex superbia proficisci: *Humana superbia*, inquit, *tanquam presumens de viribus liberi arbitrii excusatam se putat, quando ignorantia, non voluntatis est quod peccat.*

## R E F L E X I O.

*Multi quarunt scientiam, pauci conscientiam. Conscientia tamen quàm scientia citiùs apprehenditur, & utiliùs retinetur*, inquit Bernardus *lib. de conscient.* In omnibus ergo agendis naturale illud tribunal consule, bonam intelligo conscientiam, qua nihil in hac vita securius, nihil jucundius possidetur. Assiduè internas domestici cordis paginas intellige, seu intus lege: confer illas cum libro vitæ, ne fortè in ultima discussione abjiciaris, si ex æterno libro internum

non emendaveris. Unicuique liber est sua conscientia, ad quem emendandum omnes sacri libri inventi sunt: ergo scriptis digito Dei voluminibus conscientia, si qui sunt, corrige errores, ut recta sit conscientia tua. Porro bona est conscientia, ait præfatus Bernardus, *qua habet in corde puritatem, in ore veritatem, in acti. ne rectitudinem.* Munda est, cum nec de præterito iuste accusatur, nec de præsentis iniuste delectatur. Pura est, cui nec Deus peccata sua imputat, quia non fecit; nec aliena, quia non approbavit; nec negligentiam, quia non tacuit; nec superbiam, quia in unitate permansit. Secura est, quando accusationem non patitur, vel pro torpore boni, vel pro presumptione mali. Recta est, cui peccatum suum displicet, nec aliena peccata dissimulat; & cum corripit, non insultat. Talis est bona conscientia.

Hanc semper lege, semper habe præ oculis; quia omnia supergreditur sententias, qui à sua conscientia suam sententiâ condemnatur. Quem alter iudicat, potest excusationem prætexere, sed reus sine excusatione erit, qui conscientia bonæ iudicio condemnabitur. Hæ conscientia loquentis voces, quæ nesciunt tenere silentium, semper audires, nisi pravitatis obicem ejus luminibus poneres. Est conscientia cordis scientia; quid mirum si interdum eam non sentis, & contra conscientiam agis, qui cor concupiscentiâ perversum habes? Quid mirum, si oculis agris odiosa & invisa lux est, quæ puris est amabilis? Ergo preces pro veritatis impetrandæ cognitione fusæ sint assiduæ; quia si tales sint, quales esse convenit, non illorum modò notitiam obtinebimus, quorum nobis inesse ignorantiam conscii sumus, sed eorum

etiam quæ nescientes ignoramus. Ergo justos imitare, qui ut ait Augustinus lib. 22. de Civit. cap. 23. *Vigiliis continuis excubant, ne opinio verisimilis fallat, ne decipiat sermo versutus, ne se tenebra alicujus erroris offundant, ne quod bonum est, malum; quod malum est, bonum esse credatur.* Ergo continuis lamentis vaca, ne in ipsis bonis operibus occulto aliquo errore displiceas; & ad hoc valebunt preces, vigiliæ, & lamenta, ut dimittantur tibi peccata ignorantie, non quidem quandiu esse peccata culpâ tuâ ignoraveris, nec eorum proinde affectum deposueris, sed ut lucem tibi Deus infundat, quâ intelligas illa esse peccata, & postquam intellexeris, toto corde detesteris; ut aperiat Deus quod latebat, & suave fiat quod antea non delectabat.

Sed potissimum mentis castimonie, cordis mundicie, affectus puritati operam da, quia si te iniquitas non oneret, si non fascinet delectatio, si non inclinet voluptas, si non gravet cupiditas, si non deprimat amor mundi, si non trahat superbia vitæ, inter multiplices humanæ vitæ tenebras, inter innumerabiles negotiorum molestias nulla supererit ne in obscurissimis quidem Decalogi conscriptis ignorantia; sed te, Deumque cognosces; te audies, & Deum sedulo orabis, ut à voluntariis erroribus semper defendat. Divinam enim lucem, & naturalis legis claritatem sæpè non videmus, non ex absentia lucis quâ circumfundimur, sed defectu voluptatis, quam in creaturis liberè, sed tenacissime defigimus. *Non ideo cogitent stulta corda,* inquit August. tract. 1. in Joan. *quasi absentem esse lucem, quia eam videre non possunt; ipsi enim propter peccata tenebra sunt, quomodo positus in*

Sole cecus, praesens est illi Sol, sed ipse Soli est absens. Hæc si præstes, bonæ conscientiae motus & discernes facile, & facilius exequeris, quia nihil à te durum exigit, asperum nihil rationali creaturæ imponit; quia hoc solum petit, ut sicut villam, ita & colas animam tuam. Præclare Cæsarius Arelatensis homil. 20. Clamat tibi in conscientia tua aeterna iustitia: Quomodo gubernas agrum tuum, gubernas & cor tuum. Quomodo colis villam tuam, cole & animam tuam. Quomodo superfluos palmites tollis de vite tua, sic malos affectus tolle de anima tua. Præcis de vite tua quod malum est, incide de anima tua quod iniquum est. Quomodo in vite tua totos superfluos palmites amputas, & duos aut tres qui sunt legitimi, derelinquis: sic & in anima tua omnia desideria, quæ res alienas malè respiciunt, & pessimè concupiscunt, Spiritus sancti gladio, & crucis falce debes incidere; & hoc tantum, unde iustitia vel misericordia cernitur, reservare.



## SPECVLATIO II.

*Probabilissimum, seu sententiam revera falsam & aeterna legi adversam, non esse tutam agendi regulam, praesertim in concursu probabilioris, omni genere auctoritatum suadetur.*

**Q**UIDAM recentiores omnibus traditionis & antiquitatis pro tuenda vaga probabilitate praediis destituti, videntes nullum in Scriptura aut Patribus verbum extare, quo vel minimum larga haec opinandi licentia insinuetur, illud effugium excogitarunt, quod si vim justae defensionis habeat, nulla erit unquam novitas, quae justè possit accusari. Nihil mirum, inquiunt, probabilitatem tacuisse Patres, quòd eam tanquam certissimam supponerent. Sed haec exceptio si recipiatur, in tuto ponimus quidquid humana ratio semper luxurians, semper novorum pruritu laborans voluerit invenire. Id sanè mirum, recentiores illos contendere, juris naturalis posse contingere & de facto dari ignorantiam; & tamen (quod sanè ridiculum est) nullam unquam contigisse ignorantiam suae probabilitatis, quam dicunt ejusdem esse cum orbe originis & perennitatis. Experiamur an probabilitatis assertio non solum sit silentio praetermissa, quod non diffidentur adversarii, sed etiam significantissimis antiquitatis oraculis praedamnata.

Probatur 1. auctoritate sacræ Scripturæ, quæ *Deuteron. 26.* præcipit ut impleamus mandata *ex toto corde, & ex tota anima.* Qua autem veri specie dici ille potest Deum ex toto corde diligere, qui illud eligit quo probabilius existimat Deum offensum iri? Illéne amicum non dico totum, sed sincero corde diligeret; qui eamitteret; quibus probabilius intelligeret amicitiae necessitudinem dissolvendam? Præcipit etiam Spiritus Sanctus *Eccles. 37.* ut *ante omnia opera verbum verax præcedat te, omne n actum consilium stabile.* Non est autem verbum verax quod reip-sa æternæ legi & immutabili veritati adversum est, & tale esse probabilius judicatur. Nec consilium stabile censeripotest instabilis & nutans minoris probabilitatis fucus, securitati majorique probabilitati scienter prælatus. Præcipit Sapiens *Proverb. 6.* fugere periculum, quia *qui amat periculum peribit in illo.* Ille autem procul dubio periculum amat, periculoque se committit, qui ei adhæret parti, cui salutis periculum inesse probabilius videt. Præcipit Veritas, *Matt. 7.* *Intrate per angustam portam, quia lata porta & spatiosa via est, qua ducit ad perditionem. Quàm angusta porta & arcta via est, qua ducit ad vitam, & pauci sunt qui inveniunt eam!* At quomodo intrat per angustam portam, qui intuitu utilis & commodi laxiorem opinionem æternæ legi adversam aliquo tantum minoris probabilitatis colore oblitam, spectat tutiore, & probabiliore, pro lege ac commodo stante consulto eligit? Certè vaga probabilissimæ licentia lata porta est & spatiosa, omnibus morum corruptelis longè lateque patens, quotidianisque Probabilistarum inventis magis magisque dilatata.



Ea omnes asperitates ita molliuntur, ut fatentibus suis authoribus, dejecto quovis terriculo, pietas vitiiis facilior, voluptateque suavior effecta sit; ut difficilius multò sit simpliciter vivere, quàm ex pietate vivere; ut gratissimæ rerum in melius commutatione, feliciter pleraque quæ illicita vulgò putabantur, innoxia probentur & licita; ut mirabilibus ejus artificiiis, salubribusque versutiis alacriùs nunc purgentur crimina quàm committantur, plurimique vix citiùs maculas contrahant, quàm eluant; ut denique in omnibus Christi vel Ecclesiæ mandatis nihil duri, acerbis nihil relictum sit, sed omnis fuerit asperitas acerbitasque detracta, atque omnibus ad vitam commodiùs agendam lenociniis inventis, omnes viæ Christi salebræ complanatae, omnes ex illa spinæ evulsæ, omnes omnibus, ferè criminibus fuerint veniæ datae.

Denique præcipit Apostolus veritatis, Thesalon. 5. *Omnia probate, quod bonum est tenete, ab omni specie mali abstinete vos.* Omnia quidem probant recentiores, dum omnia probabilia esse effutiant: sed absit ut in sensu Apostoli omnia probent, id est omnia discutiant, omnia examinent, ut exponunt Patres, ut quod bonum est, id est æternæ legi consonum, teneant, ab omni que mali specie abstineant, quod utique non faciunt, qui ea insequuntur quibus turpis inesse speciem probabilius arbitrantur.

Confirmatur cum Julio Mercoro ex variis Scripturarum factis & exemplis, in quibus criminis damnantur opera, quibus reverà non defuissent verisimiliores probabilitatum fuci, illis quibus moderni laxitates suas præcolorant; **Damnatur** in primis Protoparentum ligni vetiti.

comestio, & ita damnatur ut in omnes posteros transferat tantæ damnationis maledictum; & tamen Protoparentes ex probabilitatum *antiquissima, & universalissima*, sic à Caramuèle vocatur, officina excusationes eruere poterant & securitatem. Poterant enim sibi facile persuadere legem Dei mortem minitantis esse pœnalem, ob quam culpa solùm civilis, vel ad summum venialis prævaricantibus contingit. Poterant sapientissimi illi Casuistæ prætexere ob materiæ parvitatem se in peccatum mortale lapsuros nunquam, nec pœnam à jure communi adeo exorbitantem, & ad personas saltem non nominatas minimè extendendam promerituros; & tamen has probabilitatis cœlo & chao antiquioris, mundoque, si Superis placet, cœvæ exceptiones non produxerunt primi genitores, quas utique non ignorasset tanta ipsis cœlitus infusa sapientia, nec omisisset tanta necessitas, si eas sibi prodesse credidisset.

Similiter i. *Regum* 15. nomine Dei præcepit Samuel Saül: *Nunc ergo vades, & percutito Amalech, & demolire universa ejus: non parcas ei, & non concupiscas ex rebus ipsius aliquid: sed interfice à viro usque ad mulierem, & parvulum atque lactentem, bovem & ovem, camelum & asinum.* Præceptum autem illud benignè & probabiliter interpretatus est Saül, arbitrans servandum Agag incolumen ad magnificentiam triumphi, retinenda quoque pecora in gratiarum actionem immolanda. Unde Saül increpatus à Samuele quòd non obtemperasset voci Domini, respondit: *Tulit de prada populus oves & boves, primitias eorum quæ casus sunt, ut immolet Domino Deo suo in Galgalis.* Nonne justa, vel probabilis

videbatur hæc exceptio ? Nonne pia aderat gloria Dei intentio , quâ recentiores opera quævis etiam intrinsecè mala purgant ? Nonne aliquis tenuis probabilitatis gradus illi Sathis defensionis inerat , longèque major quàm insit illis terrenis proprii commodi & delectabilis intentionibus, ob quas simoniis, usuris, vindictis veniam dant plures Casuistæ *lib. 6. dissert. 1. cap. 2. specul. 3.* relati & refutati ? Et tamen Deus qui non juxta probabilitatis regulam lesbyam, sed legis impositum rigorem judicat, Sathis operis colores despexit, intentionis prætentam pietatem aspernatus est, dicens: *Nunquid vult Dominus holocausta & victimas, & non potius ut obediatur voci Domini ? Melior est enim obedientia quàm victima; & auscultare magis quàm offerre adipem arietis: quoniam quasi peccatum ariolandi est repugnare, & quasi scelus idololatria nolle acquiescere. Pro eo ergo quod abjecisti sermonem Domini, abjecit te Dominus, ne sis Rex.*

Mitto alia plura quæ faciliè probabilissimus à peccato purgaret, quæ tamen æquissimus judex Deus gravissimis pœnis in Scripturis enarratis ultus est. Excusaret procul dubio Probabilistarum laxitas uxoris Loth levitatem oculos in civitatem igne conflantem retorquentis. Excusaret Davidis populi ex vana gloria recensio-nem, tot hominum strage & gravioribus morte pœnis punitam. Excusaret utique Ozæ pietatem probabilem, Arcam è curru præcipitem retinentem, quia eam rebatur casuram, nisi præsto fuisset. Excusaret etiam, ac levissimâ injunctâ pœnitentiâ absolveret Ananiam cum Sapphira uxore sua, quos ob mentacium probabiliter leve Princeps Apostolorum contrivit spiritu

oris sui, *Act. 5.* Ergo vaga probabilitas ad excusandas excusationes in peccatis nata sacrae Scripturae factis non est consentanea.

Probatur 2. ex Patribus, quorum in hac parte silentium sufficeret, & esset omni tuba vocalius ad exsufflandam probabilissimi novitatem. Cum enim tot, & tanta sint probabilitatis compendia, ut hac doctrinâ, si vera esset, nulla sit vel ad dubia resolvenda commodior, vel ad evellendos scrupulos aptior, vel ad complanandum salutis iter expeditior; creditu difficile esset, eos ejus regulæ adeo vitæ negotiis & morum dubiis necessariæ nunquam meminisse. Quis non ægè ferat, cui non suspectum erit & periculosum, novam vitæ moralis regulam, quæ per omnia quàm latè patent humanæ vitæ officia proceditur, invehi, quâ cuique permissum sit opinionem minus probabilem, commodo affectibusque contra legem & honestum indulgentem sequi, & eam à Patribus vel omninò prætermissam; vel æterno silentio sepultam fuisse? Atqui recentiores fatentur probabilitatis regulam fuisse Patribus ignoratam, qui propterea in citandis recentioribus copiosissimi, parcissimi sunt & muti in antiquis referendis; qui propterea gratulantur Ecclesiæ, quòd exuberet recentiorum turbâ benignas opiniones introducentium, fiantque in dies opiniones probabiles, quæ antea non erant; proindeque jam non peccent homines; qui antea peccabant; qui propterea etiam in mutuas crebrè laudes excurrunt, seseque mutuo scabunt, ut suis inventis reciprocas concilient modernorum laudes, & auctoritatem extrinsecam emendicent. Ergo ipsi sine Probabilistis authoribus, probabilissimus ab auctoritate

Patrum desertus est, quòd ad probabilissimam abundantissimam eversionem apud æquos æstimatores satis superque sufficeret. Sed absit ut in re tam necessaria tacerint Patres, qui vagam opinandi licentiam non semel exertissimè reprobaverunt.

In primis Patres omnes relati speculatione præcedenti peccata ex ignorantia juris naturalis patrata non excusant, sed accusant, etiam quando quis benè fieri putat quod malè fit, quia legi naturali & æternæ adversum semper malum est. Ergo juxta Patres ibi citatos totus ruit, & à fundamentis subruitur probabilismus, qui omnes opiniones probabilitatis colore induras, tametsi falsas & tales probabilius existimatas securitate donat. Si juxta Patres ignorantia velans malitiam non excusat per se mala, præsertim si aliqua sit, ut sæpe contingit, conscientiæ velliatio; quid dixissent, vel quid non dixissent Patres, quidve statuisent de operibus adversus jus naturale conscientiam probabiliore reclamante admissis? Scio quidem modernos opiniones quascumque probabiles ignorantia invincibilis fuso colorare, & nefanda inde opera honestare. Esto, hoc illis demus, quod tamen in veritate negandum est; tamen hoc illis ex indulgentia permissio, qua verisimilitudine ignorantiam invincibilem possunt prætexere in conflictu opinionum inter se pugnantium, cum id relinquat operans non quod ignorat, sed quod probabilius censet esse faciendum; id faciat non quod licet, sed quod probabilius censet non licere. Ergo ex opinionum varietate non in ignorantiam incidit, sed in formidinem, qua stante si minus probabilia eligit, utique peccat; quia ut.

ut veridicè Augustinus *epist.* 154. scripsit: *Si quis bonum putaverit esse quod malum est, hoc putando utique peccat. Ea sunt omnia peccata ignorantia, quando quisque benè fieri putat quod malè sit.*

Sed clariores Magni Augustini definitiones audiamus. Non potuit S. Doctor clariùs mentem suam aperire, quàm *lib. 3. contra Academ. cap. 16.* ubi Academicorum commune axioma, quod ipsissima est Probabilistarum doctrina, refert: *Cùm agit, inquebant, quisque quod ei probabile videtur, non peccat, nec errat.* Ex qua maxima semel probata omnia probari & honestari crimina, infert Augustinus: *Taceo, inquit, de homicidiis, parricidiis, sacrilegiis, omnibusque omninò qua fieri aut cogitari possunt, flagitiis aut facinoribus, qua paucis verbis, & quod est gravius, apud sapientissimos iudices defenduntur. Quomodo enim non facerent quod probabile visum est? Qui autem non putant ista probabiliter persuaderi posse, legant orationem Catilina, quâ patria parricidium, quo uno continentur omnia scelera, persuasit. Illud est capitale, illud formidolosum, illud optimo cuique metuendum, quod nefas omne, si hæc ratio probabilis erit, cùm probabile cuquam visum sit esse faciendum, non solum sine scelere, sed etiam sine erroris vituperatione committatur.* Ergo conceptis verbis probabilitatem debellavit Augustinus, & ex illa omnia nefaria dogmata celsissimis, & necessariis consequutionibus sponte derivari ita perspicuè demonstravit, ut omnia probabilitatis monstra hac ætate nata prævidisse, & prænuntiasse videatur. Unde fit, Probabilissimum in diverso sensu esse antiquum & novum: antiquum, utpote in Academia partum: novum,



quia jam pridem extinctum novi recentisque Probabilistæ suscitavit.

Eundem probabilissimum rejecit & exarmavit idem Augustin. *lib. 1. de Bapt. cont. Donatist. cap. 3. & 5.* ubi proponens quomodo se gerere debeat Donatista, qui fatetur quidem rectè suscipi Baptismum in Ecclesia Catholica, sed dubitat an rectè apud Donatistas suscipiatur, respondet S. Pater, *eum graviter peccare vel eo sola quod certis incerta præponeret. Accipere itaque in parte Donati, si incertum est esse peccatum, quod dubitet certum esse peccatum, non ibi potius accipere, ubi certum est non esse peccatum.* Vides ex Aug. illum sine dubio & certissimè peccare, qui certis incerta præponit, unde à Doctore celebratur illud consilium ex Augustini verbis concinnatum: *In his qua salutis sunt, tene certum, dimitte incertum.* Sed qui opinionem falsam, & legi æternæ adversam, & talem probabilius exstimatam, relictâ probabiliore & tutiore sectatur, certis incerta præponit; nam opinio minùs probabilis incerta est, ut patet hoc ipso quod est opinio, & minùs probabilis, præferturque tutiori & probabiliori, quam sequi, certum est nullum esse peccatum: Ergo opinio probabilis, quæ reverà falsa est, quæve probabiliori præfertur, in peccatum operantem, ex August. præcipitem agit.

Plura aliorum Patrum huc congerere in promptu esset, sed postquam Augustinus tam luculenter loquutus est, ab aliis referendis supersedere brevitatis meæ compellit. Mitto illud Chrysost. hom. 44. in Matth. *Si vestimentum empturus unum gyras negotiatorem, & alterum, & ubi meliores vestes inveneris, & pretio viliori, ab illo comparas: an non oportet populum circuire om-*

nes Doctores, & inquirere ubi sincere veritas Christi venundatur, & ubi corrupta, & veriozem eligere plus quàm vestimentum? At juxta probabilistarum leges potior habenda est vestimenti ratio, quàm veritatis, quàm respuere etiam in sententia probabiliori affulgentem, licere sine verecundia docent. Certè non boni mercatores sunt, nec æqui rerum æstimatores, illisque procul dubio filii hujus sæculi prudentiores in generatione sua sunt, qui & vestes quæ apparent commodiores, & cibos qui credantur salubriores, & vias quas existimant tutiores, omni quâ possunt sollicitudine quærunt: at nostris Probabilistis anima non est plus quàm esca, nec timet animæ legem dare, quam corpori suo præscribere nollent.

Mitto SS. Patres semper in rebus agendis, ubi non erat ipsis explorata veritas, tantum timoris præ se tulisse, ne fortè quod eis rectum videbatur, iniquum à Deo judicaretur & pravam Hinc Magnus Gregorius tam seriò timendum monet, ne vitia incautis animis virtutum specie illabantur. Unde sancti viri, inquit s. Moral. cap. 6. *ciam mala sperant, sua etiam benè gesta formidant, ne cum bona agere appetunt, de actionis imagine fallantur, ne pestifera tabes putredinis sub boni specie lateat coloris.* Unde infert, quod Sancti de incertitudine operum trepidi, quò gradiuntur ignorant. Et cap. 7. *Iusti in i sis bonis operibus positi trepidant, ac ne in eisdem occulto aliquo errore displiceant, continuis lamentis vacant.* Hinc August. liquidam veritatem non cernens, sic mentis cordisque opera sua verentis sollicitudinem aperiebat epist. 250. *Quis vindicandi modus non solum pro qualitate, vel quantitate culparum, ve-*

*rùm etiam pro quibusdam viribus animorum, quàm profundum & latebrosus est? Ego in his quotidie peccare me fateor, & ignorare quando, quoque modo custodiam id quod scriptum est: Peccantes coram omnibus argue, ut ceteri timorem habeant. Quis in his omnibus timor, mi Pauline sancte homo Dei, quis tremor, qua tenebra? Nonne putamus de his esse dictum: Timor & tremor venerunt super me, & contexerunt me tenebra? Hunc autem timorem tam justum, tam castum funditus Probabilistæ tollunt tanquam inanem, cum actus per se illicitos boni coloris specie, & falsa verisimilitudine honestari singulis penè versibus inculcent, negentque in eo quemquam merito culpari, quod a duce opinione probabili, & rejecta probabiliori & tutiori operatus fuerit. Ergo vanis sese scrupulis, anxiiisque superstitionibus exedebant Patres ob totius moralis disciplinæ cardinem ignoratum: Ergo infelicitati eorum condolendum est præclaris Guigonis Chartusiani Ordinis Generalis verbis: O Apostolorum tempora infelicissima! o viros illos ignorantia tenebris involutos, & omni miseratione dignissimos, qui ut ad vitam pertingerent, propter verba labiorum Dei tam duras vias custodiebant, & hac nostra copendia nesciebant!*

Mitto Patres tantoperè curâ animarum, officioque Pastoris, & Rectoris se idcirco indignos credidisse, tam periculosum regimen conscientiarum prædicasse, tamque accuratè fideles monuisse ne se remissis dissolutisque directoribus instruendos traderent, ne si cæcus cæco ducatum præstet, ambo in foveant cadant, ne si sal evanuerit, non sit in quo salietur, & tota vita cælesti sale destituta corrumpatur. Quia nimirum à cæco ducitur, qui ejus sequitur opi-  
nionem,

nionem , quæ æternæ & incommutabili veritatī contraria est , cū veritatis lumen non cernat , sed fatuum & volaticum ignem falsitatem exhibentem & in foveam trahentem. Hinc S. Franciscus Salesius conscientię moderatorem non solum ē mille unum , uti volebat Magister Aui-  
la , sed ē decem millibus unum post varias orationes seligendum docet. Hinc Patres Spirituales inculcant , continentibus apud Deum precibus agendum esse , ut & nostras , & rectorum nostrorum tenebras illuminet , quia nusquam certa securitas , nisi in veritate invenitur : nusquam , & nunquam licet , quod semper & ubique non licet. Hinc S. Basilus *de abdicat. ver.* ait : *Contendit adversarius noster , ut nobis persuadeat , ut alicui nos credamus , propter vitia simulata quadam lenitatis specie commendanti , ut hoc modo innumeris nos pravis libidinibus irretiat. Si ergo cum corpore tuo mitius agere volens , magistrum tibi quesieris tecum se ad vitia tua demittentem , vel ut verius dicam , tecum unā in eandem perniciem curruentem , frustra mundanis rebus nuncium remisisti , qui cacum tibi ducem asceveris , cujus ductum sequuto in foveam tibi sit procidendum.*

At vero juxta modernos Probabilistas , sicut qualibet opinio probabilis tuta est agendorum regula : ita quilibet de plebe doctus , quilibet Sacerdos , post semel aut iterum perlectum Bertinum Bertauldum , post exploratum compendium Dianæ , vel Bonacinæ , idoneus habetur regendis animabus dux ; cū tamen res admodum periculosa , lubrica , ingentis cautionis , & divinæ prudentiæ , ac divinorum experientiæ sit de conscientię latebris , de gravitate criminum , de

culparum distinctione, de pœnitentiæ injungenda modo definire. Vidi non sine acerbissimo doloris sensu in quibusdam communitatibus austeritatem non mediocrem profitentibus, excipiendarum confessionum curam infirmis ingeniis committi, quibus perpenſa divinarum rerum cognitio nulla, nulla librata judicii maturitas, sed temeraria de rebus ignotissimis & minimè meditatiſſis differendi fiducia. Vidi & doli illis sanandarum animarum provinciam miſſerimè demandari, quibus vix claves januæ domus credere voluiſſent. O perversam rerum æſtimationem! O puniendam auguſtiſſimarum rerum profanationem! Illis videmus artem artium imponi, quibus nunquam notum fuit non modò quid eſſet Confessarius, sed omninò quid eſſet Christianus. Patres divini luminis abundantia præcellentes falſitatem timent ſimilitudine veritatis indutam, formidant corruere, & ſecum alios in eandem foveam trahere; & nemo Probabiliſtarum non ſe ad animarum curam putat idoneum, probabilitate non minùſ quam Dei revelatione ſecurum? Væ peccatoribus in hujusmodi duces incurrentibus! Sed terribilius væ Prælatiſtis tam miſeros duces tam damnabiliter præſcientibus! Formidabat Auguſtinus in dandis morum conſiliis, ne ceſpitaret; pronuntiabat inanem eſſe ſecuritatem à ſe datam, ſi foret à divina lege diſſentanea: & jam quilibet ſemidoctus probabilitatis umbone teſtus nihil non arduum deſinit, & in favorem libertatis contra legem aſcito aliquo extrinſeco, vel intrinſeco, ut loquuntur, veritatis colore impavidus, intrepidusque ſententiam fert. Audiant, quæſo, hujusmodi præſidentes Auguſti-

nam homil. 12. aliter de se sentientem, & dicentem: Ecce dat tibi securitatem procurator. Quid tibi prodest si paterfamilias non acceptet? Procurator sum, servus sum. *Vu dicam tibi: Vive quomodo vis, Dominus te non perdet, securitatem tibi procurator dedit? Nihil valet securitas procuratoris. Veinam tibi Dominus securitatem daret, & ego te sollicitum facerem! Domini enim securitas valet, etiamsi nolim; mea verò nih. valet, si ille noluerit. Qua est autem securitas, fratres, vel mea, vel vestra, nisi ut Domini iussa inientè, diligenterque audiamus, & promissa fideliter expectemus? Ridebunt, scio, formidines nostras Probabilistæ; scrupuli, terroris panici, & superstitionis nimia nos damnabunt: sed pro eorum risu libenter post Sanctos lacrymas damus. Quarant, Lector, non me, sed Augustino doctiores; sed caveant ne inveniant præsumptores. Et si ridere pergant, meliùs cum eodem Augustino eorum risum committo fidelium gemitibus, quàm impugno sermonibus. Et plus eis sine dubitatione præstamus, si ut corrigantur oremus, nec cum tantis ingeniis vel pereant, vel alios perdant.*

Mitto demùm Patres ad operis rectitudinem præter puræ intentionis charitatem desiderasse semper electionis veritatem, quarum altera absente, vitiosam esse operationem contestantur. Præclarus ea de re extat Bernardi locus lib. de præcept. & dispensat. cap. 14. ubi sic longiusculè, sed eximie & nervosè probabilissimi licentiam exinanit usque ad fundamentum in ea: *Vt interior oculus verè sit simplex, duo illi esse arbitror necessaria, charitatem in intentione, & in electione veritatem. Nam si bonum quidem deligat, si d verum non eligat, habet quidem zelum Dei, sed non*



*secundum scientiam: & nescio quemadmodum iudicio veritatis vera esse possit cum falsitate simplicitas. Volens denique ad veram discipulos instruere simplicitatem magistra Veritas: Essote, inquit, prudentes sicut serpentes, & simplices sicut columbae. Premisit ergo prudentiam, sine qua neminem satis esse posse simplicem sciret. Quomodo denique verè simplex erit oculus cum ignorantia veritatis? aut verò vera potest dici simplicitas, quam simplex ignorat veritas? Scriptum est enim, Ignorans ignorabitur. Patet ergo, laudabilem illam & à Domino laudatam simplicitatem absque his duobus non esse bonis, benevolentia, atque prudentia, ut oculus videlicet cordis non solum pius, qui fallere nolit; sed & cautus sit, qui falli non possit. Et quibusdam interjectis: sive itaque malum putes bonum quod fortè agis; sive bonum, malum quod operaris, utrumque peccatum est.*

Illo loco nihil planius, nihil evidentius. Manifestum enim est, illum qui opinionem, tametsi probabilem, sed revera aeternae veritati adversantem eligit, spretâ tutâ & derelictâ probabiliore; manifestum est, inquam, illum non habere in electione veritatem, cum proponat illud quod verosimilius iudicat esse falsum. Illène habet in electione veritatem, qui ex falsitate dirigit actus suos? Illène viam veritatis eligit, in veritate ambulat, veritatem facit, adoratque Patrem in spiritu & veritate, qui à via veritatis errare se, & edere se opera tenebrarum probabilius arbitratur? Certè ex regulis probabilissimi non solum non habetur in electione veritas, sed prorsus extinguatur amor veritatis, inanisque efficitur inquisitio detegendæ falsitatis. Si probabilis opinio, etiam falsa, tuta sit, quid opus est

veritati vestigandæ insudare? Cur necesse erit eam à Deo ardentibus votis postulare? Cur non potius veritatis fugiemus radios, & fulgores execrabimur, qui dum apparent, angustius sæpe demonstrant iter; dum verò latent, jucundè, nec minùs tutè per latiore[m] viam ambulamus? Ergo si tuta est probabilitas etiam falsa, inanis est veritas non adepta, perniciosa est veritas jam resecta. Certè benè falsa est illa doctrina, ex qua sequitur extinctio veritatis; nec est à Sp̃ritu veritatis sententia, quæ tutam facit voluntariam repulsam veritatis.

*Reflexio & apostrophe ad Probabilistas.*

*Desinat novitas laceßere vetustatem.* Novis Probabilistis quâ par est reverentiâ meos sensus aperiam, illosque ad amorem vetustatis hortabor, quia illud saltem ex probabilitatum studio sibi videntur comparasse, quod simili disputandi genere se consequutum Tullius gloriabatur, dum diceret: *Nos qui probabilia sequimur, refellere sine pertinacia, & refelli sine iracundia possumus.* Videte ergo quomodo non in solis dogmatum controversiis, sed & in vitæ Christianæ moribus componendis necesse est insudare propter tantos tam varii erroris anfractus, ut moralis disciplinæ linea secundum Ecclesiastici & Catholici sensus normam dirigatur, quâ exurgentium novitatum fraudes deprehendere, laqueosque vitare, & in fide Romanæ Ecclesiæ sana sani, atque integri poterimus permanere. An nescitis quod in Ecclesia Catholica magnopere curandum est, ut id

teneamus quod ubique, quod semper, quod ab omnibus creditum est. Cur, quæso, Patrum universitati, antiquitati, consensioni, modernorum sufficitis partem, novitatem, dissensionem? Cur novellæ probabilitatis contagio non jam portiunculam tantum, sed totam pariter Ecclesiam commaculare conati estis? Cur non Patribus fideliter in hæretis, qui prorsus jam non possunt ab ulla novitatis fraude seduci? Cur non paucorum temeritati, vel inscitiae, universalis Ecclesiæ, Romanorumque Antistitum decreta prætulistis? Cur operam non dedistis, ut collatas inter se Majorum consuleretis, interrogaretisque sententias? Majorum, inquam, eorum qui diversis licet temporibus & locis, in unius tamen Ecclesiæ Catholicæ communione & fide permanentes, Magistri probabiles ideo extiterunt, quia vagam vestram probabilitatem antequam nata esset, verbis factisque condemnauerunt.

Patribus & Sanctis omnibus solida & pura placuerunt: vos subtilibus & vanis delectamini. Patres sanctè sancta tractaverunt: vos distinctivularum metaphysicarum vanissimis nugis sanctitatem nostræ Religionis inquinatis. Illi ad sacram legis severitatem divina institutione formati & studio comparati certis adhærescebant, & tuta quæque timebant: vos laxissimis opinionibus capti & gloriantes, à probabilibus formidinem, à dubiis periculum, à nefandis horrorem abstulistis. Primi a:ctâ viâ & angustâ portâ, quæ ducit ad vitam, gradiuntur: vos latam aperientes portam, quæ ducit ad perditionem, diverticula quæritis, & qui vos sequuntur, per prærupta ducitis. Sancti quotquot fuerunt Ecclesiæ Romanæ Canones spiritus Dei conditos

& firmatos, ac totius orbis reverentia consecratos probaverunt, & tenuerunt tanquam formas & regulas morum fixas, immobiles, immutabiles, & veluti cœlestia instituta ad formandam, in temporum perpetuitate Christianorum vitam venerati sunt: vos divinas illas regulas tanquam Lacedæmoniorum, aut Atheniensium leges, vel septem Græciæ Sapientium oracula pridem abolita & extincta spectatis, & continuis vestris scriptiunculis vel eas deletis, vel dudum abrogatas prædicatis. Estne hoc de Ecclesia benè mereri, Ecclesiæ spiritum velle extinguere, & pro virili conari; spiritum, inquam, qui nullam temporum decursu pati labem, nullam Cœsistarum prolubiis pati mutationem potest? Sancti quia viva Ecclesiæ membra erant, sic erant animo constituti, ut vèro & intimo cordis affectu, sincera ferventis animi præparatione qualibet data occasione foras erumpente, & in exteriores actus sese fundente peroptarint tam necessarias sanctiones ad amissum servari, vigentes teneri, cœnscultas instaurari, collabentes muniri, collapsas restaurari, ad easque semper conniti omnes, omnes contendere Christianos: vos nullis cautionibus adhibitis leges promiscuè abrogatis, omnem antiquæ severitati aditum obsèpitis, ut inde hōrrenda morum dogmata, & doctrinæ flagitia jam sine pudore deriveris, sine metu disciplinam enervetis, totum canonum rigorem exsuffletis, & Pontificiarum Constitutionum pondus abigatis. Sancti non minori sacra Concilia, quàm Evangelium reverentiā lectitabant, Romano Pontifici non minùs quàm Christo obtemperabant, eorumque quàmlibet severa decreta in corde consignata

referebant, ac sibi ipsis graviter succensebant, quòd non essent in iis observandis religiosiores: vos de emendandis moribus, de restituenda disciplina nullam unquam bonam cogitationem suscipitis. Nihil ægrum, nihil saucium in moribus videtis, sed nova semper legibus vulnura infligitis. Quidquid abusu inolevit, pro lege habetis; quidquid negligentia exolevit, in eorum quæ nunquam fuerunt numero collocatis. Quin & vigentes leges & emanantes singulis annis Pontificum Constitutiones infringere laboratis, & illas jacere omnes, nec ullam obligandi vim habere, docere non erubescitis, quoties vobis quasi ex tripode pronuntiare bene visum fuerit: *Concilium vel diploma non sunt usu recepta.*

Quis vos, amabò, & salutis arbitros, & Synodorum iudices, & Pontificum censores constituit? Quo jure, vel qua lege de supremis judiciis, quibus subesse debetis, iudicium fertis, & prolatâ sententiâ condemnatis? Qua fronte eorum decretis interceditis? Qua præfidentia infallibilitatem Conciliis, Pontificibusque eximiam, ligandi solvendique potestatem Petro ac successoribus ejus divinitus collatam, vobis, vestrarumque probabilitati asseritis? Quasi ex vobis universa lex pendeat & Prophetæ, & ita pendeat, ut jussi sint Confessarii poenitentes vestris opinionibus nixos absolvere, lethali crimine damnandi ni faciant. O imperium vestrum nulli secundum! Multa sapientius præcipiunt, multa prohibent Pontifices & sacre Synodi sub peccati mortalis & anathematis interminatione: sed eorum decreta exceptionibus, tergiversationibus, probabilitatibus tenuissimis,

usū non recipiente eluditis, & ad nihilum redigitis; & decretorum vestrorum violatoribus, probabilitates vestras non adorantibus mortalis criminis culpam, pœnamque infligitis. Ad delendam Prælatorum potestatem tollitis peccata mundi: ad invehendam & firmandam vestram auctoritatem nova inducitis peccata in mundum. Confessarium Pontificum decretis non obtemperantem probabilitate vestra purgatis; & eundem vestris probabilitatibus refragantem sine misericordia damnatis.

Miror sanè vestram versutiam pro variis hominum studiis, pro hominum, statuumque varietate, pro cuiusque ingenio versicolores sententias adhibentem, quasi quovis tempore non una sit Ecclesiæ fides, & quæ fidem servat traditio; quasi non oporteat opera ad legem dirigere, sed legem liceat ad opera detorquere; quasi doctrina morum sit fides temporum, quam ad cupiditates nostras inflectere fas sit; quasi denique persuasum habere debeamus, mores non ad Scripturæ & Traditionis auctoritatem, sed ad formicantes recentiorum opinionationes exigi oportere. Itane vobis licuit in Patrum locum recentiorum & ignotorum Scriptorum turbam sufficere, ut non ex illorum decretis, sed ex istorum phantasiis mores informetis? Itane creditis, & nobis persuadere vultis, doctrinam morum à recentioribus sumendam, & in controversiis circa agenda enatis dirimendis potiorē modernorum habendam esse rationem, nec maioris ponderis censerī eorum placita, quæ copuriora credimus, quo Apostolicæ traditioni viciniora extiterunt? Itane venerando Sanctissimum chorū vix à seculo fruticantem Casuista-



rum segetem immensis voluminibus luxuriantem, seseque in locum Patrum sine vocatione intrudentem antepontis? Itane sub Probabilitatum adventum Augustino, Hieronymo, Aquinate, Decretis & Decretalibus ad mores hominum formandos uti ita delitum est, ut præter antiquos neoterici omnes, & singuli vobis accepti sint, quo laxatis habenis sine metu in tam patenti latissimæ probabilitatis campo exspatiari valeatis? Iane vobis antiquos Doctores despectui esse, & recentiores amoris & venerationi opera vestra conclamant, & adeo paginis omnibus præ se ferunt, ut Patrum sacratissima nomina vix compareant, dum singuli penè versus ad fastidium frequentibus modernorum allegationibus perstrepunt, ut eorum autoritate gravissima quæque de moribus dubia definiatis, & ea interdum deriveris, quæ non modò Christiana pietas, Sacerdotum gravitas, sed omnino ingenui hominis pudor detestatur? Iane tandem hominum cupiditatibus lenocinari studeatis, ut dubia dubiis superstruatis, & nova novis adjicientes sic sensum progrediamini, ut ea tandem dogmata attentetis, de quibus nulla unquam in Ecclesia dubitatio coorta fuerat? Mihi credite, hanc viam insistere ne pergite, ne brevi omnia in moribus incerta sint, nihil prorsus fixum & ratum; ne pro Christi disciplina, Pyrrhonis schola; pro veritatis institutionibus, incondita opinionum strues habeatur.

Quid ergo opus facto? Quonam modo poterimus certa quadam, & quasi generali ac regulari via Ethicæ Christianæ puritatem à probabilitatis novitate discernere? Antiquitatem Patrum sedulo, serioque sectemur, incorruptum il-

lum de moribus sentum teneamus, quem Sancti, Majores ac Patres nostri tenuisse perspicuum est; & quod antiqui uno eodemque consensu apertè, frequenter, perseveranter tenuisse, scripsisse, docuisse cognoverimus, id nobis quoque intelligamus absque ulla dubitatione credendum. An nescimas quod Roboam, teste sacro eloquio 1. Reg. 12. damnatus est, quia *reliquit consilium seniorum, quod dederant ei, & adhibuit adulescentes, qui nutriti fuerant cum eo, & assistebant illi*? Estne credibile annis integris mille sexcentis rem tam necessariam, si esset vera, fuisse in Ecclesia Catholica ignoratam? Estne ita de misericordia & providentia Dei sentiendum, ut ab illo tota Ecclesia deserta tantum salutis præsidium tot sæculis ignorarit, tantoque adminiculo privata sit? Cur, ô novelli Probabilistæ, post sexcentos supra mille annos, ut Hieronymi phrasi utar, docere nos nitimini quod ante nescivimus? Cur profertis in medium quod Petrus, Paulus, cæterique Patres edere noluerunt? Usque ad hunc diem sine ista doctrina mundus Christianus fuit. Ita sanè & Deo injurium, & Patribus atque Ecclesiæ Catholicæ parum honorificum, & per se absurdum est, si asseratur adeo insignis utilitatis arcamum vel Patribus invidisse Deum, vel nobis Patres invidisse, & rem tanti momenti toti antiquitati ignoratam his posteris temporibus patuisse. Absurdius, quod nonnemo temerariè effutiit, veteres mole quidem majores & robustiores viribus extitisse, juniores verò subtilioribus ingeniis præditos. Absurdissimum porro est asserere, sicut alicui aliter libuit insanire, Scholasticos posteriores super senes intelligere, non secus ac nunciam super

humerum gigantis positum longius gestatore suo videre. Si enim hæc locum aliquem haberent deliramenta, obtusa essent penitus quæcumque arma, quibus hætenus contra Novatores certatum est.

Audite ergo quotquot estis Probabilistæ, Petrum Damiani epist. 18. *Quoniam ab Apostolis fidem, ab Apostolicis autem viris conversandi in Ecclesia percepimus ordinem: ita propem dùm non mutamus discipline modum à majoribus traditum, sicut illibatum tenemus ipsum quoque fidei fundamentum.* Audite Apologeticum pro Gregorio VII. *Non minus resistendum est authenticarum institutionum impugnatoribus, quàm sacra fidei violatoribus; cùm & demonibus assimilentur quicumque institutionem Sanctorum Patrum in fide tantum, & non etiam in conversatione pro viribus affectantur.* Audite ipsum Gregorium VII. ex Apostolico throno hæc divina oracula fundentem: *Videntes ordinem Christiana Religionis multis jam labefactam temporibus, & principales ac proprias lucrandarum animarum causas diu prolapsas, & suadente diabolo concultas; concussi periculo & manifesta perditione dominici gregis, ad Sanctorum Patrum decreta doctrinamque recurrimus, nihil novi, nihil ad inventionem nostram statuentes; sed primam & unicam Ecclesiastica disciplina regulam, & tritam Sanctorum viam, relicto errore repetendam & servandam esse censuimus.*

SPECVLATIO III.

*Prosequutio ejusdem materiei ab auctoritate Summorum Pontificum ac Conciliorum, & ab Ecclesia Catholica conspiratione.*

UT nostræ sententiæ firmitati nihil desit; argumentis à Scripturis, & Patrum traditione petitis appendenda sunt alia ab aliis Theologiæ locis, paulò quidem uberius quàm operis nostri brevitās postularēt; sed dabit veniam Lector, si in re tanti momenti prolixior sim, ne immodicæ brevitatis studio rerum gravissimarum pondera orationis celeritate rapiantur.

Refellitur ergo tertio probabilissimus auctoritate Romanorum Antistitum & Conciliorum. Et quidem omissio illo præjudicio repetito ab altissimo silentio Pontificum & Conciliorum, quibus nunquam in mentem venit, ut ad controversias sibi sine fine propositas, & quotidie emergentes decidendas probabilitatis regulam adhiberent; estne verisimile Pontifices & Concilia, quibus infiniti casus resolvendi fuerunt, tam utilem, tam necessarium, si verus est, Christianæ Philosophiæ cardinem, quo nihil commodius, nihil expeditius, ignorasse?

Quis sibi persuadeat sacrorum decretorum conditores unis conscientiæ negotiis incumbentes eam præterminasse regulam, quam Probabilitæ totius disciplinæ moralis puppim volunt ef-

se & proram, ad animarum salutem & tranquillitatem unicè necessariam? & ita prætermisisse, ut ne verbum quidem ullum, vel vivæ vocis oraculum abs Pontificum ore exciderit, vel in decretis eorum, immentisque diplomatibus extet, quod probabilitatum Patroni possint ad suam defensionem arripere? Hoc, inquam, omisso argumento negativo, tametsi efficacissimo, positivè Pontifices & Concilia protestantur se nihil velle unquam ex rationum verisimilitudine, sed ex Scripturarum oraculis & Patrum traditione determinare. *Non nostra præcepta imperantur*, inquit Innocent. I. epist. ad Victricium, *sed ea quæ per desidia aliquorum neglecta sunt, ab omnibus observari cupimus, quæ tamen Apostolica, & Patrum traditione sunt constituta. Ad Sanctorum Patrum decreta, doctrinamque recurrimus* (addit Gregor. VII.) *nihil novi, nihil ad inventionem nostram statuentes; sed primam, & unicam Ecclesiastica disciplina regulam, & tritam Sanctorum viam, relicto errore repetendam & sectandam esse censuimus. Neque enim alium nostræ salutis & æternæ vitæ introitum Christi ovibus, eorumque Pastoribus patere cognoscimus, nisi quem ab ipso monstratum, qui dixit: Ego sum ostium, per me si quis introierit, salvabitur, & pascua inveniet: & ab Apostolis prædicatum, & à Sanctis Patribus observatum in Evangelica, & in omni divinarum Scripturarum pagina didicimus.*

Si Pontifices non sua præcepta imperari volunt, non suas privatas sententias utique probabiles prævalere; si nihil novi, nihil ad inventionem suam statuere volunt, si solam Sanctorum viam sectandam esse censent, si omnem alium salutis introitum respuunt: Ergo fructificantes & ad in-

star fungorum pullulantes Probabilistarum novitates in actu exercito, ut loquuntur, condemnarunt. Ergo ab illa voce abhorruissent, quam unus è Probabilistarum primipilis in sua Theologia fundamentalì eructavit: *Tota moralis Theologia nova est. Quis enim negare audebit esse hodie in Diana centenas opiniones probabiles, quæ Augustino, & antiquis Ecclesiæ Patribus ignotæ fuerunt?* Negare planè non audeo, ô Caramuel: fateor quidem centenas esse in Diana opiniones, quin & millenas Augustino Patribusque ignoratas; sed pernego eas esse probabiles, idest, ut tu exponis, securas. Imò eas ideo arbitror esse suspectas, quia eas Augustino Patribusque fateris ignotas. Nova est Theologia Moralis tua, non inficior; sed nescis quod Lirinenſis cap. 34. *Commonit.* scripsit: *Catholicorum hoc ferè proprium est, deposita Sanctorum Patrum & commissa servare, damnare prophana; novitate, & sicut dixit, & iterum dixit Apostolus, si quis innunciarit præterquam quod acceptum est, anathematæ?* Nescis illud S. Sixti ab eodem Lirinenſi laudatum: *Nihil ultra licet novitati, quia nihil adici convenit vetustati?* Qui estis vos Probabilistæ? Quando, & unde venistis? Qua potestate limites Patrum, quos sibi ipsimet Pontifices præfixerunt, commoveris? Mea est possessio, aiebat Tertullianus aliàs citatus, olim possideo, prior possideo, habeo origines firmas ab ipsis auctoribus, quorum fuit res. Ego sum hæres Apostolorum, ego filius Sanctorum, ego Patrum & Ecclesiæ Doctorum discipulus: sicut caverunt testamento suo, sicut fidei commiserunt, sicut adjuraverunt, ita teneo. Vos certè exheredavo.



runt semper, & abdicaverunt ut extraneos, quia novos & novitatum amantes.

Idem antiquitatis amor, idem novitatis quantumcunque probabilis odium in sacris Conciliis nitet. *Observandum equidem nobis magnopere est, ante omnia, & super omnia, inquit Concilium Lemovicense II. anni 1134. uti mandatum Dei, & non nostras traditiones populo observandas tradamus, & nihil nisi Scripturarum divinarum auctoritate fultum statuamus agendum; nihilque de cordibus, nihil extra praeceptum Domini, & sanctorum Patrum, quod absit, constituere, docere, vel jubere presumamus.* Et longè antè Concilium VIII. Constantinop. act. 10. cap. 1. *Ut rectam, regiamque divinae justitiae viam sine erroris offensa teneamus, sanctorum Patrum correctæ, veluti inextinctæ quaedam semperque lucentes facies sequenda sunt. Quapropter sanctiones Ecclesiae Catholicae & Apostolicae per traditionem, tum à Sanctis, omnisque laudis praconio celebrandis Apostolis, tum ab orthodoxis, oecumenicisque & provincialibus Conciliis, aut à quovis Deoquo Patre & Doctore Ecclesiae acceptas, servandas, custodiendasque profitemur.* Ergo sacra Concilia non ad probabilitatis amissum, sed ad Patrum sanctiones suas determinationes exigebant. Et meritò, quia ut Felix III. *epistol. 7. tradit, non est in hominum potestate legis aeternae violatores peccato eximere. Sciat quod se decipit ipse qui fallit, nihilque per nostram facilitatem tribunalis excelsi iudicio derogari, cui illa sunt rata quae pia, quae vera, quae iusta sunt.* Ergo multò minùs facilitatem Probabilissimi, qui sine dubio auctoritate summi Pontificis inferior est, nihil Dei iudicio derogatur, nec Deo rata esse poterant quae per

se impia, quæ per se falsa, quæ per se injusta sunt.

Sed ut à pluribus locis huc congerendis supersedeam, sufficit unum Canonici juris axioma à Pontificibus, à Conciliis semper & ubique consecratum, à Sanctis executioni mandatum, & è lumine naturali depromptum, sed à Probabilistis infinitis corruptelis depravatum, quod unicuique ad totam istam controversiam conficiendam, & probabilitatem exterminandam abundantissimum est: *In dubiis tutius pars est eligenda.* Quâ regulâ innumeras quæstiones dirimunt Pontifices in Jure relati. Nam in cap. *Ad audientiam*, de homicidio, & in cap. *Significasti*, determinatur Sacerdoti anstinendum esse à suorum Ordinum ministerio in casu hominis vulnerati à Sacerdote, & deinde mortui, cum dubitatione an mors sequuta sit ex vulnere; & in casu etiam hominis mortui ex vulnere, sed cum dubio an illatum sit à Sacerdote, quia tutius est in dubio cessare à celebratione, quàm temerè celebrare. Quæ eadem solutio habetur *dist. 7. de pœnit. cap. Si quis*, ubi ex Augustino docetur, quod in dubiis emergentibus tenendum est certum, dimittendum incertum. Nec usurpatur solùm illa regula in materia homicidii, ut quidam ignorantèr dixerunt; nam in cap. *Juvenis*, de sponsalibus, in quo videtur quod qui matrimonium contraxerat cum puella septenni, de qua dubitabatur an esset viripotens, jubetur relinquere consortium consobrinæ ejus puellæ, cum qua secundas nuptias iniverat, quia in dubiis quæ certiora tenenda sunt. Et in cap. *Istud*, de Clerico excommunicato, ministr. præcipitur deponi Episcopum, qui in dubio an sit excommunicatus, ab officio

ministerio non abstinuit, quia partem tutiorem non elegit. Et in Clement. *Exivi*, Fratribus Minoribus Sedem Apostolicam consulentibus, an verba Regulæ Franciscanæ per imperium expressa ligarent sub mortali? Respondetur ad vitandos graves conscientiae remorsus, tutiorem viam esse tenendam: Ergo in quæstionibus, dubiisque moralibus non ad probabilem, sed ad tutam opinionem librandas esse decisiones, Pontifices decreverunt.

Innumera sunt vitilitigantium Probabilistarum suffugia, quibus hanc regulam totius Ecclesiæ praxi commendatam elevare, aut obscurare conantur. Contendunt enim, jura illa consilium, non præceptum continere. Quod si præcepti vis illis asseratur, aiunt jura esse consuetudine abrogata, vel ad modum solius consilii recepta. Addunt proinde præcepta Pontificia nullos astringere præter Catholicos, nec hos quidem omnes, quia & à jure Canonico, & à Tridentini decretis, & à Pontificiis diplomatis per non usum, per non receptionem immunes sunt, & eximuntur plures orbis Catholici Provinciæ.

Non poteram, nec debebam alias à Probabilistis expectare responsiones ad istud ineluctabile pronuntiatum, quo causam jugulari suam vident. Digni planè sunt Probabilistæ qui has responsiones totius Ecclesiasticæ potestatis everfivis usurpent: dignæ sunt responsiones, quæ à Probabilistis usurpentur. Si quis vellet de moribus peccatè & nefariè scribere, si quis vellet totam disciplinam enervare, si quis vellet Calvinistarum canones & decreta Pontificia iridentium causam permovere, iter ad everfio-

mem Ecclesiæ munire, & nos in totius impietatis voraginem agere, profectò non aliis responsionibus uteretur, quæ non nisi pravis & distortis ingeniis placere possunt; illis verò in quibus aliquis religionis sensus, aut pudor superest, non displicere non possunt.

At enim ut ab ultimo responso incipiam, si cuilibet oscitanti Probabilistæ dicere liceat, leges Ecclesiæ & Conciliorum per non usum, per non receptionem omni carere vi, frustra de reformatendis moribus cogitationes suscipiunt Pontifices, frustra ad instaurandam disciplinam Concilia coacta sunt, quibus nascentes rescidentur labeles, vitia succrescentia amputentur; sed in improborum potestate omnia Ecclesiæ decreta ponentur, & de Probabilistarum arbitrato Ecclesiæ potestas pensabitur: nisi Casuistæ placuerit, Ecclesiæ potestas non erit; homo jam Ecclesiæ propitius esse debebit, ut in simili argumentabatur Tertullianus. In vanum ergo laborabit Pastoralis Episcoporum zelus, nihil proficiet Apostolica Romanorum Antistitum sollicitudo omnium Ecclesiarum, jacebunt omnes Bullæ, nullam vim obligandi sortientur diplomata quamprimum retroriso alicui Probabilistæ ex cathedra & ex tripode dicere libuerit (dicere verò libebit quoties aliquam severitatem decretum præ se feret) decretum non esse receptum. O tempora, ô mores! O propudia hominum inanissimis distinctionum nugis Religionis majestatem fœdantium! O temporum nostrorum dedecus, quando videmus sic jura derideri, ut jam magis crescere audacia non posse videatur!

Maximè quia licet Ecclesiæ præcepta, quæ

cæremonias quasdam indicunt, possint per desuetudinem ab Ecclesia toleratam abrogari, præcipuè, inquit D. Thomas quodl. 9. art. 15. *si dissimilantes hanc contrariam consuetudinem, in quorum potestate est jus positivum mutare, intendunt per talem dissimulationem antiqua jura mutare*: nihilominus Ecclesiæ decreta ad componendos mores, frenandaque vitia instituta, in varietate disciplinæ immutabilia sunt, quia nihil aliud sanciunt vel præscribunt, quàm quod jure divino vel naturali sancitum est. *Quantum ad hoc quod jura antiqua continent jus naturale, abrogari non possunt per contrariam consuetudinem, utpote irrationalem*, ait inibi S. Doctor. Atqui jura dum pronuntiant in dubiis tutiorem partem eligendam, non condant novam legem, sed eam præsuppositam peculiaribus casibus applicant, ut vidimus: Ergo nullâ incuriâ, nulla non receptione, nulla desuetudine distingui potest regula illa, in qua semper vivet quidquid in illa divini ac naturalis est juris.

Quod verò additur, decretorum Pontificum, Conciliorumque vigorem per non receptionem deleri, alibi operosius refutatur, si tamen refutari mereatur doctrinæ flagitium, quod tam indignum est quàm quod maximè. Corruet planè & penitus concidet totius disciplinæ decus, & obedientiæ simplicitas, simulque vires adjicientur audaciæ, si Prælatorum constitutiones à recipientium subditorum pendeant voluntate. Sic præesse subesse erit, & à subditis vigorem obtinebit, vel perdet Principatus. Certè nulla esse, vel excogitari potest maxima Monarchiæ & Ecclesiæ exitiosior, si de hominum Logicam callentium arbitrato leges omnes pateant distin-

tionibus metaphysicis recens inventis, definitionibus nuperis & voluntariis, ac cavillis nescio quibus in otiosorum cerebro uatis.

Quod verò addunt, jura illa consulere, non præcipere, modestius est illud quidem, sed non verius: tum quia præscribunt pœnas suspensionis Ordinum, depositionis Episcopatus gravissimas, in quas non incidere potest negligentia consilii, sed præcepti. Tum quia, ut rectè ait Joannes à S. Thoma, sacri Canones aliquid singulare statuunt necessarium in dubiis conscientia, quod non est necessarium in rebus certis, & ex utraque parte per se tutis: Atqui in rebus certis & utrinque tutis optimum consilium est tutiori parti adhærescere: Ergo in dubiis conscientia, ubi de peccato agitur, aliquid aliud intendunt jura, nimirum præceptum esse tutiorem viam inire; dubiam enim conscientiam ex præcepto reformare tenemur, cum stante dubio operari non possimus: Ergo illa regula non est consilium, sed præceptum. Præceptum, inquam, quod ipso jure naturali constat & ad prima syntereseos principia reducitur: nisi dicas præceptum illud in omnibus aliis contineri; dum enim aliquid præcipitur vel prohibetur, simul injungitur ne in periculum illud violandi incurramus: quod fit si in dubio minus probabili, & non tutiori parti adhæreamus.

Speciosior est aliorum cavillus dicentium, eum qui opinione probabili fretus operatur, non laborare dubio, sed uni parti adhærescere, etsi cum formidine partis opposita. Verùm hoc effugium soliditate & veritate destitutum est. Et enim si ad difficultates resolvendas, dubiaque removenda sufficeret opinio probabilis, nec es-



set necessarius opinionis tutæ delectus, nullus nisi fortè rusticus, aut ignarus teneretur in dubio viam tutiorem eligere, quia qui fuerit in casuistica doctrina tenuiter versatus, citò sententiam probabilem inveniet, præsertim ex jure possessionis, quo tantopere abutuntur Probabilistæ, ut illud in omni materia perperam frequentent. Etenim si ille qui jus libertatis possidet, non debet ex solo dubio privari jure minus probabilia eligendi, vix, immò nunquam tutior pars erit in dubiis eligenda, subindeque inanis erit & ludibrio exposita de tutioribus sectantis regula tot Pontificum responsis consecrata. *Quapropter* (inquit Illustrissimus Prosper Fagnanus corpore cæcus, sed Ecclesiastici luminis copiâ nulli secundus, cujus manus Romæ deosculatus sum) *non immeritò Antonius Merenda in suo tractatu de hac materia novissimè impresso rotundis verbis affirmat usum probabilium esse commentum diaboli ad enervandam vim præceptorum.*

Confirmat optimè idipsum Prosper Fagnanus ex variis regulis Juris, quas in dubiis, dum par utrinque periculum ingruit, adhibendas legum conditores & interpretes sanxerunt. Nimirum, *Judicandum ut actus valeat potius quàm pereat: Praferendum quod in regione, in qua res peracta est, frequentatur: Spectanda probata consuetudo: Nihil ex arbitrio, sed juxta leges & jura pronuntiandum: In æquilibrio judex suspendat sententiam, vel transigatur, vel res per medium dividatur, vel ad Principem aut Sedem Apostolicam recurrendum; & aliæ similes adducuntur in jure: Atqui si probabilium usus licitus sit, si juxta ridiculam Casuistarum assertionem, homo in foro conscientia manutenendus est in possessione sua libertatis contra*

Deum ; frustra in iis adorandis regulis se torquissent Legislatores , frustra tot cautiones statuis-  
sent, cum beneficio probabilitatis remedium es-  
set in promptu, & ad manum, dicendo nimirum  
opinionem probabilem esse utrinque securam.  
Opinio autem probabilis nunquam deerit ha-  
benti Casuistam ; cum enim infinita sit & ef-  
frenata probabilium opinionum multitudo,  
nulla erit veritas moralis quæ plausibili aliqua  
ratione oppugnari non possit. *Nulli dubium est,*  
inquit laudatas, & omni laude major Fagnanus,  
*quin omnis regula morum possit everti ex libertate*  
*opinandi non modò in praeceptis humanis , sed etiam*  
*in divinis & naturalibus , dum de ijs interdum*  
*non occurrunt rationes demonstrative.* Unde his  
temporibus eò res perducta est, ut nullus fere sit ar-  
ticulus in Moralibus , in quo non sit varietas , aut  
contrarietas opinionum ; adeo ut in solo opere non  
ita pridem impresso resolutionum moralium Anto-  
nini Diana numerentur in unum collecta quaestiones  
supra ter mille, cum opinionibus & authoribus pro  
utraque parte, plerumque affirmantibus aut ambas  
esse probabiles , aut unam probabilem , & alteram  
probabiliozem , in quibus fere omnibus agitur de  
peccato mortali. Quare hac doctrina probabilita-  
tum videtur fovere veluti quandam libertatem  
conscientia , ac proinde magnopere indigere dexte-  
ra Dei , & Beatissimi Romani Pontificis provisione,  
ne venenum jam plus nimio dilatum ulcricius  
serpet. Ergo arbitraria probabilitas utrinque  
tuta fuit Pontificibus & Conciliis jurium con-  
ditoribus, aut approbatoribus invisa , incogni-  
ta, & reprobata.

Confirmatur rursus , & magis eliditur præ-  
fatus cavillus. Qui dubitat, secundum jura tene-

tur sequi partem tutiorem : Ergo multò magis qui adhæret opinioni probabili in concursu probabilioris. Probatur consequentia. Qui adhæret opinioni minùs probabili, & deserit probabiliorem, adhæret illi sententiæ quam existimat magis falsam quàm veram; qui verò dubitat, habet convenientes rationes, ob quas existimat neutram sententiam esse magis falsam : Ergo si dubitans, nec persuasus de malitia operis partem tutiorem sequi tenetur, à fortiori ille qui convincitur de minori probabilitate unius partis, & de majori probabilitate alterius. Res exemplo sicut illustrior, ita fiet sensibilior. Sit aliquis deliberans an tres contractus allècurationis sint liciti; & perpenis Casuistarum hinc inde rationibus eos æquè probabiles arbitratur, & in nullam partem judicio inclinat, sed inter utramque fluctuat; tunc secundùm jura ille à tribus contractibus tenebitur abstinere, & si contrahat, peccat, cum dubitet an in illis peccatum insit. Deinde re maturiùs considerata, censet probabilius esse tres contractus esse illicitos, minùs verò probabiliter esse licitos. Certè tunc ex lege minùs probabili poterit contrahere : at quis non videt id esse prorsus absurdum, & irrationabile? Si enim quando dubitabat de malitia contractus illum non poterat eligere, quomodo id modò licebit quando videt, & probabilius opinatur atque assentitur, contractum illum esse peccatum. Dum credebat utramque sententiam æquè ponderosis rationibus niti, non poterat licitè minùs tutam sententiam sequi : & jam dum videt illis non æquis rationum momentis niti, eam tutò sequi potest, quam falsam magis opinatur quàm veram, & de qua non dubi-

tat quin falsa sit, sed penè convictus est, id quod agit, esse illicitum: Ergo si in dubiis secundum sacratissimam Canonum vocem tutior pars tenenda est, multò magis tenenda est in conflictu minùs probabilis, & probabilioris.

Dènique intignis est Adversariorum paralogismus, dum dicunt regulas illas juris veras esse in dubiis, non in probabilibus. Nam præterquam quod textus juris utuntur illa regula in casibus in quibus poterant esse opiniones probabiles; præterquam quod minùs probabilis, minusve tuta opinio dubia est, & plus quàm dubia, cùm plus habeat falsitatis quàm veritatis, stante verò dubio æquè vera videatur ac altera: insuper fit hoc argumentum invincibile. Secundum jura qui dubitat, id est, qui nescit utra pars vera sit, utriusve partis rationes probabiliores sint, ille non debet agere id quod verè dubitat an æquum sit, an iniquum; ita enim non minùs Philosophi, quàm Theologi credunt: Ergo minùs debet agere id quod verius credit esse iniquum. Consequentia est sole clarior, antecedens verò est vox Ecclesiæ & rationis naturalis. Rursum argumentor non minùs evidenter: In dubiis tutior pars est eligenda: Ergo ad determinanda dubia non sufficit sententia minùs probabilis, minusque tuta: Ergo Pontifices & Traditio probabilitatem hac regula jugularunt; siquidem probabilitas juxta ejus assertores non alio fine invec-ta est, quàm ut dubia moralia resolveret. Nec hæc regula de tutiori scetanda sententia, solis Conciliis Pontificibusque arrisit, sed ipsis etiam Philosophis probata fuit. Unde Tullius eam *lib. 1. officiorum*, his verbis usurpata.

Quocirca benè præcipiunt, qui vetant quidquam agere, quod dubites æquum sit, an iniquum. *Æquitas enim lucet ipsa per se; dubitatio autem cogitationem significat injuria.* Quæ verba ponderans noster Vincentius Baronius, sic egregiè & juxtà piè commentatur i. tom. *Moral. disp. i. sect. 2.* Fateor vix me posse hac verba legere, quin pudore & dolore afficiar maximo, quòd Theologi eas summæ æquitatis leges corrumpant, quas Ethnici religiosè sanciverunt. Quid enim dolendum magis, aut Theologo indignius, quàm ex dubitatione, an res æqua sit, aut impia? Ethnicos inferre esse illicitam, & ipsam etiam dubitationem habere nocendi cogitationem: ex iis verò capitibus, id est ex probabilitate utriusque partis, Theologos deducere nos à lege exemptos, & licere quidquid libuerit, etiam illa, qua probabilius est honesto adversari? Sed quod stupendum magis est, eos qui hanc legem justitia à Philosophis sancitam in pejus interpretantur, consendere hanc suam sententiam communem esse totius Ecclesiæ sensum, & addendam Decalogo quasi undecimum præceptum ejusdem cum aliis decem authoritatis & ponderis. Quis credat potuisse Christiano ulli venire in mentem illud incredibile paradoxum, opinionem probabilem eandem esse cum tuta; & quamlibet inæqualiter probabilem, seu pro libertate, seu pro lege stet, aquè tutam esse?

Romanorum Antistitum prædecessorum zelum imitatus Alexander VII. probabilitatis doctrinam in Apologia Casuistarum speciali decreto, & quamplura probabilitatis consecratoria semel & iterum distinctis constitutionibus & censuris proscripsit, ut postea referemus. *Ut omnes luce clariùs videant, verba sunt Lirinensis, Beatorum Apostolorum beata successis quanta vi*

*semper, quanto studio, quanta contentione defenderit suscepta Religionis integritatem.*

Refellitur demum arbitraria probabilissimi licentia ex Ecclesiæ Catholicæ sensu & consuetudine, quæ est quintus Theologiæ locus irrefragabilis, quàmve in omnibus æmulari tenemur, ut ait S. Thomas olim citatus. Vix Probabilistarum corruptelæ in unum collectæ manarunt in vulgus, ita ab his abhorruerunt Catholicorum omnium animi, ut & populi clamoribus, & Docti argumentis, & Ecclesiarum Præpositi censuris tam nefaria dogmata de testati sint. Et quavis hoc tempore non pauci recentiores alii aliorum scripta compilantes, eosque tanquam aves aut oves sequentes, probabilitatis viam vel consensu, vel plures incauti, & nimis creduli, ac in fide aliorum sequuti sint; tamen cum dogma illud cœpit, & in se, & in suis nefandis consuetudinibus ventilari, innumeri, & ferè omnes generatim Catholici Casuisticæ disciplinæ præjudiciis non occupati & animo respuerunt, & auribus aspernati sunt.

In primis enim his temporibus singularis Dei in Ecclesiam suam cura & providentia veritatem obrui non sinens, ipsique semper in necessitatibus, & tribulatione succurrens, atque intrepidus defensores excitans, ad excindendum probabilitatis dogma insignes Parochos armavit Rhotomagenses & Parisienses. *Judicium autem*, inquit Prosper Fagnanus supra citatus, *tam magni cœtus Presbyterorum, qui in urbibus Regni præcipuis animas regunt, & conscientias dirigunt, parvi non est faciendum.* Sed longè pluris faceret illuminatissimus cæcus judicium universæ ferè Ecclesiæ Gallicanæ, quæ serpenti, seseque latè



fundenti Probabilissimo veritatis & antiquitatis firmissimos aggeres objecit, pestiferum venenum exitu salutari retexit, & divina Episcoporum autoritate ac decretis Apostolico spiritu plenissimis populum fidelem monuit, ut doctrinæ flagitia è probabilitatis fonte liquidò manantia fugerent, & pestiferum ipsum fontem quàm studiosissimè caverent.

Præfatorum Parochorum omni laude majorem zelum Deus qui accenderat fortunavit, perfecitque negotium ipse qui incepit, quive Ecclesiam tunc maximè curâ suâ non destituit, cum eam ferè destituisse videtur. Nam statim eximios omnium Ordinum viros impavidos vidimus, quos ( ut verbis Lirinensis utar ) à defensione fidei Majorum, ab amore divinæ legis, à luxuratum horrore *nulla vis depulit, non mina, non blandimenta, non vita, non mors, non palatium, non satellites, non Imperator, non imperium, non homines, non damones* detertere unquam potuerunt: quos, inquam, pro religiosa vetustatis tenacitate tanto munere Dominus dignos judicavit, ut per eos prostratam repararet disciplinam, extinctum à nonnullis Canonum vigorem vivificaret, dejectas Ecclesiasticæ Hierarchiæ coronas reponeret, nefarias illas novellæ corruptionis, *non litteras, sed lituras, infuse cælitus Episcopis fidelium lacrymarum fonte dele, et;* universum postremo jam penè mundum sæva repentinæ probabilitatis tempestate percussam ad antiquam fidem à novella licentia, ad antiquam sanitatem à novitatis vesania, ad antiquam lucem à novitatis cæcitate revocaret. Magnum sanè fuit & efficax Episcoporum nostrorum exemplum, planeque divinum, & veris

quibusque Catholicis indefessa meditatione recolendum. Qui in modum septemplex candelabri septena sancti Spiritu luce radiantes clarissimam posteris formulam pramonstrarunt, quoniam modo deinceps per singula quaque errorum vaniloquia sacra vetustatis auctoritate prophana novitatis conteratur audacia. Neque hoc sane ( in Ecclesia Gallicana ) novum, siquidem mos iste semper in Ecclesia viguit, ut quo quisque floreret religiosior, eo promptius novellis adinventionibus contrairet.

Itaque totam Ecclesiam Gallicanam vidimus adversum probabilitatem animatam. Vidimus Clerum fœmè universum tot opinionum monstra horrentem. Vidimus Curatos numero meritoque insignes probabilitatis necessaria corollaria in unam collecta, & cum authorum libris unde decerpia dicebantur, collata & recognita, & sua auctoritate damnasse, & eorum damnationem canonicâ viâ, libelloque supplici à suis Episcopis, generalique Cleri conventu depoposcisse. Vidimus censuram Ecclesiæ Parisiensis his verbis de probabilitate pronuntiantem: *Hac doctrina generatim & indefinitè concepta temeraria & periculosa, omnem morum disciplinam perturbat, à veritatis inquisitione & inventione avocat, & corrupta natura cupiditatibus obsequi sin't.* Vidimus Ecclesiæ Parisiensis zelo magnam aliarum Provincialium Ecclesiarum partem adjunctam, ut ipsimet Parochi Parisienses variis scriptis gravissimis & juxta cultissimis testantur. Vidimus statuto Gallicani Cleri, die 1. Februarii anni 1657. S. Caroli institutiones in lucem editas, quibus, ut aiunt, *grassantes ad Evangelica morum institutionis perniciem novarum opinionum labe opposito velut obice coercerentur.*

*Et tanquam aliqua mole reprimi posset novarum opinionum torrens, qui Christianam morum doctrinam perditum ibat.*

Vidimus deinde authoritatem Illustrissimorum Episcoporum, quorum zelum tota Christianorum posteritas laudibus licet imparibus efferet, Sacerdotum judiciis accessisse. Pauca ex innumeris seligam, ut appareat quantum Antistites pervenerabiles adversus luxuriantem probabilitatem horroris præ se tulerint, quam vehementissimè eorum animi permoti sunt adversus illam totius iniquitatis & licentiæ doctrinam, quantus eos ardor incesse- rit coercendæ Probabilistarum audaciæ, qui tam præfidenter & juxta nefariè Sanctissima quæque Evangelii, Ecclesiæ, Romanorumque Pontificum decreta pervertunt; quantum & privato fremitu, & effusis lacrymis, & aperta indignatione eam prosequuti sint doctrinam, quam certis judiciis, maturata accuratæ discussionis deliberatione damnamam pronuntiarunt, quippe quæ Dei legem dissiparet, Evangelium perversis interpretationibus totum depravaret, Dei Spiritum pro virili extingueret, ut sese humanis, corruptisque cupiditatibus accommodaret. *Hec doctrina* (inquit Archiepiscopus Senonensis in sua censura, 4. Septemb. 1658. spectante & plaudente Synodo Episcopali lata) *quæ Author fas esse censet, neglectâ probabiliore ac tutiore, sequi opinionem minus probabilem & minus tutam, id est, amplecti & exequi quod illicitum esse, quàm licitum probabilius putes; atque ad probabilitatem opinionis, unius scriptoris authoritatem sufficere affirmat: falsa & periculosa est: innumeris corruptelis viam aperit: bonam conscientiam, quæ est secunda humana-*

*rum actionum regula, prorsus extinguit: ac proinde erronea est, ac B. Paulo contraria, & Christianos ad certam salutis perniciem inducit.* Succinuit huic censuræ Ecclesia Parisiensis, quæ eam doctrinam temerariam, periculosam, omnis morum disciplinæ perturbatricem, à veritatis inquisitione & inventione avocantem, & corruptæ naturæ cupiditatibus obsequi sinentem, disertissimè pronuntiavit.

Vidimus etiam in partibus nostris Tolosanis Episcopos primitivæ Ecclesiæ spiritu plenissimos, sed ab eadem laxitate alienissimos. Novî Alanum de Soliniac Episcopum Cadurcensem meum in Christo Patrem, à quo puer sacro Confirmationis chrismate inunctus sum, & beatos oculos meos arbitror, qui illum virtutis simulachrum viderunt. Sciunt autem omnes qui eum videre, vel audire meruerunt, quantum vir ille divinus à probabilitatum laxitate abhorrerit, quantum verbis, scriptis, litterisque pastoralibus tutas sententias firmarit, sed potissimum quàm præclarissimis exemplis novellorum molliem condemnarit, quantumve in restituenda disciplina à Probabilistis ad nihilum redacta indefensè insudarit, Domino etiam cooperante, & sermonem confirmante sequentibus signis, quibus sepulchrum ejus sit in dies gloriosum. Vidimus quinque Præsules, Alecensem, Apamiensem (quorum diœceses genuinum primitivæ Ecclesiæ sanctitatis spiritum redolere ipse vidi, & omnes vident qui habent oculos, omnes gudent qui non sunt invidi) Convenerunt, Vasanensem, Conseranensem, eodem Spiritu congregatos, post accuratum examen, post fufas ad Deum preces, probabilitatis do-

strinam, dirigendæ intentionis artem, seu fraudem, variaque inde sponte fluentia putidissima corollaria Episcopali censurâ longè gravissimâ perculisse his verbis, die 24. Octobris 1658. *Iudicamus probabilitatis doctrinam, prout ab Apologista explicatur, & ad omnia promiscuè morum decreta extenditur, falsam esse: simplicitati Christianæ, Spiritus Christi sinceritati, tradita nobis ab Apostolis idius nomine doctrina contrariam: animasque fallacis spe securitatis ad certam salutis perniciem impellere.* Catervatim accurrerunt aliî Episcopi certatim censuras censuris adjicientes, quos inter Episcopus Bellovacensis ob pietatis famam satis notus, & Episcopus Venciensis Antonius Godeus ob omnigenas Episcopalis muneris dotes, & nominatim ob præstantissimi ingenii fæctus Sole clariores, auroque pretiosiores nulli ignotus, probabilitatem vehementissimis decretis proscripserunt. Ille enim in censura die 12. Novemb. anni 1658. lata probabilitatem *omnium corruptelarum sectur. ginem*, zelo zelatus pro Domino Deo exercituum, vocat. Ille verò Probabilistarum cavillos & invictè convellit, & de ipsa probabilitate sic in censura sua, die 6. Maii anni 1659. pronuntiat. *Hæc probabilitatis doctrina à mendacii parente procul dubio his postremis temporibus eo consilio inventa est, ut omnia Evangelii præcepta eluderet, & carnalibus animis Christiana doctrina, propriæque salutis arbitrium permetteret.*

Cæterorum Prælatorum censuras per totum regnum sparsas, splendentemque in illis zeli vigorem cum doctrina & eloquentia de palma certantem prætermitto, ne historiam texam. Id porro constans, totius Cleri Gallicani sacræ

conspirationi nullum alicujus nominis virum interceisse, nullum reclamasse, nullum damnatis dogmatis patrocinatum patenter & expresso auctoris nomine fuisse; sed omnes fideles Pastoribus obtemperasse suis, omnes doctos obstupefactos de suo stupore fuisse, quod aliquandiu tantam corruptelam vel non advertissent, vel præ timore inani non arguissent; omnes denique solidè pios corde sincero doluisse, nonnullos bonos alioquin viros domesticis præjudiciis implicatos in errorem bona fide inductos, & simul gavisos fuisse hanc probabilitatis pestem nec in Concionatores, nec in piorum librorum scriptores se infudisse; sed eas sordes iis in libris latitare, qui ob incultum & horridulum scribendi genus, ob adventitii orationis splendoris ac lepōrum nuditatem, ob inconditas materiæ salebras vix nisi ab aliquo retorrído despicati ingenii Casuista minimè malo illo quidem teruntur. Cæteri verò Ecclesiæ doctrina imbuti, & Patrum eloquiis dulcioribus super mel & favum pasti vix in illis lætitandis tempus terunt; quia in illis nulla traditionis lux, nullus Patrum candor, nullum ingenii & eruditionis lumen, nulla sæpe in rebus ex æquo & bono librandi sagacitas & boni sensus integritas inest, sed importuna loquacitas & farrago, ut apparet in illa opinionum portentosarum mole tam parum communis rationis notionibus consentanea, quarum postea fortassis indiculum dabimus.

Nec in sola Gallia, sed ubique gentium Probabilissimi impugnatores concitavit Spiritus Domini qui replet orbem terrarum. Nam & in Belgio Archiepiscopus Mechliniensis, Episcopus Gandavensis, Academia Lovaniensis: & in



Italia Theologi ac Canonistæ præstantissimi effrenem in materia morum opinandi licentiam vehementissimis, & eruditissimis scriptis insectati sunt.

Sed interim dum tota Gallia fervet, & totus obstreperet ea contentione orbis, cui vix parem superiora sæcula viderunt, dum motus factus est magnus, ita ut veritatis & fidei Catholicæ navicula operiretur fluctibus, videbatur non præ incuria, sed præ summa prudentia, sicut olim Christus, ita & tunc Romanus Pontifex in puppi dormiens, quando immincebat sibi suisque grande discrimen. Quia, ut egregie dixit Chrysologus serm. 20. *Gubernatoris peritiam non probat temperies serena, sed præcellosa tempestas: blandiente aura, navim regit ultimus nauta; in confusione ventorum primi quaritur ars magistri.*

Catholici ergo videntes post tot Episcoporum censuras nihil Probabilistas de sua laxitate remittere, sed suis viribus filios eam pro aris & focis tutari: videntes Pastorum suorum ordinationum industriam, & in remigando laborem Probabilistarum insultus non coercere, sed in multos potentiam savire, illos fluctus petere, adversum istos ventorum turbines convenisset ad ipsum Gubernatorem rerum, Prælatum mundi Catholici, Episcoporum Episcopum, Magistrum Ecclesiæ, Pastorem Urbis & orbis trepidi confugerunt (jactitabant enim aduersarii Probabilissimum ad Romanam Sedem delatum à Summo Pontifice solenni approbatione adornandum, quâ inani alleverantiâ non paucis timor incutiebatur,) petentes ut sedaret fluctus, periculum submoveret, salutem morbis redderet desperatis. Denique *discipuli accedunt ad*

*Dominum, & suscitaverunt eum dicentes: Domine salva nos, perimus.*

Perimus planè, Beatissime Alexander, nisi verbo tuo reprimas mare, recutias fluctus, dissipas turbines, des quietem. Perimus, inquam, quia Probabilistarum flabra, dissidiorum de salute procellæ, Casuistarum nubes, opinionum nebulæ sic ruerunt, ut nisi caveas, totius fiet Christiani mundi una tempestas. Perimus, inquam, quia laxitatum spumant undæ, fervent fluctus, sonat rabies, rotantur gurgites, notantur scopuli, Christiana mugiant littora, se undique furens ac perniciosus ingerit turbo, impendent naufragia, & est totius mundi unum discrimen, una causa communis. Perimus, inquam, nisi probabilitatum mare corripias, tranquilles orbem, sedes fluctus, componas mores, reformes abusus, luxuriantium animorum tumores dejicias & spumas, & Romano cœlo tonante, ranae taceant novitatum. Perimus, inquam, quia Aquilo durus ventus, à quo panditur omne malum, frigidas invehit opiniones, divini amoris ignem extinguit, dum negat necessarium, mentes confundit, leges delet, sorbet judicia, conscientias mergit, totius Christianismi statum ferè cogit esse naufragum. Et nos iterum atque iterum clamamus: Domine salva nos, perimus. Perimus, inquam, quia avaritia furit, usura serpit, simonia foetet, anhelat pompa, iniquitas placet, aliena delectant, ita ut adimpleretur navis, cum tot penè corruptelas invehant Probabilistæ, quot divinae legis legimus esse quæstiones.

Exurge, Beatissime Papa, exurge; quare obdormis, & ne repellas in finem? Ubi est illud:

*Ecce non dormitabit neque dormiet qui custodit Israël? Nonne ad te pertinet, si perimus, si tundamur fluctuum scandalis, si novitatum periculis mergimur, si operimur furore undarum? Lege, si placet, librum Apologiæ Casuistarum, & animadvertite quantæ & ibi sylvescant segetes sacrilegiorum atque errorum; & si quidem judicas Ecclesiam Gallicanam justè moveri, moveatur omnium Magistra Romana. Et ne frustra moveatur, age pro loco quem tenes, pro dignitate soli Deo inferiori, quâ polles; pro potestate Christiani orbis, quam accepisti, quomodo opera tenebrarum ausa prodire in lucem arguantur à luce in lucem, ut qui publicè peccavit, publicè arguatur. Tu solus & errorum domitor, & moderator veritatum: si nos audieris, si fueris evigilare dignatus, planabuntur undæ, & tumidi fluctus sternentur & colles: venti diffugient, peribit procella, magnaque tempestas in tranquillitatem maximam commutabitur.*

*Non frustra fusus est fidelium gemitus. Per se non dormit, neque sibi dormitat (Pontificia) majestas expers lassitudinis, quietis ignara, inquit Chrysol. Claudebat oculos Romanus Præsul horrore laxitatum: dormire videbatur tepidis, qui semper piis vigilat & perfectis: fingeat se dormire, ut palpebræ ejus interrogarent filios hominum: avertebat faciem suam à peccatis, ut patientiâ revocaret delicatos filios, quos fortassis paterna verbera asperassent. Claudebat oculos, & iterum aperiebat, ut currentes incitaret, lassescentes erigeret, respiceret supplicantes, quia Filiis aliàs Catholicis non nocere per rigorem, sed consulere aiebat per disciplinam.*

*Nam qui trucidat, non considerat quemadmodum  
lanxer; qui autem curat, considerat quemadmo-  
dum sanat.* Nolebat sapientissimus Papa perle-  
qui sanitatem, sed putredinem: perfecto odio  
oderat non homines, sed errores. Illum inlue-  
rat christianum animum Christi Vicarius, quem  
omnibus inspirat Augustinus: *Diligite homines,  
interficite errores: sine superbia de veritate prasu-  
mite, sine sacritia pro veritate certate.* Sperabat  
patientissimus Pater, tam insignia è probabili-  
tatis fonte fluxa flagitia ipsis suis authoribus fu-  
sura horrore, quæ non profligatis Ethnicis pu-  
dori, ac Turcis non planè improbis offensio-  
ni forent. Confidebat sufficere communem sen-  
sum, sufficere communissimas pietatis notio-  
nes Christiana institutione nobis impressas ad  
tot errorum portenta detegenda, aspernandæ:  
que, quia omne malum, & tam apertum malum  
timore aut pudore natura perfudit. Non existi-  
mabat esse necessaria Vaticani fulmina ad ea  
comprimenda dogmata, quibus auditis tota  
cøhorruit Ecclesia, publicisque illa execratio-  
nibus prosequuta est.

Advertens tamen Pontifex Probabilistas suæ  
patientiæ non revocari, sed abuti, pertæsus tot  
novarum opinionum hoc sæculo in Theolo-  
giam moralem inductarum, quibus disciplina  
Evangelica resolvitur, ac conscientis cum gra-  
vi animarum periculo illuditur, Apologiam Ca-  
fuitarum solenni diplomate damnavit die 26.  
Augusti anni 1659. eamque pro damnata &  
prohibita haberi voluit. Mandavitque Sancti-  
tas sua, ut nemo cujusque gradus & conditionis  
existat, etiam speciali & specialissimâ notâ dig-  
nus, prædictum librum apud se retineat, aut lo-

gat. Plures etiam propositiones, seu varia vagæ probabilitatis consuetaria significato intrinseco sui Apostolici cordis dolore, tanquam temeraria & scandalosa damnavit, eaque doceri, aut defendi, vel ad praxim deduci, in Congregatione generali Sacræ Romanæ Inquisitionis habita die 24. Septembris anni 1665. & iterum die 18. Martii 1666. prohibuit, & pestiferam gurgentem Apostolico ferro amputavit. Et nominatim inter illas nefandas propositiones unam proscripsit omnibus ferè Probabilistis probatissimam, quæ est numero 27. *Alicujus junioris & moderni debet opinio censeri probabilis, cum non constat rejectam esse à Sede Apostolica tanquam improbabilem.*

Quibus decretis, ringentibus licet & frementibus Probabilistis, rescissa est laxitatis hydra è turbidis recentiorum fluentis & paludibus in puritatis orthodoxæ cladem infelicitè enata: subjecta est omnium oculi serpens ad Evangelicæ & Ecclesiasticæ disciplinæ eversionem corruptæ doctrinæ contagies. Amotum est à Catholicorum nomine propudiosæ morum disciplinæ infame dedecus ab Hæreticis impiissimè objectum. Præcepta Calvinistis & Lutheranis deturpandæ Romanæ Ecclesiæ ansa & materia.

Ex quibus omnibus apodycticè concludo, & formo demonstrationem, ni fallor, invictissimam: Communis Ecclesiæ Catholicæ sensus est irrefragabilis Theologiæ locus, ita ut nullus citra errorem & hæresim possit unanimi Catholicorum Sacerdotum, Episcoporumque conspirationi refragari: præsertim postquam Academicarum Theologicarum toto orbe celeberrimarum, Episcoporumque non semel conve-



nientium judiciis ipsius Summi Pontificis auctoritas accessit; tunc enim nihil deesse videtur, cur non à tota Ecclesia aliqua doctrina debeat censi approbata, vel damnata. Atqui vaga probabilitas, ejusque innumera corollaria ab universo ferè Clero Gallicano accusata, à facultatibus Theologicis, & ab omninò multis Ecclesiæ Episcopis, ac demùm ab ipso Summo Pontifice damnata & proscripta fuerunt, adeo ut tunc probabilismus nullum habuerit manifestum defensorem, sed latentes solum sub larvatis nominibus patronos paucos: ipsi etiam qui antea & in Episcoporum censuras insurrexerant, & in ipsum Summum Pontificem contumeliosis vocibus privatim inveci fuerant, ultrò se Romano judicio ea quâ par est obedientia supposuerint; quam professionem sinceram credere Christiana charitas, quæ non cogitat mala, compellit. Ergo ex communi Ecclesiæ consensu vaga opinionum recentiorum probabilitas explodenda est, deviique illi tramites intercludendi, quibus in interitum ferri proclive est. Major est principium Theologiæ dissertatione præambula hujus voluminis propugnatum; Episcoporum enim Catholicorum unius clarissimi Regni consensus nullo apertè contradicente susceptus, ad multas hæreses profligandas semper in Ecclesia sufficiens habitus est, nisi Sedes Petri restiterit; sed quid, dum auctoritate Romana firmatur? Minorem verò propositionem oculi nostri viderunt, aures nostræ audierunt, & ipsæ manus contrectaverunt.

Si juxta Probabilistarum principia, pro quibus tam acriter pugnant, omne probabile licitum est; illud verò probabile esse dicunt, quod



alicujus præstantis doctrinâ & pietate Theologi autoritate constat, planè probabilis, & omninò probabilissima est nostra probabilitatis repulsa & reprobatio, quæ tot illustrium Ecclesiæ Rectorum judicio firmata est. Hos dum sequor, si erro, tutò & libenter erro, quia illos audio, de quibus Veritas dixit: *Qui vos audit, me audit; qui vos spernit, me spernit.* Quin dum hos audio, errare nequeo, etiam secundum illos contra quos pugno; nam si tuta est probabilis sententia, quomodo non probabilis erit, quomodo non tuta sententia, quæ jubet probabiliora sequi, tutaque sectari? Quomodo non probabilis, quæ ab illis probata est, quibus judicandorum dogmatum potestas divinitus commissa est, nec defuit in ferendo judicio accurata maturæ deliberationis diligentia? Saltem, ni fallor, ad illam se redigent Probabilistæ æquitatem, ut non plus sibi tribuant, quàm tantæ Prælatorum coronæ. Patiantur nos ab illis recedere, & ab illorum dogmatis dissentire, quæ tantæ locupletum, & omni exceptione majorum testium & judicum sententiæ periculosa & scandalosa reputaverunt. Si juxta Probabilistas Confessarius severioris disciplinæ tenax peccati mortalis reus est, qui renuit absolvere pœnitentem sequutum aliquam opinionem, quam nuper Diana, Caramuel, vel Tamburinus probabilem effecere; quantò magis peccati mortalis reus ero, si illum contra tot Ecclesiæ Rectorum consensum absolvero? Qua enim æquitate & sobrietate volent sua judicia Magistrorum Ecclesiæ judiciis anteferri?

*Reflexio , & apostrophe ad  
Probabilistas.*

*Nihil ultra liceat novitati , quia nihil addi  
convenit vetustati : perspicua Majorum fides  
nulla cœni permixtione turbetur , aiebat S. Xy-  
stus in epist. ad Episc. Ant. Post exploratam  
Pontificum , Conciliorum , Ecclesiæque con-  
sensionem , quid superest , ô Probabilistæ , nisi  
ut vos cum Apostolo obsecrem , ut idipsum di-  
camus omnes , & non sint in nobis schismata,  
sed perfecti simus in eodem sensu , & in eadem  
sententia. Ad hanc consensionis amissim , ad  
tam præclaram communionis regulam difficul-  
tates morales exigamus , hoc eas Suanctuarii  
pondere libremus , novitates sopianus , unita-  
tem custodiamus. Nonne scitis , genuinum  
Gatholicorum Doctorum characterem esse una-  
nimi inter se consensione conspirare , uno ore  
loqui , idem intima voluntatum & animorum  
conjunctione sentire ? Nonne sæpe dicitis , sæ-  
pe , vereque docetis , Sacræ concordie telo de  
omnibus hostibus suis Ecclesiam Romanam  
triumphasse ? Certè sicut oculi sani , tametsi  
duo sint , ob internam tamen unionem non  
duplicatas , sed singulas res vident ; lippientibus  
verò singularis lucerna-nunerosa est , ut dixit  
Tertullianus : sicut dum duo consentiunt su-  
per terram , de omni re quamcunque petie-  
rint , teste Veritate , fit illis à Patre qui in cœ-  
lis est ; dissidentium verò orationes aspernatur  
Deus pacis : sic puræ disciplinæ moralis con-  
cordiæ , doctrinæ similitudo & consonantia &  
Deo placet , & Ecclesiam honorat , & Fideles*

ædificat, & hæreticos quosque confundit. Scio quidem spiritum veritatis esse multiplicem in donis, varium in gratiis, quas dividit prout vult, alii sic, alii autem sic; sed in tam multiplici varietatis ornatu spirituales Ecclesiæ Magistri in doctrina præsertim morum longè gravissima eodem consensionis vinculo conjungi, eadem sententiarum fibula constringi, uno spiritu respirare debent.

Qui unitatem fidei profitemur, quidni morum concordem doctrinam æmulabimur? Si stemus simul, quis erit adversarius noster? Si spiritalia ossa inter se convertantur, non secundum commissuras articulorum, & ligamina nervorum, sed ejusdem charitatis & pacis in unum conspirantis colligationem, quis Ecclesiæ constantem firmitudinem attentabit? Idipsum dicamus omnes: Ethica nostra unius labii, unius coloris sit, assimileturque lapidum fornici, quæ casura, nisi invicem obstarent, hoc ipso, ut ait Seneca, sustinetur. Credamus clarissimos præstantissimi & amplissimi regni Parochos excitasse Spiritum sanctum, qui à Cyrillo Jerosolymitano catech. 17. *Universalis Ecclesiæ Parochus* appellatur. Assentiamur Episcoporum judiciis, quos Episcopus animarum Christus nobis præfecit, quosve regere Ecclesiam suam posuit Spiritus sanctus. Illi ultrò obtemperemus primo Pastori, cui in persona Petri Pastor bonus dixit: *Pasce oves meas. Quas?* (quærit Bernardus alias laudatus) *Illius vel illius populos civitatis, aut regionis, aut certi regni? Oves meas,* inquit. *Cui non planum non designasse aliquas, sed assignasse omnes. Nihil excipitur, ubi distinguitur nihil.* Et hoc ita voluit Salvator, ut committens uni,

*unitatem omnibus commendaret in uno grege, & in uno Pastore, secundum illud, Vna est columba mea, formosa mea, perfecta mea. Vbi unitas, ibi perfectio.*

Ferbuit non ita pridem tota Gallia contentione gravissima, num Constitutionibus Pontificiis & Episcoporum sanctionibus Regia auctoritate munitis deberent se omnes animo subicere quoad facti in Jansenium quaestionem, & subscribere celeberrimæ formulæ tenerentur etiam illi, quibus persuasum erat rem secus se habere, & errorem facti vel contigisse, vel contingere saltem potuisse. Cum cæteroquin omnes penè fateantur infallibilitatem in rebus facti vel summo Pontifici, vel Conciliis œcumenicis minimè esse asserendam, nec posse sine errore asseri; quia omnis definiendarum controversiarum collata Ecclesiæ auctoritas uni divino verbo ad nos sacris paginis vel traditione perlato innititur. Gravis, inquam, fuit contentio. Affirmabant nonnulli non esse his facti dissidiis pacem Ecclesiæ sollicitandam, modò quinque propositiones ubicunque repertas, quas Apostolica Sedes damnatas voluit, ipsi sincero corde in germano earum naturalis intellectus sensu damnaverent. Alii contrà obnixè urgebant, permiscendas esse juris factique quaestiones, nec patiebantur unam ab altera sejungi, nec uni subscribendum volebant, quin alteri quoque subscriberetur, timentes ne qui utrique conjunctum subscribere detrectarent, clam propositiones defenderent, vel apud se earum assensum continerent. Alii subscriptionem & permittebant, & præcipiebant in signum obsequii & reverentiæ quæ Ecclesiæ & Prælati ejus debetur maxima; ita

tamen ut subscriptio quæstioni juris assensum, in quæstionem verò facti reverentiam significaret. Censebant enim pro bono pacis non esse illa distinguenda, quæ supponi debebant distincta, nec esse necessarium, & multò minus utile ea operosè seponere, quæ nunquam sibi Pontifices, nunquam Concilia asseruerunt; sed licitum fuisse eas tricas dissimulare, & quasi ignorare, quarum scrutatio tantam creaverat invidiam. Alii demùm arbitrabantur, quod sicut in sententia D. Thomæ homo publicis & authenticis testibus juridicè criminis capitali pœna digni convictus potest à iudice, tametsi innocentie ejus conscio, secundum allegata & probata contra privatam scientiam condemnari: ita Jansenius publico Ecclesiæ judicio damnatus poterat ab omnibus sine quæstionum facti & juris discretione per subscriptionem damnari, & ab iis maximè, à quibus ignorabatur Jansenii sensus, nec lectus erat liber. Hanc controversiam non diuimo in præsentiarum, sed in omnibus, & per omnia Romano Pontifici me tota devotione subjicio, & gaudeo totam hanc litteram à Clemente IX. non minùs eximiâ morum castimoniâ quàm dignitate sanctissimo, & vivo Pii V. aliorumve insigniorum Pontificum simulachro mirâ esse sapientiâ compositam. Sed illud ex hac dissensione non mediocre emolumentum reporto, præsentì instituto opportunum.

In negotio Jansenii omnes ad unum contestati sunt circa facti etiam quæstiones profundam summo Pontifici reverentiam esse præstandam; & alii ulteriùs progressu obnixè contendunt, ut doctrina Jansenii in sensu ipsius totius Ecclesiæ subscriptione sine ulla facti, jurisque

præcisione damnaretur. Benè, est, laudo zelum, sed desidero constantem. Nonne idem Alexander & Jansenii propositiones damnavit, & Apologiam Caluistiarum proscripsit? Nonne iidem Galliarum Episcopi in laxissimam Probabilistarum doctrinam graves tulere censuras, nec minus acerbis iis quibus Jansenium reprobarunt? Nunquid Ecclesiæ decreta patent exceptionibus arbitrariis suscipientium, qui non eodem reverentiæ obsequio ea prosequi teneantur? Ubi æquitas? Ubi præjudiciorum vacuitas ab acceptione personarum aliena?

Quin etiam post damnatas quinque propositiones nullum vidimus qui eas in dubium revocarit, nullus qui illa impia quinque dogmata defenderit, nullus qui non sinceram erga Innocentii X. constitutionem in Gallias allatam animi reverentiam non significarit, nullus qui non paratum promptumque se dixerit ad obsequium suum subscriptione sua testandum. Omnes pro norma delegerunt Pontificiam constitutionem; ad hanc ipsam ipsum exigendum Jansenium, etiam qui de facto dubitabant, contestati sunt, ut de eo, prout cum illa norma consentiret, vel dissentiret, judicaretur. Et quanvis aliqui crediderint in ea professione multam simulationem latere, animum à lingua dissidere, forisque Catholicos mentem intrinsecus hæreticam recondere: Ego tamen qui prophetiæ dono careo, cordisque pervadendi privilegio non gaudeo, eandem professionem tandiu sinceram habeo, quandiu ejus authores non se mendacii apertè coarguant, quia ut semel, & iterum dixit Gregorius Magnus: *Si credi fideliter consentienti despicitur, cunctorum in dubium fides adducitur. Nam*



*veraciter confitenti non credere, non est hæresim purgare, sed facere.* Sed utut sit, id tandem apud omnes est in confesso, nullum in foro exteriori adversus Innocentii constitutionem reclamasse.

At contrà in negotio damnatæ corruptæ disciplinæ moralis res aliter contingit. Multi etenim suppressis Authorum nominibus libri sparsi sunt, in quibus non de facto disceptabatur, sed perniciosissimi errores, quibus Apologia Casuistarum scater, & in omnium indignationem incurrit, evulgantur, & defenduntur propositiones eadem individua ab Alexandro VII. damnatæ; & mutatis authorum nominibus interpolantur. Quis nescit Lugduni post reprobata Apologiam typis mandatum Amadeum Guimenium, in quo Apologiæ flagitia moralia non modò propugnantur, sed atrociora adduntur etiam cum superpondio atque auctario, ita ut unus videatur scopus huic authori præstitutus, comprobare in quas doctrinæ corruptelas deserti à Dei gratia, suisque permissi cogitationibus homines prolabi possint? Uidimus alia publicis typis committi & luci exponi opera tenebrarum, in quibus non pars Religionis laceffitur, sed tota penitus evertitur, in quibus Christianæ pietatis officia funditus profligantur. Vidimus præcepta fidei, spei, charitatis & religionis eludi, & ita ad nihilum redigi, ut vix illis ullus supersit locus: justitiæ, societatis, & honestatis humanæ vincula homicidiis, calumniis, restrictionibus mentalibus, furtis, usuris, quibusdam distinctionibus honestatis rumpi, ac dissolvi eâ, adeoque patente licentiâ, ut nullum sit tam insolens scelerum genus, quod probabilitatis

regulis & coloribus non defendatur.

Ubi ergo antiquus ille, laudandusque in quinque propositiones zelus? *Ethica Christiana* post *Episcoporum* censuras, post *Alexandri* geminatas constitutiones infruitè laceratur, induciturque sapientia non desursum descendens, cum sit cæno lutoque concreta; non *Pharisæica*, cum legis litteram & externam *Pharisæorum* probitatem eliminet; non *Christiana*, cum *Evangelii* arctissimas maximas extinguat; non *Philosophica*, cum naturali æquitati infensa sit; non civilis, cum societatis, pacisque politicæ fundamenta convellat; sed terrena & animalis: & tamen nemo movetur, nemo de formula subscriptione omnium firmanda cogitationem suscipit! Hoc sanè est, quod me stupore defigat. Et auget admirationem, quod longè major est dubitandi ratio, major timendi causa, ne plures sint apologiæ propositionum defensores, quàm inveniantur quinque propositionum propugnatores. Nullus quippe apparuit liber, nulla prodiit scriptiuncula, ubi alicujus damnatarum quinque propositionum defensio suscepta sit; sed omnes etiam accusati, etiam de facto ambigentes, detestari se quinque illa dogmata iis verbis professi sunt, quibus nihil cogitari possit significantius, aut apertius. Videmus verò quotidie cudi opuscula, in quibus eadem probabilitatis cantilenæ recinuntur, & detractis quibusdam laciniis, ejusdem materiæ, formæ, spiritus, & laxitatis sententiæ vulgantur, recoquantur, refinguntur.

Fas, sodes, sit exhaurire quod reliquum est admirationis. Cur in tam pari causa tam dispar est exitus, tam dispar zelus? Si res à no-

bis non privatis similitudinibus, vel politicis artibus, sed uno veritatis amore, unâ erga Romanorum Antistitem obedientiâ ageretur; si non quæreremus quæ nostra sunt, sed quæ *JESU CHRISTI*; si non propria communibus, sed communia propriis anteponeremus, cur inusitata exceptionis lege, quam nonnullis veniam concedimus, eam aliis eriperemus? Cur & propositiones Jansenii, & corruptelas apologiæ sine acceptione personarum non detestaremur? Cur non instituta est in Gallia aliqua formula, in qua corruptionum moralium laxitas omnibus subscriptione damnanda offerretur, cum certum sit quamplures non solum intus recondere, sed foris propalare, & ad praxim damnatas propositiones reducere? Quibus, quâ-ve aliis consiliis negotium istud gubernetur, planè non capio. Qua de causa quorundam mucro quiescat, nec sese evaginet ad occidendum; nec limet se, ut fulgeat, non intelligo. Cur tam multorum gladius Jansenismum tam libenter confodiens, in causa Probabilissimi hæreat in vagina, non capio. Cur illi iidem, tam parum iidem, & qui nullum non moverunt lapidem ut Jansenismus & à Clericis & Laïcis, & à Religiosis & sæcularibus, & à viris & mulieribus damnaretur; jam quasi emarcuisset nervus eorum, nemo illorum de tanta Ethicæ Christianæ obfuscuratione, & contundendis obscuratoribus ulla sollicitudine tangitur? Unde hoc, quæso, unde hoc?

Causas hujus operosè non scrutor; tibi judicium, Lector, permittent ipsi Adversarii, modò probabili rationi innitaris. Id à te exigo, ut Ecclesiæ Prælatorum contentioni, Romanæque Sedis

dis censuræ eadem semper fide, eadem observantia obsequaris: non sit tibi pondus & pondus: omnia columbino intuens oculo, solius Dei & proximi quære lucra, relinque tua. Ne dividās cor tuum, ut illud & Dei rebus, & tuis pariter reculis impartiaris. Amputetur omnis lucri vel gloriolæ causâ contentio, omnia Dei causâ suscipiantur. Quàm præclare Bernardus serm. 41. in Cant. & in declinat. *Va qui benè de Deo & sentire & eloqui acceperunt, si quæstum æstiment pietatem, si convertant ad inanem gloriam quod ad lucra Dei acceperant erogandum, si alta sapientes humilibus non consentiant. Paveant quod in Propheta legitur, dicente Domino: Dedi eis aurum meum, & argentum meum; ipsi autem de argento & auro mee operati sunt Baal. Clericus qui partem habet in terra, non habebit partem in cælo: itemque Clericus, si partem habuerit præter Dominum, pars ejus non erit Dominus.*

Ergo, Lector, non sis tui dissimilis, obedientia tua, & in Ecclesiam obsequium tuum unius coloris sit; nec illos imitere, qui in Summos Pontifices ita diverso sunt animo comparati, ut quid pronuntient quod sibi faveat, quasi de ore Dei meritò excipiunt; si quid verò decernant quod ipsis adversetur, penitus abjiciant, non spiritu & veritate, sed commodis omnia propriis metientes. Nec mirum si ita sint varii, quia probabilitas, quam tutantur, opiniosa & varia; veritas semper sui similis est. Unde Magnus Leo serm. 18. de Pass. *Hoc maxime ad Christianæ fidei pertinet soliditatem, ut secundum Apostolicam doctrinam id ipsum dicamus omnes, & simus perfecti in eodem sensu, & in eadem scientia.*

*Infidelitas quippe qua omnium est mater errorum, in multas opiniones, quas arte dicendi necesse habeat colorare, distrahitur: veritatis autem testificatio nunquam à sua luce discedit.*

---

## C A P V T II.

*S. Thoma inconcussa authoritate, Theologorum suffragiis, & omnigenarum rationum momentis Probabilismus evertitur.*

**B**Enè se res habet, iacta sunt fundamenta operis pia molitione cæpti, & divini officii amore suscepti. Et ideo non sunt solubili luto posita, nec temperali lapide constructa, sed sacrarum expensarum confectiōne validata, & divini magisterii arte firmata, qua ut ipse in Evangelio Deus dicit, nec ventis possint furentibus concuti, nec alluvione fluminum subruī, nec pluviarum infusione dissolvi. Cū enim opus hoc manus quodammodo divinorum voluminum intruxerit, & cælestium scripturarum compago solidarit, necesse est tam esse firma hæc per Dominum IESUM CHRISTUM qua facta sunt, quàm firma illa sunt qua fecerant ædificium, inquit Salvianus lib. 3. de Provid. cujus verba in hac materia nobis usurpare licet, quibus primum studium fuit scētandæ tutioris opinionis necessitatem sacra authoritate stabilire, ut nullis posset impugnationibus concuti, quæ

tam firmis esset innixa fundamentis. Sicut enim in terrenis ædificiis dejiçere parietes nullus potest, nisi priùs lapides & cæmenta disjegerit: sic ædificium quod struimus, dissolvere nullus valet, nisi id unde structum & erectum est, antè dissolverit. Quod quia labefactari utique nequaquam potest, rectè etiam à nobis incolumitas ædificii præsumitur, cujus status subsidiis immortalibus continetur. Sufficeret quidem ad nostræ causæ probationem tam unanimis sacratissimæ autoritatis consensus; sufficeret nobis velle Deum homines semper tutiora & viciniore salutis eligere; sufficeret ita se gessisse Sanctos omnes: hæc, inquam, abundè ad plenissimam rationem sufficerent; quia satis est pro universis rationibus author Deus, nec necesse est ut argumentis præbetur, quod hoc ipso quod à Deo dicitur, comprobatur. *Alia enim omnia*, inquit laudatus Salvianus, *idest humana dicta, argumentis ac testibus egent: Dei autem sermo ipse sibi testis est; quia necesse est quidquid incorrupta veritas loquitur, incorruptum sit testimonium veritatis.* Sed tamen quia nullam esse omninò arbitror in universa Theologia quæstionem istâ quam versamus gravio-rem, in qua omnis Ethicæ Christianæ puritas vertitur ac periclitatur, post productos in aciem quinque priores locos theologicos, quos vocant irrefragabiles, à Scriptura, traditione Patrum, Conciliorum decretis, Pontificum Romanorum constitutionibus, & Ecclesiæ Catholicæ consensu, operæpretium est rationibus veritatem confirmare; & quia omnes ferè ex inexhausta Angelici Doctoris aurifodina erutæ sunt, placet in antecessum tantè Magistri me-



tem exponere, cujus authoritatis solius pondus ad totam sufficit controversiam definiendam. Debueramus illum quidem inter Ecclesiæ Patres recensere, qui omnium est Patrum Echo, & in optimorum Ecclesiæ Magistrorum numerum ipsa ascribit Ecclesia: sed quia ejus nomen speciali est omnibus Theologis Christianis amoris & venerationi, speciali etiam diligentia ejus est mens representanda, de quo in ejus officio authoritate Apostolica probato in ordine Prædicatorum canimus: *Orbis decor, dux, lux fidelium: norma, limes, lux morum omnium.*

## SPECVLATIO I.

*S. Thomæ testimoniis luce clarioribus Probabilismus exploditur, communis veterum Theologorum sensus proponitur. Solida Thomistarum vindicta.*

**N**ON est opus conjecturis, aut argumentorum circuitu, quando mens alicujus de se patet. Adeo autem apertè S. Doctor versatilem probabilitatem exclusit, ut ejus verba non ponderatione egeant, sed nuda representatione. Sic enim loquitur *quodl. 8. art. 13.* ubi quaerit: *An quando sunt diversa opiniones de aliquo facto, ille qui sequitur minus tutam, peccet?* Cui quaestioni quomodo respondeat, attentè audiendum est, cum ibi perspicuè punctum præsentis con-

troverſiæ proponatur. Ecce locum integrum.

Reſpondeo dicendum, quod duobus modis aliquis ad peccatum obligatur: Vno modo faciendo contra legem, ut cum aliquis fornicatur: alio modo faciendo contra conſcientiam, etiamſi non ſit contra legem; ut ſi conſcientia dictat alicui quod levare feſtucam de terra ſit peccatum mortale. Ex conſcientia autem aliquis obligatur ad peccatum, ſi e habeat certam fidem de contrario ejus quod agit, ſive etiam habeat opinionem cum aliqua dubitatione. Illud autem quod agitur contra legem, ſemper eſt malum, nec excuſatur per hoc quod eſt ſecundum conſcientiam. Et ſimiliter quod eſt contra conſcientiam, eſt malum, quanvis non ſit contra legem. Quod autem nec contra conſcientiam, nec contra legem eſt, non poteſt eſſe peccatum.

Dicendum eſt ergo, quod quando ſunt dua opiniones contrariæ de eodem, oportet eſſe alteram veram, & alteram falſam. Aut ergo ille qui facit contra opinionem Magiſtrorum, utpote habendo plures prabendæ, facit contra veram opinionem, & ſic cum facias contra legem Dei, non excuſatur à peccato, quanvis non faciat contra conſcientiam: ſic enim contra legem Dei facit. Aut illa opinio non eſt vera, ſed magis contraria, quam iſte ſequitur, ita quod verè licet habere plures prabendæ; & tunc diſtinguendum eſt, quia aut talis habet conſcientiam de contrario; & ſic iterum peccat contra conſcientiam faciens, quanvis non contra legem; aut non habet conſcientiam de contrario, ſed certitudinem, ſed tamen in quandam dubitationem inducitur contrarietate opinionum; & ſic ſi manente dubitatione plures prabendæ habet, periculo ſe committit, utpote magis amans beneficium temporale, quam propriam ſalutem: aut ex contrariis opinio-

*nibus in nullam dubitationem adducitur; & sic non committit se discrimini, nec peccat.*

Hæc D.Thomas. Quæ verba adeo plana & luculenta visa sunt Amadeo Guimenio, ut tract. de opinion. probab. num. 6. dixerit: *Hæc si vera sint, va operantibus ex opinione probabili.* Et meritò ita dixit; si enim his verbis opinionem minùs probabilem, falsam & æternæ legi adversam non refutat S.Doctor, nihil unquam S.Thomas refutavit, quia nihil potest significantius refutari. Nam præterquam quod expressè docet quæcumque opera contra legem æternam perperam facta semper esse mala, quanvis sint secundùm conscientiam, ex quo fit nullam dari juris naturalis invincibilem ignorantiam, quo principio apud D.Thomam constantissimo, & superiori capite demonstrato omnem funditus tolli minoris probabilitatis securitatem fatentur ipsi Probabilistæ; præter hoc, inquam, sic claritatis gratiâ ex verbis D.Thomæ argumentor in forma.

Ex D.Thoma *duobus modis aliquis ad peccatum obligatur: uno modo faciendo contra legem, ut cum aliquis fornicatur: alio modo faciendo contra conscientiam, etiam si non sit contra legem. Illud autem quod agitur contra legem, semper est malum, nec excusatur per hoc quod est secundùm conscientiam.* Atqui secundùm Probabilistas non est semper malum quod est contra legem, sed excusatur per hoc quod est secundùm conscientiam, etiam minùs probabilem: Ergo Probabilistarum doctrina nullatenus est S.Thomæ consentanea, sed è diametro opposita; cum eorum sententiâ illi uni principio unicè subnixa sit; nimirum illum à peccato excusari, qui in

conflictu opinionum sequitur opinionem reipsa falsam, & aeternae legi adversam, dummodo eam probabilem existimet, quia sic excusatur per hoc quod est secundum conscientiam. Quod est in terminis S. Thomae contradicere.

Iterum: S. Thomas inde probat, eum qui habet plures praebendas peccare, si illa opinio quae docet eas habere, sit contra legem; quia *quod est contra legem, semper est peccatum*. Atqui S. Thomas non loquitur de his quae sunt aperte & notorie contra legem: tum quia jam ageretur etiam contra conscientiam: tum quia in illa quaestione de pluribus praebendis, non erat constans & certus Ecclesiae sensus, cum testetur idem S. Doctor quodl. 9. art. 15. *Periculosum est (determinare) ubi veritas ambigua est: quod in hac quaestione accidit. Cum enim hac quaestio ad Theologos pertineat & ad Iuristas, inveniuntur in ea Theologi Theologis, & Iurista Iuristis contraria sentire. In iure namque divino non invenitur determinatum expressè, cum in sacra Scriptura expressa mentio de ea non fiat. Ergo ex D. Thoma qui sequitur opinionem falsam & contrariam legi, semper peccat, etsi non sit apertum, opinionem illam esse contra legem, & in ea inveniuntur Theologi Theologis & Iuristae Iuristis contraria probabiliter sentire.*

Rursum arguuntur: Ex D. Thoma, quando duae sunt opiniones Doctorum de eodem, oportet esse alteram veram, & alteram falsam; & qui facit contra veram opinionem, cum facit contra legem Dei, non excusatur à peccato, quanvis non faciat contra conscientiam. Atqui ille qui ex opinione probabili falsâ operatur, facit contra veram opinionem, quanvis non faciat contra con-

scientiam : Ergo qui ex opinione probabili contra legem agit, peccat. Nec loquitur S. Doctor de opinione evidenter & manifestè falsa, quia non esset opinio, sed certus & perspectus error : Ergo censet S. Præceptor, per quamcunque voluntariam legis æternæ violationem, etiam opinione probabili fultam, hominem in peccatum incurrere; cùm ex S. Præceptore de- tur casus, in quo quis agens contra legem peccat, tamen si non agit contra conscientiam: nunquam verò homo agat contra manifestam sibi legem, quin agat contra conscientiam. Qui casus S. Thomæ nunquam contingit, in sententia Probabilistarum, juxta quos nullus peccat contra legem, quin simul peccet contra conscientiam; nec potest quisquam contra legem peccare, qui secundum conscientiam operetur. Ergo evidenter probabilissimus asserens securitatem opinioni minùs tutæ, minùsve probabilis, fuit à S. Thomæ refutatus, qui in tribus casibus ait committi peccatum, & cùm opinio à veritate & lege æternæ dissentit, & cùm opinio vera dictamini conscientie adversatur, & etiam cùm non habetur conscientia de contrario, sed certitudo à ratione orta, sed dubitationem ex contrarietate opinionum non excludens: quam quidem dubitationem non tollit, sed auget opinio minùs probabilis in concursu probabilioris, ut superiori capite exponendo celebrem juris regulam exposuimus. Et certè si, ex D. Thomæ ille peccat, *etiamsi non habeat conscientiam de contrario, sed certitudinem, si in quandam dubitationem inducatur ex contrarietate opinionum, quia sic periculo se committit*; quantò magis peccat, qui sequitur opinionem minùs probabilem, minùs-



*He* tutam, de qua non solum aliquam dubitationem patitur, sed quam probabilius falsam opinatur? Non poterat S. Doctor hujusce difficultatis ramos accuratius secernere, nec discretius definire.

Mirum est quot, & quantis modis, quamve subtilibus declinationibus, & veluti nebulis tam splendentem locum eludere & obscurare in omne latus se vertentes Probabilistæ sategerint. Sed revera locus ille, ut phrasi Tertull. utar, *itacelaret, quod ipsius Solis radiis eum putem scriptum.* Unde omnia hac unica observatione evanescent, quod ex D. Thomâ datur casus in quo quis agens contra legem Dei, peccat, etsi non agat contra conscientiam; quia quod agitur contra legem æternam, semper est malum, etsi non sit contra conscientiam, & multò magis quando est contra conscientiam probabiliorem. At verò secundum Probabilistas nullus est casus, in quo quis peccet contra legem Dei, in quo simul non peccet contra conscientiam. Unde manifestum est, nullam secundum D. Thomam dari juris naturalis invincibilem ignorantiam, quæ possit ullo opinionis probabilis prætextu excusari, ulla Magistrorum autoritate defendi. Quod optimè roborat Vincentius Baronius in tertia sua editione operis moralis contra Amadeum Guimenium, *pagina mihi 21.* ex notandissima S. Præceptoris doctrina *ejusdem quodl. art. 15.* ubi tradit quod error conscientix quandoque habet vim absolvendi, quando scilicet procedit ex ignorantia ejus, quod quis scire non potest, vel non tenetur: sicut si aliquis intenderet accedere ad uxorem suam



causâ delectationis, & ita intendenti supponeretur alia, tunc non peccaret mortaliter ob ignorantiam facti, sed venialiter propter amorem delectationis per se quæsitæ. Si verò error conscientie pertineat ad res juris naturalis, tunc non excusat à peccato, quia jus naturale quisque scire potest, & tenetur. *Sicut, inquit, si quis crederet fornicationem simplicem esse peccatum veniale, & tunc quanvis crederet se peccare venialiter (utique ex aliqua opinione probabili) non tamen peccaret venialiter, sed mortaliter.* Ubi aperte damnat S. Doctor opiniones falsas contra legem, constituto discrimine inter ignorantiam rerum facti & juris, quòd illa interdum, ista nunquam excuset à peccato. Et omninò observandum est exemplum fornicationis, ut videas quàm verè, & D. Thomæ consonè dixerimus *cap. preced.* contra P. Mercorum in hac parte remissum, actum fornicationis existimatum erroneè immunem à culpa, posse esse meritorium. Unde crediderim P. Baronium pro nobis stare, tamen si alibi pro sua ingenua urbanitate, & nimia, quâ abundat, charitate propositionem Mercori excusare conetur.

Confirmatur ex alio illustri S. Thomæ loco, qui habetur quodl. 9. art. 15. ibi: *Respondetur dicendum, quod omnis questio, in qua de peccato mortali agitur, nisi expressè veritas habeatur, periculosè determinatur: quia error quo non creditur esse peccatum mortale quod est peccatum mortale, conscientiam non excusat à toto, licet fortè à tanto.* Error verò quo creditur esse mortale, quod non est mortale, ex conscientia ligat ad peccatum mortale. *Præcipuè autem periculosum est, ubi veritas ambigua est, quod in hac questione (utrum liceat*

habere plures præbendas) accidit. Cum enim hac quaestio ad Theologos pertineat, in quantum dependet ex jure divino, vel ex jure naturali; & ad Juristas, in quantum dependet ex jure positivo, inveniuntur in ea Theologi Theologis, & Jurista Juristis contraria sentire. His verbis Probabilissimum S. Doctor significanter & luculenter confutavit, & trita Probabilistarum pronuntiata disjecit. Etenim Probabilistæ docent, quod quando veritas perspicue non habetur, tunc quaestiones sine periculo beneficio opinionis probabilis determinantur, permittiturque optio alterutram sine scrupulo eligendi. At D. Thomas contra: *Quaestio*, inquit, *in qua de peccato mortali agitur, periculose determinatur, nisi expressè veritas habeatur.* Certè si S. Doctor usum arbitrariae probabilitatis agnovisset, quid ei promptius, aut expeditius occurrere natum erat, quàm juxta leges Probabilistarum sic respondere? Quia in hac quaestione Theologi Theologis, & Juristæ Juristis inveniuntur contraria sentire, poterit quisque opinionem sibi benè visam tutò sectari.

Rursum Probabilistæ contendunt, quod error quo probabiliter creditur aliquid non esse peccatum mortale quod est peccatum mortale, conscientiam excusat à toto & tanto, sufficitque ad honestandam actionem, ad eique meritum conciliandum. At S. Thomas docet errorem illum non excusare à toto, licet forte à tanto. Denique Probabilistæ tunc censent, delectionem opinionis minùs probabilis, minùsve tutæ vacare periculo, quando veritas non aperta, sed ambigua est; quia tunc probabilitas utriusque sententiae sub veritatis ambiguitate constat, dam-

neutrius veritas aut falsitas percipitur. Nam varietas opinionum probabilium venit ex ignorantia veritatis, quæ si non latêret, non jam probabilis, sed planè certa esset sententia. Nam ut ait Bernardus lib. 5. de consider. cap. 2. *Opinio sola verisimilitudine se tuetur. Opinio certi nihil habens, verum per verisimilia quarit, potius quàm apprehendit. Opinio est quasi pro zero habere aliquid quod falsum esse nescias.* At verò S. Thomas tunc opinionum delectum ait præcipuè periculosum esse, ubi veritas ambigua est. Ergo versatilis probabilitatis licentia capitaliter Angelico Doctore adversatur.

Ex quo etiam illustri loco obiter collige, quàm deploranda sit tam multorum semidoctorum præfidentia, qui tametsi sint solidæ doctrinæ & veræ pietatis necessariâ suppellectile destituti, idoneos tamen se deputant ad confessiones audiendas, & intricatissimos conscientiarum nodos dissolvendos. Vix ullus invenitur, qui non istam Angelicis humeris metuendam functionem sine metu invadat, qui ab ea arcem non conquerratur, qui Magnatum, & Prælatorum regendæ conscientiarum se imparem putet, cùm tamen in tota Ecclesiæ administratione nullum opus vel sublimius, vel difficilius, vel ut ex D. Thoma audivimus, periculosius inveniatur. Quia nimirum semper anceps, semper periculi plenum Sanctis visum est regimen animarum. Hinc servi Dei post veras morum regulas consultas, post jugem Scripturarum meditationem, post orandi assiduitatem, post Canonum, Patrum, Pontificiorumque decretorum diligentem lectionem, post omnia Christianæ pietatis officia sedulò obita, ad regendos & consiliis instruendos alios longè imparatos se credunt. Et quàm

deoque timor, quem timebant, evenit illis; quia nimirum error in jure naturali nec magistrum excusat, nec discipulum. Dicebat quondam Tacitus: *Ut olim flagitiis, sic nunc legibus laboramus.* Verius id dixerit Casuistis, qui omnem detrahunt metum, qui omnibus sicut probabilitatem, ita securitatem offerunt, qui nulla munia detrectant, qui non coacti, sed ultrò, sed libris intentatis beneficia curata capeſſunt, nec timeant hanc immotam divinæ sententiæ veritatem: *Si cactus caco ducatum præſtet, ambo in foveam cadunt.*

Denique Angelicus Præceptor suam mentem nihilo minùs dilucidè significavit quodlib. 3. art. 10. ibi: *Respondeo dicendum, quod diversa opiniones Doctorum sacra Scriptura, si quidem non pertineant ad fidem & bonos mores, absque periculo auditores utramque opinionem sequi possunt.* Tunc enim habet locum quod Apostolus dicit ad Rom. 14. *Unusquisque in suo sensu abundet.* In his verò quæ pertinent ad fidem & bonos mores, nullus excusatur, si sequatur erroneam opinionem alicujus Magistri. In talibus enim ignorantia non excusatur, alioquin immunes à peccato fuissent qui sequuti sunt opinionem Arrii, Nestorii, & aliorum Hæresiarcharum. Nec potest excusationem habere propter simplicitatem auditorum, si in talibus opinionem erroneam sequantur. In rebus enim dubiis non est de facili præstandus assensus; quin immò, ut August. dicit in lib. 3. de doctr. Christi. consulere debet quis regulam fidei, quam de Scripturarum planioribus locis, & Ecclesiæ autoritate percepit. Non dubito quin Probabilistæ hanc D. Thomæ doctrinam duram prædicent. Videbunt enim, nisi se ultrò voluerint occurrere, his verbis gravem plagam

inferri sententiæ suæ de securitate sententiæ probabilis, quâ censent in moralibus quemlibet excusari, si sequatur erroneam gravis Magistri opinionem.

Nec potest eludi hoc testimonium dicendo S. Thomam loqui de illis erroribus, qui manifestè Scripturæ adversantur. Hæc enim exceptio sponte sua cadit; Sanctus namque Doctor loquitur de errore qui secundum se sacræ Scripturæ, vel Ecclesiæ Catholicæ adversatur, licet erranti non sit hæc contrarietas manifesta; loquitur enim de opinione hæreticorum, quibus utique non constat sententias suas manifestè Scripturæ adversari, cum oppositum contendunt, & autoritate magistrorum suorum freti credant: Atqui omnis error contra jus naturale secundum se Scripturæ, imò & legi æternæ adversatur, tametsi error ille non sit ex culpa errantis ei semper manifestus: Ergo nullus error juris naturalis excusat sequentem opinionem Magistri.

Quare vehementer mirari subit, cur nonnulli Probabilistæ confidentiâ incredibili illum eundem locum, quo tam perspicuè probabilissimus damnatur, sibi favere scripserint, ibique perspiciliis nescio quibus legerint, discipulum quemvis posse in moralibus magistri sui opinionem erroneam tutò sequi. Suspicior erroris occasionem nactos esse ex argumento *Sed contra*, articuli 13. *quodlib.* 3. suprà expensi, ubi S. Doctor ait: *Potest esse quod aliquis adhibet diligentiam, inquirens an habere plures prabendæ sit licitum, nec invenit aliquid quod ipsam moveat ad hoc quod sit illicitum: Ergo videtur quod sine peccato plures possit prabendæ habere.*

Sed parum sunt in lectione D. Thomæ versati, qui ex argumento *Sed contrà*, mentem D. Thomæ eliciunt. Solenne enim est S. Doctore utramque extremam sententiam priùs proponere, quàm ut suam responsionem producat. Unde non rarò solvit argumentum *Sed contrà*, quando non est doctrinæ corporis articuli consentaneum. Quod sciunt omnes qui D. Thomam frequentant, & fatetur Vasques in 1. p. disp. 24. num. 2. dicens: *Quod ex argumento Sed contrà, deduci videtur, minoris momenti censeri debet. Sæpius enim hoc genus argumenti non tam ponitur à S. Thoma ut confirmet id quod docet in articulo, quàm ut questionem propositam more solito ex utraque parte dubiam reducat. Quare illius sententia ex solutionibus argumentorum, & doctrinæ articuli semper conjicienda est.*

Dices: Hæ S. Thomæ autoritates nimis probant. Assertionem enim D. Thomæ universim prolata, peræquè probant, id quod fit contra legem positivam esse semper malum, atque illud quod fit contra legem naturalem, ut colligitur ex adductis à S. Doctore exemplis polygamix beneficiorum, seu plurium præbendarum jure positivo prohibita; & hæreticorum opinioniones suorum magistrorum erroneas juri divino positivo adversas sequentium; Ergo tam generalis S. Thomæ doctrina necessariò indiget interpretamento molliri, quia quod nimis probat, nihil probat.

Respondeo, aliena expositione non egere S. Præceptorem, qui seipsum tam perspicuè interpretatus est in illis iisdem locis & exemplis, quæ difficultat in ingerunt arguenti. Quod enim & disertè tradit, tunc semper nos incurrere in pec-



catum, quando agimus contra legem, ut *cum aliquis fornicatur*. Ubi clarum est, ipsum loqui de lege æterna, quæ fornicatione violatur. Nec obest exemplum plurium Sacerdotiorum, seu præbendarum. Nam illam polygamiæ non censet semper esse malam, nisi sit ab æterna lege dissidentanea. Sic seipsum apertissimè explicat S. Thomas quodl. 9. art. 15. *Cum hac quæstio* ( de pluribus præbendis ) *ad Theologos pertineat in quantum dependet ex jure Divino, vel ex jure naturali; & ad Iuristas in quantum dependet ex jure positivo, inveniuntur in ea Theologi Theologis, & Iurista Iuristis contraria sentire. In jure namque divino non invenitur determinatum expressè, cum in sacra Scriptura expressa mentio de ea non fiat; quanvis ad id argumenta ex aliquibus auctoritatibus Scriptura fortè adduci possint, quæ tamen non lucidè veritatem ostendunt. Determinando verò eam secundum jus naturale, sic videtur ad præsens de ea dicendum, &c.* Vides ex S. Doctore tunc solum Sacerdotiorum multitudinem esse semper malam, quando in ea violatur aliqua lex juris naturalis. Quare verè suprà, pag. 602. observavimus tunc solum Patres ignorantiam juris positivi, sicut & naturalis peræquè damnare, quando in ea aliquid ignorantie juris naturalis permiscetur. Quia ut eòdem loci observat Angelicus Magister, jus positivum; quatenus habet aliquid juris naturalis admixtum, semper obligat, nec ulla unquam potest consuetudine abrogari. *Quantum ad id, inquit, quod jura antiqua contraveniunt jus naturale, abrogari non possunt per contrariam consuetudinem, utpote irrationalem. Nec in hoc potest ab ullo dispensari: Eo quòd, inquit, dispensatio humana non aufert ligamen juris.*

*turalis, sed solum ligamen juris positivi, quod per hominem statuitur, & per hominem dispensari potest. Vides manifestè, D. Thomam sui interprete, celebrem illam maximam, Illud quod agitur contra legem, semper est malum, nec excusatur per hoc quod est secundum conscientiam, intelligi de eo quod agitur contra legem naturalem & æternam.*

Ad aliud exemplum de hæreticis suprà etiam loco citato respondimus, Patres & eorum vocem D. Thomam, ignorantiam hæreticorum non semel damnare, quia ob fidei & veritatis catholicæ circumfusam veritatem, ignorantia veræ Religionis fit vincibilis, sicut ignorantia juris naturalis; unde illam isti meritò æquiparant.

S. Thomæ succinunt omnes veteres Theologi; nam præter Thomistas veteres postea referendos, minùs probabilis, minuire tutæ sententiæ delectum damnant Henricus Gand. *quodl. 4. q. 33.* Gerson *tract. 39. art. 10.* Joan. Major *in prolog. 4. Sentent. q. 2.* Adrian. *in qq. de restit.* Navarrus *in Manual. cap. 27.* Pano. *in cap. Castell. de feriis, num. 2.* & omnes Canonistæ. Sed quod mirum est, ipse Scotus, qui in aliis passim S. Thomæ advesatur, in hac quaestione, sicut in materia de efficacia divinæ voluntatis, Angelico Doctore consentit, his observandissimis verbis, quæ habet in 3. dist. 25. q. 1. num. 8. *In moribus quando sunt altercationes de aliquo peccato, quando primò est mortale, ut si unus feritus in scientia dicat, quod non licet sic mercari, & alius dicat quod licet; tutius est non procedere sic vel sic, sed expectare quousque veritas pateat aliunde: si enim ita esset, quod unus Doctor diceret aliquem peccare mortaliter, nisi sic faceret, &*

*alius quod peccaret, si sic faceret, tunc simplex foret perplexus: ideo bene videndum est in moralibus, antequam aliquid asseratur, quia videlicet cum habens duas opiniones contrarias perplexus sit, periculose se determinaret ad unam, nisi re diligenter inspecta, illam probabiliorē agnosceret. Et in 4. dist. II. q. 6. Cum multis sit probabilior pars negativa, non sine peccato aliquis se exponit dubio, sequendo affirmativam minùs probabilem. Plura alia adduci possent Scoti testimonia, variaque loca argumentosa, quæ urget quidam recens Scotista anonymus egregio opusculo, quo & D. Francisci sanctitatem relipit & Doctoris subtilis eruditionem æquat, demonstratque opinandi licentiam non solum morum integritati repugnare, sed etiam lumen naturalis rationis extinguere. Quia in opinionibus contradictoriis negatio non solum removet affirmationem, sed etiam ipsam rem affirmatam; unde contrariæ opiniones possunt quidem esse in mente apprehendente, sed non in mente judicante; subindeque impossibile est, quod utraque pars judicetur vera, quod tamen requiritur ad licitum probabilis opinionis assensum. Egregiè etiam observat unum, quod ad versatilem probabilitatem de medio tollendam sufficeret, S. Thomam, Scotum, aliaque Scholæ lumina in quæstionibus de rebus moralibus variis argumentis verisimilibus utraque parte munita, nunquam adhibuisse responsionem recentioribus familiarem, quæ erat facillima, si eam tutam putassent; nimirum, liberum esse utriusque partis argumentis non destitutæ delectum. Ergo opinionum Probabilistarum licentia fuit antiquis omnibus suspecta, qui existimarunt utramque*

contradictionis partem non posse esse simul licitam, sed longâ opus esse disquisitione, ut cognoscamus quid tutò fieri possit, quid probabile prudenter sit, seu assensu, & usu probandum. Illud porro dolendum, plerosque Scotistas hac in controversia, sicut & in materia de efficacia divinæ voluntatis, à tam perspicuis Doctoris subtilis sensibus ultrò recedere, in quibus ei magis indivulsè debebant adhærescere.

Dces : Illis antiquis recentiorum turba ex omni statu suffecta est, ut refert quidam recens author quæstionis facti, enumerans Authores ex omnibus Ordinibus & familiis, qui minori probabilitati tutò sectandæ astipulari sunt : atqui Theologis hujus temporis pro controversiis hujus temporis fides adhibenda est, peritis enim in arte credendum est. Ergo nihil morari debemus antiquorum Theologorum sensum, sed tutò nos modernis Casuistis committere, quia quærent casus temporum Doctores temporum, ex quorum proinde placitis Catholici orbis mores conformare, emergentes nodos dissolvere, contractus componere necesse est.

Respondeo in hac gravissima quæstione sequendos esse antiquos Theologos, posthabitis modernis, ut sæpè diximus, sæpè in sequentibus dicemus : quia concors veterum Theologorum sententia argumento est, dogma illud non esse recens natum, sed à majoribus traditione acceptum, communissimis, antiquissimisque regulis nixum, omnium Doctorum Catholicorum mentibus consignatum. Quia etiam amor novitatis, & nausea vetustatis ingentibus malis & periculis patent, atque suos alleclas in errorum abrupta & præcipitia transversos agunt. Et certè

quo jure prætendunt recentiores se à nobis reverentius haberi, quàm ipsi habeant antiquos? Quare agrè ferunt, nos ab ipsorum placitis disscutire, cum ipsi à D. Thoma, Scoto, totaque antiquitate veneranda dissentiant? An ignorant illas Magni Gregorii maximas: *Qui sua à successoribus desiderat mandata servari, decessoris sui statuta custodiat.* Quia justum est, *ut qui seniores deserunt, à junioribus deserantur?* Sine injuria quidem recentes legendos docebat Lampridius, sed cum reverentia antiquos: nostrorum temporum ingenia non despiciebat Plinius, sed antiquorum animum, & placita mirabatur. Accedit antiquos antecellere recentibus numero, merito, concordia. Numero, quia ante 80. annos, quotquot de re morali scripserunt, probabilioribus & tutioribus adherendum sanxerunt: merito, quia S. Thomæ & Scoti quis audeat recentiores comparare, quis antepondere? Concordia demùm, quia una voce, uno consensu omnes nostri asserunt, sequenda esse probabiliora, tutiora, & viciniora salutis. Probabilistarum verò non sunt convenientia testimonia, sed tot sunt sensus, tot dissidia, tot restrictiones, quot capita.

Quod verò additur, Probabilissimo plures ex omni statu, ordine, & familia adhaesisse, & in illud nuperum inventum Episcopos, Sacerdotes, & Religiosos omninò plures pedibus manibusque ivisse, id non obest, quia non negamus hanc novitatem hac ætate latè fusam; sed contendimus eo eam esse antiquitatis sacris regulis fortius & diligentius compertendam, quo eam magis serpsisse videmus. Unde præcipitur Exodi 23. *Nesequaris turbam ad faciendum malum:*

nec in iudicio plurimorum acquiesces sententia, ut à  
 vero devies. Et christianè Philosophus Moralis  
 lib. de vita beata, cap. 1. & epist. 7. Non tam bene  
 cum rebus humanis agitur, ut meliora pluribus  
 placeant. Argumentum pessimi turba est. Quæramus  
 quid optimè factum sit, non quid usitatissimum:  
 & quid nos in possessione felicitatis æterna consti-  
 tuat, non quid vulgò veritatis pessimo interpreti  
 probatum sit. Sanabimur si modò sc. paremur à cætu.  
 Quid tibi præcipuè vitandum esse existimem, qua-  
 ris? Turbam. Vtique quò major est populus cui  
 commiscemur, hoc periculi plus est. Sed quàm op-  
 portunè, quàm divinè Bernardus ad retunden-  
 dam delicatam illam ex Episcopis, Sacerdotibus,  
 & Religiosis objectionem hom. de Discip. eunti-  
 bus in Emaüs, expendens illud, Et quomodo  
 summi Sacerdotes & Principes crucifixerunt eum,  
 ait: Ponere vereor os meum in cælum, ut non di-  
 cam in cœnum, & Saül ad purgationem ventris  
 inclinatum occidere. Suffi it si oram eblamydis  
 abscindam gladio Ieremis, cum Dominus dicat  
 per Malachiam: Vos me configitis, gens scilicet  
 tota. Ostendit Ieremias quomodo summi Sacerdo-  
 tes & Principes eum crudeliùs crucifigunt. Ibo, in-  
 quit, ad Optimates, & loquar eis; ipsi enim cog-  
 noverant viam Domini, & iudicium Dei sui. Et  
 ecce hi magis simul fregerunt jugum, ruperunt  
 vincula, & à Propheta usque ad Sacerdotem om-  
 nes faciunt dolum. :: Hinc est non minima causa  
 tristitia nobis; quia etiam litterati, & qui vi-  
 dentur Religiosi, comparantur jumentis, & im-  
 mundiores facti sunt illis. Ipsi enim non solum  
 spinis peccatorum suorum crucifigunt Deum, sed  
 aliis facti sunt in proverbium & exemplum. Non  
 esset doloris materia, nec res tam suspensa, si



*plebs qua non novit legem, sola caderet in errorem; quia revelari posset per litteratorum & Religiosorum prudentiam, si ipsi non fuissent primi ad ruinam. ::: Sed de litteratis stupemus, & qui præcendunt habitum Religionis, qui bonum Dei verbum gustaverunt, & donum cœleste, virtutesque sæculi venturi: & ecce vacca pingues Samaria facti sunt, arbores autumnales eradicata, bis mortua, facti hostes in capite, qui docere debuerant viam vita.*

### *Solida Thomistarum vindicia.*

Sed statim contra expositam S. Thomæ mentem, & veluti sponte se offert hæc obiectio: Thomistæ non pauci senserunt, litterisque consignarunt in concursu opinionum posse quemvis tutò sequi minùs probabilem. Cum ergo illi in verba D. Thomæ, sensusque juraverint, perperam contendimus obligationem eligendi sententiam tutiorem ac probabiliorem nobis esse à D. Thoma impositam. Estne, inquires, verisimile Thomistas contra Angelici Magistri mandata latissimam ad omne flagitiorum genus portam referasse? Hoc argumentum toto opusculo urget Amadeus Guimenius in Dominicanos Scriptores, quasi in primos authores omnium laxitatum invidiam derivans, quasi Schola Thomistica prima sit quæ Ethicam Christianam corruperit, morumque licentiam in Ecclesiam invexerit; subindeque non esse à nobis tantoperè increpandos modernos laxones, qui in Dominicana familia nedum socios, sed etiam duces habent & Magistros. Hæc sunt Guimenianæ calliditatis præstigiæ, quas ut magis præcoloret,

Thomistas honorificentissimis verbis appellat, ut eos ad corruptissimarum suarum opinionum consensum pertrahat. Cum tamen his fucatorum encomiorum artibus plus laceſſat, quam si apertis sarcasmis Scholæ Angelicæ gloriam infuscarer.

Arbitrarer me degenerem, nec solum Prædicatoriæ familiæ, sed etiam veritatis proditorem, atque hujus de probabilitate quæstionis & causæ prævaricatorem, si non totus vocalis exurgerem ad tam infamem propulsandam calumniam, quæ dissimulata & nostro dedecori, & Ecclesiæ offensionem verteretur. Cerrè cum familiæ Dominicanæ, & Scholæ Thomisticæ concreditum sit, sicut gratiæ efficacis, & incorruptæ disciplinæ moralis tutela, velut solenne depositum, omnes genuinos Thomistas *ad hæc mala avertenda*, ut verbis Tertulliani utar, *militēs esse oportet*. Serio ergo nobis monstrandum est, S. Thomam doctrinæ suæ puritatem in veros suos discipulos transfudisse & corrivasse. Et quanvis non sit hic consilium nostrum texere responsionem singula quæque objecta evertentem, ne actum agam, & munus à Vincentio Baronio eximie occupatum, accuratiusque impletum quam à me tentari possit: nihilominus operæpretium est generale parare antidotum, quo & pestilentis operis veneno in his partibus Lugdunensibus sparso, & grassanti medeamur, & à tantis, quibus Angelica Schola abundat, viris tantam injuriam defendamus. Necessitas ergo Thomistas nostros à nefandorum criminum consortio vindicandi has à me adversus fraudulentum adversarium vindicias extorsit, cujus impetus eo periculosior est, quo blanditiis &

encomiis apparet favorabilior. Quia ut bene dixit Seneca : *Pessimum calumniantium genus, laudantium.* Et Venerabilis Beda lib.4. in Luc. cap. 52. *Duo sunt genera persecutorum, unum palam sciuentium, alterum fide, fraudulenterque blandientium.*

In primis ad omnes adversarii calumnias falsitatis revincendas, hoc unum sufficeret argumentum, quod tanta laxitatum colluxies nullo veterum Thomistarum testimonio fulta sit, sed ab omnibus antiquis S. Thomæ discipulis expressè damnata. Siquidem minùs probabilis, minusque tutæ in conflictu probabilioris decretum rejicit expressè D. Antoninus 1. *part. tit. 3. cap. 10. §. 10. & 3. part. tract. 5. cap. 2. §. 9.* unde luculenter docet, illum qui agit contra dubium, non peccare, *dum adhaeret opinioni alicujus Doctoris, & habet rationes probabiles pro ipsa magis quàm pro opposita opinione*; unde clarè exigit ut probabiliorē existimet partem quam sequitur. Unde planè mirari subit quorundam incogitantiam vel fraudem, qui S. Antoninum sententiæ suæ astipulatorem afferunt 1. *part. citata*, cum eò loci contrarium planissimè doceat his, verbis *Potest aliquis tenere unam partem alicujus opinionis, & secundum eam operari, dummodò talis opinio non sit contra auctoritatem expressam sacra Scriptura, nec contra determinationem Ecclesie Catholica; & quando etiam ex contrarietate opinionum non inducatur ad dubiandum, sed bonam conscientiam & credulitatem formet de eo quod credit, tanquam probabiliori parte.* Quin immò partem probabiliorē iis S. Antoninus cautionibus sepit, ut semper probabilior eadem sit vera. Eam quippe exigit in librandis opinionibus

bus diligentiam, ut ad vitandos errores præcipiat, ut quis se ad gratiam præparet quantum potest, ut sapientiam invocet per rationem, ut Scripturas diligenter investiget, ut quærat eam quasi pecuniam, ut adhibeat diligentiam in inquirendo. Quibus adhibitis conditionibus, vix aut nunquam error obrepet. Quam Antonini sententiam tam religiosis conditionibus septam si ex animo suscipiat adversarius ac tota Probabilistarum cohors, cum illis perpetuam optatissimæ concordiæ pacem jurabo. Sed absit ut ab illis id sperem, quibus nihil usitatus, quàm ut ab Antonini sensibus, dum strictiores videntur, passim dissentiant.

SS. Thomæ & Antonino subscribunt celebriores Thomistæ, Cajetanus in *Sum. verbo Opinionis usus*, Sotus *lib. 3. de just. & jur. quest. 6. art. 5.* Sylvester *verb. Opinio, quest. 2.* Tabiena *eodem verbo, num. 4.* Quin ex Paulo Æmilio alicubi observat noster Vincentius Baronius, Dominicanos ab Instituti origine, ab Ordinis incunabulis ab opinionibus cupiditati ambitionique faventibus semper abhorruisse, ac protutarum sententiarum à lege stantium usque ad rerum suarum jacturam & sanguinem decertasse. Unde nullum ex antiquioribus Thomistis præsidium habet adversarius, sed omnes illos sibi adversos fateatur necesse est. Ergo à tempore quod à S. Thoma ad finem decimi quinti sæculi intercurrit, absque versatili probabilitate quæstiones morales, quæ multæ semper fuerunt incertæ, definierunt Patres nostri, constanterque docuerunt, nefas esse minùs probabilem, minusve tutam sententiam difficultatibus quotidie emergentibus sequi, sed oportere probabi-

ex tota illa , quam in aciem producit , caterva , multos illi eripere , quos si bi summâ confidentiâ arrogavit. Tum quia multi eorum intelligendos se dant de opinionibus , quæ licet vulgò existimentur minùs probabiles , revera tamen illis probabiliiores apparent ; quo sensu neutiquam Guimeno favent. Tum quia loquuntur de opinionibus illis , quæ utrinque pugnant pro lege , quales sunt Thomistarum , Scotistarumque sententiæ de innocente publicis tabulis convicto , quem illi damnari posse à iudice , isti non posse contestantur , non ex probabilitatis regula , sed ex gravissimis rationum momentis ex legum diversarum amore petitis ; quia Scotistas urget innocentia nequaquam punienda , Thomistas bonum publicum privati hominis iuribus anteponendum. Verùm in conspectu opinionum hinc pro lege , inde pro commodo pugnantium , vix ullus modernorum Thomistarum exerte docuit , utile vel delectabile esse honesto præferendum. Quia in schola nostra nihil versatili probabilitate periculosius iudicatur , sed ex solùm opiniones permittuntur , vel quæ adhærent legi , vel omnem adversæ sententiæ probabilitatem veritatis notiâ absorbent. Tum demùm , quia ut notat Sapientissimus Julius Mercorus 2. p. art. 21. Thomistæ illi loquuntur hypotheticè , id est , si minùs probabilis , minusque tuta , in concursu probabilioris & tutioris remaneat probabilis & tuta. Neque enim inter tutas vias necessariò tutior sequenda est ; sed à veritate , & à verorum Thomistarum sensu prorsus alienum est , minùs probabilem , minusque tutam opinionem per hoc præcisè reddi tutam , quod probabilis sit.

Sed quid opus est conjecturis , quando res ip-



sa loquitur? Cur adhibitis interpretamentis novos Thomistas vindicamus, qui suum adversus probabilitatis laxitates horrorem tam luculenter significarunt? Poterat (& sanè debebat) Guimenius Bartholomæi à Martyribus Theologiæ Moralis Summam, & totius Pastoralis regiminis castissimas regulas à viro Dei litteris consignatas in medium proferre. Poterat non authores ignotos, quorum obscura nomina vix audivimus, quorumve lucubrationes vix teruntur, nec potest eorum subinde mens explorari; sed celebres & orbi sub cœlo toti notos allegare. Poterat Joannem à S. Thoma referre, qui licet in speciem minùs probabiliter favere videatur, tamen tot cautionibus & conditionibus sententiam suam sepit, ut iis adhibitis minùs probabilis intra lineam & limites opinionis tutæ contineatur.

Ægrè ferrem authorem istum, unum è præcipuis Angelicæ Scholæ ornamentis à partibus modernorum laxonum stare, è quibus semetipsum ipse clarissimè eripuit. Siquidem *disput. 12. in 1.2.art.3.* docet in primis in Authoribus, quos consulere oportet, desiderari judicium rectum, & sanctitatem vitæ; quia moralia pendent à prudentia, prudentia verò à recta intentione, & cordis castimonia. Unde vult viros in album Sanctorum relatos esse præferendos, quia eos ut publica morum exemplaria proponit Ecclesia. Deplorat deinde modernorum Casuistarum laxitatem, aitque jam juxta Apostoli impletum vaticinium coacervari Magistros prurientes auribus, & acervi nomine multitudinem laxonum esse ab Apostolo figuratam. Tertiò in difficultatibus decidendis requirit seriam accuratæ



*alius quod peccaret, si sic faceret, tunc simplex foret perplexus: ideo bene videndum est in moralibus, antequam aliquid asseratur, quia videlicet cum habens duas opiniones contrarias perplexus sit, periculosè se determinaret ad unam, nisi re diligenter inspecta, illam probabiliorē agnosceret. Et in 4. dist. II. q. 6. Cum multis sit probabilior pars negativa, non sine peccato aliquis se exponit dubio, sequendo affirmativam minus probabilem. Plura alia adduci possent Scoti testimonia, variaeque loca argumentosa, quæ urget quidam recens Scotista anonymus egregio opusculo, quo & D. Francisci sanctitatem relipit & Doctoris subtilis eruditionem æquat, demonstratque opinandi licentiam non solum morum integritati repugnare, sed etiam lumen naturalis rationis extinguere. Quia in opinionibus contradictoriis negatio non solum removet affirmationem, sed etiam ipsam rem affirmatam; unde contrariæ opiniones possunt quidem esse in mente apprehendente, sed non in mente judicante; subindeque impossibile est, quod utraque pars judicetur vera, quod tamen requiritur ad licitum probabilis opinionis assensum. Egregiè etiam observat unum, quod ad versatilem probabilitatem de medio tollendam sufficeret, S. Thomam, Scotum, aliaque Scholæ lumina in quæstionibus de rebus moralibus variis argumentis verisimilibus utraque parte munita, nunquam adhibuisse responsionem recentioribus familiarem, quæ erât facillima, si eam tutam putassent; nimirum, liberum esse utriusque partis argumentis non destitutæ delectum. Ergo opinionum Probabilistarum licentia fuit antiquis omnibus suspecta, qui existimarunt utramque*

contradictionis partem non posse esse simul licitam, sed longâ opus esse disquisitione, ut cognoscamus quid tutò fieri possit, quid probabile prudenter sit, seu assensu, & usu probandum. Illud porò dolendum, plerosque Scotistas hac in controversia, sicut & in materia de efficacia divinæ voluntatis, à tam perspicuis Doctoris subtilis sensibus ultrò recedere, in quibus ei magis indivulsè debebant adhærescere.

Dces : Illis antiquis recentiorum turba ex omni statu suffecta est, ut refert quidam recens author quæstionis facti, enumerans Authores ex omnibus Ordinibus & familiis, qui minori probabilitati tutò sectandæ astipulati sunt : atqui Theologis hujus temporis pro controversiis hujus temporis fides adhibenda est, peritis enim in arte credendum est. Ergo nihil morari debemus antiquorum Theologorum sensum, sed tutò nos modernis Casuistis committere, quia quærent casus temporum Doctores temporum, ex quorum proinde placitis Catholici orbis mores conformare, emergentes nodos dissolvere, contractus componere necesse est.

Responleo in hac gravissima quæstione sequendos esse antiquos Theologos, posthabitis modernis, ut sæpè diximus, sæpè in sequentibus dicemus : quia concors veterum Theologorum sententia argumento est, dogma illud non esse recens natum, sed à majoribus traditione acceptum, communissimis, antiquissimisque regulis nixum, omnium Doctorum Catholicorum mentibus consignatum. Quia etiam amor novitatis, & nausea vetustatis ingentibus malis & periculis patent, atque suos alleclas in errorum abrupta & præcipitia transversos agunt. Et centè

quo jure prætendunt recentiores se à nobis reverentiùs haberi, quàm ipsi habeant antiquos? Quare agrè ferunt, nos ab ipsorum placitis dissecare, cum ipsi à D. Thoma, Scoto, totaque antiquitate veneranda dissentiant? An ignorant illas Magni Gregorii maximas: *Qui sua à successoribus desiderat mandata servari, decessoris sui statuta custodiat.* Quia justum est, ut qui seniores deserunt, à junioribus deferantur? Sine injuria quidem recentes legendos docebat Lampsidius, sed cum reverentia antiquos: nostrorum temporum ingenia non despiciebat Plinius, sed antiquorum animum, & placita mirabatur. Accedit antiquos antecellere recentibus numero, merito, concordia. Numero, quia ante 80. annos, quotquot de re morali scripserunt, probabilioribus & tutioribus adherendum sanxerunt: merito, quia S. Thomæ & Scoto quis audeat recentiores comparare, quis antepone? Concordia denuò, quia una voce, uno consensu omnes nostri asserunt, sequenda esse probabiliora, tutiora, & viciniore salutis. Probabilistarum verò non sunt convenientia testimonia, sed tot sunt sensus, tot dissidia, tot restrictiones, quot capita.

Quod verò additur, Probabilissimo plures ex omni statu, ordine, & familia adhæsisse, & in illud nuperum inventum Episcopos, Sacerdotes, & Religiosos omninò plures pedibus manibusque ivisse; id non obest, quia non negamus hanc novitatem hac ætate latè fusam; sed contendimus eam esse antiquitatis sacris regulis fortiùs & diligentius comprimendam, quo eam magis serpsisse videmus. Unde præcipitur Exodus 23. *Ne sequaris turbam ad faciendum malum.*

nec in iudicio plurimorum acquiesces sententia, ut à vero devies. Et christianè Philosophus Moralis lib. de vita beata, cap. 1. & epist. 7. *Nin tam benè cum rebus humanis agitur, ut meliora pluribus placeant. Argumentum pessimi turba est. Quæramus quid optimè factum isit, non quid usitatissimum: & quid nos in possessione felicitatis æterna constituat, non quid vulgò veritatis pessimo interpreti probatum sit. Sanabimur si modò sparemur à cœtu. Quid tibi præcipuè vitandum esse existimem, quaris? Turbam. Utique quò major est populus cui commiscemur, hoc periculi plus est. Sed quàm opportunè, quàm divinè Bernardus ad retundendam delicatam illam ex Episcopis, Sacerdotibus, & Religiosis objectionem hom. de Discip. euntibus in Emâis, expendens illud, Et quomodo summi Sacerdotes & Principes crucifixerunt eum, ait: Ponere vereor os meum in cœlum, ut non dicam in cœnum, & Saül ad purgationem ventris inclinatum occidere. Suffi it si oram chlamydis abscindam gladio Ieremia, cum Dominus dicat per Malachiam: Vos me configitis, gens scilicet tota. Ostendit Ieremias quomodo summi Sacerdotes & Principes eum crudeliùs crucifigunt. Ibo, inquit, ad Optimates, & loquar eis; ipsi enim cognoverant viam Domini, & iudicium Dei sui. Et ecce hi magis simul fregerunt jugum, ruperunt vincula, & à Propheta usque ad Sacerdotem omnes faciunt dolum. :: Hinc est non minima causa tristitia nobis; quia etiam litterati, & qui videntur Religiosi, comparantur jumentis, & immundiores facti sunt illis. Ipsi enim non solum spinis peccatorum suorum crucifigunt Deum, sed aliis facti sunt in proverbium & exemplum. Non esset doloris materia, nec res tam suspensa, si*

*plebs qua non novit legem, sola caderet in errorem; quia revelari posset per litteratorum & Religiosorum prudentiam, si ipsi non fuissent primi ad ruinam. ::: Sed de litteratis stupemus, & qui prætendunt habitum Religionis, qui bonum Dei verbum gustaverunt, & donum cœleste, virtutesque seculi venturi: & ecce vacca pinguis Samaria facti sunt, arbores autumnales eradicata, bis mortua, facti hostes in capite, qui docere debuerant viam vita.*

### *Solida Thomistarum vindicia.*

Sed statim contra expositam S. Thomæ mentem, & veluti sponte se offert hæc objectio: Thomistæ non pauci senserunt, litterisque consignarunt in concursu opinionum posse quemvis tutò sequi minùs probabilem. Cum ergo illi in verba D. Thomæ, sensusque juraverint, perperam contendimus obligationem eligendi sententiam tutiorem ac probabiliorem nobis esse à D. Thoma impositam. Estne, inquires, verisimile Thomistas contra Angelici Magistri mandata latissimam ad omne flagitiorum genus portam reſerasse? Hoc argumentum toto opusculo urget Amadeus Guimenius in Dominicanos Scriptores, quasi in primos authores omnium laxitatum invidiam derivans, quasi Schola Thomistica prima sit quæ Ethicam Christianam corruperit, morumque licentiam in Ecclesiam invexerit; subindeque non esse à nobis tanto-perè increpandos modernos laxones, qui in Dominicana familia nedum socios, sed etiam duces habent & Magistros. Hæ sunt Guimeniana calliditatis præſtigia, quas ut magis præcoloret,



Thomistas honorificentissimis verbis appellat, ut eos ad corruptissimarum suarum opinionum consensum pertrahat. Cum tamen his fucatorum encomiorum artibus plus laceſſiat, quàm si apertis sarcasmis Scholæ Angelicæ gloriam infuscaret.

Arbitrarer me degenerem, nec solum Prædicatoriæ familiæ, sed etiam veritatis proditorem, atque hujus de probabilitate quæstionis & causæ prævaricatorem, si non totus vocalis exurgerem ad tam infamem propulsandam calumniam, quæ dissimulata & nostro dedecori, & Ecclesiæ offensioni verteretur. Cerrè cum familiæ Dominicanæ, & Scholæ Thomisticæ concreditum sit, sicut gratiæ efficacis, & incorruptæ disciplinæ moralis tutela, velut solenne depositum, omnes genuinos Thomistas *ad hac mala avertenda*, ut verbis Tertulliani utar, *militēs esse oportet*. Seridè ergo nobis monstrandum est, S. Thomam doctrinæ suæ puritatem in veros suos discipulos transfudisse & corrivasse. Et quanvis non sit hic consilium nostrum texere responsionem singula quæque objecta evertentem, ne actum agam, & munus à Vincentio Baronio exiniè occupatum, accuratiusque impletum quàm à me tentari possit: nihilominus operæpretium est generale parare antidotum, quo & pestilentis operis veneno in his partibus Lugdunensibus sparso, & grassanti medeamur, & à tantis, quibus Angelica Schola abundat, viris tantam injuriam defendamus. Necessitas ergo Thomistas nostros à nefandorum criminum consortio vindicandi has à me adversus fraudulentum adversarium vindicias extorsit, cujus impetus eo periculosior est, quo blanditiis &



encomiis apparet favorabilior. Quia ut bene dixit Seneca : *Pessimum calumniantium genus, laudantium.* Et Venerabilis Beda lib. 4. in Luc. cap. 52. *Duos sunt genera persecutorum, unum palam sciuentium, alterum fide, fraudulenterque blandientium.*

In primis ad omnes adversarii calumnias falsitatis revincendas, hoc unum sufficeret argumentum, quod tanta laxitatum colluxies nullo veterum Thomistarum testimonio fulta sit, sed ab omnibus antiquis S. Thomæ discipulis expressè damnata. Siquidem minùs probabilis, minusque tutæ in conflictu probabilioris delictum rejicit expressè D. Antoninus 1. *part. tit. 3. cap. 10. §. 10. & 3. part. tract. 5. cap. 2. §. 9.* unde luculenter docet, illum qui agit contra dubium, non peccare, dum adheret opinioni alicujus Doctoris, & habet rationes probabiles pro ipsa magis quàm pro opposita opinione; unde clarè exigit ut probabiliorē existimet partem quam sequitur. Unde planè mirari subit quorundam incogitantiam vel fraudem, qui S. Antoninum sententiæ suæ astipulatorem afferunt 1. *part. citata*, cum eò loci contrarium planissimè doceat his, verbis *Potest aliquis tenere unam partem alicujus opinionis, & secundum eam operari, dummodò talis opinio non sit contra auctoritatem expressam sacra Scriptura, nec contra determinationem Ecclesia Catholica; & quando etiam ex contrarietate opinionum non inducatur ad dubitandum, sed bonam conscientiam & credulitatem formet de eo quod credit, tanquam probabiliori parte.* Quin immò partem probabiliorē iis S. Antoninus cautionibus sepit, ut semper probabilior eadem sit vera. Eam quippe exigit in librandis opinionibus

bus diligentiam, ut ad vitandos errores præcipiat, ut quis se ad gratiam præparet quantum potest, ut sapientiam invocet per rationem, ut Scripturas diligenter investiget, ut quærat eam quasi pecuniam, ut adhibeat diligentiam in inquirendo. Quibus adhibitis conditionibus, vix aut nunquam error obrepet. Quam Antonini sententiam tam religiosis conditionibus septam si ex animo suscipiat adversarius ac tota Probabilistarum cohors, cum illis perpetuam optatissimæ concordia pacem jurabo. Sed absit ut ab illis id sperem, quibus nihil usitatus, quàm ut ab Antonini sensibus, dum strictiores videntur, passim dissentiant.

SS. Thomæ & Antonino subscribunt celebriores Thomistæ, Cajetanus in *Sum. verbo Opinionis usus*, Sotus lib. 3. de *just. & jur. quæst. 6. art. 5.* Sylvester *verb. Opinio, quæst. 2.* Tabiena eodem verbo, num. 4. Quin ex Paulo Æmilio alicubi observat noster Vincentius Baronius, Dominicanos ab Instituti origine, ab Ordinis incunabulis ab opinionibus cupiditati ambitionique faventibus semper abhorruisse, ac protutarum sententiarum à lege stantium usque ad rerum suarum jacturam & sanguinem decertasse. Unde nullum ex antiquioribus Thomistis præsidium habet adversarius, sed omnes illos sibi adversos fateatur necesse est. Ergo à tempore quod à S. Thoma ad finem decimi quinti sæculi intercurrit, absque versatili probabilitate quæstiones morales, quæ multæ semper fuerunt incertæ, definierunt Patres nostri, constanterque docuerunt, nefas esse minùs probabilem, minusve tutam sententiam difficultatibus quotidie emergentibus sequi, sed oportere probabi-

lioribus & tutioribus adhærere. Nec mirum, quia hanc doctrinam à SS. Thoma & Raymundo in sua accuratissima Summa pro lege semper in dubiis stante hauserant; hanc à Patribus & traditione Aquinas & Raymundus acceperant: unde evaserat vulgaris Dominicani Ordinis sensus omnium Magistrorum nostrorum membris consignatus.

Quod si dicas D. Thomam, primosque Dominicanos nimis hac in parte ridigos à Patrum benignitate & sensibus descivisse: hæc responsio tam est improbabilis, quàm quod maxime. Quis enim credat decursu sæculorum, quo severitas laxari solet, adauctum fuisse à Dominicanis rigorem, impositumque conscientiiis jugum, quod nec tulerunt Patres eorum, nec portare valuerunt? Quis credat Scotum, qui omni data, & sæpe accepta occasione D. Thomæ asserta carpit, hanc nimiam S. Thomæ doctrinæ austeritatem prætermitturum fuisse, ejusque defectionem, ac doctrinæ moralis basis & cardinis mutationem à traditione deficientem dissimulaturum, nec restiturum? Et tamen suprà manifestis Scoti verbis demonstravimus, Doctorem subtilem hac in parte Angelico suffragari. Ergo velit nolit, veritate coactus fateatur Guimenius, fateantur novi recentisque Probabilistæ, firmissimam de probabiliori & tutiori opinione sequenda sententiam Ecclesiæ traditioni nixam per trecentos & amplius annos apud Thomistas fuisse indubitatam.

Sed dices: Ita est; probabilissimus antiquorum est Thomistarum præsidio desertus, sed nihil inde probabilitati decedit; quia tamen sit nudata ab antiquis, numeroso tamen est recen-

tiorum Thomistarum comitatu circumsepta. Ergo sine scrupulo ab antiquatis veterum Summularum sententiis recedere licet, & moderno adhærere Casuistarum recentiorum suprà senes intelligentium globo, atque turbæ illius recentiorum magnæ, quam dinumerare nemo potest, vestigia premere.

Hoc argumento fultus adversarius, impavidus in arenam pugnaturus descendit sibi securus victoriæ. Verùm enim verò ad plausus illos deijciendos multa suppetunt, quibus palam erit hac inani gloriatione adversarium nihil efficere, sed pulverem duntaxat imperitorum oculis offundere. In primis quid injustius quàm Thomistica scholæ sensum ex antiquioribus & fontibus vicinioribus Doctores nolle eruere? Quia, ut aliàs observavimus, nec iterare piget, illa sententia tanto gravior est ac verior habenda, quanto modernis Thomistis antiquiores auctoritate, ac Thomistici luminis abundantia antecellunt. In discernendis legitimis D. Thomæ sensibus eadem fermè regulæ servandæ sunt, quas ad Catholica dogmata dignoscenda præscribit Lirinensis: *Mos iste se per in Ecclesia vixit, ut quo quisque foret religiosior, eo promptius novellis opinionibus contraret.* Et iterum: *Nihil aliud ratio pietatis admittit, nisi ut omnia quæ fide à Patribus suscepta forent, eadem fide filiis consignarentur; nos, ne religionem, non quæ vellemus, ducimus; sed potius quæ illa duceret, sequi oportet.* Idque est proprium Christianæ modestiæ & gravitatis, non suæ posteris tradere, sed à majoribus accepta servare.

Deinde certum est, ab Adversario multis nostris Thomistis imponi, unde in promptu esset

ex tota illa , quam in aciem producit , caterva , multos illicripere , quos si bi summâ confidentiâ arrogavit. Tum quia multi eorum intelligendos se dant de opinionibus , quæ licet vulgò existimentur minùs probabiles , revera tamen illis probabiliiores apparent ; quo sensu neutiquam Guimenio favent. Tum quia loquuntur de opinionibus illis , quæ utrinque pugnant pro lege , quales sunt Thomistarum , Scotistarumque sententiæ de innocente publicis tabulis convicto , quem illi damnari posse à iudice , isti non posse contestantur , non ex probabilitatis regula , sed ex gravissimis rationum momentis ex legum diversarum amore petitis ; quia Scotistas urget innocentia nequaquam puniendâ , Thomistas bonum publicum privati hominis juribus anteponendum. Verùm in conspectu opinionum hinc pro lege , inde pro commodo pugnantium , vix ullus modernorum Thomistarum exercè docuit , utile vel delectabile esse honesto præferendum. Quia in schola nostra nihil versatili probabilitate periculosius judicatur , sed ex solùm opiniones permittuntur , vel quæ adhærent legi , vel omnem adversæ sententiæ probabilitatem veritatis notitiâ absorbent. Tum demùm , quia ut notat Sapientissimus Julius Mercorus 2. p. art. 21. Thomistæ illi loquuntur hypotheticè , id est , si minùs probabilis , minusque tuta , in concursu probabilioris & tutioris remaneat probabilis & tuta. Neque enim inter tutas vias necessariò tutior sequenda est ; sed à veritate , & à verorum Thomistarum sensu prorsus alienum est , minùs probabilem , minusque tutam opinionem per hoc præcisè reddi tutam , quod probabilis sit.

Sed quid opus est conjecturis , quando res ip-

sa loquitur? Cur adhibitis interpretamentis novos Thomistas vindicamus, qui suum adversus probabilitatis laxitates horrorem tam luculenter significarunt? Poterat (& sanè debebat) Guimenius Bartholomæi à Martyribus Theologiæ Moralis Summam, & totius Pastoralis regiminis castissimas regulas à viro Dei litteris consignatas in medium proferre. Poterat non auctores ignotos, quorum obscura nomina vix audivimus, quorumve lucubrationes vix teruntur, nec potest eorum subiinde mens explorari; sed celebres & orbi sub cælo toti notos allegare. Poterat Joannem à S. Thoma referre, qui licet in speciem minùs probabili favere videatur, tamen tot cautionibus & conditionibus sententiam suam sepit, ut iis adhibitis minùs probabilis intra lineam & limites opinionis tutæ contineatur.

Ægrè ferrem auctorem istum, unum è præcipuis Angelicæ Scholæ ornamentis à partibus modernorum laxonum stare, è quibus semetipsum ipse clarissimè eripuit. Siquidem *disput. 12. in 1.2. art. 3.* docet in primis in Authoribus, quos consulere oportet, desiderari judicium rectum, & sanctitatem vitæ; quia moralia pendent à prudentia, prudentia verò à recta intentione, & cordis castimonia. Unde vult viros in album Sanctorum relatos esse præferendos, quia eos ut publica morum exemplaria proponit Ecclesia. Deplorat deinde modernorum Casuistarum laxitatem, aitque jam juxta Apostoli impletum vaticinium coacervari Magistros prurientes auribus, & acervi nomine multitudinem laxonum esse ab Apostolo figuratam. Tertiò in difficultatibus decidendis requirit seriam accuratæ



attentionis gravitatem, judicii maturitatem, diuturnam veritatis ponderationem, ne celeritate vel evanescat, vel opprimatur; jugem legis meditationem, de qua si constet, & sit dubium de causa exceptionis, potius lex possidet, & exceptio non est facienda (quibus solis verbis reprimitur modernorum licentia.) Quia, inquit, exceptio est sicut vulnus legis, & lex semel statuta est in possessione præcipiendi. Additque legem esse interpretandam juxta consuetudinem Ecclesiæ, quæ est in omnibus æmulanda, & præferenda omnibus rationibus quâmlibet probabilibus, & apparentibus. Quotò præcipit, in contractibus quâmlibet disputativè probabilibus, inspicienda esse non perfunctoriè, sed seriò damna quæ sequuntur, vel imminetia. Quia, inquit, nihil jam invenitur tam usurarium, quod non possit ratione præcensi lucri cessantis, aut damni emergentis, aut asecurationis danda justificari. Unde factum est quod sepe omnes in pecunia & negotiatione plus confidunt, quàm in labore, & fructibus terrarum. & omnia repellantur fraudibus, negotiationibus, otiositate. Quotò non solùm exigit in auctoribus scientiæ supellectilem, prudentiam eximiam, & pietatem non mediocrem; sed etiam vult modernis anteponendos esse antiquos, quos multi temporis comprobatio, vitæ sanctionia, & Ecclesiæ Romanæ commendatio efficit reverendos. Quia, ut dicitur Job 12. *In antiquis est sapientia, & in multo tempore prudentia.* Et Eccl. 3. *Non te prætereant narratio seniorum, ipsi enim in didicerunt à Patribus suis.* Porro fugiendos monet esse illos Doctores auribus prurientes, placentia loquentes, quorum multitudo suspecta, & auctoritas nihilo melior est. Nam etiam inventi

sunt quadringenti Prophetæ, qui Achab & Josaphat felicem belli eventum prænunciabant, & tamen à spiritu nequam decipiebantur, ut dicitur 3. Regum 22. Quod repetit & inculcat art. 6. num. 66. Quid ad hæc Guimenius? Quid tota laxorum natio? Certè si his minorem probabilitatem munirent præfidiis, illi possent asserere securitatem; quia ut antè monuimus, sufficit eligere tutam, nec tutior in concursu verè tutæ est necessariò eligenda.

Fatemur quidem, nec negare possumus, è recentioribus Thomistis nonnullos nimium sibi, aut Probabilistarum certè vulgo indulgentes minori probabilitati fuisse; sed illud etiam constans est, effrenem opinandi licentiam fuisse ab iisdem variis exceptionibus correctam, ut videre est in Ildephonso monente præferendam esse semper probabiliorem, si sequatur ex minùs probabili aliquod incommodum, vel damnum ex charitate, vel justitia vitandum. Ipse etiam Gregorius Martines, qui magis videtur habenas probabilitatis laxare, non indulget delectum opinionis speculativè probabilis, nisi practicè probabilis & tuta sit, id est careat omni periculo peccati. Cæterùm de Scholæ Anglicæ & Dominicanæ Ordinis sensu non est ferendum judicium ex singularibus privatorum hominum sententiis, sed ex D. Thoma, & rigidioribus, & antiquioribus Thomistis. Nam hîc præsertim valet aureum Melchioris Cani lib. 11. de loc. cap. 6. monitum: *Theologum admoneri operæpretium est, ne id illi statim persuasum sit, omnia quæ magni Aucthores scripserunt, undique esse perfectæ: nam & labuntur aliquando, ut ille ait, & oneri cedunt, & indulgent ingeniorum suorum voluptati, vulgo*

*que, ut dixi, etiam interdum indulgent; nec semper intendunt animum, & nonnunquam fatigantur. Summi enim sunt, homines tamen. Sed de his postea.*

Ad illos etiam paucos excusandos non parum facit, quod magna illis profectò tentatio fuit, dum tot & tantos viderunt viros Probabilissimi assertores, quos multis præjudiciis egregios veritatis Doctores esse arbitrabantur, & aliunde summa veneratione, & sincero amore complectebantur. Non poterant citò apprehendere, vel facilè damnare tot Doctorum Christianorum iudicia, tametsi non multùm Christiana. Quis enim eos apertè errare citò crederet, quos tanto studio Magnates, tanto favore populi, tanto amore firmè omnes prosequerentur? Quis non censeret recta docere, recta scribere, recta sentire illos, qui uni suæ de vaga probabilitate sententiæ aditum patefecerant cunctarum hæreseon & dogmaticarum blasphemiarum infectatione?

Fateor è Probabilistis multos profectibus suis & industria non parvæ tentationi Thomistis quibusdam extitisse. Fateor pleròque & ingenii viribus valentes, & doctrinæ opibus excellentes, & eloquio præpotentes, & bonâ intentione excusandos esse. Fateor nonnullos eorum acumine, exercitatione, & doctrinâ multas hæreses multis voluminibus oppressisse, inimicorum fidei confutasse errores, atque furiosas Calvinistarum, Lutheranorumque adversùs Catholicam Ecclesiam calumnias confudisse, præclarisque operibus suis summis ædicatoribus Ecclesiæ partem esse potuisse, nisi prophana laxitate novum quid invenissent, quo & cunctos

labores suos, velut cujusdam lepræ admixtione fœdantur, & peccantes in uno fortassis facti sunt omnium rei. Unde præclara eorum doctrina in cæteris jure commendanda, hac in parte non tam ædificatio, quàm tentatio facta est. Tentatio enim populi est error Magistri; & tanto major tentatio est, quanto doctior is qui tentamur. Sed necessaria fuit illa tentatio, ut probati manifesti fierent, nimirum ut appareret unusquisque quàm tenax, quàm fidelis, quàm fixus Catholicæ puritatis esset amator.

Sed ut ad plenam, cumulatamque Dominicanæ Ordinis gloriam, & de Guimenio victoriam nihil desideres, Lector, id unum scias Dominicanæ familiæ honorificum, & tibi necessarium. Vix obrepentes probabilitatis corruptelas piorum concertationibus & doloribus conspicuæ factæ sunt, vix tam nefanda consuetudines, quæ incuriâ, & quasi somno adoleverant, resectæ sunt, vix veritas disputatione & zelo limata est; statim plerique Thomistæ in probabilismum, quasi erecto vexillo, impavidi invaserunt, justisque illum voluminibus adorti sunt. Permissit quidem divina providentia paucos ex nostris veluti dormitantes in doctrina morum cespitare, & torrente Probabilistarum in præceptis abreptos, eorum principiis quasi certis & indubitatis usos esse. Sed quamprimum pestiferorum dogmatum latens venenum ipsis veluti expergefæctis apparuit, vix in eorum oculos antea tantisper gravatos lûbes morum incurrerunt, subito non solum hæc flagitia nemo defendit, sed multorum in illa indignatio verbis scriptisque exarsit: dumque probabilitatum novitas ebullit, statim visa est frumentorum gravitas.



& levitas palarum, & sine magno volumine Thomisticâ ab arca excussum est, quod nullo pondere intra aream Thomisticam tenebatur.

Hinc Religio nostra innato zelo gliscentem hanc luem pro virili rescindere avens, unanimem Ordinis sensum in comitiis generalibus è toto terrarum orbe Romæ anno 1656. coactis hac ordinatione significavit: *Caveant ab omni pruritu exoticarum, minúsque cum littera S. Thomæ coherentium opinionum; præcipuè verò in moralibus, ubi pressius de salute ac indemnitate animarum agitur. Porro in his studeant omni cautela evitare opiniones laxas, novas, ac parum tutas, abstinereque à paradoxis ac monstris recentium placitorum, seu problematum, quæ magis vanitati, ac periculosa ostentationi militent, quàm veritati. Denique satagant non tantùm fidelissimè in omnibus adhærescere: sana doctrina Angelici nostri Præceptoris, quam ille ex limpidis ac incorruptis SS. Patrum fontibus integerrimè in alveos suorum operum corripavit: verum etiam assuescere propria ipsius phrasi & modo loquendi, ita quod quantum fieri potest, ne quidem ab ipso verborum ejus ordine, stylo, & emphasi longius discedatur, ut sic evitentur. Quia nimirum Sapientissimi Patres, veritatis & catholicæ puritatis amantes, & Angelicæ D. Thomæ severitati nihil præponentes, quorumdam etiam Filiorum suorum auctoritatem vel ingenium parvifacientes, in fide fixi & stabiles permanentes, avitæque doctrinæ tenaces; quidquid antiquos Thomistas cum Angelico Magistro & Ecclesiâ tenuisse cognoverunt, id solum sibi & filiis tenendum, credendumque decreverunt: quidquid verò ab aliquo deinceps uno præter omnes, vel contra omnes novum & inau-*

ditum subinduci senserunt, id non ad religionem, sed ad tentationem pertinere intellexerunt.

His præceptis salutaribus moniti, & proprio zelo accensi Dominicani, novitatem subodorati, veluti Dominicane allatrare cœperunt, & decretorum Pontificiorum munimine septi, & Summi Pastoris Romani Antistitis id Ordini mandantis voce provocati, laxones etiam suos non minus quàm lupos caulas dominici gregis infestantes fugere Theologos docuerunt; laboranti & novarum opinionum licentiâ deformatæ disciplinæ subvenerunt; Probabilistarum argutias argutè & juxta solidè refellerunt; & sicut olim efficacis gratiæ in discrimen vocatæ tot strenuos patronos, tot invictos victricis auxilii defensores instruxit, & etiamnum instruit: ita nunc everse morum doctrinæ fortes itidem belatores è sinu suo excitavit.

Et ut totius Ordinis sacra conspiratio eniteret; omnisque depelleretur simultatis suspicio, è diversis Catholici orbis Provinciis nullo inter se inito consilio in Probabilismum insurrexerunt, & totis viribus, uno Christianæ sanctitatis amore, uno Angelicæ Ethicæ zelo, licet diverso stylo & impetu impugnaverunt. Quia nimirum lydiū D. Thomæ doctrinæ lapidem admoveantes, multitudinem novitiorum Doctorum despexerunt, & toti illi Probabilistarum nationi unum D. Thomam Patrum Discipulum & vocem, divinæ voluntatis interpretem, æternæ legis vindicem ab Ecclesiæ Capitibus probatum opposuerunt, cujus doctrinâ veluti gladio à Deo proviso omnes novitates ab ejus decessu irreperentes semper truncatæ; semper truncandæ sunt.

Hispania in primis avitæ & domesticæ tradi-



tionis tenax, jam dudum vagæ probabilitatis periculofam licentiam perfensit & infectata est, ut videre est in Epistola Bartholomæi Carranzæ Summæ Conciliorum præfixa, ubi sic ait: *In tantis Ecclesia procellis & vita malis subiit animum relegere majorum nostrorum acta in Conciliis antiquioribus. Et pudit me, ut ingenuè fatear, nostrorum morum. En à quanto culmine decidimus! En segnitiam & oscitantiam nostram! En gentem à Christo & redemptam, & factam rerum Dominam! Vbi ille charitatis ardor? Denique nihil ferè convenit præfenti rerum statui, si quis attentius conferat cum illo quem cernere licet in scripturis Conciliorum.* Novissimè verò præter Tapiam ad insulas Hispalenses assumptum, opinione sanctitatis nuper vitâ functum; præter Martinem de Prado Castellanzæ Provinciæ Provincialem, quorum librorum penuriâ jam laboro, aluit insuper Ildephonsus à S. Thoma, filium naturalem Regis Hispaniarum, insignem profectò virum, in quo egregiæ dotes, natalium splendor, judicii acerrimi præstantia, doctrinæ supellex eximia, & incomparabilis omnigenæ pietatis, ac totius sanctimoniz decor, denique virtutum omnium beatissima copia collucent. Ob quem multiplicis ornamenti concentum omniibus Provinciæ suæ sanctus muneribus, tandem rejecto Episcopatu Placentino annuis quinque millium nummorum redditibus opulento, Civitatem Malaga, utpote pauperiorem prætulit, & in ea regenda Ecclesia eundem, quem in Ordine bonum Christi odorem efflaverat, longius latiùsque Episcopus effudit. Ille ergo varias Probabilistarum corruptelas exposuit, & elisit. Et quanvis in nonnullis ejus scriptis ea non probem, quæ Sacræ Inquisitioni

displicuerunt; hinc tamen quod intendo elicio, nimirum laxorum corruptelas Hispanis Dominicanis displicuisse; licet fortassis flagitiorum atrocitate permoti personas aliquas læserint, quorum solas persequi exerrationes fuisset & moderatius, & utilius. Si enim Apostolus *Philip. 2. 18.* viros, eosque quamplures luxui ac voluptatibus deditos innominatos damnat, ne personas læsere videatur, sed vitia, eosque modestiæ armis fractos revocaret, quos indigitatis nominibus poterat exacerbare: *Multi enim, inquit, ambulant, quos sæpe dicebam vobis, nunc autem & flens dico inimicos crucis Christi;* &c. sic juxta Sacræ Inquisitionis mentem satius fuisset insectari vitia, non homines; non ferire errantes sibi minimè subditos, sed emendare. Sic Christus divitis epulonis à se objurgandi nomen suppressit, quantumvis vir ille crudelis in inferno jam sepultus esset, ut ejus consuleret honori, cujus vitia detestabatur. Si enim Patres, etiam cum apertis hæreticis agentes verant efferrari, & verbis amarulentis occulta dedecoris aperire, tutius (ni fallor) est, non dissimilem habere agendi rationem, cum Catholicorum & Religiosorum, si qui sint, excessus propalantur. Patietur Princeps Serenissimus hanc meam humilem suggestionem, ut omnibus clareat, Discipulos D. Thomæ nihil posse adversum veritatem, sed pro veritate. Id tamen constans est, virum optimum & inclytum scriptorum suorum vehementiâ non tam in authores animi malignitatem, quàm vitiorum odium concitare voluisse; nec flagitiorum horrorem in personas transfuisse, sed cum animi habitum induisse, quem his verbis præcipit Augustinus: *Diligite homines, inter-*

*ficite errores: sine superbia de veritate presumite; sine savitia pro veritate certate: orate pro eis quos redarguitis atque convincitis.* Italia quoque, unde Theologi Thomistæ clarissimi, Cajetanus, Ferrariensis, aliique sexcenti prodierunt, è sinu suo protulit R. P. Julium Mercorum ad totius Reipublicæ Christianæ bonum, ad singulare Dominicanæ Oedinis decus natum, qui summa perspicuitate, majori pondere, & modestia ubique eminente, quæstionem intricatissimam libro, cui titulus est, *Basis Theologia moralis*, à primis principiis altè reperit, & per omnes partes egregia dispositione, subtilitate, & soliditate deducit. Principium probabilitatis versatilis, quâ minùs probabilis, minusve tutæ opinionis eligendæ venia datur, omni argumentorum genere convellit, atque ex opinandi licentia justis legibus non cohibita, innumera fluxille doctrinæ flagitia, majoraque in dies fluxura demonstrat. *Sentiet Christiana Respublica* ( inquit Hieronymus Placentia Societatis JESU, in Academia Parmensi Theologiæ Professor, in censura operis Mercoriani, ) *plurimum se lucubrationibus hisce debere, quòd dum ex lege opinandi licentiam multiplici solidarum rationum vallo coercet, avirta morum integritati aureas moliantur compedes, in protectionem fortitudinis, & bases virtutis.*

Ante Julium Mercorum novellæ probabilitatis pericula vidit & elusit Dominicus Gravina antiquitatis callentissimus, pietate etiam & doctrina spectabilis; sic enim lib. 4. sui *Cherubim Paradisi*, pag. m. 325. ait: *Hoc ponderandum diligenter, an provabilia doceant* ( Moderni. ) *Quòd maxime in moralibus cavendum est: Nam multoties ad unum dictum, vel paucorum erigitur*

aliqua opinio ut probabilis, quæ tamen est contra communem sensum; unde fit ut relictis veteribus Magistris, plebs imperita novos sequatur, & laxentur virtutum habena, & ad vitia scotanda augeatur inclinatio hominum ad latam viam tendentium. :: Absque dubio eliminandi sunt illi, qui delicias & pompas assumunt, & novitates singulares, quas nesciunt Patres eorum: similiter qui incerta inducunt, & non examinata, neque probata; & nulla certitudo moralis est, ut sub opinionis calculo tandem censeatur, & ut indiscussa accipiatur, & inexaminata, reclamante sapientum & plurimorum Doctorum choro.

Ratio autem naturalis dicitur, ne certa præponatur incertis, & communiter recepta sententia non postponatur nova, & non discussa, nec trita sententia: sed semper innitendum regula infallibili, & certa moraliter, maximè ubi periculum imminet. Nam ex defectu inconsiderationis & indiscussionis sunt qui putant ad sequelam cujuscunque opinionis salvari se posse in conscientia, qui tamen tuti non sunt (ex quodl. 13. art. 10.) & ad inferos tendunt. Et in his dicebat Basil. ad 5. cap. Isai. Non solum ad scientiam, rerumque notionem isthac turbela pervenit, sed usque ad opera: siquidem sunt via viri quæ videntur rectæ esse, novissima autem earum respiciunt ad profundum inferni.

Maximè autem cavendæ sunt opiniones, quæ gloriam, vel venerem, vel prudentiam humanam, seu pseudopoliticam fovent, & injustitiam: hæc enim sunt velut styx Phlegeton, velut amnes infesti, in quos demerguntur homines, & quarunt excusationes in vitiis & peccatis, & nollent hæc esse peccata, vel dimittunt eorum culpam, vel gravitatem sub specie probabilitatis, verisimili, non vera ratione;

*sed apparenti, vel ut turpitudine vetetur. ... Quæ dogmata nunc sunt in praxi apud hæreticos nostri temporis, & apud malos Christianos in opere vigent. Et quantum ad nonnullos Scriptores, sunt in eadem salebra, qui sub specie opinionis probabilis venditarunt multa, quæ abſtinentiam & jejunia peſſundant, pudicitiam emolliunt, prudentiam hujus ſæculi extollunt, & juſtitiam tam diſtributivam, quàm commutativam pervertunt.*

Pro certo ſtatuant qui varias ſemitas opinio-  
num iſtarum probabilium inducunt, vel varia  
itinera aperiunt innovandæ veritatis, & ſpeciem  
bonorum apparentium oſtendunt, quod non  
viæ dicendæ ſunt, ſed diverticula & ſemite, quæ  
nequaquam tandem ad unum exitum terminan-  
tur. Vinam iſtitueretur, quod ſicut in foro con-  
tentioſo recipiuntur communiter recepta ſententia,  
ita & in foro pœnitentiaſi idem ſtatuereſur, decre-  
tis proviſiſque præſcribendo has, non illas recipien-  
das. Quàm benè eſſet id conſultum Eccleſia! Brevi  
tempore reformaretur mundus, qui ex licentia opi-  
nandi in præceps ruit, latiffimam viam ingredien-  
do quæ ducit ad perditionem.

Sed nulli Catholici orbis Provinciæ Gallia  
noſtra palmam concedit. Nam præter Olive-  
rium, Richecœur & Petrum Louverum Doctores  
Parieſes, qui juiſu Vicariorum Generalium  
Parieſis diœceſos Probabiliſſimi fontem & rivos  
in Apologia Caſuiſtarum unà cum aliis ſex de-  
ſignatis Theologis proſcripſerunt, plures alii in  
eaſdem laxitatis evagationes verbo, ſcriptis, con-  
cionibus exarſerunt. Sed quod ſine cujuſquam  
invidia dictum velim, cæteris omnibus vaſtiſſimi  
Ordinis Provinciis zeli laudem præripuit noſtra  
Toloſana, quæ ſicut eſt antiquitate prima, ita

strictioris observantiæ tenacitate, & eruditionis fama nulli secunda. Unde sicut olim adversus acerrimos D. Thomæ impugnatores Joannem Capreolum Tolosanum, Thomistarum Principem in aciem protulit, qui de S. Doctoris hostibus gloriosissimum triumphum primus reportavit: ita etiam laxatæ morum disciplinæ impavidos aggressores instruxit vagam probabilitatem, ab eaque sine modo manantes corruptelas impugnatu-  
ros. Quia nimirum sicut Tolosæ Ordinis sui fundamenta jecit B. Pater Dominicus, ita primitivum observantiæ regularis, & incorruptum de moribus sensum veris Dominicanis altè impressum S. Parens consignavit. Et profectò non deceret Provinciam Tolosanam virginei S. Thomæ corporis Tolosæ quiescentis depositricem à virginali ejusdem Angelici Doctoris Ethica vel latum unguem recedere.

His de causis Petrus Labat Academiæ Tolosanae Doctor Regens, vir in Scholastico pulvere non mediocriter exercitatus, stylo familiari, semotis adventitiis orationis splendoribus, breviter, & solidè, non sine pietatis, quæ in tota vitæ serie elucebat, instinctu minùs probabilis sententiæ in concursu probabilioris delectum primis è nostris refutavit. Ejus libro suppedaneæ fuerunt longè præstantiores Joannis Baptistæ Gonet lucubrationes, quibus Probabilissimum, nedum humanis rationibus, quem lepidè *artem cum Deo cavillandi* appellat, sed etiam raris Patrum locis, ac eximiis observationibus ad-  
oritur. Nec contentus est venenatum fontem indigitare, sed innumera probabilitatum monstra, quæ nihil in moribus integrum relique-  
runt, lato calamo subjecit lectorum oca-



lis, & eorum ciet horrorem. Sed omnibus, qui in Probabilistas prodierunt, Ordinis nostri libris Vincentii Baronii lucubrationes antecellunt. Romæ aderam cùm ejus libri in discrimen vocati sunt, naufragium sine dubio passuri, nisi veritas, pro qua certarat, ipsa pro illo pugnasset, ipsa vicisset, ipsa ab Adversariis potentissimis veluti reciproco officio liberasset. Et quanvis non minùs sapientiâ quàm purpurâ Eminentiissimi Congregationis Indicis Patres voluerint amarulenta quædam verba erasa, ut præclara illa opera nedum doctrinæ D. Thomæ profunditatem, sed & Angelicam modestiam ubique spirarent, tamen ob causæ ipsius æquitatem & susceptam divinæ legis defensionem, asperiori defensionis modo condonarunt, Authoremque humanissimè monuerunt, ut si novam editionem adornaret, verba amarorem resipientia rescicaret, quibus sublatis liber undique perfectus in publicum prodiret, n'ihilque haberet quod ullam ulli posset offensionem ingenerare. Ille verò pro sua summa in Romana Tribunalia observantia in novis suæ Théologiæ Moralis editionibus quæcumque asperius dicta visa fuerant submovit, quanvis non tam necessitas defensionis, quàm horror vitiorum verba illa aliquam convitiû speciem præferentia à Baronio invito, aliàs totò in urbanitatem composito, & in aliorum laudes sæpe effuso, extorsisset.

Itaque Vincentius Baronius non perfunctoriè vel timidè in refellenda probabilitate versatur sed secum radici admovent, dum è propria mente loquitur, doctrinam quodlibetorum S. Thomæ in naturali sensu intelligit, prout à nobis suprà exposita est. Et quanvis in gratiam

quorundam Thomistarum verba D. Thomæ mollientium, videatur ipse aliquid de sua severitate remittere, ut ( quæ summa ejus humanitas est ) Mercorum, aliosque probabiliore sectandæ sententiæ authores, optimos illos quidem, sed in quæstione de ignorantia juris naturalis nonnihil fuliginis è Probabilistis trahentes, & à genuina littera S. Thomæ recedentes defendat; nihilominus tamen dum sua sensu prodit, nullam dari juris naturalis ignorantiam, vel esse unum de rarò, & vix unquam contingentibus, affirmat: & doctrinam articuli 13. quodl. 8. in toto suo splendore propugnat; sic enim habet in nova editione alterius partis Theologiæ Moralis: *Agnosceis quàm iniquè Domini anorum nomen advo-  
cetur in patrocinium laxissimarum contra legem  
opinionum, cùm à S. Doctore, in cujus verba j-  
rant, hoc dogma inconcussum habeant, quod gignit  
contra legem, semper esse malum, nec excusari per  
hoc quod sit secundùm conscientiam quacunque  
probabilitate munitam, qua in certitudinem mo-  
ralem nunquam sit evasura, quandiu reclamabunt  
Doctores graves, & contra stabunt rationum mo-  
menta. Et pagina 21. illud inter res facti & juris  
statuit discrimen: Quod res facti omnes scire, sit  
supra vires nostras & præter officium, ac proinde  
ignorari possint citra culpam: secus sit de rebus ju-  
ris naturalis; nam cùm paucissimis principiis con-  
tineantur in scripta sunt cordibus hominum, & fere  
omnibus obvia, unde quidquid ex illius ignorantia  
sit perperam, vix excusatur à peccato, quod statuit  
S. Doctor loco cit. Et prolatis quibusdam D. Tho-  
mæ verbis, sic pergit: Poteratne apertius vali-  
diusque his locis damnare quasvisque opiniones  
probabiles falsas contra legem, quàm constituit illo*

*discrimine inter ignorantiam rerum facti & juris, quòd illa interdum, ista nunquam excuset à peccato, quandiu est rerum, quas scire possis & debeas?* Quibus verbis totam vagæ probabilitatis doctrinam ab imis fundamentis subruit, hoc dogmate à D. Thoma stabilito, ignorantiam juris naturalis nunquam excusare, quia nunquam invincibilis est: & quod contra legem æternam voluntariè fit, semper esse peccatum, etiamsi sit secundùm conscientiam.

Quin & argumentum, quo P. Gonet probare conatur, probabile falsum nonnunquam à peccato excusare, quia sæpe contingit probabiliorē & probabilissimam sententiam esse falsam; & tamen absurdum est nos eam non posse deligere; hoc, inquam argumentum *cap. precedenti* à nobis confutatum, validissimè etiam refellit Vincentius Baronius priore Moralis parte, *pag. mihi 24.* Quia quædam opiniones majorem habent cum sibi contraria similitudinem veri, & sunt speculativè probabilissimæ, quæ tamen citra peccatum usurpari & revocari ad actum nequeunt; nam forma Baptismatis *in nomine Genitoris, geniti, & ab utroque procedentis*, probabilissima est, cujus tamen usum omnes peccati mortalis damnant. Item venatoris homicidium nemo excusat, quamvis ingredienti sylvam occurrerit aliquid ambiguum, quod probabilius speciem fære quàm hominis ferebat, si minùs probabili, sed magis tutâ desertâ, hominem interfecerit. Rursum Judex non potest reum damnare ob probabiliores conjecturas suspectam, si suppetant probabiles innocentie conjecturæ; quia tunc minùs probabilis est magis tuta, cùm reus non debeat pœnas dare criminis.

cujus non sit probationibus sole meridiano clarioribus convictus. *His exemplis, inquit, demonstratum est, nihil repugnare opinionem probabilissimam speculativè, prorsus improbabilem esse ad praxim.* Unde toto §. sequenti infert, & sæpius inculcat, toto genere & cœlo differre opinionem probabilem & tutam, postponendamque esse semper opinionem quæ stat pro utili contra honestum, nisi *evidenti ac certa ratione scias*, addit pag. 28. *nihil tibi, ab illis posse periculi accersere* : & quoties de salute, de sectanda honestate, de peccato mortali fugiendo agitur, illi *adhaerendum sententia, cui nulla peccati aut periculi salutis subsit dubitatio, qualis est quacumque opinio favet religioni; aq̃uitati, legi naturali, seu certò & evidenter, seu probabiliter; illi verò obnoxia, quacumque adversatur legi sententia, & favet commodo, ac libertati.* Et concludit, nihil suis regulis impossibile, nihil difficile præcipere. *Quid ergo, inquit eleganter, nec minùs piè, impossibilia causantur Adversarii nos præscribere Christianis, quos suorum laborum aterna merces, aut peccatorum aterna damnatio manet? Quibus spe unius, & metu alterius etiam impossibilia tenenda essent omninò; cum ipse Epicurus nulla discipulis præscribat longè severiora, quàm Theologi probabilitatum patroni & cutores? Quibus immaculatis documentis, aliisque pietate plenissimis nihil suam à nostra, nisi fortè verbo tenus, discrepare sententiam clarissimè significavit.*

Aliud etiam ejusdem P. Goneri argumentum, quo inferre vult, ex nostra sententia sequi perplexitatem, imò & peccandi inevitabilem necessitatem, imò plerumque esse fortunæ & non voluntatis, quod homines peccent, quod supe-

rio. i capite ex D. Thoma sibi pluries illud proponente diluimus, fortiter etiam refellit Pater Baronius, quia illud sophisma haberet aliquam verisimilitudinem, si tunc non esset ad manum opinio tuta pro lege & officio stans: at semper in conflictu opinionum una stat pro lege & salute, altera pro commodo & libertate: *Et hoc discrimen*, inquit, *norunt stupidissimi & pueri, quia a iustas per se lucet, nec pueros etiam latet, quos pudet obscœna loqui, aut turpia agere; & ideo dum hæc meditantur, tenebras quarunt, hominumque gravium fugiunt conspectum.* Ergo nec ad casum, nec ad angustias redigimus operantes, cum præscribimus tuta semper, & probabiliora sectanda. Non est etiam perplexitas, vel casus, quando utraque sententia pro officio pugnat; quia tunc majus minori, probabilius minus probabili, moderante christianâ prudentiâ circumstantias appendente anteponendum est. Quod si officia sint hinc inde paria, quod rarò, vel nunquam contingere patiuntur circumstantiæ individuae, tunc faciliè permittitur arbitrarius delectus, si non amore utilitatis aut voluptatis, sed studio honestatis fiat optio.

Sed Dices: Julius Mercorus, & Baptista Gonet suprà infra meritum laudati, in suis adversus Probabilistas dissertationibus supponunt dari posse ignorantiam invincibilem juris naturalis, eandemque à peccato excusare non solum imperitos, sed etiam doctos circa conclusiones, quæ non nisi discursu deducuntur, quando præcepta naturalia considerantur ut vestita aliquâ circumstantiâ & conditione, vel quando inter Theologos dubitatur, num aliquid jure naturali, vel tantum positivo prohibeatur? Ergo isti Autho-

res recidunt in Probabilissimum, quem condemnant; nam de sententia minùs probabili dubitant Theologi moderni, an sit contra jus naturale, cum id habitâ terminorum notitiâ non constet: contendunt etiam Probabilistæ, suam de minùs probabili tutò sequenda sententia, sibi esse probabiliorē: Ergo quod una manu ædificant isti Thomistæ; altera destruunt, nec sunt à castigatæ Moralis laude celebrandi.

Respondeo quod licet hi Authores virulentum illum Probabilistæ fœcis fontem dissimularint, vel etiam permiserint; tamen quia in aliis Probabilistarum corruptelis insequendis eximii sunt, non sunt debita laude fraudandi. Quantum verò ab ingenio Probabilistarum ipsi abhorreant, facile conjicies, si quæ suprà ostendimus summam recolamus.

Licet daremus posse admitti invincibilem juris naturalis ignorantiam, non propterea causam obtinebunt suam Probabilistæ, quia non caret cognitione, nec laborat ignorantia, qui minùs probabili adhærescit. Est enim quod ubi nulla subit peccati suspicio, admissa in legem opera ascribi possint ignorantia invincibili; tamen quicumque varias de aliquo capite Doctorum sententias cognoverit, profectò cognitione non caret, nec ignorantia invincibili laborare dicendus est; cum illi affulgeat sententia quæ sibi ob rationum momenta probabilior, & ob periculi remotionem tutior est, atque secuior.

Verum quidem est, quod si ex sententia quæ mihi certa est, nulla possit dari juris naturalis invincibilis ignorantia, apertâ & necessaria consequentione deducitur in controversiis, in dubiis,



in probabilibusque sententiis nunquam licere à lege discedere, tutiori ac probabiliore parte prætermissa, minùs tutæ, minusve probabili adherere, subindeque probabilissimum usque ad internecionem ea assertionem profligari. Sed tamen ( ut rectè observavit Vincentius Baronius unum è præcipuis Probabilistarum flagellis ) sententia de opinione probabiliore, tutioreque eligenda, non illi soli principio innititur, præsertim in concursu, & ut ita dicam, conflictu utriusque sententiæ operanti notæ; tunc enim nulla obrendi potest ignorantia, siquidem spectâ tutiore, & sibi probabiliore, minùs probabilem, minusve tutam operans de industria sequitur, etiamsi stet pro libertate contra legem, pro voluptate contra officium, pro commodo contra honestum verisimilioribus argumentis communitum.

Esto quod puer duodennis excusetur à labe mendaciæ, quod sibi licitum ad servandam oppugnati patris vitam arbitratur: demus actum fornicationis à Mahometano majorum auctoritate & exemplo, proprioque errore perpetratum condonari. Hoc verò quis divinæ legis amantium, nisi ægerrimè ferre potest, opera quæ fieri contra legem naturalem non solùm suspicio conjectat, non solùm dubitatio timet, sed etiam probabilior opinio fert, tenuissimæ probabilitatis etiam errantis allito colore veluti iustitiâ imputativâ regi, justificari, imò & meritoria esse, si probabili dictamine bona esse videantur? Quis credat ignorantiam, quæ comparitur dubium & opinionem probabiliorem partis adversæ stantis pro lege & æquitate, vim habere veritatis, loco esse baptismatis, fidei, charitatis,

charitatis, & innocentia, ut ejus non minus quam istorum beneficio salvus fias, & rectè ad cœlum tendas? Permittamus recentiorum tenacitati & vociferationibus aliquam constandam nostræ sententiæ de probabilioribus semper sectandis invidiam, si inde solum argumenta assumerent ad confirmandam de tutiori opinione eligenda assertionem, quod ignorantia juris naturalis invincibilis nulla detur? sed inde gloriandi, vel ut vulgò dicitur, cristam extollendi ansam nullam arripiant Probabilistæ, quibus impugnandis innumera argumenta ex aliis locis repetenda suppetunt, quia ignorantiam prætexere nequeunt, qui mores suos ad cujusvis opinionis, etiam minus probabilis regulam lesbyam exigunt, ut eam sententiæ non solum æquitate causæ & honesti defensione tutiori, sed etiam probabilitatis majoris viribus & argumentis superiori anteponant.

Fateor quidem, non mediocri ad penitus extirpandas probabilitatum laxitates se orbare præsidio, qui operibus ex ignorantia juris naturalis contra legem Dei patratis veniam dant. Fateor quod si illa ignorantia invincibilis esse dicatur, excusationes non paucæ peccantibus multis suppeditantur, quorum tamen opera adversus jus naturæ commissa nullus Patrum excusavit, nonnullus hætenus unanimi consensu sine exceptione accusavit. Fateor quod si error minimè volitus, quanvis propriis sceleribus accersitus facit infontem, nullum erit vitium tam tetrum, quod non sit etiam ultrò, & liberè amplectentibus illud innoxium; quia nullum est, quod non alicubi gentium vel pium, vel certè licitum existimetur. Laudandus ergo erit Car-

thaginensium homines immolantium mos barbarus, quia illum pro religioso habebant: condonanda erunt Calecutanorum adulteria, veterum Germanorum latrocinia, quia ea expertia vitii opinabantur. Excusanda erit Platonis auditorum uxorum communitas, à tanto Magistro, quem præ sapientiæ excelsissimæ ornamentis Divinum censebant, permissa.

Fateor etiam hoc uno ignorantiam juris naturalis excusantis principio non quidem penitus convelli, sed revera non mediocre incommodum & detrimentum creari delectui tutioris opinionis, atque illi Christianæ Ethicæ emendationi à viris optimis, & ab Alexandro VII. Christianæ sanctimoniam amore & in Evangelicæ doctrinæ corruptores zelo non minùs quàm orbis Episcopatu Sanctissimo, votis omnibus exoptatæ. Etenim qui Magistro Probabilistæ credens receptam apud omnes esse sententiam, nihil esse periculi, si minùs tuta, minusque probabilis, reluctante probabiliori & tutiori, tutò & securè usurpetur opinio; si hac, inquam, doctrina imbutus & persuasus alicujus Doctoris gravis seu Classici, id est Casuisticorum apicum callentis autoritate passim usuras sub colore interesse, vel chimæricorum trium contractuum fictione palliatas, simonias, vindictas, plurium Sacerdotiorum possessiones, aliaque id genus quæ Sancti abominati sunt, securus & gaudens reducat ad praxim; quomodo eum peccati coarguemus, si error & ignorantia juris naturalis excuset à culpa. Debuerat ille, inquit, opinioni tutiori, sibi, que probabiliori obtemperare: sed quare debebat, si id se debere ignorabat? Ignorabat autem, qui Magistrum docentem minùs tutam certissi-

ne securam esse audierat, & audienti crediderat, & credens, nec subinde de operis malitia practice, ut dicunt, dubitans, licet fortassis speculative formidans, operatus fuerat: Ergo non peccavit, cui involuntaria fuit malitia operis: nec fuit voluntaria malitia, quæ fuit hic & nunc ignorata: fuit autem hic & nunc ignorata ab eo, qui simpliciter, & penè bona Magistri fide credidit minùs probabilem in praxi licitè & securè adhiberi posse, putavitque reclamantes opinionis probabilioris rationes, non secus ac scrupulos à formidolosis injectos esse removendos. Ergo qui ignorantiam juris naturalis, vel ex eâ facta exculant, malè agentibus azylum præbent, & civitatem refugii aperiunt minùs tuta sequentibus, ac ferè vallum ædificant, unde vix ac ne vix quidem poterunt laxioribus opinionibus indulgentes dimoveri; quia quibusvis argumentis revincantur nefariæ corruptelæ, quibusvis coërceatur vinculis dissolutio, semper præsto erit perfugium erroris, quò se facile quisque recipiet, cum nihil promptius sit, quàm illis Doctoribus obedire, qui favorabilia & placentia loquuntur. Præsertim quia, ut dixi, Probabilistæ licet sibi sæpe in quæstionibus singularibus contradicant, in hoc tamen omnes conveniunt, ut minùs probabilis opinio tuta sit rectæ operationis regula, quâ qui plenè persuasus, vel potius deceptus fuerit, ignorantie summo beneficio, sed *conscientiâ virgine*, ut unus è Probabilistarum coryphæis loquitur, varia poterit pertransire prata luxuriæ, ut phrasi Scripturæ utar.

Hæc, inquam, fateor, & lubens amplector, quia ignorantiam juris naturalis invincibilem

nullam agnosco, omnem vincibilem, & voluntariam in sua saltem causa affirmo, & Patrum, ac nominatim S. Thomæ Sole clariore authoritate persuasus certissimè credo, peccare omnes qui contra jus naturale agunt; quia ut antea dixi, nulla tam profunda caligo æquitatis principia & boni honesti semina in totum tollit, nulla ita occupat mentem, quin residua semper sit aliqua boni honesti scintilla interdum ad meliorem frugem monens & pungens, quam si evacuatis præjudiciis ritè consuleret, uti debet, peccator, & pravitatem perspiceret ob concupiscentiæ & passionum voluntarias nebulas ignoratam.

Sed licet hoc principio affirmante omnem juris naturalis ignorantiam esse inexcusabilem, penitus causa probabilitatum juguletur; tamen non eo uno vaga probabilissimi licentia coercetur; nec eo solo præsidio munitur tutioris & probabilioris delectus. Unde tametsi Probabilistis non quidem concedamus, sed permittamus dari ignorantiam juris naturalis invincibilem; non tamen continuo ad ignorantiae latebras confugere possunt, ut suam laxissimam de minori probabilitate securè eligenda sententiam ab omni peccato purgent. Frustra enim, & juxta iniquè se ignorantiae invincibilis umbone tegit à validissimis quibus impetitur argumentis, qui adversæ sententiæ pro honestate stantis rationes probabiliore non ignorat, sed perspectas minoris probabilitatis opinationi postponit.

Hac de causa P. Julius Mercorus, & P. Baptistæ Gonet in divinæ legis defensionem, & ordinis Dominicani gloriam armati laxissimarum probabilitatum usum intra certas metas cohibi-



turi, ut turbæ recentiorum invidiam declinarent, abstinerunt ab illa quæstione de juris naturalis ignorantia, rati sibi fortiùs, certè plausibiliùs se acturos, si prætermisso principio modernis tam exoso & suspecto, ex communibus, & ab utraque parte receptis principiis contrariam definirent. Licèt enim decipiantur recentiores ignorantiam juris naturalis excusabilem & innoxiam affirmantes, & fucum faciant inanissimum, dum illi sententiæ totius traditionis clypeo communitæ Jansenismi notam pueriliter inurunt; tamen hoc eis permissò, quod ignorantia juris naturalis opera in illud commissa excuset, non propterea opinio minùs probabilis laborare ignorantia invincibili censenda est, cum non solum opinionis probabilioris fulgor, sed etiam dubitatio vel conjectatio periculi in concursu tutioris & probabilioris derelictæ imminentiæ ignorantiam satis superque inculpabilem resolvat.

Evidenter ergo se discernunt prælaudati Thomistæ à modernis Probabilistis, qui latissimam flagitiorum portam ignorantia invincibilis falso colore referarunt. Præsertim verò ab illis se sejungit P. Baronius, qui licèt fateatur, vel potiùs in gratiam Mercori toleret, posse aliquando juris naturalis ignorantiam tum inculpata esse, cum de obscurioribus juris naturalis consuetudinibus agitur; tamen tot opponit obices, tot objicit claustra quibus peccatorum collunies & iniquitatis torrens sistatur, tot condiciones restringentes, quibus prætermisissis accusantur quævis peccata in jus naturale patrata, ut licèt fortè ex aliqua veluti rimula non nihil effluere possit, quod minùs sit æternæ legi consentaneum, non



tamen quā datā portā, & effractis obicibus in  
 omne flagitiorum genus homines efferantur.  
 Nam illos omnes prævaricationis inexcusabilis  
 damnat, qui vel legem conscientiæ doctricem  
 honesti spreverunt audire, nec quas ingerit co-  
 gitaciones morati sunt; vel è jure naturali ad-  
 discere neglexerunt, quod sua refert scire; vel  
 qui primigenii peccati pœnalibus tenebris libe-  
 re apposuerunt iniquitatem super iniquitatem,  
 quā voluntariam cordis duritiem, mentisque  
 caliginem sibi asciverunt; vel qui fidem semel  
 acceptam pravis moribus corruerunt mali Ca-  
 tholici; vel qui Ecclesiā sibi notā, Evangelii  
 prædicatione, bonorum hominum & librorum  
 copiā neglectis in hæresi immortui sunt: quos  
 omnes legis æternæ sub specie opinionis cujus-  
 vis probabilis ignorantiam invincibilem præte-  
 xere non posse affirmat, & validissimè in suis  
 operibus omni genere argumentorum demon-  
 strat. Quibus quatuor exceptionibus tantum  
 distat à modernis laxonibus, quantum ortus ab  
 occidente.

Hæc in defensionem Scholæ nostræ cum mo-  
 deramine inculpatæ tutelæ, nullius vellicandi  
 animo dicta velim. Sed illud præ oculis omninò  
 habendum est, quod licèt hæc nobis deessent  
 præsidia, nihil tamen negotii Religioni Prædi-  
 catoriæ facessere possunt Adversarii; quia non  
 singulorum Thomistarum, sed unius D. Thomæ  
 patrocinium suscipit, pro solo Angelico Docto-  
 re vadem se offert familia nostra: unde toti  
 corpori afferendi non sunt singulorum membro-  
 rum, si qui sunt, nævi; nec toti Scholæ quorum-  
 dam à communis Magistri sensu exerrationes.  
 Unus S. Doctor est nobis instar omnium & su-

pra omnes; & quia in ejus solius verba sensusque juramus, in ejus etiam solius defensionem usque ad mortem decertamus. Non ea teneritudine laborat Dominicanus Ordo, ut velit quidquid emanat à singulis, in totius continuò Ordinis sensum & ingenium referre. Dolei vehementer aliquos transfugas ab avita doctrina descivisse; agrè fert è pluribus paucos segreges & desertores, qui Angelicæ doctrinæ sacrum depositum non satis religiosè custodientes, gratiæ divinæ & illibatæ moralis traditiones Dominicanorum tutelæ concreditas, à Paulo Patribus, à Patribus Aquinati, ejusque Scholæ transmissas nimis trepidè sectantur.

Itaque frustra Guimenius, frustra Petrus à Valleclausa, frustra alii æmuli quorundam ( & tamen verè sunt ) congerunt corruptelas, quæ toti Ordini horrori sunt atque execrationi. Nonnullos interdum cespitare, vera & humili confessione agnoscere non detrectamus. Non dum ita nobis insanire licuit, ut credamus nusquam impingere alumnos nostros. Homines nos esse, humani à nobis nihil alienum putantes, nec in facto, nec in jure infallibiles, modestè & sincerè contestamur. In tot & tam vastis Thomistarum voluminibus, tanta varietate refertissimis, alicubi, vel interdum contingere lapsus, nullus sapiens mirari debet. Nihil enim tam proclive, nihil tam pervulgatum, quàm errare homines, & errores hominum ab aliis perspicacioribus emendari. Quia teste Apostolo, *alius judicat inter diem & diem, alius judicat omnem diem.* Hoc est, ut exponit Gregorius, aliùs alio est scientiâ veritatis instructior.

Augustini & Aquinatis lacte innutrita Schola

Dominicana confitetur humanæ infirmitatis pondus, & victricis gratiæ ad singulos actus necessitatis conscia experitur, nos ex nobis nihil posse nisi mendacium. Scit quod non sumus sufficientes cogitare aliquid ex nobis quasi ex nobis, & quod sufficientia nostra à Deo est, qui radios suos, quibus vera falsaque secernimus, uni quàm alteri plenius uberiusque pro summa potestate & bona sua voluntate largitur. Scit, & propugnat illud à Cœlestino Papa veridicè pronuntiatum: *Neceſſe eſt, ut quo adjuvante vincimus, eo iterum non adjuvante vincamur.* Subindeque non solum non præsumit plenam suorum non peccandi securitatem, sed asserit id in hominibus humanam excedere facultatem. Coarctet ergo quàmlibet voluerit Guimenius Ethicæ paradoxa, vel monstra, eaque quorumdam Thomistarum verbis veris, vel obtortis veluti fuco præcoloret; improbo tamen labore se frustra fatigat, quia ea ubicumque, & à quocumque prolata execramur, & quasi à totius instituti nostri genuino sensu aliena detestamur. Unde quæcumque objicit Ordini nostro, nullatenus nocere possunt. Vel enim vera sunt quæ opponit, vel falsa. Si falsa obtrudit, plus sibi quàm nobis officit: si vera, non defensione, sed damnatione repellimus quæ opponit; sicque dissimillimus erit ab eo, quem sperat eventus.

Quin tantum abest Ordinem Dominicam solidâ S. Thomæ doctrinâ enutritum non solum aliqua suorum errata nolle defendere, ut etiam in optimis suorum operibus occultas labeſ for-  
midet, ne fortè quæ labis pura hominibus apparent, divinis oculis tanquam pannus menstruatae polluta videantur. Sicque non solum

aperta mala, sed etiam sua rectè gesta pertimescit, veritus ne bonorum operum imagine fallatur, & eo graviùs laboret, quo morbum latentem non sentit. Cum Jobo *vereiur omnia opera sua*. Ab occultis suis mundari se quotidie rogat, quotidie lamentatur. Nam si Paulus è cœlo rediens adhuc timeret, quomodo non timeret Ordo noster qui adhuc in terra cōversatur? Novimus ad retinendam humilitatem (quæ veræ pietatis fundamentum, & cumulus est) nihil tam conducere, quàm de suis actibus non confidere; & à S. Thoma domestico nostro Doctore didicimus, quod in aliis suspecta benè judicare, in nobis bona suspecta habere debemus. Quia in propria causa cupiditas propria occæcat, & indiscretis indiciis veram charitatem adulterina imitatur, & mensitur iniquitas sibi. Hinc S. Thomas 2. 2. *quest. 60. art. 4.* postquam statuit in corpore, quod ex hoc ipso quod aliquis habet malam opinionem de alio, absque sufficienti causa injuriatur ei, & contemnit ipsum. Nullus autem debet alium contemnere, vel nocumentum quodcumque inferre absque causa cogente; & ideo ubi non apparent manifesta indicia de malitia alicujus, debemus eum ut bonum habere, in meliorem partem interpretando quod dubium est. Tamen in responsione ad 3. ubi explicat illam maximam in argumento 3. positam, Circa seipsum homo debet dubia interpretari in peiorem partem, secundum illud Job 9. Verebar omnia opera mea, ait: Cum debemus aliquibus malis adhibere remedium, siue nostris, siue alienis, expedit ad hoc ut securius remedium apponatur, quod supponatur id quod est deterius; quia remedium quod est efficax contra majus malum, multò magis est efficax contra minus malum.

Hinc Ordo Dominicanus, qui à Summis Pontificibus *Ordo veritatis* dici meruit, non solum non excusat apertos lapsus, sed etiam errores, sive à suis, sive ab aliis in vestros detestatur, & more Dei iudicium incipit à domesticis. Itaque licet vera essent quæcumque Guimenius nobis imponit, perperam tamen inde ex filiorum erratis Ordini nostro dedecus, & infamiam quæreret, totumque corpus infectum ex membrum alicujus contagione prædicaret. Quia nimirum privatas aberrationes non suscipit defendendas, sed scriptis & voce reprimit & condemnat. Quo uno verbo veluti spongia, amulorum suorum (& sunt sanè multi) objectiones delet, obstruitque os loquentium iniqua.

Imitatur Ecclesiam Ordo noster. Cùm enim sibi ab hæreticis privatorum corruptelæ regeruntur, respondet Ecclesia cum Augustino suo lib. I. de morib. Eccles. cap. 34. *Nunc vos illud admonéo, ut aliquando Ecclesia Catholica maledicere desistatis, vituperando mores hominum, quos & ipsa condemnat, & quos quotidie tanquam malos filios corrigere studet.* Sic Religio Dominicana præclarum indicium dare se putat animi & humilis, dum fatetur errata, & verè catholici, dum errores infectatur vel in suis, nec eos ignava dissimulatione fovet. Vera infamia est suscipere scelera, fovere errores, defendere falsitates: at verò proscribere nefaria, reprobare etiam suorum opiniones reprobare, immortale decus, & gloriæ prædicandæ verissima feges. Quandiu durabit illud Ordinis nostri ingenium, tandiu paucorum filiorum dedecus in matrem inaniter refunderur.

Reflexio & apostrophe ad Semi-  
Thomistas.

Nonnullos D. Thomam in speculabilibus sequendum, sed in moralibus deferendum, non semel effutientes in præloquio hujus libri retulimus; hos iterum alloquimur, & monemus. Quam dolendum, ô Semi-Thomistæ, vos hac in parte à S. Doctore discedere, quam præ cæteris debebatis ad amissim ardentius æmulari. O quæ tempora! ô quæ studia vestra! Illa profectò, illa de quibus Bernardus *serm. 33. in Cant.* ait: *Olim prædictum est, & nunc tempus impletionis advenit: Ecce in pace amaritudo mea amarissima.* Amara prius in nece Martyrum, amarior post in conflictu hæreticorum, amarissima nunc in moribus domesticorum. Non fugare, non fugere eos potest, ita invaluerunt, & multiplicati sunt super numerum. Intestina & insanabilis est plaga Ecclesiæ, & ideo in pace amaritudo ejus amarissima. Sed in qua pace? Et pax est, & non est pax. Pax à paganis, & pax ab hæreticis, sed non profectò à filiis. Vox plangentis in tempore isto: *Filios enutrevi, & exalta vi, ipsi autem spreverunt me.* Ut ergo sit vera pax, vel Thomistas vos non dicite; vel S. Thomæ ubique obtemperate. Et qui tantum Doctorem in morali disciplina existimatis errare, etiam atque etiam quæ ab eo dicta sunt considerate, ne fortassis ipsi erretis.

Serpit hodie probabilissimi putida tabes per omne corpus Ecclesiæ, & quo latius, eo desperatius, & que periculosius, quo interiorius. Ex probabilissimo videmus proficere omnia flagitia



omnis Ecclesiasticæ disciplinæ everſionem, omnis obſervantiæ regularis exterminium. Ex eo omnes amici & inimici, neceſſarii & adverſarii quæ ſua ſunt quærunť. Ex eo miniſtri Chriſti non Deo ſerviunt, ſed mundo, honoratique incedunt de bonis Domini, qui Domino honorem non deferunt. Ex eo is, quem quotidie videmur, meretricius nitor, hiſtrionicus habitus, ſplendidus apparatus. Ex eo aurum in frenis, in ſellis, & calcaribus; & plus calcaria quàm altaria fulgent. Ex eo ſplendidi menſæ & cibus & ſcyphis. Ex eo comeſtationes & ebrietates; cythara, lyra, & tibia; redundantia torcularia, & promptuaria plena cruſtiantia ex hoc in illud. Ex eo uſurarum, ſimoniarum, pigmenta, & maſſupia plena. Et D. Thomam hæc monſtra in radice præſcindentem ſectari recuſatis. Si in D. Thomam inſurgeret apertus hæreticus, mitteretur foras, & areſceret; ſi violentus malediceret adverſarius, abſcondemus nos forſitan ab eo. Nunc verò quem eji- ciemus, aut à quo abſcondemur, ſi impunè Moralem D. Thomæ diſciplinam deferere etiam diſcipulis liceat, qui Thomiſtarum nomine gloriantur.

Ego quia ad animum veſtrum veritati adiutum eſſe poſſe confido, non tam vos arguo, quàm deprecor, non tam moneo, quàm rogo, ut remoto contentionis ſtudio, & evacuaris Probabilistarum præjudiciis, animum ſic componatis, quemadmodum ad veritatem percipiendam cõponi par eſt. Dimidiatum veſtrum S. Thomæ obſequium ſeriò attendite, veſtrum à præcipua totius ejus doctrinæ cardine reſeſſum ſeriò conſiderate, quàm periculofa ſit vagæ probabilita-

ris licentia, quàm effrænata ad omne peccatorum genus licentiam præbeat, quot nefaria dogmata pariat, quotve longè deteriora parere possit, si cernitis cernite, & S. Thomæ invulso adhærescite.

Quare vos tam dulce D. Thomæ solatium vobis ipsis eripitis, quem dum sequimini, certi estis vos non probabilibus modò, sed turissimis, & inconcussis dogmatibus, testante Alexandro VII. ad Lovanienses, adhærere? Non credo vos ita frontem cum corde durasse, ut in tanta Probabilistarum laxitate & discordia, vel potiùs caligine nullus conscientiam pulset remorsus, inter tot angustias voces extorquens: *Quis ostendit nobis bona?* Cur ergo à D. Thomæ cynosura faciem avertitis, quæ iter dirigeret, detegeret pericula, salebrosa complanaret. An nescitis quod docet Chrysost. hom. 43. in epist. ad Hebr. *Ducem & rectorem non habere malum est, & multarum calamitatum argumentum, nec non inordinatae perturbantis ac confusions principium. Quemadmodum enim si chori coryphaum & ducem sustuleris, non erit amplius chorus concinnus & ordinatus: & si à phalange exercitus amoveris Imperatorem, non erit amplius ordinata acies: & si à navigio ademeris gubernatorem, navem demerges: ita malum quidam est, atque everisionis occasio rectore carere, sed non minus malum fuerit non obediri ei à suis subditis.*

Hæc cum ita sint, si D. Thomam in speculativis sectari gloriamini, in moralibus, ubi periculosior error est, ab eo ne latum unguem discedatis; quia in istis si à veritate exerremus, cæci erimus, & cæcorum duces facti ambo in foveam cademus. Graviùs plectemur si inspire-

mus errores iis qui nostris decretis imbuti peccata committent ; qui enim crimen suadet & docet, non solum propriæ pravitatis, sed & alienæ iniquitatis pœnas luet. Maximè quia, ut aliàs monuimus, & iterum confirmare placet, licèt fatali protoparentis peccato, quo natura humana corrupta est, præcipua funesti pars vulneris in intellectu & voluntate impressa sit ; tamen quia magis voluntate quàm intellectu peccatum est, ideo humana natura originis vitio remanet voluntate quàm intellectu corruptior, minusque obscurata mens ad veritatis intelligentiam obtorpèt, quàm voluntas à summo bono averfa in creaturarum, sui que amorem defluat. Inde fit, hominem in morum judiciis quàm in speculationibus decernendis à vero faciliùs exerrare, quia ex appetitus majori corruptione majores intellectui tenebræ offundantur circa res illas, quas voluntas diligit. Quia in hujusmodi rebus dum concitatis à concupiscentiâ nebulis offuscatur animus, nativam hebetudinem & tarditatem in immensum auget invisceratus terrenorum amor, subindeque in regulis morum dignoscendis magis magisque caligat. Veritates speculativas, quàmlibet invias & inaccessas, dum non capit, miratur, & quia sibi magno non constant, non odit. At verò præcepta morum, quibus cupiditates coërcere, & concupiscentias temperare jubetur, non solum fastidit, sed averfatur : ideoque subtilitatem acuit & ingenium, ut mandatorum molliat rigorem, detrahatque asperitatem ; variâ quoque ad vitam commodiùs agendam lenimenta quarrit, ut dejecto arduæ vitæ tericulo, cœli semitæ inferni viis faciliores, suavioresque efficiantur.

Quàm præclare, & ad miraculum opportunè Ambrosius lib. de bono mort. cap. 9. Errat oculus, ubi errat affectus. Affectus ergo deceptio, est deceptio visus. Quia ut ibi observat, sic corruptus quærit ut concupiscat, non ut verum cognoscat. Quam rationem eleganter prosequitur in Psal. 118. Serm. 4. Terra ista, quam gerimus, meretriciis nos quibusdam illecebris capit, & quasi vultus quosdam voluptatum, corporaliumque delectationum fucis illinit, ut lateat in his veritas, & forensi quadam specie decipiant appropinquantes. Succinit. S. Nilus in Ascetico: Hujus perversitatis causa est, quod iis qua cernuntur, nihil præstantius (practicè & in actu exercito) ducimus; neque ex præsentium, futurorumque comparatione vilitatem illorum, atque horum præstantiam agnoscimus. Præsentium enim splendor nos capit, & mentis oculos perstringit. Nam sæpè fit absentiâ præstantiorum, ut deteriora pro illis habeantur in pretio. Quod si de futuris bonis gustum aliquem haberemus, haud ita præsentibus inhiaremus.

Itaque intellectus voluntate voluptatis amante inflexus, tota qua pollet vi legum vigorem enervat, actuum salebras complanat, licita conatur efficere, quæ illicita ex legis præscripto videbantur. Hinc facilius errat homo, quo dulcius. Hinc opinionationes suas non à recto exerrationes, sed benignitates disciplinæ; non immodicas luxuriantes animi profusiones, sed charitatis attemperationes; non legum dissipationes, & vulnera, sed scrupulorum animos exedentium remedia, vel piam & religiosam calliditatem, pietatisque solertiam appellat, & abjecta æternæ legis divina luce, præeunte ratiuncularum fallaci fulgore, & igne fatuo fictæ charitatis, in-

varia præcipitia dilapsi cæci fiunt, & duces cæcorum. A charitate potissimum scientia moralis exoritur, ut eximiè annotat D. Thomas in illud cap. 1. Epist. ad Philip. *Oro ut charitas vestra magis ac magis abundet in omni scientia.* Quia, inquit, *qui habet habitum, si rectus est habitus, sequitur inde rectum iudicium de his quæ pertinent ad illum habitum; si verò corruptus, falsum.* Vide quæ diximus in præloquio libri hujus.

Quid ergo ad rationis sibi relictæ tenebras depellendas opus facto? Quomodo se geret humilis ac verè Christianus Theologus? Quo pacto inter tot discrimina exurgentium molliculorum fraudes deprehendere, laqueosque vitare, & in sana Ecclesiæ Romanæ morum doctrina sanus atque integer poterit permanere? Duplici modo sensa sua Domino adjuvante munire debet. Primò scilicet divini verbi in Scriptura, vel traditione loquentis lumen consulere, & revereri tenetur. Sibi in veritate persuadeat, nihil esse tam rationi adversum, quàm ipsam rationem divinæ legi præponere, vel in bonis, malisque dignoscendis, discernendisve parem putare. Certè credat lucernam pedibus nostris, & lumen semitis esse verbum Dei, sive sacris Paginis consignatum, sive ab Apostolis, Apostolicisque viris, Apostolicæ Sedis potissimum Antistitibus ad nos traditione derivante transmissum. Recorde-  
tur illius quod habetur Iosue 1. præcepti: *Non declines à verbis legis ad dexteram vel ad sinistram, ut intelligas cuncta quæ agis.* Præ oculis habeat illam Deuter. 12. contestationem: *Non facietis singuli quod vobis rectum videatur, sed quod præcipio tibi.*

Tum deinde Ecclesiæ Catholicæ Doctores, &



Magistros optimos, nominatim verò D. Thomam, ad extirpandas morum corruptelas divinitus provisum audiamus. Nam ut stylo Lirinensis utar, quis ille tam demens est, qui te, Doctor Angelice, etsi assequi non valeat, non exoptet sequi, quem à defensione incorruptæ Theologiæ moralis nulla Aristotelicarum argutiarum vis depulit, quem Deus elegit, ut exitialem morum depravationem, quâ hodie laborat mundus, divinâ tuâ sapientiâ præfocares, ne benè fundata antiquitas scelestâ novitate subrueretur, ne, superiorum instituta violarentur, ne rescinderentur scita Patrum, ne convellerentur definita Majorum, sed sese intra sacratæ, atque incorruptæ vetustatis castissimos limites prophanæ ac novellæ curiositatis libido contineret.

Pecuinam servitutem appellent cum Petro à Valleclausa inimici tui doctrinæ tuæ adhæSIONEM; sed veri Theologi quomodo doctrinam tuam repudiabimus, cujus sanctitatem, & de hæresibus omnibus victoriam prædicamus? Prædicamus, inquam, ô venerande Thoma, prædicamus planè, laudantesque miramur, quem pro divinæ legis defensione, proque religiosæ vetustatis tenacitate tanto te munere Dominus dignum judicavit, ut per te præpararet prostratas à modernis legis sanciones; extinctas, inquam, plurimas Evangelii maximas vivificaret, dejectas decretorum coronas reponeret, & nefarias illas novellæ impietatis non litteras, sed lituras, infuso cœlitus fidelibus discipulis tuis lacrymarum fonte deleret. Vidit olim Innocentius Ecclesiam nutantem, & Dominicum succollantem. Columna Ecclesiæ fuit Dominicus, quia te geni-



turus erat Ecclesiæ Atlantem , non fabulosum , sed verum. Dignus profectò es, quem sequamur Magistrum , qui Patrum omnium religiosus sectator, & discipulus extitisti. Dignus cui deferatur honor , quem tu sanctis omnibus detulisti. Tu docuisti nos servare præcepta Majorum: Tu librum signatum illum propheticum , non moderniorum prolubiis, sed seniorum, idest Patrum decretis resignare iussisti. Tu declinare, & fugere præcepisti eos, qui dissensiones & offendicula præter doctrinam quam acceperunt, faciunt; quive ducti variis desideriis semper discunt, & ad scientiam veritatis nunquam perveniunt; quia docentes quæ non oportet, sed languentes circa quæstiones & pugnas verborum veritate privati sunt.

Coacervent sibi qui voluerint Magistros prurientes auribus. Producant, si velint, in aciem non decem aut viginti Probabilistas, sed centum, sed millia, sed decem millia in millibus suis: Illi omni catervæ, multitudini & nationi te opponimus, Doctor sancte, qui unus es, & parem non habes, quia *Tu unus pro decem millibus computaris.* 2. Reg. 18. Oppono veterum discipulorum tuorum cœtum aliter sentientium: oppono parochorum, Episcoporum, & Summi Pontificis consensionem, qui tuam de moribus doctrinam specialiùs commendarunt: oppono doctrinæ tuæ oracula ab Academiis, ab Episcopis, à Conciliis, à Summis Pontificibus, ab ipso denique Christo ita probata, ut si te sequendo error contingeret, essemus (quod absit) ab ipsa veritate decepti. Omnibus ergo novis Doctoribus, quorum fundamenta non sunt in montibus sanctis, te ab Ecclesia consecratum jure

præferimus ; quia juxta auream Lirinenſis maximam : *Magna proſectò res eſt, & ad diſcendum utilis, & ad recolendum neceſſaria, quam etiam atque etiam exemplorum molibus illuſtrare, atque inculcare debemus ; ut omnes ſerè Catholici noverint ſe cum Eccleſia Doctores recipere, non cum Doctores Eccleſia fidem deſerere debere.*

## SPECVLATIO II.

*Omni rationum genere, tum à priori,  
tum à poſteriori probabilifmus  
everitur.*

**P**lures confirmandæ noſtræ ſententiæ rationes opportunas hætenus inſinuavimus, quarum præcipua petitur ex illa maxima S. Thomæ inconcuſſa : Quidquid fit ontra legem naturalem & æternam ſemper eſt malum, nulla-que ignorantia excuſatur ; quia omnis juris naturalis ignorantia vincibilis & culpabilis eſt, unde nulla bona eſt actio, niſi ſit rectæ, ac veræ regulæ conformis ; nec ulla opinio probabilis ſecura, niſi vera ſit. Ergo multò minùs minori probabilitate opus contra legem admiſſum peccato eximetur affulgente, & reclamante probabilioris & tutioris opinionis luce ; quia tunc nulla obtendi poteſt ignorantia cauſa, ad quam directè excludendam ſufficit minima ſuſpicio, dubitationis vellicatio, & multò magis probabilioris ſententiæ plenum, & circumfuſum lumen. Conſequentia eſt neceſſaria, & ipsis Pro-

babilistis ultrò fatentibus evidens. Antecedens verò est illis quidem execrandum, sed tota antiquitatis veneranda canitie, & variis rationum momentis superiori, capite, speculatione prima, tanquam hujus controversiæ basis & fundamentum firmatum est. Sed quia paulò superius monuimus, non illo solo studio jugulari Probabilissimum, placet alias rationes exhibere magis ad ubertatem quàm ad necessitatem, præacta enim sufficeret.

Prima ergo ratio à priori sic formatur. Unusquisque in controversiis & difficultatibus moralibus quotidie emergentibus verum in omnibus pro virili quærere dum latet, & sequi dum patet tenetur, aliàs Christianismus non esset schola veritatis, sed spelunca erroris, si ad veritatem de corde puro & optimo inquirendam, & quàm proximè possumus ad eam accedendum non teneremur. Certè cum asserat Evangelium, sola nos demùm veritate liberos effici posse, asserat nos non ex hominum mendacibus stateris, sed ex Dei verbo vero judicandos; asserat Servator se esse viam, veritatem, & vitam, se in hoc natum, se ad hoc venisse in mundum, ut testimonium perhibeat veritati; talemque se velle instituere Religionem, in qua veri adoratores adorent Patrem in spiritu & veritate; cum, inquam, hæc ita sint nemo nisi illius qui fuit mendax ab initio, interpretes negare potest Christianos debere pro virili veritatem quærere, veritatem amare, & viam veritatis cognitæ eligere. Atqui ille non sincerè veritatem quærît, nec purè veritatem amat, qui illud ultrò negligit quod verius esse probabilius censet, & aliunde tutum esse supponitur, cum faveat legi & honesto; ai

& illud amplectitur quod magis putat esse falsum, quàm verum, & ideo illud minùs probabile esse judicat : Ergo qui minùs probabili, minusque tutæ sententiæ in concursu probabilioris & tutioris adhæret, ultrò à veritate, quam sequi tenetur, recedit; ultrò ad falsitatem sibi notam, quam fugere debet, tendit amore utilis, aut delectabilis, seu in favorem libertatis : Ergo peccat in illa tam præpostera comparatione & electione, quâ tutum minùs tuto, probabilius minùs probabili, verius minùs vero, non duce veritate, sed improbante; non movente charitate, sed repudiante; non suadente ratione, sed cupiditate postponit. Omnes propositiones sunt evidentes. Major est dogma Catholicum apertius, ut phrasi Senecæ utar, quàm ut interpretandum, disertius quàm ut sit adjuvandum. Minor est status quæstionis. Consequentia sponte fluit ex præmissis.

Secunda demonstratio : Ille peccat qui contra conscientiam reclamantem agit, seu qui facit id quod conscientia judicat non esse faciendum; tunc enim non possunt afferri effugia ignorantia ad excusandas excusationes in peccatis : Sed ille qui spretâ probabiliori, & tutiore sententiâ, ex minùs probabili, minusve tuta operatur; ille, inquam, agit contra conscientiam, seu facit id quod conscientia judicat non esse faciendum; illud enim judicat conscientia quod probabilius censeret, alias ineptè judicaret: in conflictu autem prædicto opinionum, conscientia censeret probabilius opus quod permittit opinio minùs probabilis esse illicitum, & subinde non esse faciendum, sed fugiendum: Ergo qui in illo concursu ex minùs probabili operatur,

facit contra conscientiam ; siquidem iudicium conscientiae suae improbantis opus , quia videt illud in malum propensius, spernit, & volens illud eligit, quod potius falsum quàm verum, potius illicitum quàm licitum putat , proindeque renitente iudicio voluntatem habet à studio & amore veritatis alienam.

- Tertia demonstratio petitur ex celebri juris regula superiori capite à corruptelis & cavillis modernorum vindicata : sed quia ex illa tota Probabilistarum doctrina à fundamentis subruitur, placet sic iterum ex ea argumentari. In dubiis tutior pars est eligenda , nec quidquam agere possumus quod dubitamus æquum sit , an iniquum ; id enim non solum Canonicum Jus, sed Philosophia , sed naturalis ratio communissimis boni , malique notionibus informata verum esse fatetur. Atqui in conflictu & distractione opinionum, de quarum veritate non constat, sed una rectior & probabilior , alia minùs tuta, minùsve probabilis est , animum de minùs probabilis sententiae veritate dubitare & fluctuare necesse est : Ergo in opinionum conflictu probabilior , tutiorve eligenda est. Majorem non audent inficiari Probabilistae, & quamvis alii consilium continere duntaxat illam regulam velint, alii usu abolitam dicant ; id tamen alii explodunt, & nos supra evidenter confutavimus à pag. 665. Unde negant minorem propositionem ; quia, inquit, hoc axioma valet quidem in dubiis , sed non in probabilibus ; quia in dubiis neutri parti assentimur : at in opinionibus animus non est pendulus & fluctuans , sed utrique probabili sententiae etiam contradictoriae probabiliter assentitur : ubi autem est assensus,

non est dubium ; quia dubium assensum omnem continet & suspendit , opinio verò vel utrique, vel alterutri sententiæ assentitur.

Sed contrà probatur minor , & hæc Adversariorum doctrina, quæ est tota probabilissimi medulla, multipliciter impugnat. Tum quia vel opiniones contradictoriæ sunt ambæ æquè probabiles, vel una apparet minùs probabilis, altera probabilior. Si primum , animus neutri parti assentitur, quia nihil habet quo uni parti potius quàm alteri se addicat ; cùm enim intellectus à sola veritate, vel verisimilitudine moveatur, si in partibus contradictoriè oppositis non relucet aliquis major veritatis radius , sed æqualem undique percipiat , ad unam inclinari potius quàm ad aliam non potest , sed æqualibus rationibus distractus in æquilibrio dubius remanebit ; & sicut remanent lances in libra, quibus æquale onus imponitur, sicut non movetur corpus quod in oppositas partes æquali duorum agentium virtute impellitur : ita similiter intellectus à dubii æquilibrio non recedit, nec in alterutram partem assensu inflectitur , quandiu æqualibus hinc inde premitur rationum ponderibus & momentis. Nec obest quod videat per reflexionem rationes esse hinc inde probabiles, quia ea ipsa rationum probabilium utriusque partis perceptio animum hære, & pendere cogit, quia ob paria æqualis probabilitatis pondera in neutram inclinatur, neutri assentitur, neutram præponere jure potest, sed æquali probabilitatis fucò fulgente diducitur. Unde judicium reflexivum non aufert , sed supponit, imò auget dubitationem, quia videt nihil apparere, quo magis in unam, quàm in aliam partem flecti debeat



intellectus, unde iudicium de probabilitate æquali opinionum compellit suspendere iudicium de re ipsa; quia cui parti contradictoriæ insit veritas, tanto magis nescit, tantoque dubitat, quanto clariùs cernit oppositas sententias æquè firmis fundamentis inniti.

Si verò intellectus videat unam opinionem esse minùs probabilem, minusque tutam, & alteram contradictoriam probabiliorem & tutiorem, tunc intellectum de minùs probabilis veritate dubitare, eique non assentiri, sic manifestè suaderetur. Intellectus non movetur ad assensum nisi à veritate, vel verisimilitudine; quia veritas est objectum formale adæquatum intellectus, sicut bonitas est objectum formale, & motivum adæquatum voluntatis: Ergo in conflictu opinionum contradictoriarum illi necessariò assentitur intellectus, in qua major veritas, majorve verisimilitudo apparet, ne à suo formali motivo recedat. Atqui major veritas, majorque verisimilitudo in sententia probabiliore, & tutiore apparet; ideo namque dicitur probabilior, ut patet ex penetratione terminorum: Ergo in huiusmodi conflictu intellectus necessariò dubitat de veritate opinionis minùs probabilis, nec illi ullatenus assentitur, cum potius assentiatur probabiliori, quam utpote sibi yeriorem, præponit minùs probabili, à qua dissentit; quia falsam eam assensu opinativo reputat.

Pluribus aliis argumentis illum Adversariorum cavillum loco citato imperivimus, ostendimusque illo funditus deleri, & ad nihilum redigi factam illam regulam ab Ecclesia tota consecratam, & lumine naturali notam; & esse meram ideam, meram fabulam, merum ludibrium

dibrium, quia dubitanti nunquam deest opinio probabilis; si enim illi operis malitia pateret, utique non dubitaret: unde eo ipso quod dubitat, non tenetur tutiora sequi, quod est regulam illam conculcare. Monstravimus etiam ex sensu Pontificum manifestè illam in difficultatibus ex opinionibus probabilibus emergentibus esse usurpandam; sed hæc iterare non decet, quæ eò loci fusè ponderata sunt. Sed illud non est prætermittendum, quo omnis evasio apertè simul, & efficaciter præcluditur: Si in dubiis teneor sequi probabilia, certè multò magis in minus probabilibus; quia dum rationabiliter dubito de operis honestate, minime assentior tale opus esse pravum: unde ab opinione illud permittente non dissentio, quia illam nec probō, nec improbo, ob bonas quibus munitur rationes. At verò dum opinor aliquam opinionem esse minùs probabilem, tunc ab illa sententia dissentio, tunc ferè persuasus sum de ejus falsitate, & hic, & nunc eam non censeo veram, sed ejus oppositam: Ergo si stante dubio nefas sit operari, quia mihi incertum est an opus sit æquum, vel iniquum; multò magis nefas est ex minùs probabili operari, quia tunc magis judico opus esse iniquum, quàm æquum; hoc ipso quod oppositam probabiliorem existimo. Si hæc ratio non sit convincens, nescio quo poterit humanus animus convinci.

Quarta demonstratio sumitur ex ipso Principio adversariorum contendentium, omnem opinionem probabilem esse tutam, quia volunt eam esse dictamini prudentiæ consentaneam. Ego contrà affirmo, probabilissimam omni veræ prudentiæ spiritus repugnare, & sic argumentor:

Qui sequitur opinionem minùs probabilem, minùve tutam in conflictu probabilioris & tutioris, ille prudenter non agit : Ergo peccat. Consequentiam fatentur Adversarii, qui non aliter argumentantur. Prudenter agit qui probabilem opinionem sequitur : Ergo non peccat. Non enim aliud ferè proferunt sui dogmatis argumentum, cujus consequentia si bona sit, nostra mala esse non potest. Antecedens verò suadetur, quia in conflictu illo opinionum, vel operans ex minùs probabili dubitat, vel non dubitat de rectitudine operationis : si dubitat, imprudenter opus aggreditur, non deposito priùs dubio : si non dubitet, multò magis imprudens est, qui in nullam dubitationem inducitur, quando tanta est dubitandi ratio. Nonne imprudens, stupidus, & insanus diceretur, qui in conflictu probabilium sententiarum, an esca apposita sit veneno infecta, non dubitaret utrum esset comedenda, sed eam securus quasi puram, incorruptam, & sinceram comederet ? At imprudentior longè est qui non dubitat illud aggredi opus quòd in malum propensius est quàm in bonum, quodve probabiliùs est mortiferum : Ergo vel nihil datur in rebus humanis prudentiæ adversum, si prudentiæ probabilissimus non adversetur. Respondete, ò inconsulti, & maleduadi Probabilistæ. Estne prudens Imperator aut Dux, qui eo tempore prælium committit & hostes aggreditur, quo probabiliùs putat suum exercitum victum iri, & hostium irruptione dissipandum, profligandumque ? Habeturne prudens ille negotiator, qui cum illis societatem contrahit, quos probabiliùs censet ære alieno gravatos, & pecunias acceptas per

fraudem decocturum, mala fide creditoribus denunciatâ mensariæ rationis inopiâ? Cense-  
turne prudens ille nauta, vel non potius in  
exemplum stultitiæ & imprudentiæ ab omni-  
bus affertur, qui explicatis velis mari se per-  
mittit, quando probabilius impendet à tempe-  
state naufragium, ut non ita pridem nonnullis  
triremibus Gallicis, duce Equite Paulo, submer-  
sis contigit? Ergo totius prudentiæ lumen ex-  
tingunt Probabilistæ, dum docent minùs pro-  
babilia probabilioribus, minùs tuta tutioribus  
posse prudenter præponi. Nihil esset prudentiâ  
imprudenter, si tam imprudens consilium à  
prudentiâ posset oriri.

Quiata demonstratio: Qui amat periculum,  
peribit in illo, ut docet Spiritus Sanctus *Ecel. 3.*  
*27.* Quod maximè verum est in moralibus, quia  
qui non declinat periculum peccati, peccati  
amorem retinet, nec illud fugit sicut à facie  
colubri, sed peccatum est illi quadantenus in-  
differens. Atqui ille qui in conspectu probabi-  
lioris, & tutioris minùs probabilem, minùsve  
tutam sententiam sectatur, amat, non vitat pe-  
riculum: Ergo peccat, & peccando peribit. Ma-  
jor est non solum axioma Spiritus sancti, sed  
est lumini naturali manifesta. Minor probatur.  
Quod dicitur periculosum, seu non securum, ex  
quo an oriri possit aliquod grave damnum, in-  
certum est; sicut dicitur morbus periculosus, de  
quo incerti sunt sapientes medici bonis rationi-  
bus permixti, an mortem sit illaturus; pericu-  
losa dicitur via, quando juxta eam latitare fures  
multa probabiliter persuadent; periculosus ci-  
bus, periculosus contractus appellatur, si ex illo  
corpori, ex isto rebus nocumentum imminere

optimis rationibus judicetur. Nullam enim, quotquot sunt homines aliam veri periculi ideam ac notionem habent. Adeantur parvuli, viri, mulieres, indocti, litterati, nobiles, ignobiles, Catholici, Calvinistæ, rogenturque quid nomine *periculosi* intelligant? nemo eorum aliter respondebit, nisi tunc esse periculum, quando damnum ex aliquo impendere bonis rationibus judicatur. Atqui sequens opinionem minus probabilem, minusve tutam, illud agit quod omninò incertum est, num ex eo sequatur peccatum mortale, animæ spiritualis mors, & æterni supplicii damnum irreparabile; quia id facit quod est probabilius illicitum. At quomodo à peccati periculo immune, quomodo tutum & securum est, quod probabilius illicitum est? Quomodo cibus periculo inferendæ mortis caret, qui probabilius est eam illaturus? Quomodo via periculo vacua, quæ probabilius est circumsepta latronibus insidiantibus? Quomodo contractus periculo eximitur, ex quo rerum omnium jactura probabilius peritorum judicio consequetur? Qui sic se gererent in humanis, forentne tuti & securi? An minor quærenda securitas, ubi tota periclitatur æternitas? An filii hujus sæculi prudentiores & cautiores filiis lucis in generatione sua esse debent? Væ nobis perversis rerum æstimatoribus! Væ nobis, si in humanis benè administrandis omnia tuta timeamus, in negotiis animæ omni nos probabilitati committimus. Væ nobis, quibus in comparatione aliorum Deus vilis est, æterna salus non est unum necessarium, pro quo obtinendo dimittenda incerta, certa tenenda esse Sancti omnes docuerunt.

Sexta demonstratio : Ut ille qui ex minùs probabili , minusve tuta sententia operatur , à peccato liberetur , necesse est ut quævis probabilitas , etiam falsa , etiam minor , etiam minùs tuta sit certa agendorum regula , ita ut in praxi istud iudicium formare possim : Illud hîc & nunc mihi certò licitum est , eo ipso quod probabiliter licitum est , quia prudenter , & tutò quisque opinionem probabilem sequi potest. Ita enim explicant Adversarii , ita se defendunt , ita miro artificio speculativam dubitationem cum practica securitate componunt. Atqui probabilitas non est certa agendorum regula , sed dubia , fluxa , & incerta. Tum quia regula illa est ad summum probabilis , subindeque derivari ex illa certitudo rectæ operationis nequaquam potest ; ex probabili enim principio certa nequit deduci conclusio , & incerto innixa fundamento ædificatio non potest certa consistere ; quia generaliter nemo dat quod non habet , subindeque opinabile & incertum principium certam infundere securitatem tam non potest , quàm calidum frigefacere , vel frigus naturaliter calefacere. Tum quia probabilissimus suâ vagâ licentiâ seipsum interimit , & ex Probabilistarum principiis ipsa probabilitas est regula improbabilis ; sic enim argumentor : Probabilitatem opinionum autoritate & ratione metimur : Atqui multi Authores gravibus rationibus permoti existimant probabilitatem esse periculosam agendorum regulam , imò prorsus improbabilem , prorsus falsam , & quidam erroneam vocant : Ergo ex Probabilistarum principiis probabilitas non est certa agendorum regula. Ergo juxta Probabilistas probabilissimus non est



securus, non est à peccato immunis, sed periculo plenus. Ergo illi credere conscientiam suam non possunt, nisi qui seipso, nisi qui alios sponte decipiunt. Hæc ratio magis urget in casibus particularibus, in quibus licet interdum litigent Probabilistæ, & inter se digladientur, tamen reipsa sibi non contradicunt dum alii negant aliquid licere, alii affirmant; quia cum probabilitatem ut sic securam agendi regulam unanimi consensione pronuntient, frustra dicunt id non licere, quod ex sua cardinali regula in praxi licitum, securum, & innoxium est. Ergo probabilitas est regula non solum veritatis amantibus, sed ipsis etiam probabilissimi assertoribus exitiosa, & planè falsa.

*Ratio à posteriori.*

Denique à posteriori sic arguo: Ex probabilitate continuo derivantur infinitæ laxitates Christianæ disciplinæ everivæ. Ad cujus evidentiam considerato, quod licet probabilitas in se spectata, & nescio quo verborum apparatu, vanisque conditionibus & exceptionibus hujus doctrinæ venenum simplicioribus occultantibus facata, non videatur prima fronte admodum exitiosa; quia quandiu vitium in remoto aliquo principio veluti in semine latet minùs percellit animam, & pietatis sensum minùs deterret. Verùm cum probabilitatis radix ramos suos longè latèque protendit, cum ad praxim usumque reducitur, cum singularia minutatim expendit, cum methodo compositionis à fine ad media, à generibus singulorum ad singula generum, à principis per varios conclusionum

gradus descendit ad opus ; cùm denique foras erumpens venenum in varias sese induit species, & in conspectu omnium venit, tunc in universorum indignationem incurrit. Quia cùm arbor bona non possit malos fructus facere, tunc incipiunt homines cordati de probabilitatis nedum veritate, sed etiam probabilitate dubitare, cùm ex ea illas videant spurcicias sine modo diffuere, ad quas infernus horrescat. Si ex vero non sequitur falsum, longè à veritate aberrat illud principium, ex quo tam crebra deducuntur conjectaria, vel potius portenta, quæ hæreticis ludibrio, Catholicis horrori sunt & indignationi. Quis non abhorreat à prætenso probabilitatis securitate, quâ admisâ innumeras nefandorum scelerum immanitates, infinitæ spurciciarum turpitudines honestantur.

Atqui sic est : etenim ex probabilitatis licentia ita dissipata est lex Domini, ut tam horrendas maximas & referre pudeat, & dolere magis expediat quàm refellere. Illas tamen oculis tuis objicere amor veritatis impellit, & coërcendæ illorum Scriptorum licentiæ, qui una probabilitate freti, sanctissima quæque Evangelii dogmata perverterunt, eamque morum disciplinam in Ecclesiam invehere conati sunt, quæ Turcis & Ethnicis non omnino corruptis, offensioni forent : at illas Christianis oculis expandere vetat pudor ; vereor enim ne repræsentata tam prodigiosa legis divinæ dissipatio Lectorem meum horrore percellat, cogatque sibi aures obturare, ut Nicanos Patres, ne Arrii blasphemias audirent, fecisse Ecclesiæ Annales referunt. Sed verecundiam vincet necessitas & pia utilitas sequutura ; quia etiamsi cætera deessent

argumenta, non dubito quin sola tot malorum exhibitione, tanquam aliqua mole reprimi posset probabilissimi torrens, qui ni fons exhauriatur, totam Christianorum morum disciplinam perditum ibit. Nec sine singulari Dei providentiæ judicio Probabilistæ in tam horrenda inciderunt opinionum portenta, in quibus tam manifesta rationis depravatio apparet, ut omnes non omninò stupidi monerentur, quantum in pestifero fonte veneni lateat, cujus rivus tam aperte, tam sensibilibiter corrupti sunt; quàm abominandum sit illud principium, unde conclusiones communi sensui, communibus vulgaris honestatis notionibus repugnantes inferuntur; quàm demùm periculosè se turbidis Probabilissimi committunt fluentis, quàmve temerè se horum Rectorum permittunt ducatu, quibus rustici & mulierculæ judicii incorruptione præstant. Sed euge calame, quid hæres? cur trepidas? An times ne atramentum pudore rubeat, & suffundatur? Ne propala occulta dedecoris, sed publica flagitia publicè argue; & ut ordinem serves in recensendis lapsibus, in quibus nullus ordo, sed sempiternus horror inhabitat, Decalogum paucis decurre.

Primo præcepto præcipitur nobis fides in Deum, amor, & cultus religiosus illius. At juxta aliquos infra referendos, Infidelis cui sua secta est probabilis, non tenetur Catholicæ Fidei etiam sibi probabiliori adherere. Secundum alios absolutionis est capax homo negligentia culpabili ignorans Mysteria Trinitatis & Incarnationis. Et juxta Caramuëlem Theol. Moral. n. 1559. Deorum pluralitas stando puris principiis naturalibus defendi & propugnari potest.

Secundo præcepto prohibetur vanum, vel falsum juramentum. At juxta Tamburinum lib. 3. in Decal. cap. 1. §. 6. n. 7. *Licitum est inducere testem ad jurandum falsum, quod jurans quidem putat esse verum, ipse verò inducens scit esse falsum.* Libenter hic cum Augustino exclamaverim: *Vbi estis fontes lacrymarum!* Et quid facimus, quò ibimus, ubi nos occultabimus ab ira Veritatis, si non solum negligimus cavere mendacia, sed audemus insuper docere perjuriam? Tertio præcepto iungitur observantia diei festi. At verò juxta eundem Tamburinum, in die festo per duas horas vacare servilibus non est peccatum mortale, quia modicum tempus judicatur duarum horarum spatium comparatione vigintiquatuor horarum. Unde si herus quispiam habens duodecim servos, iungat eis laborem integri diei, assignando singulis duas horas successive ac divisive, non peccat mortaliter.

Quarto præcepto imperatur cultus parentum: At juxta Tamburinum lib. 1. cap. 1. §. 3. *Licet filio, absoluto desiderio cupere mortem patris, non quidem ut malum patris, sed ut bonum cupientis; quia nimirum ei obventura est pinguis hereditas.*

Quinto præcepto prohibetur homicidium, & totum id quod contra proximum per illationem damni committitur. Verum secundum Caranuellem Theologiæ fundam. n. 1142. *Doctrinam Amici asserentem licere Clerico vel Religioso calumniatorem gravia crimina de se, vel de sua Religione spargere minantem occidere, solum esse veram, & oppositam improbabilis censuræ omnino docti.* Et teste Tamburino lib. 2. cap. 2. §. 1. *Ad tormenta graviaque damna vitanda potest quilibet*

*sibi falsum crimen imponere, etiamsi mors sit sibi sequutura.*

Sexto præcepto prohibetur omnis actus luxuriae, omnisque usus rerum venerearum extra actum matrimonii commissus. Et tamen juxta Caramuëlem Theolog. Moral. lib.2. num.1598. *Fornicatio secundum se nullam involvit malitiam, & mollicies jure natura prohibita non est.* Juxta Tamburinum lib.5.cap.1.§.4. *Famulus non peccat mortaliter, qui submissis humeris adjuvat herum suum ascendente per fenestram ad stuprandam virginem.* Juxta Joannem Sancium, à Diana 5. p. tract.19. resol. 108. memoratum: *Concubinaris non tenetur pellere domo concubinam, sed polliceri solum se deinceps cum ea non peccaturum, quando eam relicta minus agere ageret vitam.* Et juxta Baunium in Summa: *Non neganda absolutio est iis qui in proxima peccandi occasione remanent, si eam deserere aliter non possunt, quin vel sermonem dent populo, vel aliquid ipsis inde incommodi importetur.* Quæ verò in favorem gulæ, aliorumve sensuum docent Probabilistæ, vide suprà, dum de actuum indifferentia.

Septimo præcepto inhibetur injusta rei alienæ ablatio, aut detentio, quâ proximus in bonis suis læditur. At juxta Baunium in Summa, pag.307. & 308. *Qui alium movet aut inducit ad inferendum grave damnum tertio, v.g. ad domum ejus aut segetem incendendam, non tenetur ad restitutionem illius damni illati.* Et pag. 220. *Non tenetur quis sub pœna peccati mortalis restituere quod ablatum est per parva furtiva, quantumcunque sit magna summa totalis.* Quin juxta Probabilistas, vix jam est usura, vel simonia, & omnes divites elemosynæ erogandæ onere exsolvun-

tur, quia juxta Vasquem vix in divitibus superfluum invenitur.

Octavo præcepto prohibetur falsum testimonium, mendacium, & omne id quo honor proximi læditur. At juxta Caramuëlem n. 1151. *sux Theologiæ: Probabile est non peccare mortaliter, qui imponit falsum testimonium alicui, ut suam justitiam & honorem defendat; quia illud est probabile quod asseritur à viris doctis, probisque; & hac doctrina habet pro se viginti, aut plures viros magnos & doctos, qui si dicantur non sufficere, vix ulla erit opinio probabilis in Theologia. Vide Gasp. Hurt. Dicastill. Dianam.*

Idem apparet in præceptis Ecclesiæ. Primo & secundo præcepto Ecclesiæ præcipitur statuto; Ecclesiæ dies festos celebrare, & Sacrum Missæ reverenter audire. At Caramuël *Theolog. fundam. num. 44.* & alibi docet, in audiendo Missam de præcepto, recitandis horis ex obligatione, satis esse attentionem externam, & posse quemlibet tui voluntarie distrahi, & post mille distractiones voluntarias certò scire se ne venialiter quidem peccasse, & ita certò ut possit jurare. Addit num. 760. eum satisfacere præcepto recitandi officium, qui illud recitat animo non satisfaciendi. Et num. 500. & 502. una Matutinarum lectione posse quem duorum dierum obligationi satisfacere. Mitto alia non minùs nova & stupenda, quàm ridicula, ut cùm sæpe ait, *horologia habere opinionum probabilitum virtutem.*

Tertiò jubemur indicta certis diebus jejunia, & à quibusdam cibis abstinentiam servare. Illi satisfacere credit Filiucius tom. 1. tract. 27. quemvis defessum ex quocumque labore licito vel illicito, v.g. cum fœminis commixtione. Atque ex



eo docet Escobarius *tract. 1. exam. 13. num. 67.* non teneri jejunare qui dormire nequit nisi sumptâ cœnâ, etiamsi jejunium tolerari possit collatiunculâ sub meridiem sumptâ. Quia, inquit, *nemo tenetur pervertire ordinem refectionum.*

Quin juxta Tamburinum *lib. 4. cap. 5. §. 1. & 2.* probabile est, sagimen inter laticinia numerari, atque adeo posse recipi in jejunio; licere etiam intra diem jejunii bibere vinum, mustum, cervisiam, aquas ex herbis, vel ex eodem vino destillatas, etiam de mare, etiam ob solam delectationem, etiam multoties in die, etiam in fraudem jejunii. Alia circa præcepta tam divina quàm humana longè horribilissima flagitia doctrinæ prudens ômitto, eligens indiligentiæ notari, quàm tot spurcitiis has chartas commaculare. Videri poterunt excerpta Párochorum Parisiensium, & alia innumera scripta, in quibus summa accuratone recensentur.

Per singula etiam Sacramenta decurrendum foret, singulæ quoque censuræ memorandæ, ut appareat quantum & illis injuriæ, & istis inobedientes fuerint Probabilistæ. Ex ungue leonem, & ex frusto pannum conjicito. Præcipuam diligentiam & curam in parando ad susceptionem Sacramentorum animo exigebant Patres: at juxta Baunium & Sanctium non sunt arcendi ab Altaribus, qui eodem die copulam carnalem cum fœmina habuerunt, vel se voluntariè polluerunt, sive per fornicationem (addit Mascarenhas, *tract. 4. dub. 5.*) sive per adulterium, sive per peccatum contra naturam, seu quæcumque alio modo. Quantum verò sacris Pontificum, Conciliorumque legibus & censuris obtemperent, patet ex eo quod idem Mascarenhas, *leges Provinciales vel universales in contrarium latas, totius*

orbis consuetudine abrogatas pronuntiat. Et Escobarus tract. 1. exam. 8. num. 102. Bullam Pii V. Clericos sodomitas omni privilegio Clericali, ex nique officio, dignitate & beneficio privantis modo tam horrendo ludificatur, & ad nihilum redigit, ut eam præ horrore non audeam castis Lectoris oculis præsentare Pontificiæ authoritatis irrisiionem in casu in quo omnes Theologos deceret esse armatos, deberentque non solum non Apostolica fulmina eludere, sed ignem de cælo advocare, si aliqua esset in illis gloriæ Dei scintilla.

Concilium Lateranense ad abolendam execrabilem blasphemiarum consuetudinem gravissimam pœnitentiam severi Confessarii arbitrio blasphemis injungendam decrevit: at illud sacratissimum decretum solitâ suâ responsione, non usu, vel non receptione omnia præcepta evadente, eludunt Sanchez, Azorius, Eliucius, aliique. Religiosos habitum regularem exuentes excommunicationis pœnæ subjiciunt Pontifices. *Excipe*, inquit Probabilistæ apud Escobarium tract. 6. *si habitum Religiosus dimittat ut melius currat & saltet, vel si ut furetur occulte, vel fornicetur, cum dimittat mox reassumitur.* Denique quidquid Summis Pontificibus decernere placuerit, facile pessumdabitur hoc Dianæ p. 5. tract. 13. resol. 39. & 650. effato: *Ad auctoritatem Summorum Pontificum dicendum est, ita respondisse illos adharendo opinioni affirmativæ, sed non exinde sequitur negativam sententiam carere probabilitate.* Dixerit hoc Summus Pontifex tanquam caput Ecclesiæ, volo: at dixit tamen in sphaera duntaxat probabilitatis sententia sua. Ubi pro summa & verecunda erga Ecclesiæ capita

reverentia probabilitatem aliquam Summo Pontifici decernenti, sicut & Casuistæ concederet, largiri dignatur.

Quantum verò Regulari Religiosorum Ordinum observantiæ officiat probabilissimus, nemo nescit; facile enim erit & promptam cunctis omnia Conciliorum, Pontificumque de reformatione instauranda decreta eludere, qui à Diana didicerint, illa Pontificem statuere *in sphaera duntaxat probabilitatis sententia sua*; qui axioma illud, quod semper in ore Probabilistarum versatur, receperint, *Ecclesia leges vim obligandi amittunt, cum jam desuetudine abierunt.* Ut autem in desuetudinem abiisse censeantur, sufficit modicum annorum interstitium, vel alicujus Casuistæ nova opinio, quæ initio debilis & imbecilla modico tempore adolescit, & ut loquitur Diana, *tempore maturatur*, ac deinde Prælatorum incuriâ, vel inconsideratione neglecta, tacitâ Ecclesiæ non reclamantis approbatione sancita à Probabilistis venditur. Quàm profundum erga superiores pro vita regulari resarcienda laborantes obedientiæ obsequium præstabit, qui à Castro Palao *part. 1. disp. 2. pag. 6.* audierit: *Non est controversia, quando daretur opinio probabilis ex parte subditi, quod non teneatur obedire, etiamsi contraria sententia sit probabilior. Tunc enim licitum est amplecti quæ sibi gravior fuerit. Ita notavit in presenti Thomas Sanchez lib. 6. in Decal. cap. 3. Quem penitentiae motum concipiet Religiosus propter flagitia, & incorrigibilitatem à Monasterio expulsus, cui arriserit illud Molinæ pronuntiatum ab Escobario tract. 6. exam. 7. laudatum: Expulsus à Religione non tenetur se emendare, ut ad illam*

*redeat ; neque obligatur voto obedientia.* Unde observat Prosper Fagnanus, quosdam Regulares auditâ opinione nonnullis probabili, quod Summus Pontifex non possit Religiosis ad præscriptum regulæ reformationem indicare præter consuetudinem tempore professionis vigentem, ausos esse debitam mandatis Apostolicis obedientiam denegare.

Nec dicas hæc tam impia consecraria à variis Probabilistis reprobari. Nam cum videntur ex principiis proximis ea damnare, in suo generali probabilitatis principio illa probant & honestant. Cum enim pro certo venditent, id licere quidquid utrinque Authores habet; cum singulis paginis clament, tutò quemque adhærescere posse claro Casuistæ non omninò ab aliorum auctoritate deserto; quid interest si juxta nefanda illa dogmata, quæ interdum in particulari rejiciunt, aliqua tandem ratione probabili, & Casuistis probata agere liceat? Quid juvat afferre rationes, quibus speculativè damnetur contractus *Mostra*, interfectio calumniatoris, vel alapam intentantis, si in praxi illud judicium formare possum: Id mihi certum est quod probabiliter licitum est, quia tutò sequi possum opinionem probabilem? Speculativè quidem ob rationes speciales dubitabo; sed practicè ob rationem generalem probabilitatis non dubitabo, sed opinabor; quia illud saltem occurreret, ut quod mihi videtur insolubile, & cum doctrina Patrum insociabile, alius solvet, alius Probabilista conciliabit. Ergo non incurram in illud à Jure consecratum decretum, quo peccati reus statuitur, qui agit ex conscientia dubia, certisque incerta præponit; quia semper securitatem practicam

obtendam, ex eo principio mihi ascriptam, quod nemo peccat opinionem probabilem sequutus. Esto quod Casuistæ inter se in privatis quæstionibus digladiantur, sufficit mihi quod in communi principio conveniant, *Verè illud licere, quod probabilitate non caret.* Nihil ergo mihi jam à Veritatis ira timendum existimabo, parum veritatem curabo, probabilitatis securitate contentus gaudebo, & illo axiomate, quod apud Probabilistas est ferè de fide, *Opinio probabilis, etiam falsa & legi naturali adversa, etiam in concursu probabilioris excusat à peccato*, omnes rationes Comprobabilistarum confringam, & ad illud extremum Casuisticæ subtilitatis vallum perductus fateri eos compellam, paradoxa illa & monstra opinionum practicè licita esse, quanvis ob alias rationes ea speculativè illicita esse denuntient. Unde illis cum Augustino *lib. 2. de adult. conjug. cap. 4.* dicam: *Hoc vos quidem non sentitis, sed hæc sequuntur illa qua sentitis. Mutate ergo antecedentia, si vultis cavere sequentia.*

Nec putes, Lector, illis quæ jam prodierunt portentis, & horrendis fœtibus latissimum ad impietatem aditum esse oclusum. Si toleretur vaga probabilissimi licentia, nondum exhaustus est venenatus fons unde profluent iniquitatum rivi; nondum extirpata radix, cujus pestiferi rami tam latè fundentur, ut in fidei, pietatis, religionisque exitium grassari, & indifferentiam sectarum securam reddere humana audacia probabilitate armata facillè possit. Si enim omne probabile falsum excusat à peccato, si probabilitas etiam minor, & quæ probabilius videtur falsitas, ad honestandam actionem sufficit, po-

terit quisque in religione, quam probabilem putat, permanere, & in ea ad salutem pervenire: Non obligabitur infidelis ad credendum in Christum, sicut secundum Probabilistas non obligatur fidelis ad eum amandum; nihil ad salutem refert cujus sectæ professor sis, modò error probabilis videatur; nam probabile, & securum apud modernos convertuntur, & teste Caramuële Theolog. fundam. pag. 472. *Minus probabilis sententia, si benignior, etiam securior est.* Devorandæ ergo erunt omnes hæreses aliquo veri colore probabiliter illitæ, permittendæ, & confundendæ omnes sectæ suis hinc inde rationibus humanis non destitutæ; nullæ recusandæ corruptelæ, si corruptorum hominum iudicio verisimiles appareant. Denique Christianismus fiet Pirrhonismus, & quidem perditissimus: omnia erunt incerta, fluxa, mobilia; omnia abrumpentur fidei & Religionis retinacula, si novellâ probabilitate susceptâ, cuncta erratiæ rationis arbitrio permittantur; si humanæ authoritati, humanæque rationi id juris iniquissimè detur, ut aliquid securum & tutum efficere possint, si æternæ legis ignorantia etiam ex personali vitio profecta, etiam precibus ac virtutum studio superabilis non solum ad imminuendam culpam, sed ad eam penitus delendam omninò valet; si minus probabilis, minusque tuta opinio probabiliori & tutiori cognitæ anteferri sine peccato possit; si carnalibus animis, novitatum amantibus, severitatis impatientibus supremum salutis arbitrium asseratur; si extra solam veritatem vera sit securitas; si lex Dei æterna non sit immota operationum humanarum regula, à qua actio libera se distolet.



hoc ipso mala est ; si nihil referat , veræne sint opiniones, an falsæ , modò sint probabiles , seu eas probantibus probabiles videantur , & aliqua nitantur ratione, atque moderni authoritate Casuistæ ; & si humana ratio quàmlibet peccato occæcata, certa regula agendorum ita constituitur, ut ei suum Deus judicium accommodare teneatur ; si divina lex eos insontes pronuntiare debeat , quos humana probabilitas absolvit ; si Casuistis infallibilitatis genus asseratur soli Ecclesiæ Catholicæ eximium ; si Probabilistæ sibi ipsis contrarii , subindeque ad veritatis viam incerti , mira absurditate certi sint ad veritatis terminum duces ; si denique non minus tutum sit in ore Probabilistarum mendacium fucatum , quàm in ore Christi , & Sanctorum veritas fait.

Videant , quæso , Probabilistæ , & seriò tandem considerent, quàm rejiciendum , quàm improbandum, quàm abominandum sit vagæ probabilitatis pestiferum dogma , quod à tam nefandis consecrariis divelli nequaquam potest. Ex fructibus cognoscant arborem, ex effectibus causam, ex rivis fontem , & ex longè absurdissimis , & falsissimis corollariis probabilitatis doctrinam , à qua derivantur , cum qua cohærent, cui agglutinantur , rejiciant , reprobent , insectentur. Num ut elegantibus Tullii verbis utar: *Prorsus consequentia tenetis , ô Probabilistæ ; sed ita falsa sunt ea qua consequuntur , ut illa è quibus nata sunt , vera esse non possint.* Et quia de Tullio mentio occurrit , erubescant Probabilistæ ethnice loqui , postquam Tullius christinè & theologicè loquutus est. Hic enim suis de officiis libris totis viribus probat , ho-

nestum utili ita anteponendum, ut in concursu utriusque ipsa comparatio culpâ non vacet. Quod si erubescere nolunt, aut nesciunt Probabilissimi arbitrarii defensores, tu (Lector Christiane) rubore suffundere; tu dolore tabesce ob sæculi miseri huius dedecus sempiternum, & dum vides hac probabilitatis arte omnia jura corrumpi, antiqua floccifieri, nova calcari, judicia perverti, hæreticis de Ecclesiâ Catholica obloquendi ansam præberi, indolens cohorresce. *Qui enim, ut ait August. epist. 137. ista non dolent, non est in eis charitas Christi; qui autem etiam de talibus gaudent, abundat in eis maliginitas diaboli.*

Hæc dicta sint non in sugillationem personarum, sed exerrationum. Scio, & certus sum præfatos Authores in istâ morum disciplina stabilienda non huc spectasse, ut Catholicæ Ethicæ puritatem corrumperent: longè ab omnibus, longè à singulis consilium istud fuisse credo. Non dubito quin optassent nuda Evangelii præcepta nullâ mitigatione temperata fidelibus proponere. Mihi persuasum est, viros erga se severos, & in propriis institutis egregiè compositos, tam multa statuisse de Evangelii severitate remittere, morumque præcepta quàm potuere mitissima condere, ut indulgentiâ & molliori disciplinâ se ad hominum imbecillitatem attemperante, Christianorum depravationi ac perversioni succurrerent, atque ut ne ullum suæ in salutis desperationem arctæ vitæ difficultas propelleret, in hunc scopum collimasse, hoc ipsis unicè propositum fuisse dum decreta singulorum usibus accommodata pararunt, ferè jurare possem. Credebant viri urbanissimi, totique ad

benignitatem ficti & comparati, se majora mala præcavere minorum tolerantia. Existimarunt accedendum esse ad peccatores, eisque conveniendum, ne totos sese vitiis tradentes in pejus ruerent.

Quod præsertim de Patribus Sacræ Societatis Jesu intelligendum velim. Ingratus audiam, si Societatem illam de me optimè meritam, quàmve meis officiis promereri impensè aveo, corruptelarum amantem pronuntiem. Sex annos Jesuitas Provinciæ Tolosanæ Magistros audiavi, totidemque conscientia rectores adolescens habui. Testis verò est mihi Deus, & non mentior, me nihil ab eorum ore accepisse unquam, nihil in eorum moribus advertisse, quod ab infandis illis depravationibus non abhorreret. Puras Evangelii maximas ab illis edoctus sum, in directores sacræ severitatis amantes incurri, si quid in me pietatis, si quid religionis, si quid doctrinæ sit, totum ipsis debeo à quibus elementa suscepi, totum ipsis acceptum refero, & post innumeras persolutas gratias, majores me debere profiteor, quia recte Philosopho, Parentibus & Magistris pares referre gratias nemo potest.

Porro quod aliqui eorum Casuistæ molliorem in illis disciplinam tolerant, quàm in moribus suis teneant; quod animi sui solertiam ad excogitandas subtiles quasdam rationes adhibuerint, quod accitis lenimentis legum asperitatem mitigare sategerint, non Societatis vitio, sed ipsius conditione & naturâ probabilitatis, quæ sine periculo tractari nequit, contigisse sine dubitatione credere & charitas, & Religiosi instituti ab Ecclesia probati sanctimonia, & Je-

ſuitarum ferè omnium præclara morum com-  
poſitio ſuadent, ac penè cogunt. Nam probabi-  
liſſimi licentiam ab aliis hauſerunt Jeſuitæ, &  
cum Jeſuitis non pauci alii ex omnibus Ordini-  
bus & Academiis, nonnulli etiam Sorbonici hu-  
jus ſæculi Doctores ſectantur; quia probabilif-  
mus poſtquam timidè primùm prodire cœpit,  
tempore aliquo maturatus, & plus juſto arri-  
dens, plures bonos & Doctos non ſolùm Jeſui-  
tas, ſed omnium Ordinum viros in errorem ac  
fraudem induxit, quos alii deinde bona fide ſe-  
quuti, ſed nimium creduli probabilitati ſuffra-  
gati ſunt, & latens virus abſque malitia combi-  
bentes, in eam ſententiarum laxitatem duce pro-  
babilitate abierunt, quæ non ſunt Theologo-  
rum Societatis Jeſu propriæ, ſed aliis multis  
communes. Unde ſi Probabiliſtarum catervam  
in aciem producere liberet, magnam partem  
conſicerent aliorum Inſtitutorum & Ordinum  
profefſores, quos probabilitatis dogma pervafit,  
pervaſerunt & alia probabilitatis corollaria.

Accedit, quod totius alicujus Inſtituti ſen-  
ſum non ex privatorum alumnorum opinionibus,  
ſed ex Præpoſitorum Generalium, in quibus  
non ſecus ac in capite naturali, totius corporis  
ſenſus vigent, ſtatutis, vel univerſalibus Reli-  
gionis comitiis metiri nos decet: Atquæ poſt  
damnatas Romæ probabilitatum laxitates nul-  
lum librum legere licuit, in quo de licentia  
Præpoſitorum ſuorum Jeſuita ullus expreſſo ſuo  
nomine propoſitiones damnatas tutatus fuerit:  
Ergo ſignum eſt, ſacram Societatem Eccleſiæ  
authoritati ceſſiſſe, ægrè quorundam Filiorum  
plus juſto ingeniorum ſuorum voluptati & vul-  
go indulgentium licentiam paſſam eſſe, & pro

suo Catholicæ Religionis amore eâ modestiâ  
 præditam fuisse, ut quanvis quosdam ex suis  
 nosset laxitatibus illis implicatos, nemini ta-  
 men pepercerit, qui se manifestum eorum gere-  
 ret defensorem. Totius Societatis ingenium, &  
 vota luculenter expressit R. P. Mutius Vitelles-  
 cus Societatis Præpositus Generalis litteris ad  
 totam Societatem datis 4. Januar. an. 1617. ubi  
 sic filios monet: *Nonnullorum ex Societate sen-*  
*tentia ( in rebus præsertim ad mores spectantibus )*  
*plus nimio libera, non modo periculosa est ne ipsam*  
*evertant, sed ne etiam Ecclesia Dei æriversa in-*  
*signia afferant detrimenta. Omni itaque studio*  
*perficiant, ut qui docent scribuntve, minime hac*  
*regulâ & normâ in delectu sententiarum utan-*  
*tur: Tueri quis potest: Probabilis est: Authore*  
*non caret. Verum ad eas sententias accedant, quo-*  
*tutiores, quæ graviorum, majorisque nominis Do-*  
*ctorum suffragiis sunt frequentata; quæ bonis*  
*moribus conducunt magis, quæ denique pietatem*  
*alere, & prodesse queant, non vassare, non per-*  
*dere. Quoniam verò Constitutiones, Decreta, Re-*  
*gulas probè callent de S. Thoma sequendo, de non*  
*provehendis ad Cathedras, aut etiam removendis*  
*qui ejusmodi doctrinam parvisfacere, aut cordi*  
*non habere præ se ferunt, præsertim si novitatum*  
*amantes deprehendantur, qui nullaratione sunt*  
*ferendi; reliquum præterea mihi nihil est, nisi ut*  
*hac ipsa serventur, ut maximi res momenti, quàm*  
*ardentissimè possum urgere. Vides hunc sapien-*  
*tissimum, & juxta piissimum Generalem non*  
*solum filiorum suorum doctrinæ laxitates non*  
*probare, aut ignavâ dissimulatione fovere, sed*  
*proscribere; non affectare in iis tuendis con-*  
*stantiæ famam, sed malle suorum lapsus semel*

agnoscere, seriò detestari, quàm eos in perpetuum retinere, & ipsis retentis *pietatem perdere, & vastare.*

Non aegrè, ut opinor, feret prudens & sacra Societas, me illam eo modo defendere, quo Ordinem nostrum vindicare satègi: Christianæ charitatis officia me implere crediderim, si proximum diligam sicut meipsum; si Matrem à Filiorum dedecore liberare, non Filiorum quorundam dedecus in Matrem refundere voluerim; si diligere me decorem domus Dei, & expurgare Religiosum Sanctuarium his vindiciis significaverim, si à tota Societate erroris suspicionem amovere, & necessariâ quorundam privatorum infamiâ totius Religionis dedecus redimere studuerim. Non arbitror Religiosos in malam accepturos partem istam meæ erga ipsos gratitudinis significationem. Si plura possem, plura rependerem; si repræsentata dogmata, salvâ conscientia, vel defendere, vel excusare mihi liceret, ad illorum defensionem aspirarem, illis me ultrò aggregarem. Sed nihil possum adversus veritatem, sed pro veritate: quin in tam perversorum dogmatum defensione vel dissimulatione infamandam magis Societatem crederem; quia sicut verum in suscipiendis, occultandis, fovendisque erroribus situm est dedecus: ita nefarias opiniones abjicere, easque à celeberrimo corpore, per nullo membrorum quorundam inhonestamento, amovere solidum decus, magnifica gloria. Hanc gloriam toti Societati modis omnibus amplificandam sincerè opto; ipsos RR. PP. non tam moneo, quàm rogo, ut Comitolum magis sibi Andreæ Blanchum, Mutium Virellescum,



quàm Escobarium vel Tamburinum imitandos proponant, idque Majorum nostrorum monitis & præceptis imbutus concupisco. Etenim sæpe sæpiùs Capitula nostra Generalia Religiosissimam Societatem omni officiorum genere prosequi statuerunt.

*Confutantur responsiones Probabilistarum,  
& scorsim R. P. Georgii  
de Rhodes.*

Dices : His rationibus quidem conficitur, quamcunque probabilitatem non esse tutam agendi regulam; sed nihil evincitur contra probabilitatem certis cautionibus, limitibus, & conditionibus coërcitam. Effrenis quidem probabilitas clamoribus & tragædiis excitatis, quasi omnium corruptelarum fons potentissimus à doctis pariter & indoctis exagitatus est, quia ad eum ex animo respuendum sufficit communis sensus, sufficit communis vulgaris pietatis institutio, quæ ad tam nefaria dogmata cohortens ipsum etiam spurcitiarum fontem execrationibus prosequi debet. Sed longè diversa est probabilitatis notio, cui securitas vindicatur. Quod si quæras à modernis exactioribus Probabilistis, quid sit opinio probabilis castigata, & non effrenis? Respondent ad eam duas exigi condiciones: prima, ut gravioribus rationibus innixa sit: Secunda, ne vel rationi evidenti, vel catholicis dogmatibus in Scriptura revelatis, vel Conciliorum, Summorumque Pontificum decretis, vel Patrum traditioni, vel Theologorum torrenti sit opposita.

Sed

Sed contrà. Nam præterquam quod pauci, & ferè Probabilistarum nulli hunc conditionum apparatus requirunt, cùm candidè fateatur Tamburinus lib. 1. in Decalog. cap. 3. §. 3. *Qui aliquid operatur motus ex opinione probabili, benè operatur, & sine peccato, etiam opinione proabiliore relicta, etiam omissa tutiore, etiam communi. Dum probabilitate, siue intrinseca, siue extrinseca, quantumvis tenui, confisi aliquid agimus, semper prudenter agimus.* Præter hoc, inquam, hæ conditiones, hæ duæ annexæ dotes nihil aliud sunt, quàm laquei irretiendis, deludendisque simplicioribus ad declinandam corruptæ disciplinæ moralis invidiam instituti; nam si excussâ larvâ pestilenti opinioni formam satis honestam affingenti, adyta & interiora velaminis perscrutemur, apparebit his conditionibus probabilitatis fœditatem occultari quidem, & veluti obli-viente fucò honestari; revera tamen licentiam probabilissimi foveri tantò periculosiùs, quanto in speciem innocentius.

Etenim quid est apud Probabilistas ratio gravis, & ratio solida? Estne ratio uni veritati innixa? Minimè sanè; cùm enim Probabilistæ sibi tam crebrè contradictoriè adversentur, media probabilium opinionum pars vera esse non potest, & tamen probabilis esse non desinit: Ergo per probabilitatem gravi solidaque ratione fretam, non intelligunt opinionem veritati innixam, sed opinionem iis rationibus fultam, quæ graves & solidæ Probabilistis videntur. Atqui hoc modo non vitamus monstra illa flagitiorum & errorum, quæ declinare velle videntur authores hujus responsionis; nam eorum

consecratorum architecti solidis se niti rationibus opinantur. Et licet hæ rationes fortè aliis non videantur solidæ & graves; illis tamen graves & solidæ saltem probabiliter apparent, cum propter illas ea dogmata invexerint. Similiter pleraque Hæreticorum, aliorumve infidelium commenta, quanvis reipsa sophisnatis inmixta sint, tamen illa ipsa argumenta quæ nobis sophismata sunt, ipsis videntur rationes graves, & solidæ: Ergo si vera sit probabilitatis doctrina, si nimirum falsum probabile etiam in concursu probabilioris à peccato excusat, illa omnia debent transglutire, & devorare dogmata, à quibus ore tenus, & extremis labiis recedere videntur; illisque flagitiis veniam dare, & sub pœna peccati mortalis absolutionem impertire ea admittentibus ob rationem, vel Casuistæ auctoritatem, quæ perpetrantibus solida, & gravis visa est, quanvis reipsa dubia, incerta, & sæpe falsa sit. Ergo non veram, sed apparentem soliditatem, quæ errantibus non deest, his conditionum fucis & artibus venditant; sed falluntur, quia apparens soliditas, soliditas falsò dicitur, sicut mendacium apparenter verum, ineptè veritas dicitur; & fallacia, perperam gravis & solida ratio nominatur. Nam illa omnia doctrinæ flagitia, quæ populi Christiani pietas tam justâ indignatione insequuta est, & Ecclesiæ divinitus concessa auctoritas justissimis censuris anathematizata est, rationibus apparenter solidis muniri visa sunt viris apparenter doctis, qui & multa scripserunt, & in evolvendis noctu & interdiu Casuistis multum temporis insumpserunt: Ergo illa omnia consecratoria, quibus cæcibus, vindictis, abortionibus, calumniis, furtis,

usuris venia datur, in tuto locari, & ferè consecrari existimanda sunt.

Deinde verò dum addunt ad opinionis probabilitatem requiri, ut sententia illa non sit Scripturæ, vel Traditioni adversa, dum aliquid dicere videntur, reverà ludunt, & nos ludificant. Nam vel volunt opinionem illam, ut sit probabilis, debere de facto esse Scripturæ, & Traditioni consentaneam, vel tantùm apparere talem. Si primum, benè dicunt, sed probabilissimum à fundamentis subruunt; nam probabile falsum revera non est Scripturæ & Traditioni consentaneum; si verò secundo contentus sis, jam omnibus illis flagitiorum paradoxis veniam das. Quamvis enim reipsa cum Scripturarum & Traditionis veritate pugnent; tamen ita pugnare suis authoribus & defensoribus non apparet. Sic etiam Calvinistis & Lutheranis errores probabiles & tuti erunt, cùm illis persuasum sit, errores suos à Scriptura non dissidere, à traditione non abhorrere, quamvis reipsa abhorreant. Sic Germanorum antiquorum latrocinia, Mahometanorum immunditiæ, quas innoxias, justasque habent, justificabuntur; quia hæc nefanda scelera à lege naturæ abhorrere minimè eis apparet; quamvis abominanda meritò videantur iis, quorum judicium non est ita corruptum, vel affectus tantoperè depravatus. Ergo vel probabilitas illâ responsione jugulatur, vel nullum omninò eorum, quæ commemoravimus, doctrinæ flagitium, nulla hæresis è probabilium, subindeque tutarum opinionum numero eximitur: si id demùm sibi quisque persuadeat, opinionem libertati faventem ob aliquam apparentem rationem non videri Sacræ Traditioni

repugnantem, etiam si tutior, probabiliorque sententia Scripturis adversari attestetur, & omnibus tum rationibus, tum auctoritatibus inter se libratis, in ea opinione tanquam probabiliori permaneat, opus agendum esse contra Scripturam & Traditionem; id tamen tutâ conscientiam efficiet, si aliqua ratio, vel auctoritas Casuistica suppetat, quæ dicat id Traditioni neuiquam repugnare.

Nec obest quod interdum videatur Casuista ab Scriptura, vel Traditione discedere; quia potest sibi probabiliter, subindeque prudenter, ac proinde tutò suadere, objectionem illam sibi ineluctabilem ab ingenioso, & Dialectico Casuista, si adesset, bona aliqua distinctione solvi posse. Unde iuprudenter te gereres, si ob rationem in contrarium convincentem, sententiam, quæ ut probabilis circumfertur, improbabilem judicares. Imò criminis lethalis, & Casuisticæ majestatis læsæ reus fores, si pœnitentem talem opinionem sequutum non absolveres; quia licet tibi videatur manifestè Scripturæ, vel Traditioni contraria, ex novo humilitatis Probabilisticæ præcepto teneris in reverentiam Casuisticæ aliter sentientis suspendere iudicium tuum. Nam licet omnia alia peccata aliqua probabilitate excusari possint, unum tamen est, cui nunquam parcunt Probabilistæ, si nimirum illis infallibilitatem assecurandæ, ut loquuntur, conscientie non asseras. Hoc peccato si pecces, desperata est salus, peccasti in Spiritum sanctum, & tibi nec in hoc sæculo, nec in futuro remitteretur. Scilicet, scilicet! Sed salibus jocisque uti non placet, quia licet ridiculi errores jure rideri possint; nam ut ait Tertull. advers.

Valent. cap.6. *Multa sunt sic digna revinci, ut gravitate adorentur, ubicunque dignus risus officium est*; quia, ut addit alicubi Augustinus, misericorditer iridentur errores, ut ab errantibus rideantur & fugiantur: nihilominus impræsentiarum flere magis libet quàm ridere, & flendi magis quàm ridendi tempus advenit, dum videmus novas in dies induci doctrinæ corruptelas, quibus lascivientibus ingeniis laxissimæ ad peccandum habentæ remittuntur.

Hæc Probabilistarum ambagibus & æquivocationum fucò vagæ opinandi licentiam obteg-  
gentium calliditas mirè apparet in novissimo probabilitatis patrono P. Georgio de Rhodes, authore aliàs mihi probato, & ob egregias dotes laudato; sed quia in hac controversia excessisse videtur (ut verbis D. Thomæ modestissimis utar) & ea quæ tradit, mirè ad detrahendum Casuisticarum æquivocationum fucum juvant, placet cum illo scriptore, seposito omni verborum amarore velitari, & ea quæ *disp. 2. de actib. hum. quest. 2. sect. 3.* edisserit, ventilare.

In primis apertè semel & iterum ad declinandam corruptæ moralis disciplinæ totum orbem inficientis invidiam inculcat ad opinionem probabilem requiri, *Ut eam ratio aliqua bona fulciat: Ut contra eam non sit ratio aliqua convincens: Ut eam generaliter Doctores omnes non improbent, & tanquam absurdam & falsam explodant: Ut non repugnet principiis veris & receptis in Ecclesia, & communi sensui fidelium.* Quæ conditiones, inquit, si expendantur ab Adversariis, quos passim Jansenianos vocat, doctrinæ de sententia probabili perperam & injuriâ dicetur causa totius corruptionis, quæ inficit hodiernam Eccle-



siam. Hæc dum audis, Lector, nonne crederes puræ disciplinæ moralis castimoniam in tuto positam. Sed ne citò credas his ambagibus, quibus probabilistis doctrina non emendatur, sed impeditur & involvitur, seu callidè probabilitatis virus, ne percipiatur, obscuratur. Nam ille idem Author, qui tam accuratè præmonuisse videtur, nullius Doctoris auctoritatem sufficere ad conciliandam suis sententiis probabilitatem, si à Scriptura, Traditione, & sensu Ecclesiæ dissideant, statim id quod dedisse videbatur, totum retrahit, & omnimodam quibuscumque Probabilistis licentiam tribuit ad quamlibet opinionem sua probabilitate donandam.

Etenim §. 1. constituta opinionis communis & probabilis definitione, quæ multis pateret instantiis, si expendere vacaret, ait: *Imprudenter procedet, qui aliorum opiniones communiter receptas, vel etiam novas, ideo tantum judicaret improbabiles, quia rationes contra eas aliquas haberet, quas ipse non posset solvere, neque putaret ab aliis posse solvi; quia persuadere sibi prudens quisque debet, multas sæpe rationes nobis apparere insolubiles, quas faciliè alii solvunt: ideo nemo unquam debet solo judicio suo aliorum sententias judicare improbabiles.* Hæc ille, & ad Probabilistarum mentem omninò consonè. Sed profectò omnem illum fucatarum conditionum apparatus labefactat, ad nihilum redigit, & in actu exercito, ut loquuntur, retractat. Si enim opinio est censenda probabilis generatim & universè omnibus, quia alicui docto probabilis visa est, quanvis alii de ejus falsitate certi sint, quia habent aliquas rationes, quas ipsi non possunt solvere, nec putant ab aliis solvi posse, quibus per-

moti existimant opinionem illam *novam* Scripturæ vel Traditioni repugnare, certè jam penitus corruunt illæ præclaræ exceptiones, quibus P. Georgius nihil probabile habendum jactabat, quod convincenti rationi, vel divinæ, aut Ecclesiasticæ authoritati adversaretur; siquidem teneor suspendere judicium meum, & mihi persuadere, *rationes quas non possum solvere, facile alios solvere, nec eas meo solo judicio judicare improbables*. Ergo illa omnia doctrinæ moralis flagitia, quæ toti Ecclesiæ horrore fuerunt & indignationi, licita sunt & innoxia, quia ab aliquo docto Casuista tanquam probabilia tradita sunt, cui proinde Casuistica probabilitas manebit, donec congregetur Concilium OEcumenicum ad eam proscribendam.

Quare illæ omnes Probabilistarum corruptelæ, quas Parochi Parisienses in sua probabilitatis synopsi congesserunt, devorandæ erunt & permittendæ, cum eas tutas ac securas faciat alicujus Casuistæ, qui ut doctus & probabilis circumfertur, authoritas, si tandem verum sit quod idem P. Georgius probare conatur: *Dico secundò, sufficere omnino ad opinionem probabilem, ut eam Doctor aliquis magni nominis, & pius, præsertim recentior teneat*. Et ad 2. objectionem: Respondent Sanchez & Vasquez unius Doctoris authoritatem non sufficere ad opinionis probabilitatem, nisi rationes habeat quæ tibi probentur. Ego existimaverim, esse necesse, ut aliquas habeat rationes, sed necesse non esse, ut illa mihi probentur in seipsis; quia viri magni authoritas satis est magna ratio, ut judicem rationes illas esse probabiles, quibus sententiam suam confirmat. Atqui Doctores aliqui magni nominis, & præsertim recentior

res, in quorum defensionem se multi magni nominis viri armaverunt, calumniam criminibus eximunt, credis patrandæ potestatem hominibus ob levissimas causas faciunt; abortiones puellis, usuras avaris, furta servis non semel permittunt, ut in Parochorum excerptis exhibetur, appositis Casuistarum nominibus, allatis syllabatis sententiis cum exemplaribus collatis, citatisque libris, capitibus, paragraphis, numeris. Ergo quantumlibet illa dogmata videantur rationi & Scripturæ repugnantia, modo habeant aliquem Casuistam, qui hac ætate nunquam deest, nullum eorum poterit ut probabile rejici, nihilque proderit insolabiles adversus illa flagitia rationes proferre, & opposita argumenta evidenter solvere, si juxta P. Georgii decretum, *viri magni autoritas satis est magna ratio, ut judicem rationes ejus esse probabiles, etsi mihi non probentur.* Si, ut ait §. 2. *certa regula est, posse quemlibet operari eligendo illam opinionem, qua minùs videtur tuta, & minùs probabilis, relinquendo propriam opinionem probabiliorem & tutiorem, quia ille qui deserit opinionem probabiliorem, exponit tantum se periculo errandi speculativè, non practicè, & nihil obest te facere actum qui physicè ac materialiter bonus non sit, sed malus.* si Director conscientiarum possit respondere, *pœnitentem probabiliter teneri ad restitutionem, & probabiliter non teneri.* Et hoc, inquit ad 4. *dicet singulis & semper:* si, ut addit, *nunquam periculum erit corruptionis, quando aliquis sequetur id quod videbitur commodius, modo probabilis opinio doceat id esse licitum:* si, ut infert §. 3. *qui credit opinionem esse aliquo modo probabilem, secundum eam operari potest, etiamsi recedat à sententia com-*

munis, magis probabili & magis tuta : si, ut infert 2. potest quilibet recedere à sententia communi ; si enim doctus sit, rationem aliquam firmam habere potest, propter quam præferat sententiam suam sententia communi : si verò non sit doctus, potest prudenter doctrina ac moribus alicujus probati viri sic considerare, ut adhæreat sententia illius contra sententiam communem : si Doctor, ut infert 4. loco, potest contra propriam sententiam consilium dare juxta sententiam alienam, imò possit etiam respondere aliquando juxta unam sententiam, aliquando aliam sequendo : si denique Confessarius, sive ordinarius, sive delegatus, teneatur sub peccato mortali absolvere Pœnitentem qui opinionem sequitur probabilem, quam Confessarius ipse putat esse falsam.

Iam quis non videt his novis conditionibus è puro intimi probabilissimi fonte depromptis, superiores exceptiones, quibus vagæ probabilitatis pernicies occultabatur, veluti retractari, & ad nihilum redigi? Nulla enim est tam laxa corruptela ex iis omnibus, quæ ex Casuistis excerptæ sunt, quas nec à convincenti ratione, nec à Scripturis abhorreere suis non sit Authoribus persuasum, quas proinde probabilibus opinionibus accenset illa P. Rhodii regularum multitudo, qui proinde postquam in speciem probabilitatem coercere visus est, eam deinde magis magisque dilatavit. Vix enim ac ne vix quidem unquam continget, vel efficietur, opinionem ullam ex collectis à Parochis, non esse aliquo modo probabilem, & traditam à Casuista docto, cui adherere possumus contra sententiam communem, et si Confessarius putat eam esse falsam.

Rolluntne laxiores, lascivientibus ingeniis.



502 *Lib.VI. Differt.III. Cap.II.*

innitti habenæ? Certè nunquam se à suis laqueis expediet Adversarius, quandiu probabilior id juris dabit, ut aliquid tutum efficere possit. Et quanvis nefandorum consecratorum horrore perterritus exceptiones nescio quas afferre velit, nulla tamen erit morum absurditas quam possit recusare, quia eam ex aliquo probabili saltem probabiliter inferre non est difficile. Sic hæreticis hæresis, cui sunt innutriti; sic Judæis Judaismus, sic Mahometanis Alcorani lex, sic Ethnicis Ethnicismus dici poterit probabilis. Sic quilibet in Religione quavis, quæ probabilis appareat, ad salutem rectè poterit pervenire. Unde Caramuël probabilissimi consecutionum callentissimus *Theolog. fund. pag.472.* quàm id sit consequens, utrò agnoscit, & Basanomenum Lutheranum sic loquentem inducit: *Cur non licebit dicere, Romanam quidem Ecclesiam esse probabilissimam, adeoque in foro interno esse securissimam; & tamen hoc ipso non obstante, Lutheranam, quam ipse profitetur, esse etiam probabilem, atque æquè Christianam ac securam; imò securiorem omnino, quoniam minùs probabilis sententia, si benignior, etiam securior est? Cur non licebit addere, se esse in quieta conscientia apud Lutherum, adeoque non teneri redire ad Ecclesiam Romanam, nec à Christi Religione secedere. Sic discurret etiam cum Basanomenus, & deberet à te, Lector erudice, campesci. P.Valerianum Magnum audiuit, & alios audire desiderat. Idem docet Hermanus Busenbaur lib.2. tract.1. cap.2. Hæreticus quandiu suam sectam judicat esse credibiliorem, vel æquè credibilem, non tenetur credere; quia fides non dum est sufficienter proposita, ageretque imprudenter. Sed clariùs & asseverantiùs Eradus Billius tract. 3.*

cap. I. *Etiam puer baptizatus non peccabit credendo hæresi sibi proposita, & quam à parentibus edoctus est, nisi habeat argumenta convincentia, & probabilitatem excludentia sua secta. Quandiu enim probabilis est, non peccat eam sequendo. Quis enim dicat non habere argumenta probabilia sua secta? At nemo peccat sequens opinionem probabilem.*

Et quanvis hæ consequutiones sint horrendæ, & in veræ, Catholicæque Religionis exitium apertè grassentur, sunt tamen necessaria illatione ex probabilitate deductæ. Ergo ex probabilitatis doctrina, quàmlibet quibuldā conditionibus obsecrata, omnia Christianæ Ethicæ & ætæ viæ, quæ ducit ad vitam, principia nutantia, fluxa, & mobilia evadent. Ergo fidei, & Religionis retinacula abrumpentur, permittenturque omnia erraticæ rationis arbitrio, si ad novas opinationes quotidie fornicantes securitate donandas sufficiat volaticum probabilitatis proclubium. Ergo voluntariis illis exceptionibus, quibus probabilissimi fucō obliti sceditatem simpliciorum oculis subtrahant, nequaquam continere possunt, nequaquam coercere præcipientem luxuriantium ingeniorum impetum, quæ nihil non audebunt, nihil non probabile efficiant, ut præclaro probabilitatis umbone veluti iustitiâ imputativâ crimina tegant. Caveat, quæso, Adversarius, & qui nos Jansenianæ hæresis suspectos, nesciens quid diceret, pronuntiat, caveat, inquam, ne in ipsum æquiori jure telum quod intorquet, retorqueamus, & in probabilissimum, quem defendit, omnium hæresum origo refundatur; cùm nullum sit errorum genus, quod probabilitate defendi, suaderi, tutòque cligi non possit. Caveat ne opinandi licen-



tiâ Religio in apertum discrimen vocetur; ne Neutralistæ probabilitate tecti, Religionem perinde ac vestes quotidie mutant.

Multa, quibus adversæ sibi sententiæ defensores P. Rhodius afficit, convicia surdâ aure prætereo, quos vocat *novos Reformatores Theologia, & Ecclesiæ, vanissimos ac imperitissimos sanè homines, non intelligentes communem Theologia vocem, cujus ipsi micam nullam habent.* Sed totius stomachi bilem iratissimè effundit §. 2. ubi adversarios, quos *Iansenianos* opportunè importunè pronuntiat, appellat *turpissimè errantes, deferentes semitas iudicii ac iustitiæ, ut ambulent per salebras, duce perditissima fama homine damnato per iudicium Ecclesiæ.* Et interim exultabundus, & quasi certus ac securus victoriæ, ait doctrinam de minùs probabili, minusque tuta sententia turò sequenda amplecti, & *demonstrativè probare omnes alicujus nota Theologos, nec ullam esse nunc controversiam, propter quam pugnetur acriter contra novos errores.* Speciatim adducit plures Pontifices, Cardinales, Episcopos, Canonistas, Theologos, plura exemplâ manifestissima ex scripturis utriusque Testamenti, plurima ex Conciliis, ex Patribus, ex historia Ecclesiastica, quibus probatur clarissimè quàm sit improbabilis doctrina hæc novorum Dogmatistarum, qui volunt teneri quemlibet in quolibet negotio sequi sententiam magis tutam. Et infrâ addit, operantem juxta opinionem probabilem, facere quod licitum esse ait S. Thomas.

Non credebam Probabilistas, qui uni benignitati student, quive flexibilibus institutis ac lenimentis omnes ad se alliciunt, neminem submovent, tam citò, tam dirè stomachum commovere suum, & in adversarios iram eos erum-

pere adeo acerbam, à quibus ex probabilissimè præjudiciis nihil nisi melleum, nihil nisi urbanum meritò expectari posse videbatur. Verùm à mansuetudinis lege, sicut ab aliis solet, dispensare probabilitas potest pro domo sua. Quanquam autem tam amarulenta Adversarii ex impetu loquentis censura, adeo anticipatæ mihi de Probabilistarum lenitate & remissione opinioni contraria vehementem objurgationem & fraternam correctionem merebatur; tamen ex imposita mihi Thomisticæ modestiæ lege, non solum visum est mihi cum ipso agere remissè, sed etiam amicè: tum quia multa alia ab illo Authore commodè & piè scripta scio, quæ debitis ingenuè & libenter laudibus ornari debere agnosco: tum quia rixas & contentiones ægrè fert natura mea minimè stomachosam tum in reverentiam almæ Societatis, quæ ipsum in Christo genuit, cujus profectò existimationi non satis consuluisse videtur Adversarius, dum in limine sectionis 5. suam sententiam appellat *doctrinam Theologorum Societatis*; cum certum sit ab ea plures longè gravissimos Societatis Theologos vel abhorrere planè, vel eam variis limitibus coercere, quibusdam veluti aggeribus ad legis defensionem oppositis cupiditates sistere tentantes, ut fusè ostendit P. Deschamps in suo de quaestione facti opusculo: tum demùm, & potissimùm, quia ex probabilioris & tutioris sententiæ, cui adhæreo, decretis, non convicia conviciis reponere, sed maledicentibus benedicere; non malum pro malo reddere; sed cum omnibus pacem habere; non vinci à malo, sed vincere in bono malum tenemur, & juxta Pauli oraculum non ex Ca-

suistarum prolubiis, sed ex æternæ veritatis & Ecclesiæ institutis interpretandum illud: *Maledici regnum Dei non possidebunt.* Scio illud Casiodori lib.1. epist.28. *Ad injurias illi profiliunt, qui se superatos turpiter erubescunt.* Scio damnaſſe Gregorium lib.8. *Moral.cap.2. eos, qui de Deo, qui est pax nostra, pacificè loqui nesciunt.* Et certè si Christiani Theologi, & Sacerdotes disputationes excitent de animi rancore descendentes, si scribant stylo verborum atrocitate ferreo, felle amaro, morſibus sævo, unguium laceratione violento, non Theologi, sed maledici nomen merentur, quos qui legunt, alii detestatos abjiciunt sana gravitate, alii suaviter hauriunt malevola voluntate, omnes offenduntur urbanitatis honestate. Verumtamen quæ dixit, veluti commentario explicare non erit inutile, quia ex eorum patefactione aliquid lucis hætenus dictis accessurum spero.

Fateor quidem doctrinam à lege semper in conflictu opinionum stantem, novam quorundam Theologiam *reformare*, sed perennem & incorruptum Ecclesiæ de moribus sensura absque ulla innovatione conservare; quia ut præclare dicebat Episcoporum præcedentis sæculi gemma Bartholomæus à Martyribus: *Verba Dei & sanctorum promulgata non sunt ut variantur cum tempore, sed ut illibata permaneant in omni tempore. & eis serviant omnia tempora.* Ecclesiæ doctrinam non indigere reformatione, contra impios Lutheranos & Calvinistas pronuntio; sed Casuistarum multorum laxitatem non esse per irreformabilem & immutabilem Ecclesiæ doctrinam reformandam, nemo nisi deformatissimus negare potest. Desiderium reformationis

disciplinæ morum collapsæ luculentissimis verbis significavit sacrum Tridentinum Concilium sess. 2. *Cum hujus Sacrosancti Concilii præcipua cura, sollicitudo & intentio sit, ut propulsatis hæresum tenebris, quæ per tot annos operuerunt terram, Catholica veritatis lux, IESU CHRISTO, qui vera lux est, annuente, candor puritasque resulgeat, & ea quæ reformatione egent, reformentur; &c.* Et sess. 6. in decreto de reformatione, cap. 1. *Eadem sacrosancta Synodus ad restituendam collapsam admodum Ecclesiasticam disciplinam, depravatosque in Clero & Christiano populo mores emendandos se accingere volens, &c.* Vide quàm à sacri Concilii mente absint Probabilistæ. S. Synodus præcipuam curam, sollicitudinem & intentionem quæ reformatione egent, reformari avet: Probabilistæ de emendandis moribus, de reformanda laxitate, de instaurando, & pro virili restituendo primitivæ Ecclesiæ spiritu semper in sanis Ecclesiæ Romanæ membris vigente, nullam unquam cogitationem suscipiunt, nullum non de eo mitigando consilium habent. Sacra Synodus gravi dolore afficitur, quòd collapsa admodum sit Ecclesiastica disciplina: Probabilistæ nihil saucium, nihil ægrum in ea vident; omnibus malis, omnibus corruptelarum calamitatibus oppressam in plerisque membris Ecclesiam, felicem ut eum maximè, & florentem prædicant. Sacra Synodus ad depravatos in Clero & Christiano populo mores emendandos se accingere vult: Probabilistæ ad fontem aperiendum se semper accingunt, ex quo innumera depravationes fluxerunt, & innumera fluent in posterum, si ad opinionem securitate donandam sufficere probabilitatis verisimilitudinem concedatur. Sacra Synodus ibidem

*initium reformationis à majoribus Ecclesiis sumendum censet* : Probabilistæ nihil in Pastoralis munere tremendum aut arduum vident ; Prælatos, Clericos, Christianos sæculi moribus placidè vivere sinunt , salutis iter variis suavitatibus temperatum cum vitæ deliciis copulant ; quia pro variis hominum moribus varia habent de moribus decreta. Et quia Theologi intrepidi, favente Deo, duce D. Thoma & saniori Theologiâ, Sacri Concilii menti & votis conformari volunt , & ea tradere, quibus ad praxim reductis, *brevi tempore reformaretur mundus*, inquit Gravina noster lib. 4. sui Cherubini Paradisi, cap. 3. *qui ex licentia opinandi in præceptis ruit, latissimam viam ingrediendo quæ ducit ad perditionem*, propterea ab Adversario reformatores Ecclesiæ & Theologia vanissimi & imperitissimi audient.

Sed non intelligimus, inquit, *communem Theologia vocem*. Cujus, quæso, Theologiæ ? Thomisticæ ? Scotisticæ ? At D. Thomas & Scotus Scholæ principes ea pro nostra sententia oracula tradiderunt, quæ non essent apertiora, si essent radiis solaribus scripta. Cujus, inquam, Theologiæ vocem ignoramus ? Qui veterum Theologorum omnium, nemine excepto, & recentiorum multorum longè præstantissimorum venerando choro stipati Probabilistarum laxitatem reprimimus, corrupta morum decreta novitatibus ad perniciem impellentibus culpamus, accusamus, objurgamus, & omnibus Theologiæ Catholicæ locis refutamus. Et post hæc, si Superis placet, *communem Theologia vocem*, ipsa etiam Theologiæ elementa & rudimenta ignorant Aquinas, Scotus, Antoninus, Cajetanus, Soto, Sylvester, Gravina, Fagnanus, Comitulus, Gonetius, Vin-

centius Baronius. Non oportet, mi Georgi, frustra aërem verberare, non campos verborum captare, in quibus ventosè & inaniter calamus excurrat, vel saltem ingenitâ Probabilistis dulcedine desertâ, nos nihil tale meritos exasperare; sed seligere argumenta, quibus efficias Theologiæ vocem ab eis ignorari, qui duos Theologiæ Coryphæos suæ habent doctrinæ fidejussores, probabilioris sententiæ necessariò sequendæ suffragatores, probabilissimi impugnatores.

Nec mirum quod ignorantibus Theologiæ vocem, Theologiæ micam nullam concedat liberalissimus Adversarius. Divitem epulonem indutum purpura & bysso, epulantem splendide damnat Scriptura, quia Lazarum jacentem ad januam, & cupientem saturari de micis quæ cadebant de mensa divitis, nemo illi dabat. Sed & canes veniebant, & lingeabant ulcèra ejus. Luc. 16. Quæ ferrea viscera adamante duriora sic egregiè & acriter reprehendit Chrysologus serm. 121. Dives superbo oculo & insatiabili corde omnia & audire & videre & sentire contemnit. Et novo modo, fratres, humanitatis ordo mutatur: fit humana mendicitas, ut cupiditas prodatur inhumana. Dives pauperem nec cadentibus de mensa micis pascit: & Lazarus pauper, quia aliud non habebat, etiam de carnibus suis canibus humanus extitit. Miser dives, si panem non dedisti, quare vel canes abigere noluisti? Sed mitiores te canes tui, imò tu scivior canibus tuis. Nam te sciviente illi parcut, qui non ad morsum dentes, sed linguas ad obsequium sic producunt, ut in modum spongia non vexent vulnèr, sed detergant.

Ab sit ut Adversarium cum divite epulone,



nostræ sententiæ authores cum Lazaro comparem. Hoc solùm adverto, quod sicut Scriptura & Patres divitem præ tumore denegantem micæ reprehendunt, & canum lambentium vulnera pietatem famem vincentem laudant; ita iidem Patres Catholicos verborum amarore adversarios mordentes reprobant, hæreticos verò humaniùs, urbaniusque more canum lambentes, à comitate laudant. Desiderassem adversarium hanc temperatam agendi rationem fuisse æmulatum, nec passum se humanitate ab infidelibus adversarios suos benignè impugnantibus superari. Quia timere debet omnis doctus ne in illam incidat superbiam, quâ ut ait Greg. hom. 4. in Evangel. *dum doctrinam legis non ad charitatem habet, sed ad elationem, quasi de acceptis opibus tumet: & quia ei verba defluunt de scientia, quasi mica cadunt de mensa.* Observat etiam idem Chrysologus *serm. 122.* ideo divitem solius linguæ æstibus desiderasse subveniri, quanvis totum eum possideret, totum combureret ignis inferni, *quia magis lingua uritur, ardet, aestuat, quam insultavit pauperi.* Ut discant docti adversarios suos non floccifacere, non insultando contemnere, sed rationum momentis aggredi & expugnare. Non decet muliercularum more ubi defunt argumenta, oppositos authores *turpissimè errantes, deserentes semitas iudicii, ambulantes per fulebra,* appellare; quasi verò deessent nobis acriora verba, quibus eadem probra in adversarium regeremus, nisi linguam & calamus patientissima christianæ modestiæ præcepta continerent. Quod verò nos *Iansenianos* appellat, ut nostræ sententiæ invidiam creet, supra depulsum est tanquam ridiculum, & tyrannicum: ridiculum quidem;

non enim agitur de illo celebri propositionum  
quinario asserto ab illis, quos Jansenistas appel-  
lant, si tamen modò aliqui sunt in rerum natura:  
nullum enim novi, nullum invenire potui li-  
brum, in quo damnatæ propositiones, à tempore  
damnationis typis dato propugnatae legan-  
tur. Et quanvis aliqui illis tenerentur errori-  
bus, quid inde pro, vel contra probabilitatem?  
Quid propterea moliri potest P. Rhodius ad-  
versum nos aperta fidei professione omnes sus-  
piciones amolientes, & quinque illa capita de-  
testantes? Quid absurdius quàm omnes adver-  
sarios tanquam unum hominem spectare, &  
unius errores omnibus indiscriminatim asserere?  
Ergo imbellis, vel ridiculus apud omnes audiet  
qui nostram de probabilitate sententiam Janse-  
nianam vocat, nisi efficiat omnes vagæ proba-  
bilitatis impugnatores Innocentii constitutio-  
nem repudiare. Quod quàm sit chimæricum,  
quàm absurdum, nemo non videt. Porro quid ab  
æquitate magis alienum, quid tyrannide illa  
crudelius, quæ Theologos Catholicos constrin-  
gere vult, ut omnes alicujus authoris sententias  
propter hoc solùm proscribant, quia inveniun-  
tur nonnullæ justo Ecclesiæ judicio proscriptæ,  
ita ut alterutrum vitare non possimus, quin vel  
bona cum malis confundentes contra æquita-  
tem peccemus, vel apud homines famam & no-  
men hæretici, etiam dum Catholica dogmata  
propugnemus, suscipiamus? Nam ut aliàs pon-  
deravimus, quinque propositiones Ecclesia  
Romana damnavit, Apologiam Casuistarum ea-  
dem Ecclesia condemnavit. Ergo Apologiæ im-  
pugnatores Jansenianos appellare, est eadem  
infamiâ, si quæ sit, Romanam Ecclesiam asper-

gere. Quis non rideat vanas, pueriles, & insulas accusationes Jansenismi, quibus Probabilistæ meticulosos deterrent, simplices dedudunt.

Verum ab Adversario divite, & nullius egente scire averem, cur ex promptuariis plenis eructantibus ex hoc in illud, nullam Traditionis Patrum, & Conciliorum *micam* eruere potuerit, qui ovans, triumphans, & quasi nuntabundus se plura posse eruere ait ex *Pontificibus, Cardinalibus, Scripturis, Conciliis, Patribus, Theologis, Canonistis, historia Ecclesiastica, quibus probatur clarissime quàm sit improbabilis doctrina hac novorum Dogmatistarum*. Atqui hoc unum quærimus, de hoc solo quæstio vertitur, hoc uno tota causa continetur, & hoc unum omittit Adversarius sibi conscius, planèque intelligens hæc quæ unicè desideramus, sibi ex ipsa causæ, quam tuetur, conditione deesse. Sed quod interim, cum sit inermis, nudus, spoliatus omni Patrum præsidio, omni traditionis in hac controversia luce destitutus, nihilo inde factus humilior, plenis buccis dicat se Patribus & Conciliis innominatis abundare, hoc est quod me admiratione & stupore defigit. Et quod auget admirationem est, quod cum nostra sententia sit antiquorum omnium calculo probata, tamen nos *novorum Dogmatistarum* lutulento convitio laceffit, mortalium omnium scilicet mitissimus, cum certum sit Casuisticam de minùs probabilis ac minùs tutæ opinionis securitate sententiam ab omnibus antiquis nedum Patribus, sed etiam Scholasticis expressè fuisse damnatam, & oppositam per trecentos & amplius annos edoctam & receptam: quod ad dejiciendos Adversarii nihil

probantis, nihil ex antiquitate afferentis plausus abundè sufficit.

Respondet iterum P. Rhodius, se variis aliis limitibus probabilitatis licentiam cum Suare & aliis coërcere : nam non licet sequi minùs probabilem, quando proximo grave aliquod damnum imminet. Sic medicus peccat gravissimè, si certum relinquens medicamentum, adhibet duntaxat probabile : quod repugnat non solum charitati, sed etiam justitiæ, cum fraudet ægrotum committentem se illi bona fide, ut adhibeat optima remedia. Sic Judex non potest damnare eum qui habet potiores tum juris, tum facti rationes. Sic etiam Minister Sacramentorum non potest assumere materiam probabilem deserta certa, si proximus exponatur periculo.

Sed contrà : Nulla est de rebus terrenis consultatio isti, in qua de salute agitur, conferenda. Quid enim prodest homini universum mundum lucrari, animæ verò suæ detrimentum pati : aut quam commutationem dabit homo pro anima sua ? Et voce Veritatis jubemur nō timere illos qui occidunt corpus, nec possunt amplius quicquam facere ; sed magis timere eum, qui corpus & animam in gehennam mittere potest. Atqui in rebus humanis levissimis, in rerum periturarum discrimine probabiliora & tutiora sequi ex Adversario tenemur : Ergo à fortiori in momentosissimis animæ negotiis, in quibus tota agitur & periclitatur æternitas, non minori cautela sequi tutiora debemus. Ex Adversario si horrendus est medicus, qui medicamentum aliquod probabiliùs lethiferum putans, illud tamen ægrotò, ut se illi accomodet, propinat, quia retorrido cuidam medico probabile visum est ; si detestandus est

minister, qui consilium à Rege rogatus, non quod salutare magis suadet, sed quod sibi perniciosum probabilius judicatur, prætexens id consilii genus suo judicio exitiale, alicui alteri benè visum fuisse; quàm multò magis abominandus est Casuista, qui salutem consulentis pœnitentis suspendit, & exponit ob unam nescio cujus opinionem tam infirmis nixam rationibus, ut eam falsam putet?

Disparitas est, inquires, quia medicamentum revera mortiferum non potest medicus opinione probabili efficere salutare, nec exitiosum desinet esset Principi datum consilium, si reipsa tale sit, quanvis sit probabilitatis fucò illitum. O absurdam, & claudicantem responsionem! O disparem & irrationabilem disparitatis rationem! Errore medici non fit sanum remedium insanum: & errore Casuistæ licitum fiet, quod & suapte naturâ illicitum est, & tale esse probabilius judicatur? Quis hoc credat, has exceptiones aliquo solido fundamento niti quis intelligat? Nunquid enim salus æquè chara est mercatori, militi, confessario, ac medico, vel judici sua? Nunquid paris periculi est peccatum in nundinis ac in pharmacopoliis patratum? Nonne eadem est immobilis veritatis regula, ad quam omnes conscientiæ exigendæ sunt? Cur aliqui communi fraudabuntur probabilitatis jure, si per se licitum est; vel cur omnium libertati, & tranquillitati non est peræquè consulendum? Ergo vel in totum damnanda probabilitatis licentia, vel perinde omnibus permittenda.

Imò hujusmodi exceptiones plus reipsa nocent, & absolutè fictitiæ sunt. Nocent quidem, laxantque potiùs, quàm restringunt; quia cùm

exceptio firmet regulam in contrarium, si quibusdam duntaxat metæ ac limites apponuntur, eisque cavetur, ne minùs probabilem, minusve tutam sequantur, cæteris omnibus aperitur licentiæ aditus, fractisque repagulis infinita flagitiorum probabilitate aliqua involutorum colluvies fluat. Fictitiæ verò sunt, quia cùm juxta communia infimæ probabilitatis principia liceat opinioni minùs probabili adhærere, modò tandem induta sit probabilitate intrinseca, vel extrinseca, id est à ratione, vel ab alicujus Casuistæ probabilitate petita, cùm ejusmodi exceptiones non admittantur ab omnibus Casuistis, nihil revera coërcent. Quia dispar Casuistarum in varios sensus abeuntium judicium probabilitatem utriusque non tollit, sed fovet: unde quod sint concordēs, vel discordēs, nihil ad rem, cùm singulorum auctoritate singulis opinionibus probabilitas, subindeque par securitas vindicetur.

Quin ipsa discordia commoda est, cùm ejus beneficio conscientie libertatem nanciscamur. Atqui circa præfatas exceptiones variæ, & discrepantes sunt Casuistarum sententiæ: nam Professore scholarum minùs sibi probabilia docentem peccare mortaliter tradit Suares, quia tunc non fungitur Magistri officio, ad quod Respublica deputavit, infertque discipulis injuriam, quibus sententiam sibi falsam existimatam instillat. At Salas id non esse peccatum nisi veniale censet. Imò, ait ipse P. Rhodius, *verius judico, quod ille ne venialiter quidem peccat; licet enim cuilibet sequi sententiam probabilem; & sanè imponeretur alioqui nimis grave onus Præceptoribus.* Hæc ille ad principia probabilitatis om-



ninò consequenter. Sed quid prodest limitatio Suaris frustra probabilitatis usum temperare sagagentis? In materia justitiæ cum agitur de restitutione, Doctorem non posse minùs probabilem sequi, docet Valentia. Hanc exceptionem despicunt Sanches & Castro, & dissidium ex Vasque componit P. Rhodius. ea distinctione, quâ interroganti nihil commodius: *Si eum*, inquit, *à quo interrogaris obligas ad restitutionem, non potes respondere juxta sententiam minùs probabilem, tacendo tuam: quando autem illum deobligas, potes respondere secundum sententiam minùs probabilem.* Valde profectò opportunè: sed amabò, Pater Georgi, estne hoc juxta Apostoli mandatum esse *sapiens in bono, simplex in malo*? Dum agitur de restitutionis onere imponendo, non possum obligare ex aliena sententia contra meam; dum agitur de exonerando, seu (ut tu loqueris) *deobligando*, possum sequi minùs probabilem, & falsò respondeo, *si solam sententiam obligantem explico.* Periculum illi times qui pecuniam ex aliqua sententia minùs probabili, sed tuta restitueret, & illi non times qui probabiliòri obligante ad restitutionem desertà, ex minùs probabili non restituit. Quàm belli Probabilistarum scrupuli! ibi timent, ubi nihil opus est; ubi opus est, nihil timent. Sic coërcet Adversarius vagam probabilitatis licentiam. Quin illis ipsis exceptionibus probabilitatem dum corrigere videtur, magis inficit; quia cum probabilitas vaga & effrænis tot quæ secum importat malis, sui horrorem incutiat, qui retentum probabilitatis principium temperare videntur, horrorem mali minuunt, non perniciem; venenum melle oblinunt, ut immedicabilius efficiatur.

Rursus

Rursum ministri Sacramentorum ex Suare  
semper tenentur uti materia & forma certis,  
ablegatis dubiis, aut probabilibus. At illam pro-  
babilissimi correctionem corrigens ex Vasque &  
Sanche Georgius de Rhodes, docet §.3. corolla-  
rio 6. quod etiam quando de valore agitur, v.g.  
quando est probabile aliquam materiam, aut for-  
mam validam esse, & est probabilius illam esse in-  
validam, tunc per se loquendo licet sequi sententiam  
probabilem, per accidens autem non licet, quando  
praeceptum Ecclesia obstat, vel prohibet proximi cha-  
ritas. Si ergo de sola Sacramenti agatur reverentia,  
potest quilibet sequi sententiam probabilem, aequè in  
hac materia sicut in aliis. Sic fortibus claustris  
coërcet opinandi licentiam Adversarius, sic Sa-  
cramentorum reverentiæ consulit. Sed hæc non  
moror, sed ad propositum infero chimæricas  
esse quorundam Probabilistarum exceptiones  
quæ ab aliis Comprobabilistis floccifiunt. Quod  
in aliis exceptionibus circa Medicos & Judices  
pariter contingit, digladiantibus inter se. Ca-  
suiſtis, sed pugna suâ nihil officientibus, quia  
diversorum Casuistarum utraque opinio proba-  
bilis, utraque est secunda: illa prodest quam se-  
queris, nec illa nocet quam rejicis.

Hinc sæpe mihi inquirenti, unde tanta, tam  
prodigiosa opinionum probabilium in qualibet  
ferè controversia varietas suis authoribus mu-  
nita orta sit, occurrit hæc responsio, easdem  
ferè rationes induxisse probabilitatum & Pro-  
babilistarum dissentientium multitudinem, quæ  
pluralitatem Deorum in mundum invexerunt.  
Observavimus lib. 1. dissert. 2. magnam illam in  
idololatriam propensionem olim tam pervulga-  
tam exortam esse ex desiderio asciscendi sibi pa-

troni, ad quem à Deo irato confugerent, juxta illud Ovidii: *Iupiter in Troiam, pro Troia stabat Apollo: Sape premente Deo fert Deus alter opem.* Tum etiam, ut eo magis concupiscentiæ laxarent habenas, quo sceleribus patrocinari Deos arbitrabantur. Ita similiter dum homines normas morum exquirunt suis utilitatibus congruentes, opportuna est illis discrepans Casuistarum multitudo; quia dum unus est ab utili vel delectabili alienior, ad alium benigniorem confugium patet, quem in tanta diversitate citò invenire promptum est, quo patrono & sponse quieti, & nullo conscientiae morlu perturbati peccatores, post suas concupiscentias eo alacrius eunt, quo vident eas ab aliquo Doctore quadantenus consecratas. Hinc tanta probabilitatum copia inundavit, quia quæ timidè & subdubitanter primùm prodierunt opiniones, accedente numerosâ Casuistarum nova semper eudentium turbâ, postea vulgares, & deinde certæ factæ sunt, quarum omnium sententiarum delectum nequaquam ancipitem ac periculosum pronuntiarunt, sed ejus quæ magis arriserit, deligendæ optionem permiserunt. Sicut autem in magno omnigenarum vestium apparatu vix est ut non sibi quisque aptam inveniat; & in oppiparo instructissimæ mensæ convivio nullus est tam fastidiosus, qui non incurrat in cibum aliquem gustui suo congruentem; & ut in myriade illa falsorum Deorum aliquis tandem inveniebatur propensionibus consentaneus: sic rarò admodum fit, & vix unquam contingit, ut in tanta probabilitatum multitudine non aliquam reperiant homines cupiditatum igne succensi votis suis favorem. Unde sicut Casuistis

parum utuntur, qui Deum & veritatem per se  
lucentem quærunt, sic illos summè colunt &  
assiduè lætitant, qui Evangelii asperitatem  
amore sæculi allecti ferre nolunt.

*Solvuntur objectiones P. Rhodii.*

Argumenta quæ ad suam stabilendam senten-  
tiam producit Rhodius, jam ferè occupata sunt.  
Quia tamen Adversarius non desinit gloriari, &  
ita se de demonstrationum evidentia jactare, ut  
dicat *solam terminorum sua sententia explicatio-*  
*nem* esse evidentissimam demonstrationem; ju-  
vat ad tantam ejus fiduciam & fastum paululum  
compescendum, pauca levissimæ armaturæ ejus  
argumenta proponere, & refellere.

Sic arguo, inquit: Nemo malè potest ope-  
rari, quandiu prudenter & cum ratione ope-  
ratur; nam malum illud est, quod repugnat  
rationi & prudentiæ; quis enim dixerit, nisi sit  
stultissimus, posse aliquem prudenter peccare?  
Sed qui sequitur opinionem probabilem, pru-  
denter, & cum ratione operatur; nam proba-  
bilis opinio illa est, quam bona ratio fulcit,  
alioqui non est probabilis: Ergo qui sequitur  
opinionem probabilem, prudenter, & cum ra-  
tione operatur, non temerè, vel imprudenter.  
*Qua certè demonstratio* ( addit solitâ suâ urbani-  
tate ) *apertam esse declarat Adversariorum vel*  
*ignorantiam, vel malitiam.*

2. Deinde argumentatur optimè S. Antoni-  
nus. Si teneretur quilibet eligere id quod est tu-  
tius & certius, tenerentur omnes Religionem  
ingredi, quæ via est longè tutior ad salutem;  
2. immò nullum esset discrimen iuter consilia &

& præcepta ; nam consiliorum via tutior est : ergo eam sequi tenemur. *Quod*, inquit, *Adversarios pudebit affirmare.*

3. Tutius est sine dubio contentum esse debere quemlibet unico beneficio Ecclesiastico, cujus redditus satis sint ad sustentationem ; nunquid tamen audebunt Adversarii omnes illos damnare, qui plura servant beneficia?

4. Cùm sit difficillimum in omnibus reperire certò veritatem, non voluit Deus obligare homines, nisi ut operarentur cum certitudine morali ; nunquid enim certitudo physica exigitur ? Sed qui sequitur sententiam probabilem, operatur cum morali certitudine ; *nam certitudo moralis illa est, quæ nititur ratione aliqua.* Ergo licet sequi sententiam probabilem, quæ videtur minùs tuta, & minùs probabilis, relinquendo propriam opinionem probabiliorem, & tutiorem. Ecce præclara illa, & evidentiæ adversarii demonstrationes ubique crepantis argumenta. En magnificas illas demonstrationes, quas tanta liberalitate pollicetur, ut solam terminorum explicationem velit apertissimam esse convictionem. Verumtamen ex dictis omnes illæ argutiæ sponte dissiliunt, palamque fiet his voceferationibus, clamoribus, injuriis, syllogismis, quibus plenis buccis sese nos obtritutum minatur, ne quidem nos adoriri ; ipsum contrà nulla fidentiùs affirmare, quàm quæ apertè falsa ; nulla asseverantiùs negare, quàm quæ apertè vera esse responsione ad singula clarebit.

Ad primum dico, patere responsionem ex quarta ratione suprâ posita, ubi monstravimus prudentiæ quidem carnis consentaneam esse minùs probabilem, sed prudentiæ spiritus è

diametro repugnantem; quin & omne prudentiæ lumen extinguere ab his qui docent utilia, incerta, minus tuta, minusve probabilia posse honestis, tutioribus & probabilioribus anteponi, idque variis exemplis evidentissimis illustravimus. Sed quia hæc materia nunquam exhauritur, addo rationem illam non solum non esse demonstrationem, sed esse apertum sophisma manifesta petitione principii, aliisque vitiis laborans; hoc enim est de quo disputatur, utrum opinio minus probabilis, minusve tuta sit in concursu probabilioris & tutioris prudens, quod eadem facilitate rejicitur à nobis, quàm ab Adversariis affirmatur, & fingitur. Et certè si assensus prudens & probabilis reverà coinciderent, sponte labant & irrumpuntur omnes illi obices quibus probabilitatis licentiam & profluvium sistere voluit P. Georgius; si enim assensus prudens & probabilis sint synonymi: ergo excusabitur Medicus probabilia remedia adhibens, tutis, & efficacioribus prætermittis: ergo absolvetur venator reatu homicidii, qui hominem occiderit, causatus sibi probabiliter visum esse feram, tametsi probabilius esse hominem opinatus sit: ergo non damnabitur Religionis candidatus, qui sectæ sibi probabiliter, abjectâ Religione Catholica sibi probabilior, & tutiore, nomen dederit: ergo justificabitur Iudex qui reum nec convictum, nec confessum, ex probabilibus suspectum, sed ex probabilioribus innocentem pœnâ capitis multaverit: ergo prudentiæ consona erunt illa nefanda consuetudina legem Dei dissipantia, quæ aliqua probabilitate saltem extrinseca non carere; ex principiis probabilitatis constans est:



Atqui consequentia illa omnibus aliquod sanitatis intervallum habentibus horrore sunt, & execrationi, nec ea devorare audet Adversarius: Ergo opinio probabilis absolutè non est prudens regula operationis, dum tuta, & probabilior occurrit.

Et post hæc quis non obstupeſcat, sophisina illa tantâ assereentiâ demonstrationis nomine ab Adversario insigniri, ut non dubitarit eâ *declarari apertam esse Adversariorum vel ignorantiam, vel malitiam*. Cum tamen sole meridiano clariùs demonstratum sit, regulam illam P. Georgii, *Opinio probabilis eadem est qua prudens*, absolutè prolatam ad omnium hæreseon ignorantiam, ad omnium flagitiorum malitiam viam sternere ac munire, imò & in Atheorum voraginem impellere, & præcipites dare. Quid enim non deducatur ex illa regula probabilitatem cum prudentia imprudentissimè confundentè? Ex illa prorsus totius fidei, Religionis, honestatis everſio liquidò consequitur; si enim ad licitum, prudentemque assensum sufficiat probabilitas: ergo liberum erit Atheo, & Libertino opinari de immortalitate animæ, eamque prudenter negare Catholicam assertionem, quam difficultatibus circumseptam probabiliter videt: ergo licitum erit Hæreticis Mysteriorum augustissimorum insuperabilibus argumentis impugnatorum fidem repellere: ergo licitum erit Christianis illas omnes morum corruptelas ad praxim redigere, quas probabiles aliqui Casuistæ crediderunt. Quænam ergo est, inquires, opinio prudens? Respondeo, eam verè prudentem esse, & jure appellari, quæ non solum in rebus necessariis necessitate medii & causæ effe-

Arctici salutis, qualia sunt Fides & Sacramenta, sed etiam in necessariis necessitate præcepti tutiora sectatur, statque pro lege & officio; quia nullum inde impendere potest periculum, quod alteri parti subesse potest, imò nec abstergi potest. Quia juxta prudentiæ naturalis & Christianæ leges, si in opinionum conflictu, & in dubiis tutiorem partem non eligas, nunquam cohibebitur opinandi licentia, debetque Libertinis & Hæreticis probabilitatis jus permitti, si probabile & prudens idem sint. Qui proinde coram Deo excusationem habebunt de peccato suo; contestabuntur enim se nihil egisse vel credidisse, quod à probabilitatis regula recesserit. At in nostra sententia asserente in dubiis, seu controversiis tutiorem partem esse eligendam, meritò accusantur Athei, meritò culpantur Libertini, quòd non illi parti adhaerint, unde nullum creari malum poterat, nulla jactura timeri.

Ad secundum respondeo, S. Antoninum manifestè loqui, quando utraque pars tuta est, ut patet exemplo quod affert; nam status matrimonii per se tutus est, tamen si tutior sit status virginitatis; per se tuta est via præceptorum, etsi tutior sit via consiliorum. Non loquitur ergo Antoninus de minùs, vel æquè probabilibus sententiis, in quibus tutiorem sententiam sequendam ipsemet docet, ut antè demonstravimus.

Ad tertium respondet ipsemet S. Thomas quod! 8. *sæpe citato*, art. 13. ubi ait: *Dicendum quod quando sunt dua opinioniones contraria de eodem, oportet esse alteram veram, & alteram falsam. Aut ergo ille qui facit contra opinionem Magistrorum, utpote habendo plures præbendas, facit contra ve-*

*ram opinionem ; & sic cùm faciat contra legem Dei , non excusatur à peccato , quanvis non faciat contra conscientiam ; sic enim contra legem Dei facit. Aut illa opinio non est vera , sed magis contraria , quam iste sequitur , ita quod verè licet habere plures præbendas ; & tunc distinguendum est , quia aut talis habet conscientiam de contrario ; & sic iterum peccat contra conscientiam faciens , quanvis non contra legem ; aut non habet conscientiam de contrario , sed certitudinem , sed tamen in quandam dubitationem inducitur contrarietate opinionum ; & sic si manente dubitatione plures præbendas habet , periculo se committit , & sic procul dubio peccat , utpote magis amans beneficium temporale , quam propriam salutem ; aut ex contrariis opinionibus in nullam dubitationem adducitur , & sic non committit se discrimini , nec peccat. Quæ verba sunt ita enucleatè distincta , ut non egeant commentario.*

*Sed difficultatem magis in speciali definit quodl. 9. art. 15. sic : Actionum humanarum multiplex est differentia. Quædam enim sunt quæ habent deformitatem inseparabiliter annexam , ut fornicatio , adulterium , & alia hujusmodi , quæ nullo modo benè fieri possunt. De numero talium non est habere plures præbendas , aliàs in nullo casu dispensationem recipere posset , quod nullus dicit. Quædam sunt actiones , quæ de se indifferentes sunt ad bonum vel malum , ut levare festucam de terra , vel aliquid hujusmodi , inter quarum numerum quidam computant habere plures præbendas , dicentes : Ita licitum est habere plures præbendas , sicut habere plura poma. Sed hoc non videtur esse verum , cùm hoc quod est habere plures præbendas , plurimas in*

se inordinationes contineat, utpote quod non est possibile aliquem in pluribus Ecclesiis deservire, in quibus est præbendatus; cum præbendæ videantur esse ordinatæ quasi quædam stipendia Deo ibidem ministrantium. Sequitur etiam diminutio cultus divini, dum unus loco plurium instituitur. Sequitur etiam in aliquibus defraudatio voluntatum testatorum, qui ad hoc aliqua bona Ecclesiis contulerunt, ut certus numerus Deo deservientium ibi esset. Sequitur etiam inæqualitas, dum unus pluribus beneficiis abundat, & alius nec unum habere potest. Et multa alia hujusmodi quæ de facili patent. Unde non potest contineri inter indifferentes actiones, & multò minùs inter eas quæ sunt secundùm se bonæ, ut dare elemosynam, & ejusmodi.

Sunt verò quædam actiones, quæ absolute consideratæ deformitatem vel inordinationem quandam important, quæ tamen aliquibus circumstantiis advenientibus bonæ efficiuntur; sicut occidere hominem, vel percutere, in se deformitatem quandam importat. Sed si addatur occidere malefactorem propter justitiam, vel percutere delinquentem causâ disciplinæ, non erit peccatum, sed virtuosum. In numero harum actionum videtur esse habere plures præbendas. Quanvis enim aliquas inordinationes contineat, tamen aliæ circumstantiæ possunt supervenire ita honestantes actum, quod prædictæ inordinationes totaliter evacuentur, utputà si sit opus in pluribus Ecclesiis ejus obsequio, & possit plus servire Ecclesiæ, vel tantundem absens, quàm alius præsens, & si quæ alia sunt hujusmodi, & tunc istis conditionibus super-

826 *Lib.VI. Dissert.III. Cap.II.*

venientibus cum recta intentione, non erit peccatum, etiam nulla dispensatione interveniente, si consideretur tantum secundum jus naturale; quia dispensatio ad jus naturale non pertinet, sed tantum ad jus positivum. Si verò aliquis hac intentione plura beneficia habeat, ut sit ditior, ut laurius vivat, & ut facilius ad Episcopatum perveniat in aliqua Ecclesiarum ubi est præbendatus, non tolluntur prædictæ deformitates, sed augentur; quia cum tali intentione & unum beneficium habere (quod nullam inordinationem importat) esset illicitum.

Et sic quidem esset dicendum jus naturale, etiam nullo jure positivo superveniente. Nunc autem certum est, per antiqua jura hoc esse prohibitum, consuetudinem esse contrariam, per quam quidam dicunt illa jura esse abrogata. Nam per contrariam consuetudinem, jura humana abrogantur. Quidam verò dicunt, per hanc consuetudinem antiqua jura non abrogari, eo quod quædam Decretales dicunt: Multa per patientiam tolerantur, quæ si in judicium fuerint deducta, justitiâ cogente cassarentur. Et hæc controversia Juristis est relinquenda. Quavis hoc videatur esse probabile, quod quantum ad hoc quod jura illa antiqua continent jus naturale, abrogari non possint per contrariam consuetudinem, utpote irrationalem. Quantum autem ad hoc, quod solum de jure positivo continent, possunt esse abrogata, præcipuè si dissimulantes hanc contrariam consuetudinem, in quorum potestate est jus positivum mutare, intendunt per talem dissimulationem antiqua jura mutare.

Si ergo antiqua jura quæ hoc prohibent, in-

fuo robore maneant, contraria consuetudine non obstante, certum est non posse aliquem plures præbendas habere absque dispensatione, etiam illis circumstantiis supervenientibus, quæ secundum considerationem juris naturalis actum poterant honestare. Si autem antiqua jura sunt per consuetudinem abrogata, tunc prædictis circumstantiis supervenientibus, etiam sine dispensatione licitum est plures præbendas habere, sine quibus circumstantiis licitum non est, quantumcunque dispensatio interveniat, eo quod dispensatio humana non aufert ligamen juris positivi, quod per hominem statuitur, & per hominem dispensari potest.

Hæc omnia D. Thomas, cujus responsionem fortassis non expectabat P. Rhodius, qui fortassis non reponet, sicut nonnullus alius: *Hæc definitio commoda erat D. Thomæ præbendis nudo, sed minimè apta beneficiariis.* Sed sive commoda sit, sive incommoda, est certè maximè his temporibus necessaria doctrina: dura quidem Sacerdotiorum poligamiâ laborantibus, sed pauperibus pauperis Christi ministris modico victu & vestitu contentis suavissima, quidquid contrà cupiditas probabilitate armata obganniat.

Ad tertium respondeo, sufficere quidem homines operari cum certitudine morali, nec exigi physicam: at ille qui sequitur opinionem minus probabilem, minusve tutam, desertâ probabilioris & tutioris, non operatur cum certitudine morali de honestate operationis: tum quia verisimilius existimat, operationem illam esse malam & illicitam: tum quia probabilitas non est certa benè operandi regula, sed ad summum probabilis, & valde dubia, imò falsa & periculosa.



ut omni genere argumentorum demonstravimus. Tum quia ille solus cum certitudine moraliter operatur, qui illi adhæret sententiæ, quæ nulli nos errandi, peccandive periculo exponit, qualis est probabilior & tutior: viri porro prudentis est in negotio æternitatis tutiora sequi, & viciniora saluti; nisi enim velimus in re tanta periclitari, anteponenda sunt semper quæ secura sunt, iis quæ commodi, aut voluptatis causâ geruntur. Hoc argumento permotus Henricus IV. Galliarum Rex hæresim, quam cum lacte suserat, ejuravit. Cùm enim observasset omnes tam Catholicæ, quàm Calvinianæ confessionis Doctores à se consultos in hoc convenisse, Religionem Catholicam tutum esse ad salutem medium, & hoc solum discrepasse, quod Catholici non solum tutum, sed etiam unicum esse contenderent, intulit acerrimi judicii Princeps, ad illam redeundum esse Religionem, quæ secundum omnes certa esset ad salutem viâ, licet juxta minus probabilem Doctbrum Calvinianorum sententiâ non esset sola. Quod gloriosissimi Regis prudentissimum consilium non imitantur, qui deserta probabilior & tutior sententiâ, quam omnes Theologi certam & immunitem à periculo confitentur, possint nos minus probabilem amplecti docent, quam plures, gravesque Theologi securitate nudant, licet probabiliori aliquorum judicio idoneum sit medium quo salutem consequamur.

Instat Adversarius: Ille non peccat qui operatur juxta gravissimorum Doctbrum sententiâ: Sed plures Doctores, iique gravissimi docent, licitum esse minus probabilis sententiæ delectum: Ergo securè minus probabilem opinionem deligere possumus.

Confirmat id ipsum §. 1. Sufficit ad opinionem probabilem & tutam autoritas unius Doctoris pii & eruditi, quia in negotiis humanis prudenter solent homines unius consilio regere: v.g. unicuique medicum adhibent ad tuendam sanitatem, unum Advocatum ad conservandum iura familiae, unum Architectum ad exstruendam domum, unum Confessarium ad regendam conscientiam: Ergo signum est quod autoritas boni alicujus Doctoris est ratio sufficiens ad findendam opinionis probabilitatem, quantum tunc sequi valeamus.

Respondeo patere satis quid dicendum sit ad autoritatem eorum qui minori probabilitate patrocinantur, cum ostensum sit omnes Theologos quotquot ante octoginta annos scripserunt, tutioris sententiae electionem in conspectu opinionum praecipisse, eorumque iudicium recentiorum Probabilistarum sententiae multis nominibus, potissimum vero numero, autoritate, & concordia praestare. Sed quae latius prosequuti sumus, iterare non est necesse. Et certe non est mirum, plures huic sententiae faventi libertati astipulari, & Doctores prurientes auribus coaceruari; amor enim libertatis, & concupiscentia voluptatis mentem acuit, ut quae placent rationum honestate praecoloret. Unde Hieronymus lib. 2. adversus Jovin. c. 19: *Quod multi acquiescunt sententia tua, iudicium est voluptatis; non enim tam te loquentem probant, quam suis faventem vitiis.*

Ad confirmationem respondeo, nequaquam sufficere unius Doctoris autoritatem contra probabiliorem & tutiorem sententiae securitatem se erigentem: tum quia ut ex D. Thoma alias diximus, in his quae pertinent ad fidem & bonos

mores , nullus excusatur si sequatur opinionem erroneam alicujus Magistri. Tum quia singulare unius Doctoris sese Theologorum torrenti opponentis inventum, nedum incertum est , sed nec probabile dici debet , quia juxta Philosophum 1. Topic. cap. 1. *Probabilia sunt qua videntur omnibus, aut pluribus, aut sapientibus, & his maximè notis.* Tum quia jam omni doctrinæ flagitio danda erit venia, si ad opinionem securitate donandam unius sufficiat Doctoris moderni authoritas; illa namque portenta doctrinæ, quæ suprâ retulimus, nec Doctore carent, nec rationum veritilimum fucio. Ad exempla verò quæ adducuntur, dicendum hinc potius confirmari nostram sententiam? sicut enim nullus nisi insanus se crederet medico minùs probabilia remedia desertis probabilioribus adhibenti, nullus domum suam illi committeret architecto ædificandam, quem sciret regulis minùs probabilibus & incertis opificia sua dirigere: ita nullus, nisi periculi amans, ei se Confessario regendum tradit, qui hanc suæ directionis regulam statuit: Potest quisque quodvis probabile sectari, etiam dum æquè, aut magis falsum videtur quàm verum. Illum ergo Confessarium vitæ nostræ rectorem tutò eligimus, qui in difficultatibus eam partem anteponit, quæ conformior est legi & appetitui recto; quia si in cæcum ducem incurramus, ambo in foveam cademus; quia in dubiis, præsertim juris naturalis, nusquam certa est nisi in veritate securitas. Nec propterea animarum tortores jure audimus, uti Probabilistæ obtrudunt; cùm nihil difficilius, aut operosius ad salutem præscribamus, quàm quæ prudentiores sæculi in temporalibus observant, in qui-

bus meliora & tutiora captant, & sectantur.

Hæc sunt argumenta P. Rhodii, quæ tantum abest intentum demonstrare, ut potius demonstrativè confutentur. Multa alia congerunt Probabilistæ argumenta, quæ licet admittentibus excusabilem juris naturalis ignorantiam non nihil difficultatis facestant, à nobis tamen nullo negotio dissolvuntur, qui credimus non probabilitatem, sed veritatem tutam esse agendorum regulam, quia non in Schola Pythagoræ degimus, sed in Schola Christi, qui non dixit, *Ego sum probabilitas*; sed, *Ego sum veritas*. Quam veritatem, legisque notitiam perpetuis precibus & gemitibus à Deo justî efflagitant, sibi que comparatam alios pro virili docent; quia si arbitrium probabilitatis usum permitterent, certò crederent se virtutem & actiones honestas parum aut nihil curare.

Dices: Usus regulæ de sectanda minùs probabili opinione, ab annis plurimis in vectus, jus legitimæ possessionis habet: Sed in dubiis melior est conditio possidentis: Ergo manutenendus est homo in possessione suæ libertatis contra legem divinam & in dubio legis sensu potest sequi quamcunque probabilem interpretationem.

Respondeo hujus regulæ, *Melior est conditio possidentis*, perperam intellectæ abusu facile omnes leges eversum iri, cum nunquam ingenioso Probabilistæ defuturum sit benignum aliquod interpretamentum, aliqua distinctione legis sensum dubium reddens. Quis autem credat, eam esse Legislatorum mentem, ut cuique subditorum licentiam faciant interpretandi legem à se latam? Quis non videt hoc perverso hujus regulæ usu aperiri viam latissimam ad pericula

& peccata legem violantia, & immensam perniciosorum dogmatum colluviem citò proditura? Porro illa regula rem possidenti vindicans, in rebus externis à jure adhibita, immeritò ad alia dubia juris præsertim naturalis extenditur, quia sola possessio libertatis contra legem nullam veritatis præsumptionem ingerit, sicut contingit in externis fortunæ bonis, quæ possidens re sua tandiu potiri censendus est, quandiu non constat de injustitia possessionis. Ac verò in dubio juris, an opus sit licitum, vel illicitum, possessio libertatis nequit facere licitum quod est æternæ legis decreto reprobatur; quia ejus incommutabilis decreti rectitudo non de libertate creata, sed de increata sanctitate pensatur. Imò in dubiis juris naturalis possessio semper stat pro lege, cujus veritas manet in æternum, quam nulla proinde libertas infringere, nulla consuetudo abrogare potest. Denique si in dubiis semper standum esset pro jure possidentis, ad nihilum planè redigeretur regula illa sacratissima, *In dubiis tutior pars est eligenda*. Unde rectè observat Prosper Fagnanus, jus possessionis extra judicia fori esse ridiculum, & commentitium, & omni laxitate periculosius; quia licet in foro externo facta aliorum in bonam partem & benigniori modo interpretari, nō privare aliquem possessione famæ vel fortunarum, idque ex lege charitatis, quæ non cogitat malum, & mavult sæpiùs decipi dum malos bonos reputat, quàm si vel unum probum malum falsò pronuntiet. At verò in foro conscientiæ opera nostra verè jubemur, malaque propria augere magis expedit quàm elevare, seu minuire. Vana est ergo libertatis possessio adversus legem Dei omni libera-

tate priorem, quæ præcipit in dubiis conscientiæ tutiora esse sectanda.

Instabis: Qui sequitur aliquam opinionem probabilem, id agit quod sibi apparet honestum, aliàs opinio esset improbabilis: Ergo nihil peccat, nihil turpitudinis ex objecto actus derivat.

Respondéo multos contendere, impossibilem esse assensum opinionis minùs probabilis in concursu probabilioris; cui sententiæ favent omnia quæ suprà inter formandas rationes nostras adduximus: sed quia hanc doctrinam, tametsi verissimam, spinis logicis & metaphysicis intexunt & interpungunt Probabilistæ, ideo faciliùs dico, quod siue assensus ille possibilis sit, siue impossibilis, est tamen illicitus, quod retorquendo instantiam factam demonstro. Si quis agit quod apparet probabiliter honestum, rectè agit: ergo similiter perversè agit, qui agit quod sibi probabiliùs apparet inhonestum. Cum enim actus spècificentur ab objectis, si probabilis bonitas refundat honestatem in actum, quidni probabilior turpitudine objecti non refundet in actum turpitudinem, cum ea sit creaturarum omnium conditio faciliùs infici quàm honestati; bonum enim ex integra causâ, malum ex quocumque defectu? Atqui ille qui deserta probabilior & tutiore, sequitur minùs probabilem, minusve tutam, id agit quod probabiliùs illicitum arbitratur: Ergo certissimè peccat. Hoc unico argumento, si cætera quæ abundant deessent, causa ista conficeretur.

Pro aliarum infinitarum objectionum solutione, atque hætenus dictorum luce & compendio, placet præclara verba succo plenissima Vin-



centii nostri Baronii *ex disp. 2. sect. 2. art. 3. §. 1.* referre, quæ meritò dixeris totius gravissimæ huiusce controversiæ medullam: Sanè si uni veritati studeamus, necesse est probabiliora querere, quæ vero viciniore, & à falso remotiora sunt. Si peccatum pejus angue odio habendum, tutiora pro lege sunt sectanda, quæ carent omni metu peccati, & specie mali. Denique si certam salutem nos facere oporteat, deligenda sunt media efficaciora, quæ si per ignorantiam omittas, nihil habent quod illorum vicem & vim impleat, neque fortè quod te apud Deum excuset, & à damnatione eximat. Immotum ergo sit principium & Theologia Moralis fundamentum, nos triplici quasi vinculo adstringi ad probabiliores pro lege opiniones, quod veriores præ aliis, quod secura & à peccato immunes, quod efficaces ad salutem consequendam.

Si opiniones minùs probabiles pro libertate adversus legem stantes attendamus, totidem vitiis iis tribus dotibus infestis laborant, quatenus minùs probabiles propiores sunt falso quàm vero, deinde obnoxia sunt peccato; & quanvis nullum apponerent impedimentum ad salutem, & excusarent à peccato; nihil tamen conferunt ad illam consequendam, & interdum semovent media quibus salus constare potest, & certò comparari.

Tria omninò necessaria sunt ad felicitatem adipiscendam, nempe veritas quæ aperiat quò sit eundum; bonitas quæ peccati impedimenta submoveat, & viam sternat quâ sit eundum; virtus virefque, quibus cursum intendamus & consummemus. Hæc tria à Christo sunt haurienda & accipienda, & se daturum pollicetur his verbis: *Ego sum via, veritas, & vita.* Quà

veritas, docet nos ad quid sumus nati, quæ sit nostra felicitas, & quò tendere nos oporteat: quâ via, semovet peccata & scandala, quæ nostrum ad cœlum cursum præpediunt: quâ vita, dat vires efficacissimas, confert gratiam & virtutes infusas, Sacramenta instituit, quibus muniti cursum perficimus, & vitam æternam consequimur.

Qui docent delectum laxiorum opinionum, etiam cùm agitur de mediis ad salutem, & de Religionis delectu, putantque sine noxa nos posse sequi quamlibet opinionem, aut Religionem quæ probabilitate non careat, tria nobis infligunt vulnera insanabilia; veritatis quærendæ studium extinguunt & lucem obscurant, licentiâ datâ minùs probabilium eligendorum, quæ à vero remotiora sunt quàm à falso; offendicula apponunt viæ quâ itur ad cœlum, dum opinionibus favent quæ legi adversantur; denique dum mediis efficacioribus sufficiunt quæcumque libuerit, vitam auferunt, cujus conferendæ abundantioris gratiâ Christus dicit se in mundum venisse,

Hæc cum moderamine inculpatæ tutelæ dicta sint, non ut calamum in Adversarium distringerem, qui omnes sincera veneratione prosequor, cui ab omni livore & odio alieno nihil virorum eruditorum (qualis est P. Rhodius, cujus elaboratam Theologiam nulli Sociorum cedere, multis præstare dicent qui non sunt invidi) reverentiâ, nihil pace, & cum omnibus concordiâ antiquius. Sed cùm tanta acerbitate nostram sententiam, etiam post damnatam Apologiam Casuistarum habeat, cùm nos iis verborum injuriis laceßat, quæ ab ingenita ejus urbanitate

abhorreant; cùm iis utatur argumentis, quæ nihil respiciant præclaram ejus eruditionem, subtilitatem, dispositionem, perspicuitatem, aliasque eximias ejus dotes, quas ultrò & libens agnosco, sed potiùs eam minuunt, quam sibi in aliis multis disputationibus comparavit eruditionis & pietatis opinionem; non potui hanc ejus prolapsionem (quam Comitulus fœdam vocat, & divinæ legi injuriâ) dissimulare, ut in secunda, si quam adornet, editione omnia retractet, quæ magnam multis possunt offensionem asferre; ea corrigat, quibus emendatis multum ad ejus Theologiæ utilitatem adjectum fuerit, non parum etiam ad P. Rhodii laudem, quam salva veritate omnibus modis amplificari sincerissimè avelo.

Ita sanè hanc ab Adversario spero æquitatem, quâ & Lectoribus, & Sacræ Societati suæ, & propriæ existimationi consulat. Nec hanc meam non tam responsionem, quàm à fraterna charitatè prodeuntem monitionem, ex partiam præjudicio animique alienatione factam putet pervelim; cùm ipsum nunquam viderim nisi in scriptis ejus à me non semel laudatis, & in superioribus tonis laudandis, si copiam eorum habuissem. Quin potiùs, ut verum fatear, quia nihil mihi candore potius est, ideo eas ex Patre Rhodio labe rescandas optarem, ut liber ejus perfectus prodiret; quia tanto in hac materia potest esse perniciosior, quanto in aliis est disputationibus correctior & ornatior. Dum ab indoctis, vel obscuris Authoribus veritas impetitur, excidii periculum avertere non est difficile; sed propinatum à viro bono & docto venenum nocentius est, quo occultius & ipsi propinanti.

bibentique latentius. Cum ergo certus sim, & ferè jurare audeam, Adversarium noluisse de industria & meditatò lectores suos in laqueos & insidias inducere, sed scribendo quæ retulimus & bona intentione non caruisse, & sacrificium se præstare Deo fortassis censuisse; non despero fore quin agnita veritate, ea humiliter recantet, quæ nunquam debuerat scripsisse. Nam etiam si posset dari juris naturalis invincibilis ignorantia (quod tamen inficiamur) quomodo post Romanæ Ecclesiæ in Apologiam & Amadæum justissimas censuras poterit ignorantia invincibilis excusationum cavillos coram justo iudice afferre, cui tot dubitandi, adeoque se retractandi rationes instillavimus, quibus velliendum, pulsandumque ejus animum in Domino confido.

Neque enim spei meæ, expectationique eum defuturum credo, si seriò perspexerit quantum periculi res plena sit, quòd convenientia necessariis, probabilia tutis, utilia honestis, libertatem legi anteposuerit; nec pessimam, credo, affectabit in hoc periculossissimo dogmate tuendo constantia famam, sed veritate coactus fatebitur ex probabilitatis doctrina, quam acriter tueretur, innumera doctrinæ flagitia fluxisse, majoraque, ni emendet, fluxura, si ad opinionem securitate donandam sufficiat probabilitas pro qua pugnat. Ergo vide, mi Pater, ac provide, ne illarum, quæ ex probabilitate à te asserta sponte fluunt, culparum in divino aliquando iudicio pœnas luas; vulneri, quod incautus inflixisti, remedium adhibe; tot mala satage resarcire. Et sicut ego suprà lapsus quorundam è nostris non defensione, sed damnatione repuli:

ita tuas, tuorumque prolapsiones quascunque in quibuscunque sine personarum acceptione detestare: & ambo illud ab Augustino *lib. 2. de Bapt. cont. Donat. cap. 3.* veridicè dictum sincerè profiteamur: *Aliter sapere quàm res se habeat, humana tentatio est; nimis autem amando sententiam suam usque ad praevidenda communionis, & condemnati schismatis, vel hæresis sacrilegium pervenire, diabolica præsumptio est: in nullo autem sapere aliter quàm res se habeat, Angelica perfectio est. Qui igitur homines sumus, sed spe Angeli sumus, quibus æquales in resurrectione futuri sumus, quoad perfectiorem Angeli non habemus, præsumptionem diaboli non habeamus; ideo dicit Apostolus: Tentatio non vos apprehendat, nisi humana. Humanum est ergo aliquid aliter quàm se res habeat sapere.*

Illud etiam ab Adversario, aliisque Probabilistis jure peto, ut non sint adeo morosi & iniqui censores, ut dum vident aliquos solidæ pietati vacantes, Christianâ modestiâ mores & gestus componentes, cum maximis sæculi luctantes, usuras sub colore interesse non admittentes, labore manuum otio bellum indicentes, in conflictu opinionum tutiora sectantes, cum tremore salutem operantes, tuta quæque timentes, pro officio semper stantes, collapsam disciplinam pro virili instaurantes, non statim illos novæ hæresis suspectos, & Jansenisini compertos pronuntient. *Impertinens est; dicebat vir gravissimus mihi Romæ familiaris, illa accusatio, quam damnatione Apologiæ Casuistarum in Jansenistas ipse Alexander VII. depulit. Innumeris vitiis laborat hæc obsectio toties Jansenismum infontibus occinens: puerilis est, un-*

dique rimas agit, & è trivio tota sumpta hæc cantilena, ad invidiam intrepidis divinæ legis defensoribus conflandam imperitissimè, & juxta à iniquissimè instituta. Si bonis rationibus Probabilistæ ex misera suæ causæ conditione carent, ad lutulenta & inepta convitia non confugiant, à dissertationibus ad injurias muliercularum more non veniant, modum habeant, & finem faciant dictierorum, à quibus non nisi disceptantium odia, & legentium scandala derivantur, quæve magis authoribus nocent, quàm iis in quos furunt & debacchantur. Eam saltem modestiam, gravitatem, urbanitatem præ se ferant, quam in scriptionibus suis hæretici non omnino feroces vix patiuntur desiderari. Quod si adhuc nolunt quidquam de sua sævitia remittere, me saltem sciant iis non esse accusationibus opportunum, quibus nostræ sententiæ defensores immeritò gravant: nam post illa mea præjudicia *dissert. præambulâ* stabilita, post assertam Romano Pontifici jurium definiendorum infallibilitatem, non possum nisi per summam iniquitatem *novus Dogmatista* audire, qui uni Romanæ Ecclesiæ, extra quam nulli ad salutem aditum patère certissimè credo, addicor, & totis medullis cordium, totis præcordiorum affectibus cum B. Catharina Senensi Dominicanæ familiæ gloria & honorificentia in orationibus suis, ideintidem rogo: O summa & ineffabilis Deitas! non sum dignus orare, sed tu potes me facere dignum. Vicarii tui Romani Pontificis amore teneor. Unum corpus à te habeo, quod tibi reddo, & offero. Ecce carnem, ecce sanguinem: absumatur, deservatur, scindantur etiam, & vitulentur ossa mea medullis suis pro Vicario tuo.



Non dubito tamen, quin post hanc sinceræ orationis professionem mihi Jansenismum Probabilistæ objiciant, rati beneficio probabilitatis omnes consequentias quâmlibet inconsequentes se posse deducere, aquam è pecuniâ extundere, mel de petra, oleum de saxo, falsum ex vero, quodlibet ex quolibet elicere, & ea quæ non sunt, tanquam ea quæ sunt ad vocare.

*Reflexio & monita ad Confessarios.*

*Si cæcus cæco ducatum præstet, ambo in foveam cadunt. Ars artium, experimentum periculosum regimen animarum.* Quale sit officium vestrum, ô Confessarii, animarumque Rectores, seriò considerate, seriò timeate. Quod si vos fortè aliena minùs pericula movent (quod de vestro zelo non audeo credere, vel suspicari) vestra vos certè commoveant, & ad tutiora semper sectanda, intrepidè pœnitentibus instillanda compellant. Erratis planè, & vehementer erratis, & periculosè erratis, si ex nimia, effrænataquæ indulgentia, quæ omnibus flagitiis lenimenta quærit, nullum in vos, nullum in Ecclesiam periculum creditis redundare. Si malum est peccata committere, malitiæ extremum est alienis peccatis suadendo, docendoque consentire. Si nocens est pœnitens, qui cæci Rectoris ductu legem naturalem offendit, licèt quia nesciens, plagis vapulabit paucis; nocentior profectò est, plagisque valupabit multis, qui sciens tutæ & probabilioris sententiæ veritatem, minoris probabilitatis decretis pœnitentes imbuat nullo conscientia morſu perturbatos, sed falsa pace securos.

securos. *Si oculos in corde habetis*, ut ait Augustinus; si sint *oculi vestri in capite*, & non in calcaneo, ut ait Scriptura, cernite agi non solum consulentis vos æternam salutem, quem prævum forè consilium in æternum præcipitabit, sed vestram agi qui consulimini, qui si alium in foveam impuleritis, haud dubie in eandem ipsi corruetis.

Vidistis infinitam ad omne flagitiorum genus licentiam probabilismo aperiri. Vidistis quot nefaria morum dogmata pepererit, quot longè deteriora magis magisque, ni coërceatur & extirpetur pestifera radix, parere possit. Nullibi sanè, nullibi tanti mali remedium esse potest, nisi in vigore Confessariorum, quæ tantum habeat in sedulo tenendis puræ disciplinæ moralis regulis firmitatem, quantam in tuendo vagæ probabilitatis perniciosissimo dogmate affectant Probabilistæ constantiæ famam. Tantum vos ad probabilissimum debellandum conitamina, tantum contendite, quantum illi satagunt obbibitum errorem, & Romanæ Ecclesiæ exosum in perpetuum retinere. Tanti periculi metum accuratè semper vos expendite, quod illi nolunt semel agnoscere. Primitivæ Ecclesiæ formas ac regulas morum in intimo spiritu impressas gerite; quantum potestis vel nunc tenete, vel quod temporum cladibus tenere non possitis, ingemiscite & dolete. Scio quidem nonnulla, moderante Christianâ prudentiâ, esse dissimulanda, ne præcipiti zelo pax Ecclesiæ & fidelium concordia perturbetur; sed simul attendite hæc non tam latè patere, quàm putant Probabilistæ. Semper enim improbavit Ecclesia, semper damnat, & in æternum puniet Deus quidquid

contra leges ac statuta à Confessariis ignaviâ ac molliâ peccatur.

Attendito quod non levem à vobis rationem exiget Deus, nisi ad disciplinam Ecclesiasticam tenendam instaurandamque incumbatis. Nonnulla quidem saltem in externo Ecclesiæ foro prudentia patitur, nonnullas dissimulat interiores & arcanas labe, à quibusdam etiam foras erumpentibus nonnunquam oculos avertit, majorisque mali vitandi causâ tolerare videtur, quæ remedium parare temporum difficultatibus impedita nequit. At in foro interno, in quo vos judices estis, sacerdotalem zelum vestrum exigit, ut sine metu, falsoque pudore arguatis, obsecratis, increpetis, ædificetis, eradicetis, atque invalescentibus abusibus vehementius obniti & reluctari curetis, quibus majori perniciæ conceditis, & bonos usus aboleri finitis, quàm si contra leges privatim vobis solis peccaretis, nihil aliis exemplo, turpique conniventia nocituri.

An nescitis non ex criminum, quam nanciscuntur, impunitate, sed ex æterna lege nullâ hominum injuriâ, nullâ desuetudine abrogandâ omnia vobis judicanda esse? An nescitis multa innoxie tolerare provisores generales, quæ vos sanguinis Christi dispensatores tolerare sine piaculo non potestis. Quia si explorata pœnitentis dispositione Sacramenta indignis administratis, si sanctum canibus datis, si eos solvitis qui ad delenda peccata nihil laboris obire voluerint, si omnibus promiscuè absolutionem dandam existimatis, nec antè dispicitis utrum illos Christus solvat in cœlo, quorum in terra vincula relaxatis; si eos absolvitis, quos Christus condem-

nat, si indiligenter exploretis, sufficientemne dolorem afferat pœnitens, & tale non peccandi propositum, cui meritò credere possitis; dum eos solvere præsumentis vos magis implicatis, nec ministerii vestri dignitatem satis attenditis, nec dispensatores fideles estis.

Sed enini, ait, aliter sentiunt Casuistæ, nec solum sentiunt, sed suadent licere Confessario ex opinione probabili, quam certò falsam putet, consilium dare; quin mortalis peccati reum esse Confessarium, qui pœnitentibus probabilis opinionem sequentibus absolutionem neget. Quis tam severo præcepto obtemperare non reformidet? Quis illud tam Sacrosanctum Probabilistarum decretum cum æternæ salutis discrimine violare attentabit? Grande (scilicet) malum esse debet, quod constanter Casuistæ suorum decretorum aspernatoribus minantur. Cum enim illis innata sit benignitas, cum illis calumnia veniale ac leve peccatum sit, cum homicidium honoris sui tuendi causâ nullum peccatum incredibili indulgentia prædicetur, cum ab illis simonia palliata, ambitus, conversatio ad obtinenda pinguiora Sacerdotia, propriarum utilitatum in capeflendis & obeundis Ecclesiæ muneribus consecratio passim aliqua distinctione, aliqua intentionis directione permittantur, malorum omnium summum, & summa esse debet, ac peccatum infinitum infinitate intrinseca & extrinseca esse debet absolutio pœnitentibus probabili opinione nixis denegata.

Sed ô inauditam Probabilistarum severitatem cum solita decretorum ipsorum remissione malè coherentem! Quàm suspectum in propria causa iudicii rigorem! Quàm grande pri-

vilegium decretorum suorum violatores mortalis criminis poenâ summo jure multare ! Quis hoc credat ? Quis putet in Casuistas neminem venialiter posse peccare ? Quis credat non dari ullam opinionem contrariam aliqua saltem tenuis probabilitatis colore indutam ? Non arbitror , ô Confessarii , in vestris animis sic officii vestri , sic communis pietatis extinctas esse notiones , ut huic inanissimo præcepto divinorum omnium præceptorum exterminio obtemperetis : sed potius arbitror vos inde inferre , quàm abominandum sit vagæ probabilitatis dogma cum tam nefando præcepto religatum , quo jubemini esse bilingues , duplices , inconstantes , veritatis cognitæ desertores , cognitæ falsitatis suasores , in corde & corde loquentes , pondus & pondus habentes , modò hoc , modò illud contra id quod sentitis effutientes , ut nedum Christianam sinceritatem , sed & philosophicam gravitatem , & honesti hominis constantiam violare sub interminatione peccati mortalis , neque in hoc sæculo , neque in futuro , ni faciatis , remittendi teneamini . O novos intolerandæ legis Apostolos omnibus omnia factos ! Sed proh dolor ! non in sensu Apostoli ; nam isti omnium temporum Doctores modò juxta unam , modò juxta aliam opinionem Confessarios consulere docent . Et magnus Apostolus 2. Cor. 1. pronuntiat : *An quæ cogito , secundum carnem cogito , ut sit apud me Est , & Non ? Fidelis autem Deus , quia sermo noster qui fuit apud vos , non est in illo est , & non . Dei enim Filius IESVS CHRISTVS , qui in vobis per nos predicatus est , per me , & Sylvanum , & Timotheum , non fuit est , & non , sed est in illo fuit . Ergo illud Probabilistarum , Est lici-*

*tum, non est licitum*, illud licet, & non licet, fuit ab Apostolo veritatis reprobaturum.

Cum certum sit omnes de rebus terrenis consultationes, in quibus homines tam diligentem navare operam solent, nihil esse præ magnitudine illius, in qua quæritur, num aliquo facto violetur Dei honor, eoque an ad æternam salutem, an ad æternum exitium perveniatur; quis nisi impius consiliarius illam viam prudens ac sciens suadebit, quam ex propria sententia ad inferos ferre, quâ Deum offendi, ejusque legem infringi certò judicat? Hanc duplicitem in paganismo horruissent Ethnici, hanc in commercio horrent mercatores, hanc in infirmitatibus fugiunt ægroti, hanc in consiliis detestantur Principes: & in negotio negotiorum, in uno necessario, in animæ detrimento, in Paradisi discrimine hoc licitum, ô Confessarii, putabitis, quod in temporalibus rebus, in negotiis de nihilo nefandum, flagitiosum, proditorium haberetis? Quis non ducem illum execraretur, quis omnibus eum diris devovendum non censeret, qui noctu itinerantibus eam viam monstraret, quæ probabilius, & sibi veriùs in præcipitii abyssum, vel puteum interitus fert, & inducit? Sic sentire, sic docere est communissima nedum Christianæ vitæ, sed humanæ societatis præcepta ignorare. Lupi venientis periculum inminens latratibus, motibus, & signis indicat canis, & naturalis hujus charitatis bestiis insitæ benignitatem non imitabuntur Confessarii Christiani, sed potiùs consilium petentibus illud præscribent, quod perniciosum & reverà falsum putant. O cæcitatem indicibilem! ô judicii iniquissimi perversitatem! Sancti nihil



aliud quàm veritatem, Deique voluntatem invenire studentes, post longas vigilias, post frequentatas orationes, post omnem adhibitam diligentiam, post evacuata præjudicia, adhuc securitatem non spondent, sed verentur ne aliquas tenebras offusa cupiditas, & circumstans nos peccatum rationi sparserit; ardentiusque postulant ut tenebras illuminet veritas, ut cor ab occultis mandet castimonia, ut spiritum rectum in visceribus ( id est in latentibus animi recessibus ) innovet Deus: At novi Probabilistæ vanam illam bonorum meticulosorum formidinem aspernati, non solum occultarum cupiditatum insidias non timent, sed apertas & cognitatas, & probabilius illicitas judicatas, sequi licere palam docent; nec erubescunt suadere ex magno numero luxuriantium opinionum illam eligere fas esse, quæ ad cupiditatis, voluptatis, utilitatisque normam dinoscitur, appetitui perspecta fuerit congruentior, & desideriis favorabilior.

At enim, inquietis, nolumus peccati mortalis labem contrahere: atqui pœnitenti probabilem opinionem sequuto negare absolutionem culpa est ex genere suo mortalis, ut communis sententia Probabilistarum satellitio munita fert. Ego contrà contendo, opinionem illam esse omnibus Sanctis ignoratam, vel reprobata, & Confessarium peccati mortalis reum esse qui absolutionis beneficium sequenti opinionem quam judicat falsam, impartitur. Nonne Confessarius manifestè judicium conscientie violaret, qui illum absolveret cui conscientia judicat retinenda esse peccata? Nonne juxta Ecclesie doctrinam Confessarius est iudex, medicus, doctor peccatoris pœnitentis? At nemo dixerit

judicem desertâ propriâ, & probabiliori sententiâ teneri sententiæ minùs probabili, quam judex errorem censeat, conformari; nemo asseruerit medicum, ut ægroti minùs probabili sententiæ consentiat, teneri contra propriam, probabilioremque sententiam illud medicamentum præscribere, quod verosimiliùs censeat nociturum; nemo scripserit Doctorem veritatis cognitione instructum ea debere tueri dogmata, quia discipulorum falsæ, sed probabili persuasione magis conveniunt. Nonne melius justiusque diceretur, & judici reum, & medico infirmum, & Doctori discipulum assentiri oportere?

Et certè cùm secundum aliquos Casuistas non liceat pœnitentem illum absolvere, frustra minitantur peccatum mortale Probabilistæ, quod ex ipsa probabilitatis doctrina non committitur; si enim opinio probabilis secum fert securitatem, probabilitatem minorum sequutum securè non absolvam, eum non debere eum absolvi, censeat aliqui probabilissimi defensores. Sed absit ut propter eorum solam auctoritatem tales absolvatis Pœnitentes, & falsa reconciliatione deludatis, quos ex firmiori veritatis sermone solvere non potestis, si eos ligatos putatis in cœlo. Absit ut aliqua lege pœnitentem vos fallere teneamini, & veritatem vobis liquidè cognitam abjicere, ut reorum errantem opinionem sequamini. Absit ut veritatem vobis cognitam ardentibus votis expetitam, & Dei lumine conspicuam in injustitia detineatis, cùm dicat Lactantius lib. 3. cap. 13. *Ne trahamur auctoritate cujusquam, sed veritati potius accedamus.* Nullus hic temeritati locus est; in aeternum stulti:ia pœna suberunda est, si aut persona inanis

*aut opinio falsa decipiat. Timete ne cæci fixis, & duces cæcorum. Timete ne peccatis alienis consentientes, non solum propriæ pravitatis, sed etiam alienæ iniquitatis pœnas luatis. Timete illud à Domino per Prophetam intentatum: Væ qui consueunt pulvillos sub omni cubito manus, & faciunt cervicalia sub capite universa atatis ad capiendas animas. Id est, ut exponit Gregorius Magnus lib. 18. Moral. cap. 4. væ qui peccatoribus adulantur. Pulvillus, inquit, ponitur ut mollius quiescat. Quisquis ergo male agentibus adulatur, pulvillum sub capite, vel cubito jacentis ponit, ut qui corripiri ex culpa debuerat, in ea sultus laudibus molliter requiescat.*

### SPECVLATIO III.

#### *Varia scrupulosi remedia parantur.*

**N**ihil frequentius nostræ sententiæ, aut invidiosius objici solet, quàm nostris de probabiliore sententia sectanda decretis impleam, anxiam, scrupulisque innumeris implicatam Christianæ vitæ rationem effici. Id Probabilistæ libellis omnibus suis usque ad fastidium occinunt; in hoc præcipuum per se infirmissimæ causæ suæ firmamentum locant, atque hoc nomine in nostræ sententiæ defensores quasi in austeros conscientiarum non tam rectores, quàm tortores invehuntur. Etenim si in omnibus de peccato dubiis, quæ in scrupulosi formicare solent, tutiora sectanda sint; si nullus sit æctus omni vitio carens, cui non veritas præ-

luxerit, vel ut ait Scriptura, verbum verax præcellerit; si omnis æternæ & naturali legi contraria operatio eo ipso prava ac perversa sit; si legis naturalis nulla detur invincibilis ignorantia; si illud D. Thomæ pronuntiatum, *Quod sit contra legem naturalem semper est malum, etiamsi sit secundum conscientiam*, sit dogma nullis exceptionibus circumcissum, sed absolute generatimque amplectendum; si in sola sit veritate securitas, adeoque nec probabilis, nec probabilior segura dici possit, nisi sit vera: Ergo omnis prorsus probabilitas eliminanda erit, statuendaque certitudo quæ ad benè agendum requiratur, quod est nimia asperitate aggravare jugum Christi, imponere onera importabilia, & agendorum securitatem extra humanarum virium captum collocare. Ego contrà contendendo, nihil ad amovendos, evellendosque solide scrupulos aptius doctrinâ nostrâ, cui apud imperitos invidiam facere Probabilistæ connumerantur. Igitur operæpretium est quædam ex præscriptis à Patribus aphorismis spiritualia pharmaca apparare, quibus & scrupulosorum conscientiæ infirmæ medeamur, & simul ostendamus S. Thomæ Ethicam, sicut & Christianam, voluntatibus ægris & corruptis invisam, sanis & puris summè esse amabilem; quia arctam quidem viam indigitat, sed non inviam & inaccessam, & ut verbis Senecæ utar: *Ostendit beata vita magnitudinem, sed desperat, opera ejus non facit: sciens illam esse in excelso, sed volenti penetrabilem.*

In primis quid promptius quàm discernere inter honestum & utile, cùm etiam pueris & stupidis luceat æquitas, pudeat eos turpitudon

850 *Lib.VI. Dissert.III. Cap.II.*

Quid bonæ voluntati gratus & facilius quam tutioribus, & probabilioribus adhærere, donec veritas patefcat? Tantum enim abest, vagam Probabilistarum licentiam scrupulos sedare, quod potius illos revera auget. Quia Fratribus Minoribus dixit summus Pontifex superiori capite relatus, *ad tollendos graves conscientia remorsus tutioribus esse adharendum*; ita ad ingenerandas timoratis conscientia anxietates permit-tenda est eis minus tutarum sententiarum optio, quarum deinde dum cernunt falsitatem, majoribus exeduntur stimulis, quibus solidè pacandis sola veritas, sola tutiorum electio opportuna est. Verà enim pace, quam nemo tollet à nobis, quamve mundus dare non potest, fruemur, si veritatem seriò quæramus, si quæsitam feliciter inveniamus, si inventæ fideliter obediamus. Unde tutioris sententiæ delectus nedum gravis, anxius, & impossibilis est, sed facillimus & suavissimus; nec eum audent sequi homines, quòd difficilis sit, sed difficilem evasisse, quòd sequi non audeant.

Secundum scrupulosorum remedium est, quod si in sententiarum gravissimarum conflictu utrinque occurrat peccandi periculum, affirmantibus aliis opus sine peccato omitti non posse, contendentibus aliis sine peccato fieri non posse; quid opus erit facto viro bono hærenti, dubitanti, ambigenti, ut sedet remorsus, ut componas æstus tuos? Nonne anxia efficietur & scrupulis inquieta vita ipsius, cum ex duabus sententiis utra sit vera, perspicere nequit, definire non audet? Nequaquam, quia semper habet præsens, semper circumfusum divini Magistri lumen, ad quod si se convertat, si ejus lucem

precibus imploret, si viros doctos & pios, atque à probabilissimi effreni licentia abhorrentes consulat, si quâ potest diligentiam veritatem detegere studeat, vel veritatem nitentem videbit; vel si urgeat tempus & periculum sit in mora, habet in promptu remedium, eam nimirum sectando sententiam, qua ad veritatem magis credet accedere, magis à peccato recedere. Suadet enim ratio, iubet prudentia, hortatur charitas, ut sicut assensu & iudicio probabiliora ac tutiora minus probabilibus, minusque tutis semper præponimus, ita & præponamus affectu, præponamus & usu. Porro tunc in timore quidem operabitur, sed in illo tremore nihil sibi conscius exultabit, quia dum testatur animum se agere à studio & amore veritatis non alienum, tamen verebitur opera sua, trepidans ne in eis occulto aliquo errore displiceat: sed timor ille tam castus, tam filialis, sicut ab amore Dei, eiusque legis proficiscitur, non modò non turbat vel anxiat, sed magis recreat & solatur, ac pacem illam Dei, quæ exsuperat omnem sensum, dum comparitur, mens spiritualium charismatum abundantiam impinguatur.

Tertium remedium scrupulosa conscientia est huiusmodi: Licet minus tuta, minusque probabilis sententia in concursu probabilioris & tutioris non sit firma agendorum regula, quando minus tuta stat pro libertate contra legem, quia hoc ipso quod apparet minus probabilis, apparet magis falsa, seu propensior in falsitatem, unde illi hærrere nequit voluntas sine conscientia & veritatis contemptu; tamen si inter duas tutas sententias instituaturs comparatio, tunc non est necessario tutius eligendum, cum sup-



ponatur nulli inesse periculum, & tunc in fauorem scrupulosi benignior potest & interdum debet asperiori anteferri, vt inanes & superstitiosa eorum formidines fatuitatem aliquam resistentes, quæ in austeriora quæque, licet non semper veriora, magno impetu feruntur, depellantur, exuantque illud timoris, vbi non est timor, vitium quod illo quod vitare satagunt non raro deterius est. Quare sicut libertiniscordè duris, & in molliem ac indulgentiam propensis, cæteris paribus, seueriora consilia danda sunt, ita teneris & infirmis scrupulosorum conscientis mitiora indulgenda sunt, tutatamen: Quia contraria contrariis quidem, sed non noxiis curari debent, & quælibet indoles in extremum aliquo vitio vel imbecillitate detorta, in alteram partem contrariis est institutis reflectenda.

Quartum remedium est studium humilis, feruida, & quantum possumus continuæ orationis. Quia ignorantia juris naturalis, vt sæpe dictum est, & electionis imprudentia semper ex incuria quæsitæ veritatis, & cordis expurgandæ negligentia proficiscitur. Tum quia qui necessariam à Patrum lumine sapientiam postulat, id quod petit, nunquam non impetrabit ab eo qui dat omnibus affluenter, & non improperat; cum in hoc non solum Sanctos, non solum Apostolum Iacobum, sed etiam ipsam Sapientiam Patris, lumen de lumine, lucem mundi Christum Dominum fidei iussorem, quem mentiri impossibile est, habeamus. Quærite, inquit, & inuenietis; petite, & accipietis; pulsate, & aperietur vobis: Ergo qui non inuenit, qui non accipit, cui non aperitur, hoc ipso non petisse;

non quæsiſſe, non pulſaſſe conuincitur; vel ſaltem non tantum petiſſe, quantum res tanta petenda eſt, vel non eâ quâ par erat cordis munditie & caſtimonia quæſiſſe; vel non perſeueranti devotionis inſtantia pulſaſſe. Rectè Sylveſter verbo *Scrupulus*, ait: *Prima regula pro ſcrupuloſis eſt ut homo ſe præparet ad gratiam dolore præteritorum, cautela futurorum: ſecunda ſollicita ſacra Scriptura. indagatio: tertia eſt continuatio deuota orationis, quæ eſt optimũ remedium; ſed eo ſcrupuloſi parum utuntur, & malè.*

Quintum remedium eſt ſincera, prompta, & cæca adverſus Prælatum & animæ rectorem reverentia ac obedientia; ſi tamen talis ſit Rector, cuius vnus ſcopus ſit ut homines à noxiis cupiditatibus abſtrahat, ne quos dirigit pœnitentes prioribus ignorantia ſuæ deſideriis configurentur, & ipſi in omni converſatione ſancti ſint; cuius unum lumen ſit verbum Dei in Scriptura, traditione, Sanctorum moribus conſignatum; qui non ſubterfugiat puras & nudas Evangelii veritates omnibus annunciare; qui Magiſtrum ſuum Chriſtum in omnibus æmulari contendat; ut ſicut ejus perſonam ſuſtinet, ſic & in doctrina verax ſit, & viam Dei in veritate doceat. Qui talem Rectorem invenerit, theſaurum inveniſſe credendus eſt: illi ſe committat ſcrupuloſus, qui paſtoris ſui Chriſti vocem audire unicè vult, qui unam ſincerè cupit inire viam ætarnam ducentem ad vitam, qui de corde bono & optimo intelligere vult quæ ſit voluntas Dei bona, beneplacens, & perfectæ, non ut eam ad ſe detorqueat, ſed ut illi ſuam adjungat. Iſti, inquam, ſe credat, illum vitæ ſuæ moderatorem eligat: nam ex Chriſtiana prudentia & ſolida:

humilitatis regula potest quis privato judicio diffusus propriam deponere opinionem, ejusque judicio se subdicere, quem in doctrina Traditionis Patrum magis versatum, cœlesti lumine uberius perfusum, & divinorum experienciâ, & spiritus prudentiâ plenius senserit informatum. Tunc enim non libido laxitatis, sed discretio amorque veritatis illum movent, à quo fides illa ac justa persuasio illud ab ejus animo judicium elicit, opinionem illam eo esse probabiliorem, quo illum quem consulit, certò putat scientiâ veritatis instructiorem.

Fateor quidem semper suspectum, semper noxium esse varios adire Casuistas, donec inveniatur qui ad libitum respondeat, proferatque ex probabilitatis promptuario aliquas morum normas cupiditatibus suis utiliter congruentes, quibus libidinis gaudia timoris morsus non imminuat, amorem gustumque sæculi Evangelii severitas amarescens non interrumpat, sacram illam utilemque synterefeos punctiorem in mediis voluptatibus importunè vellicantem probabilitatis securitate detrahat, legemque Dei cum maximis mundi ita componat, ut placidè sæculi moribus vivat, dignitatibus, divitiis, voluptatibus, commodis lentus & otiosus perfruatur, & aliquo Probabilista sponfore de deliciis temporalibus transeat ad sempiternas. Licet, inquam, id suspectum sit, quia sola veritas, non probabilitas, vel probabilitatis commoditas ab inferno liberabit nos; & corrupti animi argumentum est velle sibi persuaderi, justum ac licitum esse quod expetit: tamen multos adire Doctores per se licitum est, non ut commodior & exoptatior, etsi minus probabilis, sententia eligatur, sed ut vera & probabilissima præferatur.

Sextum remedium est puri cordis simplicitas, qua dum in veritate simpliciter ambulamus, & Deum sincero corde quærimus, veritatem absque cavillorum ambagibus, vel subtilitatibus citò cognoscimus. Æquitas enim mundo & simplici cordi ferè semper per se lucet, & ad incorruptum de rebus judicium ferendum plurimum valet animus incorruptus. Sicut enim, ut sæpe diximus, cupiditatibus veluti nebulis tenebrosus fit oculus cordis, & affectuum præjudiciis animus occupatus veritatem mundis conspicuam sæpe non videt; quia intus existens prohibet extraneum, id est intentio animi non veritatem quærentis, sed cupiditatis securitatem, ab amore sui & utilitatum propriarum studio minime mundatus, arcanis quibusdam desideriis in secretioribus cordis recessibus retrusis præventus bonum malum, malum bonum dicit, idque deceptus sequitur, non quod divinæ consentit legi, sed quod internæ favet corruptelæ; non quod falli exertè velit, sed quia propter corruptum cupiditatibus animum, falsitatem accersit, non in actu signato, ut loquuntur, sed in actu exercito, seu ut magis Latine, nec minus verè Magnus Gregorius *lib. 15. Moral. cap. 25.* ait: *Hæc verba dicere vel stulti minime præsumunt; sed tamen perversi omnes id Deo non verbis, sed moribus dicunt.*

Itaque scrupulosus ubi nihil opus est, vereri non debet, nec timere ubi non est timor, sed ut docet Apostolus, *sapiens sit in bono, simplex in malo*: charitate foras mittat timorem, & legem Dei & Evangelii maximas absque apicibus, absque subtilitatum tricis observet, & dum in-fregisse se noscit, humilietur, sed non turbetur. In virtutum officiis inquirendis, dignoscendis,



frequentandis, augendis, acrem, diligentem, sagacem moderante prudentia se exhibeat, ut in omni data, & accepta occasione gloriam Dei promoveat: at verò in malo simplex sit, id est omne malum sincerè detestetur, peccatorum palliandorum artes horreat, remittendarum & inflectendarum legum subtilitates execretur, ipsa nedum comperta flagitia, sed omnem mali speciem, umbram, nomen ipsum quorundam peccatorum abominetur, & sic faciens, nisi sit fatuus, citò à scrupulorum anxietate liberabitur, & in studio serio veritatis gaudium plenum, quod nemo ab ipso tollet, inveniet.

Atque hinc etiam intelliges, quomodo in nostra sententia verum sit illud Servatoris, *Matth. 5. Iugum meum suave est, & onus meum leve*: & illud rursus 1. *Joan. 5. Mandata ejus gravia non sunt*. Tum quia insectantibus tutiora amor legis omnia efficit suavia, quia in eo quod amatur non laboratur, aut si laboratur, & labor amatur, ut docet Augustinus, addens mandata dura timori, dulcia esse amorì. Relege quæ priori tomo diximus de connexionione gratiæ efficacis cum rigida morali, ubi diximus novæ legis non in eo sitam esse suavitatem, quod legem Dei enervet, & probabilitatum compendio emolliat; sed quia quod jubet, dat diffusa per Spiritum sanctum omnipotentissima victricis adjutorii potestate, quæ legem carni amaram cœlestibus amœnitatibus temperatam reddit amabilem. Tum quia, ut antea dicebamus, tantum abest ex nostra doctrina præcepta Dei effici impossibilia & impervia, eo quòd difficile sit in omnibus veritatem invenire, quod potius contraria faciliora esse ex illo capite mandata contem-

do, qui satis est nosse quod nec pueri ignorant, quid sit honestum, quid justum, quod in dubiis incertis, & mixtis probabilibus est anteponendum. Quod principium si semel nutare concedimus, idololatria probabilis evadet, atheismusque securus, atque ab omni periculo peccati aut damnationis immunis, ut sæpe inculcavimus.

Septimum remedium est sincerus charitatis amor, quo Deum, divinaque diligimus & sapimus. Ut enim sæpe diximus, nec exhaustiri potest materia infinita, mirum in modum ad rectum de rebus efformandum judicium conducit dilectio, quam idcirco Apostolus supereminentem Dei scientiæ charitatem appellat. Hinc Dionysius *cap. 7. de divin. nom.* ait, *sapientiam esse divinissimam cognitionem secundum ignorantiam traditam, secundum unionem supra mentem.* Quia nimirum viri simplices & ignari, sed Deo charitate devincti, altissimum divinæ cognitionis experimentum habent, & pietate ascensiones in corde disponente, mens divinis illustrationibus perfunditur. Hinc idem Pater initio Theologiæ mysticæ Timotheum monet suum, ut *forti contritione sensus, & intellectus operationes derelinquat.* Hinc pulchrè Richardus Victorinus lib. de grad. charit. *Amor, inquit, oculus est, & amare videre est, quia ubi intellectus caligat, amor penetrat: intrat dilectio, ubi scientia foris est.* Hinc Bernardus ad Eugenium: *Ea (divina) non disputatio comprehendit, sed sanctitas.* Et rationem assignat S. Thomas 2. 2. *quest. 45. art. 2.* Quia de rebus divinis magis, saniusque judicamus per quandam connaturalitatem ad divina quæ patimur. Quæ passio amabilis, & connaturalitas optabilis



fit per charitatem, quæ nos unit Deo secundum illud Apostoli: *Qui adhæret Deo unus spiritus est cum illo.* Uade oritur rectum de divinis iudicium; qui enim habet perfectum habitum, si rectus est habitus, format iudicium rectum circa illa quæ pertinent ad illum habitum; si verò corruptus, falsum.

Maximè quia anima per charitatem Spiritui sancto coniungitur, fitque spiritualis: spiritualis autem homo iudicat omnia, & Spiritus omnia scrutatur, etiam profunda Dei. Ideo rectè monet Propheta: *Gustate, & videte, quoniam suavis est Dominus.* Et Bernardus serm. 79. super Cant. *Amor ubique loquitur. Si quis verò eorum quæ hîc leguntur, cupit adipisci notitiam, amet; alioquin ad audiendum, legendumque amoris carmen, qui non amat, accedit: quoniam non potest omninò frigidum pectus ignitum capere eloquium.* Et B. Catharina Genuensis amoris Dei igne decoro perfusa testabatur, quod si cœlites omnes sese eadem figurâ, iisdemque vestibibus sibi conspicuos redderent, & inter ipsos sponsus Christus iisdem tesseris indutus appareret, ipsum statim, tametsi oculis absconditum, cor agnosceret, suoque amoris pondere ad ipsum veluti centrum conaturaliter raperetur, tanta est amatum inter & amantem affinitas, cohærentia, atque ingénita propensio. Sanè si catellus dominum inter mille agnoscit etiam nocte, si agriculus inter oves gregis nullo signo discretas discernit matrem, quidni anima sancta & devota in dubiis emergentibus, in difficultatibus quotidianis veritatem amore quæret, amore pulsabit, amore inveniet? Recole præclara Patrum testimonia in altera appendice ad dissertationem præambu-

lam tomi 1. recensita ; & certò scias, casus conscientia te faciliùs unctiōe, quàm Casuistarum lectione decisurum. Et si contentio faciendā esset, & alterutrius iudicio standum in aliqua morali quæstione, vel hominis, siue mulieris Dei sincerè amantis, vel Probabilistæ cuiusdam, sexcenties malim ignari, vel ignaræ illius sententiæ acquiescere, quàm retorrīdo Casuistæ, quī suis distinctionum cavillis, non divinis Patrum luminibus res definit.

Porro sicut amor, & unctio docens omnia mentem illustrat, ut discernat & à falso verum, & à malo bonum ; ita exigit ut in controversiis semper tutiora & probabiliora sectemur ; lex enim christianæ charitatis, quæ est amicitia erga Deum, non solum parum percipit de infinita Dei perfectione gaudium, sed etiam eternam diuini numinis gloriam, eiusdemque mandatorum observantiam pro virili promouet, & curat. maximè verò violandæ amicitia pericula cauet. Quomodo autem etiam inter homines ille amici officio defungi censebitur, qui amore voluptatis, vel in fauorem libertatis ea agit quibus probabilius arbitratur amicitia necessitudinem violatam iri ? Certè amici nomine indignus esset, qui initum amicitia fœdus tam aperto periculo exponeret ; sed multò magis Dei amicitia injurius est, qui non saltem æquè diuino obsequio ac eius legis juribus attentus est, ac Deus ipse nostris commodis, & precibus benignus : Deus verò amans animas non minùs probabilia ad salutem media hominibus, sed tuta & tutissima præscribit, & effusissimè largitur.

Octauum remedium est discretio, quæ in cunctis præesse, & veluti eminere debet. Quæ virtus,

teste B. Antonio cæterarum est regina & condimentum, quia est moderatrix operum, ordinatrix affectuum, & doctrix morum, quâ sublatâ virtus vitium fit, ipsaque affectio naturalis in perturbationem magis convertitur, exterminiumque naturæ. Prohibet autem discretio, ne scrupulosi nimis super actus suos reflexionibus inaniter se torqueant, veteres Confessiones cupit animi tortura discutiant, sed quæ retro sunt obliviscentes, uni Deo indivulse juxta & suaviter cogitatu adhæreant, & affectu. *Sepe, inquit Magnus Greg. in Moral. dum nosmetipsos plus justo discutimus, de ipso discretionis studio indiscretius erramus, & mentis nostra acies quo plus cernere nititur, eo densius obscuratur quia qui importunè Solis radios aspicit, tenebrescit.* Exigit etiam, ut in virtutum praxi, & bonorum operum consilio & molitione supra conatum nihil aggrediamur, quia juxta tritum adagium: *Qui nimis cupit, parum stringit.* Unde ortum habet gravissimum illud, nec minùs necessarium christianæ vitæ præceptum, quo monentur infirmi, ne majora viribus audeant, nè se iis negotiis non vocati implicent, quæ variis sunt obnoxia tentationibus. Hinc Thomas à Kempis lib.3. cap.7. *Quidam incauti propter devotionis gratiam seipsos destruxerunt, quia plus agere voluerunt quàm potuerunt, non pensantes suæ parvitatæ mensuram, sed magis cordis affectum sequentes, quàm rationis judicium. Et quia majora præsumpserunt quàm Deo placitum fuerit, idcirco gratiam citò perdiderunt. Facti sunt inopes, & viles relictæ, qui in cælum posuerunt nidium sibi; ut humiliati, & depauperati discant non in alis suis volare, sed sub pennis meis sperare.* Unde sæpe advertimus plures initio scrupulosos.

& ferventes , deinde subleuandæ conscientiaæ specie in effrænem libertatem protendi, & spiritu incipientes carne consummari. Sic v.g. nonnullis nimis jejuniis, abstinentiis, & vigiliis corpus macerantes , ad illum debilitatis, infirmitatibusque statum rediguntur , ut mollem postea, ac delicatam vitam degentes , tantum à cruce abhorreant, quantum eam fervido prosequi amore videbantur.

Deinde postulat discretio, ut licet quando suppetit via tuta , & periculo prorsus vacua , tunc eligere eam teneamur, ne nos peccandi discriminè temerè , & imprudenter committamus ; tamen quando incidunt tempora, ut utrinque peccandi periculum urgeat, quod non rarò , aut infrequenter obvenit , tunc deposito scrupulo è duobus periculis minus est eligendum, & in eam debet se homo conferre partem , quam omnibus circumspectis judicat à peccato remotiorem, Nec propterea certitudinem physicam , aut metaphysicam, sed duntaxat moralem consequetur, quæ formidinem benè agendi compatitur ; cum in hac vita nemo sciat , utrum odio , vel amore dignus sit ; & expressè Sapiens moneat ; ut de propitiato peccato sine metu non simus. Hinc Sancti in huius vitæ caligine , etiam bonas actiones non nisi trepidè operantur , & quavis nihil sibi conscij sint , in hoc tamen se iustificatos non dicunt , veriti ne ipsa conscientiaæ suæ pax ex cordis cæcitate, vel occulti cuiusdam peccati vindicta à Deo inflicta proveniat , quam sibi peccando accesserint. Sæpè enim mens sibi ipsi blanditur, suamque indignitatem intelligere non valens, mitius de se , indulgentiusque opinatur. *Et si*, inquit Magnus Gregor. in 1. Reg.

rum) me deprimit, tui meriti me manus levet. Unde non mihi levis causa timendi, quod sim docens, & non faciens, quod pietatem & tutiora lectoribus instillans, iis me vacuum cerno quæ aliis exopto, similisque fio ( comparatio est ejusdem Magni Gregorii 3. part. Pastor. admon. 11.) stultis spectatoribus ludicarum artium, quibus histrionum vanitas placet; nec tamen tales esse desiderant, quales illos conspiciunt esse, quos laudant: mirantur eos placita egisse, sed tamen devitant similiter placere. Sic ego planè, sic lectores meos ad pietatem ciere, ad tutiora permovere studeo, & illa omnia quæ cæteris aveo, abesse à me desleo, & sincerè profiteor. Justo ergo timore configo carnes meas, & cor meum; quia dum à defensione legis Domini lingua & calamus meus non cessant, factis tamen non exequor, quod approbo impellente veritate; & tamen cum omnibus sanctis Ambrosius testatur serm. 23. *Quoniam dictis facta priora sunt, imò sine factis dicta nihil prosunt; sine bono opere, verborum est inutilis; & superstitiosa jactatio; melius docemur facto, quam voce. Sancti etsi voce tacent, factorum virtute nos edocent; etsi lingua silent, passione persuadent.* Faxit Deus, ut eam cordis castimoniam tandem assequar, quæ & veritatem nudam percipiam, & perceptam executioni mandem, ne ore meo iudicer servus nequam gravius extremâ ultione feriendus, cui placuit quod imitari heu nimium! Hactenus detrectavi. Cæterum desperatum meum peccatorum morbum non suspicor, quia infirmitas cognita est semisanata, & juxta laudatum Ambrosium in Psalm. 118. *Bona trepidatio à verbis Dei; qui enim trepidat à verbis Dei, postea exul-*

*eat in verbis Dei.* Sed quidquid sit, ut phrasi Hieronymi utar, dicat quisque quod volet: ego loquutus sum secundum conscientiam meam, quanvis videns meliora probansque, deteriora interdum sequar; scio tamen mihi tutiorum sequelam & nocuisse intermissam, & profuisse repetitam. Caterùm pro susceptis, suscipiendisque majoribus laboribus & vigiliis solatium, Lector amantissime, mihi tuæ orationis impende, *in qua recompensatione* (verba sunt Gregorii in epilogo Moral.) *Lector meus me superabit, si cum per me verba accipit, pro me lacrymas reddat.*

*F I N I S.*

